


# I Fiyowe Uret



New Testament in Tiruray

I Fiyowe Uret  
New Testament in Tiruray

copyright © 2002 Wycliffe Bible Translators, Inc.

Language: Tiruray

Translation by: Wycliffe Bible Translators

Contributor: Wycliffe Bible Translators, Inc.

**Copyright Information**

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9718260234

The New Testament

in Tiruray

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2015-03-17

---

PDF generated using Haiola and XeLaTeX on 4 Mar 2019 from source files dated 1 Mar 2019  
b0fb0c95-f209-5a97-9de8-b336c1289708

## Contents

Mateo . . . . .	1
Markos . . . . .	48
Lukas . . . . .	77
Juan . . . . .	123
Apl . . . . .	157
Roma . . . . .	201
1 Korinto . . . . .	221
2 Korinto . . . . .	241
Galasia . . . . .	254
Efeso . . . . .	261
Filipos . . . . .	268
Kolosas . . . . .	273
1 Tesalonika . . . . .	278
2 Tesalonika . . . . .	283
1 Timoteo . . . . .	286
2 Timoteo . . . . .	292
Tito . . . . .	296
Filemon . . . . .	299
De Judio . . . . .	301
Santiago . . . . .	316
1 Pedro . . . . .	321
2 Pedro . . . . .	327
1 Juan . . . . .	331
2 Juan . . . . .	336
3 Juan . . . . .	337
Judas . . . . .	338
Kéfégétigan . . . . .	340

## I Fiyowe Uret Sénulat Mateowe

Been i niy Fiyowe Uret sénulat Mateowe fantag bé Jesu Kristowe. Sénulat Mateowey de ténero Jesus, sani Nga i Tuluse, brab de mémégaif do rénigo no. Sénulat Mateowe soy Jesuse, Been i “Kristowe”. I atag i “Kristowe”, sani fénémili i Tuluse méguléw. Bé do gétah, ménongot-ongot i de Judio bé kégumah i fénémili i Tuluse méguléw. Ménongot-ongot ro non bé do gétah wén i de sénarigoy Tuluse muret bé kékérén ne, bénréh roy wén i gérumahe ségétew fénémili i Tuluse méguléw bé de Judio. Fénggétiga Mateowey ni étew bé Beeney Jesuse, sani “Kristowe”.

Endob i de odoroy de Judio, méndaléw ro fo bé Jesuse brab ménrarék ro de. Mélaw nongot ro bé de gémamak kukuman, sani méguléwe tidéw dob ingéde Roma, bé féléhuén i Jesuse. Endob amun ménléhuén i Jesuse dob kruse, brab amun ménlébengén, méntebule. Mélaw tintu gétiga tom bé i Jesuse Beene foy tintuwe Nga i Tuluse.

I Mateowe, sani séménulate bé ni Fiyo Uret, ségétew so bé de kuyug Jesus amun ménbati sénay Jesuse dob duniyae ni. Mélaw gétiga tom bé i kéluhanay do sénulatén toow fo toow.

### *I de katufua Jesu Kristowe*

<sup>1</sup> Ay niy de dawét i de katufua Jesu Kristo, sani ségétéwe séfu Datu Dabide séfu Abraham. <sup>2</sup> I Abrahamey boh Isake. Atin i Isakey boh Jakobe. Atin i Jakobey boh Judahe brab de dumo no sétiman boh. <sup>3</sup> Atin i Judahey boh Farese brab Sarawe. (Tamar i idéng ruwe.) Atin i Faresey boh Esrome. Atin i Esromey boh Rame. <sup>4</sup> Atin i Ramey boh Aminadabe. Atin i Aminadabey boh Nasone. Atin i Nasoney boh Salmone. <sup>5</sup> Atin i Salmoney boh Boose. (Rahab i idéng ne.) Atin i Boosey boh Obede. (Rut i idéng ne.) Atin i Obedey boh Jesewe. <sup>6</sup> Atin i Jesewey boh Datu Dabide. Atin i Dabidey boh Solomone. (I idéng ne been i bawag Uriase bé do gétah.) <sup>7</sup> Atin i Salmoney boh Roboame. Atin i Roboamey boh Abiase. Atin Abias i boh Asawe. <sup>8</sup> Atin i Asawey boh Josefate. Atin i Josefatey boh Jorame. Atin i Joramay boh Osiase. <sup>9</sup> Atin i Osiasey boh Jotame. Atin i Jotamey boh Akase. Atin i Akasey boh Esekayawe. <sup>10</sup> Atin i Esekayawey boh Manasese. Atin i Manasesey boh Amone. Atin i Amoney boh Josiase. <sup>11</sup> Atin i Josiasey boh Jekoniase brab de dumo no sétiman boh. Kéluhana ro mén-uwit mangéy dob méravue ingéd féndawét Babilonia amun ténabanan i karowe ingéd bé girawe. <sup>12</sup> Amun diyo ron bati dob Babilonia, i Jekoniase wén i ngaén féndawét Salatiel. Atin i Salatieley boh Sorobabele. <sup>13</sup> Atin i Sorobabeley boh Abiude. Atin i Abiudey boh Eliakime. Atin i Eliakimey boh Asore. <sup>14</sup> Atin i Asorey boh Sadoke. Atin i Sadokey boh Akime. Atin i Akimey boh Eliude. <sup>15</sup> Atin i Eliudey boh Eleasare. Atin i Eleasarey boh Matane. Atin i Mataney boh Jakobe. <sup>16</sup> Atin i Jakobey boh Josehe, sani bawag Mariahe. Atin i Mariawey idéng Jesuse féndawét Kristo non Been i fénémili i Tuluse méguléw. <sup>17</sup> Mélaw folo bra fot gékansad i de katufuan tidéw dob Abrahame taman dob Dabide. Atin tidéw dob Dabide taman dob gaiwe mén-uwit i de Judio mangéy Babilonia folo bra fot so gékansad i de katufuan. Atin tidéw béno taman bé kéumah Kristowe folo bra fot so gékansad i de katufuan.

### *I kéumah Jesu Kristowe*

<sup>18</sup> Ay ni urete fantag bé kéumah Jesu Kristowe. I idéng ne Maria. Atin i Mariahe télnaana nén fébwagén dob ségétéwe lagéy féndawét Jose. Endob amun énda séna sébawag ro de, ménwaléy obor i Mariahe non fénobor i Rémoor i Tuluse. Enggétiga Mariahey ni. <sup>19</sup> Atin i Josehe, métintu étew, mélaw ménika sébawag bé Mariahe non oborén. Endob fiyo étew i Josehe, mélaw mika de ké kékalan i Mariahe. Mélaw ménuyot i Josehe de ké sérontos bé Mariahe sékémén saén. <sup>20</sup> Dob lala Josehe mégitung fantag bé de ni, méntefégitoy téakiwe tidéw dob Kadnane dob téginéf ne. Ménbéréh i

télakiwe ni mano, “O Jose, séfu Datu Dabid, kago magalang-galang mawag bé Mariahe, non i funa nuwe mén-obor sabaf bé barakat i Rémogor i Tuluse. <sup>21</sup> Mégénga moso i Mariahe ségétew nga lagéy. Atin fédawétém Jesus, non Been i mémukase bé de étewén dob de sala ro.” Been i bénréh i télakiwe.

<sup>22</sup> I funane ménrigoy kéluhanay de ni inok métuman i fénbérén i Kadnane bé sénarigo nuwe étew mano, <sup>23</sup> “I kénogone waléy obor, brab mégénga nga lagéy, atin fédawétén Emanuel.” (I atag i dawéte Emanuel “Bati i Tuluse dob betome.”)

<sup>24</sup> Tidew béno, énggétékénal i Josehe, atin nunuro noy fémandu i télakiwe de, mélaw bénawagén i Mariahe. <sup>25</sup> Endob énda ménstifon ro fidong taman énda séna mumah i nga ne. Brab amun ménmahén, féndawétén Jesus.

## 2

### *I kégumah i de gétuwan étew*

<sup>1</sup> I Jesuse ménmah dob ingéde féndawét Betlehem dob sakuf i dakéle ingéd féndawét Judea, amun Herod sénay méguléwe de. Atin énda mérugayén tidew bé kéumah Jesuse, wén i de gétuwan do étew tidew dob mérugue ingéd dob sébangan ménagéw ro mangéy dob ingéde Jerusalem. I de ni do lagéy furung gésobut bé de tanda dob de gitoon. <sup>2</sup> Atin amun énggumah ro dob Jerusalem, ménenginsa ro maro, “Hon i gonoy Ngae, sani waléye moso Datu i de Judio? Non énggito gey i gitoone dob sébangan tanda i kéumah ne. Atin mélaw angéyé key féngadafén.”

<sup>3</sup> Atin i Herode méguléw, amun énggelingoo noy fantage bé ni ségiyo datu, toow fo ménbuku, brab beroy de kéluhanay de étew bati dob Jerusalem. <sup>4</sup> Mélaw lénimud Herodey kéluhanay de odoroy de fadi brab de témore bérén i de Judio, atin ménenginsa dob berowe mano, “Hon i gonoy umaha Kristowe de, sani fénemili i Tuluse méguléw?”

<sup>5</sup> Atin séménbul ro maro, “Fatut mumah i Kristowe dob ingéde Betlehem dob sakuf i dakéle ni ingéd Judea. Non been i niy sénulat i sénarigoy Tuluse muret bé kékérén ne mano, <sup>6</sup> ‘I beeme, o Betlehem, dob dakéle ingéd Judawe, tintu békén go toow na fo gérifantad bé kéluhanay de ingéd dob Juda. Non tidew dob beeme moso i odorone méguléw bé de étew gu do Judio.’”

<sup>7</sup> Tidew béno, féntawag Herodey de ni gétuwan do étew tidew dob sébangan mangéy sélimud dob beene énda i ségiyo étew de gétigan. Atin fénenginsaa no bero kékérén tintuwe gai énggito roy gitoone ni. Amun énggétiga Herode, <sup>8</sup> sénuguén bero mangéy Betlehem mano, “Agéw gom, toow gom fo sélé i Ngao no. Atin buluk gito gom, fégétiga kom begén inok angéyé ku so féngadafén.” <sup>9-10</sup> Tidew béno, amun énggelingoo roy bénréh Datu Herode, ménagéw ro. Atin énggito ro man i gitoone ni, sani gitoone so énggito ro dob sébangane bé gétahe. Toow ro fo ménoror amun énggito ro. Atin i gitoone ni ménagéw métah bero taman témenrén dob gatagay gonoy Ngae ni. Atin ménfuray ro bé gitoone ni taman dob no lawi. <sup>11</sup> Amun énggumah ro diyo, ménahur ro brab énggito roy Ngae ni brab Mariahe idéngén. Atin ménlingkuwé ro dob adafay Ngae ni ménadaf de. Tidew béno, bénungkal roy de balilaga tamuk nuwit ro do bélwon, do dukah, brab do fégéféamut féndawét mira. Atin niray ro dob Jesus.

<sup>12</sup> Tidew béno, i Tuluse féningatén bero dob téginéf ruwe bé békénén séfule ro mangéy dob Datu Herode. Mélaw ménule ro mangéy dob karowe ingéd dob ségiyowe aguwon.

### *I kéférény ruwe mangéy Egipto*

<sup>13</sup> Amun ménagéw i de ni gétuwan do étew, ménfégíttoy télakiy Kadnane dob Josehe dob téginéf ne. Atin bénréhén dob Josehe mano, “Tek go, brab uwitén i Ngae brab idéng ne méraréy mangéy dob ingéde Egipto. Atin bati gom diyo taman béréhé ku beem kékakay gomén mule. Non i Datu Herode séléde noy Ngae ni inok féléhué no.”

<sup>14</sup> Mélaw méntek i Josehe fiyon fo kékérara kélunganon, atin nuwitén i Ngae ni brab idéng ne mangéy Egipto. <sup>15</sup> Atin ménbati ro diyo taman béréhé Herode. Ménrigoy ni

inok métuman i fénbéréh i Kadnane bé sénarigo nuwe mano, “Ténawag guy Nga guwe inok mésut tidéw Egipto.”

<sup>16</sup> Endob i Herode, amun énggétiga noy fénggakaray de gétuwan do étew tidéw sébangan, toow fo ménkérít. Mélaw sénuguén i de sundalo mangéy Betlehem brab dob de ingéd géliwét de, inok féléhué roy kéluhanay de nga lagéy tidéw ruwo gébélantuwa i idad ne mangéy fantad. I Herode énggétiga noy idad i Ngae ni sabaf bé kékéréh i de gétuwan do étew bé gaiwe ménsut i gitorno no.

<sup>17</sup> Mélaw méntuman i ménrugayén kékéréh i ségétéwe sénarigoy Tuluse muret bé kékéréh ne féndawét Jeremias mano, <sup>18</sup> “Wén i émbéréhe énggelingoon dob ingéde Rama, kémérew brab rémuung. Non kémérew i Rakelé sabaf bé de ngaén. Enda i géfedoror de non i kéluhanay de ngaén ménléhu.”

### I késéfule ruwe mangéy Nasaret

<sup>19</sup> Amun ménléhu i Datu Herode, i télakiy Kadnane méntefégitob Josehe dob Egipto dob téginéf ne. <sup>20</sup> Atin ménbéréh i télakiwe ni mano, “Tek go brab uwitém i Ngae ni brab idéng ne mule mangéy dob ingéde Israel. Non ménléhuén i de méméléhu damén bé Ngae ni.” <sup>21</sup> Mélaw méntek i Josehe atin nuvitén i Ngae brab idéng ne mule mangéy Israel.

<sup>22</sup> Endob énda ménbati ro dob Judea non ménggilak i Josehe non énggelingoo noy Arkelaowe ménwaléy méguléw amun ménléhu i boh ne Datu Herod. Atin féninatén man i Josehe dob téginéf ne, mélaw ménlaus ro mangéy dob sakuf i dakéle ingéd féndawét Galilea. <sup>23</sup> Atin ménbati ro diyo dob ingéde féndawét Nasaret. Mélaw méntuman i ménrugayén kékéréh i de sénarigoy Tuluse muret bé kékéréh ne maro, “Fédawétén i Kristowe ‘ségétew tidéw dob Nasaret.’ ”

## 3

### I kéuret Juan Bautistawe

<sup>1</sup> Bé no do gai, amun ménifus i firoye gébélantuwa, i Juan Bautistawe énggumah dob gonone énda i étew de bati dob sakuf i dakéle ingéd Judea. Atin nureténi mano, <sup>2</sup> “Kailanga kom gésénule bé de sala gom brab témagak bé de tete adat gom non gédétén gumah i gaiwe méguléw i Tuluse dob de étewén.” <sup>3</sup> I Juane ni, been i bénréh i méntelatae sénarigoy Tuluse muret bé kékéréh ne féndawét Isaias mano, “Wén i ségétéwe mékes dob gonone énda i étew de bati mano, ‘Tafay gom i aguwoy Kadnane. Fééntang gom i aguwo nuwe.’ ”

<sup>4</sup> Atin kéménégal i Juane nawél buk dakél binatang féndawét kameliyo, brab kulit binatang i légét ne. Atin i amaé nuwe kasuk brab téné. <sup>5</sup> Atin ménangéy dob beeney médoowe do étew tidéw Jerusalem, brab tidéw dob kéluhanay de ingéd sakuf Judeawe, brab de étew bati dob de ingéd gédét dob wayége Jordan. <sup>6</sup> Atin amun fénayag roy de sala ro, bénautis Juane bero dob wayége Jordan.

<sup>7</sup> Atin médooy soy de Fariseo brab de Saduseo ménangéy dob Juane inok fébautis ro. Endob amun énggito no bero, ménbéréh i Juane mano, “I begome maak do ulé gom non tete i de rigoné kom. Sedek mangéy gom dini? Enda géféraréy gom tidéw dob kékukum i Tuluse moso ké fébautis gom saén. <sup>8</sup> Buluk toow gomén gésénule bé de sala gom brab téragom gom i de tete adat gom, féténgténg gom i kégésénule gome bé de fiyo ula-ulane kom. <sup>9</sup> Atin kagom fégitungén de ké i Tuluse fukasé no begom dob de sala gom sabaf bé begom i de séfu Abraham. Bérhéku begom, fakay géféléyoy Tuluse séfu Abrahamey de batéw ni. <sup>10</sup> Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibérén dob aféye inok métuwé. <sup>11</sup> I begéne, bautiso ku begom bé wayége inok fégito gom énggésénule gom bé de sala gom. Endob wén nay gégumah géttundug begén brab bautisé no begom bé Rémogor i Tuluse brab aféye. Toow na fo gérotor bé begéne. Fiyon foy safatos ne, énda médaïtu de mibit. <sup>12</sup> Féganané noy de fiyo étew bé de tete étew ségiléw bé ségétewé métof. I fégéetof ne diyo dob kémér ne inok fégéetofén

bé énrek ne brab fégétimuén bé faréye dob kiwot ne. I de ukofén tuwégé no dob aféye énda émfandaén.”

### *I kébautise bé Jesuse*

<sup>13</sup> Bé no do gai, ménagéw i Jesuse tidéw Galilea mangéy dob wayége ni Jordan. Atin ménfégédét dob Juane inok fébautis de. <sup>14</sup> Endob géléé Juane damén mano, “Begéney fatute bautiso mo, sedek Beem uman i mangéy fébautis begén?”

<sup>15</sup> Endob séménumbul i Jesuse mano, “Fédayaém saén béeleewe ni. Non fatut rigoné toy kéluhanay kétayay Tuluse.” Mélaw ménagayun i Juane.

<sup>16</sup> Atin amun ménbautisén i Jesuse, géménaun tidéw dob wayége. Sonom béo, ménungka i lawayo, brab énggito noy Rémogor i Tuluse ménlus maak marafati brab méntérimféna dob Beene. <sup>17</sup> Atin wén i ménbérhé tidéw dob lawayo mano, “Been i niy Nga guwe. Toow fo kégédawa ku brab tintu késuwata ku.”

## 4

### *Ténéngkad Satanasey Jesuse*

<sup>1</sup> Tidéw béo, i Rémogor i Tuluse fénanangguvitén i Jesuse mangéy dob gonone énda i étew de batí, inok i odoroy de saitan féndawét Satanas géténgkada noy Jesuse rémigo tete. <sup>2</sup> Atin amun diyo i Jesuse, énda ménamaén bé rugay i ménfote folo gétérésangan. Mélaw toow fo ménlayaf. <sup>3</sup> Atin énggumah i Satanase dob Beene brab ménbérhé mano, “Amuk Beemey Nga i Tuluse, féwaléyém amaén i de batéw ni.”

<sup>4</sup> Endob séménumbul i Jesuse mano, “Wén i Ménsulate Kébérhé i Tuluse mano, ‘Békén amaén saén i funay étewe méuyag. Yamula kailangay étewey kéluhanay kébérhé i Tuluse.’”

<sup>5</sup> Tidéw béo, nuwit Satanasey Jesuse mangéy dob Jerusalem brab nuvitén mangéy dob toowe fo gérotor bérungoy lawi i Tuluse. <sup>6</sup> Atin ménsebérhé man bé Jesuse mano, “Amuk Beemey Nga i Tuluse, antéfor go. Non wén i Ménsulate Kébérhé i Tuluse mano, ‘Suguéy Tulusey de télaki no démiyaga Beem. Brab sakémé ro Beem inok énda émfali go bé de batéw, fiyon i de sékéyém.’”

<sup>7</sup> Tidéw béo, séménumbul i Jesuse mano, “Endob wén soy Ménsulate Kébérhé i Tuluse mano, ‘Kago téngkadén i Kadnane Tulusém rémigo bé kétaya muwe rigonén.’”

<sup>8</sup> Tidéw béo, nuwit Satanasey Jesuse mangéy dob uruk i gérotore fo tuduk. Brab fénténgténgén dey kéluhanay de ingéd dob duniyae ni brab kéluhanay de ungangéy de ni. <sup>9</sup> Atin ménbérhé man i Satanase mano, “Buluk lingkuwédo mo begén brab féngadafé mo begén, iray gu Beem i kéluhanay de ni.”

<sup>10</sup> Endob séménumbul i Jesuse mano, “Féraréy gon Satanas! Enda féngadafé ku beem non wén i Ménsulate Kébérhé i Tuluse mano, ‘Lingkuwéd go saén dob adafay Kadnane Tulusém. Been saén i féngadafé muwe.’”

<sup>11</sup> Tidéw béo, i Satanase téngakén i Jesuse. Atin énggumah i de télaki brab ténalima roy Jesuse.

### *Féngganay Jesusey galbék ne*

<sup>12</sup> Atin i Herode fénféférisu noy Juan Bautistawe. Atin amun énggelingoo Jesuse, ménule mangéy Galilea. <sup>13</sup> Atin téménara saén dob ingéd ne Nasaret, brab ménangéy batí dob Kafernaum dob fédoror i dogote Galilea, fingé dob ingéde Sabuton brab Neftali.

<sup>14</sup> Ménrigoy ni inok métuman i kékérhé i sénarigoy Tuluse féndawét Isaias mano, <sup>15</sup> “I de étew batí dob de ingéd Sabuton brab Neftali, brab fingé dob dogote, brab dob difar i wayége Jordan, brab de étew békén Judio batí dob Galilea, <sup>16</sup> fiyon fo ké i de ni étew maak batí ro dob délémone non békén ro do méngrintulus, gégito ro dakél solo. Atin fiyon fo ké maak kélunganon dob berowe non mégilak ro bé kéléhue, rémendaw i soloe ni dob berowe.”

<sup>17</sup> Atin tidéw bé no gai, féngganaya Jesusey kéuret ne mano, “Fatut gésénule gom bé de sala gom brab tagak gom i de tete adat gom, non gédétén i gaiwe féguléwoy Tulusey de étewén.”

*Ténawag Jesusey de fot gétew fatatugés*

<sup>18</sup> Wén i no sébaan fuweh, ménagéw i Jesuse dob doror i dogote Galilea. Atin bé lala ne magéw, énggito noy ruwowe gétew lagéy sétiman idéng. I dawét ruwe Andres brab Simon (féndawét so Pedro). Nibér roy biyala ruwe dob dogote non fatatugés ro.

<sup>19</sup> Ménbéréh i Jesuse dob berowe mano, “Enggomén, odor gom Begén, atin kagomén séméléd sédo. Tidéw béléewe ni, fésélédé ku begom étew, inok modor ro so Begén.”

<sup>20</sup> Sonom béno, ténagak roy de biyala ro atin ménodor ro bé Jesuse. <sup>21</sup> Bé lala ruwe magéw, énggito Jesusey de ségiyo lagéy do sétiman idéng. I dawét ruwe Santiago brab Juan. Diyo ro dob awang ruwe beroy boh ruwe féndawét Sebedeo. Fégimué roy biyala ruwe. Atin ténabar Jesuse bero. <sup>22</sup> Atin sonom béno, ténagak roy boh ruwe dob awange atin ménodor ro bé Jesuse.

*Nuwa Jesusey de médo do étew*

<sup>23</sup> Atin i Jesuse séménugud mangéy dob kéluhanay de ingéd dob Galilea. Atin témenoro dob de lawi féngadafan kay de Judio, brab nureténi Fiyowe Uret fantag bé kékéfugléw i Tuluse, brab nuwaén i de démeruun do séségiyo-giyo do déruun. <sup>24</sup> Atin, ménslalag i bantuga Jesuse dob kéluhanay de ingéd dob Siria. Mélaw i de étew nuwit ro mangéy dob Beeney kéluhanay de démeruun bé séségiyo-giyye do déruun, do démawét, brab do rénahuko saitan, brab do rebengén, brab do kimoyén. Atin énggféadi-adino Jesuse bero kéluhanan. <sup>25</sup> Atin toow fo médooy de étew ménfuray bé Jesuse, do tidéw Galilea, brab do tidéw Dekapolis (i atag i Dekapolis “Do Folo Ingéd”), brab tidéw Jerusalem, brab tidéw Judea, brab tidéw dob difar i wayége Jordan.

*I urete dob burure*

<sup>1</sup> Atin i Jesuse amun énggito noy médoowe do étew ménlimud, ménénagé mangéy dob burure, atin ménstar diyo. Atin i de kuyugén ménfégédét ro dob Beene. <sup>2</sup> Atin ténero Jesuse bero mano, <sup>3</sup> “Moror i de étew gétiga ro énda gérigo ro fiyo saliyu ké tabangay Tuluse bero, non féguléwoy Tuluse bero. <sup>4</sup> Moror i de étew rémuung, non i Tuluse féfioné noy de fédew ro. <sup>5</sup> Moror i de térfantad étew non gédoté roy ati fénasad i Tuluse. <sup>6</sup> Moror i de étew toow fo méuyot ro rémigo bé kétayay Tuluse, non tabangay Tuluse de bero inok gérigono ro. <sup>7</sup> Moror i de étew mégédaw bé de ségiyo étew, non mégédaw i Tuluse bero. <sup>8</sup> Moror i de étew malinis i de fédew ro dob adafay Tuluse, non gito roy Tuluse moso. <sup>9</sup> Moror i de étew do gémélé bé de sétiboh étew, non fédawétén ro do nga i Tuluse. <sup>10</sup> Moror i de étew férasayén sabaf bé kétintuy adat ruwe dob adafay Tuluse, non féguléwoy Tuluse bero.

<sup>11</sup> “Moror gom ké féngirasén gom brab férasayén gom brab béréhon gom tete bé kéluhanay tugie sabaf bé kéunur gome Begén. <sup>12</sup> Féguaya gom bé no gai gégumah, non i baras gome toow fo médooy diyo dob lawayo. Non loo so bé niy kékérasay i de étew bé do énggétah do sénarigoy Tuluse muret bé kékérah ne.”

<sup>13</sup> Atin féntaus Jesusey kétoro ne mano, “I begome ségiléw gom bé timuse lénawék dob amaéne inok fiyoy nonom ne. Non sabaf bé begome, waléy fiyoy de étew dob duniiae ni. Endob amuk mékédan i kétasik i timuse, éndaén géséfule i kétasik ne. Endaén i lagaén, brab fatut ibérén brab gédaa de étew ké témara ro.

<sup>14</sup> “Atin i begome ségiléw gom bé soloe rémendaw dob délémone ni duniya. Loo so bé ni, i ingéde féntindég dob uruk i burure, énda ménbunéyén. <sup>15</sup> Atin énda i ségétew tumumon solo inok ahuré no dob fénléngkébé kuréng. Yamula fédioé no dob fédongone de inok rémendaw dob lawie. Mélaw gégitoy kéluhanay de étew diyo. <sup>16</sup> Mélaw ségiléw gom bé de solo, non fatut rigo gom i fiyowe sénga tékélid, inok i de étew gito ro, atin dayewé ro mélaw i Abay gome Tuluse dob lawayo.”

<sup>17</sup> Atin féntaus Jesusey kétoro ne mano, “Kagom fégitungén de ké ménangéyu dini inok kédané kuy kitabé niray Moisese taloo noy de kétoro i de sénarigoy Tuluse muret bé kébéréh ne. Non énda ménangéyu dini inok kédané ku, yamula ménangéyu dini inok tumané ku. <sup>18</sup> Bérhéhé ku begom i toowe, taman énda méalfa i duniyae ni brab lawayo, énda so mékédan i kitabe, fiyon kloh saén, taman énda métuman i kéluhanane. <sup>19</sup> Mélaw i étewe mémélis bé kitabé fiyon fo ké toow saén fo kloh sugu, brab toroé no so dob de étew i éndaén kailanga no odoron, toow na fo gérifantad bé de étew féguléwoy Tuluse. Endob i étewe modor bé kitabé brab toroé noy de étew bé fatut odoro ro, toow fo gérotor bé de étew féguléwoy Tuluse. <sup>20</sup> Bérhéhé ku begom, amuk énda toow na fo métintuy de rigoné kom bé de rigoné de Fariseo brab de témoreo bé kitabe, énda géahur gom dob kéféguléw i Tuluse.”

#### Fantag bé kékéríte

<sup>21</sup> Atin féntaus Jesusey kétoro ne mano, “Enggélingoo kom i ténero i de katufua kom maro, ‘Kagom méméléhu, atin i méméléhue fatut mékukum.’ <sup>22</sup> Endob toroé ku begom béléewe ni: I étewe mékérít bé dumo nuwe, mékukum. Atin amuk wén i étew bérhéhé no, ‘Léngléngén go’ dob dumo nuwe, fatut mékukum dob adafay de kénéfédewan. Atin amuk wén i étew émbéréh dob dumo nuwe mano, ‘Dufang go’, médait mangéy dob gonoy aféye dob uleono emferno. <sup>23</sup> Mélaw amuk diyo go dob féngadafane témulak dob Tuluse, atin gétédémo mo wén i rénigo mo sala dob dumo muwe, <sup>24</sup> tagakém nay tulaké muwe dob adafay ahayane tulakan, atin fagayas go angéy dob dumo muwe brab séfiyo gom inok éndaén tete i de fédéw gom. Tidéw béo, séfule go brab irayém i tulak me dob Tuluse.

<sup>25</sup> “Atin buluk wén i dumo mo sébanil beem, atin uwité no beem dob kémukume inok sétiyawan gom, buluk diyo gom séna dob de aguwon, bérhéhé go fiyo inok géséfagayun gom, brab éndaén mélaw kailanga kom i, mangéy dob adafay kémukume. Non amuk Enda, atéé no beem dob kémukume, brab i kémukume atéé no beem dob de sundalo, brab i de sundalo férisuné ro beem. <sup>26</sup> Atin bérhéhé kuy toowe, énda moso géésut go tidéw dob férisunone taman énda gébayada moy kéluhanay késalaa muwe.”

#### Fantag bé kélamfae

<sup>27</sup> Atin féntaus Jesusey kétoro ne mano, “Enggélingoo kom i kétoroe mano, ‘Kago sétayan saliyu bé bawag me.’ <sup>28</sup> Endob toroé ku begom béléewe, bé fiyon fo ké téneungténg i lagéye saén i libune brab mingar de sétayan, énggésalaén non maak léménamfa i fédéw ne. <sup>29</sup> Mélaw amuk i funa muwe mésala i moto muwe fingé kuwonon, lésitém atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno. <sup>30</sup> Atin amuk i funa muwe mésala i kuwonone kémérém, kéléngém, atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno.”

#### Fantag bé késégélake

<sup>31</sup> Atin féntaus Jesusey kétoro ne mano, “Wén soy kétoroe mano, ‘I lagéye gémélak bé bawag ne fatut iraya no bé sulate émbéréh ménségélak ron.’ <sup>32</sup> Endob toroé ku begom béléewe, amuk wén i ségétew lagéy gélaké noy bawag ne éndob énda mon bigaén i ni libun, toow fo ménfsala i nan lagéy. Non been i ménfsala bé libuno no ké mawag man ségiyo lagéy. Atin énggélamfa soy lagéye ménawag bé libune gélak loo bé nan.”

<sup>33</sup> Atin féntaus Jesusey kétoro ne mano, “Enggélingoo kom soy ténero i katufua tome mano, ‘Amuk sémafa go dob Kadnane, tintu kailanga mo tumanén i safá me ni.’ <sup>34</sup> Endob toroé ku begom béléewe, amuk rémigo gom fasad, kagom sémafa. Kagom fégésafa i lawayo non been i niy saray Tuluse. <sup>35</sup> Atin kagom fégésafa i duniyae ni non been i niy ténaa nuwe bé de sékéyén. Atin kagom fégésafa i ingéde Jerusalem non been i niy gonoy barakatane Datu bati moso. <sup>36</sup> Atin kagom sémafa ké makom, ‘Méléhuu na dob ni.’ Non énda géfífuteo kom taloo no géfítama kom i fiyon suwaréw bé de buk gom. <sup>37</sup> Bérhéhé gom saén, ‘Hoo’, taloo no ‘Enda.’ Amuk umana kom i nan bé de safá, tidéw dob Satanasey nan kébéréh gom.”

### Fantag bé késulie

<sup>38</sup> Atin fénauts Jesusey kétoro ne mano, “Enggélingoo kom i kétoroe mano, ‘Fatut séfésuliém i motowe bé motowe, brab i kiféne bé kiféne.’ <sup>39</sup> Endob toroé ku begom béléewe ni, kagom sulion i étewe réménigo tete dob begome. Ufama, amuk wén i téménamfiling bé fiféy me fingé kuwonon, fédayaém de témamfiling so bé ségébalae de. <sup>40</sup> Atin amuk wén i muwit beem dob adafay kémukume inok gédoté noy kégal me irayém soy kamisita muwe de. <sup>41</sup> Atin amuk wén i sundalo fégésé no beem mobo bé de uwitén bé ségékilomitrowe saén, oboém taman ruwo gékilomitro. <sup>42</sup> Atin iraya moy mongote dob beeme. Atin amuk wén i méuyot mélét dob beeme, fééléto mo.”

### Fantag bé késébanile

<sup>43</sup> Atin fénauts Jesusey kétoro ne mano, “Atin énggélingoo kom i kétoroe mano, ‘Fégédaw go bé de dumo mo séloyuk, atin férarék go bé de sébanil beem.’ <sup>44</sup> Endob ay niy kagéne kétoro begom: Fégédaw gom bé de sébanil begom. Atin dasala kom i de émférasay begom, <sup>45</sup> inok waléy gom do nga i Abay gome Tulus dob lawayo. Non i Tuluse féréndawé no soy térsange dob de fiyo étew loo so dob de tete étew. Atin féranaay Tuluse soy de étew rémigo fiyo loo soy de étew rémigo tete. <sup>46</sup> Amuk mégédaw gom saén bé de étew mégédaw begom, énda i baras i Tuluse de begom. I de lémiful kémubra buwis rigoné roy nan, fiyon fo ké énda fiyo ro étew. <sup>47</sup> Atin amuk sébéréh gom saén bé de dumo gom séloyuk, énda i funa kom médayéw. Non fiyon i de békén méngintulus rigoné roy nan. <sup>48</sup> I Abay gome Tulus dob lawayo, rigoné no saén i fiyowe. Brab i begome fatut so rigoné kom saén i fiyowe.”

## 6

<sup>1</sup> Atin fénauts Jesusey kétoro ne mano, “Kagom rémigo bé fiyowe émfésuwat bé Tuluse dob téngaangay de étew saén inok dayewéy de étew begom. Non amuk rigoné kom i ni, énda i ségiyo baras gédoté kom tidew dob Abay gome Tulus dob lawayo.

<sup>2</sup> “Mélaw amuk tabanga moy ségétéwe méskinan bé kéraya muwe de limus, kago fégétawan de dob de ségiyo loo bé de étew do ubo-ubo saén méngintulus rigoné ro dob de lawi féngadafan brab dob de aguwon. Rigoné roy ni inok dayewéy de étew bero. Mélaw bérhéku begom i towe, énggédot roy kéluhanay de baras ro, atin énda i baras i Tuluse de bero. <sup>3-4</sup> Endob amuk tabanga moy ségétéwe méskinan, kago fégito-gitoy kérigo muwe de inok fiyon i de dumo mo do séloyuk énda gétiga ro de. Endob fiyon fo ké énda gitoy de étew de, i Abay me Tulus gito noy rénigo muwe brab Been i marasane beem.”

### Fantag bé kédasale

<sup>5</sup> Atin fénauts Jesusey kétoro ne mano, “Buluk démasal gom, kagom iringén i de étew do ubo-ubo saén méngintulus. Méuyot ro témindég démasal dob de lawi féngadafan brab dob de aguwon inok gitoy de étew bero. Bérhéku begom i towe, i gédoté ruwe saén bé nan rigoné roy kédawé i de dumo étew bero. <sup>6</sup> Endob buluk démasal gom, angéy gom dob sibéy gome brab fintu gom, atin dasal gom dob Tuluse Abay gom dob lawayo énda gito gom de. Amuk rigoné kom i ni, gédoté kom i baras gome tidew dob Tuluse Abay gom. Beene saén i gégitowe bé kéluhanay rigoné kome.

<sup>7</sup> “Buluk démasal gom, kagom dulién i kédasale énda i atagén. I de étew énda gétiga roy Tuluse rigoné roy ni non maro ké fégélingoéy Tuluse bero ké mérugay i kédasal ruwe.

<sup>8</sup> Kagom iringén bero. Enda kailanga kom i mérugaye kédasal non gétigay Abay gomey kailanga kome bé énda séna nongot gom de.

<sup>9</sup> “Ay niy ufamawe de. Dasal gom loo bé ni, ‘Abay gey dob lawayo, kéluhanay étewe damén féngadafé ro Beem. <sup>10</sup> Féguléwo mo damén i kéluhanay de étew inok i kétaya muwe mérigo dob fantade ni loo so bé mérigowe dob lawayo. <sup>11</sup> Irayan gey bé amaé keye bé ni gai. <sup>12</sup> Fésagada mo begey bé de sala gey loo so bé késagad geye bé de

énggésala begey. <sup>13</sup> Kago fédayaén begey météngkad rémigo sala. Brab diyaga mo begey bé Satanase.'

<sup>14</sup> "Buluk fésagada kom i de étew réménigo tete dob begome, i Boh gome dob lawayo fésagada no so begom. <sup>15</sup> Endob buluk énda fésagada kom i de ménsala dob begome, i Abay gome Tulus énda so fésagada no begom."

<sup>16</sup> Atin fentaus Jesusey kétoro ne mano, "Atin amuk fuwasa gom inok tintu méngintulus, kagom féélumén i falas gome loo bé rigonéy de ubo-ubo saén méngintulus. Féélumé roy falas ruwe inok fégétiga ro bé de étew bé mélafay ro non fuwasa ro. Bérhéku begom i toowe, énda i ségiyo baras gédoté ro saliyu bé kédayew i de étew. <sup>17</sup> Endob amuk fuwasa gom, furauf gom brab suwat gom, <sup>18</sup> inok i de ségiyo étew, énda gétiga ro de ké fuwasa gom. Atin mélaw i Abay gome Tulus énda gitono, Been saén i gégitowe bé rigoné kome, atin barasa no begom.

<sup>19</sup> "Atin kagom mitong kurta brab do languntaman dob duniyae ni, non mébinasa ro. Non i de tamuk dob duniyae ni keke i de ifés taloo no tangisén taloo no fénakawén non géahur i de ménakaw dob de lawi gom. <sup>20</sup> Endob fatut itong gom i de baras gom dob lawayo non énda i ifés de méminasa taloo no tangisén taloo no fénakawén. <sup>21</sup> Non i gonoy de tamuk gom, been soy gulaané kome.

<sup>22</sup> "I motowe maak solo i lowohe. Buluk fiyoy moto muwe, maak géfékaya i kéluhanay lowoh me non gérito go. <sup>23</sup> Endob buluk ménsadil i de moto mo, maak délémon i lowoh me non énda gérito go. Mélaw buluk i solo me waléy délémon, toow fo délémon mon.

<sup>24</sup> "Enda i sugu-suguén fakay galbéko no sérégan i ruwowe gétew amu. Non amuk mégédaw bé ségétéwe de, mérarék bé ségétéwe de. Taloo no odoro noy kétayay ségétéwe de, brab siyawé noy ségétéwe de. Mélaw énda fakay gom modor bé Tuluse amuk fégitungé kom saén i kurtae.

<sup>25</sup> "Mélaw bérhéku begom, kagom émbuku fantag bé kéuyag gome, bé ati amaé kome look inémé kome, taloo noy lowoh gome, bé ati kégalé kome. Non wén nay labi na fo mélaga bé amaéne funa kom méuyag, brab wén nay labi na mélaga bé kégale kay de lowoh gom. <sup>26</sup> Fégitung gom i de kloh manok. Enda mohok ro taloo no kémétew ro, brab énda mitong ro amaén dob de kiwot. Endob i Abay gome Tulus féamaé no so bero. Atin mas gom na balilaga bé de kloh manok! <sup>27</sup> Enda i étew géfétaah bé umul ne bé kékuku ne, fiyon ségéuras saén.

<sup>28</sup> "Enda soy funa kom émbuku fantag bé kégale. Fégitung gom i de flores. Méruk ro fiyon fo kékégal i Tuluse bé de kéroon méuyag ro saén singkow,

<sup>30</sup> Endob buluk loo bé nan i kékégal i Tuluse bé de kéroon méuyag ro saén singkow, atin bé démoe ibérén ro brab inohén, békén ba fékégalé no so begom? Toow fo kloh i kékéginugut gome.

<sup>31</sup> "Mélaw kagom émbuku bé amaé kome brab inémé kome brab kégalé kome. <sup>32</sup> Non i de étew énda méngintulus ro, been i nan i fégitungé ruwe taman émbuku ro. Endob i Abay gome Tulus gétiga noy kéluhanay kailanga kome. <sup>33</sup> Mélaw kagom émbuku. Yamula fatut kétaya kom kékégal i Tuluse dob begome brab kétaya kom rémigo bé métintuwe, atin mélaw irayay Tuluse begom bé kéluhanay de éntingayén kailanga kom.

<sup>34</sup> Atin mélaw kagom émbuku béleewe ni fantag bé ati mérigowe démo, fégitung gom fo kékéginugut gome. Kagomén umanan i kékérégéna kome béleewe bé kékuku fantag bé démoe."

### Kagom kémukum

<sup>1</sup> Atin fentaus Jesusey kétoro ne mano, "Kagom kukumén i de étew, inok i Tuluse énda so kukumé no begom. <sup>2</sup> Non i kékukum gome bé de ségiyo étew, iringéy Tuluse so kékukumé no begom. Atin i kérigo gome bé de ségiyo étew, rigonéy Tuluse so dob begome.

<sup>3</sup> Sedek gito moy klohe sala i dumo muwe, éndob énda gito moy kaame sala toow na fo

dakél? <sup>4</sup> Atin béréhé mo dob dumo muwe mamo, ‘Adih, téréno moy nan salaém.’ Endob wén i kaame sala toow na fo dakél. <sup>5</sup> Fédayéw-dayéw go, éndob békén go fiyo étew. Térénmo na métah i kaame sala toow na fo dakél, inok gétabanga moy dumo muwe émfétérén bé kaane kloh sala.

<sup>6</sup> “Atin kagom iray i mékétéfuwe dob de itu. Non amuk rigoné kom, kekeé ro saén begom. Atin kagom iray i balilagae fégonoén perlas dob de babuy. Non amuk rigoné kom, daa ro saén. Mélaw kagom témoreo bé Fiyowe Uret dob de étew mika mégélingo.”

### *Ongot gom dob Tuluse*

<sup>7</sup> Atin féntaus Jesusey kétoro ne mano, “Ongot gom dob Tuluse atin irayén begom. Séléd gom, atin gito gom. Tawag gom dob bengawane, atin i fintue ungkaén inok géahur gom. <sup>8</sup> Non i kéluhanay de mongot dob Tuluse, gédoté ro. Atin i kéluhanay de séméléd, gito ro. Atin i kéluhanay de témawag dob bengawane, géahur ro. <sup>9</sup> Ufama, ségétew go boh, atin i nga me mongot fan, énda iraya mo de batéw. <sup>10</sup> Taloo no mongot sédo, énda iraya mo de ulé. <sup>11</sup> Fyon fo ké tete gom étew, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na dob begome. Beeney Boh gome dob lawayo, brab irayén i de fiyo do éntingayén dob de étew mongot dob Beene.

<sup>12</sup> “Buluy kétaya kome rigonéy de étew dob begome, rigo gom so dob berowe. Non been i atag i kéluhanay de sugu dob kitabé niray Moisese brab de kétoro i de sénarigoy Tuluse muret bé kóbérén ne.”

### *I mératé bengawan*

<sup>13</sup> Atin féntaus Jesusey kétoro ne mano, “Ahur gom dob mératé bengawan mangey dob lawayo. Non toow fo buka i bengawane mangéy dob uleone emferno atin médooy de étew muntul de non magad i kágéw ruwe diyo. <sup>14</sup> Endob i mératé bengawan mangéy dob umule magufusa, mérégén i kékuntule de. Mélaw énda médooy étewe géuntul de.

<sup>15</sup> “Atin ingat gom inok énda géunur gom bé de ubo-ubo sénarigoy Tuluse muret bé kóbérén ne. Non fiyon fo ké ubo-ubo ro mégédaw maak do ménorom ayam, tintu tete i adat ruwe brab binasané ro begom. Non i toowe, ségiléw ro bé de mérayar do binatang. <sup>16-18</sup> Endob gélolo gom bero sabaf bé de rigoné ro. Ufama, énda i fiyo kayéw mégonok bé tetee onok, taloo no tete kayéw mégonok bé fiyowe onok. I sulu-suluwe énda mégonokén bé manggæ. Brab i kayéwe suwaran énda mégonokén saging. I fiyowe kayéw mégonok saén fiyo, atin i tetee kayéw mégonok saén tete. <sup>19</sup> Atin i kayéwe énda mégonokén fiyo, tuwongén brab ibérén dob aféye inok inohén. <sup>20</sup> Mélaw gélolo gom i de ubo-ubo sénarigoy Tuluse sabaf bé de tete rigoné ro.

<sup>21</sup> “Enda kéluhanay de étew témawag Begén maro, ‘Kadnan, o Kadnan,’ géangéy ro dob lawayo. Endob i de étew rémigo bé kétayay Abay guwe Tulus, bero saén i géangéy dob lawayo. <sup>22</sup> Bé gaiwe géumah i kékukum i Tuluse, médooy de étew émbérén dob Begéné maro, ‘Kadnan, o Kadnan, nuret gey i kóbérén i Tuluse nusar gey i dawéti. Atin nusar gey soy dawéti me fégédédél bé de saitan tidéw dob de étew rénahuko ro, brab rénigo gey i de médooy do mékégaif dob dawéti me.’ <sup>23</sup> Endob béréhé ku bero maku, ‘Enda gélolo gu begom. Férayu gom dob Begéné. Begom i de étew do rémigo tete.’

<sup>24</sup> “Béréhé ku begom i fantage bé de mégélingo bé kóbérén guwe brab odoro ro. Berowey ségiléwe bé ségétewe météldétdé réménigo lawi brab féntindégén i de liléyén dob émbagére batéw. <sup>25</sup> Amun mérégés i ranae brab énggégumah i dunuke brab énggóbela diyo i émbagére réfuruh, énda méntuwongén non féntindég dob rotor i batéwe.

<sup>26</sup> “Endob i étewe énggélingo bé de kóbérén gu éndob énda odoro no de, ségiléw bé dufange étew féntindégén i lawi ne dob faréke saén. <sup>27</sup> Mélaw amun ménrégés i ranae brab énggumah i dunuke brab énggóbela diyo i émbagére réfuruh, méntuwong brab toow fo ménbinasa.”

<sup>28</sup> Amun énggilid i Jesuse téromo bé de ni, ménggaif i de médoor do étew bé kétoro ne. <sup>29</sup> Non békén ségiléw i kétoro ne bé de maistéroy kitab i de Judio. Non énda saén téneroén i kégéitung i de ségiyo étew. Yamula téneroén i kaane kégéitung.

## 8

*Nuwa Jesusey ségétéwe fémuteén*

<sup>1</sup> Tidéw béno, léménudug i Jesuse tidéw dob burure ni. Atin ménfuray i de médoor do étew. <sup>2</sup> Tidéw béno, wén i ségétéwe étew fémuteén ménangéy dob Beene brab léméningkuwéd dob adafa nuwe. Atin ménbérélh i fémuteéne ni étew mano, “Kadnan, buluk méuyot go, gféadi-adino mo begén.”

<sup>3</sup> Atin i Jesuse béntrérén i kémér ne brab kénuwahén, brab ménbérélh mano, “Méuyotu. Adi-adi go.” Sonom béno, ménkédan i fémute ne brab ménadi-adi. <sup>4</sup> Atin bénréh Jesuse dob beene bé békén ureté no dob de ségiyo étew, brab sénuguén mano, “Ay go dob fadie inok fétengtengém ménadi-adi gon. Tidéw béno, tulak go, loo bé ménbérélhe dob kitabé tidéw dob Moisese inok gétigay kéluhanay de étew ménadi-adi gon.”

*Nuwa Jesusey sugu-suguéy sundalowe*

<sup>5</sup> Amun énggumah i Jesuse dob ingéde Kafernaum, wén i ségétéwe Romano kafitay de sundalo ménangéy dob Beene. Atin ménongot tabang dob Jesuse mano, <sup>6</sup> “Maistéro, wén i sugu-sugué kuwe toow fo fasang démérueun béni. Diyo dob lawi guwe énda gélékutohén.”

<sup>7</sup> Atin ménbérélh i Jesuse mano, “Na, mangéy diyaan atin uwaé ku.”

<sup>8</sup> Endob bang i kafitane, “Kagonén damén mangéy dob lawi guwe. Non toow go fo gérotor étew atin mélaw énda médaitu témanggaf Beem dob lawi guwe. Endob toow go fo barakatan, mélaw béréhém saén i sugu me mamo, ‘Adi-adi gon,’ atin gétiga kuy waléy adi-adiy sugu-sugué kuwe. <sup>9</sup> Gétiga kuy ni non wén i mas gérotor sundalo mémantuon begén. Brab wén soy do sundalo fémanduo ku. Atin buluk béréhé ku dob ségétéwe de, ‘Angéy go diyoo,’ mangéy diyo. Brab buluk maku dob ségétéwe de, ‘Enggon,’ témingé. Brab buluk béréhé ku dob sugu-sugué kuwe, ‘Rigo moy ni,’ rigoné no.”

<sup>10</sup> Amun énggelingoo Jesusey ni, ménggaif de. Atin ménbérélh dob de étew furay dob Beene mano, “Béréhé ku begom i toowe, fiyon foy de Judio, énda i ségétew énggito gu loo bé ni kégéingintoowén étew. <sup>11</sup> Béréhé ku begom, bé gaiwe gégumah méguléw i Tuluse, médooy de étew gégumah tidéw dob kéluhanay sugud i duniiae, fiyon i de békén Judio. Atin i Tuluse féguléwo no bero beroy de katufua tom ro Abraham, Isak, brab Jakob. <sup>12</sup> Endob wén i de Judio diyo ro so damén éndob kénda no bero mangéy dob délémone gonon dob liyuwe. Diyo ro kémérew brab kémigét i de kifé ro.” <sup>13</sup> Atin ménbérélh i Jesuse dob kafitane ni mano, “Ule gon, ménadi-adinén i sugu-sugué muwe loo bé kénur me mérigo.”

Atin i sugu-sugué nuwe, ménadi-adi bé no so uras.

*Nuwa Jesusey de médoor do étew*

<sup>14</sup> Tidéw béno, méntaus i Jesuse mangéy dob lawi Pedrowe. Diyo énggito noy térima Pedrowe libun démérueun gara-gara toow fo méduf. <sup>15</sup> Atin i Jesuse kénuwahén i kémér i libune ni. Atin sonom béno, ménkédan i kékéduf ne brab ménadi-adi. Atin méntek dénuwoto no bero.

<sup>16</sup> Amun mélédén i térsange, i de étew nuwit roy de médoor do sénaitan ménangéy dob Jesuse. Ménbérélh saén i Jesuse atin fénféraréyén i de saitan. Atin nuwa Jesusey kéluhanay de démérueun diyo. <sup>17</sup> Rénigo noy ni inok tumané noy kékéralh i sénarigoy Tuluse muret bé kékéralh ne féndawét Isaias mano, “Uwaé noy de déruu tom, atin kédané noy de tete tom.”

<sup>18</sup> Atin amun énggito Jesusey de médoo étew géliwét de, sénuguén i de kuyugén mifar dob dogote. <sup>19</sup> Tidéw béno, wén i témoree bé kitabé ménfégédét dob Jesuse brab ménbérél mano, “Maistéro, modoru Beem fiyon udenén ayo mo.”

<sup>20</sup> Endob ménbérél i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén taloo no fidong. Mélaw toow go fo kérégénan amuk modor go Begén.”

<sup>21</sup> Atin wén i ségetéwe kuyugén ménbérél dob Jesuse mano, “Maistéro, modoru Beem. Endob tungkasém na begén métah mangéy lémbéng bé boh guwe.”

<sup>22</sup> Endob séménumbul i Jesuse mano, “Félébéngém bé de étew énda munur Begén i de ménléhu ro. Endob i beeme, odor go Begén.”

### Féntéré Jesusey défuke

<sup>23</sup> Tidéw béno, i Jesuse brab de kuyugén ménda ro awang mifar dob dogote. <sup>24</sup> Atin téménékow ménggumah i émbagére défuk. Atin sénadamfa-damfaay de bagél i awange, taman gédét méléd. Endob i Jesuse énggfidong. <sup>25</sup> Atin ménangéy i de kuyugén dob Beene, brab nulégo maro, “Kadnan, tabangén gey! Gédét tom méléhu!”

<sup>26</sup> Séménumbul i Jesuse mano, “Sedek mégilak gom? Toow fo kloh i kéunur gome.” Tidéw béno, téménindég i Jesuse brab ménbérél dob réfuruhe brab dob de bagél mano, “Térén gom!” Sonom béno, téménrén i défuke brab méntinanék i dogote. <sup>27</sup> Ménggaiif i kéluhanay de kuyug Jesus. Atin ménsébérél-bérél ro maro, “Ati keeyén i Jesuse ni? Fiyon i réfuruhe brab de bagél modor ro bé sugu ne.”

### Dénédél Jesusey de saitan

<sup>28</sup> Amun énggumah i ro Jesuse dob difar i dogote dob ingéde Gerasa, bénalak i de ruwo gétew lagéy rénahukoy de saitan. Bati ro dob de takub do lébéng atin toow ro fo émbaraw. Mélaw énda i do étew gétara diyo. <sup>29</sup> Atin ménkes ro maro, “Nga i Tuluse, ati rigoné muwe dob begeye? Aw ménangéy go ba dini inok kukumé mo begey fiyon fo ké énda séna gérumah i fatute gai?”

<sup>30</sup> Enda mérayuén dob no gonon, diyo i médoowe do babuy témabtab. <sup>31</sup> Atin nongot i de saitan dob Jesuse maro, “Amuk féféraréyé mo begey, féahurém begey dob do babuy diyo.”

<sup>32</sup> Atin bang Jesuse, “Agéw gom.” Mélaw ménsut i de saitan tidéw dob do étew no brab ménahur ro dob de babuy ni. Sonom béno, i kéluhanay de babuy ni, ménraréy ro mangéy dob fingase brab ménantéfor ro mangéy dob dogote atin ménléné ro.

<sup>33</sup> Atin i de étew témalima bé de babuy ni amun énggito roy ni ménrigo, ménségéta ro mangéy dob ingéde brab nuret roy kéluhanay de rénigo Jesus brab ati ménrigowe dob de lagéy sénaitanan bé gétahe. <sup>34</sup> Mélaw ménangéy diyo i kéluhanay de étew dob ingéde ni inok malak bé Jesuse. Atin amun énggito ro, nongot roy Jesuse ké tékédan dob no gono ro.

### Nuwa Jesusey ségetéwe kimoyén

<sup>1</sup> Tidéw béno, ménda i Jesuse dob awange atin ménséfule mifar dob dogote brab ménule mangéy dob ingéd ne. <sup>2</sup> Diyo, énggumah i de étew ménuwit bé ségetéwe kimoyén ténanggung ro mangéy dob Jesuse. Amun énggito Jesusey kékengintoow ruwe, ménbérél dob ni étew kimoyén mano, “Adih, kago émbuku! I de salaém ménfésagadén.”

<sup>3</sup> Tidéw béno, wén i de témoree bé kitabé ménsébérél ro dob de fédew ro maro, “Embérél mékémurka i ni étew, non réfengé noy Tuluse.”

<sup>4</sup> Edob i Jesuse gésobuto noy de itunga ro. Mélaw ménbérél mano, “Sedek tete i kékégitung gome loo bé nan? <sup>5</sup> Toow na fo mélému ké bérélén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén ké bérélén. ‘Tindég go brab agéw go.’ Non giton ké wén i barakat gu de rémigo. <sup>6</sup> Endob féfégétiga ku begom i fantage bé Nga i Kéilawane, sani Begéne. Wén i barakat gu brab

kuwagib gu dob duniyae ni émfésagad bé de sala.” Tidéw béno, bénréhén dob ni kimoyén mano. “Tindég go brab ule go unwitém mule i iroo muwa nan.”

<sup>7</sup> Sonom béno, téménindég i kimoyéne ni brab ménagéw mule. <sup>8</sup> I de médo do ménlimud do étew diyo, amun énggito roy ni, ménggilak ro, atin dénayéw roy Tuluse non nirayén dob Jesusey kuwagibé émfésagad bé de sala.

### *I kétawage bé Mateowe*

<sup>9</sup> Tidéw béno, méntékédan i Jesuse dob no gonon. Atin i lala ne magéw, énggito noy ségétewe étew kémubra buwis féndawéti Mateo, ménasar dob de kubranan buwis. Atin ménbéréh i Jesuse mano, “Odor go Begén.” Atin téménindég i Mateowe brab ménodor de.

<sup>10</sup> Tidéw béno, i Jesuse beroy de kuyugén ménama ro dob lawi Mateowe séréngan bé de médo do kémubra buwis brab de ségiyo so do tete étew. <sup>11</sup> Atin amun énggitoy de Fariseoy ni, ménénginsa ro dob de kuyug Jesus maro, “Sedek ménésławék i Maistéro gome mama bé de kémubra buwis brab de ségiyo tete étew?”

<sup>12</sup> Endob i Jesuse énggelingoo no brab ménbéréh mano, “I de fiyo kégelowoho no, énda kailanga roy muwae, éndob kailangay de wén déruu no. <sup>13</sup> Enda ménangéyu dini inok tabaré kuy de métintu étew, éndob ménangéyu dini inok tabaré kuy de wén salaén inok gésénule ro. Basa gom brab tantu gom fégitung i ni Ménusat Kébéréh i Tuluse mano, ‘Mas méuyotu de ké ségédaw gom bé kétulak gome.’ ”

### *Fantag bé kéfuwasawe*

<sup>14</sup> Tidéw béno, wén i de kuyug Juan Bautista ménangéy ro dob Jesuse brab ménénginsa ro maro, “I begeye, sénga téklid fuwasa gey. Loo so bé de Fariseo. Sedek énda fuwasay de kaam kuyug?”

<sup>15</sup> Atin sénumbulo Jesuse bero mano, “Ufama, i de kana dob uyote énda waléy tete i de fédew ro taman énda tékédan i témérime awe lagéy. Endob amuk gégumah i gaiwe ké édotén nén i témérime awe lagéy dob berowe, been nay no fuwasa ro. Ségiléw so bé de kagén kuyug, non amuk diniwu séna, énda fuwasa ro.”

<sup>16</sup> Tidéw béno, nuret Jesusey sébaane binuwaya fantag bé sébidanay mantuwe ké-toroén brab tafaye kétoro i de Judio. Ménbéréh mano, “Enda i étew usaré noy mantuwe safut fégétabungén bé tafaye kégal. Non amuk rigoné no, kéménkén i mantuwe safut, atin mífendet i tafaye kégal, atin minut géttimal i rédet ne. <sup>17</sup> Brab énda i étew mahur bé mantuwe arak dob tafaye ahuron arak rénigo bé kulit i ayame. Non amuk rigoné no, mébétus i mantuwe arak dob tafaye ahuron brab mébinasa brab méitis i mantuwe arak. Yamula fatut i mantuwe arak ahurén dob mantuwe kulit fédégon de, atin méitong kéluhanan.”

### *Nuwa Jesusey ruwowe gétew libun*

<sup>18</sup> I lala Jesuse émbéréh séna, énggégumah i ségétewe odoroy de Judio, brab mén-lingkuwédo adafa Jesuse brab ménbéréh mano, “I nga guwe libun mantu séna ménléhu. Endob amuk modor go begén brab angéyé mo gamakén, géttiga kuy tébule.”

<sup>19</sup> Mélaw téménindég i Jesuse brab ménodor bé ni lagéy. Ménodor soy de kuyugén.

<sup>20-21</sup> Amun ménagéw ro, ménggéta i ségétewe libun bero. I ni libun foloén bra ruwo gébelintuwa i kéranas i adat ne. Amun ménfuray bé Jesuse, ménggitung mano, “Amuk gékuwaha ku saén i kégal ne, adi-adiwu.” Mélaw ménangéy dob ségang Jesuse brab kénuwahén i kégal ne.

<sup>22</sup> Tidéw béno, séménling i Jesuse brab amun énggito noy ni libun, sénbérého no mano, “Di, kago émbuku. I kékéngintoow mey funa muwe ménadi-adi.” Sonom beno, i ni libun ménadi-adi.

<sup>23</sup> Tidéw béno, méntaus i Jesuse mangéy dob lawi i odoroy de Judio ni. Amun énggumah, énggito noy de médo do étew diyo. Rémuung ro brab selekén ro brab émbaat ro fo.

<sup>24</sup> Ménbéréh i Jesuse mano, “Tékédan gom! Enda ménléhu i ngae ni. Fidong saén.” Tidéw béno, sénbayat roy Jesuse bé bénréh ne.

<sup>25</sup> Amun ménasut i de étew dob lawie, ménahur i Jesuse dob sibéy i ngae ni libun, brab génamakén dob kémér ne. Bé béno so, méntek i ngae ni. <sup>26</sup> Tidéw béno, i urete fantag bé ni rénigo Jesuse ménlégéb dob kéluhanay de ingéd diyo.

#### *Nuwa Jesusey ruwo gétew langafén*

<sup>27</sup> Tidéw béno, ménékédan i Jesuse tidéw diyo. Atin bé lala ne magéw, ménfuray i ruwo gétew lagéy do langafén. Ménkes ro maro, “Séfu Datu Dabid, fégédaw go begey!”

<sup>28</sup> Atin amun ménahur i Jesuse dob lawie, ménfégédét i de langafén ni. Atin fénénginsaa Jesuse bero mano, “Aw munur gom ba ké géuwa ku begom?”

Atin séménumbul ro maro, “Hoo Maistéro, munur gey.”

<sup>29</sup> Tidéw béno, i Jesuse kénuwahén i de moto ro brab ménbéréh mano, “Mérigo dob begome loo bé kéunur gome de.” <sup>30</sup> Atin sonom béno, énggégito ro. Atin ménégét i kékéréh Jesuse de bero mano, “Kagom ureténi ni dob de étew.”

<sup>31</sup> Endob amun ménagéw ro, nuret roy ni rénigo Jesuse. Atin mélaw ménsefélalag i bantuga nuwe dob kéluhanay de ingéd diyo.

#### *Nuwa Jesusey ségétéwe mow*

<sup>32</sup> Lala ruwe magéw i de ni ruwo gétew do éndaén do langafén ro, énggumah i de étew nuwit ro dob Jesusey ségétéwe mow sabaf bé saitane rénahuko no. <sup>33</sup> Atin dénédél Jesusey saitane ni. Atin sonom béno, énggóbéréh i lagéye ni non éndaén mowén. Atin i kéluhanay de étew diyo ménngaif ro, brab ménbéréh ro maro, “Enda séna énggégito gey bé mékégaife loo bé ni dob ingéd tome ni Israel.”

<sup>34</sup> Endob ménbéréh i de Fariseo maro, “I funa nuwe gédédél do saitan non wén i barakatén tidéw dob Satanase sani odoroy de saitan.”

<sup>35</sup> Tidéw béno, ménagéw i Jesuse mangéy sémugud dob kéluhanay de ingéd diyo. Atin témenoro dob de lawi féngadafan kay de Judio, brab nureténi i Fiyowe Uret fantag bé kékéguléw i Tuluse bé de étewén. Atin nuwaén soy de médo do étew bé ségiyo-giyowe do déruun. <sup>36</sup> Atin amun énggito noy de médo do étew ménlimud dob Beene, ménuray i na nuwe bero, non ménbuku ro brab kailanga roy tabange. Maak do bili-bili énda i mifat bero. <sup>37</sup> Mélaw ménbéréh dob de kuyugén mano, “I de ni do médo do étew méuyot munur dob Begéne, ségiléw ro bé bukae safad fatutén kétewén. Endob kloh saén i kémétéwe de, sani de témore bero munur. <sup>38</sup> Mélaw dasal gom dob Tuluse inok umana noy de gémalbék témabangan betom kémétéw.”

## 10

#### *I de folo bra ruwo gétew kuyug Jesuse*

<sup>1</sup> Atin i Jesuse ténavagén i de folo bra ruwo gétew kuyugén mangéy dob Beene. Atin niraya no bero barakat inok gédédél ro do saitan brab géuwa roy de kéluhanay de ségiyo-giyo do déruun. <sup>2</sup> Ay niy de dawét i de Apostol, sani de sénugu: Simon (féndawétén so Pedro), brab Andres dumo no sétiman idéng, Santiago brab Juan sani de nga Sebedeo, <sup>3</sup> brab Filipi, brab Bartolome, brab Tomas, brab Mateo sani kémubrawe buwis, brab Santiago nga Alfeo, brab Tadeo, <sup>4</sup> brab Simon ségétéw toow fo gulaané noy ingéd ne, brab Judas Iskariot sani ménfékéfoe bé Jesuse.

#### *Sénugu Jesusey de folo bra ruwo gétew kuyugén*

<sup>5</sup> Atin sénugu Jesusey de ni folo bra ruwo gétew kuyugén mano, “Kagom mangéy dob de ingéd i de békén Judio taloo no dob de ingéd sakuf i dakéle ingéd Samaria. <sup>6</sup> Yamula, agéw gom mangéy dob de étew dob Israel non ségiléw ro bé de ménadin do bili-bili.

<sup>7</sup> Agéw gom brab uret gom makom, ‘Gédétén i gaiwe féguléwoy Tulusey de étewén.’ <sup>8</sup> Atin uwa gom i de démuun, tébule gom i de ménléhu, féadi-adi gom i de fémuteén, féferaréy gom i de saitan. Atin kagom fébayadén i de étew, non énda fébayadé ku begom bé kéraya kuwe begom. <sup>9</sup> Atin kagom muwit kurta, fiyon bélowan look filak, taloo no do kloh kurta.

<sup>10</sup> Atin kagom muwit réban, taloo no tugé, taloo no lékasa kom kégal look sinilas. Non i de tabanga kom fatut tabanga ro so begom bé atiy kailanga kome.

<sup>11</sup> “Atin amuk gégumah gom dob sébaane ingéd, séléd gom i ségétewe méuyot témayakuf begom. Atin bati gom diyo taman tékedan gom tidew dob no ingéd. <sup>12</sup> Atin buluk mahur gom dob lawie, béréh gom bé féfiyonéy Tulusey de étew bati dob ni lawi. <sup>13</sup> Buluk i de étew dob nan lawi tayakufé ro begom, féfiyonéy Tuluse bero. Endob buluk énda tayakufé ro begom, énda so féfiyonéy Tuluse bero. <sup>14</sup> Atin buluk gégumah gom dob sébaane ingéd énda tayakufé ro begom taloo no énda fégélingoé ro begom, tékedan gom diyo. Atin tag-tag gom i de bubuk sébuwan dob de sékéy gom inok fégétiga kom bero bé kukuméy Tuluse bero. <sup>15</sup> Béréhé ku begom i toowe, bé gaiwe kémukum i Tuluse, toow na fo géttimal i kékukum ne bero bé de tete étew ménbati dob de ingéd Sodom brab Gomorah bé gétahe.

<sup>16</sup> “Fégélingo gom, féuwt gu begom maak do bili-bili mangéy dob kérara i de itu talun. Mélaw ingat gom brab fatut rigo gom saén i fiyowe. <sup>17</sup> Ingat gom non wén i de étew kémfo begom brab uwité ro begom mangéy dob adafay kémukume. Atin badasé ro begom dob de lawi féngadafan kay de Judio. <sup>18</sup> Atin uwité ro begom dob adafay de méguléw begom brab de datu inok kukumé ro begom sabaf begom i do kuyug gu. Endob been i niy gaiwe uret gom i Fiyowe Uret dob berowe brab dob de békén Judio. <sup>19</sup> Atin amuk kéfoé ro begom brab kukumé ro begom, kagom émbuku fantag bé atiy béréhé kome bero look ati kékéréh gome. Non bé no gai, iray begom i fatute kékéréh fégésumbul gom bero. <sup>20</sup> Non i kékéréhe békén tidew dob itunga kome, yamula i Rémogor i Abay gome Tulus i émfébéréhe begom.

<sup>21</sup> “Atin bé no gai, wén i de étew atéé roy de dumo ro sétiman idéng inok féléhuén. Loo soy rigonéy de abay dob de nga ro. Atin wén soy de nga waléy sébanil bé de lukés ro brab féléléhu ro. <sup>22</sup> Atin i kéluhanay de étew mérarék ro begom sabaf bé kéunur gome Begén. Endob ati fédawaye munur taman dob tamfadane, méfukas ro. <sup>23</sup> Atin amuk ferasayé ro begom dob sébaane ingéd, féraréy gom mangéy dob ségiyowe ingéd. Béréhé ku begom i toowe, énda séna géfégilido kom i galbék gome dob kéluhanay de ingéd dob Israel, séfuleun mangéy dini, sani Nga i Kéilawane.

<sup>24</sup> “I méganade békén gérotor na bé témore de. Atin i sugu-suguéne békén gérotor na bé amu ne. <sup>25</sup> Mélaw i méganade fatut moror ké iringé noy témore de. Atin i sugu-suguéne fatut moror ké iringé noy amu ne. Atin amuk i uléw i ségékuréngé féndawéti do étew Beelsebul sani Satanase, labi na fo tete i féndawéti ruwe bé kuréngó nuwe. Mélaw amuk féngiras i de étew Begén, toow na fo géttimal i kékéngiras ruwe begom.

<sup>26</sup> “Mélaw kagom mégilak bé étewe. I kéluhanay rigonéy de étew do méntéléb, mébukeh so moso. Brab i kéluhanay de méntéléb, mébukeh so moso. Brab i kéluhanay de ménbunéy, giton so moso. <sup>27</sup> Atin i béréhé kuwe ni dob begome saén, fatut béréh gom so dob de médo do étew. Atin i ségurawé kuwe dob begome, fatut toro gom dob de médo do étew. <sup>28</sup> Atin kagom mégilak bé de géféléhu bé lowoh gome, éndob énda géféléhu roy rémogor gome. Yamula fatut gom mégilak bé Tuluse non wén i barakatén méminasa bé de lowoh gom loo soy de rémogor gom dob uleono emferno. <sup>29</sup> Ufama, i de kloh manok toow fo mélémuy kékébéléye bero dob fadiyane. Endob énda i sébaan mélawu bero dob fantade ké énda fédayaéy Abay tome de Tulus. <sup>30-31</sup> Atin i begome mas gom na balilaga bé de kloh manok. Mélaw kagom mégilak, non i Tuluse tiganulé no begom. I Tuluse géttiga no fiyon i kédoo de buk gom dob de uléw gom.

<sup>32</sup> “Atin ati murete fantag bé kéunur ne Begén dob de étew, ureté ku soy fantage bé kéunur ne dob Abay guwe Tulus dob lawayo. <sup>33</sup> Endob ati démirunge bé kéunur ne Begén dob adafay de étew, dirungé ku so moso i kéunur ne dob adafay Abay guwe Tulus.

<sup>34</sup> “Atin kagom fégitungén de ké ménangéyu dini inok kédané kuy késétibohe dob duniyae ni. Békén. Yamula ménangéyu dini inok sétiboh i de étew. Non i de étew munur Begén brab de étew énda munur Begén waléy ro sébanil. <sup>35</sup> Non ménangéyu dini inok fésébanilé kuy de boh brab de nga ro lagéy. Loo so bé de idéng brab de nga ro libun. Loo

soy de libun bé de térima ro libun. <sup>36</sup> Atin mélaw i toowe na fo sébanil i de étew, beroy de dumo no ségékuréng.

<sup>37</sup> “Atin i étewe mas nay kéimu ne bé de lukésén bé Begéne, énda médaitén waléy kuyug gu. Atin i étewe mas nay kéimu ne bé de ngaén bé Begéne, énda so médaitén waléy kuyug gu. <sup>38</sup> Atin fiyon atiy étewe énda furayén Begén bé kéfedayday ne bé de mérégén fiyon fo ké féléhuén dob kruse, énda médaitén waléy kuyug gu. <sup>39</sup> Atin i étewe méuyot émféraru bé umul ne dob duniyae ni, méléhu. Endob i étewe méléhu bé kéfuray ne Begén, gédoté noy umule magufusa.

<sup>40</sup> “I étewe témayakuf begom, tayakufé no so Begén. Atin i étewe témayakuf Begén, tayakufé no soy Tuluse ménféuwit Begén. <sup>41</sup> Atin i étewe témayakuf bé sénarigoy Tuluse sabaf sénugu i Tuluse, gédoté noy barase ségiléw bé nan sarigon. Atin i étewe témayakuf bé métintuwe étew sabaf bé kétintuy adat ne, gédoté noy barase ségiléw bé nan métintu étew. <sup>42</sup> Atin béréhé ku begom i toowe, i étewe miray fiyon ségétabu saén mélégénéy wayég dob ségétéwe gérifantad kuyug gu sabaf bé been i kuyug gu, tintu gédoté noy barase.”

## 11

### *I kénéfinsa Juan Bautistawe*

<sup>1</sup> Amun énggilid i kétoro Jesuse bé de folo bra ruwo gétew kuyugén, ménagéw mangéy dob de ingéd diyo inok téromo brab muret diyo.

<sup>2</sup> Bé béno do gai, ménférisuy Juan Bautistawe. Atin amun énggelingoo noy fantage bé de rigoné Kristo, sénuguén i de dumo bé de kuyugén mangéy dob Beene inok ménginsa.

<sup>3</sup> Atin fénénginsaa ro maro, “Beeme bay no bénréh Juane gégumah ongot-ongoté key, taloo no ongot-ongot gey na ségiyo?”

<sup>4</sup> Atin séménumbul i Jesuse mano, “Séfule gom mangéy dob Juane brab uret gom i de énggito gom do rénigo gu brab de énggelingoo kom. <sup>5</sup> I de langafén énggégito ro, brab i de fikat énggéagéw ro, brab i de fémuteén ménadi-adi ro, brab i de bokongén énggégélingo ro, brab i de ménléhu méntébule ro. Atin ureté kuy Fiyowe Uret dob de méskinan. <sup>6</sup> Atin béréh gom so dob Juane bé toow fo moror i étewe énda ruwo-ruwoy kéfengintoow ne Begén.”

<sup>7</sup> Amun ménsefule i de kuyug Juan, ménbéréh i Jesuse dob de médoor do étew fantag bé Juane mano, “Ati nangéy gome téneungténg dob gonone énda i étew de bat? Ségétew maak kéron faniréy réfurehe? Békén, non i kéunur Juane énda mafélikén loo bé kéroone. <sup>8</sup> Aw ménangéy gom diyo inok angéyé kom téngténg i ségétewé lagéy toow fo fiyoy kégal ne? Békén, non i de étew kémégal ro fiyo batí ro dob de toow fo fiyo lawi kay de datu. <sup>9</sup> Ati nangéy gome téneungténg? Ségétew étew sénarigoy Tuluse muret? Hoo, éndob béréhé ku begom, i Juane békén saén sénarigon muret bé kékéréh i Tuluse. <sup>10</sup> Non been i Juane niy fantage bé Ménslate Kékéréh i Tuluse mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’ ” <sup>11</sup> Atin fentaus Jesusey kékéréh ne mano, “Béréhé ku begom i toowe, énda i toow na fo gérotor bé Juane bé kéluhanay de étew ménúmah. Endob dob gaiwe féguléwoy Tulusey de étewén, i kéluhanay de térfantad étew sakuf i Tuluse, toow ro na fo gérotor bé Juane béléewe ni. <sup>12-13</sup> Bé énda séna téromo i Juane de, i Moisese brab de sénarigoy Tuluse nuret ron i fantage bé kéguléw i Tuluse bé de étewén. Atin tidew dob gaiwe féngganaya Juaney kékret ne taman so béléewe ni, médooy de étew sétiboh inok fégésé ro mahur de. <sup>14</sup> Wén i kékéréh i de énggétah do sénarigoy Tuluse muret bé gégumah Eliase inok ureté noy kégumah Kristowe. Atin Juan i téménúmane bé nan kékéréh. Fiyo ké géunur gom bé ni. <sup>15</sup> Mélaw fétuntay gom fo toow amuk méuyot gom de ké gésobuto kom i de ni.

<sup>16</sup> “Ati féségiléwo kuwe bé de étew méuyag béní? Ségiléw gom bé de nga ménstar dob fadiyane brab mika ro mégérémét. Tabar i de dumo ro bero maro, <sup>17</sup> ‘I begeye ménsegagung gey, éndob énda ménsayaw gom. Brab léméninggéng gey linggéng ménléhuon, éndob énda kéménrew gom.’ <sup>18</sup> Non ménangéy diniy Juan Bautistawe

ménfuwasa brab énda méninémén arak. Brab bénréh i de étew sénaitanan kun. <sup>19</sup> Endob i Nga i Kéilawane, sani Begéne, ménangéyu dini, brab mamau atin minému. Brab ménbéréh i de étew, ‘Ay niy ségétewe étew arumén mama brab miném arak, brab wén i dumo no do lémisful kémubra buwis brab do tete étew.’ Endob i kégétigay Tuluse, énggiton toow fo métintu sabaf bé de rénigo no.”

<sup>20</sup> Tidéw béno, dénowoy Jesusey de étew dob de ingéd gono no réménigo médo do mékégaif. Non énda fo téragak roy de sala ro fiyon fo ké énggito roy de mékégaif rénigo Jesuse. <sup>21</sup> Ménbéréh mano, “Mékégédaw-gédaw gom do étew bati dob Korasin, brab de begom do bati dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén damén i de étew diyo kéménégal do saku brab rénigono ro awéw i de lowoh ro inok fégétiga roy énggésénule ro bé de sala ro. <sup>22</sup> Mélaw béréhé ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Tiro brab Sidon. <sup>23</sup> Brab begome do étew bati dob Kafernaum, méuyot gom téfégérotor taman dob lawayo. Endob ibérén gom mangéy dob uleono emferno. Amuk i de mékégaif rénigo gu dob begome ménrigo so dob ingéde Sodom, énda damén ménbinasa no non énggésénule ro damén. <sup>24</sup> Béréhé ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Sodom.”

<sup>25</sup> Bé béno, i Jesuse déménasal mano, “Abay, Kadnay lawayo brab fantade, fésalamata ku Beem non féngétiga moy towe dob de étew énda i féngganad ro, brab bénunéyém i towe dob de étew do métiletdé brab énggféganad. <sup>26</sup> Hoo Abay, ménrigoy ni non kaam kétayan brab késuwatan.”

<sup>27</sup> Tidéw béno, ménbéréh man i Jesuse dob de étew mano, “Sénarig i Abay guwey kéluhanane dob Begéne. Enda i gétigan bé atiy Nga saliyu bé Abaye. Brab énda i gétigan bé atiy Abaye saliyu bé Nga, brab fiyon atiy kétayay Nga fégétiga no de.

<sup>28</sup> “I kéluhana kome do lugotén gémalbék bé kífukas gome bé de lowoh gom dob de sala gom, angéy gom dob Begéne atin fétéréné ku begom non fukasé ku begom. <sup>29</sup> Unur gom Begén brab iring gom Begén. Non térfantadu mégédaw begom brab fétéréné ku begom. <sup>30</sup> Non i de sugu gu begom toow fo magad, brab énda mérégén i de férigo gu begom.”

## 12

### Fantag bé gaiy kétéréné

<sup>1</sup> Enda mérugayén tidéw béno, wén i no sébaan fuweh gai kétérén, i Jesuse brab de kuyugén téménara ro dob de médo do faréy. Atin mélafay i de kuyugén, mélaw ménidot ro do faréy atin ménama ro. <sup>2</sup> Endob i de Fariseo diyo, amun énggito roy ni rénigo ro, ménbéréh ro dob Jesuse maro, “Téngténgém! I de kuyugém fénlis roy kitab tome fantag bé gaiwe kétérén.”

<sup>3</sup> Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo ménlayaf beroy de sundalo no. <sup>4</sup> Atin ménahur ro dob lawi i Tuluse brab namaén i fane niray dob Tuluse beroy de sundalo no. Rénigo noy ni fiyon fo ké dob kitabe, fadi saén i fakaye mama bé ni fan. <sup>5</sup> Aw énda séna énggébasana kom i ni dob kitabé niray Moisese? Sénulatén bé fatut gémalbék i de fadi dob lawi i Tuluse sénga gai kétérén. Endob békén sala i ni. <sup>6</sup> Béréhé ku begom, wén i ségétewe étew dini mas na balilaga bé lawi i Tuluse. <sup>7</sup> Wén i Ménsulate Kébéréh i Tuluse mano, ‘Mas na méuyotu de ké ségédaw gom bé kétulak gome.’ Amuk énggésobuto kom i ni, énda damén kukumé kom i de étew énda i sala ro. <sup>8</sup> Non i Nga i Kéilawane, sani Begéne, wén i kuwagib gu fantag bé ati fakaye dob gaiy kétéréné.”

### Nuwa Jesusey ségétewe étew ménasdil i kémér ne

<sup>9</sup> Tidéw béno, ménékédan i Jesuse diyo atin ménagéw mangéy dob sébaane lawi féngadafan kay de Judío. <sup>10</sup> Atin diyo soy ségétewe lagéy ménasdil i ségébalae bé kémér ne. Atin diyo soy de étew méuyot témbo bé Jesuse rémigo bé éndae fakay dob kitabe.

Mélaw ménénginsa ro dob Jesuse maro, “Aw fakay ba dob kitab tomey muwae ké gai kétérén?”

<sup>11</sup> Atin séménumbul i Jesuse mano, “Ufama, buluk i bili-bili gome mélawu dob ménaléme kalut bé gai kétéréné, ati rigoné kome? Békén ba abangé kom inok géésut fiyon fo ké gai kétérén? <sup>12</sup> Atin i étewe toow na fo balilaga bé bili-biliwe! Mélaw fakay dob kitab tomey témabange fiyon fo ké gai kétérén.” <sup>13</sup> Tidew béno, ménbéréh i Jesuse dob lagéye ni ménsadil i kémér ne mano, “Bétérém i kémér me.”

Atin béntrén i kémér ne, atin sonom béno ménadi-adi loo bé ségébalae de. <sup>14</sup> Tidew béno, i de Fariseo ménsut ro, atin ménséuret-uret ro bé ati kéféléhu ruwe bé Jesuse.

<sup>15</sup> Atin énggétiga Jesusey de rigoné ro, mélaw méntékédan diyo. Atin ménfuray dob Beeney de médoo do étew. Atin nuwaén i kéluhanay de démeruu bero. <sup>16</sup> Endob sénuguén bero bé békén ureté roy fantage bé Beene dob de ségiyo étew, <sup>17</sup> inok métuman i fénbéréh i Tuluse bé sénarigo nuwe muret féndawéti Isaias mano, <sup>18</sup> “Beeney sugu-sugué kuwe fénemili gu. Toow fo kégédawa ku brab késuwata ku. Fédiyoé kuy Rémogor guwe dob Beene, atin ureté noy fantage bé kékukum guwe dob kéluhanay de étew. <sup>19</sup> Enda séédélén taloo no mégeng ké émbéréh, atin énda métanugén ké émbéréh dob de aguwon. <sup>20</sup> Enda ikaa noy de étew do maak fénréku férébong taloo no lémat-lémat solo. Yamula tabanga no bero. Atin fédidayday taman géfétabana noy kétintuwe. <sup>21</sup> Atin médooy de étew dob séngae ingéd sémarig dob Beene.” Been i bénréh Isaiase.

### Dénédél Jesusey saitane

<sup>22</sup> Tidew béno, wén i de étew nuwit ro dob Jesusey ségétéwe langafén brab mow sabaf bé rénahukoy saitane. Atin nuwa Jesuse inok gérito brab gébéréh. <sup>23</sup> Atin i kéluhanay de étew ménggaif ro brab ménsefenginsa-nginsa ro maro, “Aw Been keeyén i séfu Datu Dabide, sani Kristowe ongot-ongoté tom?”

<sup>24</sup> Endob i de Fariseo, amun énggelingoo roy kékéréh i de étew ni, ménbéréh ro maro, “Beelsebul, sani Satanase, odoroy de saitan, i ménirayane de barakat inok gédédél bé de saitan.”

<sup>25</sup> Endob énggétiga Jesusey de itunga ro, mélaw ménbéréh dob berowe mano, “Ufama, amuk i de étew dob sébaane ingéd énda géséfagayun ro brab sétiboh ro, mébinasay nan ingéd. Taloo no i ségékuréngé étew dob sébaane lawi énda so géséfagayun ro brab sékérít ro, éndaén séko sétifon ro. <sup>26</sup> Mélaw buluk i Satanase démédél bé saitane, mésébaad ro brab énda so gétindég i fangangatura nuwe. <sup>27</sup> Bénréh guy ni non béréhé kom i démédélu saitan bé barakat i Satanase. Atin i fégédédél i de kuyug gom de, énda usaré roy barakat i Satanase. Mélaw fégítøy de kuyug gom békén ka Satanas i barakat guwe. <sup>28</sup> Endob démédélu saitan bé barakat i Rémogor i Tuluse. Atin mélaw énggiton énggégumah dob begomey gaiwe méguléw i Tuluse dob de étewén.”

<sup>29</sup> Tidew béno, fénggétiga Jesuse bero bé toow na fo barakatan i Beene bér Satanase mano, “Ufama, i Satanase ségiléw bé ségétéwe émbagér étew mantay bér lawi ne. Enda i ségétéw étew géahur dob lawi i émbagére ni étew atin tulisé noy tamuk ne taman énda na géikéto no de na métah. Tidew béno, gékuliso noy kéluhanay tamuk ne.

<sup>30</sup> “I éndae modor Begén, sébanil Begén. Brab i éndae témabangan Begén, alangé no Begén. <sup>31</sup> Mélaw béréhé ku begom, i kéluhanay sala i de étew brab de tete kékéréh ro, géfésagadan. Endob i émbéréhé tete fantag bér Rémogor i Tuluse, énda géfasagada no. <sup>32</sup> I émbéréhé tete fantag bér Nga i Kéilawane, sani Begéne, émfésagadan. Endob i émbéréhé tete fantag bér Rémogor i Tuluse, énda émfésagada no bér de ni gai taloo no dob de gai géumah moso.”

<sup>33</sup> Atin ménbéréh man i Jesuse mano, “Ufama, i fiyowe kayéw mégonok bér fiyowe onok, atin i tetee kayéw mégonok bér tetee onok. I de séségiyo-giyo do kayéw gélolon ro dob onok ruwe. <sup>34</sup> I de begom maak do ulé gom. Enda gébéréh gom fiyo non toow gom fo tete. Non ati diyoe dob de fédew gom, been soy nan i béréhéy de ba gom. <sup>35</sup> I métintuwe étew rémigo fiyo, non i diyoe dob fédew ne fiyo. Atin i tetee étew rémigo tete non i diyoe dob fédew ne tete.

<sup>36</sup> “Atin béréhé ku begom, dob gaiwe kémukum i Tuluse, i séngae étew mékukum sabaf bé de kékérén énda i lantékén. <sup>37</sup> Non i de kékérén gom, been i nan i fégékukume begom. Amuk i kékérén gome fiyo, énda mékukum gom. Endob amuk tete, mékukum gom.”

<sup>38</sup> Tidéw béno, wén i de Fariseo brab do témoiro bé kitabé ménbérén dob Jesuse maro, “Maistéro, méuyot gey de ké gito gey Beem rémigo mékégaif.”

<sup>39</sup> Atin ménbérén i Jesuse dob berowe mano, “I begome do étew méuyag béeewe ni, toow gom fo do tete brab békén gom méngintulus. Mongot gom sébaan mékégaif. Endob énda i féteng-téng de begom saliyu bé mékégaife loo bé ménrigowe dob Jonase, sani énggétahe sénarigoy Tuluse. <sup>40</sup> Non i Jonase, ménbati télén gétérésangan dob sur i toowe fo dakél sédo. Atin loo bé nan i Nga i Kéilawane, sani Begéne, batiu moso télén gétérésangan dob bukag i fantade. <sup>41</sup> Atin dob gaiwe kémukum i Tuluse, i de énggétahe do étew dob Ninibé témindég ro témbé begom do étew méuyag bénii. Non ménunur ro brab énggésénule ro bé uret Jonase. Endob béeewe ni, wén i mas na gérotor bé Jonase ay ni. Gido loo énda gésénule gom. <sup>42</sup> Atin dob gaiwe kémukum i Tuluse, témindég i baiwe tidéw dob ingéde Seba, brab téboé no begom. Non séménugud tidéw dob mérayue inok fégélingoé noy kégétigay Datue Solomon. Endob béeewe ni wén i ségétéwe mas na gérotor bé Solomone ay ni.”

<sup>43</sup> Ménbérén man i Jesuse mano, “Buluk i saitane mésut tidéw dob étewe rénahuko no, sémugud dob tikare gonon séméléd téréno no. Endob buluk énda i gito no téréno no, <sup>44</sup> émbérén mano, ‘Séfuleu dob étewe sungu gono ku ténak gu.’ Tidéw béno, séfule brab gito noy tafaye ténidéwo no malinis brab métintu néen, non énda i saitan batu diyo.

<sup>45</sup> Tidéw man béno, mésut brab muwit fitéw gétew mas na tete saitan dumo no mahur dob no étew brab batu ro diyo. Mélaw i no étew toow na fo kéfasangan bé énggétahe goho no. Loo so bé nan i mérigowe dob de tete étew méuyag bénii.”

<sup>46</sup> I lala Jesuse émbérén séna dob de étew, énggumah i idéng ne brab de tuwaréyén lagéy. Atin téminindég ro dob liyuwe brab nongot ro ké géségitro de. <sup>47</sup> Mélaw wén i ménbérén dob Jesuse mano, “I idéng me brab do tuwaréyém diyo ro dob liyuwe. Méuyot ro géségitro Beem.”

<sup>48</sup> Séménumbul i Jesuse mano, “Béréhé ku begom atiy idéng guwe brab do tuwaréy gu.” <sup>49</sup> Tidéw béno, téndénuén i de kuyugén brab ménbérén mano, “Ay niy maake idéng gu brab do tuwaréy gu. <sup>50</sup> Non i kéluhanay étewe rigoné roy kétayay Abay guwe Tulus, beroy maake idéng gu brab do tuwaréy gu.”

## 13

### *I binuwayae fantag bé sémabuge*

<sup>1</sup> Dob béno so gai, méntékédan i Jesuse tidéw dob lawie ni, brab ménangéy dob dogote atin ménasar dob dénsaane. <sup>2</sup> Atin toow fo médooy étewe ménlimud géliwét de. Atin non médooy ro, ménda i Jesuse dob awange ménasar diyo bé lala i de étew diyo dob dénsaane.

<sup>3</sup> Atin ténero Jesuse bero bé médoowe kétoro fén-agéw dob de binuwaya. Ménbérén mano, “Wén i ségétéwe ménangéy sémabug bé bénne ne. <sup>4</sup> Atin amun sémanabug, i dumoy de bénneén ménbigodoy dob doror i aguwone. Atin énggumah i de kloh manok nama ro. <sup>5</sup> Atin i dumoy de bénneén ménawér dob fantade médooy de batéw de, éndob kloh saén i fantade de. Atin magad témenunoh i de bénne non énda ménalém i fantade de. <sup>6</sup> Endob amun sémbang i téresange, ménlaay i de nohokén brab ménléhu, non énda ménalém i darir ruwe. <sup>7</sup> Atin i dumoy de bénneén ménawér dob fantade brab dob de duwaléy suwar énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. <sup>8</sup> Endob i dumoy de bénneén ménawér dob fiyowe fantad. Atin i de ni nohok ménggonok ro médooy taman télén folo takéf, némi folo takéf, brab mératu takéf i séngae sébaan bénne.” <sup>9</sup> Atin féntaus Jesusey kékérén ne mano, “Fégitung gom i fantage bé ni bénréh gu begom amuk méuyot gom de ké gésobuto kom.”

<sup>10</sup> Tidéw béno, ménangéy i de kuyugén dob Jesuse atin fénénginsaa ro maro, “Sedek minuwaya go dob de étew ké ureto mo bero?”

<sup>11</sup> Séménumbul i Jesuse mano, “Dob begome do kuyug gu, Tulus i émfégétigane begom fantag bé kékéulgéw ne bé de étewén. Endob i de ni éntingayén ménbunéy, énda émfayagén dob de ségiyo étew. <sup>12</sup> Non i étewe munur bé kétoro guwe, umana kuy kétoro guwe de inok gésobut ro médo. Endob i étewe énda munurén bé kétoro guwe, dotén dob beeney kétoroe. <sup>13</sup> I de ségiyo étew, bérého ku saén bero fén-agéw dob de binuwaya, inok fiyon fo ké téngténgé ro, énda gito ro de. Brab fiyon fo ké fégélingoé ro, énda gélingo ro de brab énda gésobuto ro de. <sup>14</sup> Mélaw mémentuman i Ménsulate Kébérél i Tuluse nuret i sénarigo nuwe féndawét Isaias mano, ‘Fiyon fo ké témantu ro mégélingo, énda gésobuto ro de, brab fiyon fo ké témantu ro téméngténg, énda gito ro de. <sup>15</sup> Non i de ni étew, ménwaléy métégas i de fédew ro, brab mémentéléb i de kélingo ro, brab mémentéléfédéng i de moto ro. Amuk énda, gégito ro brab gégélingo ro brab gésobuto ro. Atin waléy ro damén do munur dob Begéne atin mélaw fukasé ku damén bero dob de sala ro.’”

<sup>16</sup> Atin féntaus Jesusey kékérléh ne mano, “Endob i begome, fatut moror gom, non gégitoy de moto gom brab gégélingo i de kélingo gom. Atin mélaw gésobuto kom.

<sup>17</sup> Non béréhé ku begom i toowe, médooy de sénarigoy Tuluse muret bé kékérléh ne brab de ségiyo métintu étew toow fo ménuyot gérito bé énggito gome do rénigo gu. Brab ménuyot ro fo gégélingo bé énggelingoo kome do kétoro gu. Endob énda énggito ro de brab énda énggelingoo ro de.

<sup>18</sup> “Fégélingo gom i atag i binuwayae fantag bé sémabuge. I atag i ni béne, been i kékérléh i Tuluse. Atin i de ségiyo-giyo gékélasi do fantad ségiléw bé de ségiyo-giyo gékélasi do étew. Atin i sémabuge ureté noy kékérléh i Tuluse dob de ségiyo-giyo do étew.

<sup>19</sup> “Wén i do étew énggelingoo roy fantage bé kékéulgéw i Tuluse, éndob énda gésobuto ro de. Enggumah i Satanase inok kédané noy de kékérléh énggelingoo ro. Fénggiring ro bé de béne ménbigodoy dob doror i aguwone brab nama i de kloh manok. <sup>20</sup> Atin ay ni atag i de béne ménawér dob fantade médooy de batew de. Fénggiring ro bé de étew énggelingoo roy kékérléh i Tuluse brab ménoror ro de témayakuf. <sup>21</sup> Endob énda méeégét i kénur ruwe. Mélaw amuk kérégénan ro loo ké mérásay ro sabaf bé kékérléhe ni, énda taus ro modor de. Ségiléw ro bé de nohok énda i do darir ro, non melaay ro ké méduf i térisange. <sup>22</sup> Atin ay niy atag i de béne ménawér dob de duwaléy suwar. Fénggiring ro bé de étew énggelingoo roy kékérléh i Tuluse éndob tétagak ro non ménangga ro saén bé de kékuku ro bé de kékaguyag ro brab kéuyot ruwe waléy kawasa dob ni duniya. Ségiléw ro bé de nohok ménléhu non ménéfuk ro bé de suwar. Enda mélaw ménnggonok ro. <sup>23</sup> Endob ay niy atag i de béne ménawér dob fiyowe fantad. Fénggiring ro bé de étew énggelingoo roy kékérléh i Tuluse brab énggésobuto ro. Atin munur ro de, mélaw rénigo roy kétayay Tuluse ségiléw bé kékégonok i de nohok dob fiyowe fantad médooy de onok ro. I de dumo étew rénigo roy fiyowe, i de dumo bero rénigo roy médoowe fiyo, brab i de dumo bero rénigo roy toowe fo médo fiyo.”

### *I binuwayae fantag bé de kéroon*

<sup>24</sup> Atin ménuret man i Jesuse sébaan binuwaya mano, “I kékéulgéw i Tuluse loo bé ni. Wén i ségétewe lagéy wén i safadén. Atin sénabugén i fiyowe béneén diyo. <sup>25</sup> Endob wén i étewe sébanil bé ni lagéy. Mélaw wén i no sébaan kélungonon, ménangéy i sébanile de étew dob safad ne bé lala i kéluhanay de étew fidong. Atin séménabug so do onok kéroon dob safade ni. Tidéw béno, ménraréy. <sup>26</sup> Mélaw amun téménunoh i de nohok brab ménnggonok téménunoh soy de kéroon séréngan bero. <sup>27</sup> Atin i de sugu-suguéy ni lagéy ménangéy ro dob beene brab ménénginsa ro maro, ‘Amu, aw békén ba séménabug go fiyo béne dob safad me? Sedek ménslawé i de kéroon de?’ <sup>28</sup> Atin séménumbul i gefee de mano, ‘Rénigoy ségétewe sébanil begén.’ Atin ménénginsa man i de sugu-suguén ni maro, ‘Aw méuyot go de ké angéyé key randutén i de kéroon de?’ <sup>29</sup> Séménumbul i gefee de mano, ‘Kagom. Non amuk randuté kom i de kéroon de, géranduto kom soy de dumo

bé de nohok faréy. <sup>30</sup> Fédaya gomén mérruk i de kéroon séréngan bé de faréy taman bé gayi kékétéwe de. Tidéw béno, béréhé ku bé de kémétew de maku, Randut gom sunguy de kéroon. Tidéw béno, timu gom brab raga gom inok tuwégén dob aféye. Tidéw béno, kétew gom i faréye brab fédio gom dob kiwot guwe.”

<sup>31</sup> Atin ménuret man i Jesuse sébaan binuwaya mano, “Ségiléw i kéféguléw i Tuluse bé sébaane toow fo kloh béne, éndot i étewé brab nohokén dob safad ne. <sup>32</sup> Fiyon fo ké toow fo kloh béne, amun téménunoh brab ménruk, ménwaléy toow fo dakél kayéw bé kéluhanay de nohokén. Atin fiyon i de kloh manok sémalag ro dob de fongo no.”

<sup>33</sup> Atin ménuret man i Jesuse sébaan binuwaya mano, “Atin i kéféguléw i Tuluse ségiléw bé fégfééruke fan. Endot i libune brab sénlawékén dob télewe géasad arinah taman ménruk i kéluhana nuwe.”

<sup>34</sup> I de ni, téménoro i Jesuse dob de ménsélimud do étew fén-agéw dob de binuwaya. Enda i sébaan uret bénréhén bero ké békén fén-agéw dob binuwayae. <sup>35</sup> Rénigo noy ni inok métuman i Ménsulate Kébérén i Tuluse nuret i sénarigo nuwe mano, “Ureto kuy de étew dob de binuwaya. Atin béréhé ku beroy de ménbunéy tidéw fégananay bé kélimbag i duniyae.”

<sup>36</sup> Tidéw béno, i Jesuse téngakén i de ménlimud ni do étew atin ménahur dob lawie. Tidéw béno, i de kuyugén ménfégédét ro dob Beene brab ménbérén ro maro, “Bérhéhém begey i atag i binuwayae fantag bé de kéroon dob safade.”

<sup>37</sup> Atin séménumbul i Jesuse mano, “I lagéye séménabug bé béne ne dob safad ne, been i Begéne, sani Nga i Kéilawane. <sup>38</sup> Atin i safade, been i duniyae ni. Atin i fiyowe do béne, beroy de munur bé Tuluse brab fédayaé roy Tuluse méguléw bero. Atin i de kéroon, beroy de békén méngintulus. Satanas i méguléwone bero. <sup>39</sup> Atin i sébanile étew séménabug bé de kéroon, been i Satanase. Atin i kékétéwe, been i tamfaday duniyae ni. Atin i de kémétew de, beroy de téaki. <sup>40</sup> I de kéroon timué brab tuwégén dob aféye. Ségiléw so bé niy mérigowe dob tamfaday duniyae ni. <sup>41</sup> I Nga i Kéilawane, sani Begéne, sugué kuy de téaki gu. Atin timué roy de tete étew brab de ménfésala bé de dumo ro. Atin féganané no bero tidéw dob de étew fédayaé roy Tuluse méguléwon bero. <sup>42</sup> Atin ibéré ro bero dob uleono emferno. Diyo kémérew ro brab kémigét i de kifé ro. <sup>43</sup> Tidéw béno, i de métintu do étew réméndaw ro maak térsang dob kéféguléw i Abay ruwe Tulus. Fétuntay gom i ni ké méuyot gom de ké gésobuto kom.”

<sup>44</sup> Atin ménuret man i Jesuse do binuwaya mano, “I kéféguléw i Tuluse loo bé ni. Wén i do bélodon ménrugayén ménbunéy lénébéng dob fantade. Atin wén i ségétéwe étew énggégito de. Tidéw béno, lénébéngén man. Atin toow fo moror, ménule brab fénbéléyén i kéluhanay languntama nuwe. Tidéw béno, ménséfule brab bénléyén i fantado no.

<sup>45</sup> “Atin i kéféguléw i Tuluse loo bé ni. Wén i ségétéwe étew démagang brab séméléd bé toowe fo balilaga perias. <sup>46</sup> Amuk gérito sébaan perlas toow fo balilaga, ménagéw brab fébéléyén i kéluhanay languntama nuwe brab béléyé noy perlas no.

<sup>47</sup> “Atin i kéféguléw i Tuluse loo bé ni. Wén i fukéte lénawu dob bukag i dogote. Atin médooy de séségiyo-giyo do sédo géahur de. <sup>48</sup> Atin amuk ménféno, i de fatatugés bégengé ro mangéy dob fé doror i dogote. Tidéw béno, mésar ro inok féganané roy de sédo. Ahuré roy de fiyo sédo dob baskete ahuron de. Endob ibéré roy de tete sédo. <sup>49</sup> Loo so bé niy mérigowe dob tamfaday duniyae. I de téaki angéyé ro fégananén i de tete étew bé de métintu étew. <sup>50</sup> Atin ibéré roy de tete étew dob emfernoue. Diyo ro kémérew brab kémigét i de kifé ro.”

<sup>51</sup> Tidéw béno, ménenginsa i Jesuse dob de kuyugén mano, “Aw gésobuto kom i de ni bénréh gu?”

Atin séménumbul ro maro, “Hoo.”

<sup>52</sup> Atin ménbérén man i Jesuse mano, “Mélaw i séngae témoré bé Ménsulate Kébérén i Tuluse, fégananadé ro soy kétoro guwe fantag bé kéféguléw i Tuluse, gétoro bé tafaye

brab mantuwe kétoro. Ségiléw mélaw bé ségétewe étew usaré noy tafaye brab mantuwe insodén.”

<sup>53</sup> Amun énggilid i Jesuse muret bé de ni binuwaya, méntékédan diyo. <sup>54</sup> Atin ménule mangéy dob ingéd ne. Atin diyo téménoro dob lawie féngadafan kay de Judio. Atin i kéluhanay de énggégélingo bé kétoro ne toow ro fo ménggaif. Atin ménséfénginsa ro maro, “Ati tidéwoy kégétigay ni étew téromo? Ati tidéwoy barakat ne rémigo bé de mékégaif ni? <sup>55</sup> Aw békén ba, Been i Nga i fandaye rémigo lawi? Aw békén ba Maria i idéng ne? Atin békén ba Santiago brab Jose brab Simon brab Judas i de tuwaréyén?

<sup>56</sup> Békén ba i de libu no batí so dini? Tidéwoy kégétiga nuwe de, loo soy barakat ne?”

<sup>57</sup> Mélaw ménika ro de.

Mélaw ménbérél i Jesuse dob berowe mano, “I sarigoy Tuluse muret bé kékérél ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi.” <sup>58</sup> Atin énda réménigo no do médoo mékégaif diyo non énda méginugut ro de.

## 14

### *I kéléhu Juan Bautistawe*

<sup>1</sup> Bé béno, i Herode, sani méguléwe dob Galilea, énggelingoo noy de rénigo Jesus. <sup>2</sup> Atin ménbérél i Herode dob de sarigo no mano, “Been keeyén i Juan Bautistawe méntébule. Been keeyén i funa nuwe wén i barakatén rémigo do mékégaif.”

<sup>3</sup> Bénréhén i ni non fénkéfoén i Juane, brab fénikétén, brab fénahurén dob férисуноне. Rénigo noy ni sabaf bé ibo ne féndawét Herodiyas lénamfaén tidéw dob dumo nuwe sétiman idéng féndawét Filipi. <sup>4</sup> I Herode fénférisu noy Juane non dénowoy Juane mano, “Fénlisém i kitabé non énda damén fatut bawagé moy bawag i dumo muwe.” <sup>5</sup> Mélaw i Herode ménuyot méméléhu bé Juane, éndob ménggilak bé de Judio non kénarang roy Juane ségétew sénarigoy Tuluse muret.

<sup>6</sup> Endob amun réménigo karagiya i Herode fégétédémo no bé kékumah ne, ménsyaw i kénogo Herodiyase dob adafay de médoo do étew diyo. Atin toow fo ménsuat i Herode de. <sup>7</sup> Mélaw fénasada noy ni kénogon bé irayén dey atiy kétaya nuwe ongoté no. Atin rénigo noy safae dob beene.

<sup>8</sup> Atin fénbérél i idéng i kénogone ni mano, “Uwit gom diniy uléw Juan Bautistawe dob biléwe, atin irayém begén.”

<sup>9</sup> Tidéw béno, i Datu Herode toow fo méntete i fédéw ne non mika damén rémigo bé ni. Endob non bé fasad ne rénigo no dob adafay de kana no, sénuguén bé iray dob kénogone ni. <sup>10</sup> Mélaw fénkéléngén i uléw Juane dob férисуноне. <sup>11</sup> Atin wén i ménuité bélw ne dob biléwe brab nirayén dob kénogone ni. Tidéw béno, nuwitén dob idéng ne. <sup>12</sup> Atin i de kuyug Juan nangéy roy bangkay ne brab lénébeng ro. Tidéw béno, ménangéy ro dob Jesuse brab féngétiga ro de.

### *Fénwaléy Jesuse médooy klohe amaén*

<sup>13</sup> Atin amun énggelingoo Jesusey ni uret fantag bé kéléhu Juane, méntékédan diyo brab ménada dob awange mangéy dob géfélébue gonon. Endob amun énggelingoo de étew i ayo Jesuse, méntékédan ro dob de ingéd ro atin ménémantad ro ménggéta ro bé Jesuse. <sup>14</sup> Amun téménéfadén i Jesuse, énggito noy de médoo ni do étew ménlimud. Atin ménuray i na nuwe bero brab nuwaén i de démérue bero.

<sup>15</sup> Amun témégénén i de kuyugén ménangéy ro dob Beene brab ménbérél ro maro, “Enda i lawi dini, atin témégénén béni. Féagéw mon bero inok mangéy ro dob de ingéd gédét dini. Diyo gébéléy ro amaé ro.”

<sup>16</sup> Endob ménbérél i Jesuse mano, “Enda kailanga roy magéwe. Iraya kom bero amaé ro.”

<sup>17</sup> Endob séménumbul i de kuyugén maro, “Enda i amaén dini saliyu bé limowe timan fan brab ruwo timan sédo.”

<sup>18</sup> Atin bang Jesuse, “Uwit gom dini.” <sup>19</sup> Atin sénuguén i de étew mésar dob de kéeroon diyo. Tidéw béno, éndot Jesusey limowe timan fan brab ruwowe timan sédo, atin lémenéngag dob lawayo brab ménfésalamat dob Tuluse. Tidéw béno, sénbaad-baadén i de fan brab nirayén dob de kuyugén. Atin sénaar ro dob de étew. <sup>20</sup> Atin i kéluhanay de étew téménantu ro mama taman ménbésor ro. Tidéw béno, ténimu i de kuyug Jesus i de sama i de amaén brab ménféno i foloe bra ruwo timan dakél biton. <sup>21</sup> I kédooy de étew ménama limo ngibu ro do lagéy saliyu bé de libun brab do nga.

#### *Ménagéw i Jesusey dob rotor i wayége*

<sup>22</sup> Tidéw béno, féneda Jesusey de kuyugén dob awange, atin féntahén bero mangéy fingé difar bé dogote, bé lala ne émféule bé de médo ni do étew. <sup>23</sup> Atin amun énggénéuleo noy de étew, ménagé dob burure énda i dumo no inok démasal. Amun kélungononén, diyo i Jesusey dob burure énda i dumo no. <sup>24</sup> Bé béno, i awange diyoén dob kérara i dogote. Atin kérégénan i de kuyugén non énggénébla i de bagél dob awang ruwe, non rumfakéy réfuruhe.

<sup>25</sup> Amun lingkuwog mangéy fuweh, ménangéy i Jesusey dob berowe ménagéw dob rotor i wayége. <sup>26</sup> Atin i de kuyugén, amun énggitoy Jesusey magéw dob rotor i wayége, toow ro fo ménggilak. Ménkes ro sabaf bé kégilak ruwe brab maro, “Ménayam!”

<sup>27</sup> Endob sonom béno, ménbéréh i Jesusey mano, “Kagom mégilak! Begén. Fétana gom i de fédew gom.”

<sup>28</sup> Tidéw béno, ménbéréh i Pedrowe mano, “Kadnan, amuk tintu Beem, féagéwém so begén dob rotor i dogote mangéy dob Beeme.”

<sup>29</sup> Atin bang Jesusey, “Enggon.” Mélaw méntéfor i Pedrowe tidéw dob awange atin ménagéw dob rotor i wayége saréw dob Jesusey. <sup>30</sup> Endob amun énggétéredama noy émbagére réfuruhe, ménwaléy mégilak, atin minut méléd dob dogote. Atin ménkes mano, “Kadnan, tabangénu.”

<sup>31</sup> Sonom béno, bénér Jesusey kémér ne atin génamakén i Pedrowe. Atin ménbéréh i Jesusey mano, “Toow fo kloh i kéunur me. Sedek ruwo-ruwoy fédew me?”

<sup>32</sup> Tidéw béno, ménda ro dob awange, atin téménréni i réfuruhe. <sup>33</sup> Atin i de kuyugén dob awange fénengadaf roy Jesusey brab ménbéréh ro maro, “Tintu fo Beem i Nga i Tuluse!”

#### *Nuwa Jesusey de médo do démeruun*

<sup>34</sup> Atin ménlaus ro mifar dob dogote brab énggumah ro dob ingéde Genesaret. <sup>35</sup> I de étew diyo énggélolo roy Jesusey. Mélaw fénksamfay roy kékéréhe dob de démeruun dob de ingéd géliwét brab nuwit ro dob Jesusey. <sup>36</sup> Atin nongot roy Jesusey bé tungkasé noy de démeruun fiyon gékuwaha ro saén damén i tamanay kégal ne. Atin i kéluhanay de énggikuwah de, ménadi-adi.

## 15

<sup>1</sup> Tidéw béno, wén i do Fariseo brab do téromo bé kitabé ménangéy dob Jesusey tidéw Jerusalem. Ménenginsa ro maro, <sup>2</sup> “Sedek i de kuyugém énda odoro roy adat tome tidéw dob de katufua tom? Non énda méguse ro ké mama ro loo bé adat tome.”

<sup>3</sup> Atin séménumbul i Jesusey mano, “Sémuliú méninsaan begom. Sedek félisé kom i de sugu i Tuluse inok odoro kom i kagome kétoro? <sup>4</sup> Non ménbéréh i Tuluse mano, ‘Basana moy abay me brab idéng me.’ Atin ménbéréh so mano, ‘Buluk wén i ségétew émbéréh tete fantag bé abay ne look idéngén, fatut féléhuén.’ <sup>5</sup> Endob i begome, téromo gom bé amuk wén i ségétew kérégénan i abay ne look idéngén, brab wén i fégétabangén irayén damén, fakay émbéréh mano, ‘Kay Tulusey ni.’ <sup>6</sup> Mélaw dob kétoro gome, éndaén kailangay de étew i masanane bé de lukés ro. Mélaw tétagak gom i kékéréh i Tuluse inok odoro kom i kagome kétoro. <sup>7</sup> Enda toow i kéunur gome bé Tuluse, ubo-ubo saén. Toow i kékéréh Isaiase, sani ségétewé sénarigoy Tuluse muret bé kékéréh ne, amun sénulatén i fantage bé begome mano, <sup>8</sup> ‘Bang i Tuluse, basanay de ni do étew Begén dob kékéréh

ruwe saén. Endob énda munur ro Begén dob de fédew ro. <sup>9</sup> Enda i atag i kénéfengadaf ruwe Begén, non toroé roy de sugu rénigoy kéilawane brab béréhé ro tidew dob Begéne.’ ”

### *Fantag bé amaéne*

<sup>10</sup> Tidew béno, ténawag Jesusey de étew mangéy dob Beene. Atin ménbérél dob berowe mano, “Fégélingo gom Begén brab fégésobut gom. <sup>11</sup> I funay de étew waléy mékérésik dob adafay Tuluse, békén sabaf bé atiy amaé ruwe. Yamula, i de tete kénébérél ro mésut tidew dob de ba roy funa ruwe waléy mékérésik dob adafay Tuluse.”

<sup>12</sup> Tidew béno, ménfégédét i de kuyugén dob Jesuse, atin ménbérél ro maro, “Gétiga mo, i de Fariseo méntete i de fédew ro sabaf bé kénébérél ma nan?”

<sup>13</sup> Endob séménumbul i Jesuse mano, “Mékédan i de békén katabuwan kétoro ro békén tidew dob Abay guwe Tulus, ségilew bé ségétéwe rémandut bé de kéeroon géliwét bé de nohokén. <sup>14</sup> Fédaya gom bero. Maak do langafén ro marak bé de dumo ro langafén. Atin amuk wén i langafén marak bé ségétéwe so langafén, ruwo ro mélawu dob kalute.”

<sup>15</sup> Atin ménbérél i Pedrowe mano, “Fékéntayém dob begeyey nan binuwaya.”

<sup>16</sup> Atin bang Jesuse, “Aw énda séna wayo gésobuto kom de? <sup>17</sup> I funay Tuluse énda mésuwat bé de étew békén sabaf bé de amaé ro. Non i amaéy étewe, mahur dob sur ne brab taus so mésut tidew dob lowoh ne. <sup>18</sup> Endob i de tete kénébérél mésut tidew dob ba i étewe, tintu fo tidew dob fédew ne. Atin been i niy funay étewe waléy mékérésik dob adafay Tuluse. <sup>19</sup> Non tidew dob tete fédewén mésut i de tete kénéfítungén inok méméléhu, brab sétayan bé békéné bawagén, brab sébiga, brab ménakaw, brab témuji, brab témuji. <sup>20</sup> Been i niy funay de étew waléy mékérésik dob adafay Tuluse. Endob fiyon fo ké énda méguse i étewe loo bé adat tome do Judio ké mama, énda waléyén mékérésik dob adafay Tuluse.”

<sup>21</sup> Tidew béno, méntédan i Jesuse diyo brab ménangéy dob de ingéd gédét dob Tiro brab Sidon. <sup>22</sup> Atin wén i ségétéwe libun békén Judio bati diyo. Been i séfu i de étew tidew Kanan. Atin ménfégédét dob Jesuse. Atin ménbérél métanug mano, “Séfu Datu Dabid, fégédawanu! I kénogo kuwe rénahukoy saitane atin mélaw toow fo kénéfasangan.”

<sup>23</sup> Endob ménantés i Jesuse brab énda sénumbulo noy libune ni. Tidew béno, i de kuyugén ménangéy ro dob Jesuse brab nongot ro maro, “Féagewém i ni libun non toow fo selekén furay betom.”

<sup>24</sup> Tidew béno, bénréh Jesuse mano, “Sénuguu saén mangéy téma bang bé de Judio non ségiléw ro bé de méntadin do bili-bili.”

<sup>25</sup> Tidew béno, i libune ni ménfégédét brab léméningkuwé dob adafa nuwe. Atin ménfégédaw-gédaw mano, “Maistéro, tabangénu.”

<sup>26</sup> Tidew béno, nuret Jesusey sébaane binuwaya inok fégétiga no de bé tabangé noy de Judio sungu, atin tidew béno tabangé noy de békén Judio. Ménbérél mano, “Enda fatutén ké dotén i amaéy de nga atin ibérén dob de itu.”

<sup>27</sup> Endob ménbérél i libune ni mano, “Toow, Maistéro, éndob fiyon foy de itu géamaa roj de momu mélawu tidew dob amaéy gefee de.”

<sup>28</sup> Tidew béno, ménbérél i Jesuse mano, “Di, méégét i kénéunur me fo toow. Mélaw rigoné kuy nan ongoté mo.” Atin bé no so uras i kénogo nuwe ménadi-adi.

### *Nuwa Jesusey de médooy do étew*

<sup>29</sup> Tidew béno, ménagéw i Jesuse ménémantad mangéy bé doror i dogote Galilea. Atin ménénagé dob burure brab ménas diyo. <sup>30</sup> Atin médooy de ménlimud do étew ménangéy ro dob Beene, atin nuwit roy de fikat, brab do langafén, brab do ménas dil i de kémér ro brab de sékéy ro, brab do mow, brab do médooy so étew do démeruun. Atin féndiyo ro bero dob adafa Jesuse. Atin nuwa Jesuse bero. <sup>31</sup> Atin toow fo méngegaif i de étew amun énggitoy de mow énggabérél, brab de ménas dil do kémér ro ménadi-adi, brab de fikat énggéagéw, brab de langafén énggégito. Atin dénayéw roy Tuluse fénagadaféy de Judio.

*Fénwaléy Jesuse médooy klohe amaén*

<sup>32</sup> Tidéw béno, ténawag Jesusey de kuyugén mangéy dob Beene. Atin ménbérél dob berowe mano, “Méuray i na guwe bé de étew ni, non télewén gétérésangan ro dob Begéne, atin béeewe ni ménétéyén i de amaé ro. Atin mikau émféule bero ké mélaf ro non mésumba ro keeyén dob de aguwon.”

<sup>33</sup> Atin ménenginsaa i de kuyugén maro, “Ati kéfingé-fingé i kéféama geye bé de médo ni do étew dob ni gonon mérayu tidéw dob de lawi?”

<sup>34</sup> Atin i Jesuse fénenginsaa no bero mano, “Firoy timan i fa koman?”

Séménumbul ro maro, “Fitew timan brab wén soy koy kloh de kloh sédo.”

<sup>35</sup> Tidéw béno, i Jesuse sénuguén i de ménlimud do étew mésar dob fantade. <sup>36</sup> Atin éndotén i fitéwo no timan fan brab do sédo, brab ménfésalamat dob Tuluse. Tidéw béno, sénbaad-baadén, brab nirayén dob de kuyugén. Atin sénaar ro dob de étew. <sup>37</sup> Atin i kéluhanay de étew téménantu ro mama taman ménbésor ro. Tidéw béno, i de kuyugén ténimu roy de sama i de amaén brab ménfénou i de fitew timan biton. <sup>38</sup> I kédo ruwe do ménama fot ro ngibu do lagéy saliyu bé de libun brab de nga.

<sup>39</sup> Tidéw béno, fénule Jesusey de ménlimud do étew. Tidéw man béno, ménda dob awange atin ménagéw mangéy dob ingéde Magadan.

## 16

<sup>1</sup> Wén i no sébaan fuweh, wén i do Fariseo brab do Saduseo ménangéy dob Jesuse. Ménuyot ro téméngkad bé Jesuse. Mélaw nongot ro dob Beene rémigo mékégaif inok fégito no tidéw dob Tuluse. <sup>2</sup> Endob séménumbul i Jesuse mano, “Amuk gito gom furay lawaye ké méléd i térsange, émbérél gom makom, ‘Enda rémaniaén démo.’” <sup>3</sup> Atin buluk gito gom furay brab délémon i lawaye ké sémbang i térsange, béréhé kom makom, ‘Rémania séko.’ Mélaw gétiga kom i atag i de tanda dob de rawén. Endob énda gétiga kom i atag i de tanda dob de ni do gai. <sup>4</sup> I begome do étew méuyag béri, toow gom fo tete brab békén gom méngintulus. Ongoté kom ké rémigowu mékégaif inok gétiga kom Begéney Kristowe. Endob énda i féténgténg gu begom saliyu bé sébaane mékégaif ségiléw bé ménrigowe dob Jonase bé do gétah.” Tidéw béno, ténagak Jesuse bero brab ménagéw.

<sup>5</sup> Tidéw béno, i de kuyug Jesuse ménifar ro dob dogote. Endob énggélifoto roy muwite fan. <sup>6</sup> Atin nuret Jesuse beroy sébaane binuwaya fantag bé de tete adatén do étew. Ménbérél mano, “Ingat gom brab sénggila gom i fégéféruek fan kay de Fariseo brab kay de Saduseo.”

<sup>7</sup> Endob i de kuyugén, énda énggésobuto roy ni binuwaya. Marok bénréh Jesusey fantage bé tintuwe fégéféruek fan. Mélaw ménsgéno-géno ro falan saén bero maro, “Bénréhén i ni non énda i fa tom.”

<sup>8</sup> Endob i Jesuse énggétiga noy de kékérél ro. Mélaw ménbérél mano, “Sedek ségéno-géno gom fantag bé kékulang i fa tome? Toow fo kloh i kénur gome.” <sup>9</sup> Aw énda séna énggésobuto kom de? Aw énggélifoto kom i rénigo guwe? Amun sénbaad-baad guy de limo timan do fan dob de limo ngibu do lagéy, firoy gébiton i énggétimuo kome samaén? <sup>10</sup> Atin amun sénbaad-baad guy de fitew timan do fan dob de fot ngibu lagéy, firoy gébiton i énggétimuo kome samaén? <sup>11</sup> Sedek énda séna énggésobuto kom i békén fantag bé faney bénréh guwe? Ingat gom brab sénggila gom i fégéféruek i de Fariseo brab de Saduseo.”

<sup>12</sup> Tidéw béno, i de kuyugén énggésobuto ro bé féingaté Jesuse bero bé kétoro i de Fariseo brab de Saduseo. Atin énggétiga ro békén nuretén i fantage bé tintuwe fégéféruek fan.

### I kénur Pedrowe

<sup>13</sup> Wén i no sébaan fuweh, i Jesuse ménagéw gédét dob ingéde Sesarea Filipo. Diyo fénenginsaa noy de kuyugén mano, “Ati kékérél i de étew ké ati Begéne ni, sani Nga i Kéilawane?”

<sup>14</sup> Séménumbul ro maro, “Wén i do ménbérél maro, Juan Bautista go kun. I de dumo de maro, Elias go kun. Brab i de dumo de maro, Beemey Jeremiase kun, taloo no ségétew bé de gétah sénarigoy Tuluse.”

<sup>15</sup> Tidéw béno, ménénginsa i Jesuse man mano, “Dob begome, ati kékéréh gome fantag bé Begéne?”

<sup>16</sup> I Simon Pedrowe séménumbul mano, “Beemey Kristowe, Nga i méuyage Tulus.”

<sup>17</sup> Atin bang Jesuse, “Simon, nga Juan, fénfiyoy Tuluse beem. Non békén kéilawan i ménfégétigane beem bé ni. Yamula i Abay guwe Tulus i ménfégétigane de beem. <sup>18</sup> Atin bérhéh ku beem, beem i Pedrowe, atin dob batéwe ni fétindégé kuy simbaa kuwe. Enda méléhu i de étew munur Begén loo bé kéunur me. <sup>19</sup> Atin iray gu beem i aturane bé de étew féguléwoy Tuluse. Mélaw ati sugué muwe énda fakayén rigonén dob fantade ni, énda so fakayén dob lawayo. Atin ati sugué muwe fakay rigonén dini dob fantade, fakay so dob lawayo.”

<sup>20</sup> Tidéw béno, sénugu Jesuse dob de kuyugén bé békén ureté ro dob de ségiyo étew ké Been i Kristowe.

### *I kéuret Jesuse fantag bé kéléhu ne*

<sup>21</sup> Tidéw bé no gai, i Jesuse fénkéntayén i kékéréh ne dob de kuyugén mano, “Kailanga kuy mangéye Jerusalem brab diyo i de odoroy de Judio brab de odoroy de fadi brab de téromo bé kitabé, ferasayé ro fo Begén toow. Atin wén soy do méméléhu Begén. Endob dob gétéléw ne gétérésangan, tébuleu.”

<sup>22</sup> Sonom béno, i Pedrowe nuvitén i Jesuse mangéy dob gélyu-liyuwe inok bero saén, atin génléén mano, “Kadnan, énda damén fidayaéy Tuluse de mérigo dob Beemey ni bénréhém.”

<sup>23</sup> Endob sénaréw Jesusey Pedrowe atin ménbéréh mano, “Maak Satanas go! Férayu go Begén. Alangé mo Begén non i kéfégitung me békén tidéw dob Tuluse, yamula tidéw sa dob kéilawane.”

<sup>24</sup> Tidéw béno, bénréh Jesuse dob de kuyugén mano, “Buluk atiy méuyote furay Begén, kailanga no diguré noy kaane kétayan inok odoro noy kétayay Tuluse. Tidéw béno, kailanga no fidayday bé de kérégénon ségiléw bé Begéne, fiyon fo ké féléhuén dob kruse.

<sup>25</sup> Non atiy méuyote émféraru bé umul ne, méléhu. Endob i méléhue bé kékfuray ne Begén, gédoté noy umule magufusa. <sup>26</sup> Ufama, fiyon fo ké i ségétewe étew gédoté noy kéluhanay étingayéne dob duniyae ni, énda i lagaén buluk méléhu atin géangéy dob uleono emferno. Enda i fégébaliway étewe de inok méuyag man. <sup>27</sup> Non i Begéne, sani Nga i Kéilawane, séfuleu moso begey i de télaki gu, rémendawu bé barakat i Abay guwe Tulus. Atin bé béno gai, barasa kuy de étew loo bé fatute sabaf bé de rénigo ro. <sup>28</sup> Bérhéh ku begom i towe, wén i do dumo begom énda méléhu ro taman gito roy késéfule guwe inok méguléw.”

## 17

### *Enggiton i kéréndaw Jesuse*

<sup>1</sup> Ném gétérésangan tidéw bé béno, nuwit Jesusey Pedrowe brab Santiacowe brab Juane dumo Santiacowe sétiman idéng dob uruk i gérotore tuduk sébero-bero saén.

<sup>2</sup> Atin i falas Jesuse ménfégalin dob téngaanga ruwe. Rémenéndaw i rangih ne maak térésang. Atin ménwaléy fute i kégal ne maak géfekaya. <sup>3</sup> Atin i de ni kuyugén, métékow énggito ro soy Moisese brab Eliase sébéréh-béréh ro bé Jesuse. <sup>4</sup> Ménbéréh i Pedrowe dob Jesuse mano, “Kadnan, toow fo fiyo non dob ni tom. Amuk kétaya mo, rémigowu téléléw timan dung-dung. Sébaan i kaame de, sébaan i ka Moisese de, brab sébaan i ka Eliase de.”

<sup>5</sup> Amun émbéréh sénay Pedrowe, méntégalung dob berowey rémendawe rawén. Atin wén i ménbéréhe tidéw dob rawéne mano, “Been i niy kénimuo kuwe Nga gu, toow fo kénswata ku. Fégélingo gom.”

<sup>6</sup> Amun énggélingooy de kuyugén i ni, toow ro fo ménggilak. Mélaw méntéléngkéb ro téduunsum. <sup>7</sup> Endob i Jesuse fénggédéto no bero brab kénwahén bero. Atin ménbéréh mano, “Tek gom brab kagom mégilak.” <sup>8</sup> Amun léménéngag ro téméngténg, énda i saliyu énggito ro bé Jesuse saén.

<sup>9</sup> Atin bé lala ruwe léménudug tidéw dob tuduko no, sénugu Jesuse bero mano, “Kagom ureténi fantage bé ni énggégito gom taman tébuleu, sani Nga i Kéilawane.”

<sup>10</sup> Tidéw béo, i de ni kuyugén ménenginsa ro dob Jesuse maro, “Sedek bénréh i de témooro béo kitabé béo kailanga Eliasey séfulee, tidéw béo méguléw i Kristowe?”

<sup>11</sup> Atin séménumbul i Jesuse mano, “Toow i nan bé fatut séfule i Eliase sungu inok tafayé noy kéluhanane. <sup>12</sup> Endob bérhéku begom, énggumahén i Eliase, éndob énda énggéloloy de étew de. Yamula fénrasay ro loo bé kétaya ruwe. Atin loo so bé nan i kéferasay ruwe moso Begén.”

<sup>13</sup> Tidéw béo, i de ni kuyugén énggésobuto roy bénréh Jesuse fantag bé Juan Bautistawé.

#### *Dénédél Jesusey saitane*

<sup>14</sup> Amun ménsefule ro dob de ménlimud étew, ménfégédét i ségétéwe lagéy dob Jesuse brab léméningkuwéd dob adafa nuwe. <sup>15</sup> Atin ménbérhéh mano, “Maistéro, fégédaw go bé nga guwe lagéy. Non rebengén brab toow fo kérasayan. Ségamét métuwar dob aféye brab mélawu dob wayége. <sup>16</sup> Nuwit gu dob de kuyugém, éndob énda géuwaa ro de.”

<sup>17</sup> Atin ménbérhéh i Jesuse dob de ménlimud do étew mano, “Enda sémarig gom béo Tuluse, brab toow gom fo do tete étew. Lugoténun sétafik begom. Enda gétuwa ku de ké ati nay kérugay i ketingkél guwe sétafik begom. Uwit gom diniy ngao no.” <sup>18</sup> Atin dénédél Jesusey saitane béo kérhéh ne. Mélaw ménraréy i saitane, atin sonom béo, ménadi-adiy ngae ni.

<sup>19</sup> Tidéw béo, i de kuyugén ménangéy ro dob Jesuse sébero-bero saén. Atin ménenginsa ro maro, “Sedek énda géféraréyo key i no saitan?”

<sup>20</sup> Séménumbul i Jesuse mano, “Non kulang foy kéunur gome. Bérhéh ku begom i toowe, amuk wén saén i kloh kéunur gom ségiléw béo kékloh i oloy sabie, gébérhéh gom dob tuduke ni makom, ‘Ay go diyoo.’ Atin magéw ba. Atin mélaw amuk wén i kéunur gom, gérígono kom i kéluhanay éntingayéne. <sup>21</sup> Endob i ni klasi saitan, géféraréyo kom saén béo kédasal gome brab kéfuwasa gome. Endaén i saliyu de fakay.”

#### *I kéuret Jesuse fantag béo kéléhu ne*

<sup>22</sup> Amun ménlimud i de kuyug Jesus dob Galilea, bénréhén bero mano, “I Nga i Kéilawane, sani Begéne, fékéfo séko béo de étew sébanil Begén. <sup>23</sup> Atin féléhué ro Begén. Endob dob gétéléw ne gétérésangan, tébuleu.”

Atin toow fo méntete i de fédéw i de kuyugén amun énggelingoo roy ni.

<sup>24</sup> Amun énggumah i Jesuse beroy de kuyugén dob Kafernaum, ménangéy dob Pedrowey de kémubra kurta kay lawi i Tuluse dob Jerusalem. Atin ménenginsa ro maro, “Aw mayad ba kurta i Maistéro gome kay lawi i Tuluse?”

<sup>25</sup> Séménumbul i Pedrowe mano, “Hoo, mayad.”

Tidéw béo, amun ménahur i Pedrowe dob lawie, bénréh Jesuse sungu mano, “Simon, ati karang me de? Ati isuwe mayad buwis dob datue, do ngaén taloo no do ségiyo étew?”

<sup>26</sup> Séménumbul i Pedrowe mano, “I de ségiyo étew.”

Atin ménbérhéh man i Jesuse mano, “Amuk loo, énda kailangay de ngaén i mayade buwis dob datue. Atin mélaw énda so kailanga kuy mayade kurta kay lawi i Abay guwe Tulus. <sup>27</sup> Endob énda méuyotu de ké mérarék Betoy de étew ni. Mélaw ay go dob dogote atin duray go. Edotém i sunguwe sédo géduraya mo. Atin fétenganga mo brab gito moy félatahe fakayén fégébayad i ruwowe gétew dob lawi i Tuluse. Dotém brab bayada moy katowe de.”

## 18

<sup>1</sup> Bé béo do gai, ménangéy i de kuyug Jesuse dob Beene brab ménenginsa ro maro, “Ati isuwe begey toow na fo gérotor dob kéféguléw i Tuluse?”

<sup>2</sup> Tidéw béo, ténavag Jesusey ségétéwe nga atin fentindégén dob téngaanga ruwe.

<sup>3</sup> Atin bénréhén bero mano, “Bérhéh ku begom i toowe, amuk énda émfégalin i de fédéw gom inok iringé kom i kétérifantad i de nga, énda géahur gom dob kéféguléw i Tuluse.”

<sup>4</sup> Non i toowe na fo gérotor bé de étew féguléwoy Tuluse, been i gérifantade loo bé ngae.

<sup>5</sup> Atin atiy étewe témayakuf bé ngae loo bé ni sabaf bé kéunur ne Begén, tayakufé no so Begén.

<sup>6</sup> “Endob amuk wén i émfésala bé ségétewe mantu séna munur dob Begéne loo bé ni nga, toow fo mékégédaw-gédaw. Toow fo gétimal ké mékukum, mélaw mas na fiyo dob beene ké ibérén dob dogote nikéton dakél batéw i reer ne. <sup>7</sup> Mékégédaw-gédaw i de étew dob duniyae ni non wén i de éntingayén émfésala bero. Démoyun wén i do étew émfésala bé de dumo ro. Endob mékukum ro fo toow moso.

<sup>8</sup> “Mélaw amuk been i kémér me taloo no sékéyém i funa muwe gésala, kéléngém brab ibérém. Non mas na fiyo ké gédoté moy umule magufusa ménkéleng i bala i kémér me taloo no sékéyém, bé géangéy go dob uleono emferno énda i kulang bé lowoh me. Non diyo wén i aféye énda émfandaén taman sa taman. <sup>9</sup> Atin amuk i moto muwéy funa muwe gésala, lésitén brab ibérém. Non mas na fiyo ké gédoté moy umule magufusa énda i bala moto mo, bé géangéy go dob emfernoué énda i kulang bé lowoh me.

<sup>10</sup> “Atin kagom siyawén i de étew gérifantad segiléw bé ni nga. Non béréhé ku begom, wén i karo télaki démiyaga bero, atin bati ro dob lawayo beroy Abay guwe Tulus. <sup>11</sup> Non i Nga i Kéilawane, sani Begéne, ménangéyu dini inok fukasé kuy de étew ménsala do maak do méntadin ro.

<sup>12</sup> “Fégitung gom i fantage bé ni ufama. Wén i ségétewe étew wén i mératu bili-bili no. Endob méntadin i sébaane de. Ati rigoné nuwe? Tagaké noy siyow de folo bra siyow dob fétabtabane, atin angéyé no sélédén i sébaane de méntadin. <sup>13</sup> Tidéw béno, buluk énggito no, toow fo moror. Béréhé ku begom, toow na fo moror sabaf bé nan sébaan méntadin bili-bili énggito no bé de siyow de folo bra siyow énda méntadin ro. <sup>14</sup> Ségiléw so bé ni, i Abay gome Tulus dob lawayo toow fo mika de ké wén i sébaan bé de ni gérifantad do méngintulus mékukum.

<sup>15</sup> “Amuk wén i ségétew dumo mo brab ménsala dob beeme, ay go dob beene inok sébegom-begom saén. Tidéw béno, toroém dey sala ne. Amuk gésénule de, tintu fo té nabanga mo séfule dob Tuluse. <sup>16</sup> Endob amuk énda gésénuleén de, uwitém i ségétewe taloo no ruwo gétew bé de dumo mo séfule mangéy dob beene. Mélaw wén i dumo mo émbérén toow i kékérén me fantag bé sala ne. <sup>17</sup> Endob amuk énda fo gésénuleén de, téboém dob kéluhanay de munur dob lawie féngadafan. Atin amuk énda na fo gésénuleén de, fiyon fo ké téboéy kéluhanay munure de, kagom séloyuk de maak ségétew békén méngintulus look ségétew lémiful kémubra buwis.

<sup>18</sup> “Atin béréhé ku begom i toowe, amuk wén i sugué kom bé énda fakayén rigonén dob fantade ni, énda so fakayén dob lawayo diyo. Brab amuk wén soy sugué kom fakay rigonén dob fantade ni, fakay so dob lawayo diyo.

<sup>19</sup> “Atin béréhé ku so begom, amuk wén i ruwo gétew begom dob duniyae ni séfagayun bé ké dasal gome, i Abay guwe Tulus dob lawayo rigoné no. <sup>20</sup> Non fiyon fo ké wén saén i ruwo taloo no télén gétew sélimud méngadaf Begén, diyou so dob berowe.”

### Fantag bé kéfésagade

<sup>21</sup> Tidéw béno, ménfégédét i Pedrowe brab ménénginsa mano, “Kadnan, amuk wén i dumo gu démoyunén gésala dob begéne, firoy gule fatut fésagada ku? Aw fésagada ku taman fitéw gule?”

<sup>22</sup> Séménumbul i Jesuse mano, “Médoo na gule tidéw bé nan. Kago térenon i émfésagade. <sup>23</sup> Ureté ku begom i sébaane binuwaya fantag bé kéféguléw i Tuluse. Wén i ségétewe datu méguléw, éntukén i de utong i de sugu-sugué no dob beene. <sup>24</sup> Atin amun féngganaya no, nuvitén dob beeney ségétewe bé de sugu-sugué no, laksaén i utong ne. <sup>25</sup> I ni sugu-suguén énda gébayada noy utong ne. Mélaw i datue, fébéléyén i ni sugu-suguén brab bawag ne brab de ngaén, inok waléy ro do rifén. Brab i kéluhanay éntingayéne kaan, fébéléyén so inok gébayada noy utong ne. <sup>26</sup> Endob ménlingkuwéd i ni sugu-suguén dob adafay datue, brab ménfégédaw-gédaw mano, ‘Tingkélonu na. Enda

sénay kurta gu, éndob bayada ku so beem ké wén i kurta gu.’ <sup>27</sup> Ménuray i nay datue de. Mélaw fén sagada no, brab éndaén fén bayadén de. Tidéw béno, fénuleén.

<sup>28</sup> “Tidéw béno, i sunguwe ni sugu-suguén ménagéw brab énggébalaka noy ségétéwe bé de dumo no sugu-suguén, énggéutong dob beene kloh kurta. I ni sungu sugu-suguén génamakén i dumo nuwe ni dob reer ne brab kénrangén. Atin ménbérél mano, ‘Bayadanu bé utong me begén!’ <sup>29</sup> Tidéw béno, ménlingkuwéd i gérupowe ni sugu-suguén, brab ménfégédaw-gédaw mano, ‘Tingkélonu na. Enda sénay kurta gu, éndob bayada ku so beem ké wén i kurta gu.’ <sup>30</sup> Endob i sunguwe ni sugu-suguén énda fo fénggélingoén de. Yamula fénférisu no taman énda gébayada noy utong ne. <sup>31</sup> Amun i de dumo sugu-suguén énggito roy ni ménrigo, toow fo méntete i fédew ruwe de. Atin ménangéy ro dob datue ménlolok, brab nuret roy kéluhanay ménrigowe. <sup>32</sup> Tidéw béno, fentawag i datuey sunguwe ni sugu-suguén brab ménbérél mano, ‘Toow go fo tete étew. Fén sagada ku beem bé kéluhanay utong me begén non ménfégédaw-gédaw go. <sup>33</sup> Fégédaw go so damén bé dumo muwe sugu-suguén loo bé kégédaw guwe beem.’ <sup>34</sup> Toow fo ménkérit i datue, mélaw fénférisu noy ni sugu-suguén taman énda gébayada noy kéluhanay utong ne.”

<sup>35</sup> Atin fentama Jesusey ni binuwaya bé ni kékérél mano, “Loo bé nan i kérigoy Boh guwe dob lawayo bé séngae ségétéw begom, buluk énda toow fo fésagada kom i de étew énggésala dob begome.”

## 19

### Fantag bé ségélake

<sup>1</sup> Tidéw béno, amun énggilid i Jesuse témoreo bé de ni, ménagéw tidéw Galilea brab ménangéy dob sakuf i dakéle ingéd Judea dob difar i wayége Jordan. <sup>2</sup> Atin ménfuray i de médo do ménlimud do étew. Atin diyo fén-adi-adi noy de démeruun bero.

<sup>3</sup> Atin wén i de Fariseo ménangéy dob Beene inok téngkadé ro inok gésumbulo no bero bé békéne damén katabawan. Ménénginsa ro maro, “Aw fakay dob kitab tome ké gélakéy lagéyey bawag ne sabaf bé de udenén do funa no?”

<sup>4</sup> Atin séménumbul i Jesuse mano, “Aw énda séna énggébasana kom i Ménsulate Kékérél i Tuluse mano, ‘Dob féganaye, amun léménimbag i Tuluse, rénigo noy ségétéwe lagéy brab ségétéwe libun.’ <sup>5</sup> Atin bang i Tuluse, ‘Been i niy funay lagéye témagak bé boh ne brab idéng ne atin sétifon bé bawag ne. Atin mélaw i ruwowe gétew waléy ro ségétéw.’”

<sup>6</sup> Atin fentaus Jesusey kékérél ne mano, “Mélaw éndaén ruwo ro gétew non ménwaléy ron maak sébaan. Mélaw békén fatut ké fésésuwayéy kélawané bero, non Tulus i ménféwaléy bero ségétéw.”

<sup>7</sup> Tidéw béno, ménénginsa man i de Fariseo maro, “Sede mélaw ké niray Moisesey sugue bé fakay gélakéy lagéyey bawag ne amuk iraya no sulat bé kégéla ne de, tidéw béno fakayén féagéwé no?”

<sup>8</sup> Séménumbul i Jesuse mano, “Niray Moisesey nan sugu non toow fo métégas i de uléw gom. Endob bé gétaho, amun lénimbag i Tulusey de étew, énda ténungkas i Tulusey de ménisébawag ségélak. <sup>9</sup> Mélaw bérélhé ku begom, ati lagéye gémélak bé bawag ne saliyu bé kékigae funa no de, atin mawag ségiyo libun, énggélamfa.”

<sup>10</sup> Tidéw béno, ménbérél i de kuyugén maro, “Amuk loo bé nan i késébawage, i ségétéwe étew mas fiyo ké énda mawagén.”

<sup>11</sup> Atin bang Jesuse, “I kétoroe ni békén kay kéluhanay de étew. Yamula kay do étew saén fénemili i Tuluse inok énda mawag ro. <sup>12</sup> Wén i de séségiyo-giyo do funay de étew énda mawag ro. Wén i de étew énda gébawag ro non ménasdil ro tidéw fanay kékumah ro. Wén soy do kafun de. Atin wén soy do étew énda mawag ro inok mégéror ro gémalbék témoreo fantag bé kékéulgéw i Tuluse bé de étewén. Mélaw amuk fénemili i Tuluse beem inok énda mawag go, odoro mo.”

<sup>13</sup> Wén i no sébaan fuweh, wén i do étew ménuwit bé de nga ro dob Jesuse inok tégéné no bero bé lala ne démasalan bero. Endob amun énggitoy de kuyugén, génlé roy de étew ni. <sup>14</sup> Endob ménbérél i Jesuse mano, “Féangéy gom i de kloh nga dob Begéne. Brab kagom alangén bero, non i de étew sémarig loo bé késarig i de ni do nga, féguléwoy Tuluse bero.”

<sup>15</sup> Atin ténégé noy de nga ni brab fénfiyo no bero. Tidéw bénou, ménagéw i Jesuse.

### Fantag bé kékawasawe

<sup>16</sup> Wén i no sébaan fuweh, i ségétewe kénogo lagéy ménangéy dob Jesuse atin ménenginsa mano, “Maistéro, ati fiyowe rigoné ku inok gédoté kuy umule magufusa?”

<sup>17</sup> Séménumbul i Jesuse mano, “Sedek fénginsaa mo Begén fantag bé ati fiyowe? Enda i ségiyo fiyo saliyu saén bé Tuluse. Amuk kétaya mo gédoté moy umule magufusa, odoro moy de sugu tidéw dob Moisese.”

<sup>18</sup> Ménenginsa man i ni lagéy mano, “Ati isuwe de bé de sugu?”

Atin séménumbul i Jesuse mano, “Kago méméléhu, kago lémaamfa, kago ménakaw, kago ureténi dumou muwe bé békéne toow, <sup>19</sup> fégadata moy boh me brab idéng me, atin fégédaw go bé de dumou mo étew loo bé kégédaw me bé kaame lowoh.”

<sup>20</sup> Atin bang i lagéye ni, “I kéluhanay de ni nodoro ku. Ati nay fatute rigoné ku?”

<sup>21</sup> Atin séménumbul i Jesuse mano, “Amuk kétaya moy waléye fo métintu dob adafay Tuluse, ule go brab fébéléyém i kéluhanay étingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw bénou, énggonén, odor go Begén.”

<sup>22</sup> Amun énggelingoooy étewe niy ni, toow fo ménertete i fédew ne atin ménagéw non toow fo kawasa.

<sup>23</sup> Tidéw bénou, ménbérél i Jesuse dob de kuyugén mano, “Béréhé ku begom i toowe, toow fo mérégén i kéahur i de kawasa dob kéféguléw i Tuluse. <sup>24</sup> Atin béréhé ku begom, mas mélémuy kéahur i dakéle ayam dob tosong i darume bé kéahur i ségétewe étew kawasa dob kéféguléw i Tuluse.”

<sup>25</sup> Amun énggelingoooy de kuyugén i ni, toow ro fo ménggaif. Atin ménenginsa ro maro, “Ati mélaw i de fakay méfukas?”

<sup>26</sup> Atin ténéngténg Jesuse bero atin séménumbul mano, “Enda fakayén rigonéy de étew, éndob i Tuluse fakay gérigono noy kéluhanane.”

<sup>27</sup> Tidéw bénou, ménbérél i Pedrowe mano, “Ténagak gey i kéluhanane atin ménfuray gey Beem. Ati mélaw i gédoté keye de?”

<sup>28</sup> Séménumbul i Jesuse mano, “Béréhé ku begom i toowe, dob mantuwe duniya amuk mésar i Nga i Kéilawane, sani Begéne, dob gérotore saray méguléwe, i de begom do kuyug gu mésar so dob de folo bra ruwo saray méguléwe inok féguléwo kom i de folo bra ruwo gétribo do Judio. <sup>29</sup> Atin atiy étewe téménagak bé lawi ne taloo no dumou no sétiman idéng, taloo no bohén brab idéngén, taloo no ngaén, taloo no fantadén inok ureté noy fantage bé kéunur ne Begén, gégédot mératuh takéf bé de ténagakén brab gédoté no soy umule magufusa. <sup>30</sup> Endob médooy de étew gérotor bénou waléy do gérifantad moso. Atin médooy de gérifantad bénou waléy do gérotor moso.”

### I binuwayae fantag bé de gémalbék

<sup>1</sup> Atin ménbérél i Jesuse sébaan binuwaya mano, “I kéféguléw i Tuluse bé de étewén ségiléw bé ni. Wén i ségétewe étew, wén i safadén. Wén i no sébaan fuweh ménagéw toow géfuwén séméléd do étew inok gémalbék dob safad ne. <sup>2</sup> Atin ménagayun bayada no bero sébaan félatah loo bé fatute sahud bé ségétérésangane galbék. Tidéw bénou, sénuguén bero mangéy gémalbék dob safad ne. <sup>3</sup> Amun géraraan lémowot i térsange, ménangéy man i gefee ni safad dob fadiyane. Diyo, énggitoy noy de étew téménindég énda i rigoné ro. <sup>4</sup> Mélaw ménbérél dob berowe mano, ‘Angéy gom so galbék dob safad guwe, atin bayada ku begom bé katabuwane.’ <sup>5</sup> Mélaw ménagéw ro mangéy gémalbék.

Tidéw béno, rénigo noy ni bé géutuhe de, atin rénigo no so man bé géraraan lémudug i térsange de. <sup>6</sup> Amun alas singko nén témégénén, ménangéy man dob fadiyane. Atin diyo énggito noy de lagéy téménindég énda i rigoné ro. Atin fénénginsaa no bero mano, ‘Sedek énda gémalbék gom bé ni térsang?’ <sup>7</sup> Séménumbul ro maro, ‘Enda i galbék gey non énda i fégalbék begey.’ Tidéw béno, bénréh i gefee ni safad mano, ‘Angéy gom so galbék dob safad guwe.’ Mélaw ménangéy ro gémalbék. <sup>8</sup> Amun sémingkufén, i gefee bé safade ni bénréhén dob sarigo nuwe mano, ‘Tabarém i de géménalbék atin sukaya mo bero. Bayada mo sunguy de mantu séna gémalbék taman dob de énggétah de.’ <sup>9</sup> Tidéw béno, i de géménalbék bé témégéne nén, énggédot roy sébaane félatah sénga ségétew bero fiyon fo ké géménalbék ro ségeuras saén. <sup>10</sup> Mélaw i de énggétah do géménalbék tidéw géfuwén taman sémingkuf, marok gégédot ro mas na médo kurta. Endob amun bénayada no bero, niraya no so bero sébaan félatah. <sup>11</sup> Tidéw béno, amun éndot roy sahud ruwe, ménbutég-butég ro dob gefee bé safade ni. <sup>12</sup> Ménbéréh ro maro, ‘I de étew énggüray do géménalbék, ségeuras saén i kégalbék ruwe. Endob sénahudo mo bero ségiléw so bé begeye fiyon fo ké géménalbék gey ségétérésangan tidéw géfuwén taman sémingkuf. Fatut damén bayada mo begey mas gérator non géménalbék gey ségétérésangan dob keéduf i térsange.’ <sup>13</sup> Endob ménbéréh i gefee ni safad dob ségétewe bero mano, ‘Adih, énda léniful gu begom. Ménagayun tom bé gémalbék gom ségétérésangan atin bayada ku begom sébaan félatah sénga ségétew. Mélaw rénigo guy ati fénasad guwe. <sup>14</sup> Mélaw dot gomén i sahud gome atin taus gom ule. I ni ségétew énggüray gémalbék, méuyotu mirayan de ségiléw bé kériraya kuwe begom. <sup>15</sup> Békén ba wén i kuwagib gu rémigo ké udenén i kérigo gu bé kurta guwe loo bé kétaya kuwe de? Médaléw gom keeyén sabaf mégédawu bé de ségiyo étew.’”

<sup>16</sup> Tidéw béno, fénggilid Jesusey binuwaya ne mano, “Mélaw i de gérifantad béní, waléy ro moso do gérator. Atin i de gérator béní, waléy ro moso do gérifantad.”

### *I kékuret Jesuse fantag bé kéléhu ne*

<sup>17</sup> Tidéw béno, i lala Jesuse ménagé mangéy Jerusalem, nuvitén i de folo bra ruwo gétew kuyugén inok sébero-bero ro saén. Atin ménbéréh dob berowe bé lala ruwe magéw mano, <sup>18</sup> “Na, magéw tom mangéy dob Jerusalem, sani Ingéd i Nga i Kílawane, sani Begéne, irayu dob de odoroy do fadi brab dob de témooro bé kitabé. Atin kukumé ro Begén féléhuén. <sup>19</sup> Atin atéé ro Begén dob de békén Judio. Atin i de békén Judio, diyangkaé ro Begén, brab tafésé ro Begén, brab féléhué ro Begén dob kruse. Endob amuk méifus i télewe gétérésangan, tébuleu.”

<sup>20</sup> Tidéw béno, i bawag Sebedeowe ménangéy dob Jesuse beroy de ngaén Juan brab Santiago. Atin léméningkuwéd dob adafa Jesuse atin wén i nongotén dob Beene.

<sup>21</sup> Atin ménénginsa i Jesuse mano, “Ati kétaya muwe?”

Séménumbul i ni libun mano, “Suguém bé amuk Beem i méguléwe moso, i de nga gu ni géésar ro so fingé dob kuwono muwe brab i ségétewe de fingé dob biwong me.”

<sup>22</sup> Atin bang Jesuse, “Enda gétiga kom i nan ongoté kom. Aw géfedayday gom bé de kérégénon loo bé mérigowe séko dob Begéne?”

Séménumbul ro maro, “Hoo, gagané key.”

<sup>23</sup> Atin ménbéréh man i Jesuse mano, “Toow mérigo dob begomey de kérégénon mérigowe dob Begéne. Gido loo, békén kagén kuwagib i mémilie bé ati mésare fingé dob kuwono kuwe brab fingé dob biwong guwe. I de ni saran kay de étew fénemili i Abay guwe Tulus mésar diyo.”

<sup>24</sup> Tidéw béno, i de folo gétew dumo ro do kuyugén amun énggelingoo roy ni nongot ro, ménkérít ro bé Juane brab Santiagowe. <sup>25</sup> Mélaw ténavag Jesuse bero kéluhanan mangéy dob Beene, atin ménbéréh dob berowe mano, “Gétiga kom i de méguléw dob de békén Judio, wén i kuwagib ro méguléw bero, atin démoyun sugué ro bero. <sup>26-27</sup> Endob békén fatut loo bé nan dob begome. Amuk wén i ségétew begom méuyot waléy odoron, fatut waléy sugu-suguéy de dumo no. Atin amuk wén i ségétew begom méuyot waléy gérotor,

fatut térifantad. <sup>28</sup> Fatut miring Begén, sani Nga i Kéilawane, non énda ménangéyu dini inok wén i do sugu-sugué ku. Yamula ménangéyu dob duniyae ni inok waléyu sugu-suguén brab inok iray guy umul guwe fégéfukas bé médoowe étew dob de sala ro.”

### *Nuwa Jesusey ruwowe gétew langafén*

<sup>29</sup> Amun ténagak Jesusey ingéde Jeriko beroy de kuyugén, wén i de médoos do ménlimud do étew ménfuray de. <sup>30</sup> Atin wén i ruwowe gétew langafén ménssar dob doror i aguwone. Amun énggelingoo roy Jesuse témara, ménkes ro maro, “Séfu Datu Dabid, fégédawan gey!”

<sup>31</sup> Endob i de ménlimud do étew génlé ro maro, “Kagom selekén!” Endob taus ro so mékes toow na fo métanug maro, “Séfu Datu Dabid, fégédawan gey!”

<sup>32</sup> Tidéw béo, téménréni Jesuse atin ténawagén bero. Atin ménenginsa dob berowe mano, “Ati kétaya kome rigoné ku dob begome?”

<sup>33</sup> Séménumbul ro maro, “Kadnan, méuyot gey de ké féadi-adiné mo begey inok gérito gey damén.”

<sup>34</sup> Atin ménuray i na Jesuse bero atin kénuwahén i de moto ro. Sonom béo, énggégito ro néen. Atin ménfuray ro bé Jesuse.

## 21

### *I kéahur Jesuse dob Jerusalem*

<sup>1</sup> Atin méntaus i Jesuse beroy de kuyugén mangéy Jerusalem. Amun gédét ron dob Jerusalem, énggumah ro dob ingéde féndawét Betfage dob tuduke féndawét Olibo. Tidéw béo, sénugu Jesusey ruwowe gétew bé de kuyugén métah. <sup>2</sup> Ménbéréh dob berowe mano, “Taus gom agéw mangéy dob nan ingéd gésaréwo kom. Buluk gérumah gom diyo, gito gom i kudae féndawét ‘asno’ ménikét diyo beroy nati nuwe. Ukoh gom bero atin uwit gom bero dob Begéne. <sup>3</sup> Atin amuk wén i ménnginsa dob begome, béréh gom de makom, ‘Kailangay Kadnane bero.’ Atin i ménnginsae magad tungkasé no begom.”

<sup>4</sup> I ni ménrigo inok métuman i kékéréh i sénarigoy Tuluse muret bé kékéréh ne mano,

<sup>5</sup> “Béréh go dob de étew bati dob Jerusalem mamo, ‘Téngténg gom, gérumah i datu gome térifantad kémuda dob natiwe asno.’ ”

<sup>6</sup> Tidéw béo, ménagéw i de ni ruwo gétew kuyugén brab nodoro roy sugu Jesuse.

<sup>7</sup> Atin ménssule ro nuwit roy kudae féndawét asno brab nati nuwe. Tidéw béo, namféno roy natiwe bé de kégal ro brab kéménuda i Jesuse. <sup>8</sup> Diyo wén i de médoos do étew ménlimud. Bénékah roy de dumo bé de kégal ro dob aguwo Jesuse. Atin i de dumo bero kéménléng ro do dau bongo brab bénékah ro dob agéwone inok fégito roy kébasana ruwe de. <sup>9</sup> Atin i de médoos do étew magéw ro métah bé Jesuse brab i de médoos de furay ro bé Jesuse, ménkes ro maro, “Dayéwé tom i séfu Datu Dabide! Féfiyonéy Tuluse damén i ni étew gérumah tidéw dob Kadnane! Dayéwé tom i Tuluse!”

<sup>10</sup> Amun énggumah i Jesuse dob Jerusalem, kélogoyan i kéluhanay de étew. Mén-sébéréh ro maro, “Ati ni étew?”

<sup>11</sup> Atin i de médoos do étew ménodor bé Jesuse séménumbul ro maro, “Been i niy sarigoy Tuluse muret bé kékéréh ne féndawét Jesus tidéw Galilea.”

### *Dénédél Jesusey de démagang dob lawi i Tuluse*

<sup>12</sup> Tidéw béo, ménangéy i Jesuse dob lawi i Tuluse. Amun ménahur, dénédéléni i de étew démagang brab do méléy-méléy diyo. Atin bénluweén i de ahayay de lémuluk kurta brab ténuwarén i de saray de émfébéléy do fégétulak do marafati. <sup>13</sup> Atin ménbéréh dob berowe mano, “Wén i Ménsulate Kékéréh i Tuluse mano, ‘I lawi guwe fédawétén lawi gonon démasal.’ Endob fénwaléy gom lawi i de ménakaw.”

<sup>14</sup> Tidéw béo, i de langafén brab de fikat ménangéy ro dob Jesuse dob lawi i Tuluse. Atin fén-adi-adi no bero. <sup>15</sup> Endob i de odoroy de fadi brab de témooré béréh ménwaléy ro ménkérit amun énggito roy de ni fiyo rénigo Jesuse brab amun énggelingoo roy kékées i de nga dob lawi i Tuluse maro, “Dayéwé tom i séfu Datu Dabide.” <sup>16</sup> Mélaw ménbéréh i

de ni odoron dob Jesuse maro, “Aw énggelingoo moy de kékéréné i de ni nga? Sedek énda fétéréné mo bero?”

Séménumbul i Jesuse mano, “Hoo, énggelingoo ku. Atin fiyo ké dayéwé ro Begén. Aw énda séna énggébasana kom i Ménsulate Kékéréné i Tuluse mano, ‘Fédayéw i Kadnane bé de nga.’”

<sup>17</sup> Tidéw béo, tétagak Jesuse bero atin méntékédan dob Jerusalem mangéy dob ingéde Betania. Diyo ménbati bé no kélungonon.

<sup>18</sup> Bé géfuwéne de, bé lala ne séfule mangéy Jerusalem, ménlayaf i Jesuse. <sup>19</sup> Atin énggito noy sébaane kayéw féndawét igos dob doror i aguwone. Mélaw fénggédéto no inok médot bé onok ne. Endob amun séménléd de, énda i énggito no onokén saliyu bé de dau no. Tidéw béo, ménbéréné dob kayéwe ni mano, “Endaén damén mégongok go!” Sonom béo ménlaay i kayéwe ni.

<sup>20</sup> I de kuyugén, amun énggito roy ni, ménggaif ro. Atin ménenginsa ro maro, “Sedek ménagad ménlaay i kayéwo no?”

<sup>21</sup> Atin séménumbul i Jesuse mano, “Béréhé ku begom i toowe, amuk tintu gom munur brab énda ruwo-ruwoy fédew gome, gérigono kom i loowe bé rénigo guwe dob kayéwe. Atin békén saén i ni, non gébérého kom dob tudukey ni makom, ‘Angéy go dob dogote’, atin mérigo ba. <sup>22</sup> Non amuk munur gom, gédoté kom i ati ongoté kome ké démasal gom dob Tuluse.”

<sup>23</sup> Tidéw béo, ménangéy man i Jesuse dob lawi i Tuluse, atin diyo téménoro. Atin i de odoroy de fadi brab de odoroy de Judio ménangéy ro dob Jesuse atin ménenginsa ro maro, “Ati atura muwe rémigo bé de ni? Ati ménirayane Beem kuwagib bé ni?”

<sup>24</sup> Séménumbul i Jesuse mano, “Sémuli ménenginsaan begom. Amuk sumbulo kom Begén, sumbulo ku so begom ké ati kuwagib guwe rémigo bé de ni. <sup>25</sup> Ati séménugue bé Juane inok mautis, Tulus loo ké étew saén?”

Atin séédél ro maro, “Amuk béréné tom ‘Tidéw dob Tulusó’, fénginsaa no betom sedek énda fénéngintoowo tom i Juane. <sup>26</sup> Endob buluk béréhé tom, ‘Tidéw dob étewé,’ kéléhanay de ni étew mékérít ro betom.” Ménngilak ro bé de étew non ménunur i de ménlimud bé Juaney ségétéwe sénarigoy Tuluse. <sup>27</sup> Mélaw séménumbul ro dob Jesuse maro, “Enda gétiga key de.”

Atin mélaw bénréh Jesus mano, “Enda so béréhé ku dob begome ké ati kuwagib guwe rémigo bé de ni rigoné ku.”

<sup>28</sup> Tidéw béo, nuret Jesusey sébaane binuwaya mano, “Fégitung gom i fantage bé ni. Wén i ségétéwe lagéy wén i ruwo gétew ngaén lagéy. Ménangéy dob ofoe de atin ménbéréné mano, ‘Adu, agéw go mangéy dob safade gémalbék béní.’ <sup>29</sup> Endob i ni nga ménbéréné mano, ‘Mikau.’ Endob énda mérugayén tidéw béo, ménagéw non ménfegalín i fédew ne. <sup>30</sup> Atin ménangéy soy boh ne dob tuwaréye bé de ngaén. Atin ménbéréné mano, ‘Adu, angéy go galbék dob safade béléewe ni.’ Atin bang i ni nga, ‘Hoo, magéwu.’ Endob énda fo ménagéwén. <sup>31</sup> Na, ati karang gome de, ati isuwe bé de ngaén i ménodorone bé kétayay boh ruwe?”

Séménumbul ro maro, “I ofoe de.”

Atin bang Jesuse man, “Hoo, atin béréhé ku begom i toowe, i de ménsala étew loo bé de lémifil do kémubra buwis brab de sundal géahur dob kékéguléw i Tuluse géétah na begom. <sup>32</sup> Non i Juan Bautistawe ménangéy dob begome fégétiga no begom i métintuwe aguwon, éndob énda ménunur gom de. Endob i de lémifil kémubra buwis brab de sundal énggésénule ro ménunur ro de. Atin fiyon fo ké énggito gom i kégésénule ruwe, énda fo gésénule gom taloo no munur gom de.”

### *I binuwayae fantag bé de tete témalima*

<sup>33</sup> Atin ménbéréné man i Jesuse mano, “Fégélingo gom nay ni ségiyo binuwaya. Wén i ségétéwe étew wén i safadén nohoko no do ubas. Atin fénlangkatén i lémiwéte de, atin kénélatén i fédongo nuwe bé fégékérésé bé de onokén. Atin réménigo so tambala. Tidéw béo, féntalimaén bé de ségiyo étew. Tidéw béo, ménagéw mangéy dob mérayue

ingéd. <sup>34</sup> Amun énggumah i gaiy kékétéwe de, sénuguén i de sugu-sugué no inok doté roy kaane de baad bé de onokén. <sup>35</sup> Endob i de témalima bé safade, génamak roy de ni sugu-suguén. Atin lénubag roy ségétéwe de, atin fénléhu roy ségétéwe de, atin nibéro ro batéw i gétéléwe de taman ménléhu. <sup>36</sup> Tidéw bénō, i gefee bé safade ni, sénuguén man i de ségiyo do sugu-sugué no éndob mas na médo. Endob i de témalima bé safade, ségiléw soy rénigo ruwe dob berowe. <sup>37</sup> Tidéw bénō, i gefee bé safade ni, sénuguén i tintuwe ngaén non fénggitungén mano, ‘Fégadata roy nga guwe.’ <sup>38</sup> Endob amun énggitoy de témalima bé safad ne, ménsébéréh-béréh ro maro, ‘Been i niy nga i gefee bé ni safad. Féléhué tom inok gékatom i ni safad.’ <sup>39</sup> Mélaw génamak ro, atin fénstut ro dob liyuy safade. Tidéw bénō, fénléhu ro.”

<sup>40</sup> Atin fénauts Jesusey kékéréh ne mano, “Amuk gégumah i gefee bé safade ni, ati rigoné nuwe dob de témalima bé safad ne?”

<sup>41</sup> Séménumbul ro maro, “Angéyé no féléhuén i de ni tete étew. Tidéw bénō, irayén man dob ségiyowe témalima inok iray ro dey kaane baad bé de nohok ké gégumah i kékétéwe de.”

<sup>42</sup> Atin ménbéréh i Jesuse dob berowe mano, “Aw énda séna énggébasana kom i Ménsulate Kékéréh i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. I ni rénigoy Kadnane ula-ula, atin mégaif tom de.’”

<sup>43</sup> Atin fénauts Jesusey kékéréh ne mano, “Mélaw béréhé ku begom i Tuluse éndaén sarigé noy safad ne dob begome. Yamula sarigé no dob de ségiyo étew rigoné roy kétaya nuwe. I atag i ni, éndaén féguléwoy Tuluse begom. Yamula féguléwo noy de ségiyo étew munur dob Beene. <sup>44</sup> Atin atiy mélawue dob nan batéw toow fo mébinasa. Brab buluk i batéwe ni mélawu dob de étew, rénahé no bero maak bubuk sébuwan.”

<sup>45</sup> I de odoroy de fadi brab de Fariseo, énggelingoo roy de ni binuwaya nuret Jesuse. Atin gétiga ro beroy bénrého nuwe fantag bé de ni. <sup>46</sup> Mélaw ténlama ro kénéfo i Jesuse, éndob énda gagane ro de non ménggilak ro bé de médo do ménlimud do étew diyo. Non i de ni étew kénarang roy Jesuse ségétew sénarigoy Tuluse muret bé kékéréh ne.

## 22

### *I binuwayae fantag bé uyote*

<sup>1</sup> Atin ménuret man i Jesuse binuwaya dob de étew. <sup>2</sup> Ménbéréh mano, “I kéféguléw i Tuluse loo bé ni. Wén i ségétewe datu réménigo karagiya dob uyot i nga ne lagéy fébabagén. <sup>3</sup> Amun énggumah i gaiwe, sénuguén i de sugu-sugué no mangéy témwag bé de étew sénengkat ro brab émbéréh dob berowe bé énggumahén i gaiy uyote brab fatut magéw ro mangéy dob lawi ne. Endob ménika ro magéw. <sup>4</sup> Mélaw i datue ni sénuguén man i de ségiyo sugu-sugué no mangéy méréh dob de ni do étew sénengkat ro mano, ‘Méntafayén i karagiye béleewe ni. Ménsumbalién i de bobo ayam atin méntogohén i kéluhanane. Enggomén, angéy gomén dob uyote ni.’ <sup>5</sup> Endob i de étew sénengkat ro, énda fo nifat ro de brab énda fo ménangéy ro dob uyote ni. Yamula i ségétewe de ménangéy dob safad ne, atin i ségétewe de ménangéy dob daganga nuwe. <sup>6</sup> Atin i de dumo bé de ni étew sénengkat ro génamak roy de sugu-suguéy datue ni. Atin lénubag ro brab fénléhu ro bero. <sup>7</sup> Mélaw i datue ni toow fo ménkérít. Mélaw sénuguén i de sundalo no atin fénléhu roy de ni étew ménméléhu, atin ténuwég roy ingéd ruwe. <sup>8</sup> Tidéw bénō, ménbéréh dob de sugu-suguén mano, ‘Méntafayén i uyote, éndob i de sungu do étew sénengkat gu énda fo médait ro mangéy dini. <sup>9</sup> Agéw gom mangéy dob de dakél aguwon atin séngkat gom médo do étew taman atiy gito gome de.’ <sup>10</sup> Mélaw i de sugu-suguén ménagéw ro dob de aguwon atin lénimud roy de médo do étew, sani kéluhanay de énggito ro do fiyo étew brab do tete étew. Atin mélaw i gonoy uyote ni toow fo ménféno bé étewe. <sup>11</sup> Endob amun ménahur i datue inok téngténgé noy de kana, énggito noy ségétewe lagéy énda kéménégalañ loo bé fatute dob uyote. <sup>12</sup> Atin ménenginsa i datue mano, ‘Adih, sedek ménahur go dob ni uyot énda kéménégalañ go loo bé fatute?’ Endob

énda séménumbul i lagéye ni. <sup>13</sup> Tidéw béno, bénréh i datue dob de sugu-sugué no mano, ‘Ikét gom i de kémérén brab de sékéyén, atin ibér gom dob liyuy lawie ni mangéy dob délémone. Diyo kémérew brab kémigét i de kifé no.’”

<sup>14</sup> Atin fénggilid Jesusey binuwaya ni mano, “Non fiyon fo ké médooy de étew sénéngkat i Tuluse, kloh saén i mafémilie de waléy do étewén.”

#### Fantag bé buwise

<sup>15</sup> I de Fariseo, ménangéy ro sélimud sébero-bero saén. Atin ménsébérén-bérén ro fantag bé ati kétengkad ro bé Jesuse inok gébérén bé békéne damén katabawan. <sup>16</sup> Tidéw béno, sénugu roy de dumo bé de kuyug ro brab de dumo bé de kuyug Datu Herod mangéy méninsa dob Jesuse. Atin ménbérén i de ni étew dob Jesuse maro, “Maistéro, gétiga key toow i kétero me. Brab métintu go, énda i isu ramigo mo bé de étew. Yamula toroé moy toowe fantag bé kétayay Tuluse toow. <sup>17</sup> Mélaw bérén hém begey, ati karang me de, aw fatut gey ba mayad buwis dob Sesare, sani datue dob Roma taloo no énda?”

<sup>18</sup> Endob i Jesuse énggétiga noy tetee kétaya ro brab bénréhén bero mano, “I de begom do ubo-ubo gom saén ménintulus. Sedek télamané kom Begén fagakaran?

<sup>19</sup> Féténgténg gom Begén i félatahe kurta fégébuwis.”

Amun niraya ro de, <sup>20</sup> ménenginsa i Jesuse dob berowe mano, “Ati gefee dawét brab falas gito gom dob nan?”

<sup>21</sup> Séménumbul ro maro, “Ka Sesar.”

Tidéw béno, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

<sup>22</sup> Amun énggelingoo roy ni, ménngaij ro bé késumbul Jesuse. Atin ménagéw ro téngak roy Jesuse.

#### Fantag bé kétébulee

<sup>23</sup> Bé no so térsang, wén i de Saduseo ménangéy ro dob Jesuse. (Been i berowey de énda ménintoow bé kétébule i Tuluse bé de étew moso.) <sup>24</sup> Ménbérén ro dob Jesuse maro, “Maistéro, bénréh Moisese bé buluk i ofo i ménléhue, brab énggélédo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. <sup>25</sup> Na, wén i fitew gétew sétuwaréy falan lagéy ménbatí dini Brab i ofoe de ménawag. Tidéw béno, ménléhu énda i nga ro. Tidéw béno, i gétunduge de bénawagén soy bawage fénled i ofo ne. <sup>26</sup> Atin ménléhu so énda i nga ro. Atin i gétéléwe de bénawagén so taman dob géfitew ruwe. Endob ménléhu ro kéluhanan énda i nga ro. <sup>27</sup> Tidéw béno, ménléhu soy ni libun. <sup>28</sup> Mélaw bé gaiy kétébulee moso, ati isuwe bawag i ni libun bé de ni fitew gétew sétiman idéng? Non énggabawaga no bero kéluhanan bé méuyag ro de séna.”

<sup>29</sup> Séménumbul i Jesuse mano, “Tintu békén katabawan i kífégitung gome. Non énda gétiga kom i Ménsulate Kébérén i Tuluse taloo noy barakat ne. <sup>30</sup> Non amuk tébule i de étew, ségiléw ro bé de télaki dob lawayo atin énda sébawag ro. <sup>31</sup> Atin fantag bé kétébulee, aw énda séna énggabasana kom i Ménsulate Kébérén i Tuluse dob begome? <sup>32</sup> Fiyon fo ké ménléhu i ro Abrahame, Isak, brab Jakob, bang i Tuluse, ‘Begéney Tuluse féngadafé Abrahame, Isake, brab Jakobe.’ I atag i ni, i Tuluse féngadafé de méuyag do étew, békén i de ménléhu.”

<sup>33</sup> Atin amun énggelingoooy de étew i ni kétero Jesuse, ménngaij ro.

#### I toowe na fo gérotor sugu

<sup>34</sup> I de Fariseo, amun énggelingoo roy fantage bé kétéantés Jesuse bé de Saduseo, ménslimud ro. <sup>35</sup> Atin i ségitewé bero témoře bé kitabe, téngkadén i Jesuse inok énda damén katabawan i késumbul ne. <sup>36</sup> Ménenginsa mano, “Maistéro, ati isuwe toow fo gérotor bé de sugu dob kukumay Tuluse?”

<sup>37</sup> Séménumbul i Jesuse mano, “Féimu go bé Kadnane Tulusém bé kéluhanay fédew me, brab kéluhanay kamatu me, brab kéluhanay itunga muwe. <sup>38</sup> Been i niy toowe fo gérotor sugu. <sup>39</sup> I géreruwowe toow fo gérotor sugu ringon so bé sunguwe de. Féimu go bé dumo muwe ringon so bé kímu me bé kaame lowoh. <sup>40</sup> I toowe atag i kéluhanay

de kukuman niray Moisese betom tidéw dob ni ruwo timan sugu. Tidéw so dob niy kéluhanay ténero i de sénarigoy Tuluse muret bé kékéréh ne.”

<sup>41</sup> Amun ménlimud sénay de Fariseo, ménénginsa i Jesuse dob berowe mano, <sup>42</sup> “Ati antaf gom bé Kristowe? Ati katufua nuwe?”

Séménubul i de Fariseo maro, “Dabid i katufua Kristowe.”

<sup>43</sup> Ménbéréh man i Jesuse mano, “Amuk loo, ati kéfanu-fanu nuwe ké fénbéréh i Rémogor i Tuluse bé Dabide bé fédawétén i Kristowe ‘Kadnan?’ Non ménbéréh i Dabide mano, <sup>44</sup> ‘I Kadnane ménbéréh dob Kadna kuwe, sar go dob kuwono kuwe taman témabanu bé de sébanil Beem.’ <sup>45</sup> Amuk fénfédawét Dabidey Kristowe ‘Kadnan’, ati kéfanu-fanu nuwe ké i Kristowe séfu Dabide saén?”

<sup>46</sup> Endob énda i ségétew bero énggésumbul, ménantés ro. Atin tidéw bé no gai, éndaén i étew émbaraw ménginsa dob Jesuse.

## 23

<sup>1</sup> Tidéw béno, ménbéréh i Jesuse dob de ménsélimud étew brab dob de kuyugén mano, <sup>2</sup> “I de téromo bé kitabe brab de Fariseo, beroy de étew sénarigon téromo bé kitabé niray Moisese. <sup>3</sup> Mélaw fatut odoro kom démoyun i kéluhanay kétoro ruwe begom. Endob kagom iringén i de rigoné ro non énda modor ro bé karowe kétoro. <sup>4</sup> Sugué roy de étew bé médoowe, maak féobo ro beroy de toow fo émbécat do obo, éndob énda témabang ro de. <sup>5</sup> Fédayéw-dayéw ro saén dob téngaangay de étew. Fénakél roy de fédongo ro bé Ménssulate Kékéréh i Tuluse ténaléy ro bé de kémér ro inok gitoy de étew. Atin féntaah roy de kégal ro maak do tintu fo méngintulus. <sup>6</sup> Atin méuyot ro mésar dob de fiyo saran dob kandulie brab dob de lawi féngadafan. <sup>7</sup> Atin méuyot ro fégadatan ségifaén dob de fadiyan brab fédawét i de étew bero ‘Maistéro.’ <sup>8</sup> Endob kagom fédayaén i de étew fédawét ro begom ‘Maistéro’, non fantay-fantay gom sédumon atin ségétew saén i Maistéro gome. <sup>9</sup> Atin kagom fédawét i de étew dob duniyae ni ‘Abay’, non ségétew saén i Abay gome sani Tuluse dob lawayo. <sup>10</sup> Atin kagom so fédayaén i de étew fédawét ro begom ‘Uléw’, non ségétew saén i Uléw gome sani Begéne, Kristo. <sup>11</sup> I toowe na fo gérotor dob begome fatut waléy sugu-suguén. <sup>12</sup> Atiy étewe téfégérotor, fégérifantadén. Atin i étewe térifantad, fégérifantadén.

<sup>13</sup> “I begome do Fariseo brab do téromo bé kitabé, mékukum gom fo toow. Ubo-ubo saén i kékéngintulus gome. Alangé kom i de étew méuyot mahur dob kékéngintulus i Tuluse. Mika gom mahur atin alangé kom i de étew méuyot mahur. <sup>14</sup> Mékukum gom fo toow do téromo bé kitabe brab begome so do Fariseo. Ubo-ubo saén i kékéngintulus gome. Lafisé kom i de libun baléw inok afasé kom i de lawi ro. Tidéw béno, démasal gom bé de métaha kédasal dob téngaangay de étew non makom ké médirung i de ni tete rigoné kom. Sabaf bé ni toow na fo géttimal ké mékukum gom moso.

<sup>15</sup> “Mékukum gom fo toow do téromo bé kitabe brab begome do Fariseo. Ubo-ubo saén i kékéngintulus gome. Mégéror gom magéw émféunur bé ségétew étew dob Tuluse. Endob amuk munur, féwaléyé kom toow na fo tete bé begome, funa no toow na fo fatut mangéy dob uleono emferno.

<sup>16</sup> “Mékukum gom fo toow. Maak do langafén gom éndob araké kom i de ségiyo étew. Ténero gom bé fiyon fo ké wén i étew sémafa bé lawi i Tuluse, ulanden ké énda métuma no. Endob amuk wén i rémigo safá bé de bélodon dob lawi i Tuluse, bérhé kom tintu fo fatut tumané noy fasad ne. <sup>17</sup> Dufang gom brab maak langafén gom. Ati isuwe toow na fo gérotor, i de bélodon dob lawi i Tuluse look i mékétfuwe lawi i Tuluse funay de bélodon mékétfu? Toow na fo balilaga i lawi i Tuluse. <sup>18</sup> Atin téromo gom so bé amuk sémafa i étewe dob ahayane tulakan dob lawi i Tuluse, ulanden ké métuman i fasad ne. Endob amuk sémafa bé atiy tulake diyo dob no tulakan bérhé kom dob beene bé tintu fo fatut tumané noy fasad ne. <sup>19</sup> Toow gom fo maak do langafén! Ati isuwe toow na fo gérotor, i tulake look i mékétfuwe tulakan funay tulake mékétfu? Mas gérotor i ahayane tulakan. <sup>20</sup> Mélaw amuk sémafa i ségétew étew dob ahayane tulakan, énda saén sémafaén dob nan, yamula sémafa so dob kéluhanay de tulak féndiyo dob ahayane. <sup>21</sup> Atin amuk sémafa

i ségétéwe étew dob lawi i Tuluse, énda sémafaén saén dob nan, yamula sémafa so dob Tuluse bati diyo. <sup>22</sup> Atin amuk sémafa i ségétéwe étew bé lawayo, sémafa so dob saray Tuluse brab dob Tuluse mésaran de.

<sup>23</sup> “Mékukum gom fo toow do téromo bé kitabé brab de begom do Fariseo. Ubo-ubo saén i kéféngintulus gome. Iray gom dob Tulusey géfoloe bé kéluhanay languntama kome fiyon i faninue nohok gom, éndob dénigur gom i de gérotor sugu dob kitabe loo bé kétintuwe, brab kégédawe, brab gésarigone adat. I de ni niray gom fatut rigoné kom éndob kagom digurén i de dumo de. <sup>24</sup> Maak do langafén gom marak bé ségiyowe étew! Modor gom bé de kloh do sugu éndob félisé kom i de gérotor do sugu. Ségiléw gom bé ségétéwe étew kédané noy liféte tidew dob wayége inémé no, éndob inémé noy dakéle ayam.

<sup>25</sup> “Mékukum gom fo toow do téromo bé kitabe brab begome do Fariseo. Ubo-ubo gom saén métintu éndob i de fédew gom toow fo tete. Non toow gom fo arumén brab lémisif. Ségiléw gom bé ségétéwe étew urahé noy tabue look biléwe fingé fuweh saén éndob dungisan fo toow dob bukag ne. <sup>26</sup> Maak do langafén gom, begom do Fariseo, non énda gito gom i toowe. Féfiyo gom i de fédew gom loo bé ségétéwe murah bé bukag i tabue. Tidew béno, tintu gom fiyo, brab métintuy adat gome so.

<sup>27</sup> “Mékukum gom fo toow do téromo bé kitabe brab de begom do Fariseo. Ubo-ubo gom saén fiyo éndob tete i de adat gom. Ségiléw gom bé de lóbéng fiyoy de falas ro dob liyuwe, éndob dob bukage wén i do bukal de brab do mérénah do bangkay. <sup>28</sup> Non ubo-ubo gom saén métintu inok i de étew karangé ro begom do fiyo étew. Endob i de fédew gom méfeno bé tugie brab sala.

<sup>29</sup> “Mékukum gom fo toow do téromo bé kitabe brab de begom do Fariseo. Ubo-ubo saén i kéféngintulus gome. Rémi gom do fiyo lawi lóbéngon kay de sénarigoy Tuluse, brab rémi gom fiyo do lóbéngon kay de métintu étew ménrugayén ménléhu. <sup>30</sup> Atin béréhé kom makom, ‘Amuk méuyag gey bé gaiwe méuyag i de ni sénarigoy Tuluse muret bé kékéréh ne, énda mamung gey bé de katufua key méméléhu bero.’ <sup>31</sup> Endob bé nan kékéréh gom, fégito gom bé begom i de séfu i de ménméléhu bé de ni sénarigoy Tuluse.

<sup>32</sup> Mélaw fatut fétaus gom i de tete rénígoy de katufua kom. <sup>33</sup> Maak do ulé gom non i de katufua kom maak do ulé ro. Mélaw kagom karangén de ké géséliya gom bé kékukume begom mangéy dob uleono emferno. <sup>34</sup> Mélaw sugué kuy de sénarigoy Tuluse muret, brab de gétigan étew, brab de téromo mangéy dob begome. Endob féléhué kom i de dumo bero, brab féléhué kom i de dumo bero dob de krus, brab badasé kom i de dumo bero dob de lawi féngadafan, brab fégétaé kom i de dumo bero dob de ségiyo-giyo ingéd.

<sup>35</sup> Mélaw mékukum gom bé sala i de étew bé kékéléhu ruwe bé de métintu étew, tidew dob sunguwe métintu étew ménléhu féndawét Abel taman dob Sekariase sani nga Barakiase. Fénléhu dob lawi i Tuluse dob élét i ahayane tulakan brab mékétéfuwe sibéy. <sup>36</sup> Béréhé ku begom i toowe, i de begom do étew méuyag béni mékukum gom sabaf bé de ni sala bé kékéléhue bé kéluhanay de ni.”

<sup>37</sup> Tidew béno, ménbéréh i Jesuse fantag bé adat i de étew dob Jerusalem mano, “I Begome do étew dob Jerusalem, tete i fédew guwe fantag bé begome. Non fénléhu gom i de sénarigoy Tuluse muret brab nibéro kom batew i de sénugu dob begome taman ménléhu ro. Firoy gule i kétaya kuwe térimu begom loo bé kétimu i méritone manok télikub-kubo noy de fiyakén bé de fafakén? Endob ménika gom de. <sup>38</sup> I lawi gome métak brab mébinasa moso. <sup>39</sup> Atin béréhé ku begom, tidew béleewe ni, éndaén gito gom Begén taman énda émbéréh gom moso, ‘Féfiyonéy Tuluse damén i gérumahe tidew dob Kadnane.’ ”

gom i de ni? Béréhé ku begom i toowe, i kéluhanay de ni mébinasa, brab fiyon i de batéw fenggérigo de émbéragar ro.”

<sup>3</sup> Amun ménasar i Jesuse dob tuduke féndawét Olibo, ménangéy i de kuyugén dob Beene sébero-berou saén. Atin ménbéréh ro maro, “Béréhém begey kédiron mérigoy de ni. Brab ati fégéolonone de ké gédétén géumah i késéfule me brab tamfaday de gai?”

<sup>4</sup> Séménumbul i Jesuse mano, “Ingat gom inok énda méfagakaran gom. <sup>5</sup> Non médooy de étew géumah usaré roy dawét guwe, brab béréhé ro maro, ‘Begéney Kristowe.’ Atin médooy de géfagakara ro. <sup>6</sup> Atin gélingoo kom i kékéréh i sétibohé brab gélingoo kom soy fantage bé de gira. Endob kagom mégilak de. I de ni kailangan mérigo éndob békén sénay ni tamana nuwe. <sup>7</sup> I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. Atin wén mosoy lénggob brab do luba dob de séségiyo-giyo do ingéd. <sup>8</sup> Endob i de ni féganaya no saén loo bé kékéganay i kékédawétay ségétéwe libun obor gédétén mégénga.

<sup>9</sup> “Atin i kéluhanay de étew mérarék ro begom sabaf bé kénéur gome Begén. Atin mélaw kéroón gom inok ferasayé ro begom brab féléhué ro begom. <sup>10</sup> Atin bé beno, wén i médooy de étew témérén munur. Atin sékéfo ro brab mésérarék ro. <sup>11</sup> Tidéw beno, médooy de ubo-ubo sarigoy Tuluse muret bé kékéréh ne géumah brab fégakara roy de médooy de étew. <sup>12</sup> Atin sabaf bé kélégeb i tetee, éndaén ségdaw i de étew. <sup>13</sup> Endob ati géfedaydaye munur taman dob tamfadane, méfukas ro. <sup>14</sup> Atin i ni Fiyo Uret fantag bé kékéulgéw i Tuluse ureténi dob kéluhanay de ingéd dob duniiae ni inok gétigay kéluhanay de étew. Tidéw beno, géumah i tamanane.

<sup>15</sup> “Atin gito gom i ‘Mékésirang-sirange Surga’ bénréh i sénarigoy Tuluse féndawét Daniel bé do gétah. Atin témindég dob mékétefuwe gonon.” (Fégesobutéy masawe.)

<sup>16</sup> Atin féntaus Jesusey kékéréh ne mano, “Bé beno gai, i de étew bati dob Judea fatut méraréy ro dob de tuduk. <sup>17</sup> Atin i étewe dob liyuy lawi ne, békénén fatut mahur dob lawi ne inok angéyé noy insod ne. Fatut magayasén méraréy. <sup>18</sup> Atin i étewe diyo dob safad ne, békénén fatut séfule dob lawi ne inok angéyé noy géruwowe lafin kégalén. <sup>19</sup> Bé do no do gai, toow fo mékégédaw-gédaw i de libun obor brab de mériton do idéng. <sup>20</sup> Dasal gom dob Tuluse brab ongot gom dob Beene inok dob gaiwe kailanga kom i méraréye bé de gai mélégénéy taloo no gai kétérén. <sup>21</sup> Non toow na fo géttimal i kérégéy ni bé kéluhanay de ségiyo do kérégénon dob ségiyowe gai tidéw bé kéklimbag i Tuluse bé duniiae taman so béleewe ni. Atin éndaén i kérégénon loo bé ni tidéw bé beno gai. <sup>22</sup> Endob i Tuluse fénfokoén i do no gai. Amuk énda rénigo noy ni, énda i ségétéw méuyag. Féfokoé noy de gai non ménuray i na nuwe bé de fénémilién étew.

<sup>23</sup> “Bé beno gai, amuk wén i émbéréh dob begome mano, ‘Téngténg gom, ay niy Kristowe,’ taloo no ‘Diyoo, ay nan,’ kagom munur de. <sup>24</sup> Non géumah i de émbéréh, ‘Begén i Kristowe,’ brab do ubo-ubo sénarigoy Tuluse. Atin gérigono roy de dakél mékégaif inok géfagakara roy de fénemili i Tuluse, amuk fakay. <sup>25</sup> Fétuntay gom i de ni. Béréhé ku dob begome lokut énda séna mérigo no.

<sup>26</sup> “Atin amuk wén i émbéréh dob begome mano, ‘Téngténg gom, diyo i Kristowe dob gonone énda i étew de bati,’ kagom mangéy diyo. Look amuk émbéréh ro maro, ‘Téngténg gom, ay diyoo ménrékunéy,’ kagom munur de. <sup>27</sup> Non i Nga i Kéilawane, sani Begéne, giton i késéfule guwe ségiléw bé kégítone bé kilote réméndaw tidéw sébangan mangéy élédon.

<sup>28</sup> “Fiyon atiy gonoy de ménléhu, diyo soy de uwak sétimu.

<sup>29</sup> “Enda mérugayén tidéw bé de mérégén do gai, i térsange waléy délémon, brab i térsang kélungonone éndaén réméndawén, brab i de giton mélawu ro tidéw dob lawayo brab i de éntingayén dob lawayo mékuyung. <sup>30</sup> Tidéw beno, giton dob lawayoy fégéolonone bé kégumah guwe, sani Nga i Kéilawane. Atin i kéluhanay de étew dob duniiae ni kémérew ro bé kégilak ruwe. Tidéw beno, gito ro Begén dob rawéne géumah tidéw dob lawayo barakatan brab réméndaw. <sup>31</sup> Atin dob métanuge béréh i témburiwe,

sugué kuy de télaki gu mangéy dob séngae gonon dob duniiae ni. Atin timué roy de fénémilién étew gu tidéw dob kéluhanay de ingéd.”

<sup>32</sup> Tidéw béno, nuret Jesusey sébaane binuwaya mano, “Fétuntay gom i ni ufama fantag bé kayéwe. Dini dob betome ni, sonom lémbud i de fongo no brab émféantu daun, gétiga kom gédétén i basa médufe. <sup>33</sup> Ségiléw so bé béno gai. Amuk gito gomén mérigoy de ni bénréh gu, gétiga kom gédétén i késéfule guwe. <sup>34</sup> Atin béréhé ku begom i toowe, i de étew méuyag béní, énda méléhu ro taman mérigoy de ni. <sup>35</sup> I lawayo diyo brab duniiae ni méalfa, éndob i kékéréh guwe énda méalfaén.

<sup>36</sup> “Endob énda i ségétew gétigan bé gaiy kégumah i no gai séfuleu. I de télaki dob lawayo énda gétiga ro de, brab fiyon i Begéne, sani Nga i Tuluse, énda so gétiga ku de. I Abay guwe saén Tulus i gétigane bé nan gai. <sup>37</sup> I késéfule guwe ségiléw bé gai Noehe. <sup>38</sup> Non bé gai Noehe, amun gédétén gégumah i dunuke, i de étew énda ménbuku ro. Yamula ménama ro, méniném ro, ménawag ro taman bé gaiy kéahur Noehe dob barkowe. <sup>39</sup> Non i de étew énda énggétiga roy ati mérigowé séko. Endob tékow énggumah i dunuke atin ménléne ro kéluhanan saliyu bé Noehe brab de samungén. Ségiléw so bé niy kétékow i késéfule guwe. <sup>40</sup> Bé béno gai, wén i ruwo gétew lagéy diyo gémalbék dob safade, atin i ségétewe de dotén brab i ségétewe de méféled. <sup>41</sup> Atin wén i ruwo gétew do libun géming, atin i ségétewe de dotén, brab i ségétewe de émféled. <sup>42</sup> Ingat gom mélaw, non énda gétiga kom i gaiy késéfule i Kadna kome, sani Begéne. <sup>43</sup> Fétuntay gom i ni ufama. Amuk i gefee bé lawie gétiga noy gaiwe gégumah i ménakawe, énda fo fidongén brab énda fédayaé no mahur i ménakawe. <sup>44</sup> Mélaw fatut tafay gom sénga tékélid. Non séfuleu bé gaiwe énda karangé kom de.

<sup>45</sup> “Ati gésarigone brab gétuwane sugu-suguén? Been i sugu-suguéne sénarigoy amu ne méguléw bé de dumo no sugu-suguén, inok irayén i de amaén bé fatute gai. <sup>46</sup> Toow fo moror i ni sugu-suguén ké séfule i amu ne brab gito no rémigo bé kaane galbék loo bé fatute. <sup>47</sup> Béréhé ku begom i toowe, i amue ni sarigé noy kéluhanay de kaan do éntingayén dob ni sugu-suguén. <sup>48</sup> Endob amuk tete i adat i ni sugu-suguén atin fégitungé no mano, ‘Mérugay sénay késéfule i amu guwe.’ <sup>49</sup> Atin féganaya noy lémubage bé de dumo no sugu-suguén, atin mama brab miném séréngean bé de molon. <sup>50</sup> Tidéw béno, séfule i amu ne bé gaiwe énda gétigay ni de sugu-suguén, atin kétékowan. <sup>51</sup> Mélaw i amu ne, kukumé noy ni sugu-suguén atin fédiyoé no dob gonoy de ubo-ubo étew. Diyo kémérew brab kémigét i de kifé no.”

## 25

### *I binuwayae fantag bé de folo gétew kénogon*

<sup>1</sup> Atin nuret Jesuse man i sébaane binuwaya fantag bé késéfule ne mano, “I kéféguléw i Tuluse loo bé ni. Wén i do folo gétew kénogon. Nangéy ro bénalak i ségétewe témérime lagéy. I séngae kénogon wén i kaan solo nuwit. <sup>2</sup> Endob i limowe de gétew do béngu brab i de limo de gétew do météldtéed. <sup>3</sup> Non i de limo de do béngu ménuwit ro do solo éndob énda i do wayégén. <sup>4</sup> Endob i de limo de gétew do météldtéed nuwit roy de solo brab de katiya ménféno fitroliyo. <sup>5</sup> Tidéw béno, ménlis i témérimawe ni lagéy. Atin mélaw ménwaléy manat i de ni folo gétew kénogon. Atin énggfidong ro.

<sup>6</sup> “Amun kérara kélungononén, wén i mékese mano, ‘Ay ni néni témérimawe lagéy énggumahén! Enggomén, angéy gom balak.’ <sup>7</sup> Sonom béno, méntek i de folo ni gétew kénogon, atin ténumo roy de solo ro. <sup>8</sup> Tidéw béno, i de béngu ni do kénogon bénréh ro dob de météldtéed do kénogon maro, ‘Irayan gey bé fitroliyo goma nan, non ménfadéng i de solo gey.’ <sup>9</sup> Endob séménumbul i de météldtéed do kénogon maro, ‘Enda fakayén non kulang i fitroliyo geye ké tukido key de begom. Fatut angéy gom de béléy kagom.’ <sup>10</sup> Mélaw ménagéw i de béngu ni do kénogon inok méléy ro do fitroliyo. Atin amun ménagéw ro, énggumahén i témérimawe lagéy. Atin i limowe de do énggétafay, ménodor ro bé témérimawe ni lagéy ménahur ro dob uyote. Tidéw béno, ménfintuén i béngawane.

<sup>11</sup> “Enda mérugayén tidéw béno, énggumah man i de béngu do kénogon. Atin téménawag ro maro, ‘Maistéro, féahurén gey.’ <sup>12</sup> Endob séménumbul i témérimalwe ni lagéy mano, ‘Tintu fo énda gélolo gu begom.’ ”

<sup>13</sup> Atin fénggilid Jesusey binuwayae ni mano, “Been i funa kome fatut mingat. Non énda gétiga kom i gai guwe séfule.”

<sup>14</sup> Atin ménuret man i Jesuse sébaan binuwaya fantag bé kéféguléw i Tuluse bé de étewén mano, “Wén i ségétéwe étew ménagéw mangéy dob mérayue ingéd. Amun énda séna magéwén de, ténawagén i de sugu-sugué no atin sénarigén i de languntama no dob berowe. <sup>15</sup> Nirayén dob séngae sugu-suguén loo bé kétileldtéed ruwe. Dob sunguwe de niraya no limo ngibu kurta. Atin dob gérubwé de niraya no ruwo ngibu, atin dob gétéléwe de niraya no séngibú kurta. Tidéw béno, ménagéwén i ni étew ménangéy dob mérayue ingéd. <sup>16</sup> Sonom so bé kéagéw i amu ruwe, i sunguwe sugu-suguén méndagang-dagang. Atin énggéinség de limo ngibu kurta. <sup>17</sup> Atin loo so bé niy rénigoy gérubwé sugu-suguén, atin énggéinség de ruwo ngibu kurta. <sup>18</sup> Endob i gétéléwe sugu-suguén ménagéw brab kéménalut dob fantade, atin lénébéngén i séngibuwé kurta sénarig dob beene.

<sup>19</sup> “Tidéw béno, amun ménrugayén, ménséfule i amu ruwe atin ténawagén i de sugu-sugué no inok étuké noy kurta ne. <sup>20</sup> Atin i sunguwe sugu-suguén, téméningé brab ménbéréh dob amu ne mano, ‘Amu, ay niy limowe ngibu kurta sénarigém dob begéne. Ay ni soy limowe ngibu kurta inségén.’ <sup>21</sup> Atin ménbéréh i amu ne mano, ‘Fiyo, mésarigon go brab fiyo go sugu-suguén. Non mésarigon go bé klohe, mésarigon go so bé médoowe. Méuyotu ké moror go séréngan begén.’ <sup>22</sup> Tidéw béno, i gérubwé sugu-suguén téméningé brab ménbéréh mano, ‘Amu, ay niy ruwowe ngibu kurta sénarigém dob begéne. Atin ay ni soy ruwowe ngibu inségén.’ <sup>23</sup> Tidéw béno, ménbéréh i amu ne mano, ‘Fiyo, mésarigon go brab fiyo go sugu-suguén. Non mésarigon go bé klohe, mésarigon go so bé médoowe. Méuyotu ké moror go séréngan begén.’ <sup>24</sup> Tidéw béno, téméningé i gétéléwe sugu-suguén. Atin ménbéréh mano, ‘Amu, gétiga ku beem métégas go fo étew. Edoté moy békéne kaam, brab kétewé moy békéne nohokém. <sup>25</sup> Mélaw mégilaku fo beem. Atin mélaw, ménagéwu brab bénunéy guy kurta me dob fantade inok énda métadino. Atin téngténgém, ay niy séngibuwé kurta sénarigém dob begéne.’ <sup>26</sup> Tidéw béno, ménkérit i amu ne, atin ménbéréh mano, ‘Tete go fo sugu-suguén brab faukén go fo toow. Aw gétiga mo médotu kun bé békéne kagén, brab kéntew guy békéne nohok gu? <sup>27</sup> Amuk kémárang go loo bé nan, fatut damén féndiyoém i kurtae dob bangkue inok buluk séfuleu, fakay doté ku brab wén i inségén.’ <sup>28</sup> Tidéw béno, bénréh i amue ni dob de étew dob sékulo ruwe téménindégo mano, ‘Dot gom i kurta ne atin iray gom dob ségétéwe wén i folo ngibu kurtaén. <sup>29</sup> Non i de étew mésarigon ro, umanan irayan inok waléy médooy karowe de. Endob i de étew énda mésarigon ro, fiyon i klohe dob berowe dotén so. <sup>30</sup> Atin i ni tete sugu-suguén, ibér gom dob liyuwe dob délémonségon. Diyo kémérew brab kémigét i de kifé no.’ ”

### *I de bili-bili brab do kambing*

<sup>31</sup> Atin ménuret man i Jesuse ségiyo binuwaya mano, “I Nga i Kéilawane, sani Begéne, amuk séfuleu begey i de télaki gu inok méguléw, mésaru dob sarane kay méguléwe.

<sup>32</sup> Atin mélimud dob adafa kuwey kéluhanay de étew. Atin féganané kuy de fiyo étew bé de tete étew ségiléw bé kéfeganay témalimae bili-bili bé de bili-bili no brab de kambing.

<sup>33</sup> Atin fédiyoé kuy de fiyo étew dob kuwono kuwe atin fédiyoé kuy de tete étew dob biwong guwe. <sup>34</sup> Atin i Begéne, sani méguléwe, béréhé ku dob de fiyo étew dob kuwono kuwe maku, ‘Fénfiyoy Abay guwe Tulus begom. Enggomén, ahur gom dob kéféguléw i Tuluse loo bé kékantak ne de tidéw bé kékantak ne de duniyae ni. <sup>35</sup> Non amun ménlayafu, fénama gom Begéne. Atin amun ménteruménu, féniném gom Begéne. Atin amun énda séna gélolo gom Begéne, ténayakuf gom Begéne dob de lawi gom. <sup>36</sup> Atin amun énda i kégal gu, fénkégal gom Begéne. Atin amun déménruunu, témalima gom Begéne. Atin amun ménfériwu, ténukaw gom Begéne.’ <sup>37</sup> Tidéw béno, i de ni fiyo étew émbéréh

dob Begéne maro, ‘Kadnan, kédiron i kégito geye Beem mélayah atin fénama gey Beem, taloo no térumén go atin féniném gey Beem? <sup>38</sup> Brab kédiron i kétayakuf geye Beem dob de lawi gey fiyon fo ké énda séna gélolo gey Beem? Brab kédiron i kégito geye Beem félawas atin féngkégal gey Beem? <sup>39</sup> Brab kédiron i kégito geye Beem démérueun taloo no ménférusu go atin ténukaw gey Beem?’ <sup>40</sup> Tidew béno, béréhé ku bé de fiyo étew maku, ‘Béréhé ku begom i toowe, amun ménggédaw gom bé ségétewe gérifantad dumo gu, maak ménggédaw gom so Begén.’ <sup>41</sup> Tidew béno, béréhé ku dob de étew dob biwong guwe maku, ‘I begome médait gom mékukum, féravy gom tidew dob Begéne. Angéy gom dob aféye énda émfandaén taman sa taman méntafayén ka Satanase brab de kaan do kuyug do saitan. <sup>42</sup> Non amun ménlayafu, énda fénama gom Begén. Atin amun ménteruménu, énda féniném gom Begén. <sup>43</sup> Atin amun énda gélolo gom Begén, énda ténayakuf gom Begén dob de lawi gom. Atin amun énda i kégal gu, énda fénkégal gom Begén. Atin amun déménruunu brab amun ménférusu, énda ténalima gom Begén.’ <sup>44</sup> Tidew béno, i de ni tete étew émbéréh ro maro, ‘Kadnan, kédiron wayoy kégito geye Beem mélayah taloo no térumén, taloo no ségétew go énda gélolo gey de, taloo no énda i kégalem, taloo no démérueun, taloo no ménférusu, atin énda ténabang gey Beem?’ <sup>45</sup> Atin i Begéne, sani méguléwe, sumbulo ku bero maku, ‘Béréhé ku begome i toowe, amun énda ténabang gom i ségétewe toow fo gérifantad kuyug gu, maak énda so ténabang gom Begén.’ <sup>46</sup> Tidew béno, i de ni do tete étew, féangéyé ku bero dob uleono emferno inok mékukum ro taman sa taman. Endob i de métintu do étew gédoté roy umule magufusa.”

## 26

### *I bantak i de odoroy de Judio*

<sup>1</sup> Amun énggilid i Jesuse téromo bé de ni, ménbéréh dob de kuyugén mano, <sup>2</sup> “Gétiga kom amuk méifus i ruwowe gétérésangan, gégumah i gaiy kanduli tome do Judio féndawét ‘Témara.’ Bé béno, i Begéne sani Nga i Kéilawane, atéénu inok féléhué ro Begén dob kruse.”

<sup>3</sup> Bé béno so, i de odoroy de fadi brab de odoroy de Judio, ménlimud ro dob lawi i gérotore fadi féndawét Kayafas. <sup>4</sup> Diyo ménsefagayun ro kéfoé roy Jesuse inok féléhuén. Endob bénantak ro rigonén ké énda i ségiyo étew de gétigan. <sup>5</sup> Ménsbéréh ro maro, “Békén saén bé lala tome kémanduli, kinok wén i mériimbur bé de étew.”

<sup>6</sup> Atin diyo i Jesuse dob lawi i ségétewe ménadi-adinén fémuteén féndawét Simon, dob ingéde Betania. <sup>7</sup> Atin bé lala Jesuse mama, énggumah i ségétewe libun wén i fiyo katiyaén ménféno bé balilagae nor fégéféamut. Atin ménfégédét dob Jesuse, atin lénukaén dob uléw ne. <sup>8</sup> Endob i de kuyugén, amun énggito roy ni rénigoy libune ni, ménwaléy ro mékérit. Atin ménbéréh ro maro, “Sedek séninggula saén i nan fégéféamut? <sup>9</sup> Non amuk fénbélén damén i nan nor, wén i médo kurta gédotén de brab iray damén dob de méskinan.”

<sup>10</sup> Endob i Jesuse énggétiga noy kékérél ruwe, atin ménbéréh mano, “Kagom dowoyén i libune ni. Non toow fo fiyoy rénigo nuwe dob Begéne. <sup>11</sup> I de méskinan taus ro bati dob begome sénga téklid, éndob i Begéne énda démoyunu bati dob begome. <sup>12</sup> Bé kéluka ne bé fégéféamute dob Begéne, fégéfafay bé lowoh guwe ké lóbéngénu. <sup>13</sup> Atin béréhé ku begom i toowe, dob séngae gonon dob duniyae ni uretén i Fiyowe Uret, uretén soy kérigo nuwe Begén. Mélaw i de étew gétédémo roy ni libun.”

### *I rénigo Judase*

<sup>14</sup> Tidew béno, i ségétewe bé de folo bra ruwo kuyugén féndawét Judas Iskariot ménangéy dob de odoroy de fadi. <sup>15</sup> Atin ménenginsa dob berowe mano, “Firoj i iray gome begén ké fékéfo guy Jesuse dob begome?” Atin bénayada ro télén folo félatah.

<sup>16</sup> Tidew bé no gai, sénléd Judasey fiyowe gai fékéfoén i Jesuse.

<sup>17</sup> Amun dob sunguwe fuweh bé kékanduli i de Judio féndawét “Fan énda i Fégéfééruk de” look “Témara”, i de kuyugén ménangéy ro dob Jesuse atin ménenginsa ro maro, “Hon i kétaya muwe gono key témafay bé amaé muwe bé ni kanduli?”

<sup>18</sup> Atin séménumbul i Jesuse mano, “Angéy gom Jerusalem atin béréh gom dob étewé diyo makom, ‘Enggumahén kun i uras i Maistérowe. Mélaw mamung bé kékandulie “Témara” begey i de kuyugén dob lawi me.’ ”

<sup>19</sup> Mélaw i de kuyugén nodoro roy kékéréh Jesuse, atin ténafoy roy amaé ruwe kay kandulie féndawét “Témara” dob no lawi.

<sup>20</sup> Amun kélungononén, i Jesuse ménasar mama séréngan bé de folo bra ruwo gétew kuyugén. <sup>21</sup> Bé lala ruwe mama, bénréh Jesuse mano, “Béréhé ku begom i toowe, wén sékoy ségétewe begom émfékéfo Begén.”

<sup>22</sup> Tidéw béno, toow fo méntete i de fédew i de kuyugén, atin ménenginsa i séngae ségétew bero dob Jesuse maro, “Kadnan, békén begén, hay?”

<sup>23</sup> Séménumbul i Jesuse mano, “I ségétewe séréngan Begén mérém fan, beeney émfékéfo séko Begén. <sup>24</sup> I Nga i Kéilawane, sani Begéne, méléhuu loo bé kékéréh i Ménsulate Kébéréh i Tuluse. Endob toow fo mékégédaw-gédaw i émfékéfo Begén. Mas na fiyo dob beene ké énda damén ménúmah i ni étew, non mélukum fo toow.”

<sup>25</sup> Tidéw béno, ménbéréh i Judase sani ménfékéfo de mano, “Maistéro, békén begén, hay?”

Atin séménumbul i Jesuse mano, “Hoo, beem.”

#### *I kéama i Kadnan*

<sup>26</sup> I lala ruwe mama, éndot Jesusey fane brab ménfésalamat dob Tuluse. Tidéw béno, sénkébeng-kébengén, brab sénaarén dob de kuyugén. Atin ménbéréh mano, “Ay niy lowoh guwe. Dot gom brab ama gom.”

<sup>27</sup> Tidéw béno, éndot Jesusey tabue wén i arak de atin ménfésalamat dob Tuluse. Atin nirayén dob berowe mano, “Iném gom de, kéluhana kom. <sup>28</sup> Non been i niy dara guwe, sani tandaé bé fasad i Tuluse, réménanas inok mélésagadan i de sala i de médo do étew. <sup>29</sup> Béréhé ku begom, éndaén minému arak taman dob gaiwe minému mantu arak séréngan begom amuk méguléw i Abay guwe Tulus dob de étewén.”

<sup>30</sup> Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke féndawét Olibo.

#### *Nuret Jesusey fantage bé Pedrowe*

<sup>31</sup> Atin ménbéréh i Jesuse dob de kuyugén mano, “Kino séko bé ni kélungonon méraréy gom kéluhanan tagaké kom Begén non wén i Ménsulate Kébéréh i Tuluse mano, ‘Féléhué kuy témalimae bé de bili-bili, atin i de bili-bili no émbéragar ro.’ ” <sup>32</sup> Atin féntaus Jesusey kékéréh me mano, “Endob amuk tébuleu, magéwu métah begom mangéy Galilea.”

<sup>33</sup> Tidéw béno, ménbéréh i Pedrowe dob Jesuse mano, “I begéne, énda fo tagaké ku Beem, fiyon fo ké méraréy i kéluhanay de dumo gu.”

<sup>34</sup> Endob ménbéréh man i Jesuse mano, “Béréhé ku beem i toowe, bé énda séna ukoro i férfute béréh ni kélungonon, dirungé mo Begén téléc gule béréh gélolo mo Begén.”

<sup>35</sup> Ménbéréh man i Pedrowe mano, “Enda fo dirungé ku Beem, fiyon fo ké méléhuu séréngan Beem.”

Atin loo so béréh ni kéluhanay de dumo kuyugén.

<sup>36</sup> Tidéw béno, ménagéw i Jesuse beroy de kuyugén dob gonone féndawét Getsemani. Amun énggumah ro diyo, ménbéréh i Jesuse dob berowe mano, “Sar gom dob ni béréh lala guwe mangéy démasal dob diyoo.” <sup>37</sup> Atin nuvitén i Pedrowe brab de ruwo gétew lagéy nga Sebedeowe, sani Santiacowe brab Juane. Atin méntete i fédew Jesuse brab ménbuku fo toow. <sup>38</sup> Atin ménbéréh dob de ni téléc gétew kuyugén mano, “I fédew guwe toow fo ménbuku taman toow fo démwé. Bati gom dini, brab tulik gom.”

<sup>39</sup> Tidéw béno, ménagéw i Jesuse gumaha témar. Atin méntélengkéb méntéduunsum brab déménasal mano, “Abay, amuk fakay saén, kago fédayaén Begén mérásay. Endob i kaame saén kétayan i mérigowe damén, békén kagén kétayan.”

<sup>40</sup> Tidéw béno, ménagéw i Jesuse gumaha témar. Atin énggito no bero énggfidong. Ménbéréh dob Pedrowe mano, “Aw énda wayo gétulik go fiyon ségéuras

saén?” <sup>41</sup> Atin ménbéréh dob berowe télém gétew mano, “Tulik gom, atin dasal gom inok énda métukawan gom. Méuyot gom rémigo bé kétaya kuwe, éndob i de lowoh gom mélubay brab magad gégéfélis bé de sugu gu.”

<sup>42</sup> Tidéw béno, téngak Jesuse man bero, atin déménasal mano, “Abay, amuk énda fakayén ké gésélyahu bé ni kérasay, mérigo damén i kétaya muwe.” <sup>43</sup> Tidéw béno, ménfélisule man i Jesuse mangéy dob de télém ni gétew kuyugén. Atin énggitó no bero énggfidong non toow ro fo manat.

<sup>44</sup> Tidéw béno, téngak Jesuse man bero bé gétéléwe gule inok démasal. Atin déménasal ségiléw so bé énggétahe de. <sup>45</sup> Tidéw béno, ménfélisule man mangéy dob de télém ni gétew kuyugén atin ménbéréh dob berowe mano, “Aw tafay gom so fidong brab témérén? Téngténg gom! Enggumahén i urase fékéfo i Nga i Kéilawane, sani Begéne, atin atéénu dob de ménalsa étew. <sup>46</sup> Na, tek gom, magéw tomén. Téngténg gom, ay nan néngumah i émfékéfo Begén!”

### *I kékéfoe bé Jesuse*

<sup>47</sup> Amun émbéréh sénay Jesuse, énggumah i Judase sani ségétewe bé de folo bra ruwo gétew kuyugén. Atin wén i dakéle ménlimud étew dob beene énggumah. Non sénugu i de odoroy de fadi brab de odoroy de Judio bero. Atin ménuit ro do sundang brab do bastun. <sup>48</sup> Atin énggétiga roy ati fégélolono ruwe bé Jesuse, non amun énda séna gégumah ro diyo, bénréh Judase bero mano, “I étewe aréké ku, kéfo gom non Been.”

<sup>49</sup> Mélaw sonom so bé kégumah Judase, ménfégédét dob Jesuse brab ménbéréh mano, “Fyo kélungonon, Maistéro.” Tidéw béno, narék Judasey Jesuse.

<sup>50</sup> Tidéw béno, ménbéréh i Jesuse dob Judase mano, “Adih, fétausém i kérigo muwe bé rigoné muwe.”

Tidéw béno, i de étew ménodor bé Judase, ménfégédét ro dob Jesuse brab kénéfo ro. <sup>51</sup> Atin wén i ségétewe kuyug Jesuse bénindasén i sundang ne atin téniyahén i ségétewe riféy gérotore fadi brab ménasilaf i ségebae bé kelingo ne. <sup>52</sup> Endob ménbéréh i Jesuse mano, “Rumaém i sundang ma nan. Non i kéluhanay de témiboh, méléhu ro so bé sundange. <sup>53</sup> Aw énda ba gétiga mo de? Amuk kétaya ku, gétawagu mongot tabang dob Abay guwe Tulus, atin sugué noy laksaéne do télaki no témabang Begén matuhon bé de ni étew. <sup>54</sup> Endob amuk rigoné kuy nan, énda métuman i de Ménusat Kébéréh i Tuluse fantag bé ati mérigowe dob Begéne.”

<sup>55</sup> Tidéw béno, ménbéréh i Jesuse dob de ménlimud do étew mano, “Sedek ménuit gom do sundang brab do bastun, inok kéfoé kom Begén maak ségétewu tulisan kéfoé kom? Sénga fuweh diyoo dob lawi i Tuluse témo, éndob énda kénéfo gom Begén.

<sup>56</sup> Endob ménrigoy kéluhanay de ni inok métuman i Ménusat Kébéréh i Tuluse sénulat i de sénarigo no.”

Tidéw béno, kéluhanay de kuyugén ménraréy téngak roy Jesuse.

### *I kékukume bé Jesuse*

<sup>57</sup> Atin i de étew kéménéfo bé Jesuse nuwit ro dob lawi i gérotore fadi féndawéti Kayafas. Diyo ménlimud i de témo, béréh kitabé brab de odoroy de Judio. <sup>58</sup> Atin i Pedrowe ménfuray ro bero éndob énda ménfégédétén, métaman saén dob fésaway lawi i gérotore ni fadi. Atin ménahur dob fésawayane ni brab ménasar diyo beroy de guwardiya inok gétiga noy ati mérigowe dob Jesuse. <sup>59</sup> Atin i odoroy de fadi brab kéluhanay de ménlimud do odoron sémenléed ro do tugi kétébo bé Jesuse inok kukumé ro méléhu. <sup>60</sup> Endob énda i énggelingoo ro funa ro de méméléhu, fiyon fo kérédooy de téménindég brab ménbéréh do tugién kétébo bé Jesuse. Tidéw béno, wén i ruwowe gétew lagéy téménindég brab ténebo roy Jesuse. <sup>61</sup> Ménbéréh ro maro, “Ménbéréh i ni étew mano, ‘Gébinasana kuy lawi i Tuluse atin fétindégé ku man béréh télém gétérésangan.’”

<sup>62</sup> Tidéw béno, i gérotore fadi téménindég brab ménbéréh dob Jesuse mano, “Ati késumbul me béréh ni kétébo ro Beem?” <sup>63</sup> Endob ménantés i Jesuse. Tidéw béno, ménbéréh

man i gérotore ni fadi mano, “Sugué ku Beem sémafa dob adafay méuyage Tulus, aw Beeme bay Kristowe Nga i Tuluse?”

<sup>64</sup> Atin séménumbul i Jesuse mano, “Toow i nan bénréhém bé Nga i Tuluse Begén. Atin bérhéh ku begom i toowe, gito gom i Nga i Kéilawane, sani Begéne, mésar moso dob kuwonoy barakatane Tulus brab gito gom Begén dob de rawén séfuleu tidéw dob lawayo.”

<sup>65</sup> Sonom béno, i gérotore ni fadi amun énggelingoo noy ni kékérén Jesuse, kénusién i kégal ne inok fégito noy kékérit ne de. Atin ménbérén mano, “Mékémurka fo toow i kékérén ne non réféngé noy Tuluse! Endaén kailanga tom i témeboe de dob betome. Non énggelingoo tomén i mémurkae kékérén béléewe ni. <sup>66</sup> Ati karang gome de fatut rigoné tom?”

Atin séménumbul i de odoron maro, “Fatut mémukum méléhu.”

<sup>67</sup> Tidéw béno, dénuraa roy rangih Jesuse atin lénubag ro. Atin wén soy do témenamfiling bé Jesuse. <sup>68</sup> Atin ténléb roy de moto no bé munsalawe brab ménbérén ro maro, “Amuk Beem i Kristowe, antukém ké ati témenamfilinge Beem.”

### Dénirung Pedrowey Jesuse

<sup>69</sup> I lala i de ni mérigo, i Pedrowe diyo ménasar dob fésayawane. Atin ménfégédét i ségetéwe kénogon sugu-suguéy gérotore fadi. Atin ménbérén dob Pedrowe mano, “Beem soy dumo Jesuse tidéw Galilea.”

<sup>70</sup> Endob dénirung Pedrowe dob téngaangay de étew diyo mano, “Enda gétiga kuy nan bérhémo.” <sup>71</sup> Tidéw béno, ménangéy i Pedrowe dob bengaway fésayawane. Diyo wén i ségiyowe kénogon sugu-suguén énggito noy Pedrowe. Atin ménbérén dob de lagéy diyo mano, “Ay niy ségetéwe dumo Jesuse tidéw Nasaret.”

<sup>72</sup> Atin dénirung Pedrowe man mano, “Méléhuu so dob ni, énda gélolo guy nan lagéy.”

<sup>73</sup> Enda ménrugayén tidéw béno, i de lagéy témenindég diyo ménfégédét ro dob Pedrowe. Atin ménbérén ro maro, “Tintu fo beem i ségetéwe bero. Non dob kékérén me énggélolo gey beem ségetéw go so tidéw Galilea.”

<sup>74</sup> Tidéw béno, séménafa foy Pedrowe dob berowe mano, “Amuk tugio ku begom, kuméy Tuluse begén. Enda gélolo guy nan étew!”

Sonom béno, ménukoro i férufete. <sup>75</sup> Atin énggétédémo Pedrowey kékérén Jesuse mano, “Bé énda séna ukoro i férufete, dirungé mo Begén télén gule bé énda gélolo mo Begén.” Mélaw i Pedrowe, ménusut tidéw diyo atin kéménrew fo toow.

## 27

<sup>1</sup> Amun toow géfuwén, i kéluhanay de odoroy de fadi brab de odoroy de Judio, ménlimud ro inok bantaké roy kékélén ruwe bé Jesuse. <sup>2</sup> Atin nikét roy Jesuse brab nangéy ro naté dob Pilatowe sani méguléwe tidéw Roma.

### I kékélén Judase

<sup>3</sup> I Judase, sani ménfékéfoe de, amun énggito noy kékukume bé Jesuse, énggésénule. Mélaw nuvitén séfule i télewe folo félatah mangéy dob de odoroy de fadi brab dob de odoroy de Judio. <sup>4</sup> Atin ménbérén mano, “Ménsalau non fénkéfo gu inok félénue i ni ségetéw étew énda i rénigo no tete.”

Endob séménumbul i de odoron maro, “Ulanden dob begeye. Kaam saén sala i nan.”

<sup>5</sup> Tidéw béno, i Judase nibérén i de kurta ni dob lawi i Tuluse, atin ménagéw tidéw diyo. Atin ménfétotoyé ménitébitin.

<sup>6</sup> I de odoroy de fadi ténimu roy de félatah ni brab ménbérén ro maro, “I ni kurta fénggélénue bé étewé, mélaw énda fakayén dob kitab tome itongén dob tulakane dob lawi i Tuluse.” <sup>7</sup> Atin amun ménagayun ro, nusar roy kurtae ni fégébéléy bé fantad i ségetéwe rémigo binangga, inok wén i fantad lébénong bé de étew énda batir ro dob Jerusalem. <sup>8</sup> Been i funay fantade ni féndawét “Démara Fantad” taman béléewe ni.

<sup>9</sup> Mélaw mémentuman i kékérén i sénarigoy Tuluse muret bé kékérén ne bé do gétah féndawét Jeremias mano, “Endot roy télewe folo félatah, sani kurtae ménagayun i de

Judio fénggékélén de. <sup>10</sup> Atin nusar roy ni kurta fénggékélén bé fantad i ségétewé rémigo do binangga, loo bé sugu i Kadnane Begén.” Been i niy kékérén Jeremiase bé gétahe.

### *I kékukume bé Jesuse*

<sup>11</sup> Atin i Jesuse téménindég dob adafay méguléwe tidéw Roma féndawét Pilato. Atin fénénginsaa noy Jesuse mano, “Aw Beem i Datu i de Judio?”

Atin séménumbul i Jesuse mano, “Beem i ménbérén de.” <sup>12</sup> Endob amun ténebo i de odoroy de fadi brab de odoroy de Judio, ménantés saén i Jesuse.

<sup>13</sup> Mélaw ménbérén i Pilatowe dob Jesuse mano, “Sedek énda sumbulo moy kéluhanay de kétobo ro ni Beem?”

<sup>14</sup> Endob énda séménumbul i Jesuse, ménantés saén. Mélaw ménggaif fo toow i méguléwe.

<sup>15</sup> I ni ménrigowe bé gaiy kékandulie Témara. Atin i adat i méguléwe, sénga kanduli ro Témara témangéy ségétew férisu fémiliéy de ménlimud do Judio. <sup>16</sup> Bé no gai, wén soy ségétew bantugén férisu féndawét Barabas. <sup>17</sup> Mélaw amun ménlimud i de étew, ménénginsa i Pilatowe dob berowe mano, “Ati isuwe kétaya kom tangéyé ku inok géesusut dob begome? Barabas loo ké Jesuse féndawét so Kristo?” <sup>18</sup> Rénigo noy ni non énggétiga no i de odoroy de Judio, naté roy Jesuse non ménthaléw ro de.

<sup>19</sup> Amun diyo ménasar i Pilatowe dob saray kémukume, fénksamfay i bawag ney sébaane kékérén mano, “Kago rigonén i éntingayéne dob ni étew énda i salaén. Non wén i énggétéginekuwe na kélunganono atin toowu fo ménbuku fantag bé Beene.”

<sup>20</sup> Endob i de odoroy de fadi brab de odoroy de Judio, fénfagayu roy de ménlimud do étew bé ongoté ro dob Pilatowey tangéyé noy Barabase, atin féléhuén i Jesuse. <sup>21</sup> Endob i Pilatowe ménénginsa mano, “Aw ati isuwe wayo kétaya kom tangéyén inok géesusut dob begome?”

Atin séménumbul i de étew maro, “Barabas.”

<sup>22</sup> Atin ménénginsa i Pilatowe mano, “Ati mélaw i rigoné kuwe dob Jesuse féndawét so Kristo?”

Séménumbul ro kéluhanan maro, “Féléhuén dob kruse!”

<sup>23</sup> Endob ménénginsa man i Pilatowe mano, “Endob ati tetee rénigo no?”

Tidéw béno, ménkes i de étew minut métanug maro, “Féléhuén dob kruse!”

<sup>24</sup> Amun énggétiga Pilatowe énda fo magayun i de étew atin sérimbur ro séko, éndotén i wayége atin méngguse dob téngaangay de étew. Atin ménbérén dob berowe mano, “Békén kagén sala i kéléhu i ni étew énda i salaén. Kagom saén aturan.”

<sup>25</sup> Atin ménbérén i kéluhanay de étew maro, “Kagey aturan i kéléhu ne brab aturay de séfu gey so.”

<sup>26</sup> Tidéw béno, ténangéy Pilatowey Barabase mésut mangéy dob de étew. Atin fénatafésén i Jesuse. Tidéw béno, natéen dob de sundalo inok kélabo ro dob kruse.

<sup>27</sup> Tidéw béno, i de sundalo Pilato nuwit roy Jesuse mahur dob lawi Pilatowe. Atin i kéluhanay de dumo ro sundalo ségbataliyon ménlimud ro géliwéti bé Jesuse. <sup>28</sup> Atin lénékas roy de kégalén brab fénkégal ro bé furowe kégal maak datu. <sup>29</sup> Tidéw béno, lénuku roy suwarane kélég atin fénsayaf ro bé Jesuse, atin féndiyo roy kayéwe dob kuwonone kémérén ubo-ubo maak datu. Tidéw béno, ménlingkuwéti ro dob adafa nuwe brab déniyangka ro. Atin ménbérén ro maro, “Méraru damén i datu i de Judio.” <sup>30</sup> Atin dénuraa ro, brab éndot roy ni kayéw tidéw dob kémér ne brab bénadas roy uléw ne. <sup>31</sup> Amun énggilid ro déniyangka, lénékas roy furowe ni kégalén brab fénkégal ro man bé kaane kégal. Tidéw béno, nuwit ro mésut inok kélaboné ro dob kruse.

### *Kélabo roy Jesuse dob kruse*

<sup>32</sup> I lala ruwe magéw tidéw Jerusalem, énggabalaka roy étewe féndawét Simon tidéw dob ingéde Siren. Atin i de sundalo fénégés ro démuwal bé krus Jesuse. <sup>33</sup> Atin énggumah ro dob sébaane gonon féndawét Golgota (i atag ne “gonoy kulobong uléwe.”) <sup>34</sup> Diyo niray roy arake sénlawék bé uwae fégékédan démawét féniném ro bé Jesuse. Endob amun éngétemtemo no, ménika de miném.

<sup>35</sup> Tidéw béno, kénlabo ro dob kruse. Atin sénbaad roy de kégalén bé késékungkungo ruwe de. <sup>36</sup> Tidéw béno, ménasar ro diyo téneungténg roy Jesuse. <sup>37</sup> Atin féndiyo roy sénumat ruwe fingé rotor bé uléw Jesuse bé kétébo ruwe de mano, “Ay niy Jesuse, sani datu i de Judio.” <sup>38</sup> Tidéw béno, kénlabo ro dob de krus i ruwowe gétew tulisan, i ségetéwe de fingé dob kuwono nuwe brab i ségetéwe de fingé dob biwong ne.

<sup>39</sup> Atin i de étew, téménara ro dob adafa Jesuse atin déniyangka ro brab dénangu-danguo ro inok dowoyé ro. <sup>40</sup> Atin ménbérélh ro dob Jesuse maro, “Bénréhém bé binasané moy lawi i Tuluse atin fétindégé mo man bé télewe gétérésangan. Amuk tintu Nga i Tuluse Beem, tabangém i lowoh me atin lus go tidéw dob krusa nan inok énda méléhu go.”

<sup>41</sup> Atin ségiléw so bé ni, i de odoroy de fadi brab de témore bákitabe brab de odoroy de Judio déniyangka ro. <sup>42</sup> Ménbérélh ro maro, “Ténabangén i de ségiyo étew inok énda méléhu ro, éndob énda gétabanga noy lowoh ne inok énda méléhuén. Amuk Beeney datu tome do Judio, fatut mélus tidéw dob krusa nan inok géunur tom de. <sup>43</sup> Sémarig bé Tuluse brab bénréhén bé Been kun i Nga i Tuluse. Na, énténgé tom ké féimuéy Tuluse brab tabangé no béleewe ni inok énda méléhuén.”

<sup>44</sup> Atin fiyon i de tulisan séréngean bé Jesuse kénlabo dob de krus, déniyangka ro so.

### *I kéléhu Jesuse*

<sup>45</sup> Amun géutuhén, ménwaléy délémon i kéluhanay fantade taman ménifus i télewe géuras. <sup>46</sup> Amun géraraan lémuudug i téresange de, ménkes i Jesuse mano, “Eli, Eli, lama sabaktani?” I atag ne, “Tulus gu, Tulus gu, sedek tétagakém Begén?”

<sup>47</sup> Atin i de dumo bé de étew témindég diyo, énggelingoo roy ni kékéréhén, atin ménbérélh ro maro, “Tawagé noy Eliase.” <sup>48</sup> Atin wén i ségetéwe bero ménagayas éndotén i maake gafas, nérémén dob mélémuwe arak, féndiyoén dob kayéwe, brab ténunggulén dob ba Jesuse inok fééséfén de damén.

<sup>49</sup> Endob i de dumo bé de étew témeungténg, ménbérélh ro maro, “Fédayaém mon, non méuyot gey de témeungténg ké géumah i Eliase témbangan de inok énda méléhuén.”

<sup>50</sup> Tidéw béno, ménkes man i Jesuse atin ménléhuén.

<sup>51</sup> Tidéw béno, i rindunge dob lawi i Tuluse ruwoy ménssédaya nuwe tidéw rotor mangéy fantad. Atin wén i émbagére luba brab wén i de dakél batéw ménseufak. <sup>52</sup> Atin wén i de takub do lébéng ménungka brab médooy de ménléhu do étew i Tuluse ménchébule ro. <sup>53</sup> Ménagéw ro tidéw dob de lébéng ro. Atin amun ménchébule i Jesuse, ménangéy ro mahur dob mékétéfuwe ingéd Jerusalem brab ménchéfítido dob médoowe do étew.

<sup>54</sup> I odoroy de sundalo brab de sundalo no ténuilik roy Jesuse, amun énggito roy ni luba brab kéluhanay de ni ménrigo, toow fo ménngilak ro. Atin ménbérélh ro maro, “Tintu fo Been i Nga i Tuluse.”

<sup>55</sup> Diyo soy de médo do libun, kémulay ro tidéw dob gétangkae. Beroy de libun ménfuray bé Jesuse tidéw Galilea brab tétabang ro. <sup>56</sup> Bero ro Maria tidéw Magdala, brab Maria idéng Santiagowe brab Jose, brab idéng Juane brab Santiagowe sani de nga Sebedeo.

### *I kélébénge bé Jesuse*

<sup>57</sup> Amun témeugénén, énggumah i ségetéwe lagéy kawasa tidéw Arimatea. I dawét ne Jose atin been soy ségetéwe kuyug Jesuse. <sup>58</sup> Ménangéy dob Pilatowe, atin nongotén i bangkay Jesuse. Atin sénuguén i Pilatowe ké fakay ro iray i bangkay Jesuse dob Josehe ni.

<sup>59</sup> Mélaw éndot Josehe, atin bénausén bé mantuwe fute safut. <sup>60</sup> Tidéw béno, féndiyoén dob kaane lébéng, mantu séna ténosong dob rangih i fingase. Tidéw béno, kénriringén i dakéle batéw fénggétélén bé bengaway lébénge ni. Atin tidéw béno, ménagéw i Josehe tidéw diyo. <sup>61</sup> Atin diyo i Mariahe tidéw Magdala brab dumo nuwe féndawét so Maria. Ménasar ro dob saréwoy lébénge.

<sup>62</sup> Bé gétunduge de fuweh, Sabado. Atin i de odoroy de fadi brab de Fariseo ménlimud ro bero ro Pilato. <sup>63</sup> Atin ménbérélh ro maro, “Datu, gétédémo key bé méuyag sénay nan étew ubo-ubo datu gey, bénréhén bé tébule kun ké ménfus i télewe gétérésangan. <sup>64</sup> Mélaw fiyo ké sugu go bé de guwardiya inok tintu bantayan i lébeng ne taman bé gétéléwe gétérésangan, inok i de kuyugén énda géahur ro témulis bé bangkay ne atin bérhéh ro dob de étew bé mémentebule. Non toow na fo gétimal i nan tugi bé sunguwe de.”

<sup>65</sup> Séménumbul i Pilatowe mano, “Dot gom bé de sundalo gu mantay bé lébeng ne inok énda i géahur diyo.”

<sup>66</sup> Mélaw ménagéw ro atin rénigo roy tandae dob bengaway lébénge inok gito ro ké wén i mahur de. Tidéw béno, féndiyo roy de guwardiya mantayan de.

## 28

### *I kétébule Jesuse*

<sup>1</sup> Amun ménifus i Sabadowe de, toow géfuwén bé Duminggue de, i Mariahe tidéw Magdala ménagéw mangéy dob lébénge Jesuse beroy dumo nuwe libun fénawé so Maria inok angéyé ro téngtengén i lébénge ni. <sup>2</sup> Atin mémentekow wén i émbagér luba, atin i télikay Kadnane ménlus tidéw dob lawayo. Kénriringén i dakéle batéw tidéw dob bengaway lébénge, atin ménasar diyo dob batéwo no. <sup>3</sup> I falas ne maak kilot atin toow fo fute i kégal ne. <sup>4</sup> Sonom béno, i de guwardiya diyo ménwaléy ro toow fo ménggilak, brab léménukub ro. Atin mémenténgkéb ro maak do ménléhu ro.

<sup>5</sup> Atin i télikawi ni ménbérélh dob de libun ni mano, “Kagom mégilak, Gétiga ku sélédé kom i Jesuse, sani fénléhu ruwe dob kruse. <sup>6</sup> Endob éndaén dini no, non mémentebuleén loo bé bénréh ne mérigo. Enggomén ahur gom, téngteng gom i gono nuwe méniro. <sup>7</sup> Na, fagayas gom agéw mangéy dob de kuyugén atin uret gom dob berowe makom, ‘Mémentebuleén i Jesuse. Atin mangéy béní Galilea métah begom. Gito gom diyo.’ Na, taus gom brab fégétédém gom i ni bénréh gu begom.”

<sup>8</sup> Mélaw ménagayas ro ménagéw tidéw dob lébénge ni. Atin fiyon fo ké ménggilak ro, ménoror ro so. Atin léménéntu ro mangéy dob de kuyugén inok ureté ro dob berowe.

<sup>9</sup> Atin tékow bénalak Jesusey de libun ni atin ménbérélh dob berowe mano, “Fiyot téresang.” Tidéw béno, ménfégédét ro dob Beene brab génamak roy sékéy ne atin fénéngadaf ro. <sup>10</sup> Atin ménbérélh i Jesuse dob berowe mano, “Kagom mégilak. Agéw gom atin bérélh gom dob de kuyug gu bé fatut magéw ro mangéy Galilea, atin gito ro Begén diyo.”

<sup>11</sup> Amun ménagéw i de ni libun, i de dumo bé de sundalo mantay bé lébénge ni ménsefule ro mangéy Jerusalem atin nuret ro dob de odoroy de fadi i kéluhanay ménrigowe. <sup>12</sup> Mélaw i de odoroy de fadi brab de odoroy de Judio, ménslimud ro. Atin ménagayun ro ké ati rigoné ruwe. Niraya ro médoor kurta i de sundalo. <sup>13</sup> Atin bénréh ro bero maro, “Bérélh gom bé nangéy i de kuyugén i bangkay ne bé kélunganone atin fénénakaw ro bé lala gome fidong. <sup>14</sup> Atin amuk énggelingoo yékuléwey fantage bé ni, bérhéh key dob beene inok énda mékérítén begom atin mélaw énda i funa kom mégilak.”

<sup>15</sup> Tidéw béno, i de guwardiya, éndot roy kurtae ni atin nodoro roy sugu i de odoroy de Judio ni. Atin mélaw, taman so béleewe ni, wén i do Judio muret bé ni uret.

### *Mémentefigo man i Jesuse*

<sup>16</sup> Tidéw béno, i de folo bra sébaan kuyugén ménagéw ro mangéy Galilea dob sébaane tuduk bénréh Jesuse fatut ayo ro. <sup>17</sup> Atin amun énggito roy Jesuse, fénéngadaf ro, fiyon fo ké wén i de dumo bero ruwo-ruwoy de fédéw ro munur de. <sup>18</sup> Atin ménfégédét i Jesuse dob berowe atin ménbérélh mano, “I kéluhanay kuwagibé méguléw dob lawayo brab dob fantade niray dob Begéne. <sup>19</sup> Mélaw angéy gom dob kéluhanay de ingéd dob duniyae ni atin féunur gom i kéluhanay de étew bé Begéne. Bautis gom bero dob dawéti Abaye Tulus, brab Nga i Tuluse, brab Rémogor i Tuluse. <sup>20</sup> Atin toro gom bero bé fatut odoro

Mateo 28:20

47

Mateo 28:20

roy kéluhanay de sugu gu begom. Atin fégétédém gom i ni, diniwu dob begome sénga tékélid taman dob tamfaday duniyae ni.”

## I Fiyowe Uret Sénulat Markose

Been i niy Fiyowe Uret sénulat Markose fantag bé Jesu Kristowe. Sénulat Markosey médoowe do mékégaif rénigo Jesuse amun ménbatí séna dob duniyae ni. Sénulat Markose soy dumoy de ténero Jesus.

I Markose ni, sani séménulate bé ni Fiyo Uret, beeney dumo Pedrowe ménangéy muret fantag bé Jesuse. Ségétew so bé de kuyug Jesus i Pedrowe ni, amun ménbatí sénay Jesuse dob duniyae ni. Mélaw gétiga tom i kéluhanay de sénulat Markos toow fo toow.

### *I kéuret Juan Bautistawe*

<sup>1</sup> Ay niy Fiyowe Uret fantag bé Jesu Kristowe, sani Nga i Tuluse. <sup>2</sup> Bé gétaho, wén i ségétewe sénarigoy Tuluse muret bé kékéréd ne féndawét Isaías. Sénulatén mano, “Bang i Tuluse, ‘Sugué kuy sarigo kuwe métah Beem inok tafayé noy aguwo muwe.’ <sup>3</sup> Diyo dob gonone énda i étew de bati, brab mékes mano, ‘Gégumah i Kadnane! Tafay gom i aguwo nuwe, brab fééntang gom i de aguwo no.’” Been i bénréh Isaiae.

<sup>4</sup> Mélaw énggumah i Juane dob gonone énda i étew de bati. Mautis bé de étew brab ménuret mano, “Fatut gom gésénule bé de sala gom brab féka gom i de tete adat gom. Tidew béno, fébautis gom inok fégito gom i kégésénule gome. Atin, i Tuluse fésagadé noy de sala gom.” <sup>5</sup> Atin médooy de étew dob Judea brab dob ingéde Jerusalem ménangéy ro dob Juane. Fénayag roy de sala ro brab bénautisén bero dob lowoh i wayége Jordan.

<sup>6</sup> I Juane ni kéménegal nawél buk dakél ayam féndawét kamelyo, brab kulit binatang i légét ne. Atin i amaé nuwe kasuk brab téne. <sup>7</sup> Atin ménuret i Juane mano, “Wén i ségétewe témundug begén. Toow na fo gérotor begén. Fiyon foy ikét i safatos ne, énda métotoror de mukoh. <sup>8</sup> Wayég i fégébautis guwe begom, éndob i Beene, bautisé no moso begom bé Rémogor i Tuluse.”

### *I kékautise bé Jesuse*

<sup>9</sup> Bé no do gai, énggégumah i Jesuse tidew dob Nasaret dob sakuf i dakéle ingéd Galilea. Atin bénautis Juane so dob wayégo no Jordan. <sup>10</sup> Amun géménaunén i Jesuse tidew dob wayége, sonom béno énggito noy lawaye ménungka brab i Rémogor i Tuluse ménlus maak marafati brab méntérimféna dob Beene. <sup>11</sup> Brab wén i ménbéréhe tidew dob lawayo mano, “Beem i Nga guwe. Toow fo mégédawu de brab mésuwatu de.”

<sup>12</sup> Tidew béno, fénagéw i Rémogor i Tulusey Jesuse mangéy dob gonone énda i do étew de bati. <sup>13</sup> Atin ménbatí diyo fot folo gétérésangan. Bé béno, sénga tékélid téne ngkad Satanasey Jesuse rémigo tete damén. Diyo soy de mérayar do binatang, éndob énggumah i de téaki brab té nabanga ro.

### *I kékéganay i galbék Jesuse dob Galilea*

<sup>14</sup> Amun ménférisonén i Juane, ménférisonén i Jesuse mangéy Galilea, brab nureténi i Fiyowe Uret tidew dob Tuluse. <sup>15</sup> Ménbéréh mano, “Enggumahén i fatute gai. Endaén mérugayén taman gégumah i kékégnéw i Tuluse bé de étewén. Fatut gésénule gom bé de sala gom brab féka gom i de tete adat gom, brab unur gom dob Fiyowe Uret.”

<sup>16</sup> Wén i no sébaan fuweh ménagéw i Jesuse dob doror i dogote féndawét Galilea. Atin énggito noy ruwowe gétew fatatugés féndawét Simon brab Andree tuwaréyén. Ibéré roy de biyala ro dob dogote. <sup>17</sup> Atin béréh Jesuse bero mano, “Odor gom Begén. Kagomén séméléd sédo. Tidew béleewe, fésélédé ku begom étew inok modor ro so Begén.” <sup>18</sup> Sonom béno, té nagak roy de biyala ro brab ménodor ro bé Jesuse.

<sup>19</sup> Atin amun ménférisonén magéw i Jesuse kloh, énggito noy Santiagowe brab Juane sani de nga Sebedeo. Diyo ro dob awang ruwe sékafété roy de biyala ro. <sup>20</sup> Sonom béno, té nagak roy boh ruwe Sebedeo dob awange beroy de té mabang do sukayan do fatatugés, atin ménodor ro bé Jesuse.

### *Dénédél Jesusey saitane*

<sup>21</sup> Atin i Jesuse beroy de kuyugén ménangéy ro dob ingéde Kafernaum. Amun gai kétérén, ménahur i Jesuse dob lawie féngadafay de Judio, brab témenoro. <sup>22</sup> Atin i de étew do mégélingo de, toow ro fo ménggaif bé kétoro ne. Non békén ségiléw i kétoro ne bé de Judio témoreo bé kitab ruwe. Non i berowe, ténero ro say de kéfégitung i de ségiyo étew. Endob ténero Jesusey kaane kéfégitung.

<sup>23</sup> Amun témenoro i Jesuse, tékow ménahur dob lawie féngadafan i ségétéwe étew rénahukoy saitane. <sup>24</sup> Amun énggito noy Jesuse, ménkes mano, “Ati amungé muwe begey, Jesus tidéw Nasaret? Ménangéy go ba dini inok binasané mo begey? Enggétiga ku ké ati Beeme. Beem i Mékétéfuwe tidéw dob Tuluse.”

<sup>25</sup> Endob génlé Jesusey saitane ni mano, “Kago selekén, brab tékédan go tidéw dob beena nan!”

<sup>26</sup> Tidéw béno, i saitane, toow fo fénkilén i étewo no brab ménkes métanug, atin méntékédan. <sup>27</sup> Atin toow fo ménggaif i de étew bé ni. Ménsébéréh ro maro, “Ati ni? Mantu keey kétoro. I ni étew wén i kuwagibén sémugu bé de saitan, brab odoro roy késugu nel!”

<sup>28</sup> Mélaw i kéurete fantag bé Jesuse magad ménlégéb dob kéluhanay de gonon dob dakéle ingéd Galilea.

### *Nuwa Jesusey de médoó étew*

<sup>29</sup> Tidéw béno, téngak roy lawie ni féngadafan, brab ménagéy dob lawi Simone brab Andrese. Atin ménodor soy Santiagowe brab Juane. <sup>30</sup> Atin diyo gara-gara i térima Simone libun non démeruun toow fo méduf. Amun énggumah i Jesuse dob ni lawi, bénréh ro dey fantage bé ni démeruun. <sup>31</sup> Atin i Jesuse ménangéy dob tébing ne atin génamakén i kémér ne brab fénétekén. Sonom béno, ménkédan i kéeduf ne brab ménadi-adiy libune ni. Tidéw béno, dénuwoto no bero.

<sup>32</sup> Bé no kélungonon, amun ménléd i térsange, i de étew nuwit ro mangéy dob Jesusey kéluhanay de démeruun brab de étew rénahukoy de saitan. <sup>33</sup> Atin médooy de étew dob no ingéd ménlimud ro dob fésaway lawie ni. <sup>34</sup> Atin i Jesuse énggféadi-adino noy médoowe déruunan bé médoowe gékelasi déruun, brab fénféraréyén i médoowe saitan. Atin i de ni saitan, énda fénbéréhén bero non gétiga roy ati Beene.

<sup>35</sup> Amun lingkuwog mangéy fuweh bé sébaane de géfuwén, méntek i Jesuse brab ménusut dob lawie ménangéy dob géfélébue gonon dob liyuy ingéde. Atin diyo déménasal. <sup>36</sup> Mélaw i Simone brab de dumo no, nangéy ro sénléd i Jesuse. <sup>37</sup> Amun énggito ro, ménbéréh ro maro, “Sélédéy kéluhanay de étew Beem.”

<sup>38</sup> Endob séménumbul i Jesuse mano, “Fatut taus tom magéw mangéy dob de dumo ingéd gédét dini inok géuretu so diyo, non been i niy funa kuwe ménangéy dini.”

<sup>39</sup> Mélaw lénégébén sénugudon i séngae gonon dob Galilea. Atin ménuret dob de lawi féngadafay de Judio, brab fénféraréyén i de saitan.

### *Nuwa Jesusey ségétéwe fémuteén*

<sup>40</sup> Wén i no sébaan fuweh, i ségétéwe fémuteén ménangéy dob Jesuse, brab lémén-ingkuwéed dob adafa nuwe mongot tabang. Ménbéréh mano, “Amuk kétaya mo, géféadi-adino mo begén.”

<sup>41</sup> Atin toow fo ménuray i na Jesuse de. Mélaw bémenter Jesusey kémér ne brab kénwahén. Atin ménbéréh mano, “Kétaya ku. Adi-adi go.” <sup>42</sup> Sonom béno, ménkédan i fémute ne, brab ménfiyoy lowoh ne. <sup>43</sup> Tidéw béno, i Jesuse fénagéwén brab ménbagér i kékéréh ne de mano, <sup>44</sup> “Fégélingoém, kago béréhén i fantage bé ni rénigo gu dob fiyon udenén étew. Endob taus go agéw mangéy dob fadie brab fétengténgém i lowoh me inok gétiga no adi-adi gon. Tidéw béno, irayém i tulake loo bé sénugu i kitabe tidéw dob Moisese inok fégito moy kéadi-adi muwe dob kéluhanay de étew.”

<sup>45</sup> Ménagéw bangnoor i ni étew, éndob nureténi dob séngae étew énggébalaka no, tidéw béno ménfélalag foy ni uret. Mélaw éndaén géréngkay-réngkay i Jesuse rémahur dob

kéluhanay de ingéd. Yamula ménbati saén dob de liyu. Atin i de étew tidew dob de kéluhanay de gonon ménangéy ro dob Beene.

## 2

*Nuwa Jesusey ségétéwe kimoyén*

<sup>1</sup> Amun ménifus i firoye gétérésangan tidew béno, ménséfule i Jesuse mangéy Kafernaum. Atin ménlégéb i urete bé ménule mangéy diyo. <sup>2</sup> Mélaw toow fo médooy de étew ménangéy sélimud dob lawie batio Jesuse. Atin non toow ro fo médooy, éndaén i gonon de fiyon fo dob fésayawane. Atin nuret Jesuse beroy kébéréh i Tuluse. <sup>3</sup> Bé lala ne téromo, énggumah i fote gétew lagéy ténanggung roy ségétéwe kimoyén, uwité ro damén mangéy dob Beene. <sup>4</sup> Endob énda i fiyo kélawang ro dob Jesuse, non bé médoowe do étew. Mélaw ménénik ro dob atéf i lawie. Tidew béno, ténosong roy atéfe dob gataga Jesuse. Amun méntosongén, ténuntu roy ténangunge ni kimoyén. <sup>5</sup> Amun énggito Jesusey kéféngintoow ruwe, ménbéréh dob ni étew kimoyén mano, “Adih, i de salaém ménfésagadén.”

<sup>6</sup> Tidew béno, i de téromo bé kitab i de Judio ménsar diyo, séfénginsa-nginsa i de fédew ro maro, <sup>7</sup> “Sedek émbéréh mékémurka i ni étew? Enda i géfésagad bé de sala ké békén i Tuluse saén!”

<sup>8</sup> Endob bé béno so, énggétiga Jesusey de itunga ro. Mélaw ménbéréh dob berowe mano, “Sedek sébéréh gom loo bé nan dob de fédew gom? <sup>9</sup> Toow na fo mélému béréhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén béréhén, ‘Tindég go, furutém i iroo muwa nan, brab agéw go.’ Non giton ké wén i barakat gu de rémigo. <sup>10</sup> Endob feféngétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidew béno, bénréhén dob kimoyéne ni mano, <sup>11</sup> “Béréhé ku beem, tindég go, furutém i iroo muwa nan, brab ule go.”

<sup>12</sup> Sonom béno, téménindég i kimoyéne ni dob téngaanga ruwe, brab fénurutén i iroo nuwe, brab ménagéw. Atin i kéluhanay de étew diyo, toow ro fo ménggaif brab dénayéw roy Tuluse maro, “Enda nay énggito tom tidew féganay loo bé ni.”

<sup>13</sup> Tidew béno, i Jesuse ménangéy man dob féedoror i dogote Galilea. Atin énggumah i de médooy do étew brab ménlimud ro dob Beene. Atin féngganaya noy témoroe bero. <sup>14</sup> Tidew béno, méntaus i Jesuse magéw. Atin énggito noy ségétéwe étew kémubra buwis fénawé Lebi, nga Alfeo ménsar dob de kubranan buwis. Brab ménbéréh i Jesuse dob beene mano, “Odor go Begén.” Tidew béno, téménindég brab ménodor bé Jesuse.

<sup>15</sup> Enda mérugayén tidew béno, diyo i Jesuse mama dob lawi Lebiwe. Atin diyo soy médoowe do étew kémubra buwis brab médooy do ménsala étew ménsar mama séréngan bé Jesuse brab de kuyugén, non médooy ro ménfuray bé Jesuse. <sup>16</sup> Atin i de téromo bé kitab i de Judio do Fariseo, amun énggito roy Jesuse mama séréngan bé de ménsala étew brab de kémubra buwis, ménénginsa ro dob de kuyug Jesus maro, “Sedek ménsélawék i Jesuse mama bé de kémubra buwis brab de ségiyo tete étew?”

<sup>17</sup> Endob i Jesuse énggelingoo noy ni brab séménumbul mano, “I de fiyo kégélowoho no, énda kailanga roy muwae, éndob kailangay de wén déruu no. Enda ménangéy dini inok tabaré kuy de métintu étew, éndob ménangéy dini inok tabaré kuy de wén salaén inok gésénule ro.”

<sup>18</sup> Wén i no sébaan fuweh, ménfuwasay de kuyug Juan Bautista brab de Fariseo. Atin wén i de étew ménangéy dob Jesuse brab ménénginsa ro maro, “I de kuyug Juan brab de kuyug i de Fariseo, fuwasa ro. Sedek i de kaam do kuyug énda fuwasa ro?”

<sup>19</sup> Séménumbul i Jesuse mano, “Ufama, i de kana dob uyote, énda fuwasa ro ké diyo soy témerimawe lagéy. Taman diyo sénay témerimawe lagéy, énda fuwasa ro. <sup>20</sup> Endob énggumah i gaiwe, ké méédot dob berowey témerimawe lagéy. Atin been nay noy gaiwe fuwasa ro. Ségiléw so bé de kagén kuyug, non amuk dinuw séna, énda fuwasa ro.”

<sup>21</sup> Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i ségétew étew fégétabungén i mantuwe safut dob tafaye kégal. Non amuk rigoné no, kéménkén i mantuwe safut, atin mífendet i tafaye kégal, atin minut gétimal i rédet ne. <sup>22</sup> Brab énda i étew mérowo bé mantuwe arak dob tafaye ahuron arak rénigo bé kulit i ayame. Non amuk rigoné no, bétus i mantuwe arak i tafaye ahuron brab mébinasa méitis i mantuwe arak. Endob fatut i mantuwe arak ahurén dob mantuwe kulit ayam fédéngon de.”

### *Fantag bé gaiy kétéréne*

<sup>23</sup> Wén i no sébaan fuweh gai kétérén, i Jesuse brab de kuyugén téménara ro dob de médo do faréy. Atin amun ménagéw ro, i de kuyugén méndot ro bé de onok faréy.

<sup>24</sup> Tidéw béno, i de Fariseo ménbéréh ro dob Jesuse maro, “Sedek rigoné roy ni, non dob kitab tome énda fatut i gémalbéke ké gai kétérén?”

<sup>25</sup> Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo mélayah beroy de sundalo no. <sup>26</sup> Mélaw ménahur ro dob lawi i Tuluse brab méndot bé ténulake fan brab namaén, atin niraya no soy de dumo no de. Rénigo noy ni fiyon fo ké dob kitabe fadi saén i fakaye mama bé ni fan. Rénigo noy ni dob gaiwe Abitar sénay gérotore fadi.”

<sup>27</sup> Atin féntaus Jesusey kékérén ne mano, “Rénigoy gai kétéréne kay de étew, békén i étewey rénigowe kay gai kétéréne. <sup>28</sup> Mélaw i Nga i Kéilawane, sani Begéne, wén i kuwagib gu fantag bé atiy fakaye rigonén bé gaiwe kétérén.”

## 3

### *Nuwa Jesusey étewe ménasdiil i kémér ne*

<sup>1</sup> Tidéw béno, ménangéy i Jesuse man dob lawie féngadafay de Judio. Diyo soy ségétew lagéy ménasdiil i kémér ne. <sup>2</sup> Endob diyo soy de Fariseo méuyot témbo bé Jesuse. Mélaw ténulik ro, inok gito ro ké muwa bé no gai kétérén. <sup>3</sup> Atin ménbéréh i Jesuse dob lagéye ni ménasdiil i kémér ne mano, “Ay go dini dob téngaangay de étew ni.” <sup>4</sup> Tidéw béno, fénénginsaa noy de étew mano, “Ati karang gome de, ati isuwe fakay dob kitabe bé gaiwe kétérén? Rémigo fiyo, loo ké tete? Témabang bé étewe inok énda méléhuén, loo ké féléhuén?”

Endob ménantés ro. <sup>5</sup> Atin ménkérít i Jesuse bé lala ne téméngténg bé de étew géliwét de. Endob tete soy fédew ne non bé de kétégas i de atura ro énda fo méuray i na ruwe bé ni lagéy. Tidéw béno, ménbéréh dob lagéye ni mano, “Bétérém i kémér ma nan.” Atin béntrén i kémér ne atin sonom béno, ménadi-adi. <sup>6</sup> Tidéw béno, i de Fariseo toow ro fo ménkérít atin ménasdiil ro tidéw dob lawie féngadafan. Atin ménasdiil ro bé de étew do modor bé Datu Herode brab ménasdiil ro bé féléhué roy Jesuse brab rénigo roy bantak fédew ruwe.

<sup>7</sup> Atin i Jesuse brab de kuyugén ménagéw ro man mangéy dob dogote Galilea, brab médooy de étew ménfuray de. Tidéw ro Galilea brab Judea, <sup>8</sup> brab tidéw Jerusalem, brab Idumea, brab tidéw fingé sébangay wayége Jordan, brab tidéw dob géliwéte bé Tirowe brab Sidone. I de ni do médo étew ménangéy ro dob Jesuse non énggelingoo roy kéluhanay de rénigo no do mémégaif. <sup>9</sup> Atin non toow fo dakél i de ménlimud do étew, i Jesuse bénréhén bé de kuyugén bé témafay ro sébaan awang édaa no inok énda méraskén. <sup>10</sup> Non énggelféadi-adino noy de médo do étew. Mélaw i kéluhanay de wén do déruuno séderi ro fégédét dob Jesuse inok gékuwaha ro. <sup>11</sup> Atin i kéluhanay de étew rénahukoy de saitan, amun énggito roy Jesuse, ménasdiil ro dob adafa nuwe brab mémégaif ro maro, “Beemey Nga i Tuluse.”

<sup>12</sup> Endob i Jesuse génléen bero bé énda fégétiga ro de dob de ségiyo.

### *Fénémili Jesusey de folo bra ruwo gétew apostol*

<sup>13</sup> Tidéw béno, i Jesuse ménénagé mangéy dob burure brab ténawagén mangéy dob Beeney de fénémilién do waléy do sarigo no. Atin ménangéy ro dob Beene. <sup>14</sup> Atin

fénémilién i de folo bra ruwo gétew, atin féndawétén bero do apostol (i atag ne “do sénugu”). Non fénodorén bero dob Beene, brab sugué no bero muret. <sup>15</sup> Atin niraya no bero barakat inok gédédél ro do saitan rémahuk dob de étew.

<sup>16</sup> Ay niy de dawét i de apostol do fénémilién: Simon (féndawét Jesuse Pedro so), <sup>17</sup> Santiago brab Juan, sani de nga Sebedeo. I Jesuse féndawétén so bero Boanerges (i atag ne “do nga dégu”), <sup>18</sup> brab Andres, Filipi, Bartolome, Mateo, Tomas, Santiago nga Alfeo, Tadeo, Simon sani ségetéwe toow fo gulaané noy ingéd ne, <sup>19</sup> brab Judas Iskariot, sani ménfékéfoe bé Jesuse.

<sup>20</sup> Tidéw bénou, i Jesuse ménule. Atin ménlimud man i médoowe étew dob Beene. Mélaw i Jesuse brab de kuyugén, énda i uras ro mama. <sup>21</sup> Atin i de samungén, amun énggelingoo roy ni, nangéy ro kénéfo, non bénréh i de étew bunég kun.

<sup>22</sup> Atin wén i de téromo bé kitab i de Judio énggumah ro tidéw Jerusalem. Ménbérén ro maro, “I Jesuse ni rénahuko Beelsebule, sani Satanase, i odoroy de saitan. Been i funa nuwe wén i barakatén démédél bé de saitan.”

<sup>23</sup> Mélaw i Jesuse ténawagén i de ni étew mangéy dob Beene, brab nureté beroy de binuwaya mano, “Enda fakayén ké féféraréyé Satanasey de dumo no saitan. <sup>24</sup> Ufama, amuk wén i ingéd énda géséfagayun ro brab sétiboh ro, mébinasa. <sup>25</sup> Taloo no i ségékurénge étew dob sébaane lawi amuk énda so géséfagayun ro brab sékrit ro, waléy mébinasa. <sup>26</sup> Ségiléw so bé Satanase. Buluk i de sugu-sugué no mésébaad énda géséfagayun ro, énda so gétindég i fangangatura nuwe, brab mébinasa.

<sup>27</sup> “I Begéne, ténabana kun i Satanase. Been i niy funa kuwe géféraréyo kuy de kuyugén sani de saitan. Ufama, énda i ségetéw étew géahur dob lawi i émbagére étew atin tulisé noy tamuk ne taman énda na géikéto no de métah.

<sup>28</sup> “Bérhéhe ku begom i toowe, i kéluhanay de sala brab de tete kébérén i de étew fakay émfésagad. <sup>29</sup> Endob i émbéréhe tete fantag bé Rémogor i Tuluse énggérigo sala énda émfésagada no non énda mékédan i nan sala taman sa taman.” <sup>30</sup> Bénréh Jesusey ni non wén i de ménbérén maro, “Rénahuko saitan i Jesuse, funa no géféraréy bé de saitan.” Endob i toowe, Rémogor i Tulusey manangguwite bé Jesuse.

<sup>31</sup> Tidéw bénou, énggumah i idéng Jesuse brab de tuwaréyén lagéy. Téménindég ro dob liyuy lawie, brab fén-uwito ro kébérén bé tawagé roy Jesuse. <sup>32</sup> Wén i de médooy do étew ménlimud ménsar géliwét bé Jesuse, atin ménbérén ro maro, “I idéng me brab de tuwaréyém diyo ro dob liyuwe. Méuyot ro géségitó Beem.”

<sup>33</sup> Atin séménumbul i Jesuse mano, “Wén i ségiyo idéng gu brab do tuwaréy gu.” <sup>34</sup> Atin iling-ilong dob de étew ménsar géliwét de brab ménbérén mano, “Téngténg gom, ay niy de maak idéng gu brab do tuwaréy gu. <sup>35</sup> Non i de étew rémigo bé kétayay Tuluse, beroy do maak idéng gu brab do tuwaréy gu.”

#### 4

##### *I binuwayae fantag bé sémabuge*

<sup>1</sup> Wén i no sébaan fuweh, témenoro man i Jesuse diyo dob dogote Galilea. Atin toow fo dakél i ménlimude do étew géliwét de. Mélaw ménda dob awange brab ménsar diyo gédét dob dénsaane, bé lala i de étew téménindég dob dénsaane. <sup>2</sup> Atin médooy de ténoréo bero fénagéwén dob de binuwaya.

<sup>3</sup> Ménbérén mano, “Fégélingo gom. Wén i ségetéwe étew ménangéy sémabug bé bénou. <sup>4</sup> Amun sénabugén i bénou ne, i de dumo bénou ne ménbigodoy dob doror i aguwone. Diyo énggumah i de kloh manok, atin nama ro. <sup>5</sup> I de dumoy de bénou ménawér dob fantade médooy de batéw de, éndob kloh saén i fantade médooy de batéw de, éndob kloh saén i fantade de. Tidéw bénou, ménagad téménunoh non énda ménalém i fantade de. <sup>6</sup> Endob amun sémbang i térsange, atin démawét foy médufe, ménlaay i nohoke brab ménléhu, non énda toow ménalém i de kédarir ro. <sup>7</sup> I de dumoy de bénou ménawér dob fantade wén i do suwar de énda séna téménunoh ro. Atin ménsérégan téménunoh i de suwar brab de nohok. Mélaw ménfuk i de nohok brab énda énggafogonok ro. <sup>8</sup> Endob i

de dumo bé de béne ménsawér dob fiyowe fantad, brab témunoh ro brab ménruk ro brab ménggonok ro médoo taman télew folo takéf, ném folo takéf brab mératu takéf i séngae sébaan béne.”

<sup>9</sup> Atin féntaus Jesusey kékéréd ne mano, “Fégitung gom i fantage bé ni bénréh gu begom amuk méuyot gom de ké gésobuto kom.”

<sup>10</sup> Tidéw béno, amun sébaa Jesuse séden, i de dumo bé de étew énggégélingo bé ni binuwaya, beroy de folo bra ruwo gétew do kuyugén ménangéy fégédét dob Beene. Atin ménenginsa ro fantag bé atag i de ni binuwaya. <sup>11</sup> Atin séménumbul i Jesuse mano, “Dob begome do kuyug gu, fégésobutéy Tuluse begom i de ménbunéy fantag bé kékéguléw i Tuluse bé de étewén. Endob dob de ségiyo étew, énggéléingoo ro saén i de ni fén-agéw dob de binuwaya, <sup>12</sup> inok fiyon fo ké téngténgé ro fo toow, énda gito ro de. Brab fiyon fo ké gélingoo ro fo toow, énda gésobuto ro de. Non amuk gésobuto ro, gésénule ro bé de tete adat ro brab munur ro bé Tuluse, atin fésagada no bero.”

<sup>13</sup> Atin féntaus Jesusey kékéréd ne mano, “Aw énda gésobuto kom i ni binuwaya? Ati mélaw i kégésobut gome bé de ségiyo kétoro gu fén-agéw dob de binuwaya? <sup>14</sup> Ay niy atag i ni binuwaya énggéléingoo kom. I atag i ni béne, been i kékéréd i Tuluse. Atin i de séségiyo-giyo gékelasi do fantad ségiléw bé de séségiyo-giyo gékelasi do étew. Atin i sémauge ureté noy kékéréd i Tuluse dob de séségiyo-giyo do étew. <sup>15</sup> I de dumo bé de béne ménlawu dob doror i aguwone. Diyo nama i de kloh manok. I atag i ni, wén i do étew énggéléingoo roy uret i Tuluse, éndob énggégumah i Satanase, atin kénda noy ni uret énggéléingoo ro. <sup>16</sup> I dumoy de béne ménsawér dob fantade médooy de batéw de. I atag i ni, wén i do étew énggéléingoo roy uret i Tuluse brab tényakuf ro brab ménoror ro de. <sup>17</sup> Endob loo bé de nohok énda ménalém i darir ruwe, énda so mécégét i kéunur ruwe. Sémarig ro bé Tuluse singkow saén. Endob amuk kérégénan ron taloo no ferasayén ro sabaf bé uret i Tuluse, magad mékédan i késarig ruwe. <sup>18</sup> I de dumoy de béne ménsawér ro dob de duwaléy suwar. I atag i ni, wén i do étew énggéléingoo roy uret i Tuluse, <sup>19</sup> éndob non bé de bukué ro fantag bé de kéuyag ro, brab kéuyot ruwe waléy kawasa, brab kéuyot ruwe bé de ségiyo do languntaman, been i niy funa ruwe gélfoto roy uret i Tuluse brab énda gérigono roy fatute kétayay Tuluse rigoné ro. <sup>20</sup> Atin i de dumoy de béne ménsawér ro dob fiyowe fantad. I atag i ni, wén i de étew énggéléingoo roy uret i Tuluse brab toow fo nunuro ro. Mélaw rigoné roy kétayay Tuluse rigoné ro. I de dumo bero gérigono roy de fiyo, brab i de dumo bero gérigono ro na foy médoowe do fiyo, brab i de dumo bero toow na fo gérigo ro do médo do fiyo.”

<sup>21</sup> Atin ménbéréd man i Jesuse mano, “Enda i témumon solo inok bunéyé no dob bukag i kuréngé fénléngkéb, taloo no fédioé no dob fantad i katriwe. Yamula fédioé no dob fégónone de. <sup>22</sup> Ségiléw so bé ni, i de kétoro gu ménbunéy béleewe, giton moso. Atin i kéluhanay éndae gésobuton béri, gésobuton moso. <sup>23</sup> Komon fégitung gom fantag bé ni bénréh gu begom amuk méuyot gom de ké gésobuto kom.”

<sup>24</sup> Atin ménbéréd man i Jesuse mano, “Fétuntay gom i gélingoo kome. Non i kékukum gome bé de dumo gom do étew, iringéy Tuluse so ké kukumé no begom, éndob toow na fo gétimal. <sup>25</sup> Atin i étewe mégélingo brab munur, méumanan nay kégésobut ne. Endob i étewe énda munurén, fiyon foy klohe fégitungé no gésobuto no, dotén dob beene.”

<sup>26</sup> Atin ménbéréd man i Jesuse mano, “I kédakél i kékéguléw i Tuluse bé de étewén ségiléw bé kééruk i de béne sénabug i ségétewe étew dob fantade. <sup>27</sup> Tidéw béno, témunoh i de béne fiyon fo ké énda gésobutoy sémaugey funay de nohok témunoh. Méruk i de nohok fiyon fo ké fuweh ké gémalbék taloo no kélunganon ké fidong. <sup>28</sup> Non i fantade fétunohé noy de nohok brab fégégonoké no. Dob sunguwe de, démaun. Tidéw béno, musu. Tidéw man béréd, kémifénén. <sup>29</sup> Atin amuk lagasén, fakayén kétewé no non énggumahén i gaiy kékétewe de.”

<sup>30</sup> Atin ménbéréd man i Jesuse mano, “Ati fégiringo tom bé kékéguléw i Tuluse bé de étewén? Ati binuwayae ureté tom? <sup>31</sup> Ségiléw na bé toowe fo kloh béne, éndot i étewe

brab nohokén dob fantade. <sup>32</sup> Tidéw béno, téménunoh brab ménruk taman ménwaléy toow fo dakél nohok. Atin ménongo dakél fongo, inok i de kloh manok salaga ro.”

<sup>33</sup> I uret i Tuluse nuret Jesuse dob de étew fén-agéw dob de médo do binuwaya loo bé ni. Nureténi bero taman énggésobuto ro. <sup>34</sup> Enda i no kétoroén bero ké békén binuwaya. Endob amuk beroy de kuyugén saén brab énda i do ségiyo étew diyo, fégétiga no beroy de atag i de binuwaya.

### Féntéré Jesusey défuke

<sup>35</sup> Bé béno gai, amun sémingkufén, bénréh Jesuse dob de kuyugén mano, “Mifar tom mangéy dob difar i dogote ni.” <sup>36</sup> Mélaw tétagak roy de ménlimud do étew, brab i de kuyugén ménda ro dob awange énsara Jesuse. Tidéw béno, ménifar ro. Wén soy do ségiyo awang ménodor bero. <sup>37</sup> Tidéw béno, amun diyo ron dob kérara i dogote, tékow énggumah i émbagére défuk. Atin nahuroy de bagél i awang ruwe taman gédét ménféno bé wayége. <sup>38</sup> Endob i Jesuse diyo dob ulinay awange, ménfidong déménanan. Atin téningé i de kuyugén atin nulég ro maro, “Maistéro, aw énda i ula mé de ké mégra tom?”

<sup>39</sup> Tidéw béno, méntek i Jesuse brab génléen i réfuruhe brab de bagél mano, “Fétinanék gom!” Sonom béno, téménréni i réfuruhe, atin ménlingén-ngén i dogote. <sup>40</sup> Atin ménbérén i Jesuse dob de kuyugén mano, “Sedek mágilak gom? Aw énda séna sémarig gom?”

<sup>41</sup> Endob toow ro fo ménggilak atin ménsbérén-bérén ro maro, “Ati néni mon i ni étew? Fiyon i défuke brab de bagél géfétérén no!”

### 5

### Dénédél Jesusey de saitan

<sup>1</sup> Atin méntaus ro taman énggégumah ro dob difar i dogote, dob ingéde Gerasa. <sup>2</sup> Amun téménfad i Jesuse, bénalak i étewe rénahukoy saitane. Tidéw dob de takub do lébeng, <sup>3</sup> non bati diyo. Brab éndaén fo méikétén, fiyon fo ké sangkali. <sup>4</sup> Non médoonén gule nikét bé sangkaliey de sékéyén brab de kémérén. Endob i de sangkali sékétusé no, brab de futow fénggéfatung bé de sékéyén séfindasé no. Atin énda nay ségtéw étew émbagér ménggífifit de. <sup>5</sup> Fuweh na kélungonon i kéagéw ne dob de duwaléy lébeng brab dob de tuduk. Diyo mékes brab falié noy lowoh ne bé de batéw.

<sup>6</sup> Atin amun énggito noy Jesuse dob mérayue, léménéntu mangéy fégédét brab ménlingkuwéd dob adafa nuwe. <sup>7-8</sup> Atin i Jesuse sénuguén i saitan mano, “Saitan, sut go tidéw dob beena nan!”

Tidéw béno, ménkes métanug i étewe rénahukoy saitane ni. Ménbérén i saitan mano, “Jesus, Nga i toowe fo gérotor Tulus, ati kérigo muwe begén? Ongoté ku Beem, fasad go dob Tuluse bé kago fédawéton begén.”

<sup>9</sup> Atin fénénginsaa Jesuse mano, “Ati dawét me?”

Atin séménumbul mano, “Laksaén i dawét guwe non bé médo gey do saitan dob ni étew.” <sup>10</sup> Atin féntausén i kéfégédaw-gédaw ne dob Jesuse bé békén damén dédélé Jesuse bero mangéy dob mérayue.

<sup>11</sup> Enda mérayuén dob no gonon, diyo i médoowe do babuy témabtab dob méngalandige. <sup>12</sup> Atin nongot i de saitan dob Jesuse maro, “féangéyén gey dob do babuy diyo, brab fédayaém begey mahur dob berowe.” <sup>13</sup> Atin ténungkas Jesuse bero. Mélaw i de saitan ménuts ro dob étewe ni brab ménahur ro dob de babuy ni. Wén i ruwo ngibu kédooy de ni babuy, brab kéluhana ro ménraréy ro ménangéy dob fingase brab ménantéfor ro mangéy dob dogote, atin ménléné ro.

<sup>14</sup> I de étew témalima bé de babuy ni, amun énggito roy ni ménrigo, ménsgéta ro brab nuret roy ni dob ingéde brab dob de ségiyo gonon géliwét. Atin ménangéy diyo i de étew inok susiné roy ni ménrigo. <sup>15</sup> Ménfégédét ro dob Jesuse brab énggito roy étewe ni bé gétaho rénahukoy de médo do saitan. Ménsar diyo, kéménégal brab métintunén

i kéfégitung ne. Atin kéluhana ro mégilak ro de. <sup>16</sup> Nuret i kéluhanay de énggégito de ké ati ménrigowe dob étewe ni bé gétaho sénaitanan brab ati ménrigowe dob de babuy.

<sup>17</sup> Mélaw i de étew nongot roy Jesuse tékédan dob ingéd ruwe ni.

<sup>18</sup> I lala Jesuse ménda dob awange, i lagéyo no ténkédanay de saitan nongotén dob Jesuse mano, “Modoru Beem.”

<sup>19</sup> Endob énda ténungkas Jesuse de. Yamula ménbérél mano, “Ule go brab uretérm dob de samungém i kéluhanay fiyowe rénígoy Kadnane Tulus dob beeme brab kégédaw ne beem.”

<sup>20</sup> Mélaw ménagéw brab ménsgud-sugud dob gonone diyo féndawét “Do Folo Ingéd”, brab nuretén i kéluhanay rénígo Jesuse dob beene. Atin i kéluhanay de étew énggégélingo de, ménggaif ro de.

### *Nuwa Jesusey ruwoye gétéw libun*

<sup>21</sup> Tidew béo, ménsefule i Jesuse mifar dob dogote. Amun énggumah dob difare, diyo dob fédoror i dogote ménlimud i médoowe étew géliwét de. <sup>22</sup> Atin énggumah i ségétewe étew féndawét Jairo, ségétew odoron dob lawie féngadafan kay de Judio. Amun énggito noy Jesuse, ménfégédét dob Beene brab méntéléngkéb dob adafa nuwe. <sup>23</sup> Atin toow fo nongotén dob Jesuse mano, “I klohe kénogo ku toow fo kétimalan démeruun. Enggonén angéyém gamak inok adi-adi brab inok énda méléhuén.”

<sup>24</sup> Mélaw ménodor i Jesuse de. Atin ménodor i médoowe étew brab méserasék ro lémiwét bé Jesuse.

<sup>25</sup> Diyo soy ségétewe libun kéfasangan non foloén bra ruwo gébélantuwa i kéranas i adat ne. <sup>26</sup> Brab ménétényen i kurta ne féngébayadén bé de doktor, éndob énda foy ségétew géuwa de. Yamula minut gétimal i déruu nuwe. <sup>27</sup> Enggelingoo noy de uret fantag bé Jesuse, mélaw ménfuray so bé de médo ni do étew ménlimud inok gékuwaha noy kégal Jesuse. <sup>28</sup> Non fénggitungén mano, “Amuk gékuwaha ku saén i kégal ne, adi-adiuw.”

<sup>29</sup> Mélaw kénuwahén i kégal Jesuse. Sonom béo, téménréni i kéranas i adat ne, atin énggétérédama no ménadi-adi bé déruu nuwe. <sup>30</sup> Endob bé béo so, énggétiga Jesuse bé ménusut i barakat ne tidew dob Beene. Mélaw méntékélid brab ménénginsa dob de ménlimud do étew mano, “Ati kéménuwahe bé kégal guwe?”

<sup>31</sup> Atin séménumbul i de kuyugén maro, “Gito moy médoowe ni étew géliwét Beem brab séendantélo ro Beem. Sedek fénginsaé moy ati kéménuwahe Beem?”

<sup>32</sup> Endob i Jesuse féntausén i kéiling-iling ne téméngténg ké atiy kéménuwahe de.

<sup>33</sup> Tidew béo, i libune ni énggétiga no atiy ménrigowe dob beene. Mélaw ménfégédét lémukub bé kégilak ne, atin méntéléngkéb dob adafa Jesuse. Brab bénréhén i kéluhanay toowe. <sup>34</sup> Tidew béo, bénréh Jesuse de mano, “Di, i kégéngintoow mey funa muwe ménadi-adi. Taus go ule brab kagonén émbuku. Endaén démeruun go bé ni déruun.”

<sup>35</sup> Amun bérhéh Jesusey ni, énggumah i de étew tidew dob lawi Jairowe. Ménbérél ro dob Jairowe maro, “Déménigurén i nga me. Endaén kailanga mo féangéyé mo diyo i Maistérowa nan.”

<sup>36</sup> Endob i Jesuse, énda ténuila noy kékérél ruwe ni, yamula bénréhén dob Jairowe mano, “Kago mégilak. Féginugut go saén.” <sup>37</sup> Atin i Jesuse, énda i ségétew fénodorén saliyu bé ro Pedrowe, Santiagowe, brab Juane dumo Santiagowe sétiman idéng. <sup>38</sup> Amun énggumah ro dob lawi i odorono no, énggito Jesusey ménribuke, atin énggelingoo noy de ni médo étew toow fo selekén non kémérew ro brab rémuung ro. <sup>39</sup> Tidew béo, ménahur i Jesuse brab bénréhén mano, “Sedek ménribuk gom brab selekén gom kémérew? Non i ngae ni énda ménléhuén, éndob ménfidong saén.”

<sup>40</sup> Mélaw sénbayat roy Jesuse. Tidew béo fénsutén bero kéluhanan, atin nuwitén i abay i ngae ni brab idéng ne brab de télew gétew kuyugén ménodor de, atin ménahur ro mangéy dob sibéye gonoy ngae ni méniro. <sup>41</sup> Tidew béo, génamak Jesusey kémér ne brab ménbérél mano, “Talita kumi.” (I atag ne “Di, tek go!”)

<sup>42</sup> Sonom béno, méntek i ngae ni atin ménagéw. Folo bra ruwo gébélintuwa i idad ne. Toow ro fo ménggaif bé ni rénigo Jesuse. <sup>43</sup> Endob i Jesuse fénégétén i kékérého nuwe bero bé békén ureté ro dob ségiyowey ni ménrigo. Atin sénuguén bero émféama bé ni nga.

## 6

<sup>1</sup> Tidéw béno, ménagéw man i Jesuse tidéw diyo atin ménule mangéy dob kaane ingéd. Atin ménodor i de kuyugén so. <sup>2</sup> Atin bé gaiy kétéréne, ménangéy témozo dob lawie féngadafan kay de Judio. Médooy de étew diyo, atin amun énggelingoo roy kétoro Jesuse, ménggaif ro. Mélaw ménésféninsa ro maro, “Ati ni dakél kégétawan, brab tidéwo nuwe de? Sedek gérigono noy mékégaife galbék?” <sup>3</sup> Aw békén ba Beeney fandaye rémigo lawi nga Maria brab ofo Santiago, Jose, Judas brab Simon? Brab aw békén ba dini dob betomey de libu no?” Mélaw ménika ro de.

<sup>4</sup> Atin ménbéréh i Jesuse dob berowe mano, “I ségétéwe sarigoy Tuluse muret bé kékéréh ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi.”

<sup>5</sup> Atin énda i gérigono no mékégaif galbék saliyu saén bé gémamake bé firoye démeruun atin géféadi-adino no bero. <sup>6</sup> Atin ménggaif i Jesuse non énda ménunur ro dob Beene.

*Sénugu Jesusey de folo bra ruwo gétew kuyugén*

Tidéw béno, ménagéw i Jesuse sémugud témozo dob de ingéd gédét diyo. <sup>7</sup> Atin ténavag Jesuse mangéy sélimud dob Beeney de folo bra ruwo gétew do kuyugén. Tidéw béno, sénuguén bero sémugud séruwo-ruwo gétew. Atin niraya no bero barakat inok géféraréyo roy de saitan. <sup>8</sup> Atin bénréhén bero mano, “Kagom muwit éntingayén saliyu saén bé tugée. Kagom muwit amaén, taloo no réban, taloo no kurta. <sup>9</sup> Fatut séminilas gom, éndob kagom muwit lékasa kom kégal.” <sup>10</sup> Atin bénréhén so bero mano, “Fyon atiy lawie témayakuf begom, bati gom diyo taman tagaké kom i nan ingéd. <sup>11</sup> Buluk wén i no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero.”

<sup>12</sup> Tidéw béno, ménagéw i de kuyugén ni brab nuret roy fatut gésénule i de étew bé de sala ro brab tagaké roy de tete adat ro. <sup>13</sup> Atin énggéléféraréy ro do médooy saitan, brab lénulawa ro nor i de médooy do déruunan atin ménadi-adi ro.

*I kéléhu Juan Bautistawe*

<sup>14</sup> Bé béno, i Herode, sani méguléwe dob Galilea, énggelingoo noy de rénigo Jesus non ménbantug dob kéluhanay de gonon. Wén i do étew ménbéréh ro bé i Juan Bautistawe ménébule non maro ké Juan i Jesuse. Been kun i niy funa nuwe wén i barakatén gérigo do mékégaif.

<sup>15</sup> Brab i de dumo de béréhé roy Elias kun i Jesuse, sani ménélatae sarigoy Tuluse bé do gétah. Brab i de dumo de béréhé roy Jesus kun i toowe fo énggétah sénarigoy Tuluse muret.

<sup>16</sup> I Herode, amun énggelingoo noy de ni, ménbéréh mano, “Beeney Juan Bautistawe fénkéleng guy uléw ne, éndob ménébule.” <sup>17-18</sup> Ay niy funa Herode ménfékéleng bé uléw Juane. I Herode lénamfaén i bawag i tuwaréy ne Filipi. I dawét i ni libun Herodiyas. Tidéw béno, bénréh Juane dob Herodey ménsla non énda fakayén dob kitab i de Judio ké bawagén i iboe. Tidéw béno, i Herode fénkéfoén i Juane brab fénférisu no.

<sup>19</sup> Mélaw i Herodiyase ménkérít bé Juane brab ménuyot de méméléhu, éndob énda féndaya Herode de. <sup>20</sup> Non i Herode ménggilak bé Juane non gétiga noy métintu étew i Juane brab fiyoy adat ne. Mélaw déniyaga no. Atin méuyot de mégélingo, fyon fo ké ménriyarah de ké fégélingoé noy Juane.

<sup>21</sup> Endob énggumah i gaiwe rigoné Herodiyasey tetee dob Juane. Non réménigo karagiya i Herode fégétédémo no bé kéumah ne. Atin sénéngkatén i médoowe do odoron brab de sarigo datu Herode brab de odoroy de sundalo, brab de gérotor do étew dob

ingéde Galilea. <sup>22</sup> Atin i kénogo Herodiyase ménahur dob karagiye ni, atin ménsayaw. Mélaw ménfiyoy fédew Herode beroy de kana no. Atin bénréh Herode dob kénogone ni mano, “Ongotém dob begéney atiy kétaya muwe, brab iray gu.” <sup>23</sup> Atin séménafa mano, “Fasada ku beem, iray gu dob beemey atiy ongoté muwe dob begéne, fiyon fo ké ségebala bé ni ingéd féguléwo ku.”

<sup>24</sup> Mélaw ménsut brab ménenginsa dob idéng ne mano, “Ati ongoté kuwe?”

Atin séménumbul i Herodiyase mano, “Ongotém i uléw Juan Bautistawe.”

<sup>25</sup> Tidew béno, ménagayas séfule mangéy dob datu Herode brab ménongot mano, “Kétaya ku ké béeewe ni irayém begén i uléw Juan Bautistawe dob biléwe.”

<sup>26</sup> Atin toow fo méntete i fédew datu Herode, non mikar rémigo bé ni. Endob sabaf bé méégeté fasadén rénigo no dob téngaangay de kana no, ménika ké énda magayun no bé ni ongotén. <sup>27</sup> Mélaw fénagayasén sénugu i ségétéwe guwardiya mangéy dob férisonone inok kéléngé noy uléw Juane brab uwité no séfule. Tidew béno, i guwardiyawe ni, ménagéw dob férisonone brab kénléngén i uléw Juane. <sup>28</sup> Atin nuwitén i uléw ne dob biléwe, brab nirayén dob ni kénogon. Atin niray i kénogone ni dob idéng ne. <sup>29</sup> I de kuyug Juan, amun énggelingoo roy ni, nangéy roy bangkay ne, atin lénébéng ro.

### Fénwaléy Jesuse médooy klohe amaén

<sup>30</sup> Amun ménésfuleén i de apostol mangéy dob Jesuse, bénréh roy kéluhanay de rénigo ro brab de ténero ro. <sup>31</sup> Atin toow fo médooy de étew ménangéy ségitó bé Jesuse, mélaw énda i uras Jesuse brab de kuyugén mama. Mélaw bénréh Jesuse dob de kuyugén mano, “Enggomén, magéw tom dob géfélébue gonon inok gétérén tom singkow.” <sup>32</sup> Mélaw ménanda ro dob awange inok mangéy ro dob géfélébue gonon.

<sup>33</sup> Endob médooy de étew énggégito bero magéw, brab énggétiga ro bero. Mélaw ménagayas i de étew tidew dob kéluhanay de ingéd léméntu mangéy dob ayo Jesuse beroy de kuyugén. Atin énggétah ro na énggégumah bé Jesuse. <sup>34</sup> Amun déménunggu i awange ni brab ménlus i Jesuse dob dénsaane, énggito noy de médooy do étew ménlimud. Atin ménuray i na nuwe bero, non gésigiléw ro bé de bili-bili énda i témalima bero. Mélaw féngganayén i kétoro ne bero bé médoowe kétoroén. <sup>35</sup> Amun témégénén, i de kuyug Jesus ménangéy ro dob Beene brab ménbérélh ro maro, “Témégénén, atin i ni gonon mérayu dob dakéle ingéd. <sup>36</sup> Mélaw féagewém i de étew ni inok mangéy ro dob de ingéd gédét dini. Diyo gébéléy ro amaé ro.”

<sup>37</sup> Endob i Jesuse ménbérélh dob de kuyugén mano, “Iraya kom bero amaé ro.”

Atin ménbérélh ro maro, “Ay aba-aba, aw méuyot go de ké méléy gey amaén kay de médoowe ni étew? Labi ruwo ngibu filak i nan!”

<sup>38</sup> Atin fénénginsaa Jesuse bero mano, “Firoy timan i fa tome? Ay gom ta langu.”

Amun gétiga ro, séménumbul ro maro, “Limo timan fan brab ruwo timan sédo.”

<sup>39</sup> Tidew béno, ménbérélh i Jesuse dob de kuyugén mano, “Féésar gom i de étew sésélumfuk-lumfuk dob de mélunéw kéroon.” <sup>40</sup> Mélaw i de étew, ménasar ro ménéslumfuk-lumfuk, sémeratuh-ratuh brab sélimo-limo folo. <sup>41</sup> Tidew béno, éndot Jesusey limowe timan fan brab ruwowe timan sédo, atin léménéngag saréw dob lawayo brab ménfésalamat dob Tuluse. Tidew béno, sénbaad-baadén i de fan, brab nirayén dob de kuyugén inok saaré ro dob de étew. Atin loo so bé niy rénigo nuwe bé ruwowe timan sédo. <sup>42</sup> Atin i kéluhanay de étew, témenantu ro mama taman ménbésor ro. <sup>43</sup> Tidew béno, ténimu i de kuyug Jesus i de sama i de fan brab sédo brab ménféno i foloe bra ruwo timan biton. <sup>44</sup> I kédooy de ménama, limo ro ngibu do lagéy saliyu na bé de libun brab de nga.

### Ménagéw i Jesuse dob rotor i dogote

<sup>45</sup> Tidew béno, fénda Jesusey de kuyugén dob awange atin fénétahéni bero mangéy fingé difar bé dogote dob ingéde Betsaida, bé lala ne émféule bé de étew ménlimud.

<sup>46</sup> Atin amun ménggétawén dob berowe, ménangéy i Jesuse dob sébaane burur inok démasal. <sup>47</sup> Atin amun sémingkufén, i awange diyoén dob kérara i dogote. Atin i Jesuse

ségétewén saén dob fantade. <sup>48</sup> Atin énggito no kérégénan i de kuyugén mémurah bé awang ruwe, non gérumfaka roy réfuruhe. Mélaw amun lingkuwogén mangéy fuweh, ménangéy i Jesuse dob berowe magéw dob rotor i dogote. Géfédew damén gélamfasa no bero, <sup>49</sup> éndob énggito ro magéw dob rotor i wayége. Atin maro ké ménayam. Mélaw ménkes ro. <sup>50</sup> Non kéluhana ro ménggilak amun énggito ro.

Endob sonom béno, i Jesuse ménbéréh dob berowe mano, “Kagom mégilak! Begén. Fétana gom i de fédew gom.” <sup>51</sup> Tidew béno, ménda dob awang ruwe. Atin téménréni de réfuruhe. Atin toow fo ménggaif i de kuyugén, <sup>52</sup> non fiyon fo ké énggito roy mékégaife rénigo Jesuse dob de amaén, énda gésobuto ro de non métégas i de atur ro.

<sup>53</sup> Atin amun énggéifar ro, déménunggu ro dob ingéde Genesaret, atin ménamfil ro fédoror. <sup>54</sup> Atin amun téménéfad ron dob awange, sonom béno énggiloy de étew bat diyo i Jesuse. <sup>55</sup> Mélaw ménagayas ro léméntu dob séngae ingéd diyo inok fégétiga ro dob de étew. Tidew béno, nuwit roy de démeruun télanggung ro mangéy dob énggelingoo ruwe gono Jesuse. <sup>56</sup> Atin dob séngae nayo no, fiyon fo ké kloh ingéd taloc no dakél, nuwit roy de démeruun dob de fadiyan, atin nongot ro dob Beeney kuwahé ro saén i firung-fung i kégal ne. Atin i séngae gékuwah de adi-adi.

## 7

*I kétoroe fantag bé adat i de Judio*

<sup>1</sup> Wén i no sébaan fuweh, i de Fariseo brab de témore béréh kitab i de Judio, do tidew Jerusalem, téningé roy Jesuse. <sup>2</sup> Atin énggito roy dumoy de kuyugén mama énda ménnguse ro loo béréh adat i de Judio.

<sup>3</sup> Non i de Fariseo, brab kéluhanay de Judio, énda mama ro taman énda gégéfugue ro non odoro roy adate tidew dob de katufua ro béréh do gétah. <sup>4</sup> Brab buluk méléy ro amaén dob fadiyané, énda amaé ro de taman énda ménurahén. Atin ménurahén do gétah ro loo béréh adat i de Judio.

<sup>5</sup> Mélaw i de Fariseo brab de témore béréh kitab, ménenginsa ro dob Jesuse maro, “Sedek i de kuyugém énda odoro roy adat tome tidew dob de katufua tom, non énda ménnguse ro béréh adat i de Judio.”

<sup>6</sup> Atin séménumbul i Jesuse mano, “Enda toow i kéunur gome béréh Tuluse, ubo-ubo saén. Toow i kékéréh Isaiase, sani ségétewé méntélata sénarigoy Tuluse muret béréh ne, amun sénulatén i fantage béréh begome mano, ‘Bang i Tuluse, basanay de ni étew Begén dob kékéréh ruwe saén. Endob énda munur ro Begén dob de fédew ro. <sup>7</sup> Enda i atag i kékéngadaf ruwe Begén, non toroé roy de sugu rénigoy kéilawane brab béréhne ro tidew dob Begén.’”

<sup>8</sup> Atin féntaus Jesusey kékéréh ne mano, “Mélaw téngak gom i de sugu i Tuluse inok odoro kom i adat i kékéngadaf ruwe saén. <sup>9</sup> Furung gom mika béréh de sugu i Tuluse inok modor gom béréh kagome kékéngadaf ruwe saén. <sup>10</sup> Non wén i sugu i Tuluse niray Moisese béréh do gétah mano, ‘Basana moy abay me brab idéng me.’ Atin bénréhne so mano, ‘Buluk wén i ségétewé émbéréh tete fantag béréh abay ne look idéng ne, fatut féléhuén.’ <sup>11</sup> Endob i begome, témore gom béréh amuk wén i ségétewé étew émfasang i abay ne look idéng ne, brab wén i tabang irayén damén, tungkasé kom de émbéréh ‘Korban’. (I atag i Korbane ‘Kay Tuluse’.)

<sup>12</sup> Mélaw éndaén tungkasé kom de témore gom béréh adate toroé kom. Brab do ménurahén do gétah ne, amuk wén i ségétewé étew émfasang i abay ne look idéng ne, brab wén i tabang irayén damén, tungkasé kom de émbéréh ‘Korban’.

<sup>13</sup> Mélaw téngak gom i kékéréh i Tuluse inok modor gom béréh adate toroé kom. Brab do ménurahén do gétah ne, amuk wén i ségétewé étew émfasang i abay ne look idéng ne, brab wén i tabang irayén damén, tungkasé kom de émbéréh ‘Korban’.

*I kétoroe fantag bé amaén*

<sup>14</sup> Tidew béno, ténavag Jesuse man i de étew mangéy dob Beene. Atin ménbéréh dob berowe mano, “Fégélingo gom Begén, kéluhana kom, brab fégésobut gom. <sup>15</sup> I funay de étew waléy mékérésik dob adafay Tuluse, békén non béréh adate toroé kom. Yamula, i de témore gom béréh adate toroé kom. Brab do ménurahén do gétah ne, amuk wén i ségétewé étew émfasang i abay ne look idéng ne, brab wén i tabang irayén damén, tungkasé kom de émbéréh ‘Korban’.

<sup>16</sup> Fétuntay gom i ni bénréh gu.”

<sup>17</sup> Tidéw béno, amun té nagak Jesusey de médo do étew ménlimud brab énggérahuur dob lawie, ménenginsa i de kuyugén dob Beene fantag bé atag i ni kékéréhén. <sup>18</sup> Atin sénumbulo Jesuse bero mano, “Ségiléw gom bé kéluhanay de ségiyo étew, non énda gésobuto kom i ni kéto ro. <sup>19</sup> Non i amaéy étewe, mahur dob sur ne brab mésut so dob lowoh ne. Enda mahurén dob fédew ne.” Bé ni kékéréh Jesuse, ténoréen bé i kéluhanay amaéne fiyo, fakay amaéy de étew.

<sup>20</sup> Atin féntaus Jesusey kékéréh ne mano, “I géésute tidéw dob étewe, been i funa nuwe mémérésik. <sup>21</sup> Non tidéw dob fédewe, gégumah i tete kefégitung, brab sébiga, brab ménakaw, brab méméléhu, <sup>22</sup> brab sétayan bé bawag i ségiyowe, brab arumén, brab lémiful, brab tete i rigonéy de lowoh ro, brab mingar, brab témo bé éndae toow, brab félangka-langka, brab dufang, brab kéluhanay de tete rigonén. <sup>23</sup> I kéluhanay de ni tete tidéw dob fédew i étewe brab funa no mémérésik.”

<sup>24</sup> Tidéw béno, ménagéw i Jesuse tidéw diyo mangéy dob de ingéd gédét dob ingéde Tiro. Diyo réménahur dob lawie, atin ménuyot ké énda gétigay de étew i gono nuwe. Gido loo, ménslalag i Jesuse diyo bati. <sup>25</sup> Atin diyo i libune wén i klohe kénogo no rénahukoy saitane. Atin énggelingoo noy fantage bé Jesuse. Mélaw ménagayas ménangéy dob Beene brab méméléngkéb dob adafa nuwe. <sup>26</sup> Atin nongotén dob Jesuse bé feféraréyé noy saitane tidéw dob kénogo nuwe ni. Endob i ni libun, békén Judio. Yamula, tidéw dob ségiyowe ingéd féndawét Fenisia dob Siro. <sup>27</sup> Mélaw nuret Jesusey sébaane binuwaya inok fégétiga no de bé tabangé noy de Judio sungu, atin tidéw béno tabangé noy de békén Judio. Ménbéréh mano, “Féamaén na métah i de nga. Non énda fatutén ké dotén i amaéy de nga atin ibérén dob de itu.”

<sup>28</sup> Endob ménbéréh i libune ni mano, “Toow, Maistéro, éndob fiyon foy de itu géamaa roy de momu mélawu tidéw dob amaéy de nga.”

<sup>29</sup> Mélaw séménumbul i Jesuse mano, “Fiyoy nan kékéréhém. Mélaw ule go non ménusutén i saitane tidéw dob nga me.”

<sup>30</sup> Tidéw béno, ménule i ni libun, brab énggito noy nga ne méniro, brab i saitane éndaén rénahuko no de.

### *Nuwa Jesusey ségétéwe bokongén brab mow*

<sup>31</sup> Tidéw béno, ménagéw i Jesuse tidéw dob de ingéd gédét dob Tiro brab ménémanték mangéy bé ingéde Sidon atin ménautas dob dogote Galilea. Atin témenara dob gonone féndawét “Do Folo Ingéd”. <sup>32</sup> Atin wén i de étew nuwit ro mangéy dob Jesusey lagéyé bokongén brab énda toowén géréh fiyo. Atin nongot ro dob Beeney gamaké no inok adi-adi. <sup>33</sup> Mélaw i Jesuse, nuwitén féravy tidéw dob de ménlimud do étew. Tidéw béno, féndiyoén i de dau kémérén dob de kelingo i bokongéne ni, brab fénreén i dau kémér ne brab kénuwahén i dila ne. <sup>34</sup> Tidéw béno, léménengag i Jesuse saréw dob lawayo, brab fénénarén i kékérénawa nuwe, atin ménbéréh dob beene mano, “Ifata”. (I atag ne “Méungka go.”)

<sup>35</sup> Sonom béno, i de kelingoén ménadi-adi brab énggégélingo, atin i kékéréh ne ménadi-adi so. Mélaw méniganay ménbéréh fiyo. <sup>36</sup> Tidéw béno, i Jesuse sénuguén i de étew diyo bé békén béréhé roy ni rénigo no dob de ségiyo. Endob amun sénuguén bero bé békén ureté ro, ménlabi na foy kéuret ruwe de. <sup>37</sup> Atin i kéluhanay de énggégélingo de toow ro fo ménggaif. Ménbéréh ro maro, “Fiyoy wayoy kéluhanay de rigoné no ula-ula. Géfégélingoo noy de bokongén brab géférého noy de mow.”

### *Fénwaléy Jesuse médooy klohe amaén*

<sup>1</sup> Enda mérugayén tidéw béno, ménlimud man i de médo étew. Amun ménitéy i de amaé ro, ténavag Jesusey de kuyugén mangéy dob Beene, brab ménbéréh dob berowe mano, <sup>2</sup> “Méuray i na guwe bé de ménlimud ni do étew, non ménélwén gétérésangan i kédini ruwe ni dob Begéne, atin béléewe ménitéy i amaé ruwe. <sup>3</sup> Atin amuk féuleé ku

bero mélayah ro, mésumba ro dob de lowoh aguwon, non i de dumo bero mérayu i de kétidéw ro.”

<sup>4</sup> Atin ménbéréh i de kuyugén mano, “Ati kéfingé-fingé i kénéfamae bé de médoo ni étew dob ni gonon mérayu tidéw dob de lawi?”

<sup>5</sup> Atin i Jesuse fénenginsaa no bero mano, “Firoy timan i fa koman?”

Séménumbul ro maro, “Fitéw timan.”

<sup>6</sup> Tidéw béo, sénuguén i de ménlimud ni do étew bé mésar ro dob fantade. Atin éndotén i fitéwe timan fan brab ménfésalamat dob Tuluse. Tidéw béo, sénbaad-baadén, brab nirayén dob de kuyugén inok saaré ro dob de étew. Atin rénigo roy ni. <sup>7</sup> Brab wén soy do kloh sédo ro, éndob énda médoo no. Atin ménfésalamatén man dob Tuluse brab bénréhén bé de kuyugén bé saaré ro so. <sup>8</sup> Atin i kéluhanay de étew, téménantu ro mama taman ménbésor ro. Fot ngibuy kédoor ruwe. <sup>9</sup> Tidéw béo, i de kuyugén ténimu roy de sama ro brab ménfénou i fitéwe timan biton. Tidéw béo, fénule Jesusey de ménlimud ni do étew. <sup>10</sup> Sonom béo, ménda dob awange beroy de kuyugén, atin ménangéy ro dob ingéde Dalmanuta.

<sup>11</sup> Wén i no sébaan fuweh, i de Fariseo ménangéy ro dob Jesuse brab méniséédél ro de. Ménuyot ro téméngkad bé Jesuse, mélaw nongot ro bé rigono no bero sébaan mékégaif galbék inok fégito no bero tidéw dob Tuluse. <sup>12</sup> Endob i Jesuse fénsénarén i kénéfrénawa nuwe sabaf bé kétete i fédéw ne. Brab ménbéréh mano, “I de begom do étew méuyag béléewe ni, sedek ongoté kom i mékégaife? Béréhé ku begom i toowe, énda rigoné kuy mékégaife inok méngeintoow gom.”

<sup>13</sup> Tidéw béo, i Jesuse beroy de kuyugén téngak roy de étew ni, atin ménda ro man dob awange mifar dob dogote.

<sup>14</sup> Atin i de kuyugén énggélifoto roy muwite fan saliyu bé sébaane saén fan dob awange. <sup>15</sup> Atin nuret Jesuse beroy sébaane binuwaya fantag bé de tete adatén do étew. Ménbéréh mano, “Ingata kom brab sénggila gom i fégéféruek fan kay de Fariseo brab datu Herode brab de kuyugén.”

<sup>16</sup> Endob i de kuyugé Jesus, énda énggésobuto roy ni binuwaya. Marok bénréh Jesusey fantage bé tintuwe fégéféruek fan. Mélaw ménsgéno-géno ro maro, “Bénréhén i ni non énda i fa tom.”

<sup>17</sup> Endob i Jesuse énggétiga noy kéfégitung ruwe. Mélaw ménbéréh mano, “Sedek ségéno-géno gom fantag bé kékulang i fa tome? Aw énda séna gésobuto kom de? Maak do légléngén gom. <sup>18</sup> Wén i do moto gom éndob maak do langafén gom. Wén soy do kéléingo gom éndob maak do bokongén gom. Aw énggélifoto kom i rénigo guwe? <sup>19</sup> Amun sénbaad-baad guy de limo timan fan dob de limo ngibu étew, firoy gébiton i énggétimuo kome samaén?”

Atin séménumbul ro maro, “Folo bra ruwo.”

<sup>20</sup> Atin ménenginsa i Jesuse man mano, “Atin amun sénbaad-baad guy de fitéw timan fan dob de fot ngibu étew, firoy gébiton i énggétimuo kome samaén?”

Atin séménumbul ro maro, “Fitéw.”

<sup>21</sup> Atin ménbéréh man i Jesuse mano, “Aw énda séna fo gésobuto kom de?”

### *Nuwa Jesusey ségétewé langafén*

<sup>22</sup> Wén i no sébaan fuweh, énggumah i Jesuse beroy de kuyugén dob ingéde Betsaida. Atin wén i de étew nuwit ro mangéy dob Beeney ségétewé langafén lagéy, brab nongot roy gamaké no inok adi-adi. <sup>23</sup> Atin i Jesuse, narakén i ni langafén brab ménusut ro kloh dob no ingéd. Tidéw béo, dénuraa noy de moto no brab ténevé noy langaféne ni. Tidéw béo, ménenginsa i Jesuse mano, “Aw wén i gito mo?”

<sup>24</sup> Atin iling-ililing i lagéye ni brab séménumbul mano, “Hoo, gégitowu do étew éndob maak do kayéw magéw.”

<sup>25</sup> Tidéw béo, i Jesuse ténevé no man féruman i de moto no. Sonom béo, téménéngténg i ni lagéye brab énggétitonén fiyo non ménadi-adinén i de moto no.

<sup>26</sup> Atin i Jesuse sénuguén mule brab bénréhén mano, “Kago mawét dob nan ingéd.”

*I kéunur Pedrowe*

<sup>27</sup> Tidéw béno, méntaus i Jesuse brab de kuyugén mangéy dob de ingéd gédét dob ingéde Sisarea Filipo. Brab amun diyo ro séna dob de lowoh aguwon, fénénginsaa Jesuse bero mano, “Ati kékérén i de étew ké ati Begéne?”

<sup>28</sup> Sémenumbul ro maro, “Wén i de émbérén maro, Juan Bautista go kun. I de dumo maro, Elias go kun. Brab i de dumo maro, Beem kun i énggétahe sénarigoy Tuluse muret.”

<sup>29</sup> Tidéw béno, ménénginsa i Jesuse man mano, “Dob begome, ati kékérén gome fantag bé Begéne?”

I Pedrowe sémenumbul mano, “Beemey Kristowe sénugu i Tuluse inok méguléw go dob de étew.”

<sup>30</sup> Tidéw béno, bénréh Jesuse bero mano, “Kagom bérén i ni fantag bé Begéne dob de ségiyo.”

*I kéuret Jesuse fantag bé kéléhu ne*

<sup>31</sup> Tidéw béno, i Jesuse féngganayén i kétoro ne bero fantag bé mérigowe dob Beene. Ménbérén mano, “I Nga i Kéilawane, sani Begéne, médooy rasayé kuwe. Brab i de odoro tom do Judio brab de odoroy de fadi brab de témore bérén ikaa ro Begén. Atin féléhué ro Begén. Endob dob gétéléwo nuwe gétérésangan tébuleu.” <sup>32</sup> Ménkéntay i kékérén ne bé ni dob berowe. Mélaw i Pedrowe nuwitén i Jesuse inok ruwo ro saén, atin génléen. <sup>33</sup> Endob sémenling i Jesuse brab ténéngténgén i de kuyugén. Atin génléen i Pedrowe mano, “Férayu go dob Begéne, non maak Satanas go. Non énda mégitung go loo bé Tuluse, éndob mégitung go loo bé kékérén.”

<sup>34</sup> Tidéw béno, ténawag Jesusey de ménlimud do étew brab de kuyugén inok mangéy ro dob Beene. Atin ménbérén dob berowe mano, “I étewé méuyot furay Begén, kailangan diguré noy kaane kétayan inok odoro noy kétayay Tuluse. Tidéw béno, kailanga no gédidayday bérén de kérégénon ségiléw bérén Begéne, fiyon fo ké féléhué dob kruse. <sup>35</sup> Non i étewé méuyot émféraru bérén umul ne, méléhu. Endob i méléhue bérén kéfuray ne Begén brab sabaf bérén Fiyowe Uret, gédoté noy umule magufusa. <sup>36</sup> Ufama, fiyon fo ké i ségétewé étew gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernouye. <sup>37</sup> Enda i tamuk fakay fégéluluk i étewé inok gédoté no saén i umule magufusa. <sup>38</sup> Mélaw buluk wén i mémala muret fantag bérén kékérén ne Begén brab de kétoro gu dob duniyae ni méréfeno bérén de énda méngintulus béléewe ni, i Begéne, sani Nga i Kéilawane, malané ku so buluk séfuleu moso begey i de télakiy Tuluse. Bérén, rémendawu loo bérén Abay guwe Tulus.”

## 9

<sup>1</sup> Atin féntaus Jesusey kékérén ne mano, “Béréné ku begom i toowe, wén i do dumo begom énda méléhu ro taman énda gito roy kékérén i Tuluse bérén de étewén, gégumah darabayat barakat ne.”

*Enggiton i kéréndaw Jesuse*

<sup>2</sup> Amun ménifus i néme gétérésangan, nuwit Jesusey Pedrowe brab Santagiowé brab Juane, atin ménangéy ro dob uruk i gérotore tuduk, énda i ségiyo étew diyo. Atin i lala ruwe téméngténg bérén Jesuse, i falas ne ménfégalin. <sup>3</sup> Brab i kégal ne ménwaléy fute rémendaw. Enda nay étew dob duniyae ni gétumaka noy kégale inok fute loo bérén ni.

<sup>4</sup> Sonom bérén, ménfégitoi Eliase brab Moisese brab ménfégitoi ro bérén Jesuse. <sup>5</sup> Atin i Pedrowe ménbérén dob Jesuse mano, “Maistéro, toow fo fiyo non dob ni tom. Rémigo gey télaw timan dung-dung. Sébaan i kaame de, sébaan i ka Moisese de, brab sébaan i ka Eliase de.” <sup>6</sup> Enda gétiga Pedrowey fiyowe béréné no non toow ro fo ménggilak.

<sup>7</sup> Tidéw bérén, wén i rawéne ténggalungo no bero. Atin wén i ménbérén tidéw dob rawéne ni mano, “Been i niy toowe fo kénimuo ku Nga gu. Fégélingo gom.” <sup>8</sup> Sonom bérén, méniling-iling i de kuyugén éndob énda i énggito ro saliyu saén bérén Jesuse.

<sup>9</sup> Amun léménudug ro tidéw dob tuduko no, i Jesuse fénégétén i kékérén ne dob berowe mano, “Kagom génoén dob ségiyowey ni énggito gom taman i Nga i Kéilawane, sani Begéne tébule.”

<sup>10</sup> Atin nodoro roy sugu Jesuse ni éndob séfénginsa ro sébero-bero saén maro, “Ati keey i atag i kékérén ne mano, ‘Tébuleu?’ ” <sup>11</sup> Atin fénénginsa ro dob Jesuse maro, “Sedek i de téromo bé kitabe émbéréh ro bé kailangan géétah na géumah i Eliase, atin tidéw bénō géumah i Kristowe kun?”

<sup>12</sup> Atin séménumbul i Jesuse mano, “Toow, géétah géumah i Eliase inok tafayé noy kéluhanane. Endob sedek ménsulat i kékérén i Tuluse bé i Nga i Kéilawane mérasay médoob brab ikaay de étew? <sup>13</sup> Endob béréhé ku begom, i Eliase énggégumahén, éndob i de étew fénrasay ro loo bé kétaya ruwe. Been soy ménbéréhe dob Ménsulate Kékérén i Tuluse mérigo dob beene.”

#### *Dénédél Jesusey saitane*

<sup>14</sup> Atin amun énggumaha ro Jesusey de ségiyo kuyugén, énggito roy dakéle ménlimud do étew diyo so. Atin wén i de téromo bé kitab i de Judio séédél bé de kuyugén.

<sup>15</sup> I kéluhanay de étew do ménlimud, amun énggito roy Jesuse, toow fo ménggaif ro, atin ménsgéta ro mangéy dob Beene atin sénggifa ro. <sup>16</sup> Atin fénénginsaa Jesusey de kuyugén mano, “Ati no funa kom séédél bé do étew diyo?”

<sup>17</sup> Atin wén i ségtéwe lagéy dob de étew ni ménlimud séménumbul mano, “Maistéro, nuwit guy nga guwe lagéy mangéy dob Beeme, non rénahukoy saitane funa no mow.

<sup>18</sup> Atin wén i no férasayéy saitane, atin tuwaré no dob fantade. Atin rémbew i ba ne, brab kémigét i de kifé no, brab waléy de témingkog. Nongot gu bé de kuyugém bé feféraréyé roy saitane, éndob énda gagané ro de.”

<sup>19</sup> Atin ménbéréh i Jesuse dob berowe mano, “Enda sémarig gom bé Tuluse. Lugoténun sétafik begom. Enda gétiga ku ké ati nay kérugay i kétinkél guwe sétafik begom. Uwit gom diniy ngaa nan.” <sup>20</sup> Mélaw nuwit roy ngae dob Beene.

Atin i saitane ni amun énggito noy Jesuse, ténuwarén i ngae ni dob fantade brab ménkériring, rémbew i ba ne so. <sup>21</sup> Atin fénénginsaa Jesusey abay ne mano, “Ménfiroyén i kégédam ne bé ni?”

Atin séménumbul mano, “Tidéw na fo kékélohén. <sup>22</sup> Brab médoonén gule féléhuéy saitane damén méibér dob aféye brab dob wayége. Mélaw amuk wén i fiyo gérigono mo, fégédawan gey brab tabangén gey.”

<sup>23</sup> Atin séménumbul i Jesuse mano, “Sedek fénginsaa mo Begén ké wén i fiyo gérigono ku? Fakay i kéluhanane dob étewe munur dob Tuluse.”

<sup>24</sup> Sonom bénō, ménbéréh métanug i boh i ngae ni mano, “Munuru, éndob kulang i kéunur guwe. Féégétém i kéunur guwe.”

<sup>25</sup> Tidéw bénō, énggito Jesusey médoowe do étew ségéta fégédét dob berowe. Mélaw sénuguén i saitane mano, “I beeme saitan émfémow brab émfébokong bé étewe. Sugué ku beem, sut go tidéw dob ni nga, brab kagonén séfuleon de!”

<sup>26</sup> Sonom bénō, i saitane ni ménkes, brab gétimal i kékékil ne de. Tidéw bénō, ménst i saitane atin i ngae ni maak ménléhuén non éndaén lékutohén. Mélaw médooy de étew ménbéréh ro maro, “Ménléhuén.” <sup>27</sup> Endob i Jesuse génamakén i kémér ne brab fentekén, atin téménindégi ngae ni.

<sup>28</sup> Tidéw bénō, i Jesuse brab de kuyugén ménule ro. Atin amun ménahur ro dob lawie, brab énda i ségiyo étew diyo, ménénginsa i de kuyugén dob Jesuse maro, “Sedek énda gagané key i émféféraréye bé no saitan?”

<sup>29</sup> Séménumbul i Jesuse mano, “I ni klase saitan, énda médédélén bé fiyon udenén fégédédél de, saliyu saén bé kédasale.”

#### *I kékuret Jesuse fantag bé kéléhu ne*

<sup>30</sup> Tidéw bénō, ménagéw ro man tidéw diyo atin téménara ro dob ingéde Galilea. Atin ménika i Jesuse ké gétigay de étew i gono nuwe. <sup>31</sup> Non téneroén i de kuyugén mano,

“I Nga i Kéilawane, sani Begéne, fékéfo dob de étew moso sani de sébanil Begén. Atin féléhué ro Begén. Endob amuk méifus i téliséwe gétérésangan, tébuleu.”

<sup>32</sup> Endob bé beno gai, i de kuyugén énda énggésobuto roy béréhé Jesuse. Atin mégilak ro de ménginsa ké ati atag ne.

<sup>33</sup> Atin méntaus ro taman énggumah ro dob ingéde Kafernaum. Atin amun énggérähur ro dob lawie diyo, i Jesuse ménenginsa dob de kuyugén mano, “Ati funa kome séédél dob de lowoh aguwon?”

<sup>34</sup> Endob mémala ro sémumbul non amun diyo ro séna lowoh aguwon, ménséédél ro ké ati isuwe bero toow fo gérotor. <sup>35</sup> Tidew beno, i Jesuse ménasar brab ténavagén i de folo bra ruwo gétew do kuyugén mangéy dob Beene. Atin ménbéréh dob berowe mano, “Amuk wén i ségetéw témayan toow fo gérotor, ay niy fatute rigoné no. Fatut térfantad brab waléy ségetéw sugu-suguéy kéluhanay de dumo no.” <sup>36</sup> Tidew beno, éndot Jesusey ségetéwe nga brab féndiyoén dob adafa ruwe. Atin sénfifi Jesuse brab ménbéréh dob berowe mano, <sup>37</sup> “Fiyon atiy étew témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén.”

<sup>38</sup> Atin ménbéréh i Juane mano, “Maistéro, énggito gey i ségetéwe étew démédél do saitan nusarén i dawét me. Endob génlé gey non békén dumo tom.”

<sup>39</sup> Bang Jesuse, “Kagom géléen de. Non amuk wén i rémigo mékégaif usaré noy dawét guwe, énda magadén émbéréh tete fantag bé Begéne. <sup>40</sup> Non i békéne sébanil betom, dumo tom. <sup>41</sup> Béréhé ku begom i toowe, buluk wén i témahang begom, fiyon iraya no saén begom ségetabu wayég inémén sabaf begomey de kuyug gu, tintu gédoté noy barase moso.

<sup>42</sup> “Endob amuk wén i émfésala bé ségetéwe loo bé ni nga munur dob Begéne, toow fo gétimal i kékukume de. Mélaw mas na fiyo dob beene ké ibérén dob dogote ikéton dakél batéw i reer ne. <sup>43-44</sup> Mélaw amuk sébaan bé kémér moy émfésalae beem, kéléngém. Non mas na fiyo ké gédoté moy umule magufusa ségbala saén i kémér me, bé géangéy go dob uleono emferno ké ruwoy kémér me. Non diyo dob emfernwoy de sofot énda méléhu ro, brab i aféye énda méfandaén. <sup>45</sup> Atin amuk i funa muwe mésala i sébaane bé sékéy me, kéléngém. <sup>46</sup> Non mas na fiyo ké gédoté moy umule magufusa ségbala saén i sékéy me, bé géangéy go dob emfernwo, ruwoy de sékéyém. <sup>47</sup> Atin amuk ségbala bé moto muwey funa muwe mésala, lésitém. Non mas fiyo ké géahur go dob kéféguléw i Tuluse ségbala saén i moto muwe, bé géangéy go dob emfernwo ruwoy de moto mo. <sup>48</sup> Non diyo dob emfernwoy de sofot énda méléhu ro, brab i aféye énda méfandaén.

<sup>49</sup> “Atin i aféye fédiyoén moso dob kéluhanane ségiléw bé timuse fédiyoén dob amaéne.

<sup>50</sup> “I timuse fiyo, non émféfiyo bé amaéne. Endob buluk mékedan i kétasik ne, éndaén i nonomén brab éndaén géséfule i kétasik ne. Atin ségiléw so bé ni, i de rigoné kom fatut géiring bé timuse inok émféfiyo gom bé de étew. Atin békén fatut sékérit gom.”

## 10

### Fantag bé késégélake

<sup>1</sup> Tidew beno, ménagéw i Jesuse tidew Kafernaum mangéy dob sakuf i dakéle ingéd Judea brab dob difar i wayége Jordan. Atin diyo médooy de ménangéy sélimud man dob Beene. Atin ténorón bero loo bé adat ne.

<sup>2</sup> Atin wén i de Fariseo ménangéy dob Jesuse inok téngkadé ro inok gébérého noy békéne katabawan. Mélaw fénénginsaa ro maro, “Aw fakay dob kitab tome ké i lagéyé gélaké noy bawag ne?”

<sup>3</sup> Atin séménumbul i Jesuse mano, “Ati sugu Moisese dob kitabe fantag bé késégélake?”

<sup>4</sup> Atin séménumbul i de Fariseo maro, “Ténungkas Moisesey lagéyé gémelak bé bawag ne amuk irayén i sulate bé késégélake.”

<sup>5</sup> Endob ménbéréh i Jesuse dob berowe mano, “I funa Moisese ténungkasén begom séglak non métégas i de atur gom. <sup>6</sup> Endob dob féganayo bé kélimbage bé kéilawane,

rénigoy Tulusey ségétéwe lagéy brab ségétéwe libun. <sup>7</sup> Atin been i niy funay lagéye tagaké noy abay ne brab idéng ne atin sétafik bé bawag ne. <sup>8</sup> Atin i ruwowe ni gétew waléy sébaan. Mélaw éndaén ruwo ro gétew, éndob ségétew saén. <sup>9</sup> Mélaw buluy fénwaléy i Tuluse sébaan, énda fakayén séfériyaséy étewe.”

<sup>10</sup> Atin i de kuyug Jesus, amun ménule ro ménahur ro dob lawie bero Jesuse, ménénginsa ro dob Beene fantag bé késégélake. <sup>11</sup> Atin séménumbul mano, “Fiyon atiy lagéye gémelak bé bawag ne atin mawag man ségiyo libun, léménamfa, brab ménalsa dob sunguwe bawagén. <sup>12</sup> Atin amuk wén i libun génlakén i bawag ne atin mawag ségiyo lagéy, léménamfa.”

<sup>13</sup> Wén i no sébaan fuweh, wén i do étew nuwit roy de nga ro dob Jesuse inok féfioné no bero. Endob i de kuyugén génlé roy de étew ni, non marok énda fiyo no ké félugotén i Maistérowe. <sup>14</sup> Endob amun énggito noy rénigoy de kuyugén, ménkérít i Jesuse. Atin ménbérédob de kuyugén mano, “Fédaya gom i de nga mangéy dob Begéne. Brab kagom alangén bero non i de étew sémarig loo bé késarig i de ni nga, féguléwoy Tuluse bero. <sup>15</sup> Béréhé ku begom i toowe, buluk i késarig i ségétéwe békén loo bé késarig i ngae, énda féguléwoy Tuluse de.” <sup>16</sup> Tidéw béo, sénfifi noy de nga brab ténegey noy de uléw ro féfioné no bero.

### I kawasawe étew

<sup>17</sup> Atin amun i ro Jesuse ménauts ro magéw, wén i ségétéwe lagéy méniséfégéta mangéy dob Jesuse brab ménlingkuwéd dob adafa nuwe. Atin ménénginsa mano, “Fyo Maistéro, ati rigoné kuwe inok gédoté kuy umule magufusa?”

<sup>18</sup> Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyu saén bé Tuluse. <sup>19</sup> Gétiga moy de sugu. Kago méméléhu, kago lémamfa, kago ménakaw, kago uretén i dumo muwe bé békéne toow, kago lémiful, brab fégadatay moy boh me brab idéng me.”

<sup>20</sup> Séménumbul i lagéye ni mano, “Maistéro, i kéluhanay de ni nodoro ku tidéw féganay klohu de séna.”

<sup>21</sup> Atin ténegténg Jesuse brab ménimu de. Atin ménbérédob de. Atin ménbérédob mano, “Sébaan i kulange beem. Ule go brab fébéléyém i kéluhanay étingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béo, énggonén, odor go Begén.” <sup>22</sup> Amun énggelingoo étewe niy ni, énggiton ménwaléy tete i fédew ne. Atin ménagéw loo bé nan, non toow fo kawasa.

<sup>23</sup> Tidéw béo, i Jesuse méniling-iling dob de kuyugén brab ménbérédob berowe mano, “Toow fo mérégén i kéahur i de kawasa dob kéféguléw i Tuluse.”

<sup>24</sup> Atin i de kuyugén ménggaif ro bé ni bénréh Jesuse. Gido loo, féntaus Jesusey kékérédob ne mano, “Do kuyug gu, toow fo mérégén i kéahure dob kéféguléw i Tuluse. <sup>25</sup> Mas na mélému y kéahur i dakéle ayam dob tosong i darume bé ségétéwe étew kawasa dob kéféguléw i Tuluse.”

<sup>26</sup> Tidéw béo, ménumanan i kégai i de kuyugén brab ménisébérédob maro, “Ati mélaw i de fakay méfukas?”

<sup>27</sup> Atin ténegténg Jesuse bero brab séménumbul mano, “Amuk dob rigonéy kékilawane saén, énda fo fakayén. Endob i Tuluse gérigono no, non fakay gérigonoy Tulusey kéluhanane.”

<sup>28</sup> Tidéw béo, ménbérédob Pedrowe mano, “Ténagak gey i kéluhanane atin ménfuray gey Beem.”

<sup>29</sup> Atin bang Jesuse, “Béréhé ku begom i toowe, i ségétéwe témagak bé lawi ne, taloo no de dumo no sétiman idéng, taloo no do lukésén, taloo no do ngaén, taloo no fantadén inok ureté noy Fiyowe Uret fantag bé Begéne, <sup>30</sup> gégedot toow na fo médo bérédob de ni do gai. Gégedot mératuh takéf bérédob de lawi, brab dumo no sétiman idéng, brab do lukésén, brab do ngaén, brab do fantadén. Atin saliyu na bé nan, gédoté noy umule magufusa dob de gai moso. Endob amuk dini séna, férasyéen sabaf bé Fiyowe Uret. <sup>31</sup> Endob i

de méadoo do énggéétah béleewe ni, do géfuray moso. Atin i de méadoo do énggékuray béleewe, waléy do géétah moso.”

### *Nuret Jesusey fantage bé kéléhu ne*

<sup>32</sup> Atin i Jesuse beroy de kuyugén, amun diyo ro dob aguwone mangéy dob Jerusalem, ménagéw i Jesuse dob métah ruwe. Atin ménggaif i de kuyugén brab ménggilak i de ménfuray bero, non magéw ro mangéy dob Jerusalem. Atin i Jesuse nuvitén man i de folo bra ruwo gétew do kuyugén, inok sébero-bero saén, brab bénréhén beroy ati mérigowe moso dob Beene. <sup>33</sup> Ménbéréh mano, “Fégélingo gom, mangéy tom Jerusalem. Diyo, i Begéne, sani Nga i Kéilawane, irayu dob de odoroy de fadi brab dob de témore bérkitabe. Atin kukumé ro Begén méléhu. Tidew bénou, atéé ro Begén dob de békén Judio. <sup>34</sup> Atin i de békén Judio, diyangkaé ro Begén, brab duraa ro Begén, brab badasé ro Begén, brab féléhué ro Begén. Endob amuk méifus i télewe gétérésangan, tébuleu.”

### *I ongoté ro Santiagowe brab Juane*

<sup>35</sup> Tidew bénou, i Santiagowe brab Juane, sani de nga Sebedeo, téningé roy Jesuse. Atin ménbéréh ro maro, “Maistéro, wén i ongoté keye dob Beeme rigoné mo.”

<sup>36</sup> Atin bang Jesuse, “Ati kétaya kome rigoné ku begom?”

<sup>37</sup> Atin séménumbul ro maro, “Amuk Beem i méguléwe moso brab mésar go dob saray méguléwe, tungkasém so begey mésar dob sékulo muwe ségétew i fingée dob kuwono muwe brab ségétew i fingée dob biwong me.”

<sup>38</sup> Endob ménbéréh i Jesuse dob berowe mano, “Enda gétiga kom i ongoté kome. Aw gagané kom i de émfasang mérigo dob Begéne séko? Aw gagané kom i kéléhue loo bérigowe dob Begéne?”

<sup>39</sup> Atin séménumbul ro maro, “Hoo, gagané key.”

Atin bang Jesuse bero, “Toow, mérasarayu fo séko toow, atin mérasaray gom so. Atin féléhuénu, atin féléhuén gom so. <sup>40</sup> Endob békén Begén i mémilie bérat mésare fingé dob kuwono kuwe taloo no fingé dob biwong guwe. I de ni saran kay de étew fénemili i Abay guwe Tulus mésar diyo.”

<sup>41</sup> Atin i de folo gétew dumo do kuyugén, amun énggéklingoo roy ni ongoté ro Santiagowe brab Juane, ménkérít ro bero. <sup>42</sup> Mélaw ténawag Jesusey kéluhana ruwe inok sélimud ro, brab ménbéréh dob berowe mano, “Gétiga kom i de étew kun odoron, wén i atura ro bérat de étew brab méguléwon bero. <sup>43</sup> Endob békén loo bérat niy begome. Amuk wén i ségétew begom méuyot waléy odoron, fatut waléy sugu-suguéy kéluhanay de dumon. <sup>44</sup> Atin amuk wén i ségétew begom méuyot waléy gérotor, fatut térifantad. <sup>45</sup> Non fiyon i Begéne sani Nga i Kéilawane, énda ménangéyu dini inok wén i do sugu-sugué ku. Yamula ménangéyu dob duniyae ni inok waléy sugu-suguén brab inok iray guy umul guwe fégékufas bérat médoowe étew dob de sala ro.”

### *Nuwa Jesusey langaféne*

<sup>46</sup> Atin énggumah i ro Jesuse dob ingéde Jeriko. Atin amun méntaus ro ménagéw tidew diyo beroy dakéle do ménlimud étew, ténaraa roy ségétew étew langafén ménas dob doror i aguwone mongot limus. I dawét ne Bartimeo, nga Timeo. <sup>47</sup> Atin amun énggéklingoo noy Been i Jesuse tidew Nasaret témaria, téménawag métanug mano, “Jesus, séfu Datu Dabid, fégédaw go begén!”

<sup>48</sup> Médooy de étew génlé ro maro, “Kago selekén!” Endob taus so mékes toow na fo métanug mano, “Séfu Datu Dabid, fégédaw go begén!”

<sup>49</sup> Atin téménréni i Jesuse brab ménbéréh mano, “Tawag gom i étewa nan.”

Mélaw ménbéréh ro dob langaféne ni maro, “Oror go! Tindég go non tawagé Jesuse beem.”

<sup>50</sup> Mélaw kénda noy géruwowe lafin bérat kégal ne brab ménagayas téménindég brab ménagéw mangéy dob Jesuse.

<sup>51</sup> Atin fénénginsaa Jesuse mano, “Ati kétaya muwe rigoné ku dob beeme?”

Séménumbul i langaféne ni mano, “Maistéro, méuyotu ké gégitowu damén.”

<sup>52</sup> Atin ménbérélh i Jesus mano, “I kéféginiugut mey funa muwe ménadi-adi. Na, ule gon.” Sonom béno, énggégito nén i lagéye ni, atin ménfuray bé Jesuse dob aguwone.

## 11

### *I kéahur Jesuse dob Jerusalem*

<sup>1</sup> Amun i Jesuse brab de kuyugén gédét ron dob ingéde Jerusalem, énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Atin sénugu Jesusey ruwowe gétew bé de kuyugén inok métah ro magéw. <sup>2</sup> Atin ménbérélh dob berowe mano, “Taus gom agéw mangéy dob nan ingéd gésaréwo kom. Buluk gégumah gom diyo, gito gom i natife kuda nikét, énda sénay énggékuda de. Ukoh gom brab uwit gom dini. <sup>3</sup> Buluk wén i ménginsa dob begome, ‘Sedek rigoné kom i ni?’ bérélh gom de, ‘Kailangay Kadna tome, atin féséfuleén so magad.’”

<sup>4</sup> Mélaw ménagéw ro brab énggito roy natife ni kuda dob no ingéd, diyo dob aguwone nikét dob bengaway sébaane lawi. Amun nukoh ron, <sup>5</sup> i de étew diyo ménénginsa ro maro, “Sedek ukohé kom i kudaa nan?”

<sup>6</sup> Atin séménumbul ro loo bé kékérélh Jesuse de bero. Mélaw fénagéw i de étew bero muwit bé natife ni kuda. <sup>7</sup> Atin nuwit ro mangéy dob Jesuse. Brab namfeno ro bé de kégal ro. Atin kénudaa Jesuse. <sup>8</sup> Atin médooy de étew bénékah roy de dumo bé de kégal ro dob aguwo Jesuse fégito roy kébasana ruwe de. Atin wén soy de étew bénékah roy de daun kénléng ro dob de kayéw dob de safad. <sup>9</sup> Atin i de méntah do étew brab de ménfuray, ménkes ro maro, “Dayéwé tom i Tuluse! Féfiyonéy Tuluse damén i ni étew gégumah tidew dob Kadnane. <sup>10</sup> Féfiyonéy Tuluse damén i kékéguléw ne émfétaus bé kékéguléw i séfu tome Datu Dabid. Dayéwé tom i Tuluse!”

<sup>11</sup> Atin méntaus i ro Jesuse mangéy Jerusalem. Amun énggumah ro diyo, ménangéy i Jesuse dob lawi i Tuluse. Atin amun énggilidén téneungténgén i kéluhanay de languntaman diyo, ménsut atin ménfule mangéy Betania beroy de folo bra ruwo gétew kuyugén, non témeugénén.

<sup>12</sup> Atin dob sébaane de fuweh, bé lala ruwe magéw tidew Betania mangéy Jerusalem, mélawayaf i Jesuse. <sup>13</sup> Atin énggékulaya no tidew mérayu i kayéwe féndawét igos mérampung i dau nuwe. Mélaw nangéyén lénangu kinok wén i onokén. Endob amun énggumah, énda i ségiyo énggito no saliyu bé de dau no, non békén séna gaiy no do kayéw igos mégonok. <sup>14</sup> Atin ménbérélh dob ni kayéw mano, “Tidew béléewe ni, éndaén i géama bé onok me féruman.” Atin énggelingoooy de kuyugén.

### *Dénédél Jesusey de démagang dob lawi i Tuluse*

<sup>15</sup> Amun énggumah i ro Jesuse dob Jerusalem, méntaus so dob lawi i Tuluse. Amun ménahur, dénédélén i de étew démagang brab do mélém-mélém diyo. Atin bénluweén i de ahayay de lémuluk kurta brab ténuwarén i de saray de émfébéléy do fégétulak do marafati. <sup>16</sup> Atin énda fédayaé no de ké wén i étew muwit do éntingayén témara dob fésayaway lawi i Tuluse ni. <sup>17</sup> Atin téneroén i de étew mano, “Ménsulat dob Ménsulate Kékérélh i Tuluse mano, ‘I lawi guwe, fédawétén lawi gonon démasal kay kéluhanay de étew.’ Endob fénwaléy gom lawi i de ménakaw.”

<sup>18</sup> Atin i de odoroy de fadi brab de témoře bé kitabe énggelingoo roy ni. Mélaw sénalikél roy fiyowe kékélélhu ro de. Non ménngilak ro bé Jesuse non ménngaif i de ni médooy do étew bé kétoro ne.

<sup>19</sup> Atin amun sémingkufén, méntékédan i Jesuse brab de kuyugén tidew dob Jerusalem.

<sup>20</sup> Atin bé géfuwéne de, bé lala ruwe magéw dob aguwone, énggito roy kayéwo no féndawét igos ménngangu taman dob de darirén. <sup>21</sup> Atin i Pedrowe, énggétédémo noy ati ménrigowe. Mélaw ménbérélh dob Jesuse mano, “Maistéro, téngténgém. I kayéwo diyo fénémulaém, ménngangu.”

<sup>22</sup> Atin bang Jesuse, “Sarig gom dob Tuluse. <sup>23</sup> Bérélhé ku begom i toowe, fiyon udenén méréhon bé tuduke ni mano, ‘Angéy go dob dogote’, atin énda ruwo-ruwoy fédew ne, éndob méninugut bé kékérélh ne méagéwon, méagéwon ba. <sup>24</sup> Mélaw bérélhé ku begom,

fiyon udenén ongoté kom ké démasal gom, feginugut gom bé gédoté kom, atin gédoté kom ba. <sup>25</sup> Atin amuk démasal gom, fésagada kom i étewe ménsala dob begome, inok i Abay gome Tulus fésagada no soy de sala gom. <sup>26</sup> Non amuk énda fésagada kom i de dumo gom, i Abay gome dob lawayo, énda so mon fésagada no begom bé de sala gom.”

<sup>27</sup> Atin ménséfule man i ro Jesuse dob Jerusalem. Atin amun diyo séménugud i Jesuse dob lawi i Tuluse, i de odoroy de fadi brab de téromo bé kitabe brab de odoroy de Judio, ménfégédét ro dob Jesuse. <sup>28</sup> Atin fénénginsaa ro maro, “Béréhém begey ké ati atura muwe rémigo bé de ni? Ati méniraye Beem kuwagib?”

<sup>29</sup> Sénumbulo Jesuse bero mano, “Sémuliú ménginsa dob begome. Amuk sémumbul gom, sémumbulu so ké ati tidéwoy kuwagib guwe rémigo bé de ni. <sup>30</sup> Béréh gom Begén, ati séménugue bé Juane inok mautis, Tulus loo ké étew saén?”

<sup>31</sup> Atin i de odoroy de Judio séédél ro maro, “Amuk béréhé tom ‘Tidéw dob Tuluse’, fénginsaa no betom ké sedek énda fénéngintoowo tom i Juane. <sup>32</sup> Endob buluk béréhé tom, ‘Tidéw dob étewe’, mékerit i de étew betom.” Non mégilak ro bé de étew non féngintoowy de étew i Juane sénarigoy Tuluse muret bé kékérén ne. <sup>33</sup> Mélaw séménumbul ro dob Jesuse maro, “Enda gétinga key de.”

Mélaw bénréh Jesuse mano, “Enda so béréhé ku de begom ké ati ménirayane Begén kuwagib rémigo bé de ni rigoné ku.”

## 12

### *I binuwayae fantag bé de tete témalima*

<sup>1</sup> Tidéw bénoréh, témenoro man i Jesuse binuwaya. Ménbéréh mano, “Wén i ségétéwe étew wén i safadén nohoko no do ubas. Atin bénunsudo no kayéw fénggélangkatén de lémiwét, brab kéménalut fédéngon bé fégékérése bé wayég i de onokén. Brab réménigo tambala. Tidéw bénoréh, féntalimaén bé de ségiyo étew, brab ménagéw mangéy dob mérayue ingéd. <sup>2</sup> Amun énggégumah i gaiy kékétéwe de, séménugu ségétew sugu-sugué no inok gédoté noy kaane de baad bé de onokén. <sup>3</sup> Endob i de témalima bé ni safad génamak ro brab lénubag roy ni sugu-suguén. Brab fénule ro énda i suwaréw nuwitén. <sup>4</sup> Tidéw bénoréh, i gefee bé safade sénugu non man i géreruwowe sugu-sugué no. Endob i de témalima bé safad ne, fénali roy uléw ne brab fénémala ro. <sup>5</sup> Tidéw bénoréh, i gefee sénugu non man i gétéléwe sugu-sugué no. Endob i de témalima bé safad ne, fénléhu ro. Loo so bé noy kérigo ruwe bé de médo do sugu-suguéy gefee bé safade ni. Wén i do lénubag ro de, wén soy dob fénléhu ro de. <sup>6</sup> Tidéw bénoréh, i gefee bé ni safad, wén nay ségétéwe sénuguén, sani kénimuo nuwe ngaén lagéy. Mélaw sénuguén mangéy dob berowe non fénggitungén mano, ‘Fégadata roy nga guwe.’ <sup>7</sup> Endob amun énggitoy de témalima bé safad ne, ménchébéréh-béréh ro maro, ‘Been i niy nga i gefee bé ni safad. Féléhu tom inok gékatom i ni safad.’ <sup>8</sup> Mélaw génamak ro atin fénléhu ro, brab nibér ro dob liyuy safade ni.”

<sup>9</sup> Atin fentaus Jesusey kékérén ne mano, “Ati rigonéy gefee bé safade ni dob de ni témenalima bé safad ne? Angéyé no féléhuén bero. Brab irayén man dob ségiyowe témalima. <sup>10</sup> Aw énggébasana kom i ni Ménsulat Kébérén i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. <sup>11</sup> I ni rénigoy Kadnane ula-ula, atin mégai tom de.’”

<sup>12</sup> Atin i de odoroy de Judio, ténulama ro kénéfo i Jesuse non énggébela dob berowey ni binuwaya. Endob énda fakayén non mégilak ro bé de médo do étew. Mélaw téngak roy Jesuse brab ménagéw ro.

### *Fantag bé buwise*

<sup>13</sup> Tidéw bénoréh, i de odoroy de Judio sénugu roy de Fariseo brab de kuyug Herod mangéy dob Jesuse inok téngkadé ro émbéréh bé békéne katabawan. <sup>14</sup> Mélaw ménangéy ro dob Jesuse ménginsa maro, “Maistéro, gétinga key toow i kétoro me. Brab métintu go, énda i isu ramigo mo bé de étew. Endob toroé moy toowe fantag bé kétayay Tuluse toow. Mélaw

bérém hém begey, aw fatut ba mayad gey buwis dob Sesare sani datue dob Roma taloo no énda?"

<sup>15</sup> Endob énggétiga Jesusey akar ruwe, mélaw bénréhén bero mano, "Sedek férudio kom Begén? Uwitonus sélafin félatah, brab féténgténg gom Begén."

<sup>16</sup> Amun niraya ro de, ménénginsa i Jesuse mano, "Ati gefee dawét brab falas gito gom dob nan?"

Séménumbul ro maro, "Ka Sesar."

<sup>17</sup> Tidew béno, bénréh Jesuse mano, "Iray gom dob Sesarey ka Sesare. Atin iray gom dob Tulusey kay Tuluse." Atin toow ro fo ménggaif bé kékéréh Jesuse ni.

### Fantag bé kétébulee

<sup>18</sup> Atin wén i de Saduseo ménangéy ro dob Jesuse. I de Saduseo do étew énda ménintoow ro bé kétébule i Tuluse bé de étew moso. <sup>19</sup> Atin ménénginsa ro dob Jesuse maro, "Maistéro, sénulat Moisese betom i kukumane bé buluk i ofo i étewé ménléhu, brab énggfélelo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. <sup>20</sup> Ufama, wén i fitew gétew sétuwaréy falan lagéy. Brab i ofoe de ménawag. Tidew béno, ménléhu énda i nga ro. <sup>21</sup> Tidew béno, i gérwowe de bénawagén soy bavage fénled i ofo ne. Atin ménléhu so énda soy nga ro. Ségiléw soy ménrigowé dob gétéléwo ruwe. <sup>22</sup> Atin ségiléw so dob kéluhana ruwe. I fitewo no gétew énggébawaga roy ni libun éndob ménléhu ro kéluhanan énda i nga ro. Tidew béno, ménléhu soy ni libun. <sup>23</sup> Mélaw bé gaiy kétébule i kéluhanay de étew moso, ati isuwe bawag i ni libun bé ni fitew gétew sétiman idéng? Non énggébawaga no bero kéluhanan bé méuyag ro de séna?"

<sup>24</sup> Séménumbul i Jesuse mano, "Toow fo békén katabawan i kéfégitung goma nan, non énda gétiga kom i de Ménsulat Kékéréh i Tuluse taloo noy barakat ne. <sup>25</sup> Non amuk tébule i de étew, éndaén sébawag ro. Non ségiléw ro bé de télaki diyo dob lawayo. <sup>26</sup> Atin i fantage bé kétébulee, aw énda énggébasana kom de dob librowe sénulat Moisese fantag bé mérinoe kayéw? Non diyo ménusulat i bénréh i Tuluse dob Moisese mano, 'Begén i Tuluse féngadafé Abrahame, Isake, brab Jakobe.' <sup>27</sup> I atag i ni, i Tuluse féngadafé de méuyag étew, békén do ménléhu. Mélaw tintu békén katabawan i kéfégitung gome."

### I toowe na fo gérotor sugu

<sup>28</sup> Diyo soy ségétewe téromo bé kitabe brab énggelingoo noy de ni do étew séédél bé Jesuse. Atin amun énggétiga noy toow fo fiyoy késumbulo Jesuse bé de Saduseo, ménfégédét dob Jesuse brab ménénginsa mano, "Ati isuwe bé de sugu dob kitabe toow na fo mélaga?"

<sup>29</sup> Atin séménumbul i Jesuse mano, "Ay niy toowe na fo mélaga sugu: 'Fégélingo gom do Judio, i Kadna kome Tulusé sébaan saén. <sup>30</sup> Féimu go bé Kadnane Tulusé bérém hém sébaan saén i Tuluse brab énda i ségiyo saliyu bé Beene. <sup>31</sup> Atin fatut féimu tom bé Tuluse brab kéluhanay fédew tome, brab bérém hém sébaan saén i Tuluse brab énda i ségiyo saliyu bé Beene. <sup>32</sup> Atin ay niy gérwowe sugu: 'Féimu go bé de dumo mo ringon so bérém hém sébaan saén i Tuluse brab kéluhanay fédew tome, brab bérém hém sébaan saén i Tuluse brab énda i ségiyo saliyu bé Beene. <sup>33</sup> Atin fatut féimu tom bé Tuluse brab kéluhanay fédew tome, brab bérém hém sébaan saén i Tuluse brab énda i ségiyo saliyu bé Beene. <sup>34</sup> Atin énggétiga Jesusey fiyoy késumbul i ni lagéy. Mélaw ménbérém dob ni lagéy mano, "Magad saén i kéféguléwoy Tuluse beem." Atin tidew béno, énda nay ségétew ménbaraw ménénginsa dob Beene.

<sup>35</sup> Amun témenoro i Jesuse dob lawi i Tuluse, ménénginsa mano, "Ati kéfanu-fanu nuwe ké bérém hém sébaan saén i Tuluse brab énda i ségiyo saliyu bé Beene. <sup>36</sup> Non fénbérém hém sébaan saén i Tuluse brab kéluhanay fédew tome, brab bérém hém sébaan saén i Tuluse brab énda i ségiyo saliyu bé Beene. <sup>37</sup> Atin féntaus Jesusey kékéréh

ne mano, "Amuk féndawét Dabidey Kristowe 'Kadnan', ati kéfanu-fanu Kristowe séfu Dabide saén?"

Atin i dakéle ménlimud do étew ménoror ro mégélingo bé kétoro Jesuse. <sup>38</sup> Atin téneroén bero mano, "Ingat gom bé de téromo bé kitabe non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan. <sup>39</sup> Brab méuyot ro mésar dob de fiyo saran dob de lawi féngadafan brab dob de kanduli. <sup>40</sup> Endob lafisé roy de libun baléw inok afasé roy de lawi ro. Tidéw béno, démasal ro bé de métah kédasal dob téngaangay de étew non marok médirung i de ni tete rigoné ro. Endob i ni do étew toow na fo géttimal ké mékukum ro moso."

<sup>41</sup> Wén i no sébaan fuweh, amun diyo i Jesuse dob lawi i Tuluse, ménasar gédét dob ahurone kurta. Atin ténéngténgén i de étew lémawu bé kurta ruwe. Médooy de kawasa do étew léménawu ro médooy kurta. <sup>42</sup> Tidéw béno, énggito no soy ségétéwe libun baléw méskinan. Enggumah i ni baléw brab méniray saén ruwo lafin furo kurta tintu énda balilagaén. <sup>43</sup> Atin i Jesuse ténawagén i de kuyugén mangéy dob Beene, brab mano bero, "Béréhé ku begom i toowe, i ni méskinan libun baléw maak mas na médooy niray ne bé kéluhanay de dumo étew kawasa. <sup>44</sup> Non i de ni étew do kawasa, méniray ro saén kloh tidéw dob de médooy kurta ro. Endob i ni baléw éntéyén i kéluhanay kurta ne fégéfaguyagén."

## 13

### Fantag bé tamfaday duniyae

<sup>1</sup> I lala Jesuse mésut tidéw dob lawi i Tuluse, i ségétéwe bé de kuyugén ménbéréh dob Beene mano, "Téngténgém, Maistéro. Toow fo dakél i de ni batéw fénggérigo bé de lawi i Tuluse ni, mélaw toow fo fiyoy de ni lawi."

<sup>2</sup> Endob ménbéréh i Jesuse mano, "I de dakél ni do lawi, gégumah mosoy gaiwe i kéluhanane gito gom mébinasa. Brab fiyon i de batéw fénggérigo de, émbéragar ro."

<sup>3</sup> Atin amun diyo i ro Jesuse ménasar dob Tuduke Olibo, dob gatagay lawi i Tuluse, fénénginsaa ro Pedrowe brab Santiago brab Juane brab Andrese sébero-bero saén.

<sup>4</sup> Ménénginsa ro dob Jesuse maro, "Kédiron mérigo de ni, sani kébinasay lawi i Tuluse? Brab ati fégélolonone de bé ni gai ké gédétén gégumah?"

<sup>5</sup> Atin séménumbul i Jesuse mano, "Ingat gom inok énda i méfagakaran begom. <sup>6</sup> Non médooy mosoy de étew gégumah usaré roy dawét guwe, brab émbéréh ro maro, 'Begéney Kristowe'. Atin médooy de gégumah begom. <sup>7</sup> Atin kagom mágilak ké gélingoo kom i de sétiboh brab fantag bé de gira. I kéluhanay de ni mérigo, éndob békén sénay niy tamana nuwe. <sup>8</sup> I de ségiyo ingéd sétiboh ro bé de ségiyo ingéd. Brab i de ségiyo sakuf fangangaturan sétiboh ro bé de ségiyo. Atin wén mosoy do luba dob de médooy do gonon, brab lénggob. I de ni mérigo ségiléw bé ségétéwe obor libun kéararan non been sénay niy féganayay rasay ne.

<sup>9</sup> "Endob ingat gom, non kéfoén gom moso brab uwitén gom dob adafay de kémukum. Atin mébadas gom moso dob de lawi féngadafan kay de Judio. Brab uwitén gom dob adafay de datu brab do máguléw inok kukumén gom sabaf begom i do kuyug gu. Endob been i niy gaiy kéuret gome bé Fiyowe Uret dob berowe. <sup>10</sup> Atin bé énda séna gégumah i tamanane, i Fiyowe Uret kailangan ureténa métah dob kéluhanay ingéde. <sup>11</sup> Atin amuk kéfoé ro begom brab uwitén gom dob adafay kémukume, kagom émbuku fantag bé atiy késumbul gome. Non amuk diyo gomén, béréhé gom saén i atiy iraye dob begome fatut késumbul gom. Non i kébéréh gome bé béréhé, békén tidéw dob de itunga kom. Yamula fébéréh i Rémogor i Tuluse begom. <sup>12</sup> Atin bé béréhé, wén i do étew iray roy de dumo ro sétiman idéng inok féléhuén. Loo so bé niy rigonéy de lukés, féléhu roy de nga ro. Loo soy de nga féléhu roy de lukés ro. <sup>13</sup> Atin i kéluhanay de étew mérarék begom sabaf bé kéunur gome Begén, éndob ati fédaydaye munur taman dob tamfadane, beeney méfukase.

<sup>14</sup> “Atin gito gom i ‘Mékésirang-sirange Surga’ diyo dob mékétéfuwe gonon békén fatut gonon. (Fégésobut i masawe.) Amuk mérigo ni, i de étew bati dob Judea, fatut ro méraréy dob de tuduk. <sup>15</sup> Atin bé bénou, i étewe diyoén dob liyuy lawi ne, éndaén fatutén séminggula bé urase mahur dob lawie inok uwité noy de tamukén. <sup>16</sup> Atin bé bénou, i étewe diyo dob safad ne, éndaén fatutén mule inok angéyé noy géruwowe lafin kégalén. <sup>17</sup> Bé do no do gai, toow fo mékégédaw-gédaw i de libun obor brab de libun mériton. <sup>18</sup> Dasala kom inok énda mérigo de ni dob gaiwe mélégénéy. <sup>19</sup> Non bé no do gai, toow na fo géttimal i kérasay i de étew, sani kérasaye énda sénay énggagéw de tidew féganay bé kélimbag i Tuluse bé duniye taman so béleewe ni. Atin énda na moso i gériféng de. <sup>20</sup> Atin amuk énda fífokoéy Kadnaney do no gai, énda nay kéilawan méuyag. Endob sabaf bé de fénémilién do étewén, fífokoé noy do no gai.

<sup>21</sup> “Atin amuk wén i émbéréh dob begome mano, ‘Téngténg gom, ay niy Kristowe!’ look ‘Téngténg gom, ay diyoo!’ kagom unuron de. <sup>22</sup> Non wén i do tugién do étew gérumah brab béréhé ro bero kun i Kristowe taloo no sarigoy Tuluse. Atin gérgo ro do mékégaif brab do tanda, inok fégakara roy de fénémili i Tuluse do étew ké fakay. <sup>23</sup> Mélaw ingat gom. Bénréh gun begom i kéluhanay de ni bé énda séna mérigo no.

<sup>24</sup> “Bé do no gai moso, amuk gilid i dakéle ni késélibug, waléy délémon i térsange brab éndaén rémendaw i térsang kélunganone. <sup>25</sup> Atin i de gitton médagdag ro tidew dob lawayo, brab i de éntingayén dob lawayo mékuyung. <sup>26</sup> Tidew bénou, i Nga i Kéilawane, sani Begéne, téfégitowu tidew dob lawayo dob de rawén toow fo barakatan brab rémendaw. <sup>27</sup> Atin sugué kuy de télaki gu mangéy dob séngae gonon dob duniye ni. Atin séfélumudé kuy de fénémili i Tuluse do étew tidew dob tamanay fantade brab dob lawayo.”

<sup>28</sup> Tidew bénou, nuret Jesuse beroy ni binuwaya mano, “Fégitung gom i de kayéw. Dini dob betome ni, sonom lémbud i de fongoy kayéwe brab émféantu daun, géttiga kom gédetén i basa mèdufe. <sup>29</sup> Loo so bé ni amuk gito gom i de ni bénréh gu bé gétahe mérigo, géttiga kom gédetén i késéfule guwe. <sup>30</sup> Béréhé ku begom i toowe, i de étew méuyag bénou, énda méléhu ro taman mérigo de ni. <sup>31</sup> I lawaye brab fantade méalfa, éndob i kékérén guwe énda méalfaén.

<sup>32</sup> “Endob i gaiwe mérigo de ni, énda i géttiga de, fiyon foy de télaki dob lawayo, fiyon i Begéne, sani Nga i Tuluse. I Abaye Tulus saén i géttigane de. <sup>33</sup> Ingat gom, brab tulik gom, non énda géttiga kom de ké kédiron i kégumah i ni gai. <sup>34</sup> Ségiléw bé ségétéwe ménagéw tidew dob lawi ne mangéy dob ségiyowe ingéd. Atin sénarigén i lawi ne dob de sugu-sugué no. Mélaw wén i galbék fatut rigonéy de sugu-sugué no. Atin bénréhén dob sugu-sugué nuwe dob bengawane mantay brab békén fidong. <sup>35</sup> Mélaw ingat gom, non énda géttiga kom i gaiwe séfuleu, ségiléw bé de sugu-suguén énda géttiga roy gaiwe séfule i gefee bé lawie, ké témégén, look kérara kélunganon, look ukoro i de manok, look géfuwén. <sup>36</sup> Kinok métékow i kégumah ne atin gito no bero fidong. Enda fatut mérigo no dob begome. <sup>37</sup> Mélaw béréhé ku begom brab dob de kéluhanay de étew so: Tulik gom.”

## 14

<sup>1</sup> Bé bénou gai, ruwo séden géterésangan i méifuse tidew bénou gérumah i kékanduli i de Judio féndawét “Témara”. Bé no kanduli, amaé roy fane énda i féngéfééruk de. Atin i de odoroy de fadi brab de témoiro bé kitabe sélédé roy ati kékéfo ruwe bé Jesuse brab féléhué ro. Endob méuyot ro de rémigo ké énda géttigay de ségyo de étew. <sup>2</sup> Ménsébéréh ro maro, “Enda fakayén ké rigoné tom ké kanduli tom, kinok mésélibug i de étew.”

<sup>3</sup> Wén i no sébaan fuweh, diyo i Jesuse dob Betania dob lawi i ségétéwe lagéy féndawét Simon. I ni lagéy ménadi-adi bé déruune fémute. Amun mama ro, énggumah i ségétéwe libun nuvitén i fiyowe katya ménféno bé mamute nor toow fo balilaga féndawét nardo. Atin ménfégédét dob Jesuse brab rénébeén i reer i katya ni atin lénukaén i nore ni dob uléw Jesuse. <sup>4</sup> Atin i de dumo bé de étew diyo, amun énggito roy ni, ménkérít ro brab ménsébéréh ro maro, “Sedek séninggula saén i nan fégéféamut? <sup>5</sup> Non amuk fénbélén

damén i nan nor, wén i médoor kurta gédotén de brab iray damén dob de méskinan.” Atin nugar roy ni libun.

<sup>6</sup> Endob ménbérélh i Jesuse mano, “Fédaya gom i ni libun. Sedek dowoyé kom? Toow fo fiyoy ni rénigo no dob Begéne. <sup>7</sup> Démoyun gom gésébegom i de méskinan, atin fakay gom téma bang bero dob gaiwe kétaya kom. Endob i Begéne, éndaén mérugayu batí dini dob begome. <sup>8</sup> I ni libun, rénigo noy gagané nuwe. Lénulawa no fégéfámut i lowoh guwe inok métafayan i kélébénge Begén. <sup>9</sup> Béréhé ku begom i toowe, fiyon udenén gonon dob duniyae uretén i Fiyowe Uret, i rénigo nuwe dob Begéne méuret so funa no métédém.”

### *I rénigo Judase*

<sup>10</sup> Tidéw béno, i Judas Iskariote, sani ségétewé bé de folo bra ruwo kuyug Jesuse, ménangéy dob de odoroy de fadi inok sébérélh bero bé ati kékéfoe bé Jesuse dob berowe.

<sup>11</sup> Atin toow ro de fo ménoror, brab fénasada ro iraya ro kurta i Judase. Mélaw sénlédén i fiyowe gai kékéfo de.

<sup>12</sup> Dob sunguwe gai bé kandulie féndawét “Témara” taloo no “Kéama bé Fane Enda i Fénggfééruk de”, bé béno gai fatut ro séumbali nati bili-bili fégékanduli ro. Mélaw i de kuyugén ménénginsa ro dob Jesuse maro, “Hon i gonone kétaya mo tafayé key i amaé muwe bé ni kanduli ‘Témara’?”

<sup>13</sup> Tidéw béno, sénugu Jesusey ruwowe bé de kuyugén mano, “Agéw gom mangéy Jerusalem. Diyo wén i ségétewé lagéy ménuit ségébinangga wayég gébalaka no begom. Furay gom de. <sup>14</sup> Atin amuk mahur dob lawie, ahur gom so. Brab bérélh gom dob gefee bé lawie makom, ‘Méuyot i Maistérowe de ké gétiga no hon i sibéye de gono no mama beroy de kuyugén bé ni kékanduli.’ <sup>15</sup> Atin i gefee bé lawie toroé no begom i dakéle sibéy wén i do téna fay do kasangkafan dob rotor i lawie. Diyo tafay gom i kéluhanay amaé tome.”

<sup>16</sup> Tidéw béno, ménagéw i de ruwo ni gétew do kuyugén brab ménahur ro dob Jerusalem. Atin énggitoy kéluhanane loo bé kékérléh Jesuse de bero. Tidéw béno, téna fay roy de amaé ro kay kandulie “Témara”.

<sup>17</sup> Atin amun sémingkufén, énggumah diyo i Jesuse beroy de folo bra ruwo gétew kuyugén. <sup>18</sup> Amun ménasar ro mama dob doror i ahayane, ménbérélh i Jesuse mano, “Béréhé ku begom i toowe, wén sékoy ségétew begom émfékéfo Begén, sani ségétewé séréngean Begén mama.”

<sup>19</sup> Tidéw béno, ménwaléy tete i fédew i de kuyugén. Atin ménstundug-tundug i séngae ségétew beroy ménénginsa dob Jesuse mano, “Békén begén, hay?”

<sup>20</sup> Atin sénumbulo Jesuse bero mano, “I beene ségétew begom do folo bra ruwo gétew kuyug gu, sani ségétew begom séréngean Begén mérém bé fa nuwe dob biléwe. <sup>21</sup> I Begéne, sani Nga i Kéilawane, méléhuu loo bé Mén sulfate Kébérélh i Tuluse fantag bé Begéne. Endob toow fo mékégédaw-gédaw i étewé ni émfékéfo Begén. I nan étew, mas na fiyo dob beene ké énda damén ménmahén, non mékukum fo toow.”

### *I kéama i Kadnane*

<sup>22</sup> Atin bé lala ruwe mama, éndot Jesusey fane, brab ménfésalamat dob Tuluse, brab sénkébeng-kébengén, brab sénaarén dob de kuyugén. Atin ménbérélh mano, “Ay niy fane. Been i lowoh guwe. Ama gom.”

<sup>23</sup> Tidéw béno, éndot i tabue, brab ménfésalamat dob Tuluse, brab nirayén bero. Atin kéluhana ro méniném de. <sup>24</sup> Atin ménbérélh i Jesuse mano, “I ni arak, been i dara guwe réménanas sabaf bé médoowe étew. Been i niy tanda i fasad i Tuluse bé de étewén.”

<sup>25</sup> Béréhé ku begom i toowe, éndaén minému arak taman géinému mantu arak dob gaiwe féguléwoy Tulusey de étewén.”

<sup>26</sup> Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke Olibo.

### *Nuret Jesusey fantage bé Pedrowe*

<sup>27</sup> Atin bang Jesuse dob de kuyugén, “I kéluhana kome méraréy séko tagaké kom Begén. Non wén i Mén sulfate Kébérélh i Tuluse mano, ‘Féléhué kuy témalimae bé de bili-bili, atin

mélaw mésébéragar i de bili-bili.” ” <sup>28</sup> Atin féntaus Jesusey kékérén ne mano, “Endob amuk tébuleu, métahu magéw begom mangéy dob Galilea.”

<sup>29</sup> Atin bang Pedrowe, “Enda fo tagaké ku Beem, fiyon fo ké i kéléhanay de ségiyo kuyugém méraréy ro tagaké ro Beem.”

<sup>30</sup> Endob ménbérén i Jesuse dob Pedrowe mano, “Béréhé ku beem i toowe, bé ni kéléunganon, bé énda séna ukoro i férufete ruwo gule, dirungé mo Begén télén gule bé énda gólolo mo Begén.”

<sup>31</sup> Atin ménbérén man i Pedrowe toow na fo méégét mano, “Fiyon fo ké géodoru Beem méléhu, énda dirungé ku Beem.” Atin i kéléhanay de dumo no do kuyug ménbérén loo bé nan dob Jesuse.

<sup>32</sup> Tidew béno, ménagéw i ro Jesuse dob gonone féndawét Getsemani. Amun énggumah ro, ménbérén i Jesuse dob de kuyugén mano, “Sar gom dob ni bé lala guwe démasal.” <sup>33</sup> Tidew béno, nuwit Jesusey ro Pedrowe, Santiagowe, brab Juane, atin méntaus ro magéw kloh. Atin ménwaléy toow fo tete i fédew Jesuse brab ménbuku.

<sup>34</sup> Atin ménbérén dob de ni télén kuyugén mano, “I fédew guwe toow fo ménbuku taman toow fo démawét. Bati gom dini, brab tulik gom.”

<sup>35</sup> Tidew béno, ménférayu dob berowe gumaha téabar. Atin méntéléngkéb dob fantade brab déménasal mongot bé amuk fakay saén, énda damén mérigoi ni kérasay dob Beene. <sup>36</sup> Déménasal mano, “Abay, fakay gérigono moy kéléhanane. Mélaw kago fédayaén Begén mérasay séko. Endob i kaame kétayan i mérigowe damén, békén i kagéne kétayan.”

<sup>37</sup> Tidew béno, ménséfule mangéy dob de télén ni gétew kuyugén, atin énggito no bero énggfidong. Atin ménbérén dob Simon Pedrowe mano, “Simon, géfidong go? Aw énda wayo gétulik go fiyon ségeuras saén?” <sup>38</sup> Atin ménbérén dob berowe télén gétew mano, “Tulik gom, brab dasal gom inok énda métukawan gom. Méuyot gom rémigo bé kétaya kuwe, éndob mélubay i de lowoh gom, brab magad géfélis bé de sugu gu.”

<sup>39</sup> Tidew béno, ménagéw man i Jesuse, brab déménasal so loo bé énggétahe de.

<sup>40</sup> Tidew béno, ménséfule man, brab énggito no bero énggfidong man, non toow ro fo manat. Atin énda gétiga roy ati fiyowe kékérén ro dob Jesuse.

<sup>41</sup> Atin ménagéw man i Jesuse atin énda mérugayén tidew béno, ménséfule dob gétéléw ne gule, brab ménbérén dob berowe mano, “Aw tafay gom séna fidong brab témérén? Na, énggumahén i urase. Téngténg gom, i Nga i Kéilawane, sani Begéne fékéfo dob de ménsala étew. <sup>42</sup> Na tek gom, magéw tomén. Téngténg gom, ay nan nén gégumah i émfékéfoe Begén.”

### I kékéfoe bé Jesuse

<sup>43</sup> Amun émbérén sénay Jesuse, énggégumah i Judase, sani ségetéwe bé de folo bra ruwo gétew kuyugén. Atin ménodor i de médo do étew sénugu i de odoroy de fadi brab de témoreo bé kitabe brab de odoroy de Judio. Ménutit ro do sundang brab do bastun.

<sup>44</sup> Atin i ménfékéfoe de, sani Judase, bé gétahe niraya noy de étew fégétigana ro de non bénréhén bero mano, “I étewe aréké ku, been i no. Kéfo gom brab toow gom fo bantayan bé lala gome de muwit.”

<sup>45</sup> Mélaw amun énggégumah i Judase, ménfégédét dob Jesuse brab ménbérén mano, “Maistéro.” Atin narékén. <sup>46</sup> Mélaw i de étew kénéfo roy Jesuse. <sup>47</sup> Endob i ségetéwe bé de kuyug Jesus diyo, rénau noy sundang ne brab téniyahén i rifey gérotore fadi brab ménsilaf i ségébalae bé kelingo ne. <sup>48</sup> Tidew béno, ménbérén i Jesuse dob de kéméfo de mano, “Sedek ménutit gom do sundang brab do bastun, maak ségetéwu tulisan kéfoé kom? <sup>49</sup> Sénga fuweh diyou dob lawi i Tuluse témore. Diyo gom so, éndob énda kénéfo gom Begén. Endob mérigoi ni inok métuman i Ménuslate Kékérén i Tuluse.”

<sup>50</sup> Tidew béno, i kéléhanay de kuyugén tétagak roy Jesuse brab ménraréy ro.

<sup>51</sup> Wén i ségétewe kénogo lagéy ménfuray bé Jesuse. I ni kénogo lagéy énda i kégalén, ménggélidot saén mut. Atin ténlama ro so kénéfo. <sup>52</sup> Endob ménraréy ménfélawas non enggétagaka noy mut ne bé kékagayes ne.

### *I kékukume bé Jesuse*

<sup>53</sup> Tidew béno, nuwit roy Jesuse dob lawi i gérotore fadi. Diyo ménlimud i kéluhanay de odoroy de fadi brab de odoroy de Judio brab de téromo bé kitabe. <sup>54</sup> Atin ménfuray i Pedrowe éndob ménféravy klo. Brab ménahur dob fésaway lawi i gérotore ni fadi. Diyo ménasar beroy de guwardiya géliwét dob aféye télagang ro.

<sup>55</sup> Atin i de odoroy de fadi brab kéluhanay de kékédewan, salkélé roy gétimale kétébo ro bé Jesuse inok wén i funa ro de méméléhu, éndob énda gérigono ro de. <sup>56</sup> Médooy de tugién do étew témenébo bé Jesuse bé békéne toow, éndob i de kékérén ro énda géséodorén.

<sup>57</sup> Tidew béno, wén i do témenindég émbérén bé ni tugién kétébo maro, <sup>58</sup> “Enggelingoo key i kékérén ne mano, ‘Binasané kuy lawi i Tuluse ni rénigoy de kélawan, brab amuk méifus i télewe gétérésangan, rémigowu man ségiyo lawi i Tuluse békén rénigoy kélawane.’” <sup>59</sup> Gido loo, énda gésafagayun i kékérén i de ni étew tugién.

<sup>60</sup> Tidew béno, i gérotore fadi témenindég dob téngaangay de ménlimud do odoron brab ménenginsa dob Jesuse mano, “Ati késumbul me bé ni kétébo ro Beem?”

<sup>61</sup> Endob énda séménumbul i Jesuse, ménantés saén. Atin ménenginsa man i gérotore fadi mano, “Aw Beemey Kristowe, Nga i ménbantuge Tulus?”

<sup>62</sup> Atin séménumbul i Jesuse mano, “Hoo, Begén. Atin gito gom moso Begén, sani Nga i Kélawane, mésar fingé dob kuwonoy barakatane Tulus. Atin gito gom Begén dob de rawén séfuleu tidew dob lawayo.”

<sup>63</sup> Tidew béno, i gérotore ni fadi kénusién i kégal ne émféténgténg bé kékérit ne bé kékérén Jesuse ni. Atin ménbérén mano, “Endaén kailanga tom i témeboe de dob betome. <sup>64</sup> Non enggelingoo tomén i mémurkae kékérén. Ati karang gome de fatut rigoné tom?”

Atin kéluhana ro kénukum ro bé fatut féléhuén.

<sup>65</sup> Tidew béno, i de dumo bero dénuraa roy Jesuse. Atin ténléb roy de moto no bé munsalawe brab ténafés ro brab fén-antuk ro de ké ati témenafése de. Atin i de guwardiya, génamak ro brab lénubag ro.

### *Dénirung Pedrowey Jesuse*

<sup>66</sup> Atin amun diyo sénay Pedrowe dob fésaway lawie ni, témenara i ségétewe kénogon sugu-suguéy gérotore fadi. <sup>67</sup> Amun énggito noy Pedrowe télagang, fénandangén brab ménbérén mano, “Beem soy dumo Jesuse tidew Nasaret.”

<sup>68</sup> Endob dénirung Pedrowe mano, “Enda gétiga ku de brab énda gésobuto kuy nan béréhé mo.” Amun bénréhén i ni, ménagéw mangéy dob bengawane. Atin sonom béno, ménukoro i férufete.

<sup>69</sup> Atin i kénogone ni sugu-suguén, amun énggito no man i Pedrowe diyo dob bengawane, bénréhén man dob de étew diyo mano, “Beeney lagéye dumo Jesuse.”

<sup>70</sup> Endob dénirung Pedrowe man.

Enda mérugayén tidew béno, i de étew diyo ténebo roy Pedrowe man maro, “Tintu go dumo no, non ségétew go so tidew Galilea.”

<sup>71</sup> Tidew béno, toow fo séménafa i Pedrowe mano, “Kukuméy Tuluse damén begén ké tugiénu. Toow fo énda gétiga kuy nan étew béréhé kom.”

<sup>72</sup> Sonom béno, ménukoro i férufete bé géruwo nuwe gule. Bé béno so, énggétédémo Pedrowey bénréh Jesuse dob beene mano, “Enda séna ukoro i manoke bé géruwo nuwe gule, dirungé mo Begén télew gule bé énda gélolo mo Begén.” Mélaw toow fo kéménrew i Pedrowe.

<sup>1</sup> Atin modor géfuwén, i de odoroy de fadi ménsélimud ro beroy de odoroy de Judio brab de témořo bé kitabe brab kéluhanay de kéfédéway de Judio. Atin ménagayun ro. Mélaw nikét roy Jesuse bé de sangkali brab narak ro nuwit ro mangéy dob Pilatowe, sani méguléwe tidéw Roma, atin naté ro dob beene. <sup>2</sup> Atin fénénginsaa Pilatowey Jesuse mano, “Aw Beem i Datu i de Judio?”

Atin séménumbul i Jesuse mano, “Beem i ménbérén de.”

<sup>3</sup> Atin i de odoroy de fadi ténebo roy Jesuse bé médoowe kétébo ro de. <sup>4</sup> Mélaw ménénginsa man i Pilatowe mano, “Sedek énda sémumbul go? Non énggelingoo moy de médoō do kétébo ro Beem.”

<sup>5</sup> Endob énda fo séménumbul i Jesuse. Atin mélaw ménggaif i Pilatowe.

<sup>6</sup> Ménrigoy ni dob gaiwe kanduli ro féndawét Témara. Atin i adat Pilatowe, sénga kanduli Témara, témangéy ségétew férisu, been i niy ongotéy de étew de. <sup>7</sup> Atin bé béo gai, wén i ségétewé férisu féndawét Barabas. Ménférisu beroy de dumo no ménsétiyah bé de gémamak kukuman. Ménméléhu étew bé no késétiyah ro. <sup>8</sup> Mélaw amun ménlimud i de étew ménfégédét ro dob Pilatowe ongoté ro ké témangéy ségétew férisu, <sup>9</sup> ménénginsa i Pilatowe mano, “Kétaya kom ké fésuté kuy datu gome do Judio?”

<sup>10</sup> Rénigo noy ni non énggétiga noy funay de odoroy de fadi ménaté bé Jesuse non ménadaléw ro de.

<sup>11</sup> Endob i de odoroy de fadi fénkérit roy de ménlimud do étew atin mélaw nongot ro dob Pilatowe ké tangéyé noy Barabase mangéy dob berowe. <sup>12</sup> Atin ménbérén man i Pilatowe dob de étew mano, “Ati mélaw i kérigo gu bé ni lagéy féndawét gom ‘Datu i de Judio’?”

<sup>13</sup> Endob i de étew ménkes ro maro, “Kélabo gom dob kruse!”

<sup>14</sup> Atin ménénginsa i Pilatowe mano, “Sede? Ati tetee rénigo no ula-ula?” Endob i de étew ménkes ro man minut fo métanug bé i Jesuse kélabonén dob kruse.

<sup>15</sup> Tidéw béo, ménuyot i Pilatowe ké fiyoy de fédew i de ménlimud do étew. Mélaw féntangéyén i Barabase, atin fénbadasén i Jesuse brab fénatéen dob berowe inok kélaboné ro dob kruse.

<sup>16</sup> Tidéw béo, i de sundalo nuwit roy Jesuse mangéy mahur dob fésaway lawi i odorone tidéw Roma. Atin lénimud roy kéluhanay de dumo ro sundalo ségébataliyon.

<sup>17</sup> Atin fénkégal roy Jesuse bé furowe métaah kégal maak datu, brab lénuku roy suwarane kélég atin fénsayaf ro bé Jesuse. <sup>18</sup> Tidéw béo, ubo-ubo basana ro maro, “Méraru damén i Datu i de Judio!” <sup>19</sup> Atin bénadas roy uléw ne bé kayéwe brab dénuraa ro, brab léningkuwédo ro ubo-ubo basana ro. <sup>20</sup> Atin amun énggilid ro déniyangka, kénda roy furowe kégal brab fénkégal ro dey kaane insod. Tidéw béo, nuwit ro mésut dob Jerusalem atin nangéy ro kénlabo dob kruse.

### Kénlabo roy Jesuse dob kruse

<sup>21</sup> Atin amun diyo ro séna dob de aguwon, énggébalaka roy étewe féndawét Simon tidéw dob ingéde Siren, abay Alejandrowe brab Rufo. Béo sénay kégumah ne dob no ingéd tidéw dob de safadén. Atin fénégés ro démuwal bé krus Jesuse. <sup>22</sup> Atin nuwit roy Jesuse mangéy dob gonone féndawét Golgota (i atag ne “gonoy kulobong uléwe”).

<sup>23</sup> Atin niraya roy Jesuse arak lénawékon uwa, éndob énda éndotén de. <sup>24</sup> Tidéw béo, i de sundalo kénlabo roy Jesuse dob kruse brab sénsaar-saar roy de kégalén, sénkungkungo roy ati gégédote bé séngae de sélafin. <sup>25</sup> Géraraan lémowot i térsange bé kékélabo ruwe bé Jesuse dob kruse. <sup>26</sup> Atin diyo dob kruse wén i ménténae sulat bé kétébo ruwe de mano, “Datu i de Judio”. <sup>27</sup> Kénlabo ro soy ruwowe gétew ménakaw dob de krus. I sébaane de fingé dob kuwono Jesuse, brab i sébaane de fingé dob biwong Jesuse. <sup>28</sup> Mélaw méntuman i Ménsulate Kébérén i Tuluse mano, “Kénarang roy Beene ségétew bé de ménsla étew.”

<sup>29</sup> Atin i de témaro dob no, déniyangka roy Jesuse brab dangu-danguo ro inok duwoyé ro, brab maro, “Hoy! Aw békén ba Beem i ménbérénhe bé binasané moy lawi i Tuluse brab rigoné mo man bé télewe gétérésangan? <sup>30</sup> Lus go mélaw dob krusa nan brab tabanga moy kaame lowoh.”

<sup>31</sup> Atin ségiléw so bé niy kédiyangka i de odoroy de fadi de brab de témodo bé kitabe. Ménsébéréh-béréh ro maro, “Ténabangén i de ségiyo étew inok énda méléhu ro, éndob énda gétabanga noy kaane lowoh inok énda méléhuén. <sup>32</sup> Amuk Beeney Kristowe, sani datu tome do Judio, fatut mélus béeleewe ni tidew dob kruse ni inok gito tom brab géfeginugut tom de.”

Atin i de ruwo gétew énggéséréngan de ménklabo dob de krus, déniyangka ro soy Jesuse.

### *I kéléhu Jesuse*

<sup>33</sup> Amun géutuhén, ménwaléy délémon i kéluhanay de gonon dob duniyae taman géraraan lémudug i térsange de. <sup>34</sup> Atin amun géraraan lémudug i térsange de, téménawag i Jesuse métanug mano, “Eloi, Eloi, lama sabaktani?” I atag ne “Tulus gu, Tulus gu, sedek ténagakém Begén?”

<sup>35</sup> Atin i de dumoy de étew diyo énggégélingo de, ménbéréh ro maro, “Fégélingo gom, tawagé noy Eliase.” <sup>36</sup> Atin i ségetéwe bero diyo, ménagayas éndotén i maake gafas brab nérémén dob mélémuwe arak. Tidew béo, féndiyoén dob kayéwe brab féndiyoén dob ba Jesuse inok ésséfé no. Atin ménbéréh i ni étew mano, “Fédaya gomén. Tuliké tom ké géumah i Eliase émfélus de.”

<sup>37</sup> Tidew béo, ségule man ménkes i Jesuse, atin ménléhuén.

<sup>38</sup> Sonom béo, i rindunge dob lawi i Tuluse ruwoy ménsésdaya nuwe, ménkusi tidew rotor mangéy fantad. <sup>39</sup> Atin i odoroy de sundalo téménindég dob adafay krus Jesuse, énggelingoo noy kéékes Jesuse brab énggito noy kéléhu ne. Ménbéréh i ni sundalo mano, “Tintu fo Nga i Tuluse ni lagéy.”

<sup>40</sup> Atin diyo soy de libun kémulay gétangka tidew dob no, ro Maria Magdalena, brab Maria idéng Jose brab ménguwéde séna Santiago, brab diyo soy libune Salome. <sup>41</sup> I de ni do libun, ménfuray ro bé Jesuse brab ténabang ro amun diyo de séna dob Galilea. Atin diyo soy de médo na do libun ménodor de mangéy Jerusalem.

### *I kélébénge bé Jesuse*

<sup>42</sup> Bé béo gai, témégénén i térsange bé kétafay ruwe bé gétunduge de fuweh, sani gai kétéréne. <sup>43</sup> Mélaw énggumah i ségetéwe lagéy féndawé Jose, tidew Arimatea. Beeney ségetéwe bé de kéfédéway de Judio, brab toow fo fégadatan. Brab ongot-ongoté noy kégumah i kékéulgéw i Tuluse. Atin i Josehe ménbaraw ménangéy dob Pilatowe nongotén i bangkay Jesuse. <sup>44</sup> Atin i Pilatowe, ménggaif non magad i kéléhu Jesuse. Mélaw fentawagén i odoroy de sundalo brab ménénginsa ké ménrugayén i kéléhu Jesuse.

<sup>45</sup> Amun énggelingoo noy kékérléh i odoroy de sundalo bé tintu fo ménléhuén i Jesuse, ténungkasén i Josehe médot de. <sup>46</sup> Mélaw i Josehe, bénléyén i futee safut brab amun ménkédanén i bangkay Jesuse dob kruse, bénausén bé safuto no. Atin féndiyoén dob lébénge ténosong dob rangih i fingase. Tidew béo, kénriringén i dakéle batéw mangéy dob bengaway lébénge ni fénggétélébén de. <sup>47</sup> I Maria Magdalene brab Mariahe idéng Josehe ténéngténg ro brab énggito roy lébénge fénggonon bé bangkay Jesuse.

## 16

### *I kétébule Jesuse*

<sup>1</sup> Amun ménifus i gaiy kétéréne, i Maria Magdalene, brab Mariahe idéng Santagiowe, brab Salomewe, ménléy ro do fégéféamut inok fédiyoé ro dob bangkay Jesuse.

<sup>2</sup> Atin toow séna fo géfuwén bé no Duminggu, amun sémbang i térsange, ménangéy ro dob lébénge. <sup>3-4</sup> Atin amun diyo ro dob de aguwon, ménséuret-uret ro maro, “Ati sékoy kémériringé bé batéwe tidew dob bengaway lébengo no inok géahur tom?” Non toow fo dakél i batéwo no. Endob amun énggumah ro, brab ténéngténg ro, énggito roy batéwe fénggétéléb bé bengawane ménkériring. <sup>5</sup> Amun ménahur ro dob lébénge ni, énggito roy ségetéwe kénogo lagéy ménsar fingé kuwonon, brab kéménégal fute. Atin toow ro fo ménggaif.

<sup>6</sup> Atin ménbérél i ni lagéy mano, “Kagom mégaif. Gétiga ku sélédé kom i Jesuse tidéw Nasaret, sani fénlhue dob kruse. Endob éndaén dini no, non mémentébuleén. Téngténg gom, ay ni féniroo ruwe de. <sup>7</sup> Na, agéw gom, brab uret gom i ni kékéréh dob de kuyugén labi na fo dob Pedrowe, bé métah begom i Jesuse mangéy Galilea. Diyo gito gom, loo bé kékéréh ne de dob begome bé do gétah.”

<sup>8</sup> Tidéw bénó, i de ni libun, ménsut ro tidéw dob lébénge ni brab léménéntu ro magéw. Non toow ro fo ménggilak brab ménggaif. Atin énda énggureto roy ni dob de ségiyo non ménggilak ro.

### *I de kétéfégito Jesus*

<sup>9</sup> Amun mémentébule i Jesuse bé toowe géfuwén bé no Duminggu, mémentéfégito sungu dob Maria Magdalena, sani libune fénféraréy Jesusey de fitéw gétew saitan tidéw dob beene. <sup>10</sup> Atin i Mariahe ni, ménangéy dob de kuyug Jesus, bé lala ruwe rémuung brab kémérew fantag bé kéléhu Jesuse. Atin nuretén dob berowey fantage bé kétébule Jesuse.

<sup>11</sup> Endob amun énggelingoo roy kékéréh ne bé mémentébule i Jesuse brab énggito no, énda ménunur ro de.

<sup>12</sup> Amun énggilid i ni, mémentéfégito man i Jesuse bé ségiyowe falasén dob ruwowe gétew bé de kuyugén bé lala ruwe magéw dob de aguwon mangéy dob de safad. <sup>13</sup> Atin méniséfule ro mangéy Jerusalem brab nuret roy ni dob de dumo ro do kuyug. Endob énda ménunur ro bero.

<sup>14</sup> Atin tidéw bénó, mémentéfégito man i Jesuse dob de folo bra sébaan gétew do kuyugén bé lala ruwe mama. Atin nugarén bero sabaf bé kulang i kénur ruwe, brab sabaf métégas i de uléw ro funa ro énda munur bé kéuret i de énggégito de tidéw bé kétébule ne. <sup>15</sup> Atin ménbérél i Jesuse dob berowe mano, “Angéy gom dob kéluhanay de gonon dob duniyae ni, brab uret gom i Fiyowe Uret dob kéluhanay de étew. <sup>16</sup> Atin i kéluhanay de munur brab mébautis, méfukas ro. Atin i kéluhanay de énda munur, mékukum ro. <sup>17</sup> Atin i de munur géféténgténg ro bé de ni do tanda bé barakat guwe: Géféraréy ro do saitan, usaré roy dawét guwe. Atin gésébérél ro bé de ségiyo késébérél énda gétiga ro de. <sup>18</sup> Atin amuk géfurut ro do ulé, taloo no géiném ro udenén bisa, énda gésug-sug ro. Atin tégené roy de uléw i de démériun brab géféadi-adino ro bero.”

### *I kédiyat Jesus*

<sup>19</sup> Atin amun énggilid i Kadnane Jesus bé kékéréh ne dob berowe, féndiyat i Tuluse mangéy dob lawayo brab ménstar fingé dob kuwonoy Tuluse. <sup>20</sup> Atin i de kuyugén ménagéw ro mangéy muret dob kéluhanay de ingéd. Atin i Kadnane ténabanga no bero brab fénggito noy toow i kéuret ruwe bé kékérigo nuwe bero bé de mékégaif galbék.

## I Fiyowe Uret Sénulat Lukase

Been i niy Fiyowe Uret sénulat Lukase fantag bé Jesu Kristowe. Sénulat Lukasey médoowe bé de mémégaif rénigo Jesuse brab de téneroén. Féngito Lukasey Jesuse, sani Nga i Tuluse, ménwaléy kéilawan brab féndawét “Nga i Kéilawane”. I funa Jesuse ménwaléy kéilawan inok fukasé noy de étew tidew dob de sala ro. Fukasé noy de étew bé kéléhu ne dob kruse.

I Lukase, sani séménulate bé ni Fiyo Uret, ségetéw doktor, mélaw toow fo métiledtéd. Fénenginsaa noy médoowe bé de kuyug Jesus inok gésulata noy de toow fo rénigo Jesuse brab de bénréhén brab ati toowe fo ménrigo dob Beene. Mélaw gétiga tom bé i kéluhanay de sénulat Lukas toow fo toow. Sénulat Lukasey ni Fiyo Uret dob gérotore étew féndawét Teofilo.

<sup>1</sup> Teofilo,

Wénén i médoos séménulat fantag bé kéluhanay ménrigowe fantag bé Jesuse dob kérara geye. <sup>2</sup> Sénulat roy tintuwe ségiléw bé kéuret i de ménuret de betom fantag bé Jesuse, sani de énggégito de tidew féganay. <sup>3</sup> Atin fiyon i begéne, toow gu féngganad i kéluhanay de ni ménrigo tidew féganay. Mélaw fatutu so sémulat bé méméntaye mangéy dob beeme bé urete fantag bé Jesuse. <sup>4</sup> Rigoné kuy ni inok gétiga moy toowe bé ténoroe nén beem.

### *I kékéréh i télakiwe fantag bé Juan Bautistawe*

<sup>5</sup> Brab i ni sulaté ku beem tafayén tidew féganay bé Herod i méguléwe séna dob Judea. Bé bénou, wén i ségetéwe lagéy féndawét Sakarias, ménamung dob ségéklasiwe fadi féndawét Abias. I Sakariase ni, wén i bawagén féndawét Elisabet. Tidew so dob katufua Aarone ségetéw fadi. <sup>6</sup> Atin i Sakariase brab Elisabete bawagén, métintu ro dob adafay Tuluse. Odoro ro brab tumané roy kéluhanay sugu i Tuluse. <sup>7</sup> Endob énda i nga ro, non i Elisabete atir, brab do lukés ro nén.

<sup>8</sup> Amun énggégumah i gaiwe gémalbék i ni ségéklasi fadi féndawét Abias, ménamung soy Sakariase diyo dob lawi i Tuluse beroy de dumo no. <sup>9</sup> Atin sénbunuto ro loo bé adat ruwe do fadi ké mémili ro ségetéw dumo ro mangéy témuwég dukah dob lawi i Tuluse. Atin Sakarias i ménfémilie. <sup>10</sup> Amun tuwégé Sakariase nén i dukahe dob lawi i Tuluse, i kéluhanay de ménlimud do méngradaf déménasal ro dob liyuwe. <sup>11</sup> Tidew bénou, i télakiwe tidew dob Kadnane méméfégito téménindég fingé dob kuwonoy ahayane féngadafan tuwégon bé dukahe. <sup>12</sup> Amun énggito Sakariasey ni, toow fo mémgaif brab ménggilak.

<sup>13</sup> Endob i télakiwe ménbéréh mano, “Kago mémilak Sakarias. Enggélingooy Tulusey kédasal me. Mélaw i bawag me Elisabet géfégénga ségetéw nga lagéy. Atin fédawétém Juan. <sup>14</sup> Atin waléy go méoror brab méoror soy de médoos étew ké mumah. <sup>15</sup> Non waléy moso gérotor dob adafay Tuluse brab énda minémén éntingayén arak méméolon. Atin énda séna ménfégéngaén, i Rémogor i Tulusey mémmanduone de. <sup>16</sup> Atin sabaf bé kétoro i nga me, médooy de Judio gésénule brab munur bé Kadnane Tulus ro. <sup>17</sup> Beeney géétahe bé Kadnane brab fémanduooy Rémogor i Tuluse brab iraya no barakat rémigo do mémégaif loo bé rénigo Eliase bé do géyah. Brab beeney émféséulite bé de ménsebanil do lukés bé de nga ro. Brab i de étew énggésala, gésénule ro sabaf bé kétoro ne, brab mémginugut ro dob Tuluse, brab waléy ro man métintu. Atin mélaw waléy médooy étewe géingat ongot-ongot bé kégégumah i Kadnane,” bang i télakiwe ni.

<sup>18</sup> Tidew bénou, ménbéréh i Sakariase mano, “Endob ati kégétiga kuwe de ké toow i ni bénréhém? Non i begéne brab bawag guwe toow geyén fo lukés.”

<sup>19</sup> Séménumbul i télakiwe mano, “Bégéney Gabriele, sugu-suguéy Tuluse démoyun dob adafa nuwe. Sénugu i Tuluse begén inok bérhéku dob beemey ni fiyo uret. <sup>20</sup> Atin béléewe waléy go émow. Enda gébéréh go taman énda métuman i ni bénréh gu, non

énda munur go bé de bénréh gu beem, sani kékéréhe métuman dob gaiwe kétayay Tuluse métuman.”

<sup>21</sup> Bé beno, i de étew dob liyuy lawi i Tuluse, ongot-ongoté roy Sakariase ké mésut, brab ménggaif ro de non ménrugay dob bukag i lawi i Tuluse. <sup>22</sup> Amun ménusut, énda gésébéréhén bero. Atin énggétiga roy wén i méntefégit de dob bukag i lawi i Tuluse, non séniniyasa no sa bero bé de kémérén, non émowén.

<sup>23</sup> Amun énggilidén i galbék Sakariase ni dob lawi i Tuluse, ménule. <sup>24</sup> Enda mérugayén tidew beno, i bawag ne Elisabet ménwaléy obor. Atin ménbati i Elisabete dob bukag i lawie, énda ménusut-sutén bé ménlimowe gétérésang kélungonon. <sup>25</sup> Bang Elisabete, “Toow fo mégédaw i Tuluse begén, non géfégéngau. Rénigoy Tulusey ni inok éndaén kémalanau dob de étew.”

### *I kékéréh i télakiwe fantag bé Jesuse*

<sup>26</sup> Dob géeném ne gétérésang kélungonon bé kéobor Elisabete, sénugu i Tulusey télakiwe féndawét Gabriel mangéy dob sébaane ingéd dob Galilea féndawét Nasaret.

<sup>27</sup> Wén i nuwitén kékéréh fénksamfayén dob ségétewe kénogon féndawét Maria. I Mariahe ténlanaa néen fébawagén dob ségétewe lagéy féndawét Jose. Beeney séfu i ségétewe méntelata datu i de Judio féndawét Dabid. <sup>28</sup> Ménggégumah i télakiwe dob Mariahe brab ménbéréh mano, “Oror go! I Kadnaney dumo muwe, brab niraya no beem dakél bantugan.”

<sup>29</sup> Toow fo ménbuku i Mariahe bé bénréh i télakiwe ni, brab fénggitungén ké ati atag i ni bénréhén. <sup>30</sup> Atin ménbéréh man i télakiwe mano, “Kago mégilak, Maria. Been i niy dakéle bantugan niray i Tuluse beem. <sup>31</sup> Waléy go obor, brab mégéngégo ségétew nga lagéy, atin fédawétém Jesus. <sup>32</sup> Waléy mébantug lagéy brab i fédawét i de étew de Nga i Toowe Gérotor Tulus. Féwaléyéy Kadnane Tulus datu ségiléw bé katufua nuwe Dabid.

<sup>33</sup> Waléy datu dob de étew Israel taman sa taman. I kéféguléw ne énda métamano.”

<sup>34</sup> Atin ménbéréh i Mariahe dob télakiwe mano, “Endob kénogonu séna, énda i bawag gu, non énda séna ménstifonu bé mawage begén. Ati kéfingé-fingé i ni mérigo?”

<sup>35</sup> Séménumbul i télakiwe mano, “I Rémogor i Tuluse mangéy dob beeme brab i barakat i Tuluse dob beeme. Been i niy funay mékétéfuwe nga fédawétén Nga i Tuluse.

<sup>36</sup> Fégitungém i Elisabete samungém. Bénréh i de étew éndaén kun fakayén géfégéngé, non toowén fo lukés. Endob fiyon fo ké loo bé nan, mén-énémén gétérésang kélungonon obor. <sup>37</sup> Non géronoy Tulusey kéluhanay étingayéne.”

<sup>38</sup> Atin bang Mariahe, “Bégéney sugu-suguéy Tuluse. Mérigo dam i ni kéluhanan loo bé bénréh manan.” Tidew beno, méntekédan i télakiwe.

### *Ténukaw Mariahey Elisabete*

<sup>39</sup> Tidew beno, i Mariahe ménagayas ménangéy dob sébaane ingéd dob de tuduk dob de sakuf Juda. <sup>40</sup> Ménangéy dob lawi Sakariase brab ténukawén i Elisabete.

<sup>41</sup> Amun i Elisabete énggelingoo noy béréh Mariahe sémégifa, i ngae dob ésur ne énggékédu, atin i Rémogor i Tuluse fénemanduo noy Elisabete. <sup>42</sup> Amun toow fo méoror i Elisabete, méntanug i kékéréh ne mano, “Bé kéluhanay de libun, toow fo féniyoy Tuluse beem, brab toow so fo féfiyoné noy ngae oboré mo. <sup>43</sup> Endob mégaifu non begéne soy féniyoy Tuluse, non i idéng i Kadna kuwe nangéyén ténukaw begén ségétew gérifantad.

<sup>44</sup> Gétiga kuy de ni non amun énggelingoo kuy béréh me sémégifa, i ngae dob ésur guwe ni énggékédu bé kéoror ne. <sup>45</sup> Féfiyonéy Kadnane damén beem non nunuro mo métuman i kékéréh ne.”

<sup>46</sup> Tidew beno, ménbéréh i Mariahe mano, “Dayéwéy rémogor guwey Kadnane, <sup>47</sup> brab toow fo méororu fantag bé Tuluse sani Mémukase begén. <sup>48</sup> Non fénggétédémén begén ségétew térifantad sugu-sugué no. Tidew béléewe tabaréy de étew begén fénggédawan.

<sup>49</sup> Non i barakatane Tulus rénigo noy mékégaife dob begéne. Mékétéfuy dawét ne.

<sup>50</sup> Tidew féganay taman béléewe, toow fo mégédaw bé de étew mégadatan de. <sup>51</sup> Rénigo noy de mékégaif galbék bé barakat ne. I de étew téfégérotor, bigodoyéy Tuluse bero inok énda mégulit i de tete bantak ro. <sup>52</sup> Kédané noy de datu dob de gono ro, brab fégérotoré

noy de étew térfantad. <sup>53</sup> I de méskinan fégédét dob Tuluse, fábésoré no bero bé de fiyo. Endob i de kawasa énda fégédétén dob Beene, énda i iray i Tuluse bero. <sup>54-55</sup> Ténabanga no betom do étewén do Judio, non gétédémo noy fasad ne dob katufua tome Abraham bé mégédaw de brab kéluhanay de séfuén taman sa taman,” bang Mariahe.

<sup>56</sup> Tidéw béo, ménbati i Mariahe dob ro Elisabete télén gétérésang kélungonon, atin béo na ménule.

### *I kéumah Juan Bautistawe*

<sup>57</sup> Atin amun énggumahén i gaiwe kéumahan i Elisabete, ménggenga ségétew nga lagéy. <sup>58</sup> I de dumo no ségédét brab do samungén, énggelingoo ro toow fo mégédaw i Tuluse de, atin mélaw kéluhana ro ménoror.

<sup>59</sup> Atin amun waléwén gétérésangan i ngae ni, ténuma roy adat i de Judio, mélaw ténuli ro. Atin sébéréh-béréh i de étew bé fédawétén Sakarias, ségiléw bé dawét i boh ne.

<sup>60</sup> Endob ménbéréh i idéng ne mano, “Békén Sakarias i dawét ne. Fédawété tom Juan.”

<sup>61</sup> Tidéw béo, séménumbul ro maro, “Endob énda i dumo no bérnan dawét.” <sup>62</sup> Tidéw béo, séniniyasa roy boh ne non énda gégléingoén. Fénénginsaa ro ké ati dawét i ngae kétaya no fédawét de.

<sup>63</sup> Atin ménongot i Sakariase sulatan brab sénulatén, “I dawét ne Juan.” Tidéw béo ménggaif i de étew. <sup>64</sup> Sonom béo, énggéréh i Sakariase, atin méngganay démayéw bé Tuluse. <sup>65</sup> I de dumo ro ségédét toow ro fo ménggaif. Brab i urete fantag bé ni ménrigo, ménlegéb dob kéluhanay de ingéd dob de tuduk sakuf i Judeawe. <sup>66</sup> Atin i kéluhanay énggégélingoe bé ni uret fégitungé ro brab ménénginsa ro maro, “Ati keeyén i kewaléyoy ni nga?” Non gétiga ro Kadnan i mémanduone de.

<sup>67</sup> Atin i boh ne Sakarias fénémanduoy Rémogor i Tuluse, mélaw ménuret bé kóbéréh i Tuluse mano, <sup>68</sup> “Dayéwé tom i Tuluse Kadna tom do Judio, non énggégumahén inok maun émfésagad bé de étewén. <sup>69</sup> Niraya no betom barakatan Mémukas tidéw dob de séfu i sugu-sugué nuwe Datu Dabid. <sup>70</sup> Been i Mémukase bénréh i de sénarigo no muret bé de kóbéréhén bé do gétah. <sup>71</sup> Réménigo fasadén dob betome bé sugué no dob betomey Mémukase inok témaban tom bé de sébanil betom brab de mérarék betom. <sup>72</sup> Bé késugu ne de, ténuma noy fasad ne mégédaw bé de katufua tom. Mélaw gétédémo noy fasad ne, <sup>73</sup> ténlaa no bérnan katufua tome Abraham, <sup>74</sup> bé fukasé no betom dob de sébanil betom inok rigoné tom i kétaya nuwe, énda i gilak tom. <sup>75</sup> Atin fakay tom méngintulus bé toowe brab fiyowe dob adafa nuwe sénga fuweh taman méuyag tom.” <sup>76</sup> Tidéw béo, bénréh Sakariase dob nga ne mano, “I beeme nga gu fédawétén go sarigon muret bé kóbéréh i Toowe Fo Gérotor Tulus. Métah go bérnan inok tafayé moy aguwo nuwe. <sup>77</sup> Embéréh go dob de étew bé mífukas ro bérnan kífésagad i Tuluse bero. <sup>78</sup> Non toow fo mégédaw i Tuluse betom. I kífukas ne betom ségiléw bé réndaw i térsange dob sébangane. <sup>79</sup> Non i kégédaw i Kadnane betom do étew mágilak méléhu, ségiléw bé kéréndaw i térsange dob délémone, inok fémanduo no betom dob aguwone énda i bukuén de.” Been i bénréh Sakariase.

<sup>80</sup> Atin i ngae ni ménruk émbagér brab ménwaléy métintu. Atin amun dakélén, ménbati dob sébaane gonon énda i étew de bati, taman bér gaiwe ménuret dob de étew Judio.

### *I kéumah Jesuse*

<sup>1</sup> Dob de gai bér béo, wén i ségétewé méngguléw dob Roma féndawét Augusto. Méniray sugu dob kéluhanay de étew félista ro inok iraya ro buwis. <sup>2</sup> Been i niy sunguwe kífélista bér de étew, atin ménrigoy ni amun Kireniovey máguléwe dob Siria. <sup>3</sup> Atin mélaw i kéluhanay étewé ménule ménangéy dob de karo ingéd, sani de gonoy de katufua ro, inok émfélista ro.

<sup>4</sup> Mélaw i Josehe ménagéw tidéw Nasaret sakuf i dakéle ingéd Galilea, mangéy dob ingéd ne féndawét Betlehem sakuf i dakéle ingéd Judea. I Betleheme ni, been i niy ingéde

numahay méntélatae Datu Dabid. Ménangéy diyo i Josehe non beeney séfu Dabide. <sup>5</sup> Ménangéy diyo bero Mariahe ténlaana no bawagé no moso. Bé bénó gai, gédétén kéumahan i Mariahe. <sup>6</sup> Amun diyo ron dob Betlehem, ménggégumah i gaiy kékéumaha nuwe. <sup>7</sup> Endob éndaén i gono ro dob de lawi kay de kana diyo. Mélaw ménangéy ro dob kayab i de ayam. Atin diyo ménkéumahan i Mariahe bé ngae lagéy sungu ngaén. Atin bénausén bé de safut brab féndiyoén dob amaay de ayam.

<sup>8</sup> Bé no so kélungonon, énda mérayuén tidéw diyo wén i do témalima bé de bili-bili dob de fétabtaban. <sup>9</sup> I télakiwe tidéw dob Kadnane méntéfégito dob berowe. Brab i géfékayae réndaw tidéw dob Kadnane réménéndaw dob berowe. Toow ro fo ménggilak. <sup>10</sup> Endob ménbéréh i télakiwe mano, “Kagom mégilak. Wén i fiyowe uret gu funay kéluhanay étewe méoror. <sup>11</sup> Béleewe ni, i Mémukase begom ménnumah dob Betlehem. Been i Kristowe Kadnan. <sup>12</sup> Gito gom bénhaus bé de safut, fén-iro dob amaay de ayam. Been i nan i funa kome gétigan bé uret guwe ni toow.”

<sup>13</sup> Atin bé bénó so, méntékow méntéfégito de médoó dumo no télaki brab kémanta ro dayéwé roy Tuluse maro, <sup>14</sup> “I kéluhanay de étew damén démayéw bé Tuluse diyo dob toowe fo gérotor laway. Irayén damén i fiyowe kébati énda i bukuén de, loo bé fasad ne dob de étew dob duniyae ni mésuwat i Tuluse bero.”

<sup>15</sup> Amun ménsséfule i de télaki mangéy dob lawayo, ménssébéréh-béréh i de témalima bé de bili-bili maro, “Fénggétigay Kadnane betom i fantage bé ménrigowé dob ingéde Betlehem. Magéw tom angéyé tom téngténgén.”

<sup>16</sup> Mélaw ménagayas ro magéw brab énggito roy Mariahe brab Josehe brab énggito roy klohe nga fén-iro dob amaay de ayam. <sup>17</sup> Amun énggito ro, bénréh ro dob Mariahe brab Josehey kékéréh i télakiwe fantag bé ni kloh nga. <sup>18</sup> Atin nuret i de témalima bé de bili-bili dob de ségiyo étew gébalaka ro, atin ménngaif i kéluhanay énggégélingoe de. <sup>19</sup> Enggétédémo Mariahey kéluhanay ni ménrigo brab sénga tékélid fégitungé no. <sup>20</sup> I de témalima bé de bili-bili ménsséfule ro kémanta dayéwé roy Tuluse, non bé de énggito ro brab de énggélingoo ro. Ménrigoy kéluhanane loo bé kékéréh i télakiwe de bero.

<sup>21</sup> Amun énggégumah i géwaléwe gétérésangan, i ngae ni ténu, brab niraya ro dawét Jesus, sani dawéte niray i télakiwe de bé énda séna obor i Mariahe de.

<sup>22</sup> Amun énggégumah i gaiwe bé kétuma ruwe bé sugu Moisese fantag bé kékélinise dob adafay Tuluse amun mégéng, i Josehe brab Mariahe nuwit roy ngae ni dob lawi i Tuluse dob ingéde Jerusalem. <sup>23-24</sup> Atin i Mariahe brab Josehe téménulak ro loo bé ménssulate dob Kukumay Tuluse ruwo timan lémugén inok félinis i Mariahe dob adafay Tuluse. I funa ruwe ménuit béréh ni inok odoro roy ménssulate dob Kukumay Tuluse mano, “Fatut iray dob Kadnaney sunguwe nga lagéy.”

<sup>25</sup> Bé bénó so, wén i ségetéwe lukés lagéy dob Jerusalem féndawét Simeon. Ségetéw métintu étew brab toow fo modor béréh tuluse. Atin sénga tékélid ongot-ongoté noy kékukase béréh de Judio. Brab i Simeone ni sénga tékélid fémanduoy Rémogor i Tuluse. <sup>26</sup> Fénggétigay Rémogor i Tuluse de bé énda méléhuén taman énda gito noy Kristowe, sani fénasad i Kadnane sugué no Mémukas. <sup>27</sup> Fénémanduoy Rémogor i Tulusey Simeone mangéy dob lawi i Tuluse béréh kékélinise dob Ménssulate Kékéréh i Tuluse. <sup>28</sup> Tidéw bénó, éndot Simeoney Jesuse brab sénfifi no brab ménfésalamat béréh Tuluse mano, <sup>29</sup> “Barakatan Kadnan, ténuma moy fasad me begén, brab fakayén méléhuu. <sup>30</sup> Non énggito gun i Mémukase sénuguém, <sup>31</sup> sani ténafe me inok i kéluhanay de étew gito ro. <sup>32</sup> Ségetéw maak solo réménéndaw dob de étew békén Judio inok fégétiga no beroy fantag béréh Beeme. Brab Been i funay de étew démayéw so begey do Judio.”

<sup>33</sup> Tidéw bénó, ménngaif i de lukés Jesus béréh Simeone fantag béréh Jesuse. <sup>34-35</sup> Atin déménasal i Simeone dob Tuluse inok féfiyoné no bero, brab bénréhén dob Mariahe idéng Jesuse mano, “I ni nga fénemili i Tuluse émféingat béréh de étew dini dob Israel inok i itungay médoowe émfayag. Médooy de étew mika béréh me ni moso, brab

funa mo tete i fédew me. Endob mékukum i de énda de munur, brab méfukas i de munur de.” Been i niy bénréh Simeone.

<sup>36</sup> Atin wén soy ségétewe libun muret bé kékéréh i Tuluse, féndawét Anah, nga Fanuel tidew dob katufua ro Asere. Toowén fo lukés brab ménsétifon bé bawag ne fitew gébélantuwa tidew fanay ménsébawag ro. <sup>37</sup> Endob ménbaléw taman waléw folo bra éfot gébélantuwa i kékukés ne. Brab énda fo méntékéda no dob lawi i Tuluse non fuweh na kélungonon i kéféngadaf ne démasal brab fuwasa. <sup>38</sup> Atin amun diyo sénay lukés Jesuse dob lawi i Tuluse, énggégumah i ni lukés libun. Sonom béno, ménfésalamat dob Tuluso, atin nureténi fantage bé Jesuse bé Beeney ongot-ongoté ruwe tidew dob Tuluse. Nureténi dob de étew diyo dob Jerusalem ongot-ongoté ro soy kéfukase bero.

<sup>39</sup> Atin i Josehe brab Mariahe, amun énggéodoro ron i kéluhanay sénugue dob Kukumay Tuluse, ménule ro mangéy dob Nasaret dob sakuf i Galileawe. <sup>40</sup> Atin ménruk i ngae ni, brab ménwaléy émbagér brab toow fo métileddé. Atin toow fo mégédaw i Tuluse de.

### *I Jesuse beroy de maistéro*

<sup>41</sup> Sénga bélantuwa i idéng Jesuse brab boh ne mangéy Jerusalem inok mamung ro kanduli féndawét “Témara”. <sup>42</sup> Amun folo bra ruwo gébélantuwa i idad Jesuse, ménodor bero, loo bé adat i de Judio. <sup>43</sup> Amun gilid i kékanduli ruwe, i de lukés Jesus ménule ro tidew Jerusalem. Enda gétiga ro de ké méntéfélé i Jesuse. <sup>44</sup> Maro ké ménodor so bé kédoono ruwe ménule. Amun ménségétérésangan ron magéw, sénléd roy Jesuse dob de samung ro brab dob de dumo ro. <sup>45</sup> Endob énda énggito ré de. Mélaw dob géruwowe de gai, ménséfule ro mangéy Jerusalem sélédé ro. <sup>46</sup> Dob gétéléw ne gétérésangan, énggito ro dob lawi i Tuluse. Ménsar beroy de maistéroy de Judio, fégélingoé no bero brab fénginsaa no bero. <sup>47</sup> I kéluhanay de mégélingo de, ménggaif ro bé de fiyo fénginsaé no brab de katabawan késumbulén. <sup>48</sup> Atin i de lukés Jesus ménggaif ro bé kégito ruwe de diyo. I idéng ne ménsébéréh de mano, “Jesus, i boh me brab begéne ménbuku gey fantag bé Beeme. Mémentaluwan gey séméléd Beem. Sédék rénigo moy ni?”

<sup>49</sup> Endob séménumbul i Jesuse mano, “Enda kailanga no sélédé kom Begén. Gétiga kom damén ay niwu dob lawi i Boh guwe.” <sup>50</sup> Endob i de lukés Jesus énda énggésobuto roy atag i bénréh Jesuse.

<sup>51</sup> Tidew béno, ménodor i Jesuse mule bé de lukésén mangéy Nasaret, brab nunuro no bero bé kéluhanay rigoné nuwe ula-ula. Enggétédémoy idéng ney kéluhanay de ni, atin sénga tékélid fégitungé no. <sup>52</sup> Amun ménruk i Jesuse, ménwaléy émbagér brab métileddé. Atin kéluhanay de étew méuyot ré de, brab i Tuluse toow fo ménoror de.

### 3

#### *I kéuret Juan Bautistawe*

<sup>1</sup> Dob géfolo ne bra limo gébélantuwa bé kékéguléw Tiberiowe, atin Ponsio Pilato sénay méguléwe bé Judeawe, brab Herod i méguléwe bé Galileawe, brab i Filipiwe dumo no sétiman idéng i méguléwe bé Itureawe brab Trakanite, brab Lisaniasey méguléwe bé Abiliniawe, <sup>2</sup> atin i de toow do gérotor fadi ro Anas brab Kaifas dob Jerusalem, ménsébéréh i Tuluse bé Juane nga Sakarias. Bé béno gai, ménbati i Juane dob gonone énda i étew de bati. <sup>3</sup> I kéluhanay de ingéd gédét dob wayége Jordan sénugudo no muret mano, “Kailanga kom gésénule bé de sala gom brab fébautis gom. Atin fésagaday Tuluse begom.” <sup>4</sup> I rénigo Juane diyo loo bé sénulat i méntelatae sénarigoy Tuluse muret féndawét Isaias mano, “Wén i ségétewe mékes dob gonone énda i étew de bati mano, ‘Tafay gom i aguwoy Kadnane. Fééntang gom i aguwo nuwe. <sup>5</sup> Tamfurén i kéluhanay de géleána, brab fédataren i kéluhanay de tuduk brab do buntud fédataren, brab féntangén i de aguwon bingkug, brab i de kémérih fédosoén. <sup>6</sup> Brab i kéluhanay de étew gégito bé Mémukase tidew dob Tuluso.’”

<sup>7</sup> Atin médooy étewe ménangéy dob Juane inok fébautis ro. Endob i Juane ménbéréh mano, “I begome maak do ulé gom non tete i de rigoné kom. Sedek mangéy gom dini?

Enda géféraréy gom tidéw dob kékukum i Tuluse ké fébautis gom saén. <sup>8</sup> Buluk toow gomén gésénule bé de sala gom, féténgténg gom i de fiyo ula-ulane kom. Atin kagom fégitungén i Tuluse fukasé no begom dob de sala gom sabaf bé begom i de séfu Abraham. Béréhé ku begom, fakay géfélawéy i Tuluse séfu Abrahame tidéw dob de batéw. <sup>9</sup> Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibérén dob aféye inok métuwégy.

<sup>10</sup> Atin i de médooy étew fénénginsa ro dob beene maro, “Ati fatute rigoné key?”

<sup>11</sup> Atin séménumbul i Juane mano, “Ati wéne ruwo lafin kégalén, fatut iraya noy éndae de. Brab ati wéne amaé no, fatut témukid de so.”

<sup>12</sup> Enggégumah soy de kémubra buwis inok fébautis ro. Atin ménbéréh ro maro, “Maistéro, ati fatute rigoné key?”

<sup>13</sup> Séménumbul i Juane mano, “Amuk kémubra gom, kagom lifulén i de étew. Yamula édot gom saén i katabuwane.”

<sup>14</sup> Atin i de sundalo ménénginsa ro so dob beene maro, “I begeye, ati fatute rigoné key?”

Atin séménumbul i Juane mano, “Kagomén médot kurta fénagéw dob kégégye. Taloo no témebo gom bé békéne toow. Kasukudan gomén bé sukay gome.”

<sup>15</sup> Atin i de médooy étew amun énggelingoo roy kétoro Juane, kémarrang ro brab mégitung ro ké beeney Kristowe ménggumah dob duniyae. <sup>16</sup> Mélaw i Juane ménbéréh dob bero mano, “I begéne, bautiso ku begom bé wayége, éndob wén nay gégumahe mas na gérotor begén. Fyon foy ikét i safatos ne, énda métotoror de mukoh. Brab bautiso no begom bé Rémogor i Tuluse brab aféy. <sup>17</sup> Féganané noy de fiyo étew bé de tete étew ségiléw bé ségétewe métof. I fégéetof ne diyo dob kémér ne inok fégéetofén bé énrek ne brab fégétimuén bé faréye dob kiwot ne. Brab i de ukofén tuwégé no dob aféye énda émfandaén.”

<sup>18</sup> Brab wén soy médoowe gékelasi kéuret Juane bé de étew fantag bé Fiyowe Uret.

<sup>19-22</sup> Amun médooy de étew ménbautisén, i Jesuse bénautis Juane so. Amun ménbautis i Jesuse, déménasal, brab i lala ne démasal, ménungka i lawaye. Atin i Rémogor i Tuluse ménlus maak marafati brab méntérimféna dob Jesuse. Atin wén i ménbéréhe tidéw dob lawayo mano, “Beem i Nga guwe. Toow fo kégédawa ku brab késuwata ku.”

Atin i Herode datu, dénowoy Juane fantag bé Herodiyase lénamfaén bawag i dumo nuwe sétiman idéng brab fantag bé de médooy de tete rénigo Herode. Tidéw béo, numana no nay sala ne bé kékéférisu nuwe bé Juane.

### I de katufua Jesus

<sup>23</sup> Bé kékéganay Jesuse bé galbék ne, téléléw folo gébélantuwa i kékukés ne. Brab i de étew maro ké Jesusey nga Josehe. Been i nga Elihe. <sup>24</sup> Been i nga Batate. Been i nga Lebihe. Been i nga Melkihe. Been i nga Janahe. Been i nga Josehe. <sup>25</sup> Been i nga Matatiase. Been i nga Amose. Been i nga Nahume. Been i nga Esluhe. Been i nga Nagehe. <sup>26</sup> Been i nga Maate. Been i nga Matatiase. Been i nga Semeihe. Been i nga Josehe. Been i nga Judahe. <sup>27</sup> Been i nga Joanahe. Been i nga Resahe. Been i nga Sorababele. Been i nga Salatiele. Been i nga Nerihe. <sup>28</sup> Been i nga Melkihe. Been i nga Adie. Been i nga Kosame. Been i nga Elmodame. Been i nga Ere. <sup>29</sup> Been i nga Josuehe. Been i nga Eliesere. Been i nga Jorime. Been i nga Matate. Been i nga Lebihe. <sup>30</sup> Been i nga Simeone. Been i nga Judahe. Been i nga Josehe. Been i nga Jonane. Been i nga Eliakime. <sup>31</sup> Been i nga Meleawe. Been i nga Mainane. Been i nga Matatawe. Been i nga Natane. Been i nga Dabide. <sup>32</sup> Been i nga Jessehe. Been i nga Obede. Been i nga Boose. Been i nga Salmone. Been i nga Naasone.

<sup>33</sup> Been i nga Aminadabe. Been i nga Admine. Been i nga Arniwe. Been i nga Esrome. Been i nga Faresse. Been i nga Judahe. <sup>34</sup> Been i nga Jakobe. Been i nga Isake. Been i nga Abrahame. Been i nga Tarehe. Been i nga Nakore. <sup>35</sup> Been i nga Seruge. Been i nga Ragauwe. Been i nga Pelege. Been i nga Hebere. Been i nga Salae. <sup>36</sup> Been i nga Kainane. Been i nga Arfakade. Been i nga Seme. Been i nga Noehe. Been i nga Lameke. <sup>37</sup> Been i

nga Matuseleme. Been i nga Enoke. Been i nga Jaredé. Been i nga Mahalaleele. Been i nga Kainane. <sup>38</sup> Been i nga Enoke. Been i nga Sete. Been i nga Adame. Been i nga i Tuluse.

## 4

*Ténéngkad Satanasey Jesuse*

<sup>1</sup> Atin i Jesuse fénémanduoy Rémodor i Tuluse, ménule tidéw dob wayége Jordan, brab fénanangguwit i Rémodor i Tuluse mangéy dob de gonon énda i étew de bati. <sup>2</sup> Amun diyoén i Jesuse, ménggégumah i odoroy de saitan féndawét Satanas inok téngkade noy Jesuse rémigo tete. I kérugay i ni éfot folo gétérésangan. Bé do no gai, énda ménama i Jesuse, atin toow fo ménlayaf.

<sup>3</sup> Ménggégumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

<sup>4</sup> Endob séménumbul i Jesuse mano, “Wén i Ménsulate Kébérél i Tuluse mano, ‘Békén amaén saén i funay étewe méuyag.’”

<sup>5</sup> Tidéw béno, méntékor nuvit Satanasey Jesuse mangéy dob gérotore gonon. Brab fenténgténgén dey kéluhanay de ingéd dob duniyae. <sup>6</sup> Atin ménbéréh i Satanase mano, “Buluk lingkuwédo mo begén brab féngadafé mo begén, iray gu beem i kéluhanay ature méguléw bé de ni inok médayéw go. Géiraya ku kuwagib i étewe fémilié ku magatur bé kéluhanay de ni, non begéney wéne atura no bé de ni béléewe. <sup>7</sup> Lingkuwédonu brab féngadafénu, atin kéluhanay de ni gédoté mo.”

<sup>8</sup> Endob séménumbul i Jesuse mano, “Wén i Ménsulate Kébérél i Tuluse mano, ‘Lingkuwédo saén dob adafay Kadnane Tulusém. Been saén i féngadafé muwe.’”

<sup>9</sup> Tidéw béno, nuvit Satanase mangéy dob ingéde Jerusalem, brab nuwitén mangéy dob towe gérotor bérungoy lawi i Tuluse. Atin ménsébéréh man bé Jesuse mano, “Amuk Beemey Nga i Tuluse, antéfor go. <sup>10</sup> Non wén i Ménsulate Kébérél i Tuluse mano, ‘Suguéy Tulusey de télaki no démiyaga Beem, <sup>11</sup> brab sakémé ro Beem inok énda émfali go bé de batéw dob fantade, fiyon i de sékéyém.’”

<sup>12</sup> I Jesuse séménumbul mano, “Endob wén soy Ménsulate Kébérél i Tulus mano, ‘Kago téngkadén i Kadnane Tulusém rémigo bé kétaya muwe rigonén.’”

<sup>13</sup> Atin i Satanas ténéngkadén i Jesuse rémigo tete bé médoowe ségiyo-giyo kétengkadén de. Endob énda génaga né de. Tidéw béno, ténagakén i Jesuse singkow.

*I kéfeganay i galbék Jesuse dob Galilea*

<sup>14</sup> Tidéw béno, ménséfule i Jesuse mangéy Galilea, brab i barakat i Rémodor i Tuluse dob Beene. Atin i urete fantag bé Jesuse méraan ménlégéb dob de ingéd diyo. <sup>15</sup> Atin téménoro i Jesuse dob de lawi féngadafan kay de Judio brab kéluhanay de étew dénayéw ro.

<sup>16</sup> Tidéw béno, énggégumah i Jesuse dob Nasaret, sani gono nuwe ménruk. Atin bé gaiwe kétérén, ménahur dob lawie féngadafan loo bé adat ne, atin téménindég inok basané noy Ménsulate Kébérél i Tuluse. <sup>17</sup> Brab wén i niraye de basanén sénulat i Méntelatae sarigoy Tuluse muret féndawét Isaias, brab amun nukabén, énggébasa na noy ménsulate diyo mano, <sup>18</sup> “I Rémodor i Tuluse ay ni dob Begéne, non fénémilién Begén inok muret bé Fiyowe Uret dob de méskinan. Sénuguén Begén inok muretu fantag bé kétangéye bé de ménkalabusu, brab émféséfule bé de fiyo kétengténg i de langafén, brab témabang bé de kéfasangan. <sup>19</sup> Atin sénuguén Begén muret fantag bé bélintuwae fégétigay Tulusey kégédaw ne bé de kéilawan.”

<sup>20</sup> Tidéw béno, amun énggilid i kékasa nuwe de, dénili noy ni basanén, atin fénséfuleén dob sugu-suguéne gémalbék dob féngadafane. Atin ménsar i Jesuse inok témo. Atin ténéngténg i kéluhanay de étew diyo. <sup>21</sup> Atin ménbéréh mano, “Bé ni gai, i ni ménsulat méntuman dob adafa kome.”

<sup>22</sup> Tidéw béno, i kéluhanay de étew diyo énggédayéwo roy Jesuse, brab ménggaif ro bé kéfiyoy de kékérélén. Mélaw ménséfenginsa ro maro, “Aw békén bay ni nga Josehe saén?”

<sup>23</sup> Atin ménbéréh i Jesuse mano, “Béréhé kom sékoy sébaane binuwaya mano, ‘Amuk beemey muwae, uwaém i lowoh me. Non amuk beemey ségétewé tintu sarigoy Tuluse, rigo moy de mékégaif galbék dini dob kaame ingéd ségiléw bé de rénigo mo kun dob Kafernaum.’ ” <sup>24</sup> Féntaus Jesusey kékéréh ne mano, “I toowe béréhé ku begom, énda i ségétewé sarigoy Tuluse tayakufén dob kaane gonon. <sup>25</sup> Endob béréhé ku begom i toowe fantag bé gai Eliase. Enda fénrana i Tuluse de bé télwe gébelintuwa brab éném gétérésang kélungonon. Atin énggégumah i lénggobé dob de ni gonon. Bé béo gai, médooy de baléw do libun Judio. <sup>26</sup> Endob fiyon ségétewé bé no do baléw dumo tom Judio dob Israel, énda fénfégédét i Tulusey Eliase dob berowe. Yamula sénugu i Tuluse mangéy dob ségétewé libun baléw békén Judio dob sébaane ingéd féndawét Sarepta dob Sidon. <sup>27</sup> Loo so bé gai Eliseawe ségétewé so sarigoy Tuluse. Wén i do médooy étew démeruun fémute bé de dumo tom Judio. Endob énda i ségétewé bero fén-adi-adi saliyu bé ségétewé étew békén Judio féndawét Naaman tidew Siria.” <sup>28</sup> Atin i de kéluhanay de étew diyo dob lawie féngadafan toow ro fo ménkérít bé kégélingo ruwe bé ni bénréh Jesuse. <sup>29</sup> Mélaw dénedél ro taman dob uruk i tuduke diyo, sani fentindégo ro bé karowe ingéd, inok dérié ro damén dob fingase inok mélawu. <sup>30</sup> Endob ménagéw i Jesuse témará dob kérara ruwe atin méntaus magéw téngakén bero.

#### *Dénédél Jesusey de saitan*

<sup>31</sup> Atin méntaus i Jesuse léménudug mangéy Kafernaum sani sébaane ingéd sakuf i Galileawe. Diyo bé gaiy kétéréné, témenoro dob de étew dob lawie féngadafan. <sup>32</sup> Atin éngkéségiyonan i de étew bé de kétoroén non énda saén ténororé i kékégitung i de ségiyo étew. Yamula ténororé i kaane kékégitung. <sup>33</sup> Atin diyo dob lawie féngadafan, wén i étewé rénahukoy saitane. Brab ménkes toow fo métanug mano, <sup>34</sup> “Adéhoyoy! Ati amungé muwe begey, Jesus tidew Nasaret? Ménangéy go ba dini inok binasané mo begey? Enggétiga key ké ati Beeme. Beem i Mékétéfuwe tidew dob Tuluse.”

<sup>35</sup> Endob génlé Jesusey saitane ni mano, “Kago selekén, brab tékédan go.” Sonom béo, tenuwar i saitaney étewe ni rénahuko no. Atin méntékédan brab énda ménkaid i étewe ni.

<sup>36</sup> Atin éngkéségiyonan ro kéluhanan. Brab ménésbéréh-béréh ro maro, “Ati ni kékéréh? Dob kékéréh ne saén wén i barakatén. Sugué noy saitane tékédan atin modor tékédan.” <sup>37</sup> Atin i urete fantag bé Jesuse ménlegéb dob de kéluhanay de ingéd diyo.

#### *Nuwa Jesusey de médooy étew*

<sup>38</sup> Tidew béo, méntékédan i Jesuse tidew dob lawie féngadafan brab ménangéy dob lawi Simone, atin diyo i térima Simone libun démeruun toow fo méduf. Atin nongot roy Jesuse bé uwaé no. <sup>39</sup> Atin téminindégo i Jesuse dob tébing i libune ni, atin fentekéda noy kékéduf ne. Sonom béo, ménadi-adiy libune ni. Atin méntek dénuwoto no bero.

<sup>40</sup> Amun mélédén i térsange, i de médooy do étew wén i démeruun ro, nuwit ro dob Jesuse inok uwaé no bero. Atin kénuwah Jesuse bero brab ménadi-adi ro kéluhanan.

<sup>41</sup> Fénféraréyén soy médoowe saitan. Brab ménkes ro maro, “Beemey Nga i Tuluse.” Endob génléen bero inok métanék ro, non énggétiga roy Beeney Kristowe.

<sup>42</sup> Amun géfuwénén, méntékédan i Jesuse ménangéy dob sébaane gonon énda i étew de bat. Endob i de étew sélédé ro brab ménangéy ro dob Beene brab nongot ro ké énda damén tagaké no bero. <sup>43</sup> Endob bénréhén bero mano, “I funa kuwe sénugu mangéy dini inok ureté ku dob de dumo ingéd i Fiyowe Uret fantag bé kékégléw i Tuluse dob de étewén. Mélaw fatut ureté ku dob de dumo ingéd.”

<sup>44</sup> Atin i Jesuse ménagéw ménuret dob de féngadafan dob Judea.

#### *Ténawag Jesusey de sungu kuyugén*

<sup>1</sup> Wén i no sébaan fuweh, diyo i Jesuse dob doror i dogote féndawét Genesaret. Ménfégédét i de médooy do étew sédantélo ro inok mégélingo ro bé kékéréh i Tuluse

ureté Jesuse. <sup>2</sup> Atin i Jesuse énggito noy ruwowe do awang diyo dob doror i dogote. Brab i de gefe de méntéfor ro non urahé roy de fukét ro. <sup>3</sup> Amun i Jesuse ménda dob sébaane bé de awang ni ka Simon, nongotén bé féangéyé no kloh dob ménaléme de. Brab diyo ménasar ménuret bé kébérhé i Tuluse dob de étew diyo ménribuk dob doror i dogote.

<sup>4</sup> Amun énggilid téromo i Jesuse, bénréhén bé Simone mano, “Fékérara tom dob ménaléme de brab lawu gom i da fukét goma nan inok gégédot gom do sédo.”

<sup>5</sup> Endob i Simone séménumbul mano, “Maistéro, ménterasay gey ségékélungonon brab énda foy énggédot gey de. Endob amun bénréhém, lawué key de fukét gey.” <sup>6</sup> Amun ménunur ro bé lénawu roy de fukét ro, énggédot ro toow fo médoo sédo, brab i de fukét ro gédét mékusi. <sup>7</sup> Tidéw béno, nabit roy de dumo ro dob ségiyowe awang, inok tétabang ro médot bé de sédo. Brab amun énggégumah ro, fénéno roy ruwowe timan awang taman gédét ro mééléd. <sup>8</sup> Amun énggito Simon Pedrowey ni fénrigo Jesuse ulala, ménlingkuwéd dob adafa nuwe brab ménbérhé mano, “Kadnan, kago fégédét begén, non ségetéwu étew ménalsa.”

<sup>9</sup> I funa nuwe énggóbérhé loo bé ni non toow fo ménggaif i Simone brab de dumo no bé kédooy de sédo énggédot ro. <sup>10</sup> Fiyon foy de nga Sebedeo, ro Santiago brab Juan dumo Simone gémalbék, ménggaif ro so. Atin ménbérhé i Jesuse dob Simone mano, “Kago mégilak. Brab éndaén séméléd gom sédo. Tidéw béléewe, fésélédé ku begom étew inok furay ro so Begén.”

<sup>11</sup> Amun féndunggu roy de awang ro, fénled roy kéluhanane, atin ménodor ro bé Jesuse.

### *Nuwa Jesusey ségétéwe fémuteén*

<sup>12</sup> Wén i no sébaan fuweh dob sébaane ingéd, énggabalaka Jesusey ségétéwe étew fémuteén. Atin bé kégito nuwe bé Jesuse, méntédunsum dob fantade brab ménfégédaw-gédaw bé Jesuse mano, “Kadnan, buluk méuyot go, géféadi-adino mo begén.”

<sup>13</sup> Atin i Jesuse béntréen i kémér ne brab kénuwahén, brab ménbérhé mano, “Méuy-otu. Adi-adi go!” Sonom béno, ménkédan i fémute ne brab ménadi-adi. <sup>14</sup> Atin bénréh Jesuse bé békén ureté no dob ségiyowe étew brab sénuguén mano, “Ay go dob fadie inok, féténgtengém i ménadi-adi gon. Tidéw béno, tulak go loo bé ménbérhéhe dob Kitabé tidéw dob Moisese inok gétigay kéluhanay de étew ménadi-adi gon.”

<sup>15</sup> Endob i urete fantag bé Jesuse ménlégéb mangéy mérayu. Mélaw wén i toow fo médoo étew ménangéy dob Beene inok mégélingo ro bé uret ne brab féuwa ro bé de déruu ro. <sup>16</sup> Wén i no do gai, i Jesuse ménangéy dob sébaane gonon énda i étew de batí inok félébu brab démasal diyo.

### *Nuwa Jesusey ségétéwe kimoyén*

<sup>17</sup> Wén i no sébaan fuweh, témenoro i Jesuse. Atin diyo i de odoroy de Judio féndawét Fariseo ménasar beroy de téromo bé kitabe. Tidéw ro dob de sakuf Galilea brab Judea brab tidéw dob ingéde Jerusalem. Atin i barakat i Tuluse méndiyo dob Jesuse inok uwaé noy de démuun bé de étew. <sup>18</sup> Atin énggumah i de étew ménuit bé kimoyéne ténganggung ro. Kétaya ro uwitén mahur inok fédiyé ro dob téngaanga Jesuse. <sup>19</sup> Endob énda i fiyo kénélawang ro de, non bé médoowe do étew. Mélaw ménénik ro dob atéf i lawie. Tidéw béno, ténosongo ro féagéwo ro de témuntun mangéy fantad dob kérara i de étew dob adafa Jesuse. <sup>20</sup> Amun énggito Jesusey kénéfingintoow ruwe, ménbérhéhe dob ni étew kimoyén mano, “Adih, i de salaém ménfésagadén.”

<sup>21</sup> Tidéw béno, i de Fariseo brab de téromo bé kitabé fénggitung ro maro, “Sedek émbérhéh ménkémurka i ni étew? Enda i géfésagad bé de sala ké békén i Tuluse saén!”

<sup>22</sup> Endob i Jesuse gésobuto noy de itunga ro. Mélaw séménumbul mano, “Sedek séfenginsa gom dob de fédew gom fantag bé kébérhé guwe? <sup>23</sup> Toow na fo mélému bérhéhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén bérhéhén, ‘Tindég go brab agéw go.’ Non giton ké wén i barakat gu de rémigo. <sup>24</sup> Endob fénfégétiga ku begom i fantage bé Nga i Kéilawane, sani Begéne.

Wén i barakat gu brab kuwagib gu dob duniiae ni émfésagad bé de sala.” Tidéw béno, bénréhén dob kimoyéne mano, “Béréhé ku beem, tindég go brab agéw go uwitém i iroo muwe mule mangéy dob lawi me.”

<sup>25</sup> Sonom béno, téménindég i kimoyéne ni dob téngaanga ruwe brab ménagéw nuvitén i iroo nuwe brab ménule mangéy dob lawi ne démayéw bé Tuluse. <sup>26</sup> Atin i kéluhanay de étew diyo, toow ro fo ménkéségyionan brab ménggilak ro. Atin dénayéw roy Tuluse maro, “Enggégito tom do mékégaif bé ni gai.”

<sup>27</sup> Amun énggilidén ni de rénigo Jesus, ménagéw brab énggito noy ségétéwe étew kémubra buwis féndawét Lebi, ménasar dob de kubranan buwis. Brab ménésbéréh i Jesuse de mano, “Odor go Begén.” <sup>28</sup> Tidéw béno, i Lebiwe fénledén i kéluhanane brab téménindég ménodor bé Jesuse.

<sup>29</sup> Atin rénigo Lebiwey sébaane dakél karagiya dob lawi ne. Brab diyo i médoowe do étew kémubra buwis brab médoob na étew ménasar mama brab miném bero Jesuse. <sup>30</sup> Atin i de témooro bé kitabé brab de Fariseo, ménbutég-butég ro brab ménbéréh ro dob de kuyug Jesus maro, “Sedek ménslawék gom mama bé de kémubra buwis brab de ségiyo tete étew?”

<sup>31</sup> Endob séménumbul i Jesuse mano, “I de fiyo kégelowoho no, énda kailanga roy muwae, éndob kailangay de wén déruu no. <sup>32</sup> Enda ménangéyu dini inok tabaré kuy de métintu étew. Yamula ménangéyu dini inok tabaré kuy de wén salaén inok gésénule ro.”

<sup>33</sup> Atin wén i de ménénginsa dob Jesuse maro, “I de kuyug Juan sénga tékélid démasal ro brab fuwasa. Loo so bé de kuyug i de Fariseo. Endob i de kaam do kuyug mama brab miném ro.”

<sup>34</sup> Endob i Jesuse sénumbulo no bero mano, “Ufama, i de kana dob uyote énda waléy tete i de fédew ro taman énda tékédan i témérimate lagéy. <sup>35</sup> Endob gégumah i gaiwe ké édotén nén i témérimate lagéy dob berowe, brab been nay no fuwasa ro bé do no gai. Ségiléw so bé de kagén kuyug, non amuk diniwu séna, énda fuwasa ro.”

<sup>36</sup> Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i étew rémiyas bé mantuwe kégal inok fégétabung bé tafaye kégal. Non amuk rigoné no, mésinggula i mantuwe kégal, brab énda fo médait féséréfaén i mantuwe bé tafaye de. <sup>37</sup> Brab énda i étew mahur bé mantuwe arak dob tafaye ahuron arak rénigo bé kulit ayame, non mébétus i mantuwe arak dob tafaye ahuron brab mébinasa brab méitis i mantuwe arak. <sup>38</sup> Endob fatut i mantuwe arak ahurén dob mantuwe kulit fédégon de. <sup>39</sup> Brab énda i étew buluk géiném bé tafaye arak méuyot bé mantuwe de non mano, ‘I tafaye arak mas na fiyo.’”

## 6

### Fantag bé gaiy kétérén

<sup>1</sup> Wén i no sébaan fuweh gai kétérén, i Jesuse brab de kuyugén téménara ro dob de médoob do faréy. Atin i de kuyugén ménidot ro de brab kénugut ro. Tidéw béno, ménama ro. <sup>2</sup> Endob i de Fariseo diyo ménbéréh ro maro, “Sedek rigoné roy ni, non békén fatut rigonén galbék bé gaiwe kétérén?”

<sup>3</sup> Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toowén fo méléyaf beroy de sundalo no. <sup>4</sup> Atin ménahur ro dob lawi i Tuluse brab ménidot bé ténulake fan brab namaén, atin niraya no soy de dumo no de. Rénigo noy ni fiyon fo ké dob kitabe, do fadi saén i fakaye mama bé ni fan.”

<sup>5</sup> Atin féntaus Jesusey kékérén ne mano, “I Nga i Kéilawane, sani Begéne, wén i kuwagib gu fantag bé ati fakaye bé gaiwe kétérén.”

### Nuwa Jesusey ménadile kémérén

<sup>6</sup> Bé sébaane man gai kétérén, ménahur i Jesuse dob lawi i de Judio féngadafan inok témooro. Atin diyo soy ségétéwe lagéy ménadil i kuwonone bé kémér ne. <sup>7</sup> Atin i de

Fariseo, sani de odoroy de Judio, diyo so beroy de téromo bé de kitab. Atin ténulik roy Jesuse inok gito roy funa ruwe de téombo rémigo énda fakayén dob kitabe. Mélaw ténéngténg ro inok gito ro ké muwa i Jesuse bé gaiwe kétérén.<sup>8</sup> Endob i Jesuse, gétuwa noy de itunga ro. Atin ménbéréh dob lagéye ni ménasadi l kémér ne mano, "Ay go dini, tindég go dob adafay kéluhanay de étew ni." Mélaw téménindég brab ménagéw mangéy diyo.<sup>9</sup> Tidéw béno, ménbéréh i Jesuse dob de Fariseo brab dob de maistéro mano, "Ati karang gome de, ati isuwe fakay dob kitabé bé gaiwe kétérén? Rémiyo fiyo loo ké tete? Témabang bé étewe loo ké féléhuén?"<sup>10</sup> Atin iling-ilong i Jesuse brab ménbéréh dob lagéye ni mano, "Bétérém i kémér me." Atin bénétérén i kémér ne atin sonom béno ménadi-adi.

<sup>11</sup> Tidéw béno, toow fo ménkérit i de Fariseo brab de téromo. Atin ménséuret-uret ro bé ati rigoné ruwe bé Jesuse.

### *Fénémili Jesusey de folo bra ruwo Apostol*

<sup>12</sup> Atin ménagéw i Jesuse bé béno gai ménangéy dob burure inok démasal, atin déménasal diyo dob Tuluse ségékélungonon.<sup>13</sup> Amun géfuwénén, ténabarén i de kuyugén, atin ménemili folo bra ruwo féndawét do Apostol, sani de sénugu.<sup>14</sup> Fénémilién i Simone (féndawétén so Pedro), brab Andrese dumo no sétiman idéng, brab Santiago, brab Juan, brab Filipi, brab Bartolome,<sup>15</sup> brab Mateo, brab Tomas, brab Santiagowe nga Alfeo, brab Simone ségétew toow fo gulaané noy ingéd ne,<sup>16</sup> brab Judase nga Santiago, brab Judas Iskariote beeney ménfékéfoe bé Jesuse.

### *Nuwa Jesusey de médoor étew*

<sup>17</sup> Atin léménudug i Jesuse beroy de Apostolén, brab téménindég dob sébaane gonon datar. Diyo soy médoowe do étew do kuyugén brab do étew tidéw Judea brab Jerusalem brab tidéw dob Tiro brab Sidon gédét dob dogote.<sup>18</sup> Ménangéy ro diyo inok mégélingo bé kékérén Jesuse brab féuwa bé de déruu ro. Atin nuwa Jesusey de démérueun brab de rénahukoy saitane, atin ménadi-adi ro.<sup>19</sup> Atin i kédoonoy de étew magafas ro inok gékuwaha ro, non i barakat ne ménusut tidéw dob Beene funay kéluhanane ménfiyo.

<sup>20</sup> Tidéw béno, ténéngténg Jesusey de kuyugén, atin ménbéréh mano, "Méoror gom do méskinan, non féguléwoy Tuluse begom.<sup>21</sup> Méoror gom do mélayahé beni, non fábésorén gom moso. Méoror gom do kémérew beni, non gébayat gom moso.

<sup>22</sup> "Méoror gom amuk wén i mérarék begom sabaf bé kéunur gome Begén. Brab méoror gom amuk wén i sémiyaw begom brab bérého ro begom tete fémalanén gom sabaf bé kéunur gome Begén, sani Nga i Kéilawane.<sup>23</sup> Féguyaya gom bé béno gai non i baras gome toow fo médoor diyo dob lawayo. Non loo so bé niy rénigoy de katufua tom bé de géyah sénarigoy Tuluse muret bé kékérén ne.

<sup>24</sup> "Endob mékégédaw-gédaw gom do kawasa, non énggétéy gomén i de funa kom máguyaya.<sup>25</sup> Mékégédaw-gédaw gom do bésor béléewe ni, non félayahé gom moso. Brab mékégédaw-gédaw gom do gébayat béléewe, non fábukuén brab fékérewén gom moso.

<sup>26</sup> "Mékégédaw-gédaw gom amuk kéluhanay de étew émbéréh do fiyo fantag bé begome, non loo bé niy kérigoy de katufua tom bé de géyah tugién do ubo-ubo sénarigoy Tuluse muret."

### *Fantag bé kégédawe*

<sup>27</sup> Atin féntaus Jesusey kétoro ne mano, "Endob béréhé ku begom, fégédaw gom bé de sébanil begom brab rigo gom i fiyowe dob de ménkérit begom.<sup>28</sup> Béréh gom i fiyowe dob de mingon begom brab dasala kom i de démufang begom.<sup>29</sup> Amuk wén i témamfiling bé fiféy me, fédayaém de témamfiling so bé ségébalae de. Brab buluk wén i mafas bé de kégal gom, iray gom soy kamisita gome.<sup>30</sup> I kéluhanay mongote dob begome, iraya kom. Brab i de médot bé de éntingayén kagom, kagom étukén de.<sup>31</sup> Brab buluy kétaya kome rigonéy de étew dob begome, rigo gom so dob berowe.

<sup>32</sup> “Amuk mégédaw gom bé de mégédaw begom saén, énda médait gom médot baras. Non fiyon foy de énda do métintu étew mégédaw ro so bé de mégédaw bero. <sup>33</sup> Brab amuk rémigo gom fiyo dob de rémigo fiyo dob begome saén énda médait gom médot baras. Non fiyon foy de énda métintu do étew rigoné roy loowe bé nan. <sup>34</sup> Atin amuk émféélét gom dob de wén fégébayadén de, énda médait gom médot baras. Non fiyon foy de tete étew émféutong ro so dob de dumo ro tete étew inok géséfule so kéluhanan. <sup>35</sup> Endob fégédaw gom bé de sébanil begom, brab rigo gom i fiyowe dob berowe. Atin féélét gom brab kagom ongot-ongotén i baliwa nuwe. Atin i baras gome dakél brab waléy gom do nga i Toowe Gérotor Tulus, non ségiléw gom bé Tuluse mégédaw bé de énda gétigan émfésalamat brab de tete étew. <sup>36</sup> Komon fégédaw gom loo bé kégédaw i Boh gome dob lawayo.

<sup>37</sup> “Kagom kémukum bé de dumo gom, inok i Tuluse énda so kukumé no begom. Atin i de dumo gom ménsala, kagom dusanén bero, inok énda so dusanéy Tuluse begom. Fésagada kom i de dumo gom atin mélaw fésagaday Tuluse begom. <sup>38</sup> Iray gom dob de dumo gom étew, atin irayay Tuluse begom. I kédooy iray gome ségiléw bé kédooy iray i Tuluse begom. Atin toow fo médooy iray i Tuluse taman gaba-gaba.”

<sup>39</sup> Brab ménbérél man i Jesuse sébaan binuwaya mano, “Fakay bay langaféné marak bé dumo nuwe so langafén? Békén ba mélawu ro dob kalute? <sup>40</sup> I méganade békén gérotor na bé témore de. Endob i ségetéwe étew amun énggégéganadén fo toow, ségiléwén bé témore de.

<sup>41</sup> “Sedek gito moy klohe sala i dumo muwe, éndob énda gito moy kaame sala toow na fo dakél? <sup>42</sup> Atin bérhé mo dob dumo muwe mamo, ‘Adih, téréno moy nan salaém.’ Endob wén i kaame sala toow na fo dakél. Fédayéw-dayéw go, éndob békén go fiyo étew. Téréno mo na métah i kaame sala toow na fo dakél, inok gétabanga moy dumo muwe témérén bé kaane kloh sala.”

### Fantag bé fiyowe brab tetee étew

<sup>43</sup> Féntaus Jesusey kékérél ne mano, “Enda i fiyo kayéw mégonok bé tetee onok, taloo no tete kayéw mégonok bé fiyowe onok. <sup>44</sup> I ségiyo-giyowe kayéw gélolon bé onok ne. Ufama, i sulu-suluwe énda mégonokén bé mangae. Brab i kayéwe suwaran énda mégonokén saging. <sup>45</sup> Ségiléw so bé étewe. I métintuwe étew rémigo fiyo, non tidéw dob fédéw ne fiyo. Atin i tetee étew rémigo tete, non tidéw dob fédéw ne tete. Non i bae émbérél bé atiy diyoe dob fédéwe.”

<sup>46</sup> “Sedek fédawété kom Begén ‘Kadnan’, éndob énda rigoné kom i de bérhé ku begom? <sup>47</sup> Atiy méuyote fégédét Begén brab mégélingo bé bérhé kuwe brab odoro noy de kétoro gu, fégétiga ku begom ké ati kélasi nuwe étew. <sup>48</sup> Beeney ségiléwe bé étewe réménigo lawi brab féntindégén i liléy ne dob émbagére batéw. Atin énggégumah i dunuke brab énggébela. Endob énda méntuwongén non féntindég dob rotor i batéwe. <sup>49</sup> Endob i étewe énggégélingo bé de kékérél gu éndob énda odoro no de, ségiléw bé étewe émfétindég lawi dob fantade énda i batéw féntindégo no bé de liléyén. Atin énggégumah i dunuke brab énggébela dob nan lawi. Atin méntuwong brab toow fo ménbinasa.”

### Nuwa Jesusey sugu-suguéy sundalowe

<sup>1</sup> Amun énggilidén i Jesuse témo de étew, ménagéw mangéy Kafernaum. <sup>2</sup> Atin diyo i ségetéwe Romano kafitay de sundalo. Wén i sugu-sugué nuwe démeruun gédétén méléhu. Toow fo mégédaw i kafitane de. <sup>3</sup> Mélaw amun énggelingoo noy fantage bé Jesuse, séménugu bé de dumo bé de odoroy de Judio mongot bé Jesuse témukaw damén dob lawi ne inok méuwa i sugu-sugué nuwe. <sup>4</sup> Amun ménangéy ro dob Jesuse, ménfégédaw-gédaw ro de maro, “I ni étew médait ké tabanga mo damén. <sup>5</sup> Non mégédaw betom do Judio, brab beeney ménférigowe bé lawi geye féngadafan dini.”

<sup>6</sup> Mélaw ménodor i Jesuse bero. Amun éndaén mérayuén dob lawie ni ayo ro, i kafitane ni sémenugu bé de dumo no malak bé Jesuse inok méréh de bé éndaén tausén, non énda médait kun i kafitane témanggaf bé Jesuse. <sup>7</sup> Fénbéréh i kafitane mano, “Toow go fo gérotor étew, atin mélaw énda métotororu malak Beem. Toow go fo barakatan, mélaw fiyon fo ké béréhé mo saén, ‘Adi-adi’, gétuwa kuy waléy adi-adiy sugu-sugué kuwe. <sup>8</sup> Gétuwa kuy ni non wén i mas gérotor sundalo sému gu begén. Brab wén soy do sundalo sugué ku. Atin buluk béréhé ku, ‘Angéy go diyoo’, mangéy diyo. Brab buluk maku, ‘Enggomén’, témingé ro. Brab buluk béréhé ku dob de sugu-sugué ku, ‘Rigo gom i ni’, rigoné ro.”

<sup>9</sup> Amun énggelingoo Jesusey ni, ménggaif de. Brab sémenling dob de étew furay dob Beene brab ménbéréh mano, “Béréhé ku begom, fiyon fo ké dob de Judio, énda i énggito gu kéfengintoow loo bé ni étew.”

<sup>10</sup> Tidew béno, amun ménséfule i de sénugu dob lawi i kafitane, énggito roy sugu-suguéne ni adi-adi néen.

### Ténébule Jesusey kénogo lagéye

<sup>11</sup> Enda mérugayén tidew béno, ménagéw i Jesuse dob ingéde féndawét Nain. Ménodor i de kuyugén brab médoowe do étew. <sup>12</sup> Atin amun ménggumah ro dob bengaway no ingéd, ménggabalaka roy de étew méntidew dob no ingéd. Ténanggung roy bangkaye, mangéy ro lémbéng. I bangkaye ni buntung nga lagéy i libune baléw. Wén i médoowe étew tidew dob no ingéd ménodor ro may lémbéng bé no kénogo lagéy. <sup>13</sup> Atin amun énggitoy Kadnane Jesus i baléwo no, ménuray i éna nuwe de. Atin ménbéréh mano, “Ina, kago kémérew.” <sup>14</sup> Atin ménangéy i Jesuse dob niroo nuwe. Tidew béno, kénuwahén atin méntétudoy i de ménuit de. Atin ménbéréh i Jesuse mano, “Adih, tek go!” <sup>15</sup> Sonom béno, méntek i kénogo lagéye brab ménbéréh. Atin niray Jesuse dob idéng ne.

<sup>16</sup> Toow fo ménggaif i de étew de diyo atin dénayéw roy Tuluse maro, “Ay niy toowe fo gérotor sarigoy Tuluse muret bé kékéréh ne, ménggumah dob betome. Ménlus i Tuluse mangéy dob begeye inok tabanga no begey do fénémilién.”

<sup>17</sup> Atin mélaw i urete fantag bé Jesuse ménlégéb dob Judea, brab dob de ségiyo-giyo ingéd géliwét de.

### I kéfenginsa Juan Bautistawe

<sup>18</sup> Brab i de kuyug Juan nuret ro dob beeney kéluhanay ni rénigo Jesuse. <sup>19</sup> Atin sénugu Juaney ruwowe bé de kuyugén mangéy ménginsa dob Jesuse maro, “Beeme bay no bénréh Juane gérumah ongot-ongoté key, taloo no fatut ongot-ongot gey na ségiyo?”

<sup>20</sup> Amun énggumahay de étew niy Jesuse, fénénginsaa ro maro, “Sénugu Juan Bautistawe begey mangéy ménginsa ké Beeme bay Kristowe bénréh Juane gérumah ongot-ongoté key, taloo no fatut ongot-ongot gey na ségiyo?”

<sup>21</sup> Bé béno so, fén-adi-adi Jesusey de médoor déruunan brab do rénahuko saitan, brab nuwaén soy médoowe do langafén inok gérito ro. <sup>22</sup> Atin sénumbulo Jesusey de sénugu Juan mano, “Séfule gom brab uret gom dob Juaney de énggito gom rénigo gu brab de énggelingoo kom. I de langafén énggégito, brab de fikat énggagéw, brab de bokongén énggégélingo, brab de fémuteén ménadi-adi, brab de ménléhu méntébule. Brab ureté key i Fiyowe Uret dob de méskinan. <sup>23</sup> Atin toow fo méoror i étewe énda ruwo-ruwoy kéfengintoow ne Begén.”

<sup>24</sup> Amun ménuleén i de kuyug Juan, ménbéréh i Jesuse dob de médoor étew fantag bé Juane mano, “Ati nangéy gome téneigténg dob gonone énda i étew de bat? Ségétew maak kéroon faniréy réfuruhé? Békén, non i kéunur Juane énda mélukén loo bé kéroone. <sup>25</sup> Aw ménangéy gom diyo inok téméngténg gom ségetéw étew toow fo fiyoy kégal ne? Békén, non i de étew kémégal ro fiyo brab do kawasa, énda bat ro dob de gonon énda i étew de bat. Yamula bat ro dob de toow fo fiyo lawi kay de datu. <sup>26</sup> Ati nangéy gome téneigténg? Ségétew étew sénarigoy Tuluse muret? Hoo, éndob béréhé ku begom, i Juane békén saén sénarigon muret bé kékéréh i Tuluse. <sup>27</sup> I Juane niy fantage

bé ni Ménsulat Kébéréh i Tuluse amun bénréh i Tuluse Begén mano, ‘Sugué kuy sugué kuwe métah Beem. Been i témafaye bé kégumah me métah Beem.’ ” <sup>28</sup> Atin fentaus Jesusey kébéréh ne mano, “Béréhé ku begom, énda i toow na fo gérотор бé Juane бé kéluhanay de étew ménumlah. Endob бé gaiy káféguléw i Tuluse бé de étewén, i kéluhanay de térfantad étew sakuf i Tuluse, toow ro na fo gérотор бé Juane béléewe ni.”

<sup>29</sup> Amun énggelingoo roy kébéréh Jesuse, i kéluhanay de étew fiyon foy de lémiful kémubra do buwis, énggélolo roy aguwoy Tuluse katabawan. Beroy de bénautiso Juan.

<sup>30</sup> Endob i de Fariseo brab de témoro бé kitabe, ménika ro rémigo бé kétayay Tuluse. Atin berowey de énda bénautis Juan.

<sup>31</sup> Atin ménbéréh i Jesuse man mano, “Ati féségiléwo kuwe бé de étew méuyag béléewe ni? Ati ségiléwo ruwe? <sup>32</sup> Ségiléw ro бé de nga ménasar dob fadiyane brab mika ro mégérémét. Tabar i de dumo ro bero maro, ‘I begeye ménsegagung gey, éndob énda ménsayaw gom. Brab léméninggéng gey linggéng ménléhuon, éndob énda kéménrew gom.’ <sup>33</sup> Non ménangéy diniy Juan Bautistawe ménfuwasa brab énda méninémén arak. Brab bénréh gom, ‘Sénaitanan.’ <sup>34</sup> Endob i Nga i Kélawane, sani Begéne, ménangéyu dini, brab mamau atin minému. Brab ménbéréh gom, ‘Ay niy ségétéwe étew arumén mama brab miném arak, brab wén i dumo no do lémiful kémubra buwis brab do tete étew.’ <sup>35</sup> Endob fégétigay Tulusey métintuwe dob kéluhanay de ngaén.”

### *I kégédaw i tetee libun*

<sup>36</sup> Atin wén i ségétéwe Fariseo, féndawét Simon, séménéngkat бé Jesuse mangéy dob lawi ne mama. Mélaw ménodor i Jesuse ménangéy diyo brab ménasar ro mama. <sup>37</sup> Brab wén i ségétéwe tete libun dob no ingéd. Amun énggétiga noy Jesuse ménangéy mama dob no lawi, ménangéy so diyo ménuwit katiya toow fo fiyo, ménfeno mamut nor balilaga. <sup>38</sup> Amun ménfégédét dob Jesuse, téménindég gédét dob de sékéyén kémérew. Atin i de énloén léménuyut dob de sékéy Jesus. Brab ténafo no бé buk ne brab narékén i de sékéyén. Brab lénulawa no бé mamute nor. <sup>39</sup> Amun énggito Simoney ni, ménbéréh dob fédew ne mano, “Buluk Jesusey ségétéwe sarigoy Tuluse muret бé kébéréh ne, gélolo no damén ké atiy ni libun mémiraw de, ségétéw libun tete.”

<sup>40</sup> Endob ménbéréh i Jesuse mano, “Simon, wén i béréhé kuwe Beem.”

Séménumbul i Simone mano, “Maistéro, béréhém begén.”

<sup>41</sup> Atin bénréh Jesusey ni binuwaya mano, “Wén i ruwowe étew énggéutong dob ségétéwe émféélét kurta. I ségétéwe de énggéutong limo ratuh, brab i ségétéwe de limo folo saén. <sup>42</sup> Amun énda i fégébayad ro de, fénsgada no bero, inok éndaén kailanga roy mayade. Na fénginsaa ku beem, ati isuwe toow na fo méimu бé étewe ni ménféutong bero?”

<sup>43</sup> Séménumbul i Simone mano, “Karangé ku, i toowe de méimu, been i énggéutonge médoo.”

Atin bang Jesuse, “Katabawan i nan sumbulém.” <sup>44</sup> Tidew бéno, séménling i Jesuse dob libune ni, brab ménbéréh man dob Simone mano, “Enggito moy rénígoy ni libun? Ménahuru dob lawi me, éndob énda méniray go wayéng fégéurah gu бé de sékéy gu, loo бé adat tome do Judio fatut rigoné mo damén. Endob i ni libun fénreén i de sékéy gu бé de énloén, brab ténafo no бé buk ne. <sup>45</sup> I beeme, énda narékém Begén loo бé adat tome témayakuf бé de kana. Endob i ni libun, tidew fanay kégumah gu, énda téménréno marék бé de sékéy gu. <sup>46</sup> Enda so lénulawa moy uléw guwe nor. Endob i ni libun, lénulaw noy sékéy guwe бé mamute nor. <sup>47</sup> Mélaw béréhé ku beem, giton i dakéle kímuén non i de médoo do salaén ménfésagadén. Endob i étewe kloh saén fénsgadan, kloh soy kímu ne.”

<sup>48</sup> Atin bénréhén бé libune ni mano, “Di, i kéluhanay de salaém fénsgadanén.”

<sup>49</sup> Atin i de étew bero ménama diyo ménésbéréh-béréh i de fédew ro maro, “Ati keeyén i ni étew gáfésagad do sala?”

<sup>50</sup> Atin bénréh Jesuse man dob libune ni mano, “I kénéfingintoow mey funay Tuluse ménukas beem. Taus go mule, atin kago émbuku.”

## 8

<sup>1</sup> Brab énda ménrugayén tidéw béno, ménangéy i Jesuse dob de ségiyo-giyo ingéd ménuret bé Fiyowe Uret fantag bé kénéfugléw i Tuluse bé de étewén. Brab ménodor i de folo bra ruwo kuyugén. <sup>2</sup> Ménodor soy de libun fén-adi-adi no rénahukoy de saitan brab do démeruun. Ségétew beroy Mariahe tidéw Magdala, dob beeney méntékédan i fitéwe timan saitan. <sup>3</sup> Ménodor soy Juanawe bawag Kusawe sénarigo Datu Herode, brab Susanawe, brab médoor na do dumo libun. I ni do libun, téma bang ro miray bé de kailanga ro Jesus.

*I binuwayae fantag bé sémabuge*

<sup>4</sup> Wén i no sébaan fuweh, wén i médoowe étew tidéw dob ségiyo-giyowe ingéd ménangéy ro dob Jesuse mégélingo. Amun médoor ro ménslimud, nuret Jesusey ni binuwaya mano, <sup>5</sup> “Wén i ségétewe étew ménangéy sémabug bé béne ne. Amun sabugé noy béne ne, i de dumo bé béne ne ménbégodoy dob doror i aguwone. Diyo gédaay de étew taloo no nama i de kloh manok. <sup>6</sup> I de dumoy de béneén ménslawér dob fantade wén i do batéw de. Tidéw béno, amun ménanayén témunoh, ménlaay ro non tikar i fantade de. <sup>7</sup> I de dumoy de béneén ménslawér dob fantade wén i do suwar de énda séna témunoh ro. Ménruk mélaw i de suwar séréngean bé de nohok, atin ménléhu i de nohok non lénimfung i de suwar. <sup>8</sup> Endob i de dumoy de béne ménslawér dob fiyowe fantad, brab téménunoh ro brab ménngonok ro médoor taman mératu takéf sénga sébaan béne.” Atin féntaus Jesusey kékérél ne mano, “Fégitung gom fantag bé ni bénréh gu begom amuk méuyot gom de ké gésobuto kom.”

<sup>9</sup> Tidéw béno, fénenginsaay de kuyugén ké ati atag i nan binuwaya. <sup>10</sup> Sénumbulo no bero mano, “Dob begome do kuyug gu, Tuluse i émfégétigane de begom fantag bé kénéfugléw ne bé de étewén. Endob i de ni éntingayén ménbunéy, brab énda émfayagén dob ségiyowe. Enggélingoo ro say de ni fén-agéw dob de binuwaya, inok fiyon fo ké téngténgé ro, énda gito ro de. Brab fiyon fo ké gélingoo ro, énda gésobuto ro de.

<sup>11</sup> “Ay niy atag i ni binuwaya éngélingoo kom. I atag i ni béne, been i kékérél i Tuluse. Atin i ségiyo-giyowe klasi fantad ségiléw bé de ségiyo-giyo klasi étew. <sup>12</sup> I de dumoy de béne ménlawu dob doror i aguwone. I atag i ni, wén i de étew éngélingoo roy kékérél i Tuluse, éndob énggégumah i odoroy de saitan brab kenda noy ni kékérél dob de fédéw ro. Been i nan i funa ruwe énda sémarig ro bé Tuluse. Brab énda mélaw gédoté roy mantuwe umul. <sup>13</sup> I dumoy de béne ménslawér dob fantade, wén i do batéw de. I atag i ni, wén i de étew éngélingoo roy kékérél i Tuluse brab tényakuf ro brab ménoror ro de. Endob énda ménbatiéen dob fédéw ruwe. Sémarig ro bé Tuluse singkow saén. Endob buluk kérégénan ron, éndaén sémarig ro bé Tuluse. <sup>14</sup> I dumoy de béne ménslawér ro dob de duwaléy suwar. I atag i ni, wén i de étew éngélingoo roy kékérél i Tuluse, éndob sabaf bé de kékuku ro fantag bé de kékuyag ro, brab kékuyot ruwe waléy kawasa, brab de kékuyot ro ménugaya, been i noy funa ruwe énda gérigo ro bé fatute kétayay Tuluse rigoné ro. <sup>15</sup> Atin i de dumoy de béne ménslawér ro dob fiyowe fantad. I atag i ni, wén i de étew éngélingoo roy kékérél i Tuluse, brab toow fo nunuro ro. Féntaus roy késarig ruwe bé Tuluse atin rigoné roy kétayay Tuluse rigoné ro.”

<sup>16</sup> Atin ménbérél man i Jesuse mano, “Enda i téumon solo inok bunéyé no dob bukag i kuréngé fénléngkéb, taloo no fédiyoé no dob fantad i katriwe. Yamula fédiyoé no dob fégongone de inok atiy mahure gito noy réndaw ne. <sup>17</sup> I kéléuhanay bénunéye, giton moso. Brab i kéléuhanay dirungéne, gétigan moso. Mélaw atiy éndae gésobuto kom béri, gésobuto kom moso.

<sup>18</sup> “Komon féfiyo gom i kénéfugléingoo gome. Non i étewe mégélingo brab munur, ménuman nay kégésobut ne de. Endob i étewe énda munur, fiyon foy klohe fégitungé no gésobuto no, dotén dob beene.”

<sup>19</sup> Tidéw béno, ménangéy dob Jesusey idéng ne brab de tuwaréyén, éndob énda gégédét ro non bé médoowe étew géliwét de. <sup>20</sup> Brab wén i ménbérhéhe dob Jesuse mano, “I idéng me brab de tuwaréyém diyo ro dob liyuwe. Méuyot ro géségito Beem.”

<sup>21</sup> Endob séménumbul i Jesuse mano, “Wén i ségiyo idéng gu brab do tuwaréy gu, non bé kéluhanay étewe mégélingo bé de uret i Tuluse brab munur de, beroy de maak idéng gu brab do tuwaréy gu.”

### Féntéré Jesusey défuke

<sup>22</sup> Sébaane de fuweh, ménda i Jesuse awang beroy de kuyugén atin bénréhén bero mano, “Mifar tom.” Mélaw ménangéy ro dob dogote ni. <sup>23</sup> Amun diyo ro dob kérarae, énggfidong i Jesuse. Atin amun énggfidong, énggumah i émbagére défuk. Atin ménahuron wayég i awange, brab toow fo ménkakaidan ro. <sup>24</sup> Tidéw béno, téningé i de kuyugén i Jesuse atin nulég ro maro, “Kadnan, gédét tomén mééléd.” Mémentek i Jesuse brab nélénoy défuke atin féntanékén i de bagél. Tidéw béno, ménlingén-ngén. <sup>25</sup> Atin ménbérhéh i Jesuse dob de kuyugén mano, “Hon i kéfengintoow gome de?”

Atin éngkéségyonan ro brab mégilak ro. Brab ménsébéréh-béréh ro maro, “Ati ni étew Jesus? Fiyon i défuke brab de bagél géfétérén no.”

### Dénédél Jesusey de saitan

<sup>26</sup> Mélaw méntaus ro mifar démunggu mangéy dob fantade Geraseno, dob difar i Galileawe. <sup>27</sup> Amun téménéfad i Jesuse, bénalak i étewe rénahukoy de saitan tidéw dob sébaane ingéd diyo. I ni étew énda batien dob lawie, éndob ménrugayén félawas diyo batie dob de takub do lébeng. <sup>28-29</sup> Médoor gule i ni étew géméndam fiyon fo ké férisonén brab ikétén bé sangkaliey de sékéyén brab de kémérén. Been so ménséfantud brab uwitéy de saitan mangéy dob gonone énda i étew de. Amun énggito noy Jesuse, ménkes toow fo métanug, brab méntéléngkéb dob téngaanga Jesuse brab ménbéréh toow fo métanug mano, “Jesus, Nga i toowe fo gérotor Tulus, fégédaw-gédawu Beem. Kago fédawéton begén.” Bénréhén i no non féngganaya Jesusey démédéle bé de saitan réménahukon de.

<sup>30</sup> Fénénginsaa Jesuse mano, “Ati dawét me?”

Atin séménumbul mano, “Laskaén i dawét guwe.” Non toow fo médooy de saitan ménahur dob beene. <sup>31</sup> Tidéw béno, ménfégédaw-gédaw i de saitan bé Jesuse békén damén dédélé no bero mangéy dob emfernoue.

<sup>32</sup> Enda mérayuén dob no gonon, diyo i médoowe do babuy tétabtab dob méngalandige. Nongot i de saitan bé Jesuse ké fakay mahur ro dob de babuy. Atin ténungkas Jesuse bero. <sup>33</sup> Sonom béno, i de saitan ménut ro dob étewe brab ménahur ro dob de babuy ni. Atin i kéluhanay de babuy ni, ménraréy ro ménangéy dob fingase brab ménantéfor ro ménangéy dob dogote, atin ménléne ro.

<sup>34</sup> I de étew témalima bé de babuy ni, amun énggito roy ni ménrigo, ménsgéta ro brab nuret roy ni dob de dakél ingéd brab dob de ségiyo ingéd géliwét. <sup>35</sup> Mélaw ménangéy diyo i de étew inok susiné roy ni ménrigo. Ménfégédét ro dob Jesuse brab énggito roy étewe bé gétaho félawas sénaitanan, ménstar gédét dob sékéy Jesuse wénén i kégalén, brab métintunén. Atin kéluhana ro mégilak ro de. <sup>36</sup> Nuret i kéluhanay de énggégito de ké ati kéuwa Jesuse bé étewe ni gétaho sénaitanan. <sup>37</sup> Tidéw béno, i kéluhanay de étew tidéw dob ingéde Geraseno, nongot roy Jesuse tékédan, non toow ro fo mégilak. Mélaw, ménda i Jesuse dob awange, atin méntékédan. <sup>38</sup> I ségetéwe ni étew ténkédanay de saitan, nongotén bé Jesuse mano, “Modoru Beem.”

Endob bénréh Jesuse de mano, <sup>39</sup> “Ule go brab uretém i fiyowe rénigoy Tuluse dob beeme.” Mélaw ménule brab ménsgud-sugud dob kéluhanay gonone dob ni ingéd brab nureténi i kéluhanay rénigo Jesuse dob beene.

### Nuwa Jesusey ruwowe gétew libun

<sup>40</sup> Amun ménsefule i Jesuse mifar, toow fo méoror i de étew de, non ongot-ongoté ro diyo. <sup>41</sup> Brab diyo wén i ségetéwe étew fédawéten Jairo, ségetéw sarigon dob lawie fénagafan kay de Judío. Méntéléngkéb dob adafa Jesuse bé ongoté noy mangéy i Jesuse

dob lawi ne. <sup>42</sup> Non i buntunge ngaén libun folo bra ruwo gébélintuwa, gédétén méléhu. Mélaw ménagéw i Jesuse modor de.

Amun magéw i Jesuse sénribukoy de médoó étew. <sup>43</sup> Diyo soy ségétewe libun kéfasangan non foloén bra ruwo gébélintuwa i kéranas i adat ne. Brab méntéy i kurta ne féngébayadén bé de doktor, éndob énda foy ségétew géuwa de. <sup>44</sup> Tidéw béno, ménfégédét dob ségang Jesuse, atin kénuwahén i kégal ne. Sonom béno, téménréni i kéranas i adat ne. <sup>45</sup> Tidéw béno, ménénginsa i Jesuse mano, “Ati kéménuwahe Begén?”

Endob ménngidih i kéluhanane. Atin ménbéréh i Pedrowe mano, “Maistéro, toow fo médooy étewé géliwét Beem, brab sédantélo ro Beem.”

<sup>46</sup> Endob ménbéréh man i Jesuse mano, “Wén i kéménuwah Begén, non énggétérédama kuy barakat guwe ménsut tidéw dob Begéne.” <sup>47</sup> Amun énggétigay libune ni énggétiga Jesuse, ménfégédét lémukub atin méntélengkéb dob adafa Jesuse brab dob téngaangay médoowe étew, brab bénréhén dob Jesuse sedek kénuwahén, brab bé béno so méntékow adi-adi. <sup>48</sup> Tidéw béno, bénréh Jesuse de mano, “Di, i kíféngintoow mey funa muwe ménadi-adi. Taus go ule, brab kagonén émbuku.”

<sup>49</sup> Amun bérhé Jesusey ni, énggégumah i sugu-sugué Jairowe. Ménbéréh mano, “Amu, déménigurén i nga me. Endaén kailanga no anggaén i Maistérowa nan.”

<sup>50</sup> Endob amun énggelingoo Jesusey ni, bénréhén dob Jairowe ni mano, “Kago émbuku. Sarig go saén atin adi-adiy nga me.”

<sup>51</sup> Amun énggégumah i ro Jesuse dob lawi Jairowe, énda i nuwitén mahur taus saliyu bé Pedrowe, brab Juane, brab Santiagowe, brab de lukés i ngae ni. <sup>52</sup> Atin i kéluhanay de étew ni dob lawie ni kémérew so brab ruungé roy ngae ni. Ménbéréh i Jesuse mano, “Kagom kémérew. Non i ngae ni énda ménléhuén, éndob ménfidong saén.”

<sup>53</sup> Tidéw béno, sénbayat ro saén i Jesuse non gétiga roy ngae ni ménléhuén. <sup>54</sup> Endob génamak Jesusey kémér i ngae ni brab téabarén mano, “Di, tek go!” <sup>55</sup> Sonom béno, i ngae ni méntébule brab tékow méntek. Atin sénugu Jesuse bero bé iraya ro amaé no.

<sup>56</sup> Toow fo ménggaif i de lukés i ngae ni. Endob bénréh Jesuse bero bé békén ureté ro dob de étew i ni ménrigo.

## 9

### *Sénugu Jesusey de folo bra ruwo kuyugén*

<sup>1</sup> Fénsélimud Jesusey de folo bra ruwo kuyugén. Atin niraya no bero barakat inok géuwa roy de démeruun brab géféraréyo roy de saitan. <sup>2</sup> Brab sénugu Jesuse bero muret fantag bé kíféguléw i Tuluse bé de étewén, brab muwa bé de démeruun. <sup>3</sup> Atin bénréhén bero mano, “Kagom muwit éntingayén, fiyon fo ké tugé, taloo no réban, fiyon amaén, brab kurta, taloo no lékasa kom kégal. <sup>4</sup> Fiyon atiy lawie témayakuf begom, batí gom diyo taman tagaké kom i nan ingéd. <sup>5</sup> Buluk wén no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero.”

<sup>6</sup> Tidéw béno, ménagéw i de kuyugén ni ménangéy dob de ségiyo-giyo ingéd muret bé Fiyowe Uret, brab muwa ro do démeruun diyo.

<sup>7</sup> Bé béno, i Herode, sani méguléwe dob Galilea, énggelingoo noy de rigoné Jesuse. Toow fo ménggaif brab énda gésobuto no de, non wén i do étew ménbéréh ro bé Juan Bautistawe méntébule non maro ké Juan i Jesuse. <sup>8</sup> Brab i de dumo bérhéhe roy Jesuse Elias ménteférito. Brab i de dumo bérhéhe roy Jesusey toowe fo énggétah sénarigoy Tuluse muret méntébule. <sup>9</sup> Endob ménbéréh i Herode mano, “Fénkéléng guy uléw Juane. Endob ati ni gélingoo ku fantag bé de ni?” Méuyot de ké gito noy Jesuse.

### *Fénwaléy Jesuse médooy klohe amaén.*

<sup>10</sup> Amun énggéséfule i de apostol Jesus, bénréh roy de rénigo ro. Tidéw béno, nuwitén bero saén mangéy dob sébaane ingéd féndawét Betsaida. <sup>11</sup> Médooy de étew énggégélingo fantag bé ni brab ménfuray ro bero. Méoror i Jesuse bé kégito nuwe bero,

brab nureté beroy fantage bé kékéfugléw i Tuluse bé de étewén. Fén-adi-adi né soy de déméruruun bero.

<sup>12</sup> Amun sémingkufén, i de folo bra ruwo gétew kuyug Jesuse ménangéy ro dob Beene brab ménbéréd ro maro, “Enda i batioy de étew ni dini. Féagéwém bero inok mangéy ro dob de ingéd gédét dini. Diyo gébéléy ro amaé ro brab diyo ro so fidong.”

<sup>13</sup> Endob ménbéréd i Jesuse dob de kuyugén mano, “Iraya kom bero amaé ro.”

Endob séménumbul ro maro, “Enda i amaén dini saliyu bé limowe timan fan brab ruwo timan sédo. Hon i ayo tome de mélény amaén bé ni kédoor étew?” <sup>14</sup> (Wén i limo ngibu do lagéy diyo.)

Atin bénréh Jesuse bé de kuyugén mano, “Féésar gom i de étew sélimo folo sénga sélumfuk.”

<sup>15</sup> Atin nodoroy de kuyugén i bénréh Jesuse bero. <sup>16</sup> Tidew bénó, éndot Jesusey limowe timan fan brab ruwowe timan sédo, atin léménengag dob lawayo brab ménfésalamat dob Tuluse. Tidew bénó, sénbaad-baadén i de fan brab de sédo, brab nirayén dob de kuyugén inok saaré ro dob de étew. <sup>17</sup> I kéluhanay de étew ménama ro médoor taman ménbésor ro. Tidew bénó, ténimu i de kuyug Jesusey de sama i de amaén brab ménféno i foloe bra ruwo timan dakél biton.

#### *I kénéunur Pedrowe*

<sup>18</sup> Wén i no, i Jesuse ségétewén saén démasal ménfélébu. Brab i de kuyugén ménangéy ro dob Beene. Atin fénenginsaa Jesuse bero mano, “Ati kékébéréd i de médoor étew ké ati Begéne ni?”

<sup>19</sup> Séménumbul ro maro, “Wén i de émbéréd maro, Juan Bautista go kun. I de dumo maro, Elias go kun. Brab i de dumo maro, Beemey énggétahe sénarigoy Tuluse kun méntébule.”

<sup>20</sup> Tidew bénó, ménenginsa i Jesuse man mano, “Dob begome, ati kékébéréd gome ‘fantag bé Begéne?’”

I Pedrowe séménumbul mano, “Beemey Kristowe sénugu i Tuluse inok méguléw go bé de étew.”

<sup>21</sup> Atin bénréh Jesuse bero mano, “Kagom bérédén i ni dob ségiyowe.”

#### *I kénéuret Jesuse fantag bé kéléhu ne*

<sup>22</sup> Atin féntaus Jesusey kékébéréd ne mano, “I Nga i Kéilawane, sani Begéne, médooy rasayé kuwe. Brab ikaay de odoroy de Judio brab de odoroy de fadi brab de témoor bé kitabe, brab féléhué ro Begén. Endob dob gétéléwo nuwe gétérésangan, tébuleu.”

<sup>23</sup> Atin ménbéréd man i Jesuse mano, “Buluk atiy méuyote furay Begén, kailangan diguré noy kaane kétayan inok odoro noy kétayay Tuluse. Tidew bénó, kailanga no fédayday bé de kérégénon ségiléw bé Begéne, fiyon fo ké féléhuén dob kruse. <sup>24</sup> Non atiy méuyote émféraru bé kúuyag ne, méléhu. Endob i méléhue bé kékfuray ne Begén, gédoté noy umule magufusa. <sup>25</sup> Ufama, fiyon fo ké i ségétewé étew gédoté noy kéluhanay étingayéne dob duniyae ni, énda i atagén buluk méléhu atin mangéy dob emfernouw. <sup>26</sup> Buluk atiy mémalawé muret fantag bé kénéunur ne Begén, brab mémala so fantag bé de kékébéréd gu, malané ku so buluk séfuleu moso réméndawu brab réméndaw i Boh guwe brab de téaki no. <sup>27</sup> Bérédé ku begom i toowe, wén i do dumo begom énda méléhu ro taman gérito bé kékéfugléw i Tuluse bé de étewén.”

#### *Enggiton i réndaw Jesuse.*

<sup>28</sup> Waléw gétérésangan tidew bé kékébéréd Jesuse bé de ni, nuvitén i Pedrowe, brab Juane, brab Santigowe, atin ménangéy ro dob rotor i tuduke démasal. <sup>29</sup> I lala Jesuse démasal, i falas ne ménfégalin, brab i kégal ne ménwaléy fute réméndaw. <sup>30</sup> Sonom bénó, méntékow méntéfégítøy ruwowe gétew lagéy ménsebéréd bé Jesuse. I ni do étew, been i Moisese brab Eliase, sani do méntéletaén sénarigoy Tuluse muret bé kékébéréd ne.

<sup>31</sup> Réméndaw soy de falas ro. Atin sébéréd-béréd ro bé Jesuse fantag bé kéléhu ne dob Jerusalem moso sabaf been i funay Tuluse séménugu de dob duniyae. <sup>32</sup> I Pedrowe brab

dumo nuwe énggfidong. Endob amun énggétékáral ro, énggito roy kérédaw Jesuse brab de ruwo gétew dumo no téménindég. <sup>33</sup> Amun féganayén tagak i de ruwo gétew étew i Jesuse, sénbérého Pedrowe mano, “Maistéro, toow fo fiyo non dob ni tom. Rémi go gey téléléw timan dung-dung. Sébaan i kaame de, sébaan i ka Moisese de, brab sébaan i ka Eliase de.” (Enda gétiga noy bérhé nuwe ni.)

<sup>34</sup> Amun émbéréh sénay Pedrowe, méntékor i rawéne méntégalung dob berowe. Brab ménggilak i de kuyugén ké météléb ro bé rawéne. <sup>35</sup> Atin wén i bérhéhe tidew dob rawéne ni mano, “Been i niy Nga guwe fénemili gu. Fégélingo gom.”

<sup>36</sup> Amun téménrén i bérhéhe ni, énggito roy sébaa Jesuse saén. I de kuyugén méntanék ro fantag bé ni, brab bé beno énda i ségétew nureto ro bé de énggito ro.

<sup>37</sup> Bé sébaane de fuweh, léménudug ro tidew dob tuduke, atin bénalak i médoowe étew i Jesuse. <sup>38</sup> Wén i ségétewe lagéy dob kérara ruwe téménabar mano, “Maistéro, téngténgém i nga guwe. Been i buntunge nga gu lagéy. Ongoté ku dob Beeme uwaé mo damén. <sup>39</sup> Wén i no rahukoy saitane, atin tékow gékes. Atin i lowoh ne témingkog brab rémbew i ba ne. Sénga téklid gémédam, fédawéto no, brab mérugay na fo tékédanay saitane. <sup>40</sup> Nongot gu bé de kuyugém ké féraréyé roy saitane, éndob énda gagané ro de.”

<sup>41</sup> Ménbéréh i Jesuse dob de ménlimud mano, “Enda sémarig gom bé Tuluse, brab toow gom do tete étew. Lugoténun sétafik begom. Enda gétiga ku ké ati nay kérugay i kétinkél guwe sétafik begom.” Atin bénréh Jesuse dob ni lagéy mano, “Uwitém diniy nga ma nan.”

<sup>42</sup> Amun fégédét i ngae ni dob Jesuse, rénahukoy saitane man brab méntuwar fuladfulad. Tidew beno téméningkog man. Atin fénféraréy Jesusey saitane, brab i ngae ni ménadi-adi. Tidew beno, fénséfule Jesuse man mangéy dob boh ne. <sup>43</sup> Ménggaif i kéluhanay de étew bé barakat i Tuluse. Atin amun kéluhanay de étew ménggaif ro bé no rénigo Jesuse, ménbéréh dob de kuyugén mano, <sup>44</sup> “Kagom lifotén i bérhéhe kuwe ni begom. I Nga i Kéilawane, sani Begéne, fékéfo séko bé de étew sébanil Begén.” <sup>45</sup> Endob bé beno gai, i de kuyugén énda énggésobuto roy bérhéhe nuwe. Bénunéyén bero inok énda gétiga roy atag ne. Atin mémala ro de ménginsa ké ati atag ne.

<sup>46</sup> Wén i no sébaan fuweh, ménséédél i de kuyugén ké ati isuwe bero toow gérotor. <sup>47</sup> Enggésobuto Jesuse ké atiy diyoe dob itunga ruwe. Mélaw éndotén i ségétewe nga atin fentindégén dob tébing ne. <sup>48</sup> Atin bénréhén bero mano, “Fiyon atiy étewe témayakuf bé ngae loo bé ni sabaf bé kénur ne Begén, tayakufé no so Begén. Brab atiy témayakufé Begén, tayakufé no soy Tuluse ménfécuit Begén. Non atiy toowe térifantad bé begome, beeney toowe gérotor.”

<sup>49</sup> Tidew beno, ménbéréh i Juane mano, “Maistéro, énggito gey i ségétewe étew démédél do saitan nusarén i dawéti me fégéferaréyén. Endob génlé gey non békén dumo tom.”

<sup>50</sup> Bang Jesuse, “Kagom géléén de. Non i békéne sébanil betom, dumo tom.”

### I kéagéw Jesus mangéy Jerusalem

<sup>51</sup> Amun gédétén i Jesuse démiyat dob lawayo, bénabaén fo ménsaréw mangéy Jerusalem. <sup>52</sup> Mémentah i Jesuse séménugu bé de kuyugén mangéy dob sébaane ingéd dob sakuf i Samariawe inok tafaya ro gono no diyo. <sup>53</sup> Endob i de étew diyo dob Samaria, énda témayakuf ro de non gétiga ro ségétew Judio mangéy Jerusalem. <sup>54</sup> I Santiagowe brab Juane, amun énggito roy ni, ménbéréh ro maro, “Kadnan, méuyot go de ké mongot gey aféy tidew dob lawayo inok métuwég ro?”

<sup>55</sup> Endob séménling i Jesuse atin génléén bero. <sup>56</sup> Tidew beno, méntaus ro mangéy dob ségiyowe gonon.

<sup>57</sup> Amun taus ro nén, i ségétewe étew ménsébéréh bé Jesuse mano, “Modoru Beem, fiyon fo ké ati ayo muwe de.”

<sup>58</sup> Séménumbul i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén. Mélaw toow go fo kérégénan amuk modor go Begén.”

<sup>59</sup> Atin bénréhén dob ségiyowe étew mano, “Furay go Begén.”

Endob séménumbul i ni étew mano, “Kadnan, tungkasém na begén métah mangéy lémbéng bé boh guwe.”

<sup>60</sup> Séménumbul i Jesuse mano, “Félébéngém bé de étew énda munur ro Begén i de ménléhu ro. Endob i beeme, agéw go mangéy muret fantag bé kéguléw i Tuluse bé de étewén.”

<sup>61</sup> Wén man i ségiyowe étew ménbérélh mano, “Kadnan, modoru Beem. Endob tungkasénu na mangéy mégétaw dob de lukés gu.”

<sup>62</sup> Séménumbul i Jesuse mano, “Enda i ségétew étew démadu atin sémeling. Loo so bé de kuyug gu. Buluk sémeling ro, énda métotoror ro ké féguléwoy Tuluse bero.”

## 10

### Sénugu Jesusey de étew

<sup>1</sup> Tidéw béo, ménémili i Jesuse fitéw folo bra ruwo gétew do lagéy. Atin sénuguén bero séruwo-ruwo métah dob de ingéd ayo no so. <sup>2</sup> Atin bénréhén bero mano, “Wén i médo do étew méuyot munur bé Fiyowe Uret. Ségiléw ro bé de buka kétéwén. Endob kloh saén i begome do kémétew. Dasal gom dob Kadnane inok émféuwit médo na do kémétew dob kaane ni kétéwén. <sup>3</sup> Amuk magéw gom, ingat gom. Non féuwit gu begom maak do bili-bili mangéy dob kérara i de itu talun. <sup>4</sup> Kagom muwit réban, taloo no talufi, taloo no ségiyo sinilas. Brab kagom mérugay séuret-uret bé atiy étewe gébalaka kom dob de aguwon. <sup>5</sup> Buluk mahur gom dob de lawi, bérélh gom féfiyonéy Tulusey de étew bati dob ni lawi. <sup>6</sup> Buluk i de étew dob no bati fiyo, brab tayakufé ro begom do sénugu gu, féfiyonéy Tuluse bero. Endob buluk énda fiyo ro étew, brab énda tayakufé ro begom do sénugu gu, énda so féfiyonéy Tuluse bero. <sup>7</sup> Bati gom dob no lawi témayakuf begom. Atiy amaéne brab inéméne iray ro begom, tanggaf gom. Non i begome do gémalbék kailanga kom i sukay gome. Brab kagom téfégalin tidéw dob sébaane lawi mangéy dob sébaane de. <sup>8</sup> Buluk mahur gom dob sébaane ingéd, brab témayakuf ro begom, ama gom i étingayéne iray ro begom. <sup>9</sup> Uwa gom i de démeruun dob no ingéd brab bérélh gom dob de étew diyo makom, ‘Endaén mérugayén taman bé gaiwe féguléwoy Tuluse begom.’ <sup>10</sup> Endob buluk mangéy gom dob sébaane ingéd brab énda tayakufé ro begom, angéy gom dob de aguwon dob no ingéd brab bérélh gom makom, <sup>11</sup> ‘Fiyon foy de bubuk sébuwan dob de sékéy gey, tag-tagé key so inok gétuwa kom i kukuméy Tuluse begom non nuret gey dob begomey fantage bé kéguléw i Tuluse éndob mika gom de.’ <sup>12</sup> Atin béréhé ku begom, bé no gai, toow na fo gétimal i kékukum i Tuluse bé de étew dob no ingéd bé kékukum ne bé de tete étew dob ingéde Sodom.

<sup>13</sup> “Mékégédaw-gédaw gom do étew bati dob Korasin, brab begome dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén i de étew diyo mésar ro brab kéménégal ro do saku brab rénigono ro do awéw i de lowoh ro inok fégétuwa ro énggésénule ro bé de sala ro. <sup>14</sup> Endob toow na fo gétimal i kékukum i Tuluse begom moso bé kékukum ne bé de étew dob Tiro brab Sidon. <sup>15</sup> Brab i begome do étew dob Kafernaum, méuyot gom téfégérotor taman dob lawayo. Endob ibérén gom mangéy dob uleone emferno.”

<sup>16</sup> Tidéw béo, bénréh Jesuse dob de kuyugén mano, “Atiy mégélingoe begom, fégélingoé no so Begén. Brab atiy mikae begom, mika so Begén. Brab atiy mikae Begén, mika so bé Ménféuwise Begén.”

<sup>17</sup> Tidéw béo, i fitéwe folo bra ruwo gétew ménagéw ro mangéy muret dob de ségiyoyi ingéd. Atin ménsefule ro toow fo moror brab ménbérélh ro maro, “Kadnan, fiyon foy de saitan odoro roy de béréhé key buluk labité key i dawét me.”

<sup>18</sup> Atin bénréh Jesuse bero mano, “Enggitoy guy Satanase ménlawu tidew dob lawayo maak kilot. <sup>19</sup> Niraya ku begom barakat inok fiyon fo ké gédaa kom i de ulé brab do sifitan, énda i kaid gom de. Brab i kéluhanay barakat Satanase sébanil betom énda i kaid tom de. <sup>20</sup> Endob kagom méoror sabaf sa bé i de saitan unuro ro begom. Yamula oror gom sabaf ménsluatén i de dawét gom dob lawayo.”

<sup>21</sup> Bé bénor so, fénoror i Rémogor i Tulusey Jesuse. Déménasal mano, “Abay Kadnay lawayo brab fantade, fésalamata ku Beem non fénggétiga moy ni dob de étew énda i féngganad ro, éndob bénuneyém dob de métiledtéd brab énggégéganad. Hoo Abay, ménrigoy ni non kaam kétayan brab késuwatan.”

<sup>22</sup> Tidew bénor, ménbérh man i Jesuse dob de étew mano, “Sénarig i Abaye Begén i kéluhanane. Enda i gétigan bé atiy Ngae saliyu bé Abaye. Brab énda i gétigan bé atiy Abaye saliyu bé Ngae, brab fiyon atiy kétayay Ngae fégétigan no de.”

<sup>23</sup> Tidew bénor, sémenling i Jesuse dob de kuyugén ménsebérh bero énda i ségiyo dumo ro mano, “Toow fo fénfiyoy Tuluse begom bé énggégito gom. <sup>24</sup> Béréhé ku begom, dob gétaho médoo do datu brab do sénarigon muret bé kékérh i Tuluse ménuyot ké gito roy énggito gome, éndob énda énggito ro de. Brab ménuyot ro mégélingo bé énggelingoo kome, éndob énda énggelingoo ro de.”

### *I binuwayaé fantag bé ménédawé étew*

<sup>25</sup> Wén i no sébaan fuweh, i ségétéwe témore bénoréh bero énda i ségiyo dumo ro mano, “Maistéro, ati fatute rigoné ku inok gédoté kuy toowe umul magufusa?”

<sup>26</sup> Sémenumbul i Jesuse mano, “Ati énggito muwe dob Ménslate Kékérh i Tuluse? Ati kégésobut me de?”

<sup>27</sup> Sémenumbul i ni lagéy mano, “Féimu go bé Kadnane Tulusém bénoréh bero énda i ségiyo dumo ro mano, “Katabawan i nan késumbulém. Rigo moy ni inok gédoté moy tintuwe umul.”

<sup>28</sup> I Jesuse ménbérh mano, “Katabawan i nan késumbulém. Rigo moy ni inok gédoté moy tintuwe umul.”

<sup>29</sup> Endob i ni lagéy mika kékmalanan. Mélaw ségiyo nén man i fénénginsa ne mano, “Endob ati dumo guwe fatut féimué ku?”

<sup>30</sup> Atin sémenumbul i Jesuse bénoréh bero énda i ségiyo dumo ro mano, “Wén i no sébaan fuweh, i ségétéwe lagéy bénoréh bero énda i ségiyo dumo ro mano, “Féimu go bé Kadnane Tulusém bénoréh bero énda i ségiyo dumo ro mano, “Katabawan i nan késumbulém. Rigo moy ni inok gédoté moy tintuwe umul.”

<sup>31</sup> Tidew bénor, ménngumah i ségétéwe fadi bénoréh bero énda i ségiyo dumo ro mano, “Féimu go bé Kadnane Tulusém bénoréh bero énda i ségiyo dumo ro mano, “Katabawan i nan késumbulém. Rigo moy ni inok gédoté moy tintuwe umul.”

<sup>32</sup> Tidew bénor, ménngumah i ségétéwe fadi bénoréh bero énda i ségiyo dumo ro mano, “Féimu go bé Kadnane Tulusém bénoréh bero énda i ségiyo dumo ro mano, “Katabawan i nan késumbulém. Rigo moy ni inok gédoté moy tintuwe umul.”

<sup>33</sup> Tidew bénor, i gétéléwe étew ménngumah. Endob békén Judiyo ni étew. Beeney étew tidew dob ségiyowe ingéd féndawé Samaria. Amun énggito moy ni lagéy ménfali, ménuray i éna nuwe de. <sup>34</sup> Fénggédéto no brab nuwaén i de falién brab bénauisé. Atin fénkudaén i ni lagéy dob kuda né brab nuwitén dob sébaane lawi kay de kana inok diyo fétausé moy kékagifat ne de. <sup>35</sup> Dob gétunduge de fuweh, niraya no kurta i gefee bénoréh bero énda i ségiyo dumo ro mano, “Fagifatém i ni lagéy. Buluk kulang i ni kurta, bayada ku beem ké séfuleu.”

Amun énggilid Jesuse nuret i ni binuwaya, fénénginsaa moy ségétéwe ni témore bénoréh bero énda i ségiyo dumo ro mano,

<sup>36</sup> “Ati karang me de, ati isuwe bénoréh bero énda i ségiyo dumo ro mano, “Fagifatém i ni lagéy ménngédaw de.”

Atin i Jesuse bénréh bero énda i ségiyo dumo ro mano, “Rigo mo loo bénoréh bero énda i ségiyo dumo ro mano, “Fagifatém i ni lagéy. Buluk kulang i ni kurta, bayada ku beem ké séfuleu.”

<sup>38</sup> Amun diyo i Jesuse brab de kuyugén dob de aguwo ro, énggégumah ro dob sébaane ingéd. Diyo i ségétewe libun fédawétén Martah. Atin ténayakufén bero dob lawi ne.

<sup>39</sup> Wén i tuwaréy ne so libun fédawétén Maria. Ménsar gédét dob sékéy Jesuse brab mégélingo bé de toroé no. <sup>40</sup> Ménbuku i Martahe bé kéluhanay de galbékén témogoh, mélaw ménfégédét dob Jesuse ménbérél mano, “Kadnan, émbuku go damén non i tuwaréy guwa nan fédayaé no begén gémalbék. Suguém inok tabanga no begén.”

<sup>41</sup> Séménumbul i Jesuse mano, “Martah, toow fo ménbuku go bé médoowe galbékém.

<sup>42</sup> Endob sébaan saén i fiyowe kailangan rigonén. Fénemili Mariawey fiyowe de. Brab énda médotén dob beene.”

## 11

### *I dasal i Kadnane*

<sup>1</sup> Wén i no sébaan fuweh, amun énggilid i Jesuse démasal, i ségétewe bé de kuyugén ménbérél mano, “Kadnan, i Juan Bautistawe téneroén i de kuyugén démasal. Toroén gey so démasal.”

<sup>2</sup> Séménumbul i Jesuse mano, “Amuk démasal gom, dasal gom loo bé ni: ‘Abay, kéluhanay étewe damén fengadafé ro Beem. Féguléwo mo damén i kéluhanay de étew.

<sup>3</sup> Irayan gey amaé key sénga fuweh. <sup>4</sup> Fésagada mo begey bé de sala gey loo so bé kékésagada keye bé de énggésala begey. Atin kago fédayaén begey météngkad rémigo sala.’” <sup>5</sup> Féntaus Jesusey kékérél ne mano, “Ufama, i ségétewe begom wén i dumo no brab ménangéy go diyo bé kérara kélunganone brab ménbérél go mamo, ‘Adih, fégédawanu. Irayanu télew timan fan. <sup>6</sup> Non wén i kana gu mantu séna ménggumah brab énda i féama gu de.’ <sup>7</sup> Atin sémumbul i ni dumo mo mano, ‘Kago anggaén begén. Ménfintuén i de bengawa key, brab fidongén i de nga gey. Enda gééteku brab iray gu beem i nan ongoté mo.’” <sup>8</sup> Féntaus Jesusey kékérél ne mano, “Gétiga ku amuk démayday go mongot, iraya no beem bé ongoté muwe. Békén miray sabaf bé dumo muwe, yamula sabaf bé énda mémala go mongot. <sup>9</sup> Mélaw béréhé ku begom, ongot gom dob Tuluse, atin irayén begom. Ay gom dob Tuluse amuk wén i kailanga kom, atin tabanga no begom. Dasal gom dob Tuluse atin sumbulo no begom, non buluk wén i mongot dob Tuluse bé éntingayéne, iray i Tuluse. <sup>10</sup> Buluk wén i fégédét dob Tuluse bé de kailanga no, tabangay Tuluse de. Buluk wén i démasal dob Tuluse, sumbulo no.

<sup>11</sup> Ufama, ségétew go boh, atin i nga me mongot sédo, énda iraya mo de ulé. <sup>12</sup> Taloo no mongot onok manok, énda iraya mo de sifitan. <sup>13</sup> Fyon fo ké tete gom étew, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na begom. Beeney Boh gome dob lawayo, brab irayén i Rémogor ne dob de étew mongot de.”

<sup>14</sup> Wén i no sébaan fuweh, dénédél Jesusey saitane mow ménahur dob ségétewe étew. Amun i saitane ni méntékédan, énggérél i étewe ni rénahuko no. Atin i de ménlimud do étew ménggaif ro de. <sup>15</sup> Endob i de dumo bé de ménlimud ménbérél ro maro, “Beelsebul, sani Satanase, i odoroy de saitan, i ménirayane de barakat inok tékédan.”

<sup>16</sup> Brab i de dumo bé de étew ténukawa roy Jesuse bé kéongot ruwe de bé féténgténgén i fégéolonone de tidew dob lawayo, inok gétiga ro tidew dob Tuluse. <sup>17</sup> Endob énggétiga Jesusey de itunga ro, mélaw ménbérél mano, “Ufama, i ingéde énda séfagayun ro brab sétiboh ro, mébinasa. Taloo no i ségékurénge étew dob sébaane lawi énda so séfagayun ro brab sékérit ro, waléy mébinasa. <sup>18</sup> Buluk i de sugu-sugué Satanás mésébaad énda géséfagayun ro, énda so gétindég i fangangatura nuwe. Bénréh guy ni non béréhé kom i démédélu saitan bé barakat Satanase. <sup>19</sup> Atin i fégédédél i de kuyug gom de, énda usaré roy barakat Satanase. Mélaw fégítøy de kuyug gom békén ka Satanás i barakat guwe. <sup>20</sup> Endob démédélu saitan bé barakat i Tuluse. Atin mélaw énggiton énggumah dob begomey gaiwe méguléw i Tuluse bé de étewén.”

<sup>21</sup> Tidew bénó, fénggétiga Jesuse bero bé toow na fo barakatan bé Satanase mano, “Ufama, i Satanase ségiléw bé ségétewe mantay bé lawi ne. Buluk i émbagére étew

bantaya noy lawi ne, brab wén i kulangé no, i de insodén énda i géfénakaw de. <sup>22</sup> Endob buluk gégumah i ségiyowe étew toow na fo émbagér bé gefee lawi, gédoté noy kulangé nuwe sarigoy gefee de. Atin gédoté no soy kéluhanay languntamane dob lawi ne brab baade noy kéluhanay de éndotén.

<sup>23</sup> “I éndae modor Begén, sébanil Begén. Brab i mikae sétabang Begén, alangé no Begén.

<sup>24</sup> “Buluk i saitane mésut tidéw dob étew rénahuko no, sémugud dob tikare gonon séméléd téreño no. Endob buluk énda i gito no téreño no, émbéréh mano, ‘Séfuleu dob étew sungu gono ku ténagak gu.’ <sup>25</sup> Tidéw béo, séfule brab gito noy tafaye ténidéwo no mélinis brab métintu néen. <sup>26</sup> Tidéw man béo, mésut brab muwit fitéw gétew mas na tete saitan dumo no mahur dob no étew. Mélaw i no étew toow na fo méfasang bé féganaye goho no.”

<sup>27</sup> Amun bénréh Jesusey ni, i ségetéwe libun tidéw dob de ménsélimud ménbérén mano, “Toow fo méoror i libune ménggenga Beem brab réméniton Beem.”

<sup>28</sup> Endob ménbérén i Jesuse mano, “Toow na fo méoror i de mégélingo bé kébérén i Tuluse brab odoro ro.”

### *I fégéolonone niray Jonase*

<sup>29</sup> Amun i de étew minut ro médoor ménlimud géliwét bé Jesuse, ménbérén mano, “Toow fo tete i de étew bé ni gai. Mongot ro do mékégaif inok fégéoloné ro ké Begén i Kristowe, sani fénemili i Tulus méguléw. Endob énda i méiray de bero saliyu bé mékégaife loo bé ménrigowe bé Jonase. <sup>30</sup> Loo bé fégéolonone nirayén dob de étew dob Ninibé amun ménut i Jonase méuyag tidéw dob sur i dakéle sédo, iraya ku séko fégéolonon i de étew bé ni gai. <sup>31</sup> Bé gaiwe kémukum i Tuluse, témo i baiwe tidéw dob ingéde Séba bé de étew méuyag béri. Non sénugudén tidéw dob tamanay duniiae mégélingo bé kégétiga Solomone. Endob béléewe ni wén i ségetéwe mas na gétigan bé Solomone ay ni, been i Begéne, éndob énda munur gom Begén. <sup>32</sup> Atin bé gaiy kékukum i Tuluse, i de énggétah étew dob Ninibé témidégo ro so témo bér de étew méuyag béléewe. Non ménunur ro brab énggésénule ro bé uret Jonase. Endob béléewe wén i mas na gérotor bé Jonase ay ni.

<sup>33</sup> “Enda i ségetéw témumon solo atin fédiyoé no dob énggembunéye taloo no dob fantad i kuréngé fénléngkéb. Yamula fédiyoé no dob fégonone de inok atiy gérumahe étew gito noy réndaw ne. <sup>34</sup> I moto muwe maak solo i lowoh me. Buluk fiyoy moto muwe, maak géfekaya non gérito go. Endob buluk i moto muwe ménadil, maak délémon non énda gérito go. <sup>35</sup> Ingat gom mélaw inok i réndawe dob beeme békén waléy délémon. <sup>36</sup> Mélaw buluk tintu munur go, i lowoh me maféno bé géfekaya, brab énda i délémon de, non maak rémendaw i soloe dob beeme.”

### *Fantag bé de Fariseo*

<sup>37</sup> Amun énggilid i Jesuse émbérén, i ségetéwe Fariseo sénéngkatén mangéy mama. Mélaw ménodor i Jesuse mangéy dob lawi ne brab ménar diyo mama. <sup>38</sup> Amun énggito noy Jesuse énda méngguseén loo bé adat i de Judio, ménggaif i Fariseowe ni. <sup>39</sup> Bé béo so, ménbérén i Jesuse mano, “I de begom do Fariseo, urahé kom i lowoh gome fingé fuweh saén. Endob dob de fédew gom ménfeno bé tetee itungan brab do sala. Ségiléw gom bé de tabu ménlinis fingé fuweh saén, éndob dungisan dob bukag ne. <sup>40</sup> Dufang gom do étew. Békén ba rénigoy Tulusey de fédew gom loo soy de lowoh gom? <sup>41</sup> Mélaw iray gom do limus bé éntingayéne kagom atin waléy gom ménlinis dob bukage so.

<sup>42</sup> “Endob mékégédaw-gédaw gom do Fariseo non niraya kom i Tuluse fiyon bé géfoloe bé de faninu nohok gom, éndob dénígur gom i métintuwe brab kéimue bé Tuluse. I ni niray gom fatut rigoné kom éndob kagom digurén i sébaane de.

<sup>43</sup> “Mékégédaw-gédaw gom do Fariseo non méuyot gom bé fiyowe do saran dob lawie fengadafan. Brab méuyot gom ségifaén fégadatan dob de fadiyan. <sup>44</sup> Mékégédaw-gédaw gom non i de étew marok waléy ro fiyo bé kífuray ruwe begom, éndob been i funa ruwe

waléy tete. I begome maak do lóbéng énda i tandaén, gédaay de étew énda gétiga ro de, funa ro gélyén.”

<sup>45</sup> Atin i ségétéwe bero témooro bé de kukuman ménbérél mano, “Maistéro, bé kékérél me bé nan, fénémala mo so begey.”

<sup>46</sup> Séménumbul i Jesuse mano, “I begome témooro bé kitabe, mékégédaw-gédaw gom, non sugué kom i de étew bé médoowe. Maak féoboé kom bero do toow fo émbégat, éndob énda téma bang gom de. <sup>47</sup> Mékégédaw-gédaw gom non ségiléw gom bé de katufua kom énda munur ro bé de sénarigoy Tuluse muret. Rémi gofiyo do lóbéngon kay de fénléhu i de katufua kom. <sup>48</sup> Mélaw féngétiga kom i ménagayun gom bé rénigoy de katufua kom non beroy do ménméléhu brab begom i do rémigo do lóbéngon. <sup>49</sup> Been i funane ménbérél i Tuluse bé kégétiga nuwe mano, ‘Fén-uwito ku bero do muret fantag Begén, brab i de dumo de fénléhu ro brab i de dumo de fénrasay ro bero.’

<sup>50</sup> “Been i funa kome mékukum, non ménamung gom bé kékélhéhue bé de kéluhanay sénarigoy Tuluse muret tidéw bé kélémbag i duniya. <sup>51</sup> Tidéw bé kéléhu Abele taman bé kéléhu Sakariase, fénléhu dob élét i ahayane féngadafan tulakan brab mékétéfuwe sibéy. Hoo, béréhé ku begom i de étew méuyag béni, mékukum ro sabaf bé de ni.

<sup>52</sup> “Mékégédaw-gédaw gom do témooro bé kitabe, non bénunéy gom i toowe dob de méuyot géttigan de. Brab mika gom munur bé toowe, atin anggaé kom i de méuyot munur.”

<sup>53</sup> Amun énggilid i Jesuse bé kékérél ne, méntékédan dob no gonon, éndob i de Fariseo brab de témooro bé kitabé nangga ro bé de mékerit kériklamo ro brab médoó éntingayén fénginsaé ro <sup>54</sup> tukawa ro téngkadén inok sumbulo no bero bé békéne damén katabawan.

## 12

<sup>1</sup> Amun i ngibunéne do étew ménsélimud géséeda ro do sékéy, féngganay Jesusey béréhé nuwe bé de kuyugén sungu mano, “Ingat gom inok énda miring gom bé kéunur i de Fariseo ubo-ubo saén. <sup>2</sup> I kéluhanane rénigoy de étew maak ténléb, mébukeh séko. Brab i kéluhanane dirungén, émfayag séko. <sup>3</sup> Atiy béréhé muwe dob kélungonone, gélingoon so dob fuwehe. Brab atiy ségurawé muwe dob gonone fénintu, been so gélingoon dob médoowe do étew.

<sup>4</sup> “Béréhé ku begom do dumo gu, kagom mégilak bé géfélhéhue bé lowoh gome, éndob saliyu bé ni éndaén i gérigono no. <sup>5</sup> Béréhé ku begom i ati fatute kégilaka kom. Fégilak gom bé Tuluse non géféléhu noy lowoh gome brab wén soy barakatén émféangéy begom dob emfernowe. Hoo, béréhé ku begom fégilak gom de.”

<sup>6</sup> Atin ménbérél man i Jesuse mano, “Ufama, i de kloh manok toow fo mélému kékébéléye bero dob fadiyane. Endob énda i sébaan de lénifot i Tuluse. <sup>7</sup> Atin i begome mas gom na balilaga bé de kloh manok. I Tuluse énggétuwa no fiyon firoy i de buk gom dob de uléw gom. Mélaw kagom mégilak.

<sup>8</sup> “Béréhé ku begom, ati murete fantag bé kéunur ne Begén dob de étew, ureté ku soy fantage bé kéunur ne dob adafay de télikiy Tuluse. <sup>9</sup> Endob atiy démirunge Begén dob adafay de étew, dirungé ku so moso dob adafay de télikiy Tuluse.

<sup>10</sup> “Atiy émbéréhé tete fantag bé Nga i Kéilawane, sani Begéne, émfésagadan. Endob i émbéréhé tete fantag bé Rémogor i Tuluse énda émfésagada no.

<sup>11</sup> “I de sébanil Begén, buluk uwité ro begom dob de féngadafan taloo no dob de gémamak kukuman, inok métébo gom sabaf bé kéunur gome Begén, kagom mégilak taloo no émbuku ké ati késumbul gome. <sup>12</sup> Non i Rémogor i Tuluse toroé no begom ké atiy fatute béréhé kom.”

### *I binuwayae fantag bé kawasawe étew*

<sup>13</sup> Wén i médoowe ménsélimud géliwét bé Jesuse. Ménbérél i ségétéwe de dob Jesuse mano, “Maistéro, béréhém bé ofo guwe, irayén begén i baad guwe bé de languntaman fénled i boh gehey begey bé kéléhu ne.”

<sup>14</sup> Séménumbul i Jesuse mano, “Enda i atura ku de maad ké ati séfiroy begom.” <sup>15</sup> Atin ménbéréh i Jesuse dob de étew mano, “Kagom arumén! Békén bé kékawasawey funay étewe fiyoy kéuyag ne.”

<sup>16</sup> Atin nureto Jesuse bero sébaan binuwaya fantag bé ségétewe étew kawasa mano, “Wén i safadén, fiyoy kéruk i de nohok-nohokén.” <sup>17</sup> I kawasawe étew ménggitung, ‘Enda i fégono ku bé kéluhanay kéntew guwe. Ati rigoné kuwe? <sup>18</sup> Gétuwa ku, ay ni rigoné kuwe. Gébaé kuy kiwot guwe, brab rémigowu bé dakéle de, inok gétimuo kuy de kéntew gu brab de éntingayén kagén. <sup>19</sup> Tidew bénorého noy ni étew mano, ‘Dufang go! Bé ni kélunganon, méléhu go. Mélaw békénén kaam i éntingayéne nitongém.’ ”

<sup>21</sup> Atin féntama Jesusey ni binuwaya mano, “Ségiléw bé niy aruméne kawasa étew énda modorén bé kétayay Tuluse.”

<sup>22</sup> Atin bénréh Jesuse dob de kuyugén mano, “Kagom émbuku fantag bé kéuyag gome, bé ati amaé kome, taloo no bé lowoh gome, bé ati kégalé kome. <sup>23</sup> Wén nay labi mélaga bé amaéne funa kom méuyag, brab wén nay labi mélaga bé kégale kay lowoh gome. <sup>24</sup> Fégitung gom i de kloh manok. Enda mohok ro taloo no kémétew ro, brab énda i kiwot ro. Endob féamaéy Tuluse so bero. Atin mas gom na balilaga bé klohe manok. Mélaw toow na fo féamaé no begom. <sup>25</sup> Enda i étew géfetaah bé kéuyag ne bé kékuku ne, fiyon fo ké ségéuras saén. <sup>26</sup> Amun énda gérigono kom i ni kloh éntingayén, sedek émbuku gom bé de ségiyo? <sup>27</sup> Fégitung gom i de flores. Mérük ro fiyon fo ké énda gémalbék ro, taloo no rémigo ro do kégal ro. Endob bérhéku begom, fiyon i Solomone toow fo kawasa datu, énda i kégalén loo bé de fiyo do falasén do flores. <sup>28</sup> Endob buluk loo bé nan i kéfekégal i Tuluse bé de kéronn bé singkowe ay nan méuyag, atin bé démoe ibérén inohén, békén ba fékégalé no so begom? Toow fo kloh i kéfeginugut gome. <sup>29</sup> Kagomén démoyun émbuku bé amaé kome brab inémé kome. <sup>30</sup> Non i de étew énda méngintulus ro, been i niy fégitungé ruwe taman émbuku ro. Endob i Abay gome dob lawayo gétiga noy kailanga kome. <sup>31</sup> Mélaw fidaya gom i Tuluse méguléw begom, atin iraya no begom éntingayén kailanga kom.

<sup>32</sup> “Do kuyug gu, kagom mégilak fiyon fo ké énda médo gom, non kétayay Abay gome Tulus ké begom soy méguléw beroy Tuluse. <sup>33</sup> Fébeléy gom i languntama kome, brab iray gom dob de méskinan inok kawasa gom dob lawayo. Non dob lawayo, i de éntingayé kom énda i réménég de, taloo no ménakaw de, brab énda i ifés minasa de. <sup>34</sup> Non hon i gonoy tamuk me de, diyo soy itunga muwe brab fidew me.”

### Fantag bé késéfule Jesuse

<sup>35-36</sup> Atin ménuret man i Jesuse sébaan binuwaya fantag bé késéfule ne mano, “Ingat gom bé késéfule guwe loo bé de sugu-suguén ongot-ongot bé amu ruwe. Iring gom bé de ni sugu-suguén, mingat ro ongot-ongot bé amu ruwe séfule tidew dob sébaane uyot. Maginsod ro, brab féréndawé roy solo ruwe inok géingat ro. Buluk géumah, magad saén géungkaa roy bengawane. <sup>37</sup> Toow fo moror i de ni sugu-suguén bé kégumah i amu ruwe, non énggéingat ro ongot-ongot bé késéfule ne. Bérhéku begom, i ni amu kémégal inok kékana brab fésaré noy de sugu-sugué no brab duwoto no bero. <sup>38</sup> Toow ro fo moror buluk énggito no bero énggéingat ongot-ongot fiyon fo ké géumah kérara kélunganon, taloo no ménalém kélunganon. <sup>39</sup> Atin fégétédém gom i ni, buluk i gefee bé lawie gétiga noy ati urase géumah i ménakawé dob lawi ne, ingata no brab énda fidayaé no de ké ahuroy ménakawey lawi ne. <sup>40</sup> Brab i begome so, fatut mingat gom non i Nga i Kéilawane géumah dob gaiwe énda karangé kom de géumah.”

<sup>41</sup> Ménénginsa i Pedrowe mano, “Kadnan, bérhé moy ni binuwaya dob begeye saén do kuyugém, taloo no kay kéluhanane?”

<sup>42</sup> Atin i Kadnane séménumbul mano, “Atiy mégérore brab métileédtéde sugu-suguén, been i sénarigoy amu ne méguléw bé kéluhanay galbéké brab iraya noy de dumo no sugu-suguén bé de karo baad bé de amaén bé katabuwane gai. <sup>43</sup> Toow fo méoror i nan sugu-suguén ké gitoy amu ne gémalbék bé késéfule ne. <sup>44</sup> Béréhé ku begom, i amu i nan sugu-suguén sarigé no dob beeney kéluhanay languntama nuwe. <sup>45</sup> Endob mémégédaw-gédaw i ni sugu-suguén buluk mégitung mano, ‘Mérugay nay késéfule i amu guwe.’ Tidéw béno, féganayé no tafésén i de dumo no sugu-suguén do lagéy brab libun, atin mama brab miném taman molon. <sup>46</sup> Ati keeyén i mérigowe amuk i amu i nan tete sugu-suguén gérumah bé gaiwe békén karangé no, brab énda gétiga no de? I ni amu, amuk gito noy teteet rigoné no, tor-toré noy ni sugu-suguén atin fédiyoé no dob gonone emferno beroy de kéluhanay de énda munur.

<sup>47</sup> “I ni sugu-suguén gétiga no fo toow i kétayay amu ne rigonén, éndob énda rigoné no de. Mélaw i ni sugu-suguén mémukum moso toow fo gétimal. <sup>48</sup> Endob i sugu-suguéné énda gétiga noy kétayay amu ne rigonén, atin réménigo énda fiyo no, mémukum éndob énda toowén gétimal. I sénarigone bé médoowe, médooye ongoténe de. Atin i nirayane médooye, médooye ongoténe de.

<sup>49</sup> “Ménangéyu dini inok muwit maak aféy dob duniyae ni, brab méuyotu de damén ké mérinoén. <sup>50</sup> Kéfasanganu séko, brab tete i fédew guwe ni taman gilid mérigoy ni. <sup>51</sup> Ati karangé kome funa ku ménangéy dini? Inok éndaén i sékérít dob ni duniya? Békén. Ménangéyu dini inok mésébaad i de étew. <sup>52</sup> Tidéw béleewe, i de limo gétew dob ségékuréngé, mésébaad ro sabaf bé ati Begéne ni. I télewe de énda magayun ro bé ruwowe de, taloo no i ruwowe de énda magayun ro bé télewe de. <sup>53</sup> Mésébaad ro sabaf bé kéunur ruwe. I bohe brab de ngaén lagéy énda séfagayun ro. Loo so bé idéngé brab de ngaén libun, énda séfagayun ro.”

<sup>54</sup> Ménbéréh soy Jesuse dob de médooye étew mano, “Dob ni gonon, buluk gérito gom bé rawéne dob élédon, magad i kékéréh gome, ‘Rémana séko.’ Atin rémana ba. <sup>55</sup> Atin buluk wén i réfuruh tidéw déligdigan, béréhé kom, ‘Méduf sékoy gaiwe ni.’ Atin méduf ba. <sup>56</sup> Gétiga kom i mérhé bé atag i éntingayéne dob fantade ni brab dob lawayo. Sedek énda gétiga kom i atag i de rigonéy Tuluse bé béleewe? Non mikay gom munur.

<sup>57</sup> “Atin sedek énda mégitung gom bé atiy fiyowe rigoné kom inok énda mémukum gom moso? <sup>58</sup> Buluk wén i dumo mo sébanil, atin uwité no beem dob de kémukum inok sétiyawan, buluk diyo gom séna dob de agéwon, béréhé go fiyo inok séfagayun gom bé énda séna gérumahén dob adafay de kémukum. Non i de kémukum séko irayén beem dob de sundalo, brab i de sundalo férisonné ro séko beem. <sup>59</sup> Béréhé ku begom, énda séko géesus go tidéw dob férisonne taman énda gébayada moy kéluhanay késalaa muwe.”

## 13

<sup>1</sup> Bé bénoréh so, i médooye do étew bénréh ro dob Jesusey fantage bé de étew tidéw Galilea. Fénféléhu i Datue Pilato bero bé lala ruwe témulak dob Tuluse. <sup>2</sup> Séménumbul i Jesuse mano, “Amun i do no étew tidéw Galilea fénléhu loo bé no, makom ké toow ro na fo wén i sala ro bé de dumo ro bati dob Galilea, brab been i funa ruwe ménléhu. <sup>3</sup> Béréhé ku begom, békén. Endob saliyu ké gésénule gom témagak bé teteet adat gom, méléhu gom so ségiléw bé berowe. <sup>4</sup> Atin fantag bé de folo bra waléw ménléhu dob Siloe bé kétuwongoy tambalae bero, makom ké mas na wén i sala ro bé de dumo ro bati dob Jerusalem? <sup>5</sup> Béréhé ku begom, békén. Endob saliyu ké gésénule gom témagak bé teteet adat gom, méléhu gom so ségiléw bero.”

<sup>6</sup> Atin bénréh Jesuse beroy ni binuwaya mano, “Wén i ségétéwe étew, wén i safadén. Nohokén i sébaane kayéw méama i onok ne. Nangéyén téneungténg ké wén i onokén, éndob énda i énggito no de. <sup>7</sup> Tidéw bénoréh, bénréhén dob étewe témalima bé safad ne ni mano, ‘Bé rugay i télewe gébélantuwa démoyunu séfule séméléd ké wén i onok i ni kayéw, éndob énda foy énggito gu de. Mélaw tuwongém, non ransiné no saén usarén i ni fantad.’ <sup>8</sup> Endob séménumbul i étewe ni témalima de mano, ‘Fédayaén na bé rugay i

ségébélantuwe atin kaluto ku géliwét de. Brab rigono ku abuno funa no bobo. <sup>9</sup> Buluk bé sébaano bélantuwa gégumah mégonok, fiyo. Buluk énda, been nay no tuwongén.’ ”

### *Nuwa Jesusey libune*

<sup>10</sup> Wén i no gai kéfengadaf i de Judio, sani gaiwe kétérén. Dob no gai, téménoro i Jesuse dob sébaane lawi féngadafa ro. <sup>11</sup> Wén i ségétéwe libun diyo békutén non fédéruuy saitane. Been i funa nuwe ménfoloén bra waléw gébélantuwa énda géfééntangén témindég fiyon kloh. <sup>12</sup> Amun énggito Jesuse, sénbérého no métanug mano, “Adi-adi gon!” <sup>13</sup> Brab nahay Jesusey de kémérén dob libune ni, brab bé beno so énggétindég mééntang. Atin dénayéw i libune niy Tuluse.

<sup>14</sup> Endob i uléwe bé no lawi féngadafan toow fo ménkérít non fén-adi-adi Jesusey ni libun bé gaiwe kétérén. Mélaw ménbérén i ni lagéy dob de étew mano, “Wén i ném gétérésangan bé ségfadiyane gémalbék tom, mélaw ay gom dini féuwa bé ni ném gétérésangan. Endob kagom mangéy dini féuwa bé gaiwe kétérén.”

<sup>15</sup> Endob ménbérén i Jesuse mano, “Enda toow gom munur dob Tuluse, ubo-ubo say kéfengintoow gome. Buluk i safi gome taloo noy kuda gome térumén, ukohé kom so dob nikéto kome de brab angéyé kom féinémén fiyon fo ké gai kétérén. <sup>16</sup> I libune ni ségétew dumo tom Judio non séfu Abraham so, brab fédéruuy saitane foloén bra waléw gébélantuwa. Fatut uwaén fiyon fo ké gai kétérén.” <sup>17</sup> I de étew diyo énda ménuyot ro bé Jesuse, ménmala ro bé kékérén ne. Endob i de dumo de, toow ro fo méoror non bé kéluhanay de mékégaif rénigo Jesuse.

<sup>18</sup> Atin ménbérén i Jesuse mano, “Ati ségiléwoy kéféguléw i Tuluse bé de étewén? Ati fégiringo kuwe de? <sup>19</sup> Ségiléw na bé toowe fo kloh béne, éndot i étewé brab nohokén. Atin téménunoh brab méruk taman ménwaléy dakél kayéw. Brab salagay de kloh manok i de fongo no.”

<sup>20</sup> Tidéw béno, ménbérén man i Jesuse mano, “Ati fégiringo kuwe bé kéféguléw i Tuluse bé de étewén? <sup>21</sup> Ségiléw bé fégéféruke fan éndot i libune brab sénlawékén bé téléwe géasad bé arinahe taman ménruk i kéluhanane brab ménwaléy médo.”

### *I mératé bénigawan*

<sup>22</sup> Atin amun ménagéw i Jesuse mangéy Jerusalem, ménawét dob de ségiyo-giyo do ingéd brab téménoro diyo. <sup>23</sup> Atin wén i ségétéwe étew ménénginsaan de mano, “Kadnan, kloh saén i de étew fukaséy Tuluse?”

Séménumbul i Jesuse manó, <sup>24</sup> “Rigo moy tamay gagané muwe mahur bé mératé bénigawan mangéy dob lawayo, non bérhéku beem, médo do étew i témélamawe mahur, éndob énda gagané ro de. <sup>25</sup> Non i gefee de témindég brab fintué noy bénigawane. Atin amuk diyo gom dob liyuwe, témuktuk gom, fégédaw-gédaw émbérén makom, ‘Kadnan, ungkaém i fintue ni inok géahur gey.’ Endob sémumbul mano, ‘Enda gélolo gu begom. Brab énda géti kuy tidéwo kome de.’ <sup>26</sup> Tidéw béno, émbérén gom makom, ‘Ménama gey brab méniném gey sétifon Beem. Brab téménoro go dob de ingéd gey.’

<sup>27</sup> Atin sémumbul mano, ‘Enda gélolo gu begom. Brab énda géti kuy tidéwo kome de. Begom i de démoyun rémigo tete. Férayu gom Begén.’ <sup>28</sup> Atin i begome moso kémérew gom brab kémigét i de kifé kom buluk gito gom i katufua kome Abraham brab Isake, brab Jakobe, brab i kéluhanay sénarigoy Tuluse muret diyo ron dob lawayo. Endob i begome énda géahur gom diyo. <sup>29</sup> Wén soy de médo étew békén Judio tidéw déligdigan, sébangán, tégenón, brab élédon, diyo ro gésar mama beroy Tuluse ké féguléwo no bero.

<sup>30</sup> Atin bé beno, i de énggétah béní waléy ro moso do géfuray. Brab i de énggétah béní waléy ro moso géétah.”

<sup>31</sup> Bé beno so, i de dumo Fariseo bénréh ro dob Jesuse maro, “Tagakém i ni gonon brab angéy go dob ségiyowe gonon non ménuyot i Datue Herod méméléhu Beem.”

<sup>32</sup> Endob séménumbul i Jesuse mano, “Agéw gom brab bérhé gom bé Herode mégakar étew, fétausé kuy kéféraréy guwe bé de saitan brab kieuwa guwe bé de étew béléewe ni brab démo. Atin dob gétéléwo nuwe gai, géfélido kuy galbék guwe dini. <sup>33</sup> Endob

i Begéne kailangan tausu béleewe brab démo brab dob télwe. Non i toowe, énda i sénarigoy Tuluse muret bé de kékérén féléhuén saliyu dob Jerusalem.”

<sup>34</sup> Tidéw béno, ménbérén i Jesuse fantag bé adat i de étew dob Jerusalem mano, “Do étew dob Jerusalem, tete i fédew guwe fantag bé begome non fénléhu gom i de sénarigoy Tuluse muret brab nibéro kom batéw i de sénugu dob begome taman ménléhu ro. Firoy gule i kétaya kuwe térimu begom loo bé kétimu i méritone manok télikub-kubo noy de fiyakén bé de fafakén? Endob ménika gom de. <sup>35</sup> I lawi gome métak moso. Endaén gito mo Begén taman bé gaiwe géumah ké béréhé mo moso, ‘Féfiyonéy Tuluse damén i géumah tidéw dob Kadnane.’ ”

## 14

### *Nuwa Jesusey lagéye*

<sup>1</sup> Wén i no sébaan fuweh gai kétérén, ménangéy i Jesuse mama dob lawi i ségétéwe odoroy de Fariseo. Atin i de sébanil bé Jesuse ténlik ro inok gito roy funa ruwe de témebo. <sup>2</sup> Diyo soy ségétéwe rémambuk. Atin ménfégédét dob Jesuse. <sup>3</sup> Atin fénénginsaa Jesusey de Fariseo brab de témoi bé kitabé mano, “Fakay ba dob kitab tomei muwae bé gaiwe kétérén?”

<sup>4</sup> Endob ménantés ro. Mélaw génamak Jesusey étew démeruun atin nuwaén brab ménadi-adi. Tidéw béno, fénagéwén. <sup>5</sup> Atin fénénginsaa Jesusey de étew témulik mano, “Buluk wén i nga gom taloo no safi gom ménlawu dob kalute ménalém wén i wayég de bé gaiwe kétérén, békén ba fagayasé kom bégéngén mésut dob kalute fiyon fo ké gai kétérén?”

<sup>6</sup> Endob ménantés ro non énda i étingayén késumbul ro de.

<sup>7</sup> Atin wén i de étew sénéngkat ro mama diyo ménuyot ro mésar dob de fiyo saran kay de gérotor étew. Amun énggito Jesusey ni, nureté beroy ni binuwaya mano, <sup>8</sup> “Amuk wén i séméngkat begom déméngean bé sébaane uyot, kagom mésar dob de fiyo saran, non amuk wén i do étew toow na fo gérotor sénéngkat, karoy de fiyo saran. <sup>9</sup> Tidéw béno, i séménéngkate begom fégédét inok kédané no begom dob de sara kom brab fégaliné no begom mangéy dob mase na gérfantad gonon. Atin been i funa kome mémala. <sup>10</sup> Yamula, buluk sénéngkat gom, angéy gom sar dob de gérfantad saran inok i séménéngkate mangéy fégédét dob begome brab émbérén mano, ‘Do adih, énggomén, diyo gom dob de fiyo ni saran.’ I ni géiray begom fiyo kékégadat dob téngaangay de médoo étew. <sup>11</sup> Non i kéluhanay de étew félangka-langka waléy ro gérfantad. Brab i kéluhanay de étew térfantad waléy ro gérotor.”

<sup>12</sup> Tidéw béno, ménbérén i Jesuse dob gefee ni karagiya mano, “Buluk rémigo go karagiya, kago séngkatén say de gélolo mo, do dumo mo, brab do samungém, brab do étew kawasa dumo mo ségédét. Buluk rigoné moy ni, sémuli ro so séméngkat beem inok gésulio ro beem. <sup>13</sup> Yamula, amuk rémigo go karagiya, séngkatén i de méskinan, de fikat, de kimoyén, brab do langafén. <sup>14</sup> Mélaw féfiyonéy Tuluse beem fiyon fo ké énda gésulio ro beem. Sulioy Tuluse beem bé gaiwe kétébule i de métintu étew.”

### *I binuwayae fantag bé karagiye*

<sup>15</sup> I ségétéwe bé de ménas mama, ménbérén mano, “Toow fo méoror i de étew mama beroy Tuluse dob kékéguléw ne.”

<sup>16</sup> Amun énggelingoo Jesusey ni, nureté i sébaane binuwaya mano, “Wén i ségétéwe étew lagéy réménigo dakél karagiya brab séménéngkat médoo étew. <sup>17</sup> Amun énggégumah i gaiy ni karagiya, i ni étew sénuguén i sugu-sugué nuwe mangéy mérél dob de étew sénéngkat ro, ‘Méntafayén i kéluhanane. Enggomén, angéy gomén dob karagiye ni.’ <sup>18</sup> Endob énda ménangéy ro diyo. Yamula bénréh roy de funa ro énda géangéy diyo. I sébaane de mano, ‘Bukué ku, énda géangéy diyoan, non mantuwu séna ménléy fantad, angéyé ku téngténgén.’ <sup>19</sup> I géruwowe de ménbérén mano, ‘Bukué ku, énda géangéy diyoan, non mantuwu séna ménléy folo timan safi brab magéwu angéyé ku

bero langunén.’<sup>20</sup> I gétéléwe de ménbéréh mano, ‘Bukué ku, énda géangéyu diyoan, non mantuwu séna ménawag.’<sup>21</sup> I sugu-suguéne ni ménule brab bénréhén dob lagéye gefe karagiya i kéluhanay de ni. Mélaw toow fo ménkérít i ni gefe karagiya. Tidéw béno, bénréhén dob sugu-sugué nuwe mano, ‘Fagayas go, angéy go dob de agéwon brab dob de kalsada, brab uwitém diniy de méskinan do étew, do kimoyén, do langafén, brab do fikat.’<sup>22</sup> Atin ménagéw i ni sugu-suguén. Tidéw béno, ménséfule mangéy dob gefee ni karagiya, brab bénréhén de mano, ‘Rénigo guy sénugu me begén, éndob énda séna féno i lawie bé étewe.’<sup>23</sup> Atin i gefee ni karagiya bénréhén dob sugu-sugué nuwe mano, ‘Agéw go mangéy dob de agéwon mangéy dob de kloh ingéd brab fiyon dob de tuduk, brab uwitém i de étew diyo mangéy dini, méuyotu de ké méféno étew i lawi guwe ni.’<sup>24</sup> Endob i de étew sénéngkat gu sungu, énda gétem-tem ro bé de amaén ténafad gu.’ ”

<sup>25</sup> Wén i no sébaan fuweh, amun ménagéw i Jesuse, ménodor i de médoo do étew géliwét de. Atin sénlingén bero mano,<sup>26</sup> “Fiyon atiy méuyote modor Begén, éndob mas nay kéimu ne bé de lukésén, brab bawag ne, brab de ngaén, brab de dumo no sétiman idéng, brab i kaane lowoh, énda médaitén waléy kuyug gu.”<sup>27</sup> Atin fiyon atiy étewe énda fédaydayén bé de kérégénon fiyon fo ké féléhuén dob kruse, énda médaitén waléy kuyug gu.<sup>28</sup> Ufama, buluk wén i méuyot rémigo lawi, békén ba mésar na métah inok fégítungé no ké firoy i laga i kérigowe de, inok gétiga no ké wén i katabuwan kurtaén fégéfélidén de?<sup>29</sup> Buluk féngganayén saén i kérigo nuwe de, atin énda gégéfélidén de, waléy sébayat i de étew gérito de.<sup>30</sup> Maro, ‘Dufang i ni étew. Féngganayén saén i kérigo nuwe de, éndob énda gégéfélidén de.’<sup>31</sup> Taloo no, i ségétewe datu mangéy sétiboh bé sébanile de datu. Békén ba mésar na métah brab fégítungé no ké gagané no bé foloé ngibu sundalo no kuntra bé ruwowe folo ngibu sundaloy sébanile de?<sup>32</sup> Buluk gékarangay datue ni bé énda gétagay kaane sundalo, émféuit sarigo no mangéy malak bé sébanile de datu amuk mérayu séna inok méréh bé éndaén sétiboh ro.”<sup>33</sup> Féntaus Jesusey kékéréh ne mano, “Ségiléw so bé begome. Amuk méuyot gom waléy kuyug gu, kailangan tagak gom i kéluhanay gulaané kome.”

<sup>34</sup> Tidéw béno, nuret Jesusey sébaane binuwaya fantag bé késégléw i timuse bé de kuyugén mano, “I timuse fiyo. Endob buluk mékédan i kétasik ne, éndaén i nonomén brab éndaén géséfule i kétasik ne.”<sup>35</sup> Enda fiyo no bé fantade taloo no bé abunowe. Fatut ibérén saén. Tuntay gom i ni énggelingoo kom.”

## 15

### *I métadine bili-bili*

<sup>1</sup> Wén i no sébaan fuweh, amun ténero Jesusey de étew, ménggégumah i de médoo lémidful kubrador brab de tete étew mangéy mégélingo.<sup>2</sup> Wén soy do Fariseo brab do téromo bé kitabé diyo. Atin sabaf bé kéika ruwe bé de tete étew, ménriklamo ro maro, “I ni lagéy méuyot témayakuf bé de tete étew brab séréngan na bero mama.”<sup>3</sup> Mélaw nureto Jesusey bero do binuwaya mano,

<sup>4</sup> “Amuk i ségétewe begom wén i mératu bili-bili no brab ménadin i sébaane de, ati rigoné muwe? Békén ba tagaké moy siyowe de folo bra siyow dob fétabtabane, atin angéyé mo sélédén i sébaane de ménadin taman gito mo?”<sup>5</sup> Tidéw béno, buluk gito mo, duwalé mo mule toow fo méoror.<sup>6</sup> Brab tabaré moy de dumo mo brab bérhé mo dob berowe, ‘Toow fo méoror non énggito guy ménadine bili-bili gu. Enggomén, rémigo tom karagiya.’ ”<sup>7</sup> Atin féntaus Jesusey kékéréh ne mano, “Loo so bé ni Tuluse. Toow fo méoror amuk wén i ségétew tete étew gésénule brab tagaké noy tetee adatén, atin rigoné noy kétayay Tuluse. Mas méoror i Tuluse bé ni ségétew étew ménggésenule bé kéror ne bé de siyow folo bra siyow fiyo étew énda kailanga roy gésénulee.”

<sup>8</sup> Ménuret man i Jesuse ségiyo binuwaya mano, “Wén i ségétewe libun wén i folo timan balilaga félatahén. Atin ménadin i sébaane de. Ati rigoné nuwe? Témumon solo brab kodosé noy lawi ne sélédé no taman gito noy ni sébaan félata ménadin.”<sup>9</sup> Tidéw béno, tabaré noy de dumo no brab bérhé no bero mano, ‘Toow fo méororu non énggito guy

félata guwe méntadin. Enggomén, rémigo tom karagiya.’ ” <sup>10</sup> Féntaus Jesusey kékéréh ne mano, “Bérhéku begom man, i de télakiy Tuluse toow ro fo méoror amuk wén i ségétew tete étew gésénule brab tagaké noy tatee adatén atin rigoné noy kétayay Tuluse.”

### *I dufange nga*

<sup>11</sup> Atin nuret Jesusey gétéléwe binuwaya mano, “Wén i ségétewé étew lagéy wén i ngaén ruwo gétew lagéy. <sup>12</sup> Wén i no sébaan fuweh i tuwaréye bé de ngaén ménangéy dob boh ne mano, ‘Boh, irayém begén i baad guwe bé de languntaman katom.’ Mélaw i boh ne bénadén i kéluhanay languntama ruwe dob ruwowe gétew ngaén. <sup>13</sup> Enda mérugayén tidew béno, i tuwaréye bé de ngaén fénbélényen i kéluhanay kaane baad. Atin ménagéw ménangéy dob mérayue ingéd, brab nuwitén i kurta ne. Diyo séninggulaén i kéluhanay kurta ne bé kédufang ne. <sup>14</sup> Tidew béno, ménggumah i dakéle lénggob dob kéluhanay sugud i no dakél ingéd. Atin toow fo mélayah i dufange ni étew, non éndaén i kurtaén. <sup>15</sup> Mélaw ménahur dob sébaane galbék kay ségétewé bat diyo. Sénuguén dob fantad ne émféama babuy. Non bé toowén fo mélayah, <sup>16</sup> méningar bé amaéy de babuy. Endob énda i mirayan de kéama. <sup>17</sup> Tidew béno, énggétiga noy kédufang ne atin ménggitung mano, ‘I kéluhanay de sugu-suguéy boh guwe, gaba-gabay de amaé ro. Endob ay niwu méléhu mélayah. <sup>18</sup> Séfuleu mangéy dob boh guwe brab bérhéku diyo, Boh, ménusalau dob Tuluse brab dob beeme. <sup>19</sup> Endaén médaitu fédaillé mo ngaém. Endob fégédaw go begén. Rigo mo begén sébaan bé de sugu-sugué mo.’ ” <sup>20</sup> “Mélaw ménule. Amun mérayu séna dob lawi ruwe, énggitoy boh ne brab mén-uray i éna nuwe de. Léménentu bénalakén i nga ne nékéfén brab narékén. <sup>21</sup> Atin ménbérhéh i nga ne mano, ‘Boh, ménusalau dob Tuluse brab dob beeme. Endaén médaitu fédaillé mo ngaém.’ <sup>22</sup> Endob i boh ne ténavagén i de sugu-sugué no brab bénréhén bero mano, ‘Féraan gom. Uwit gom i toowe fo fiyo kégal brab fékégal gom de. Fétisingo kom brab fésafatoso kom. <sup>23</sup> Atin sumbali gom i kagéne toow fo bobo nati safi. Rémi tom dakél karagiya. <sup>24</sup> Non i nga guwe maak ménléhu, éndob béléewe ni méuyag. Maak méntadin, éndob béléewe ni énggiton.’ Tidew béno, réni roy dakéle karagiya.

<sup>25</sup> “Endob béno so, ménggumah i ofoe ngaén lagéy tidew dob de galbék no. Amun gédétén dob lawie, ménggaif bé énggelingoo noy kantawe brab énggito noy de étew mésayaw. <sup>26</sup> Mélaw ténavarén i ségétewé bé de sugu-sugué ro brab ménenginsa ké ati rigoné ruwe. <sup>27</sup> Séménumbul i ni sugu-suguén mano, ‘Ménséfule i tuwaréy me. Sénugu i boh me begey séménumbali bobo nati safi, non i tuwaréy me ménséfule énda i sugsugén.’ <sup>28</sup> Tidew béno, toow fo ménkérít i ofo ne lagéy, brab énda méntausén dob lawie. Mélaw i boh ne ménusut brab ménfégédaw-gédaw inok mahur dob lawie. <sup>29</sup> Endob bénréhén dob boh ne mano, ‘Géménalbékéu bé firoye gébélantuwa brab énda fénlis guy fénriko muwe begén. Endob énda foy nirayém begén fiyon sébaan kambing inok rémigouw karagiya begey i de dumo gu. <sup>30</sup> Endob i ni ngaém ménraréy, brab séninggulaén i éntingayéne nirayém de bé de kédufanga no. Endob amun ménule, sénumbalio mo bé boboe nati safi.’ <sup>31</sup> Séménumbul i boh ne mano, ‘Adu, bat go dini sénga tékélid brab i éntingayéne kagén, kaam so. <sup>32</sup> Endob fatut rémi tom karagiya inok féténgténg tom i kéoror tome non i tuwaréy me maak ménléhu, éndob béléewe méuyag. Brab maak méntadin, éndob béléewe énggiton.’ ”

## 16

<sup>1</sup> Atin nuret Jesusey bé de kuyugén i ni binuwaya mano, “Wén i ségétewé kawasa étew, wén i sénarigo nuwe lémiful. <sup>2</sup> Amun énggelingoo amu nuwey ni, ténavarén i sénarigo nuwe ni brab ménenginsa mano, ‘Ati ni énggelingoo ku fantag beem? Fénakawa mo begén? Bérhéhém begén i kéluhanay kérigo muwe bé kagéne kurta. Non éndaén fakayén sarigo ku beem. Mélaw kédané ku beem dob ni galbék.’ <sup>3</sup> Tidew béno, i sénarigone ni ménggitung mano, ‘Ati rigoné kuwe, ké kédané no begén dob ni galbék? Enda émbagéru gémalbék mérégén loo bé kékolute. Atin mémalawu mongot limus. <sup>4</sup> Gétiga kuy ati

rigoné kuwe inok buluk mékédanun dob galbék guwe ni, tayakuféy de étew so begén dob de lawi ro.’<sup>5</sup> Tidéw bénō, téabarén i kéluhanay de étew énggétong dob amu nuwe ni. Atin bénréhén dob sanguwe de mano, ‘Firoy i utong me bé amu guwe?’<sup>6</sup> Séménumbul i ni étew mano, ‘Mératu dakél latah nor.’ Atin ménbérén i sénarigone ni mano, ‘Ay ni sulate bé utong me. Sar go brab sulatém bé limo folo saén dakél latah nor.’<sup>7</sup> Tidéw bénō, fénénginsaa noy gérupowé ni étew énggétong mano, ‘Firoy i utong me bé amu guwe?’ Séménumbul mano, ‘Séngibu gésaku faréy.’ Atin bang i sénarigone ni, ‘Ay ni sulate bé utong me. Sar go brab sulatém bé waléw ratu gésaku saén.’<sup>8</sup> Tidéw bénō, amun i amu nuwe ni énggelingoo noy kéluhanay rénigoy sénarigo nuwe ni, dénayéwén mano, ‘Toow fo métileté i ni étew lémiful.’ ” Atin féntaus Jesusey kékérén ne mano, “I de étew dob duniye ni mas na furung ro maguyag bé de méngintulus. Non tafayé roy kékaguyag ruwe dob de géfuray gai moso. Atin i de étew méngintulus fatut so tafayé roy kékaguyag ruwe dob de géfuray gai moso dob lawayo.

<sup>9</sup> “Mélaw bérhéku begom, usar gom i kurta gome fégétabang bé de étew méskinan. Atin i Boh gome dob lawayo tayakufé no begom diyo.<sup>10</sup> Buluk mésarigon go bé klohe, mésarigon go so bé médoowe. Endob buluk énda mésarigon go bé klohe, énda so mésarigon go bé médoowe.<sup>11</sup> Atin amuk énda mésarigon gom bé de funan méungangén dob duniye, énda so mésarigon gom bé toowe fo funan méungangén dob lawayo.<sup>12</sup> Buluk énda mésarigon gom bé tamuk i dumogome étew bénō, énda so sémarig i Tuluse begom bé tamuke dob lawayo.”

<sup>13</sup> Atin ménbérén man i Jesuse mano, “Enda i sugu-suguén fakay galbéko no séréngan i ruwowe gétew amu. Non amuk mégédaw bé ségétéwe de, mérarék bé ségétéwe de. Taloo no odoro noy kétayay ségétéwe de, siyawé noy ségétéwe de. Mélaw énda fakay go modor bé Tuluse amuk fégitungé mo saén i kurtae.”

<sup>14</sup> Diyo soy de Fariseo do toow fo méuyot bé kurtae. Amun énggelingoo roy ni kétoro, déniyangka roy Jesuse.<sup>15</sup> Mélaw bénrého Jesuse bero mano, “I begome maak métintu do étew, éndob ubo-ubo saén i de ula-ulane kom dob adafay de étew. Endob i Tuluse gétiga noy fédew gome. Ati médayéwe dob de étew, toow fo mika i Tuluse de.”

<sup>16</sup> “Wén i do tafay ménusat kukuman niray Moisese bé gétahé tidéw dob Tuluse, brab wén soy do sénusat i de sénarigoy Tuluse muret bé kékérén ne bé gétahé. I de sulat ni fatut nodoron taman sa bé kégumah Juan Bautistawe. Tidéw bénō, fatut ureté i Fiyowe Uret fantag bé kékéulgéw i Tuluse. Brab kéluhanay de étew fégésé roy mahure.<sup>17</sup> Endob énda fakayén ké wén i mékédan bé kukumane, fiyon kloh saén. Mas na magad mékédan i duniye brab lawaye, éndob i kukumane énda mékéda no.”

<sup>18</sup> Atin bang Jesuse man, “Fiyon atiy gémélake bé bawag ne atin mawag man ségiyo libun, énggélamfa. Brab i lagéye bawagé noy libune génlak, énggélamfa so.”

### I kawasawe brab Lasarowe

<sup>19</sup> Ménbérén man i Jesuse mano, “Wén i ségétéwe kawasa étew kéménégal toow fo fiyo kégal, brab maguyag bé toowe fo fiyo kékaguyag sénga fuweh.<sup>20</sup> Wén soy ségétéwe étew toow fo méskinan féndawét Lasaro. Ménfeno békukang i lowoh ne. Sénga fuweh uwitén dob bengaway lawi i étewe ni kawasa,<sup>21</sup> non ménuyot damén ké géama fiyon do kloh sama saén ménlawu tidéw dob amaéy ségétéwe ni kawasa. Atin fégédét i de itu dob beene inok dilaé roy de békukangén.<sup>22</sup> Tidéw bénō, i Lasarowe ni méskinan ménléhu. Atin nuwit i de télakiy Tuluse mangéy dob tébing i katufuay de Judío féndawét Abraham dob lawayo. Brab i étewe ni kawasa ménléhu so brab lénébeng.<sup>23</sup> I ni étew kawasa, énggéangéy dob uleone emferno mérasay. Brab amun léménéngag, énggit no dob mérayuey miskinane Lasaro dob tébing Abraham.<sup>24</sup> Tidéw bénō, téabarén mano, ‘Bebe Abraham, fégédaw go begén. Suguém i Lasarowa nan angéyé no élédén i tuko ténero ne dob wayége brab féluyuté no dob dila guwe ni inok fégéfélégénéy gu. Non ay niwu dob rinoe ni mérasay.’<sup>25</sup> Endob sémenumbul i Abraham mano, ‘Adu, fégétédémém i kékuyag mo séna, gédoté moy éntingayéne fiyo atin i Lasarowe kérégénan mérasay. Béleewe ay niy Lasarowe mésésaya brab ay nan go mérasay kérégénan.<sup>26</sup> Brab

saliyu na bé de ni, wén i sébaane léfak toow fo ménalém dob élét tome inok i méuyote mifar mangéy diyoan tidéw dini taloo no tidéw diyoan mangéy dini énda géifarén.’<sup>27</sup> I kawasawe ni ménbéréh man mano, ‘Bebe, suguémi Lasarowe mangéy dob lawi i boh guwe.<sup>28</sup> Non wén i limowe gétew do dumo gu sétiman idéng diyo. Brab ureté no émféingat bero inok énda mangéy ro dob ni gonon mérasaray.’<sup>29</sup> Atin séménumbul i Abrahame mano, ‘Diyo soy de sénulat Moises brab de sénarigoy Tuluse muret bé gétaho. Gébasana roy de ménusulat diyo inok géingat ro.’<sup>30</sup> Endob ménbéréh i kawasawe ni mano, ‘Enda fo munur ro bé de ménusulat. Endob buluk wén i ségétew tidéw dob de ménléhu tébule mangéy diyo, fakay munur ro, brab gésénule ro bé de sala ro.’<sup>31</sup> Endob séménumbul i Abrahame mano, ‘Buluk énda munur ro bé de sénulat Moises brab de sénarigoy Tuluse muret, énda so munur ro fiyon fo ké wén i ségétew tébule tidéw dob de ménléhu.’ ”

## 17

<sup>1</sup> Atin ménbéréh i Jesuse dob de kuyugén mano, “I de étingayén funay de étew gésala gégumah, éndob mékégédaw-gédaw i étewe muwit de.<sup>2</sup> Toow fo géttimal ké mélukum, mélaw mas na fiyo ké ibérén dob dogote nikéton bé dakéle batéw i reer ne ké beeney funay ségétewe mantu séna méngintulus gésala.<sup>3</sup> Mélaw ingat gom. Atin buluk énggésala i dumogome, gélé gom. Brab buluk gésénule, fésagada kom.<sup>4</sup> Fiyon fo ké énggésala dob beeme fitew gule bé ségétérésange, atin séfule so fitew gule mongot fasinsiya, fésagada mo.”

<sup>5</sup> Tidéw béno, i de kuyug Jesus ménbéréh ro maro, “Kadnan, umana moy kéféngintoow geye.”

<sup>6</sup> Atin séménumbul i Jesuse mano, “Buluk wén i kéféngintoow gom loo bé kédakél i oloy sabie, gébérého kom dob kayéwe ni makom, ‘Térandut go, brab angéy go téohok dob dogoto’, atin unuro no begom.”

<sup>7</sup> Atin ménbéréh i Jesuse man mano, “Ufama, buluk i ségétewe begom wén i sugusuqué no démadu taloo no témalima bé de ayamém, buluk gégumah i ni sugu-suguén tidéw dob de galbéko no, énda bérhémo de, ‘Enggon, ama go nén.’<sup>8</sup> Yamula bérhémo de, ‘Lékas go, tafayém i amaé kuwe, atin duwoto mo begén, brab ongot-ongotém ké gilidu mama. Tidéw béno, mama go so kaam.’ ”<sup>9</sup> Atin féntaus Jesusey kékéréh ne mano, “I nan ségétew sugu-suguén, énda fatutén ongot-ongot bé kékésalamate bé kérigo nuwe bé fatute.<sup>10</sup> Ségiléw so bé begomey ni sugu-suguén. Buluk énggilid gomén bé galbéké sénugu i Tuluse rigoné kom, fégétédém gom i ni, begom saén i de sugu-suguén, mélaw kagom ongot-ongotén i kékésalamate. Rénigo gom saén i fatute rigoné kom.”

### Nuwa Jesusey foloe gétew fémuteén

<sup>11</sup> Amun i Jesuse ménangéy Jerusalem, ménagéw mangéy bé élét i de sakuf Samaria brab Galilea.<sup>12</sup> Amun mahur dob sébaane ingéd, énggébalakay de folo gétew lagéy. Wén i déruu ro fémute. Atin non fémuteén ro, témenindégo ro dob mérayue.<sup>13</sup> Brab mékes ro maro, “Jesus! Maistéro! Fégédaw go Begey!”

<sup>14</sup> Amun énggito Jesuse bero, ménbéréh mano, “Agéw gom mangéy féténgténg dob de fadi inok gétiga ro ménadi-adi gom.”<sup>15</sup> Amun ménagéw ro mangéy dob de fadi, ménadi-adi ro dob aguwone. Atin amun i ségétewe bero énggito noy ménadi-adi, ménséfule ménangéy dob Jesuse, mékes dayéwé noy Tuluse.<sup>16</sup> Atin méntéléngkéb dob adafa Jesuse fésalamat. I ni lagéy békén Judio, éndob tidéw dob sakuf i ingéde féndawét Samaria.<sup>17</sup> Ménbéréh i Jesuse dob de étew mano, “Folo gétew i ménadi-adiwe. Hon i de siyow de?<sup>18</sup> Endob ségétew saén i ménséfulee mangéy fésalamat bé Tuluse, sani ségétewe tidéw dob ségiyowe ingéd.”<sup>19</sup> Atin sénbérého Jesusey ni lagéy mano, “Tindégo ro brab taus go dob ayo muwe. Ménadi-adi gon non méngginugut go Begén.”

### Fantag bé kékéulgéw i Tuluse

<sup>20</sup> I de dumogome do Fariseo fénénginsa ro dob Jesuse ké kédiron i kégumah i gaiy kékéulgéw i Tuluse bé de étewén. Séménumbul i Jesuse mano, “I kégumah i kékéulgéw i Tuluse

énda gitono. <sup>21</sup> Enda i ségétew de gérédéh begom, ‘Ay ninén, téngténgém!’ Taloo no, ‘Diyoonén.’ Non i kéféguléw i Tuluse diyo dob de fédew gom.”

<sup>22</sup> Tidéw béno, bénréh Jesuse dob de kuyugén mano, “Gégumah i gaiwe féngonoyé kom i gito gom i gaiy késéfule i Nga i Kélawane, sani Begéne. Endob énda gito gom de. <sup>23</sup> Atin bérédéh de étew begom maro, ‘Ay diyoonén.’ Taloo no, ‘Ay ninén.’ Endob kagom munur de taloo no mangéy gom diyo inok téngténgé kom. <sup>24</sup> Non i késéfule guwe maak kilot métékow rémendaw brab géfekaya i kéluhanay lawayo. <sup>25</sup> Endob bé sunguwe, kamarasayanu, brab i de étew méuyag béni, ikaa ro Begén. <sup>26</sup> Loo so bé gai Noehe, i gaiy késéfule guwe. <sup>27</sup> Bé gai Noehe, méguaya i de étew, mama ro, miném ro, mawag ro taman bé kéahur Noehe dob barkowe. Tidéw béno, i dunuke énggégumah atin ménléne ro kéluhanan saliyu bé Noehe beroy de samungén. <sup>28</sup> Ségiléw so bé gai Lote bé gétaho. Bé béno, i de étew mama ro, miném ro, sébéléy ro, mohok ro, brab rémigo ro do lawi. <sup>29</sup> Endob bé gai kéfélé Lote bé ingéd ne Sodom, i rinoe brab do bara ménlawu maak rana tidéw dob lawayo méninasa bero kéluhanan do ménféled. <sup>30</sup> Loo so moso bé niy gai guwe séfule.

<sup>31</sup> “Bé béno gai, i de étew diyo ro dob liyuy lawi ruwe, éndaén fatut ro mahur angéyé roy de insod ro. Loo so bé niy étewe diyo dob de galbékono, énda so fatutén séfule mangéy dob lawi ne. <sup>32</sup> Fégétédém gom i bawag Lote non séménling inok téngténgé noy de insod ro ménféled, mélaw i lowoh ne ménwaléy égas timus. <sup>33</sup> Atiy méuyote émféraru bé kéuyag ne, méléhu. Endob i méléhue bé kéfuray ne Begén, gédoté noy umule magufusa. <sup>34</sup> Bérédéh ku begom, bé béno kélunganon bé késéfule guwe, wén i ruwo gétew séurir fidong, atin i ségétew de dotén, brab i ségétew de émfélé. <sup>35</sup> Atin wén i ruwowe gétew do libun géming, atin i ségétew de dotén, brab i ségétew de émfélé. <sup>36</sup> Atin ruwo gétew diyo dob galbékro ruwe, atin i ségétew de dotén, brab i ségétew de émfélé.”

<sup>37</sup> Tidéw béno, fénenginsaay de kuyugén maro, “Kadnan, hon i gonoy de ni de mérigo?”

Séménumbul i Jesuse mano, “Hon i gonoy wéne de ménléhu, diyo soy de uwak sétimu. Loo so bé towe tete étew, gégumah dob berowey kékukum i Tuluse.”

## 18

<sup>1</sup> Tidéw béno, nuret Jesuse bé de kuyugén i ni binuwaya inok démoyun ro démasal brab énda mékédan i inam ruwe. <sup>2</sup> Ménbérédéh mano, “Wén i ségétewé kémukum dob sébaane ingéd, énda fo mégilakén bé Tuluse taloo no énda fo fégadata noy étewe. <sup>3</sup> Brab wén soy ségétewé libun baléw dob no ingéd. Démoyun mangéy dob ni étew kémukum fégédaw-gédaw bé tabanga no bé tiyawa nuwe bé fétabana no damén i sébanile de. <sup>4</sup> Bé sunguwe de, mika i kémukume témabang. Endob tidéw béno, fénggitungén mano, ‘Fiyon fo ké énda mégilaku bé Tuluse brab énda fégadata kuy de étew, <sup>5</sup> éndob taluwanu bé késéfule-fule ne mongot tabang. Mélaw tabanga kuy baléwe ni, inok éndaén séfuleén taman kérégénanu.’ ”

<sup>6</sup> Atin féntaus Jesusey kérédéh ne mano, “Tuntay gom i bérédéh kémukume ni fiyon fo ké békén métintu étew. <sup>7</sup> Toow na fo tabangay Tuluse begom do fénemilién amuk démasal gom fuweh na kélunganon. Brab énda métana i kétabang ne begom. <sup>8</sup> Bérédéh ku begom, magad tabangay Tuluse begom. Endob buluk gégumah i gaiwe séfuleu, kloh saén i de munur Begén.”

<sup>9</sup> Atin nuret Jesuse man i sébaane binuwaya dob de étew fégitungé roy métintu ro éndob siyawé roy de dumo étew. <sup>10</sup> Bang Jesuse, “Wén i ruwowe gétew étew ménangéy dob lawi i Tuluse inok démasal ro. I ségétewé de Fariseo brab i ségétewé de kémubra buwis. <sup>11</sup> I Fariseowe ni téménindég atin déménasal mano, ‘Fésalamata ku Beem Tulus non békén ségiléwu bé de dumo gu étew, do ménakaw, do arumén ro, do lémamfa ro. Fésalamata ku Beem non békén ségiléwu bé diyoo étew lémiful kémubra buwis.

<sup>12</sup> Fuwasawu ruwo gule bé ségefadiyane, brab iray gu dob Beemey géfoloe bé kéluhanay

sahudé kuwe.’ <sup>13</sup> Endob i ségétéwe ni kémubra buwis téménindég dob mérayue, brab mémala énda gétengangén dob lawayo, brab éntungén i kuméng ne bé kétete i fédew ne. Atin déménasal mano, ‘Tulus, fégédaw go begén ségétéwu ménalsa.’ ” <sup>14</sup> Atin féntaus Jesusey kékéréh ne mano, “Béréhé ku begom, i ni étew kémubra buwis, amun ménule, fénsagaday Tuluse bé de salaén. Endob i Fariseowe ni, énda fénsagaday Tuluse de. Non i de étew téfégérator, fégérifantadén ro. Brab i de étew térfantad, fégératorén ro.”

<sup>15</sup> Wén i no sébaan fuweh, wén i médoowe do étew ménuité bér de nga ro dob Jesuse inok féfiyoné no bero. Endob amun énggitoy de kuyugén, génlé roy de étew ni. <sup>16</sup> Endob téabar Jesusey de nga mangéy dob Beene, brab bénréhén dob de kuyugén mano, “Féangéy gom i de nga dob Begéne. Brab kagom alangén bero non i de étew sémarig loo bé késarig i de ni nga, féguléwoy Tuluse bero. <sup>17</sup> Béréhé ku begom i toowe, buluk i késarig i ségétéwe békén loo bé késarig i ngae, énda so féguléwoy Tuluse de.”

### *I kawasawe étew*

<sup>18</sup> Atin i ségétéwe uléw i de Judio ménénginsa dob Jesuse mano, “Fiyo maistéro, ati rigoné kuwe inok gédoté kuy umule magufusa?”

<sup>19</sup> Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyu saén bé Tuluse. <sup>20</sup> Gétiga moy de sugu. Kago lémamfa, kago méméléhu, kago ménakaw, kago uretén i dumo muwe bé békéne toow, fégadata moy boh me brab idéng me.”

<sup>21</sup> Séménumbul i uléwe ni mano, “I kéluhanay de ni, nodoro ku tidew féganay klohu de séna.”

<sup>22</sup> Amun énggelingoo Jesusey ni, bénréhén de mano, “Sébaan i kulange beem. Fébeléyém i kéluhanay éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidew béo, énggonén, odor go Begén.” <sup>23</sup> Amun énggelingoo étew niy ni, toow fo tete i fédew ne, non toow fo kawasa. <sup>24</sup> Amun énggitoy Jesuse ni tete i fédew ne, bénréhén mano, “Toow fo mérégén i kéahur i de kawasa dob kéféguléw i Tuluse. <sup>25</sup> Mas na mélémuy kéahur i dakéle ayam dob tosong i darume bé kéahur i ségétéwe étew kawasa dob kéféguléw i Tuluse.”

<sup>26</sup> I de énggelingoo bér de ni, fénénginsa ro maro, “Ati mélaw i de fakay méfukas?”

<sup>27</sup> Séménumbul i Jesuse mano, “I de békén fakay rigonéy étew, fakay gérigonoy Tuluse.”

<sup>28</sup> I Pedrowe ménbérén mano, “Ténagak gey i de lawi gey inok furay gey Beem.”

<sup>29</sup> Atin bangJesuse, “Béréhé ku begom i toowe, i ségétéwe téménagak bér lawi ne, bawag ne, taloo no dumo no sétiman idéng, do lukésén, taloo no do ngaén inok ureté noy fantag bér kéféguléw i Tuluse, <sup>30</sup> gégédot toow na fo médoob de ni do gai. Brab dob de gai gérumah, gédoté noy umule magufusa.”

### *Nuret Jesusey fantag bér kéléhu ne*

<sup>31</sup> Wén i no sébaan fuweh, téabar Jesusey de folo bra ruwo gétew kuyugén sébero-bero saén, atin bénréhén dob berowe mano, “Fégélingo gom, mangéy tom Jerusalem. I Jerusalemy ingéde mérigo y kéluhanay ménulate bér gétaho sénulat i de étew sénarigoy Tuluse muret bér kékéréh ne fantag bér Begéne. <sup>32</sup> I Begéne sani Nga i Kéilawane, irayu dob de békén Judio. Atin diyangkaé ro Begén brab fémalané ro Begén, brab duraa ro Begén, <sup>33</sup> brab badasé ro Begén, brab féléhué ro Begén. Endob amuk méifus i télewe gétérésangan, tébuleu.”

<sup>34</sup> Endob i de kuyug Jesus, énda énggésobuto roy de ni bénréh Jesuse. I atag i de ni kékéréh ménbunéy dob berowe, brab énda gésobuto ro de.

### *Nuwa Jesusey langaféne*

<sup>35</sup> Amun gégumah i Jesuse dob ingéde Jeriko, diyo i ségétéwe étew langafén ménasar dob doror i aguwone mongot limus. <sup>36</sup> Amun énggelingoo noy médoowe do étew téménara, ménénginsa ké ati ni gérigonon.

<sup>37</sup> Wén i séménumbule mano, “I Jesuse tidew Nasaret témara.”

<sup>38</sup> Tidéw béno, téménabar métanug mano, “Jesus, séfu Datu Dabid, fégédaw go begén!”  
<sup>39</sup> I de étew métah bé Jesuse gélélé ro maro, “Kago selekén!” Endob taus so mékes toow na fo métanug mano, “Jesus, séfu Datu Dabid, fégédaw go begén!”  
<sup>40</sup> Atin téménréni Jesuse brab nongotén i étewe ni uwitén mangéy dob Beene. Amun énggégédétén, fénénginsaa Jesuse mano, <sup>41</sup> “Ati kétaya muwe rigoné ku dob beeme.” Séménumbul i langaféne ni mano, “Kadnan, méuyotu gérito damén.”  
<sup>42</sup> Atin bénréh Jesuse de mano, “Gérito gon. Adi-adi gon, non méngintoow go.”  
<sup>43</sup> Sonom béno, énggégito néni langaféne ni, atin ménfuray bé Jesuse démayéw bé Tuluse. Amun énggitoy de étew i ni ménrigo, dénayéw ro soy Tuluse.

## 19

### *Jesus brab Sakeo*

<sup>1</sup> Atin méntaus i Jesuse bé kéagéw ne, atin ménahur dob ingéde féndawét Jeriko.  
<sup>2</sup> Wén i ségétéwe kawasa féndawét Sakeo diyo bati. Beeney lémifule kémubra buvis dob de dumō no Judio kay de Romano. <sup>3</sup> Amun énggelingoo noy Jesuse témara, méuyot i Sakeowe téméngténg inok gétiga no ké ati Jesuse ni étew. Endob énda gito no de, non bé médoowe étew géliwét bé Jesuse brab i Sakeowe foko lagéy. <sup>4</sup> Mélaw léménantu mangéy dob métaho, brab ménénik dob kayéwe inok gito noy Jesuse témara. <sup>5</sup> Amun gédétén i Jesuse dob kayéwe ni, léménéngag brab ménésbérél bé Sakeowe mano, “Sakeo, fagayas go élus. Fatut mangéyu dob lawi me béleewe ni.”  
<sup>6</sup> Atin ménagayas i Sakeowe mélus tidéw dob kayéwe ni brab méoror ténayakufén i Jesuse dob lawi ne. <sup>7</sup> Amun i de étew énggégito bé ni, ménseguraw ro maro, “I Jesuse ni sugud-sugud mangéy dob tetee étew.”  
<sup>8</sup> Endob i Sakeowe téménindég brab ménésbérél bé Jesuse mano, “Kadnan, iray gu dob de méskinan i ténga i éntingayéne kagén. Brab buluk wén i léniful gu, bayada ku fot takéf bé éndot guwe dob berowe.”  
<sup>9</sup> Atin ménbérél i Jesuse dob beene mano, “Béleewe ni, i Tuluse fénukasén beem brab kéluhana kom dob ni lawi, non munur go ségiléw bé kéunur Abrahame. <sup>10</sup> Non i Nga i Kéilawane, sani Begéne, ménangéyu dob ni duniya inok fukasé kuy de étew ménala non maak méntadin ro.”

<sup>11</sup> Amun mégélingo ro séna, fentaus Jesusey kébérél ne bé sébaane binuwaya non gédét ron dob Jerusalem, atin non i de étew maro ké béno so géumah i kégéuléw i Tuluse. <sup>12</sup> Ménbérél mano, “Wén i ségétéwe gérotor étew ménangéy dob mérayue ingéd inok rigonén datu diyo. Tidéw béno, bantaké noy séfule. <sup>13</sup> Amun énda séna magéwén, ténabarén i foloe gétew bé de sugu-sugué no brab niraya no dob séngae ségétew sébaan bélwon félatah. Brab bénréhén bero mano, ‘Féinség gom i ni taman késfule gu.’ <sup>14</sup> Endob i do étew dob no gonon mika ro de. Mélaw séménugu ro de étew émbérél maro, ‘Mika gey bé ni étew waléy datu gey.’

<sup>15</sup> “Endob fiyon fo ké loo bé nan, ménwaléy datu. Mélaw ménfule brab fénsguo noy de sénarigo no bé de bélwon félatah inok susiné no ké wén i inségén. <sup>16</sup> I sunguwe de ménbérél mano, ‘Maistéro, i de nirayém begén félatah, énggéinség gu de na folo timan.’ <sup>17</sup> Tidéw béno, bang i datue, ‘Fiyo, mégéror go sugu-suguén. Non gésarigon go bé klohe, sarigo ku beem méguléw bé foloe do ingéd do sakuf gu.’ <sup>18</sup> Atin i géruwowe bé de sugu-suguén ménbérél mano, ‘Maistéro, i de nirayém begén félatah, énggéinség gu de na limo timan.’ <sup>19</sup> Tidéw béno, séménumbul i datue ni mano, ‘Féguléw go bé limowe do ingéd do sakuf gu.’ <sup>20</sup> Tidéw béno, i gétéléwe bé de sugu-sugué no ménbérél mano, ‘Maistéro, ay niy kurtae nirayém begén. Bénunéy gu brab nitong gu ténaléy dob munsalawe. <sup>21</sup> Non mágilaku beem non métégas go étew. Médot go bé békéne kaam. Brab kémétew go dob békéne nohokém.’ <sup>22</sup> Séménumbul i datue ni mano, ‘Tete go fo sugu-suguén. Kukumé ku beem bé de bénréhém. Gétiga mo kun médotu bé békéne kagén, brab kémétewu bé békéne nohok gu. <sup>23</sup> Amuk kémarrang go loo bé nan, sedek énda féndiyoém dob bangkuey kurta guwe inok buluk séfuleu, fakay doté ku brab wén i inségén?’ <sup>24</sup> Tidéw béno, bénréh

i datue ni dob de étew dob sékulo ruwe téménindég mano, ‘Dot gom i kurta ne ni atin iray gom dob ségétéwe énggéinség folo timan.’ <sup>25</sup> Endob séménumbul ro maro, ‘Maistéro, wénén i kaan folo kurta.’ <sup>26</sup> Ménbérél man i datue mano, ‘Béréhé ku begom, buluy wéne den médo, méirayén de na uman. Brab i étewe de wén i kulang de, fiyon foy klohe dob beene dotén so.’ <sup>27</sup> Atin fentaus i datuey ni kékérél mano, ‘Atin fantag bé de sébanil begén, mika ro de ké waléyu datu ro, uwit gom bero dini brab féléhu gom bero dob téngaanga kuwe ni.’ ”

### *I kéahur Jesuse dob Jerusalem*

<sup>28</sup> Amun i Jesuse brab de kuyugén gédét ron dob dakéle ingéd Jerusalem, <sup>29</sup> énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Ténabar Jesusey ruwowe bé de kuyugén, <sup>30</sup> brab ménsébérél bero mano, “Etah gom mangéy dob nan ingéd. Buluk gégumah gom diyo, gito gom i natife kuda diyo, énda sénay énggékuda de. Ukoh gom brab uwit gom dini. <sup>31</sup> Buluk wén i ménginsa dob begome, ‘Sedek ukohé kom?’ bérél gom de, ‘Kailangay Kadna tome.’ ”

<sup>32</sup> Nodoroy de ruwo ni gétew kuyugén i bénréh ne. Atin énggito roy natife ni kuda loo bé bénréh Jesuse. <sup>33</sup> Amun nukoh ron, énggitoy de gefe de bero brab ménénginsa ro maro, “Sedek ukohé kom i kuda geaya nan?”

<sup>34</sup> Séménumbul ro maro, “Kailangay Kadna tome.” <sup>35</sup> Atin nuwit roy kudae mangéy dob Jesuse. Brab namféno ro bé de kégal ro brab fénkuda roy Jesuse diyo. <sup>36</sup> Amun méntaus i Jesuse dob Jerusalem, i de étew bénékah roy de dumo bé de kégal ro dob aguwo Jesuse fégito roy kébasana ruwe de.

<sup>37</sup> Amun énggégumah i Jesuse dob gonone lémudug dob tuduke Olibo, i kéluhanay de médo kuyugén ménfésalamat ro dob Tuluse brab ménoror ro démayéw métanug, non bé kéluhanay de mékégaif énggito ro. <sup>38</sup> Ménkes ro maro, “Dayéwé tom i Tuluse. Féfiyonéy Tuluse damén i ni datu méngumah tidéw dob Kadnane. Endaén damén i bukuén dob lawayo.”

<sup>39</sup> I de dumo bé de Fariseo diyo do ménribuk, ménbérél ro dob Jesuse maro, “Maistéro, féantésém i de kuyugém nan.”

<sup>40</sup> Endob bang Jesuse ni, “Béréhé ku begom, buluk fén-antés ro, i de batéw ni mékes dayéwé ro Begén.”

<sup>41</sup> Amun taus ron gédét dob Jerusalem, gékulaya Jesusey ni ingéd. Amun énggito no, kénrewo no bé kéuray i na nuwe de. <sup>42</sup> Brab ménbérél mano, “Méuyotu damén gétiga kom béleewe ni ké atiy kékédane bé bukuéne brab késétibohe, éndob béleewe ni énda gétiga kom de. <sup>43</sup> Gégumah i gaiwe dob begome, géséliwétoy de sébanil begom brab langkaté ro begom inok énda géléfas gom géliwét. <sup>44</sup> Féléhué ro begom kéluhanan fiyon foy de kéluhanay de dumo gom, brab do nga gom. Atin binasané roy de lawi taman énda i sébaan batéw mésama dob rotor i sébaane de. Non énda fénggélolo gom i gaiwe bé kéangéy i Tuluse begom mémukas.”

### *Dénédél Jesusey de démagang dob lawi i Tuluse*

<sup>45</sup> Amun énggégumah i Jesuse dob Jerusalem, méntaus dob lawi i Tuluse. Amun ménahur, dénédlén i de étew démagang diyo. <sup>46</sup> Atin bénréhén beroy ni mano, “Wén i Ménsulate Kékérél i Tuluse mano, ‘I lawi guwe, lawi gonon démasal.’ Endob fénwaléy gom lawi i de ménakaw.”

<sup>47</sup> Atin sénga fuweh diyo i Jesuse témore dob Lawi i Tuluse. Endob i de uléw i de fadi, brab de témore bé kitabe, brab i de méguléw bé de étew, ténułama ro féléhuén.

<sup>48</sup> Endob énda gérigono ro de non i de médo étew énda fo séféka ro de, non ménuyot ro mégélingo bé kéluhanay de béréhé no.

ménfégédét ro dob Jesuse. <sup>2</sup> Atin fénénginsaa ro maro, “Béréhém begey ké ati atura muwe rémigo bé de ni? Ati ménirayane Beem kuwagib?”

<sup>3</sup> Sénumbulo Jesuse bero mano, “Sémuliú ménginsaan begom. Béréh gom Begén, <sup>4</sup> ati séménugue bé Juane inok mautis, Tulus loo ké étew saén?”

<sup>5</sup> Atin séédél ro maro, “Amuk béréhé tom ‘Tidéw dob Tulus’, fénginsaa no betom ké sedek énda fénéngintoowo tom i Juane. <sup>6</sup> Endob buluk béréh tom ‘Tidéw dob étew’, kéluhanay de ni étew ménlimud, ibéro ro betom batew taman méléhu tom, non féngintoowo roy Juane sénarigoy Tuluse muret bé kékéréh ne.” <sup>7</sup> Mélaw séménumbul ro maro, “Enda gétiga key ati kétidew ne de.”

<sup>8</sup> Mélaw bénréh Jesuse mano, “Enda so béréhé ku de begom ati ménirayane Begén kuwagib rémigo bé de ni rigoné ku.”

### *I binuwayaé fantag bé de tete témalima*

<sup>9</sup> Atin nuret Jesusey ni binuwaya mano, “Wén i ségétéwe étew wén i safadén nohoko no. Brab fentalimaén bé de ségiyo étew. Tidéw bénó, téngakén ménangéy dob mérayue ingéd bé ménrugaye gai. <sup>10</sup> Amun énggégumah i gaiy kékétéwe de, séménugu ségétew bé de sugu-sugué no inok mongot bé kaane de baad bé de onokén. Endob i ni étew lénubag i de témalima bé ni safad. Brab fénule ro énda i suwaréw nuwitén. <sup>11</sup> Tidéw bénó, séménugu man bé géruwowe bé de sugu-sugué no. Endob lénubag ro so brab fénémala ro brab fénule ro énda i suwaréw nuwitén. <sup>12</sup> Tidéw bénó, fénuitén soy gétéléwe bé de sugu-sugué no. Endob féndawéto ro so taman ménfali. Brab dénédél ro. <sup>13</sup> Tidéw bénó, i gefee bé ni safad ménbéréh mano, ‘Ati rigoné kuwe? Gétuwa ku. Féuwit guy tintuwe nga gu kégédawa ku. Fégadata roy nga guwe.’ <sup>14</sup> Endob amun énggitoy de témalima, ménbéréh-béréh ro maro, ‘Been i niy nga i gefee bé ni safad. Féléhué tom inok gékatom i ni safad.’ <sup>15</sup> Tidéw bénó, dénédél ro mésut tidéw dob safade brab fénléhu ro.” Atin fentaus Jesusey kékéréh ne mano, “Ati rigonéy gefee safad dob de ni témalima bé safad ne? <sup>16</sup> Angéyé no féléhuén bero. Brab irayén man dob de ségiyo témalima de.” Amun énggelingoooy de étew i ni kékéréh Jesuse, ménbéréh ro maro, “Békén damén mérigoy nan.”

<sup>17</sup> Tidéw bénó, ténéngténg Jesuse bero atin ménénginsa mano, “Amuk békén, ati atag i ni Ménsulat Kébéréh i Tuluse mano ‘I batéwe nikaay de réménigo bé lawie, been i ménwaléye toow na fo balilaga fiyo batew?’ <sup>18</sup> Fyon atiy mélawue dob nan batew mébinasa. Brab buluk i batéwe ni mélawu dob de étew, rénahé no bero maak bubuk sébuwan.”

<sup>19</sup> Atin i de témoreo bé kitabé brab do uléw i de fadi, ténulama ro kénéfo i Jesuse bé bénó gai, non gébela dob berowey ni binuwaya. Endob énda fakayén non mégilak ro bé de médoó do étew. <sup>20</sup> Mélaw ténulik ro. Atin sénarigo roy de étew ménginsaan de inok buluk békén katabuwan i késumbul ne, wén i funa ro de témebo brab uwité ro dob de étew gémamak bé de kukuman. <sup>21</sup> Tidéw bénó, i de étew ni fénginsaa ro maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Yamula toroé moy toowe fantag bé kétayay Tuluse toow. <sup>22</sup> Mélaw béréhém begey, aw fatut ba mayad gey buwis dob Sesare sani datue dob Roma taloo no énda?”

<sup>23</sup> Endob énggétiga Jesusey akar ruwe brab bénréhén bero mano, <sup>24</sup> “Irayanu félatah.” Amun niraya ro de, ménénginsa i Jesuse mano, “Ati gefee dawét brab falas gito gom dob nan?”

Séménumbul ro maro, “Ka Sesar.”

<sup>25</sup> Tidéw bénó, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

<sup>26</sup> I de étew ténulama ro fégakaran i Jesuse, toow ro fo ménggaif, non toow fo fiyoy késumbul ne de. Mélaw énda i funa ro témebo bé Jesuse. Komon ménantés ro.

### *Fantag bé kétébulee*

<sup>27</sup> Atin wén i do Saduseo diyo, sani de énda méngintoow bé kétébule i Tuluse bé de étew moso. Mélaw ménfégédét ro dob Jesuse ménginsa maro, <sup>28</sup> “Maistéro, sénulat

Moisese betom i kukumane bé buluk i ofo i étewé ménléhu, brab énggfélelo noy bawag ne, énda i nga ro, fatut bawagéy tuwaréy ne inok wén i séfu i ni étewé bé tuwaréy ne. <sup>29</sup> Ufama, wén i fitéw gétew sétuwaréy falan lagéy. Brab i ofoe de ménawag. Tidéw béno, ménléhu énda i nga ro. <sup>30</sup> Tidéw béno, i gétunduge de bénawagén soy bawage fénled i ofo ne. Atin ménléhu so énda i nga ro. <sup>31</sup> Atin i gétéléwe de bénawagén so taman dob géfítew ruwe. Endob ménléhu ro kéluhanan énda i nga ro. <sup>32</sup> Tidéw béno, ménléhu soy ni libun. <sup>33</sup> Mélaw bé gaiy kétébulee moso, ati isuwe bawag i ni libun bé ni fitéw gétew sétiman idéng? Non énggébawaga ro kéluhanan bé méuyag ro de séna.”

<sup>34</sup> Séménumbul i Jesuse mano, “I de étewé béleewe, sébawag ro. <sup>35</sup> Endob i de étewé métotoror tébuleén géangéy dob lawayo, éndaén sébawag ro. <sup>36</sup> Non ségiléw ro bé de télaki brab énda méléhu ro. Beroy de nga i Tuluse non méntébule ro. <sup>37</sup> Atin fantag bé kétébulee, fiyon i Moisese féngéetuwa noy wén i kétébule. Non dob mérinoe kayéw, féndawétén i Kadnane ‘Tuluse féngadafé Abrahame, Isake, brab Jakobe.’ <sup>38</sup> I atag i ni, i Tuluse féngadaféy de méuyag étewé, békén do ménléhu. Non i kéluhanay ménléhue, méuyag séna dob karang i Tuluse.”

<sup>39</sup> Atin i de dumō bé de téromo bé kitabé ménbéréh ro maro, “Fiyoy késumbul me Maistéro.” <sup>40</sup> Tidéw béno, énda ménbaraw ro de ménginsaan man.

<sup>41</sup> Atin bénréh Jesuse dob berowe mano, “Ati kéfakay ne ké béréh i de étewé i Kristowe séfu Dabid? <sup>42</sup> Non fiyon i Dabide bénréhén dob kaane libro féndawét ‘De Kanta’ mano, ‘I Kadnane ménbéréh dob Kadna kuwe, sar go dob kuwono kuwe, <sup>43</sup> taman témabanu bé de sébanil Beem.’ ” <sup>44</sup> Atin féntaus Jesusey kékéréh ne mano, “Amuk féndawét Dabidey Kristowe ‘Kadnan’, ati kéfakay Kristowe séfu Dabid?”

<sup>45</sup> Amun dob téngaangay de kéluhanay de étewé mégélingo, bénréh Jesuse dob de kuyugén mano, <sup>46</sup> “Ingat gom bé de maistéroy de kukuman non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan, brab méuyot ro mésar dob de fiyo saran dob de lawi féngadafan brab dob de karagiya. <sup>47</sup> Endob lafisé roy de libun baléw inok afasé roy de lawi ro. Tidéw béno, démasal ro bé de métaah kédasal dob téngaangay de étewé non marok médirung i de ni tete rigoné ro. Endob i ni do étewé toow na fo géttimal ké mékukum ro moso.”

## 21

<sup>1</sup> Amun diyo i Jesuse dob lawi i Tuluse, énggito noy de kawasa étewé lémawu ro kurta dob ahurone kurta. <sup>2</sup> Atin énggito no soy ségétéwe libun baléw méskinan, méniray saén ruwo lafin furo kurta tintu énda balilagaén. <sup>3</sup> Atin bénréh Jesuse mano, “Béréhé ku begom i toowe, i ni méskinan libun baléw maak mas na médooy niray ne bé de dumō étewé kawasa. <sup>4</sup> Non i de ni étewé kawasa, méniray ro saén kloh tidéw dob de médooy kurta ro. Endob i ni baléw éntéyén i kéluhanay kurta ne fégéfaguyagén.”

### Fantag bé tamfaday duniyae

<sup>5</sup> Atin i de dumō bé de étewé diyo séuret-uret ro fantag bé lawi i Tuluse rénigo bé de batéw toow fo fiyo brab de toow fo fiyo falasén balilaga éntingayén niray i de étewé dob Tuluse. Endob ménbéréh i Jesuse mano, <sup>6</sup> “Gégumah mosoy gaiwe, i kéluhanane gito gom mébinasa. Brab fiyon i de batéw féngérido de émbéragar ro.”

<sup>7</sup> Atin ménenginsa ro maro, “Maistéro, kédiron mérigoy de ni? Brab ati fégéolonone de bé ni gai ké gédétén gumah?”

<sup>8</sup> Atin séménumbul i Jesuse mano, “Ingat gom inok énda géfagakaran gom. Non médooy mosoy de étewé géumah usaré roy dawét guwe, brab émbéréh ro maro, ‘Begéney Kristowe, brab i gai guwe ay ni nén.’ Endob kagom unuron bero loo ké furay gom bero.

<sup>9</sup> Atin kagom mégilak ké gélingoo kom i kékéréh i sétibohé brab gélingoo kom soy fantage bé de gira. I kéluhanay de ni mérigo éndob békén sénay niy tamanane.”

<sup>10</sup> Bénréh Jesuse man mano, “I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. <sup>11</sup> Atin wén mosoy do émbagér luba, brab lénggob, brab do médooy mékégilak kérégénon dob de ségiyo-giyo ingéd. Brab wén

mosoy téfégito fégélolonon de tidéw dob lawayo. <sup>12</sup> Endob bé énda séna mérigoy de ni, kéfoén gom brab kérégénan gom sabaf bé kéunur gome. Brab uwitén gom dob de lawi féngadafan inok kukumén gom brab férисunén gom. Brab uwitén gom dob adafay de datu inok kukumén gom sabaf begom i do kuyug gu. <sup>13</sup> Endob amuk mérigoy de ni dob begome, been i niy gaiy kéuret gome bé Fiyowe Uret dob berowe. <sup>14</sup> Fégétédém gom i ni, amuk mérigoy de ni dob begome, kagom émbuku fantag bé ati késumbul gome. <sup>15</sup> Non iraya ku begom kégétigan brab do kébéréh inok i de sébanil begom énda i fiyo késumbulo ro begom. <sup>16</sup> Fiyon i de lukés gom brab do dumo gom sétiman idéng brab de samung gom brab do dumo gom, iray ro begom dob de gémamak kukuman inok féléhué roy de dumo begom. <sup>17</sup> Atin i kéluhanay de étew mérarék ro begom sabaf bé Begéne. <sup>18</sup> Endob fiyon fo ké méléhu gom, maak énda gébinasana roy fiyon sébaan buk dob de uléw gom. <sup>19</sup> Fédayday gom munur Begén bé nan gai féfasangén gom non been i funa kome méfukas.

<sup>20</sup> “Atin buluk gito gom i Jerusaleme séliwétoy de sundalo néen, émfégétigan begom bé gédétén i kébinasa nuwe. <sup>21</sup> Atin i de étew bati dob sakuf Judeawe fatut ro méraréy dob de tuduk. Brab de étew dob Jerusalem fatut ro so méraréy. Brab i de étew géliyu de, békén fatut ro mahur. <sup>22</sup> Non been i niy gaiwe kémukum i Tuluse inok métuman i Ménsumate Kébéréh i Tuluse. <sup>23</sup> Toow fo mékégédaw-gédaw i de libun obor brab de libun mériton non gégumah i gaiwe toow fo mékéglak atin i Tuluse kukumé noy de ni do étew Judio. <sup>24</sup> Atin i de dumo étew féléhuén tibohén bé sundange, brab i de dumo de férissunén dob de ségiyo-giyo ingéd. Brab i de étew békén Judio daa roy Jerusaleme inok mébinasa taman gilid i karowe gai.”

<sup>25</sup> “Wén so mosoy fégélolonon de dob térsange brab térsang kélunganone brab de gitoon, brab dob duniiae niy kéluhanay de ingéd kégilakan non bé késelekéy émbagére bagél dob dogote. <sup>26</sup> I de étew mésumba ro funowén bé kégilak ruwe ongot-ongot bé ati mérigowe dob duniiae ni, atin non i de étingayén dob lawayo mékuyung. <sup>27</sup> Tidéw béno, i Nga i Kéilawane, sani Begéne, téfégítowu tidéw dob lawayo gégumah dob rawéne toow fo barakatan brab rémendaw. <sup>28</sup> Buluk mérigoy de ni, tindég gom brab léngag gom non gédétén gumah i gaiwe méfukas gom.”

<sup>29</sup> Tidéw béno, nuret Jesuse beroy ni binuwaya mano, “Fégitung gom i de kayéw. <sup>30</sup> Dini dob betome ni, buluk gito gom i de dau ro mégalin, gétiga kom gédétén i gaiwe méduf. <sup>31</sup> Loo so bé ni amuk gito gom i de ni mérigo, gétiga kom gédétén i kégumah i kéféguléw i Tuluse,

<sup>32</sup> “Béréhé ku begom i toowe, i de étew méuyag béni, énda méléhu ro taman mérigoy de ni. <sup>33</sup> I lawaye brab duniiae méalfa ro, éndob i kébéréh guwe énda méalfaén.

<sup>34</sup> “Ingat gom. Kagom démoyun fégitungén i kéfaguyaya brab téolon-olone, brab kagom toowén fégitungén i kéuyaga kome, non i nan gai séfuleu gégumah bé gaiwe békén karangé kom. <sup>35</sup> Non tékow gégumah i ni gai dob kéluhanay de étew dob duniiae ni. <sup>36</sup> Ingat gom brab sénga tékélid gom dasal inok émbagér gom énda mékaid gom bé kéluhanay de ni mérigo. Atin gétindég gom dob adafa kuwe énda mémala gom.”

<sup>37</sup> Bé béno do gai, sénga fuweh mangéy i Jesuse téromo dob lawi i Tuluse, brab sénga kélunganon ménangéy dob tuduke Olibo. <sup>38</sup> Brab i kéluhanay de étew dob no gonon, sénga toow géfuwén mangéy ro dob lawi i Tuluse inok fégélingoé roy Jesuse muret.

## 22

### I rénigo Judase

<sup>1</sup> Bé béno gai, i kékanduli i de Judio féndawét “Témara” gédétén. Bé no kanduli, amaé roy fane énda fénrukén. <sup>2</sup> Atin i de odoroy de fadi brab de téromo bé kitabé séméléd ro bé ati kékélio ruwe bé Jesuse. Endob sékémén saén, non mégilak ro bé de étew.

<sup>3</sup> Tidéw béno, i Satanase rénahuko noy Judas Iskariote ségétew bé de folo bra ruwo kuyug Jesuse. <sup>4</sup> Atin ménangéy i Judase dob de uléw i de fadi brab de méguléw bé lawi i Tuluse brab sénbéréh roy ati kékéfo ro bé Jesuse. <sup>5</sup> Toow ro de fo ménoror brab ménuyot

ro de ké iraya ro kurta i Judase. <sup>6</sup> Tidéw béno, ménagayun i Judase, brab sénlédén i gaiwe ké énda i dumo Jesuse médoō étew inok fékéfoén.

<sup>7</sup> Amun ménifus i firoye gétérésangan, ménggumah i gaiwe fatut i de Judio sémumbali nati bili-bili kay kékandulie féndawé “Témara”. <sup>8</sup> Mélaw sénugu Jesusey ruwowe bé de kuyugén ro Pedro brab Juan. Brab ménsébérél bero mano, “Agéw gom brab tafay gom i amaé tome kay kandulie ni ‘Témara’.”

<sup>9</sup> Ménénginsa ro dob Jesuse maro, “Hon i kétaya muwe de gono key témodoh?”

<sup>10</sup> Séménumbul i Jesuse mano, “Dob Jerusalem. Amuk gumah gomén diyo gébalaka kom i ségetéwe étew lagéy ménuit binangga ménféno wayég. Furay gom de mangéy dob lawie ayo no. <sup>11</sup> Tidéw béno, bérél bero gefee bé lawie makom, ‘Méuyot i Maistérowe ké gétiga no hon i sibéye de gono no mama beroy de kuyugén bé ni kékanduli.’ <sup>12</sup> Atin i gefee bé lawie toroé no begom i dakéle sibéy wén i de kagamitan de dob rotor i lawie. Diyo i kéluhanay gamité kome. Diyo tafay gom i kéluhanay amaé tome.”

<sup>13</sup> I Pedrowe brab Juane ménangéy ro dob no ingéd. Atin énggitoy kéluhanane loo bé kékéberél Jesuse de bero. Tidéw béno, ténafoy roy de amaé ro kay kandulie “Témara”.

### I kéama i Kadnane

<sup>14</sup> Amun ménahur i Jesuse dob lawie, atin amun gumahén i urase, ménasar dob doror i ahayane beroy de kuyugén. <sup>15</sup> Atin ménbérél i Jesuse mano, “Toow fo méuyotu mama séréngan begom bé ni kéama kanduli ‘Témara’ non éndaén mérugayén taman mékukumu. <sup>16</sup> Bérélhé ku begom i toowe, éndaén mamau bé ni kéama bé kékandulie ‘Témara’ taman gégumah i gaiy kékéfukéw i Tuluse bé de étewén. Bé no gai, wén i mantu atag i ni kanduli.”

<sup>17</sup> Tidéw béno, éndot Jesusey tabu i arake brab ménfésalamat dob Tuluse. Atin nirayén i tabue dob de kuyugén. Atin bénréhén dob berowe mano, “Edot gom i ni brab sétukido kom i arake ni. <sup>18</sup> Bérélhé ku begom, éndaén minému arak loo bé ni taman gégumah i gaiy kékéfukéw i Tuluse bé de étewén.”

<sup>19</sup> Tidéw béno, éndotén i fane, brab ménfésalamat dob Tuluse brab sénkébeng-kékébengén, brab sénaarén dob de kuyugén. Atin ménbérél mano, “Ay ni fane. Been i lowoh guwe, niray fégéfukas begom. Ama gom i ni inok gétédémo kom Begén.” <sup>20</sup> Amun énggilid i kéama ruwe, éndotén i tabue brab ménbérél mano, “I tabue ni been i niy dara guwe rémanas, fégéfukas begom, sani tandaé bé mantuwe fasad i Tuluse bé de étewén.

<sup>21</sup> “Endob téngténg gom. I émfékéfo séko Begén dini dob Begéne ni mama. <sup>22</sup> I Nga i Kéilawane, sani Begéne, féléhuén loo bé kétayay Tuluse mérigo. Endob mékégedaw-gédaw i étewe ni émfékéfo, non mékukum fo toow.”

<sup>23</sup> Tidéw béno, i de kuyugén séfénginsa ro ké ati isuwe bero rémigo bé ni.

<sup>24</sup> Tidéw béno, ménseédel de kuyugén ké ati isuwe bero toow na fo gérotor. <sup>25</sup> Atin bang Jesuse dob berowe, “I de étew datu dob ni duniya wén i atura ro dob de étew ro, brab i de uléw tabarén ‘Dumoy de étew.’ <sup>26</sup> Endob békén fatut loo bé ni dob begome. I toowe gérotor bé begomey fatute fénggiring bé toowe tuwaréy begom. Brab i méguléwe géiring bé sugu-suguéne. <sup>27</sup> Ufama, ati isuwe mas na gérotor, i étewe duwoton ménasar mama, taloo no i étewe démuwoton de? Békén ba i étewe ménasar mama? Endob i Begéne, ay niwu dob kérara gome loo bé ségetéwe sugu-suguén.

<sup>28</sup> “Atin i begome do méntaus ménodor Begén fiyon fo ké bé de gai kérégénanu. <sup>29</sup> Atin loo bé kériray i Boh guwe Begén bé kuwagibé méguléw, iraya ku so begom kuwagib loo bé ni. <sup>30</sup> Bé gaiwe méguléwu, mama gom brab miném gom séréngan Begén. Brab géésar gom dob de saran kay de datu inok kémukum gom bé foloe brab ruwo do sakuf i de Judio.”

### Nuret Jesusey fantag bé Pedrowe

<sup>31</sup> Atin ménbérél i Jesuse dob Simon Pedrowe mano, “Simon, fégélingoém. I Satanase méntungkas bé tukawa no begom kéluhanan, loo bé kékfanire bé faréye inok féganané noy fiyowe bé ukofe. <sup>32</sup> Endob i Begéne, dénasala ku beem inok i kékéfingintoow

me méégét. Brab amuk séfule go mangéy dob Begéne, féégétém i kékéngintoow i dumo muwe.”

<sup>33</sup> Endob bang Pedrowe, “Kadnan, modoru Beem fiyon fo ké dob kalabusuono taloo no fiyon fo ké dob léhuone.”

<sup>34</sup> Séménumbul i Jesuse mano, “Pedro, énda séna ukoro i férufete béleewe, dirungé mo Begén télew gule bé énda gélolo mo Begén.”

<sup>35</sup> Tidéw béno, fénénginsaa Jesuse bero mano, “Bé késugu guwe begom bé kagom muwit kurta taloo no amaén, brab safatos, wén bay kulang dob begome?”

Séménumbul ro maro, “Enda.”

<sup>36</sup> “Endob béleewe,” bang Jesuse, “buluy wéne kurtaén brab amaén, uwité no, brab buluy éndae sundangén, fébéléyén i géruwowe lafin kégalén inok fégébéléyén sundang.

<sup>37</sup> Non béréhé ku begom i ni, métuman i Ménsulate Kébéréh i Tuluse fantag bé Begéne mano, ‘I ni étew mékukum maak ségétew énda ménodorén bé kitab i gémamake kukuman.’ Hoo, i ménsulate fantag bé Begéne féganayén métuman béni.”

<sup>38</sup> Tidéw béno, i de kuyugén maro, “Kadnan, wén i ruwo timan sundang dob ni.”

Atin séménumbul i Jesuse mano, “Békén tintu sundang i bénréh guwe begom! Témérén tomén séuret-uret!”

<sup>39</sup> Tidéw béno, ménagéw i Jesuse loo bé adat ne rigoné no mangéy dob tuduke Olibo. Atin ménodor i de kuyugén de. <sup>40</sup> Amun gérumah ro dob no gonon, bang Jesuse, “Dasal gom inok énda métukawan gom.”

<sup>41</sup> Tidéw béno, ménféravy bero gumaha téabar. Atin ménlingkuwéd brab déménasal, <sup>42</sup> mano, “abay, buluk méuyot go de, kago fédayaén Begén mérasy. Endob i kaame kétayan i mérigowe damén, békén kagén kétayan.” <sup>43</sup> Tidéw béno, i télaikiwe tidéw dob lawayo méntéfego dob Beene brab fénbagérén. <sup>44</sup> Bé béno uras, toow fo ménbuku i Jesuse. Brab toow fo émbagér i kédasal ne. Atin ménénét fo toow, brab léménuyut i énéti ne dob fantade maak dara.

<sup>45</sup> Amun énggild démasal, téménindég ménagéw ménangéy dob de kuyugén. Endob énggito no bero énggfidong ro non lugotén ro non émbuku ro. <sup>46</sup> Mélaw nulégén bero mano, “Sedek fidong gom? Tek gom brab dasal gom inok énda métukawan gom.”

### I kékéfoe bé Jesuse

<sup>47</sup> Amun émbérén sénay Jesuse, énggégumah i médoowe étew, brab Judasey ségétewé bérén de folo bra ruwo gétew kuyugén i méngguléwe bero. Féngédéto noy Jesuse inok aréké no. <sup>48</sup> Fénénginsaa Jesuse mano, “Judas, fékéfoém i Nga i Kéilawane bérén arék me?”

<sup>49</sup> Amun énggitoy de kuyug Jesus i ni ménrigo, ménbérén ro maro, “Kadnan, sétiboh gey bérén de sundang gey?” <sup>50</sup> Atin i ségétewé bérén de kuyugén téni bohén i riféy gérotore fadi brab ménasilaf i kuwonone kelingoén.

<sup>51</sup> Endob bang Jesuse, “Ngaén i nan!” Brab génamakén i kelingoéne ménfali, atin ménwa.

<sup>52</sup> Atin ménbérén i Jesuse dob de odoroy de fadi, brab de odoroy de mantay bérén lawi i Tuluse, brab de odoroy de Judio mangéy de kéméfo mano, “Sedek ménuit gom do sundang brab do tafés, maak ségétew tulisan kérof kom? <sup>53</sup> Sénga fuweh Betom dob lawi i Tuluse, éndob énda kénéfo gom Begén. Endob méuyot gom rigoné kom i ni bérén, non délémon, brab énda i gégo begom.”

### Dénirung Pedrowe

<sup>54</sup> Tidéw béno, kénéfo roy Jesuse, brab nuvit ro dob lawi i gérotore fadi. Brab i Pedrowe ménfuray bero, éndob ménféravy kloh. <sup>55</sup> Atin wén i aféye nuyag diyo dob kérara i fésayawane brab wén i de ménasar géliwét. Ménasar so diyo i Pedrowe. <sup>56</sup> Enggitoy ségétewé kénogon sugu-suguén i Pedrowe brab bénréhén mano, “I étewé ni dumo no.”

<sup>57</sup> Endob dénirung Pedrowe mano, “Di, énda gélolo guy nan étew ménkéfo.”

<sup>58</sup> Enda ménrugayén, ségétew man i énggégélo lowe bérén Pedrowe mano, “Beem soy ségétewé bero.”

Endob séménumbul i Pedrowe mano, “Békén! Békén dumo no begén!”

<sup>59</sup> Amun ségéuras man tidew béno, ségétew man i ménbéréhe mano, “I ni étew tintu dumo no, non ségétew étew so tidew Galilea.”

<sup>60</sup> Séménumbul man i Pedrowe mano, “Adih, énda gétiga kuy bérhé muwa nan.” Atin sonom béno, i férufete ménukoro bé émbéréh sénay Pedrowe. <sup>61</sup> Atin i Kadnane Jesus séménling brab ténéngténgén i Pedrowe. Bé béno so énggétédémo Pedrowey bénréh Jesus mano, “Enda séna ukoro i férufete béléewe, dirungé mo Begén télèw gule bé énda gélolo mo Begén.” <sup>62</sup> Tidew béno, ménsut i Pedrowe ménangéy dob fuwehe brab toow fo kéménrew.

### *I kékukume bé Jesus*

<sup>63</sup> Atin i de étew mantayan bé Jesus féganayé ron tafésén brab diyangkaén. <sup>64</sup> Tidew béno, ténléb roy de moto no bé munsalawe brab féantuk ro de ké ati téménafése de.

<sup>65</sup> Brab toow ro fo fénémalay Jesus bé tetee kékéréh ro.

<sup>66</sup> Amun géfuwénén, i de odoroy de Judio, brab de odoroy de fadi, brab do téromo bé kitabe, ménslimud ro, brab fén-uwit roy Jesus dob téngaanga ruwe. <sup>67</sup> Atin fénénginsaa roy Jesus maro, “Buluk Beem i Kristowe, sani fénémili i Tuluse méguléw, bérhéhém begey.”

Atin séménumbul i Jesus mano, “Fiyon fo ké bérhé ku begom, énda méginugut gom de. <sup>68</sup> Atin buluk wén i fénénginsaa ku begom, énda sumbulo kom de. <sup>69</sup> Endob tidew béléewe, i Nga i Kéilawane fésarén dob kuwonoy barakatane Tulus.”

<sup>70</sup> Mélaw fénénginsaa roy Jesus maro, “Aw Nga i Tuluse Beem?”

Atin séménumbul i Jesus mano, “Toow i nan bénréh gom bé Nga i Tuluse Begén.”

<sup>71</sup> Tidew béno, ménbéréh ro maro, “Endaén kailanga tom i témboe de dob betome. Non énggelingoo tomén tidew dob Beene.”

## 23

<sup>1</sup> Tidew béno, i kéluhana ruwe ménlimud, nuwit roy Jesus mangéy dob Pilatowe sani méguléwe tidew Roma. <sup>2</sup> Nuret ro dob Pilatowey kéluhanay de tete rénigo Jesus kun. Bénréh ro maro, “Enggitoy i ni étew fanangguwité noy de étew inok sébanil ro begom do gémamak kukuman. Enda fébayade no bero buwis dob toowe fo gérator datu féndawét Sesar dob Roma. Bénréhén so bé Beene kun i Kristowe sani ségétewé datu.”

<sup>3</sup> Tidew béno, fénénginsaa Pilatowey Jesus mano, “Aw Beem i Datu i de Judio?”

Séménumbul i Jesus mano, “Beemey ménbéréhe de.”

<sup>4</sup> Atin bang Pilatowe dob de odoroy de Judio brab dob kéluhanay de étew diyo, “Karangé ku, énda i funa no fatut mémukum.”

<sup>5</sup> Endob fétausé ro soy kétébo ruwe de maro, “I ni étew téménoro dob kéluhanay sugud i de ingéd dob Judea fanangguwité noy de étew sétiboh begom do gémamak kukuman. Féngganayén rénigoy ni dob Galilea, atin ménangéy dini inok rigoné no so.”

<sup>6</sup> Amun énggelingoo Pilatowey ni, ménénginsa mano, “Aw tidew Galilea i ni étew?”

<sup>7</sup> Amun énggétiga no tidew diyo, sénugu Pilatowey Jesus mangéy dob Herode, sani datue dob Galilea, non diyo dob Jerusalem bé no gai. <sup>8</sup> Ménoror i Herode bé kégito nuwe bé Jesus. Non médooy énggelingoo nuwe fantag bé Jesus, brab ménrugayén i kéuyot ne de géségo. Témayan de damén ké gito noy Jesus rémigo mémégaif. <sup>9</sup> Mélaw médooy fénénginsa ne bé Jesus. Endob énda séménumbul i Jesus. <sup>10</sup> Diyo soy de odoroy de fadi brab de téromo bé kitabe. Atin toow ro fo ténebo i Jesus. Endob énda soy sumbul Jesus de. <sup>11</sup> Mélaw i Herode brab de sundalo no, déniyangka ro brab fénémala ro. Tidew béno, fénkégala roy Jesus bé toowe fo fiyo métahé kégal maak datu brab fénésfule ro mangéy dob Pilatowe. <sup>12</sup> Tidew béno, i Herode brab Pilatowe ménwaléy ro sékélayaman, fiyon fo ké sébanil ro ménntaén.

<sup>13</sup> Ténawag Pilatowey de odoroy de Judio, brab de odoroy de fadi, brab de ségiyo-giyo étew. <sup>14</sup> Atin bénréhén bero mano, “Nuwit gom i ni étew Jesus dob begéne, brab bénréh gom fanangguwité noy de étew gom sétiboh begey do gémamak kukuman. Endob béléewe fénénginsaa ku dob adafa kome, atin énggétiga ku énda i toow bé kéluhanay

bénréh gome. <sup>15</sup> I datu Herode énggétiga no so énda i salaén loo bé de bénréh gom, mélaw fénsefuleén so mangéy dini. I ni étew énda i rénigo no tete. Békén fatut féléhuén.

<sup>16</sup> Mélaw fébadas gu saén, tidéw béno fétangéy gu.”

<sup>17</sup> I ni ménrigo bé gaiy kékandulie “Témara”. Atin i adat i méguléwe tidéw Roma sénga kanduli “Témara” témancéy ségétew ménkalabusu inok fiyoy fédew i de Judio de.

<sup>18</sup> Mélaw non énda kukumé Pilatowey Jesuse féléhuén, i de étew ménsélimud ménkes maro, “Féléhu gom, brab tangéy gom i Barabase.” <sup>19</sup> (I Barabase ni étew ménférisu non ménamung sétiboh dob Jerusalem bé de gémamak kukuman. Ménméléhu so do étew.)

<sup>20</sup> I Pilatowe ménbéréh man ségule dob de étew ménsélimud bé i kétaya nuwey Jesuse tangéyéne. <sup>21</sup> Endob ménkes i de étew maro, “Féléhu gom! Kélabo gom dob kruse!”

<sup>22</sup> Endob ménbéréh i Pilatowe bé gétéléw ne gule mano, “Ati rénigoy ni étew? Enda i gétiga ku funa tom de méméléhu. Fétafés gu sa atin tangéyén.”

<sup>23</sup> Endob i de étew ménkes ro man minut métanug i Jesuse kélabonén dob kruse.

<sup>24</sup> Tidéw béno, sabaf bé kéékes ruwe, ménagayun i Pilatowe bé kéongot ruwe kémukum bé Jesuse. <sup>25</sup> Atin loo bé kétaya ruwe, témancéy i Barabase, sani étewe férisu sabaf bé beeney ségétewé méméléhu brab fénstétiyahen i de étew sébanil bé de gémamak kukuman. Atin i Pilatowe nirayén i Jesuse dob de étew ménsélimud inok rigoné roy ati kétaya ruwe rigonén dob Jesuse.

### Kélabo roy Jesuse dob kruse

<sup>26</sup> Nuwit i de étew i Jesuse mésut dob Jerusalem inok kélaboné ro dob kruse. Atin dob de aguwon, énggabalaka roy étewe féndawét Simon tidéw dob ingéde Siren. Béno sénay kégumah ne dob no ingéd. Fénodor ro inok fégésé ro démuwal bé kruse furay bé Jesuse.

<sup>27</sup> I médoowe étew furay bé Jesuse. I de dumero do libun kémérew ro brab rémuung non bé kérigo ruwe bé Jesuse. <sup>28</sup> Sénling Jesuse bero mano, “Do libun tidéw Jerusalem, kagom kéréwon Begén. Kéréwo kom i de lowoh gom brab de nga gom. <sup>29</sup> Non gégumah i gaiwe mérégén brab émbéréh i de étew maro, ‘Méoror i de libun énda mén-obor ro, énda i do nga ro, brab énda i féntutu ro do nga.’ <sup>30</sup> Bé no gai, émbéréh i de étew dob de tuduk maro, ‘Tamfurén gey!’ brab dob de burur, ‘Bunéyén gey!’ <sup>31</sup> Non buluk rigonéy de étew i ni dob ségétewé étew énda i rénigo no tete, toow na fo mas gétimal dob de étew réménigo tete.”

<sup>32</sup> Atin ménuit ro so ruwo gétew férisu inok séréngan ro féléhuén bé Jesuse. <sup>33</sup> Amun méngegumah ro dob no gonon féndawét “kulobong uléw”, kénlabo ro diyo i Jesuse dob kruse ni. Kénlabo ro soy ruwowe gétew férisu dob de krus. I sébaane de fingé dob kuwono Jesuse, brab i sébaane de dob fingé biwong Jesuse. <sup>34</sup> Tidéw béno, déménasal i Jesuse mano, “Abay, fésagada mo bero non énda gétiga roy rigoné ruwe.” Atin i de sundalo sénkungkungo roy ati gégédote bé kégal Jesuse. <sup>35</sup> I lala i de étew téménindégi diyo témanud, i de odoroy de Judio déniyangka roy Jesuse maro, “Ténabangén i de ségiyo étew inok énda méléhu ro. Mélaw, buluk Beeney Kristowe tintu Mémukas fénemili i Tuluse, sedek énda gétabanga noy lowoh ne inok énda méléhuén?”

<sup>36</sup> Déniyangka i de sundalo so. Atin téningé ro brab niraya ro bé mélémuwe arak brab ménbéréh ro maro, <sup>37</sup> “Buluk Beemey datu i de Judio, tabangém i lowoh me.”

<sup>38</sup> Brab wén i ménuslate dob rotor i uléw Jesuse mano, “Ay niy datu i de Judio.”

<sup>39</sup> Atin i ségétewé bé de férisu ménbitin diyo bero Jesuse, diyangkaé no soy Jesuse mano, “Aw békén ba Beemey Kristowe Mémukas? Mélaw tabangém begey brab i kaame lowoh.”

<sup>40</sup> Endob i dumero nuwe férisu ménbéréh dob sunguwe de mano, “Kago émbéréh loo bé nan! Aw énda mágilak go bé Tuluse? I betome télew gétew ménkukum féléhuén. <sup>41</sup> Atin i betowe fatut féléhuén non bé de tete rénigo to. Endob i ni étew énda foy tete rénigo no.” <sup>42</sup> Tidéw béno, ménbéréh dob Jesuse mano, “O Jesus, fégétédéménu amuk Beemén i méguléwe.”

<sup>43</sup> Séménumbul i Jesuse mano, “Béréhé ku beem i toowe, béléewe séko diyo go dob Begéne dob bélwono fantad.”

*I kéléhu Jesuse*

<sup>44</sup> Amun géutuhén, éndaén réméndaw i térsange. Déménlémon i fantade taman ménifus i télewe géuras. <sup>45</sup> Tidew béno, i rindunge bénitin dob mékétéfuwe sibéy dob lawi i Tuluse, ruwoy ménsésédaya nuwe. <sup>46</sup> Atin i Jesuse ménkes métanug mano, “Abay, sarigé kuy kamatu guwe dob Beeme.” Amun énggérérého noy ni, ménléhu i Jesuse.

<sup>47</sup> Wén i ségetéwe gérator odoroy de sundalo énggito noy ni ménrigo, atin dénayéwén i Tuluse mano, “Toow fo métintuy ni étew!”

<sup>48</sup> I de étew ménslimud diyo, amun énggito roy ni ménrigo, ménule ro ménmala brab tete i de fédew ro. <sup>49</sup> Atin i kéluhanay de étew énggabalaka roy Jesuse, fiyon i médoowe bé de libun tidew Galilea ménodor de, téménindég ro dob mérayue téméngténg brab énggito ro soy kéluhanay ni ménrigo.

*I kélébénge bé Jesuse*

<sup>50</sup> Wén i ségetéwe lagéy féndawét Jose tidew Arimatea sébaan ingéd dob Judea. Ségetéw fiyo étew brab ménunur bé de kukumay de Judio. <sup>51</sup> Fiyon fo ké beeney ségetéwe bé de kéfédéway de Judio, énda ménagayu no bé rénigo ruwe bé Jesuse. Ongot-ongoté no soy gaiy kéguléw i Tuluse bé de étewén. <sup>52</sup> Ménangéy dob Pilatowe brab nongotén i bangkay Jesuse. <sup>53</sup> Atin éndotén i bangkay Jesuse tidew dob kruse brab bénausén bé fiyowe safut, brab nahurén dob lébénge téñosong dob rangih i fingase. I ni lébénge énda séna ménlébéng no. <sup>54</sup> I gaiwe béno témégén Biyarnes brab gédétén i gaiwe Sabado sani gaiwe kétérény de Judio.

<sup>55</sup> I de libun ménodor bé Jesuse tidew Galilea, ménfuray ro bé Josehe brab énggito roy lébénge brab ati kéahure bé bangkay Jesuse diyo. <sup>56</sup> Tidew béno, ménule ro brab téménafay ro fégféamut brab do mamut daun kay bangkay Jesuse. Endob bé gaiwe kétérén, téménréni ro loo bé kékéréh i de kukuman nodoro ro.

## 24

*I kétébule Jesuse*

<sup>1</sup> Amun toow fo géfuwén bé no Duminggu, i de libun ménodor bé Jesuse tidew Galilea, ménangéy ro dob lébénge Jesuse. Nuwit roy mamute daun ténavay ro. <sup>2</sup> Amun énggégumah ro dob lébénge ne, énggito roy batéwe fénggétéléb bé bengaway lébénge ni ménkériring. <sup>3</sup> Tidew béno, ménahur ro, éndob i bangkay Jesuse éndaén diyoén. <sup>4</sup> I lala ruwe témindég mégaif, ménékow ménfégíttoy ruwowe gétew lagéy, sémelinang i de kégal ro. <sup>5</sup> Toow fo ménggilak i de ni libun, mélaw déménungul ro. Tidew béno, ménbéréh i de lagéy ni maro, “Sedek mangéy gom dob lébénge séméléd bé ségetéwe étew méuyag? <sup>6</sup> Endaén dini no, non ténebule i Tuluse néen. Fégetédém gom i de kékéréhén begom diyo de séna dob Galilea mano, <sup>7</sup> ‘I Nga i Kéilawane iray dob de tete étew atin kélaloné ro dob kruse. Endob dob gétéléw ne gétérésang, tébule.’”

<sup>8</sup> Tidew béno, i de libun ni, énggétédémo roy bénréh Jesuse. <sup>9</sup> Mélaw ménagéw ro tidew dob lébénge brab nuret ro dob de folo bra sébaan kuyug Jesuse brab dob kéluhanay de dumo étew i kéluhanay énggito ruwe brab énggelingoo ruwe. <sup>10</sup> (I ni do libun ro Maria Magdalena, Juana, brab Mariawe idéng Santiago, brab de dumo libun, nuret roy de ni dob de apostol.) <sup>11</sup> Endob i de kuyug Jesus, énda ménunur ro bé bénréh i de libun ni, non maro ké dufang saén i kékéréh ruwe de. <sup>12</sup> Endob i Pedrowe ni ségetéw bé de kuyug Jesus téménindég brab léménantu mangéy dob lébénge. Amun énggégumah diyo, sénarirén ténengténg, atin énggito no say de safut fénggébaus bé bangkay Jesuse, ménféled. Mélaw ménule ménggaif bé no ménrigo.

*I de kétéfégito Jesus*

<sup>13</sup> Atin bé béno gai, wén i ruwo gétew bé de kuyugén ménangéy dob sébaane ingéd fédawétén Emaus, folo bra ruwo gékilometroy kéravy ne tidew Jerusalem. <sup>14</sup> Amun diyo ron dob de aguwon, ménseuret-uret ro fantag bé kéluhanay de ménrigo bé Jesuse. <sup>15</sup> I lala ruwe séuret-uret magéw so, bé béno soy Jesuse ménggégumah séodor bero magéw.

<sup>16</sup> Endob nalang ro fégéoloné ro ké Been i Jesuse. <sup>17</sup> Atin fénénginsaa Jesuse bero mano, “Ati nan ureté kom bé lala goma nan magéw?”

Tidéw béno, téménréni ro magéw brab ménbuku i falas ruwe. <sup>18</sup> Ségettew bero féndawét Kleopas ménbérél dob Jesuse mano, “Beem saén keeyén i étewe batí dob Jerusalem, énda gétiga moy atiy ménrigowé diyo bér de ni gai.”

<sup>19</sup> Ménénginsa i Jesus mano, “Ati no ménrigo?”

Séménumbul i de kuyugén maro, “Fantag bér Jesuse tidéw Nasaret, ségettew sénarigoy Tuluse muret. Barakatan i de kébérél brab de rénigo no dob téngaangay de étew brab dob Tuluso. <sup>20</sup> I uléwoy de fadi gey brab de odoro key fénkéfo roy Jesuse inok kukumén brab féléhuén kélabonén dob kruse. <sup>21</sup> Wénén i inam gey bér Beene damén i mémukase betom do Judio. Atin béléewe niy gétéléwo nuwe gétérésangan tidéw bér no ménrigo. <sup>22</sup> Brab wén i de dumo gey do libun, fénggaif ro begey non ménangéy ro dob lébénge toow fo gino géfuwén. <sup>23</sup> Endob amun sénléd roy bangkay ne, énda énggito ro de. Atin ménséfule ro, brab bénréh ro bér wén i de télaki méntéfégito émbérél bér Jesuse méntébule. <sup>24</sup> Tidéw béno, i de dumo begey do kuyug Jesus ménangéy ro so dob lébénge Jesuse ni, brab énggito roy kéluhanane toow ménrigo loo bér kébérél i de libun ni, éndob énda gito roy bangkay Jesuse.”

<sup>25</sup> Tidéw béno, bénréh Jesuse bero mano, “Toow gom fo dufang, brab énda munur gom bér bénréh i sénarigoy Tuluse muret bér kébérél ne. <sup>26</sup> Békén ba kailangan mérasyay i Kristowe atin tidéw béno médayéw fo toow?” <sup>27</sup> Tidéw béno, fénggétiga Jesuse dob berowe ké atiy ménsulate dob libro Moisese brab i sénulat i kéluhanay sénarigoy Tuluse fantag bér Beene.

<sup>28</sup> Amun gédét ro nén dob ayo ruwe ni, i Jesuse ni fénténgtengén bér maak taus magéw mangéy féravy. <sup>29</sup> Endob nongot ro bér Jesuse maro, “Odor go begey témérén non gédétén sémingkuf.” Mélaw ménodor i Jesuse bero mahur dob lawie. <sup>30</sup> Amun diyo ron ménsar dob doror i ahayane, méndot i Jesuse fan brab fénslamata no. Tidéw béno, sénkébeng-kébengén, atin sénaarén dob berowe. <sup>31</sup> Tidéw béno, énggélolo roy Jesuse, éndob tékow ménalfa dob téngaanga ruwe. <sup>32</sup> Tidéw béno, ménsébérél-bérél ro maro, “Been i funa tuwe toow fo fiyoy de fédéw to brab toow fo méoror to bér késébérél-bérél ne beto amun diyo to dob de aguwon atin bér lala ne mureton beto fantag bér Ménsulate Kébérél i Tuluse.”

<sup>33</sup> Bér bér so, téménindég ro brab ménséfule ro mangéy Jerusalem. Diyo énggito roy de folo bra sébaan ménsélimud beroy de dumo kuyugén. <sup>34</sup> Atin séuret-uret ro maro, “I Kadna tome toow méntébule, non méntéfégito dob Simone.” <sup>35</sup> Tidéw béno, nuret i ruwowe gétew dumo roy ménrigowé dob de aguwon, brab ati kégélolo ruwe de bér de sékébeng-kébengén fan.

<sup>36</sup> I lala ruwe séuret-uret, méntéfégitoj Jesuse téménindég dob kérara ruwe mén-sébérél bero.

<sup>37</sup> Endob toow fo mégilak ro non maro ké ménayam i Jesuse. <sup>38</sup> Mélaw ménbérél man i Jesuse mano, “Sedek mégilak gom? Aw mérégén i kéunur gome ké méuyagu?”

<sup>39</sup> Téngténg gom i de kémér gu ni brab de sékéy gu ni. Gito gom? Toow, Begén. Gamakénu inok gétuwa kom békénu ménayam. I ménayame énda i ungéen brab énda i bukalén. Endob gito gom, wén i kagén de.”

<sup>40</sup> Tidéw béno, fénténgteng Jesusey de kémérén brab de sékéyén. <sup>41</sup> Toow ro fo ménngaif brab énda géfengintoow ro de, non toow fo fiyo damén ké toow. Mélaw i Jesuse fénénginsaa no bero mano, “Wén i féama gom Begén?” <sup>42</sup> Atin niraya ro sébaan sédo, <sup>43</sup> atin éndotén brab namaén dob adafa ruwe.

<sup>44</sup> Atin bénréhén bero mano, “Been soy ni mérigowé bénréh gu begom amun diyou dob begome séna bér énda séna méléhuu. Nuret guy métuman i kéluhanane fantag bér Begéne dob de sénulat Moises brab de sénulat i de sénarigoy Tuluse muret, brab dob de sénulatén kanta dob Ménsulate Kébérél i Tuluse.”

<sup>45</sup> Tidéw béno, fénggétiga Jesuse dob berowe inok gésobuto roy Ménsulate Kébéréh i Tulus. <sup>46</sup> Bénréhén man bero mano, “Wén i Ménsulate Kébéréh i Tuluse bé i Kristowe mékukum, éndob dob gétéléw ne gétérésang tébule. <sup>47</sup> Atin sabaf bé atura kuwe fatut ureté kom dob kéluhanay de étew bé kailanga ro gésénule bé de sala ro brab rigoné roy kétayay Tuluse inok fésagaday Tuluse bero. Uret gom étah dob de étew dob Jerusalem, tidéw béno dob kéluhanay de étew dob duniyae ni. <sup>48</sup> Fatut ureté kom non begomey de énggégito bé de ni ménrigo. <sup>49</sup> Sugué ku mangéy dob begomey ati fénasad i Abay guwe. Endob ongot-ongot gom dob Jerusalem taman gérumah i barakate dob begome.”

*I kédiyat Jesuse*

<sup>50</sup> Tidéw béno, nuwit Jesusey de kuyugén ménsut dob no ingéd taman Betania. Amun ménggumah ro diyo, ténunggulén i de kémérén brab déménasal dob Tuluse inok féfioné no bero. <sup>51</sup> I lala ne rémigo bé ni, déméniyat mangéy dob lawayo. <sup>52</sup> Atin fénéngadaf roy Jesuse, brab ménoror ro séfule mangéy Jerusalem. <sup>53</sup> Atin diyo ménangéy ro sénga tékélid dob lawi i Tuluse fésalamat bé Tuluse.

## I Fiyowe Uret Sénulat Juane

Been i niy Fiyowe Uret sénulat Juane fantag bé Jesu Kristowe. Sénulat Juaney dumoy de mékégaif do rénigo Jesuse sani de galbék ménfégélolo bé i Beene, Nga i Tuluse. Sénulat Juaney Jesuse ménléhu génantino noy de kéilawan. Jesusey tulake fénléhu inok i sala i de étew mékédan. Sénulat Juane so dob ni sulat bé amuk munur i de étew dob Jesuse, iray i Tuluse beroy umule magufusa.

I Juane, sani séménulate bé ni Fiyo Uret, ségétew bé de kuyug Jesus mun dini sénay Jesuse dob duniyae ni. Endob békén saén kuyug Jesus i Juane, non been soy toowe fo kégédawa Jesuse dumoy séloyuk dob duniyae ni. Mélaw énggito noy de rénigo Jesuse brab énggelingoo noy kébéréh ne. Mélaw gétiga tom toow fo toow i kéluhanay de ni sénulat Juane.

### *I Kristowe ménwaléy kéilawan*

<sup>1</sup> Dob féganaye wénén i féndawéte “Kébéréh i Tuluse”, sani Kristowe. Atin i Beene beroy Tuluse. Brab Beeney Tuluse. <sup>2</sup> Beroy Tuluse bé féganaye. <sup>3</sup> Atin fénlimbag i Tuluse bé Kristowey kéluhanay étingayéne. Enda i étingayén ménlimbag ké békén Kristowey léménimbage de. <sup>4</sup> Dob Beeney umule brab i nan umul maak Solo rémendaw dob de kéilawan. <sup>5</sup> I ni Solo rémendaw dob délémone brab énda gáfandaay délémone de.

<sup>6</sup> Wén i ségétewé étew sénugu i Tuluse, i dawét ne Juan Bautista. <sup>7</sup> Ménangéy dini muret fantag bé nan Solo inok i kéluhanane mégélingo de brab munur bé nan Solo sani Kristowe. <sup>8</sup> Békén Juaney Soloe, éndob ménangéy saén dini muret fantag bé nan Solo. <sup>9</sup> Tidéw béno, i toowe Solo énggégumah dob duniyae inok rémendaw dob kéluhanay kéilawane.

<sup>10</sup> Mélaw i Kristowe dininén dob duniyae. Endob fiyon fo ké Beeney léménimbage de, énda géloy de kéilawan de. <sup>11</sup> Ménangéy dob kaane ingéd, éndob i de kaan étew énda tényakuf ro de. <sup>12</sup> Endob i kéluhanay téménayakufe de brab ménunure dob Beene, niraya no bero kuwagib waléy nga i Tuluse. <sup>13</sup> Ménwaléy ro nga i Tuluse békén sabaf bé rénigoy de étew taloo no aturay kéilawane mumah ro, yamula sabaf bé aturay Tuluse saén.

<sup>14</sup> I Kristowe ménwaléy kéilawan, ménbati sétifon betom. Enggito gey i barakat ne tidéw dob Abayo Tulus, non been i buntunge Ngaén, toow fo mégédaw brab toow fo toow i kébéréh ne.

<sup>15</sup> Ménuret i Juan Bautistawe fantag bé Kristowe. Ménbéréh métanug mano, “Been i niy bénréh guwo begom gégumah témundug begén, éndob gérotor na begén, non bé énda séna ménumlahu de, ménwénén.” Been i bénréh Juane.

<sup>16</sup> Tidéw dob toowe kégédawén betom, énda téméré no miray do kéfiyonon dob betome kéluhanan. <sup>17</sup> Non i Tuluse nirayén i kukumane fén-uwitén bé Moisese, éndob i gédawe brab toowe kétoro fén-uwitén bé Jesu Kristowe. <sup>18</sup> Enda i ségétew énggégito bé Tuluse. Endob i Buntunge Ngaén, fénggétiga noy fantage bé Abay ne non sédumon ro. Brab i Ngae, Tulus so.

### *I uret Juan Bautistawe*

<sup>19</sup> I de odoroy de Judio dob Jerusalem, séménugu ro do fadi brab do témabang bé de fadi féndawét do Lebita mangéy méninsa dob Juane, ké ati beene.

<sup>20</sup> I Juane, bénréhén i mékéntaye brab toowe mano, “Békén begéney Kristowe, sani fénémili i Tuluse méguléw.”

<sup>21</sup> Atin fénénginsaa ro man maro, “Ati mélaw i beeme ni? Aw méntelata Elias go?”

Séménumbul man i Juane mano, “Békén.”

Atin ménénginsa ro man maro, “Aw beemey nan sarigon muret bé kébéréh i Tuluse?”

Atin séménumbul man i Juane mano, “Békén.”

<sup>22</sup> Atin ménbérélh ro man maro, “Béréméhém begey ké ati beeme ni, inok gébérého key dob de séménugu begey. Ati gébérého muwe fantag bé beeme?”

<sup>23</sup> I Juane séménumbul niringén i kékérélh Isaiase sani méntélatae sénarigoy Tuluse muret bé kékérélh ne mano, “Begéney ségétewe dob gonone énda i étew de batí, mékes maku, ‘Fééntang gom i aguwoy Kadnane.’”

<sup>24</sup> Atin i de sénugu tidew dob de Fariseo, ménenginsa ro man maro, <sup>25</sup> “Amuk békén go Kristo, taloo no Elias, taloo no sarigon muret, sedek mautis go?”

<sup>26</sup> Séménumbul i Juane mano, “Wayég i fégébautis guwe, éndob wén i ségétewe étew ménggélawék begom énda gélolo gom de. <sup>27</sup> Been i gégumahe témundug begén, éndob toow na fo gérotor begén. Mélaw énda médaitu fiyon mukoh bé ikét i safatos ne.”

<sup>28</sup> Ménrigoy ni dob Betania, diyo dob sébangay wayége féndawét Jordan, gono Juane mautis.

### *I natiwe bili-biliy Tuluse*

<sup>29</sup> Dob sébaane de fuweh, énggito Juaney Jesuse mangéy dob beene, brab ménbérélh dob de étew mano, “Téngténg gom, ay ni néni maake fégétulak nati bili-bili niray i Tuluse non féléhuén inok mékédan i de sala i de étew dob duniyae. <sup>30</sup> Been i niy bénréh guwo maku, ‘Wén i ségétewe étew gégumah témundug begén, éndob gérotor na begén, non bé énda séna ménunahu de, ménwénén.’ <sup>31</sup> Bé gétahe de, énda gélolo gu de, éndob i funa kuwe ménangéy dini mautis bé wayége inok émfayag i Beene dob begome do dumogu Judio.”

<sup>32</sup> Atin ménbérélh man i Juane mano, “Enggito guy Rémogor i Tuluse ménlus tidew dob lawayo maak marafati méntérimfena mangéy dob Beene. <sup>33</sup> Enda damén gétiga ku de saliyu bé Tuluse, sani séménugue begén mautis bé wayége, ménbérélh dob begéne mano, ‘I étewe gito mo térimfenaay Rémogor guwe, Beeney mautise bé Rémogor guwe.’”

<sup>34</sup> Atin féntaus Juaney kékérélh ne mano, “Enggito gu, brab gébérého kuy Beeney Nga i Tuluse.”

### *I de sungu kuyug Jesuse*

<sup>35</sup> Dob sébaane de fuweh, diyo man i Juane beroy de ruwo gétew kuyugén. <sup>36</sup> Amun énggito noy Jesuse témara, ménbérélh mano, “Téngténg gom, ay nan i natiwe bili-biliy Tuluse.”

<sup>37</sup> Amun énggelingoo de ruwo gétew kuyugén i ni bénréhén, ménfuray ro bé Jesuse.

<sup>38</sup> Atin séménling i Jesuse brab énggito no bero furay dob Beene. Atin fénénginsaa no bero mano, “Ati kétaya kome?”

Tidew béno ménbérélh ro maro, “Hon i batí muwe de, Rabi?” (I atag i Rabiwe Maistéro.)

<sup>39</sup> “Enggomén, inok gito gom,” bang Jesuse. Atin ménodor ro, brab énggito roy batí muwe. I urase béno, témégénén. Mélaw énda ménule ro taman kélungonon.

<sup>40</sup> I ségétewe bé de ruwo ni gétew lagéy énggégélingo bé bénréh Juaney brab ménodor bé Jesuse, sani fédawéténe Andres dum Simon Pedrowe sétiman idéng. <sup>41</sup> I sungu-sunguwe rénigo Andrese, sénlédén i Pedrowe brab nureto no mano, “Enggito gey i Kristowe.” (I atag i Kristowe fénémili i Tuluse méguléw.) <sup>42</sup> Tidew béno, nuwitén i Simone mangéy dob Jesuse.

Atin ténéngténg Jesuse brab bénréhén mano, “Beemey Simone, nga Jonas. Fédawétéku beem Sefas.” (I Sefase ségiléw bé dawéte Pedro, atin i atag ne batéw.)

<sup>43</sup> Dob sébaane de fuweh, bénaba Jesusey mangéye Galilea. Brab énggito noy Filipiwe, atin ménbérélh dob beene mano, “Odor go Begén.” <sup>44</sup> I Filipiwe, ségiléw bé Andrese brab Pedro, tidew ro dob ingéde féndawét Betsaida. <sup>45</sup> Atin i Filipiwe, ménangéy dob Natanaele atin bénréhén dob beene mano, “Enggito gey i étewe, sani étewe sénulat Moisesey fantage bé Beene dob kukumane bé do gétah, brab sénulat i de sénarigoy Tuluse so muret bé kékérélh ne. Beeney Jesuse, nga Jose, tidew Nasaret.”

<sup>46</sup> Atin ménenginsa i Natanaele dob Filipiwe mano, “Aw wén wayoy étingayén fiyo tidew Nasaret?”

Bang Filipiwe, “Enggonén, angéyém téngténg.”

<sup>47</sup> Amun énggito Jesusey Natanaele mangéy dob Beene, ménbérél mano, “Ay niy métintuwe étew Judio. Enda i tugi dob adat ne.”

<sup>48</sup> “Ati kégétiga muwe begén?” bang Natanael.

Séménumbul i Jesuse mano, “Enggito gu beem dob fantad i kayéwe féndawét igos bé énda séna ténawag Filipiwe beem.”

<sup>49</sup> Tidéw béno, fénayag Natanaele mano, “Maistéro, Beemey Nga i Tuluse brab Datu gey do Judio.”

<sup>50</sup> Ménbérél i Jesuse mano, “Aw ménunur go saén sabaf bé bénréh guwe beem énggito gu beem dob fantad i kayéwe igos? Gérito go na médoó éntingayén rigoné ku toow fo mékégaif na tidéw bé ni. <sup>51</sup> Béréhé ku begom i toowe, gito gom moso i lawaye émbukeh brab i de télakiy Tuluse ménik brab mélus dob Begéné, sani Nga i Kéilawane.”

## 2

### *I Jesuse dob uyote*

<sup>1</sup> Ménruwo gétérésangan tidéw béno, wén i uyot dob Kana, sébaan ingéd dob Galilea. Atin i idéng Jesuse diyo dob uyote ni. <sup>2</sup> Diyo soy Jesuse brab de kuyugén non sénéngkat ro so bero dob ni uyot. <sup>3</sup> Amun ménétényén i arake, ménbérél i idéng Jesuse dob Beene mano, “Endaén i arak ro.”

<sup>4</sup> Endob séménumbul i Jesuse mano, “Iday, kago suguén Begén. Enda séna énggumah i gai guwe émfégitó bé barakat guwe.”

<sup>5</sup> Tidéw béno, i idéng Jesuse ménbérél dob de sugu-suguén mano, “Rigo gom i kéluhanay béréhé nuwe begom.”

<sup>6</sup> Wén i ném timan do dakél binangga diyo, usaréy de Judio ahuron wayég fégéféguse ro loo bé adat ruwe. (Labi téléc folo gélaya i kédakél i séngae binangga.) <sup>7</sup> Bénréh Jesuse dob de sugu-suguén mano, “Féno gom wayég i de binangga.” Mélaw fénéno ro wayég i de binangga déménégér ké toow fo féno. <sup>8</sup> Tidéw béno, bénréhén bero mano, “Sakug gom de kloh, brab uwit gom dob méguléwe bé ni uyot.” Atin rénigo ro.

<sup>9</sup> Amun i méguléwe bé uyote ménggétemtem de, békénén wayég, non ménwaléyén arak. Atin énda énggétiga noy ténidéwoy ni de arak. Endob gétigay de sugu-suguén séménakug de. Tidéw béno, i méguléwe ni ténabarén i témérimawe lagéy. <sup>10</sup> Brab ménbérél mano, “Dob de dumo do karagiya, i de étew duwoté ro métah i fiyowe arak, brab buluk énggénémén témantuy kéluhanay kanawe, tidéw béno duwoté roy mélémuwe de. Endob i beeme dénuwotém wayoy toowe balilaga arak géfuray bén!” Been i bénréh i uléwe.

<sup>11</sup> Rénigo Jesusey ni sungu mékégaif dob Kana, ingéd dob Galilea. Fénggito noy barakat ne diyo, atin i de kuyugén ménunur dob Beene.

<sup>12</sup> Amun énggilidén i uyote, i Jesuse brab idéng ne, brab de tuwaréyén, brab de kuyugén, ménagéw ro mangéy Kapernaum. Atin ménbati ro diyo bé ménfiroye gétérésangan.

### *I Jesuse dob lawi i Tuluse*

<sup>13</sup> Gédétén i kandulie féndawét “Témara” kay de Judio, mélaw ménénagé i Jesuse mangéy Jerusalem. <sup>14</sup> Dob fésawayaw lawi i Tuluse, énggito noy de étew émfébélén do fégétulak safi, bili-bili, marafati. Brab énggito no soy de lémuluk kurta ménstar dob sékuloy de ahaya ro. <sup>15</sup> Mélaw réménigo fégétafésén taléy brab dénédélén bero tidéw dob lawi i Tuluse. Déndéélén soy de safi brab do bili-bili. Atin bénluweén i de ahayay de lémuluk kurta brab sénawarén i de félatah ro. <sup>16</sup> Atin ménbérél dob de émfébélén marafati mano, “Uwit gom tékédan i de ni. Kagom rigonén fadiyan i lawi i Boh guwe!”

<sup>17</sup> Atin énggétédémoy de kuyugén i Ménsulate Kébérél i Tuluse mano, “O Tulus, i kéimu guwe bé lawi me, maak aféy dob fédéw guwe.”

<sup>18</sup> Atin i de odoroy de Judio ménénginsa ro dob Jesuse maro, “Amuk wén i kuwagibém tidéw dob Tuluse bé ni rénigo mo, fégitonon gey mékégaif émféféngintoow de.”

<sup>19</sup> Sénumbulo Jesuse bero mano, “Rundas gom i lawi i Tuluse ni, atin fétindégé ku man bé téléwe gétérésangan.”

<sup>20</sup> Séménumbul i de Judio maro, “I ni lawi Tulus, mén-fot folo bra ném gébelintuwa i kétéfintindége de, atin fétindégé mo man bé téléwe gétérésangan saén?”

<sup>21</sup> Endob i lawi i Tuluse bérhé Jesuse, been i lowoh ne. <sup>22</sup> Amun gilid méntébule i Jesuse, énggétédémoy de kuyugén i bénréh ne. Atin ménunur ro bé Ménsulate Kébérélh i Tuluse brab de bénréh Jesus.

<sup>23</sup> Bé kédiyo Jesuse dob Jerusalem, bé gaiy kékanduli i de Judio féndawét “Témara”, médooy méngginugute bé Jesuse non énggito roy médoowe mékégaif rénigo no.

<sup>24</sup> Endob énda séménarig i Jesuse bero non gétiga noy kéluhanay étewe. <sup>25</sup> Enda kailanga no ureton fantag bé étewe non gétiga noy fédew i kéilawane.

### 3

#### I Jesuse brab Nikodemowe

<sup>1</sup> Wén i ségétew étew féndawét Nikodemo, ségétew bé de Fariseo sani de tintu modor bé adat i de Judio. Brab i Nikodemowe odoroy de Judio. <sup>2</sup> Wén i no sébaan kélunganon, ménangéy dob Jesuse atin ménbérélh mano, “Maistéro, gétiga key ségétew go témořo tidéw dob Tuluse. Non énda i ségétew gérigo bé de rigoné mo mékégaif ké békén tidéw dob Tulusey barakat ne.”

<sup>3</sup> Séménumbul i Jesuse mano, “Bérhéku beem i toowe, énda i ségétew géahur dob féguléwoy Tuluse, saliyu ké mumah na féruman.”

<sup>4</sup> Endob ménenginsa i Nikodemowe mano, “Ati kéfingé-fingé i kéumah i étewe féruman ké lukésén? Endaén géahurén séruman dob sur i idéng ne atin mumah man!”

<sup>5</sup> Séménumbul i Jesuse mano, “Bérhéku beem i toowe, saliyu ké i étewe mumah bé wayége brab bé Rémogor i Tuluse, énda géahurén dob féguléwoy Tuluse. <sup>6</sup> I kéluhanay étewe mumah dob kéilawane brab gédoté roy lowohe. Endob i de étew mumah bé Rémogor i Tuluse, bati i Rémogor i Tuluse dob de fédew ro. <sup>7</sup> Mélaw kago mégaif bé kékérélh guwe, ‘Fatut go mumah féruman.’ <sup>8</sup> Non ségilew so bé réfuruhe. I réfuruhe mangéy dob kétaya nuwe ayo no. Gélingoo mo éndob énda gétiga moy hon i tidéwo nuwe de taloo no hon i ayo nuwe de. Loo so bé nan, énda gésobuto kom i kéumahe dob Rémogor i Tuluse.”

<sup>9</sup> I Nikodemowe ménenginsa mano, “Ati kérigowe bé ni?”

<sup>10</sup> Séménumbul i Jesuse mano, “I beeme ménbantug go témořo dob Israel, éndob énda gésobuto moy ni? <sup>11</sup> Bérhéku beem i toowe, bérhé key i gétiga keye, brab ureté key i énggito geye, éndob énda i munur de begom. <sup>12</sup> Amuk énda munur go Begén bé ureté kuwe ni beem fantag bé de éntingayén dob duniyae ni, toow na fo énda munur go ké ureté kuy fantage bé de éntingayén dob lawayo. <sup>13</sup> Atin énda i ségétew énggéangéy dob lawayo, saliyu bé Begéne, sani Nga i Kéilawane méntidéw diyo.”

<sup>14</sup> Bé gétahe de, amun diyo i de Judio dob gonone énda i étew de bati, kénéke i de ulé bero. Mélaw réménigoy Moisese kéninontow maak falas ulé brab féndiyoén dob kayéwe brab ténungkulén inok i kéluhanay de témeingténg de, énda méléhu ro. Ségilew so bé niy Nga i Kéilawane fatut tungkulén dob kayéwe, <sup>15</sup> inok i kéluhanay munure dob Beene énda méléhu ro, yamula gédoté roy umule magufusa. <sup>16</sup> I Tuluse toow fo mégédaw bé kéluhanay de étew dob duniyae, mélaw nirayén i buntunge Ngaén inok i kéluhanay munure dob Beene, énda méléhu ro, yamula gédoté roy umule magufusa. <sup>17</sup> Non békén sénugu i Tulusey Nga ne dob duniyae ni inok kukumé noy kéilawane. Yamula inok fukasé noy kéilawane dob de sala ro.

<sup>18</sup> I munure dob Jesuse énda mékukumén. Endob i éndae munur dob Beene mékukum non énda munurén bé buntunge Nga i Tuluse. <sup>19</sup> Been i funay Tuluse kémukum: I Soloe, sani Kristowe, ménangéy dob duniyae, éndob i de étew méuyot ro bé délémone, brab mika ro bé Soloe non bé de tete rigoné ro. <sup>20</sup> I kéluhanay rémigowe tete mika ro bé

Soloe brab énda fégédét ro de non mágilak ro ké giton i de tete rigoné ro dob gáfekayae.  
<sup>21</sup> Endob i de métintu do étew fégédét ro dob Soloe inok giton rénigo roy kétayay Tuluse.

### *I kéuret Juan Bautistawe*

<sup>22</sup> Tidéw béno, i Jesuse brab de kuyugén ménangéy ro dob ingéde Judea brab ménbatí ro diyo bé ménfiroye gétérésangan, brab ménautis ro diyo. <sup>23</sup> Atin i Juane ménautis so, éndob dob ingéde Enon, gédét dob ingéde Salim non médooy wayége diyo. Atin i de étew ménangéy dob beene inok bautiso no bero. <sup>24</sup> I ni ménrigo bé énda séna ménbilanggu i Juane de.

<sup>25</sup> Bé béno, wén i ségétewe Judio ménseédél bé de dumo kuyug Juan fantag bé kélémiyowe dob adafay Tuluse. <sup>26</sup> Mélaw i de kuyug Juan, ménangéy ro dob Juane, brab ménbéréh ro maro, "Maistéro, énggétédémo moy dumo muwo ménta dob sébangay wayége Jordan, sani étewe nureté? Mautis béri atin kéluhanay étewe mangéy dob Beene."

<sup>27</sup> Endob séménumbul i Juane mano, "I étewe gédoté no saén i iray i Tuluse dob beene.

<sup>28</sup> Enggelingoo kom i bénréh guwe bé békén begén i Kristowe, éndob énggétahu sénugu bé Beene. <sup>29</sup> I Kristowe ségiléw bé témérimawe lagéy brab begéney maake sémégunung bé témérimawe lagéy. Atin i de kuyugén ségiléw ro bé térimawe libun. I témérimawe libun kay témérimawe lagéy, békén kay sémégununge. Mélaw i sémégununge ongot-ongot brab fégélingooé no atin méoror de ké gélingoo noy béréh i témérimawe lagéy. Loo bé nan i kagéne kéoror énggumah béleewe, non médooy de étew furay bé Jesuse.

<sup>30</sup> Beeney fatute waléy gérotor, atin i begéne fatut waléy gérifantad."

<sup>31</sup> Non i Jesuse tidéw dob lawayo, mélaw gérotor na bé kéluhanane. Endob i de kélawan, tidéw ro dob fantade ni saén. Mélaw géréréh ro saén fantag bé duniiae. Endob i tidéwe dob lawayo, toow na fo gérotor bé kéluhanane. <sup>32</sup> Ureté noy énggito nuwe brab énggelingoo nuwe dob lawayo. Endob kloh saén i munure de. <sup>33</sup> Endob i étewe munur bé uret ne, émfayag bé toow i Tuluse. <sup>34</sup> Non i sénugu i Tuluse, ureté noy kéréréh i Tuluse, non iray i Tulusey Rémogor ne énda i tamana no. <sup>35</sup> Atin i Abaye Tulus mégédaw bé Nga ne brab i kéluhanay ature sénarigén dob Beene. <sup>36</sup> I munure dob Nga i Tuluse, gédoté noy umule magufusa. Endob i éndae munur dob Beene, énda gédoté noy umule magufusa, non énda mékédan i kérít i Tuluse dob beene.

## 4

### *I libune dob Samaria*

<sup>1</sup> Enggelingoo de Fariseoy urete bé labi na médooy gédoté Jesuse kuyugén brab toow na médooy bautisé Jesuse étew bé Juane de. <sup>2</sup> Endob i toowe, do kuyug Jesus i mautise, békén Jesus. <sup>3</sup> Amun énggelingoo Jesusey ni uret, mémentédan dob Judea, atin ménsefule mangéy Galilea. <sup>4</sup> Mélaw dob kéagéw ro Jesuse, kailanga roy témarae dob sakuf i ingéde féndawét Samaria.

<sup>5</sup> Atin, énggégumah ro dob sébaane ingéd dob Samaria féndawét Sikar, gédét dob fantade niray Jakobé bé nga ne Jose bé gétaho. <sup>6</sup> Diyo, wén i kalute wén i wayége de, rénigo Jakobe. Atin i Jesuse ménasar diyo dob sékuloy kalute. Non ménlugotén bé kéagéw ne brab géutuh téresang i kégumah ne diyo.

<sup>7-8</sup> Bé béno, énda diyo i de kuyug Jesus non ménangéy ro dob fadiyane méléy amaén. Atin i ségétewe libun tidéw Samaria énggégumah mangéy wayége. Atin ménbéréh i Jesuse dob libune ni mano, "Aw fakay géiraya mo Begén wayége inémén?"

<sup>9</sup> I libune ni séménumbul mano, "I Beeme ségétew go Judio atin i begéne tidéw Samaria. Sedek mongot go miném dob begéne?" (Bénréhén i ni non i de Judio karangé ro mékérésik i de étew tidéw Samaria, atin mélaw énda sélawék ro bero.)

<sup>10</sup> Sénumbulo Jesuse mano, "Amuk gétiga mo damén ké ati iray i Tuluse brab gélolo mo Begén sani mongote wayége, i beeme mongot so dob Begéne brab iraya ku beem bé wayége miray umul."

<sup>11</sup> “Maistéro,” bang i libune ni, “énda i fégésakugém brab i kalute ni ménalém. Hon i gédoto muwe de bé wayége miray umul? <sup>12</sup> I katufua tome Jakob i kéménalute bé ni kalut. I beene brab de ngaén dob ni so méniném loo soy de ayamén. Aw toow na gérotor go bé beene?”

<sup>13</sup> Séménumbul i Jesuse mano, “I minéme bé wayége dob ni kalut waléy so man térumén. <sup>14</sup> Endob i minéme bé wayége iray gu, éndaén térumé no. Non i wayége iray gu dob beene waléy séfut wayég dob fédew ne miray umul magufusa.”

<sup>15</sup> Atin ménbérél man i libune ni dob Jesuse mano, “Maistéro, irayanu bé nan wayég, inok éndaén téruménu, brab éndaén kailanga kuy mangéye dini médot wayég.”

<sup>16</sup> Tidéw béno, bénréh Jesuse man dob ni libun mano, “Angéyém i bawag me brab séfule go mangéy dini.”

<sup>17</sup> I ni libun séménumbul mano, “Enda i bawag gu.”

Atin ménbérél i Jesuse man mano, “Toow i kékérél me, énda i bawagém. <sup>18</sup> Non wénén i limo gétew ménawag beem brab i ségétewé dumo mo sétifon béni békén tintu bawagém. Bénréhém Begén i toowe.”

<sup>19</sup> “Maistéro,” bang i ni libun, “Enggélolo gu béni bé Beemey sarigone muret bé kékérél i Tuluse.” <sup>20</sup> Mélaw ménénginsa dob Jesuse mano, “I de katufua key do tidéw Samaria ménéngadaf ro dob ni tuduk, éndob i begome do Judio, bérél kom, Jerusalem i fatute ayoy de étew méngadaf bé Tuluse. Mélaw ati isuwe toow fatut rigonéy de étew?”

<sup>21</sup> Séménumbul i Jesuse mano, “Di, féngintoowonu. Gégumah mosoy gaiwe, i kékéngadafe bé Abaye Tulus, békén saén dob ni tuduk taloo no dob Jerusalem saén.

<sup>22</sup> I begome tidéw Samaria, féngadafé kom i éndae gétiga kom, éndob i begeye do Judio féngadafé key i gétiga keye, sani Tuluse. Non usaréy Tulusey de Judio mémukas bé de kéilawan. <sup>23</sup> Atin gégumah i nan gai brab énggumahén béleewe, i de tintu méngadaf, féngadafé roy Abaye bé de rémogor ro brab fatut munur ro bé toowe fantag bé Tuluse. Non i Abaye, been i niy kétaya nuwe kékéngadaf de. <sup>24</sup> I Tuluse, Rémoor, békén lowoh. Komon i méngadafe de, fatut féngadafé no dob rémogore brab dob toowe.”

<sup>25</sup> Bang i libune ni, “Gétiga ku gégumah i fénemili i Tuluse méguléw féndawét Kristo. Buluk gégumah, fefégétuwa no betom i kéluhanay éntingayéne.”

<sup>26</sup> Atin ménbérél i Jesuse mano, “Begéney Kristowe, sani émbéréhe dob beeme.”

<sup>27</sup> Bé béno so, énggumah i de kuyug Jesus, brab ménggaif ro bé kégito ruwe de séuret-uret roy libune ni. Endob énda i ségétew bero ménénginsa bé ati kétaya nuwe taloo no sedek séuret-uret bé libune ni.

<sup>28</sup> Tidéw béno, i libune ni fénledén i binangga ne, brab ménséfule mangéy dob ingéde. Atin diyo bénréhén dob de étew mano, <sup>29</sup> “Enggomén, angéy gom téngténg i étewé bénréhén begén i kéluhanay rénigo guwe. Békén ba keeyén Been i Kristowe?” <sup>30</sup> Mélaw i de étew ménsut ro dob no ingéd ménangéy dob Jesuse.

<sup>31</sup> Amun énda séna gumah ro, ménongot i de kuyugén mano, “Maistéro, ama go na.”

<sup>32</sup> Endob sénumbulo no bero mano, “Wén i amaé ku énda gétiga kom de.”

<sup>33</sup> Tidéw béno ménsébérél-bérél i de kuyugén maro, “Wén bay ménuwiton de amaén?”

<sup>34</sup> Tidéw béno, bénréh Jesuse dob berowe mano, “I kérigo guwe bé kétayay Tuluse ménféuwit Begén, brab bé kékéglide bé galbéké férigo no Begén, been i maake amaé ku. <sup>35</sup> Wén i bénréh gom, ‘Fot na gétérésang kélungonon, atin kémétewén.’ Endob bérél kom, téngténg gom i de ni étew mangéy dini, non maak do nohok togohén, fakayén kétewén béleewe. Non ay ninén i gaiwe munur ro Begén. <sup>36</sup> I de étew kémétew sémahud brab timué roy de kéntew ro. Ségiléw ro bé de émféunur bé de dumo étew inok gédoté roy umule magufusa. Atin i de étew muret fantag bé Tuluse, maak beroy de mohok. Mélaw i de mohok brab de kémétew séoror ro. <sup>37</sup> Toow i kékérél mano, ‘Ségétew i mohoke, ségiyoy kémétew de.’ <sup>38</sup> Fénuit gu begom mangéy kémétew bé békéne génalbéké kom, ségiyoy géménalbéké de atin ménangéy gom saén kémétew bé génalbéké ruwe.”

<sup>39</sup> Médooy de étew tidéw Samaria dob no ingéd ménunur bé Jesuse non bé kékérén i libune mano, “Bénréhén begén i kéluhanay rénigo guwe.” <sup>40</sup> Mélaw amun ménangéy i de étew tidéw Samaria dob Jesuse, nongot ro fébatié roy Jesuse dob berowe. Atin ménbati i Jesuse diyo ruwo gétérésangan.

<sup>41</sup> Atin sabaf bé kékérén nuwe bero, ménuman i kédooy ménunure dob Beene. <sup>42</sup> Atin bénréh ro dob libune ni maro, “Munur geyén békén sabaf saén bé bénréh me begey. Béleewe énggelingoo key i kékérén ne, mélaw gétiga key tintu Beeney mémukase bé kékérén dob de sala ro.”

### *Nuwa Jesusey nga i ségétewe odoron*

<sup>43</sup> Amun énggilid i ruwowe gétérésangan, i Jesuse ménule ménangéy Galilea. <sup>44</sup> Wén soy kékérén Jesuse mano, “I sarigoy Tuluse muret bé kékérén ne, énda fégadata no dob kaane ingéd.” <sup>45</sup> Endob amun énggumah dob Galilea, ténayakuf i de étew diyo, non énggito roy kéluhanay rénigo nuwe mékégaif dob kékandulie féndawét “Témara” dob Jerusalem, non diyo ro so.

<sup>46</sup> Tidéw bénó, ménsefule i Jesuse mangéy Kana, sébaan ingéd dob Galilea, sani ingéde fénwaléyén arak i wayége. Atin wén i ségétewe gémamak kukuman wén i ngaén lagéy démeruun dob ingéde Kafernaum. <sup>47</sup> Amun énggelingoo noy Jesuse énggumah dob Galilea tidéw Judea, ménangéy dob Jesuse brab nongotén dob Jesuse angéyé no uwaén i nga ne gédétén méléhu. <sup>48</sup> Atin bénréh Jesuse dob beene mano, “I begome, taman énda gégito gom do mékégaif, énda fo munur gom Begén.”

<sup>49</sup> Bang i ni odoron, “Maistéro, énggonén, lokut énda séna méléhuén.”

<sup>50</sup> Atin bénréh Jesuse dob ni odoron mano, “Ule gon, adi-adinén i nga me.” I ni étew ménunur bé kékérén Jesuse brab ménule.

<sup>51</sup> Amun diyo séna lowoh agéwon, bénalak i de sugu-sugué no brab bénréh ro maro, “Ménadi-adinén i nga me.”

<sup>52</sup> Atin fénénginsaa no bero mano, “Ati urase bé kékadi-adi nuwe?”

Atin sémenumbul ro maro, “Ménkédan i kékéduf ne fuli natémégéno.” <sup>53</sup> Brab énggétédémoy boh ne been i noy urase bé kékérén Jesuse dob beene mano, “I nga me adi-adinén.” Mélaw tidéw bénó, kéluhana ro ségékuréng ménunur.

<sup>54</sup> Been i niy gérupowé mékégaif rénigo Jesuse dob Galilea bé kétidéw ne Judea.

## 5

### *I kékua Jesuse dob Betesda*

<sup>1</sup> Wén i no sébaan fuweh, ménangéy i Jesuse dob Jerusalem non wén i kanduli diyo kay de Judio. <sup>2</sup> Atin diyo dob Jerusalem gédét dob bengawane kay de bili-bili, wén i kérigéwe de féndawét Betesda dob Hebreewe, sani késébérén i de Judio. Wén i limo timan fésayawa no wén i do atéfén. <sup>3</sup> Diyo méniro i médoowe do étew démeruun, do langafén, do fikat, brab do kimoyén. Atin ongot-ongoté roy késékuyo i wayége ni. <sup>4</sup> Non wén i gai gégumah i télikay Kadnane, angéyé no sékuyoén i wayége ni. Atin i géétahe mangéy tééléd dob ni wayég ké mésékuyo, waléy adi-adi fiyon fo ké atiy déruu nuwe.

<sup>5</sup> Wén i ségétewe lagéy diyo, méntélén folo bra waléw gébélintuwa i kédéruu nuwe.

<sup>6</sup> Amun énggito Jesusey ni lagéy méniro diyo brab énggétiga noy kérugay i kédéruu nuwe, fénénginsaa no mano, “Aw méuyot go adi-adi?”

<sup>7</sup> Sémenumbul i ni lagéy démeruun mano, “Maistéro, énda i tétabangan begén mangéy tééléd dob wayége ké mésékuyo. Buluk féganayu séna fégédét, wénén i gégumah gétah begén.”

<sup>8</sup> Tidéw bénó, ménbérén i Jesuse dob beene mano, “Tindég go, furutém i ikam muwa nan, brab agéw go.” <sup>9</sup> Sonom bénó, ménadi-adiy ni lagéy. Atin fénurutén i ikam ne brab ménagéw.

I no gai kékadi-adi Jesuse bé ni lagéy Sabado, gai kétérén kay de Judio. <sup>10</sup> Mélaw i de odoroy de Judio ménbérén ro dob ni lagéy ménadi-adi maro, “Béleewe Sabado, gai kétérén. Enda fakayén dob kitab tome ké uwité moy ikam muwa nan.”

<sup>11</sup> Endob séménumbul i lagéyé ni ménadi-adi mano, “Endob bénréh i lagéye ni ménféadi-adi begén, furuté kuy ikam guwe brab magéwu.”

<sup>12</sup> Atin ménénginsa i de odoron maro, “Ati no lagéy ménbérélh de dob beeme, ké furuté moy ikam muwe brab magéw go?”

<sup>13</sup> Endob énda énggétigay ni lagéy ké ati no étew ménféadi-adi de, non ménangéy i Jesuse dob de ménribuk do étew.

<sup>14</sup> Enda ménrugayén tidew béno, énggito Jesusey ni lagéy dob lawi i Tuluse. Atin ménbérélh i Jesuse dob beene mano, “Téngtengém, ménadi-adi gon. Kagon rémigo sala inok énda toow gétimal i kékéfasanga muwe.”

<sup>15</sup> Tidew béno, ménagéw i ni lagéy brab bénréhén dob de odoroy de Judio bé Jesus i ménféadi-adiwe de. <sup>16</sup> Mélaw i de odoroy de Judio, féngganay roy kéférasay ruwe bé Jesuse, non ménwa bé gai kétéréne. <sup>17</sup> Endob bénréh Jesuse dob berowe mano, “I Abay guwe Tulus énda témeréno gémalbék fiyon fo ké gai kétérén, atin i Begéne fatut gémalbék so sénga tékélid.”

<sup>18</sup> Been i niy funay de odoroy de Judio ménuman i kékérit ruwe bé Jesuse, atin toow na fo sarintaé ro féléhuén. Békén saén sabaf bé kégalbék ne ké gai kétérén, éndob sabaf so bé fédawété noy Tuluse Abayén, ula-ula réfengé noy Tuluse béno.

<sup>19</sup> Atin sénumbulo Jesuse bero mano, “Béréhé ku begom i toowe, i Begéne Ngaén, brab énda i gérígono ku ké tidew dob Begéne saén. Rigoné kuy gito guwe rigoné Abay guwe Tulus. Udenén rigoné Abay guwe, rigoné ku so. <sup>20</sup> Non i Abay guwe méimu Begén brab fégétiga no Begén i kéluhanay galbék ne. Atin méuman i férigo nuwe Begén toow na fo mékégaif galbék funa kom mégaif. <sup>21</sup> Non loo bé Abay guwe tébuleé noy de ménléhu brab iraya no bero umul, Begéne ni so, iraya ku umul i de étew kétaya ku iraya ku de. <sup>22</sup> Atin békén i Abay guwey kémukume bé de étew. Yamula niraya no Begén kuwagib kémukum bé kéluhanay étewe, <sup>23</sup> inok basanay kéluhanay étewe Begén loo so bé kébasana ruwe bé Abay guwe. I éndae masanan Begén, énda so basana noy Abay guwe séménugu Begén.

<sup>24</sup> “Béréhé ku begom i toowe, i mégelingoe bé kékéhé guwe brab munur bé Tuluse séménugu Begén, wén i umulén magufusa. Atin énda mékukumén moso bé de salaén. Non éndaén méléhuén non fiyon fo ké méléhu i lowoh ne, gédoté noy umule magufusa.

<sup>25</sup> Béréhé ku begom i toowe, gégumah i gaiwe brab ménggumahén béléewe ni, bé gélingooy de ménléhu i béréhé guwe, atin i de mégelingo de, gédoté roy umule. <sup>26</sup> Non i umule tidew dob Abaye, brab loo bé ni niraya no Begén, sani Nga ne, barakat inok wén i umul tidew dob Begéne. <sup>27</sup> Atin i Abay guwe Tulus, niraya no so Begén kuwagib kémukum bé de kélawan kagulan Begén i Nga i Kéilawane. <sup>28</sup> Kagom mégaif bé de ni, non gégumah i gaiwe i kéluhanay de étew ménléhu dob de lóbéng ro, gélingoo roy béréhé guwe. <sup>29</sup> Atin mésut ro tidew dob de lóbéng ro, atin i de réménigo fiyo métébule inok gédoté roy umule magufusa. Endob i de réménigo tete métébule inok mékukum ro.

<sup>30</sup> “I Begéne, énda i kagén gérigonon saliyu bé Abay guwe saén. Kémukumu loo bé kékémandu i Tuluse de Begén. Mélaw i kékukum guwe métintu non békén kagén kétayan éndob kétayay Abay guwe séménugu Begén.

<sup>31</sup> “Amuk ureté ku saén i fantage bé lowoh guwe, énda i géunur de. <sup>32</sup> Endob wén i ségiyowe muret fantag bé Begéne brab gétiga kuy uret ne fantag bé Begéne toow fo toow. <sup>33</sup> Séménugu gom mangéy dob Juane Mautis atin nureténi toowe fantag bé Begéne.

<sup>34</sup> Endob énda kailanga kuy kéuret i kélawane fantag bé Begéne, éndob énggélabito ku émfégétédém begom i uret Juane fantag bé Begéne, inok munur gom Begén funa kom méfukas dob de sala gom. <sup>35</sup> I Juane maak solo, mérino brab rémendaw kagulan téneroén begom, brab ménoror gom témayakuf bé kétoro ne begom éndob singkow saén. <sup>36</sup> Endob wén i labi na fo fiyo funa kom munur Begén bé de nuret Juan. Fégitung gom i galbéké rigoné ku, non been i galbéké niray i Abay guwe Begéne. Mélaw i de galbék gu, been i émfégétigane bé sénugu i Abaye Tulus Begén. <sup>37</sup> Atin i Abaye séménugu Begén, fégétiga no soy fantage bé Begéne. Enda énggélungoo kom i béréhé ne taloo no énggito gom i falas ne. <sup>38</sup> Atin énda fénbati gom dob de fédew gom i kékéhé ne. Gétiga kuy ni non

énda munur gom Begén, sani sénugu i Abaye Tulus. <sup>39</sup> Tantu gom féganad i Ménsulate Kébéréh i Tuluse, non gékaranga kom dob de ni gédoté kom i umule magufusa. Endob been i niy de ménsulat uret fantag bé Begéne. <sup>40</sup> Mélaw amuk munur gom dob Begéne, gédoté kom i umule magufusa, éndob mika gom munur Begén.

<sup>41</sup> “Enda sélédé kuy kédayew i kéilawane. <sup>42</sup> Endob gétiga kuy de fédew gom, énda méimu gom bé Tuluse. <sup>43</sup> Sénugu i Tuluse Begén, atin Begén i sarigo nuwe. Gido loo énda ténayakuf gom Begén. Endob buluk wén i ségetew gégumah énda sénugu i Tuluse de, tayakufé kom. <sup>44</sup> Enda munur gom non sélédé kom i kédayew i de dumo gom étew éndob énda sélédé kom i kédayewe tidew dob sébaane tintu Tulus. <sup>45</sup> Endob kagom fégitungén de ké Begén i témbœ begom dob Abay guwe Tulus. Békén Begén. Sénarigo kom i kitabé niray Moisese, éndob been i témbœ begom. <sup>46</sup> Endob amuk tintu gom munur bé kétoro Moisese, munur gom so Begén, non sénulatén i fantage bé Begéne. <sup>47</sup> Endob amun énda munur gom bé sénulat Moisese, énda so géunur gom dob Begéne.”

## 6

*Fénwaléy Jesuse médooy klohe amaén*

<sup>1</sup> Tidew béno, ménifar i Jesuse dob dogote féndawét Galilea taloo no Tiberias. <sup>2</sup> Atin toow fo médooy de étew ménfuray de non énggito roy de mékégaif galbék rénigo no bé kéuwa ne bé de démeruun. <sup>3</sup> Atin ménénagé i Jesuse beroy de kuyugén mangéy dob burure atin diyo ro ménsar. <sup>4</sup> Bé béno gai, éndaén mérugay i kékanduli i de Judio féndawét ro “Témara”. <sup>5</sup> Amun iling-ilong i Jesuse, énggito noy médoowe étew démangkub mangéy dob Beene. Mélaw ménénginsa dob Filipihe mano, “Ayo tome de méléy amaén féama bé de étew ni?” <sup>6</sup> (I funa Jesuse ménénginsa, téngkadé no saén i Filipihe. Endob gétiga Jesuse nén i rigoné nuwe.)

<sup>7</sup> Atin séménumbul i Filipihe mano, “Fiyon fo ké wén i labi séngibu filak tom, kulang na fégébéléy amaéy médoowe ni étew, fiyon fo ké sékeloh-kélohn dob séngae ségetew.”

<sup>8</sup> Endob ménbéréh i ségiyowe kuyugén féndawét Andres (sani dumo Simon Pedrowe sétiman idéng) mano, <sup>9</sup> “Wén i ségetew kénogo lagéy dob ni, wén i nuwitén limo timan mélému fan brab ruwo timan sédo. Endob toow fo kulang i ni féama bé médoowe ni étew.”

<sup>10</sup> Tidew béno, ménbéréh i Jesuse dob de kuyugén mano, “Féésar gom i de étew.” Mélaw ménsar i de étew diyo dob bukae gonon wén i do kéroon de. Wén i limo ngibu do lagéy saliyu na bé de libun brab do nga. <sup>11</sup> Atin éndot Jesusey fane brab ménfésalamat dob Tuluse. Tidew béno, sénaarén dob de médo étew ménsar diyo. Loo so bé niy rénigo Jesuse bé de sédo de. Atin téménantu ro mama taman kétaya ro. <sup>12</sup> Amun énggéama ro nén taman ménbésor ro kéluhanan, ménbéréh i Jesuse dob de kuyugén mano, “Timu gom i kéluhanay de sama amaén inok énda mésinggulaén.” <sup>13</sup> Mélaw ténimu roy de sama amaén. Atin ménféno i foloe bra ruwo timan dakél biton bé de sama i de limo timan fan.

<sup>14</sup> Amun énggitoy de étew i ni mékégaif galbék rénigo Jesuse, ménbéréh ro maro, “Tintu Been i niy toowe sarigoy Tuluse muret bé kékéréh ne, sani suguéy Tuluse dob duniiae ni.” <sup>15</sup> Atin gétiga Jesusey fégésé ro féwaléy ro datu ro, mélaw téniakén bero man brab ménangéy félébu dob de burur.

*Ménagéw i Jesuse dob rotor i wayége*

<sup>16</sup> Amun témégénén, ménangéy i de kuyugén dob dogote. <sup>17</sup> Atin ménanda ro awang mifar bé dogote mangéy Kafernaum, non kélungononén, atin énda séna énggumah i Jesuse dob berowe. <sup>18</sup> Bé béno uras, émbagér i réfuruhe brab dakél i bagéle dob dogote.

<sup>19</sup> Amun ménggáfura ro ném gékilomitro tidew dob dénsaane, énggito roy Jesuse magéw dob rotor i dogote mangéy dob berowe. Mélaw toow ro fo ménggilak. <sup>20</sup> Endob ménbéréh i Jesuse mano, “Begén, kagom mégilak!” <sup>21</sup> Atin ménoror ro brab fénéda ro dob awange, brab sonom béno énggumah ro dob dénsaane ayo ro.

<sup>22</sup> Amun géfuwénén, i de étew ménbati séna dob difar i dogote, énggétiga ro sébaan saén i awange diyo béno kélungonon. Atin énggétiga ro énda ménodor i Jesuse bé de

kuyugén méda dob awange mifar dob dogote. Brab gétiga ro énda i ségiyo awang diyo. <sup>23</sup> Tidéw bénou, énggumah i de awang tidéw dob ingéde Tiberias, déménunggu gédét dob gonoy de étew ménama fan amun énggilid fénsalamatay Kadnane Jesus. <sup>24</sup> Atin amun gétuway de étew énda diyo i Jesuse loo soy de kuyugén, ménda ro bé de awang mangéy Kafernaum inok sélédé roy Jesuse.

<sup>25</sup> Atin amun énggito roy Jesuse dob difar i dogote, fénénginsaa ro maro, “Maistéro, ménfiroyén i kégumah me dini?”

<sup>26</sup> Sénumbulo Jesuse bero mano, “Béréhé ku begom i toowe, békén i kégésobut gome bé de mémégaif galbék rénigo guy funa kome séméléd Begén, éndob non bé de fénama gu begom atin ménbésor gom. <sup>27</sup> Kagom séméléd bé amaéne kay de sur gom saén non waleý waréy i nan amaén. Endob séléd gom bé amaéne kay de fédéw gom funa kom méraru taman sa taman. I Nga i Kéilawane, sani Begéne, iray guy nan amaén non i Abaye Tulus fénggétiga no Been i séménugue Begén.”

<sup>28</sup> Atin ménénginsa ro dob Jesuse maro, “Ati fiyowe rigoné key inok rigoné key i kétayay Tuluse?”

<sup>29</sup> Séménumbul i Jesuse mano, “Ay niy kétayay Tuluse rigoné kom: Unur gom Begén non Begén i sénugu i Tuluse.”

<sup>30</sup> Atin ménénginsa ro maro, “Ati mémégaife galbék féténgtégém begey inok munur gey dob Beeme? <sup>31</sup> I de katufua key bé do gétah, ménama ro fan féndawét ‘mana’ dob gonone énda i nohok do témunoh diyo, loo bé Ménsulate Kébérén i Tuluse mano, ‘Niraya no bero amaén tidéw dob lawayo inok géama ro.’ ”

<sup>32</sup> Séménumbul i Jesuse mano, “Béréhé ku begom i toowe, békén Moises i ménféamae bero fan tidéw dob lawayo, éndob i ménféama bero been i Abay guwe Tulus. Atin i Abay guwe, irayén so begom i tintuwe amaén tidéw dob lawayo kay de fédéw gom. <sup>33</sup> Non i amaéne iray i Tuluse, been i énggégumahe tidéw dob lawayo inok miray umul dob de kéilawan.”

<sup>34</sup> Ménbérén ro dob Jesuse maro, “Maistéro, irayan gey démoyun bé nan amaén.”

<sup>35</sup> Séménumbul i Jesuse mano, “Begéney amaéne miray umul. I kéluhanay étewe mangéy dob Begéne éndaén mélafay ro, brab i kéluhanay munure Begén éndaén térumén ro. <sup>36</sup> Endob fiyon fo ké énggito gomén Begén, éndob énda séna munur gom Begén. Bénréh gun i nan dob begome bé gétaho. <sup>37</sup> Mangéy dob Begéney kéluhanay de étew niray i Abaye Begén. Brab énda dudulé kuy étewe mangéy dob Begéne. <sup>38</sup> Non ménlusu tidéw dob lawayo inok rigoné kuy kétayay Tuluse séménugu Begén, békén inok rigoné kuy kagéne kétayan. <sup>39</sup> Atin ay niy kétayay Tuluse: énda fédayé ku métadin i de nirayén Begén étew, fiyon ségétew. Yamula tébuleé ku bero kéluhanan dob tamfaday gaiwe. <sup>40</sup> Non been i niy kétayay Abay guwe: i kéluhanay gétigane Begén brab munure Begén, gédoté roy umule magufusa. Atin tébuleé ku bero dob tamfaday gaiwe.”

<sup>41</sup> Atin i de Judío amun énggelingoo roy bénréh Jesuse, mundég-mundég ro non bénréhén bé Beeney amaéne tidéw dob lawayo. <sup>42</sup> Brab ménbérén ro maro, “Ati Jesuse ni, aw békén ba Beeney nga Josehe saén? Sedek bénréhén ménlus kun tidéw dob lawayo, non gétiga tom i boh ne brab idéng ne?”

<sup>43</sup> Endob bénréh Jesuse mano, “Kagom mundég-mundég. <sup>44</sup> Enda i ségétew géangéy dob Begéne, saliyu ké fefégédétay Abaye séménugu Begén. Atin dob tamfaday gaiwe, tébuleé kuy kéluhanay mangéye dob Begéne. <sup>45</sup> Sénulat i de sénarigoy Tuluse muret bé kékérén ne maro, ‘I de kéilawan toroéy Tuluse moso.’ Mélaw i séngae mégélingo bé Abaye brab modor bé kétoro ne, mangéy dob Begéne. <sup>46</sup> Endob énda i ségétew énggégito bé Abaye, saliyu bé Begéne non tidéwu dob Tuluse. Mélaw Begéne say énggégítowé bé Abaye Tulus. <sup>47</sup> Béréhé ku begom i toowe, i de méginugut dob Begéne méuyag ro taman sa taman. <sup>48</sup> Begéney maake amaén miray umul. <sup>49</sup> I de katufua kom amun diyo ro dob gonone énda i nohok do témunoh diyo, ménama ro amaén féndawét ‘mana’, gido ménléhu ro so. <sup>50</sup> Endob Begéney amaéne tidéw dob lawayo. Atin i kéluhanay géamae bé ni amaén, énda méléhu ro. <sup>51</sup> Begéney amaéne miray umul ménlus tidéw dob lawayo.

Atin amuk i ségétéwe géama de, méuyag taman sa taman. I amaéne iray gu funay de kéilawan méuyag, sani lowoh guwe.”

<sup>52</sup> Atin amun énggélingooy de Judioy ni bénréh Jesuse, ménséédél ro maro, “Ati kéfingé-fingé i kéiray i ni étew bé lowoh ne inok amaé tom?”

<sup>53</sup> Mélaw ménbérén i Jesuse mano, “Béréhé ku begom i toowe, amuk énda amaé kom i lowoh i Nga i Kéilawane sani lowoh guwe, brab énda inémé kom i dara guwe, énda gédoté kom i umule magufusa. <sup>54</sup> Endob i de mama bé lowoh guwe brab miném bé dara guwe, wén i umul ro magufusa, atin tébuleé ku bero dob tamfaday de gai. <sup>55</sup> Non i lowoh guwe been i nan i tintuwe amaén, atin i dara guwe been i nan i tintuwe inémén. <sup>56</sup> I kéluhanay mamae bé lowoh guwe brab minéme bé dara guwe diyou bati dob berowe atin dini ro bati dob Begéne. <sup>57</sup> Méuyag i Abaye séménugu Begén, atin i Begéne méuyagu sabaf bé Beene. Mélaw i kéluhanay mamae Begén méuyag so sabaf bé Begéne. <sup>58</sup> Begéney amaéne tidéw dob lawayo. I de katufua kom ménama ro amaén féndawét ‘mana’, gido ménléhu ro so. Endob i de mama bé ni amaén sani lowoh guwe méuyag ro taman sa taman.”

<sup>59</sup> Bénréh Jesusey ni bé kétoro ne dob lawie féngadafay de Judio dob ingéde Kafer-naum. <sup>60</sup> Amun énggélingooy de kuyugén i ni kétoro, ménbérén i de kédoono ro maro, “Toow fo ménalém i ni kétoro, ati mélaw i géfégélingoe de?”

<sup>61</sup> Endob énggétiga Jesuse dob fédéw ney funay de kuyugén mundég-mundég. Mélaw bénréhén bero mano, “Aw toow fo mika gom bé bénréh guwe? <sup>62</sup> Ati béréhé kome ké gito gom Begén, sani Nga i Kéilawane, démiyat mule dob gonone tidéwo ku? <sup>63</sup> I miraye bé umule been i Rémogor i Tuluse. Endob i kéilawane, énda i barakatén miray umul. I nuret guwe begom tidéw dob Rémogor i Tuluse brab miray bé umule magufusa. <sup>64</sup> Endob gétiga kuy wén i de dumo begom énda munur ro Begén.” (Bénréh Jesusey nan non gétiga non i de énda de munur tidéw féganay brab i étewe émfékéfo de.) <sup>65</sup> Atin sénumfata noy kébérén ne mano, “Been i nan i funa kuwe ménbérén bé énda i géangéy dob Begéne saliyu ké féfégédétény Abaye.”

<sup>66</sup> Tidéw bénou, médoob bé de kuyugén i téménagake de brab éndaén ménodor ro de.

<sup>67</sup> Mélaw fénénginsaa Jesusey de folo bra ruwo gétew kuyugén mano, “Aw méuyot gom so témagak Begén?”

<sup>68</sup> Séménumbul i Simon Pedrowe mano, “Kadnan ati nay odoro keye? I de kaam saén kébérén i géiraye bé umule magufusa. <sup>69</sup> Munur gey brab gétiga key Beemey Mékétéfuwe Etéw tidéw dob Tuluse.”

<sup>70</sup> Atin ménbérén i Jesuse mano, “Aw békén ba begom i foloe bra ruwo gétew fénemili gu? Endob saitan i ségétéwe begom!” <sup>71</sup> I ténendu i de kébérén Jesus, been i Judase nga Simon Iskariot. Been i émfékéfoe de fiyon fo ké been i ségétéwe bé de folo bra ruwo gétew kuyugén.

## 7

<sup>1</sup> Tidéw bénou, i Jesuse diyo ménsgud-sugud dob Galilea. Ménika mangéy sugud-sugud dob Judea non méuyot i de odoroy de Judio de méméléhu. <sup>2</sup> Bé bénou, gédétén i kékanduli i de Judio féndawét ro “Dung-dung.” <sup>3</sup> Mélaw ménbérén i de tuwaréy Jesus do lagéy dob Beene maro, “Ay go Judea inok gitoy de kuyugém i de mékégaif galbékém. <sup>4</sup> Amuk i étewe méuyot mébangtug, énda bunéyé noy de rigoné no. Amuk gérigono moy de mékégaif, rigoné mo dob adafay médoowe étew.” <sup>5</sup> (Loo bé niy kébérén i de tuwaréyén non fiyon foy berowe énda séna munur ro dob Beene.)

<sup>6</sup> Séménumbul i Jesuse mano, “Enda séna gumah i fatute gai rigoné kuy galbék guwe. Endob i begome fakay rigoné kom i kagome galbék bé de udenén gai. <sup>7</sup> I de tete étew énda mérarék ro begom, éndob mérarék ro Begén non dowoyé kuy kéluhanay tetee rigoné ro.

<sup>8</sup> Ay gom dob kandulie, éndob i Begéne énda séna mangéy diyo non békén sénay niy gaiwe fatut mangéy diyo.” <sup>9</sup> Amun énggilid bénréhén i ni, ménbati saén dob Galilea.

<sup>10</sup> Endob amun ménagéwén i de tuwaréyén mangéy dob kandulie dob Jerusalem, ménfuray soy Jesuse, éndob énda i énggétigan de non ménagéw nékémén saén.

<sup>11</sup> Sélédéy de odoroy de Judioy Jesuse dob kandulie atin fénénginsa ro maro, “Hon i gono Jesuse de?”

<sup>12</sup> Atin médooy de étew ménlimud diyo séméguraw séuret-ureté roy fantage bé Jesuse. Embéréh i de dumo de maro, “Fiyo étew i Jesuse.” Endob bang i de dumo de, “Enda fiyo étew i Jesuse, fégakara noy de étew.” <sup>13</sup> Endob énda i ségétew ménfélénsag muret fantag bé Jesuse non mágilak ro bé de odoroy de Judio.

<sup>14</sup> Amun gékérara ron bé kékanduli ruwe, ménangéy i Jesuse dob lawi i Tuluse brab téménoro. <sup>15</sup> Ménggaif foy de odoroy de Judio brab ménbéréh ro maro, “Sedek toow fo mon gétigan i ni étew, énda taén ménrugay i késékuwelah ne?”

<sup>16</sup> Séménumbul i Jesuse mano, “I kagéne kétoro békén tidéw dob Begéne saén, éndob tidéw dob Tuluse séménugu Begén. <sup>17</sup> I de étew méuyot ro rémigo bé kétayay Tuluse, gétiga ro ké i kagéne kétoro tidéw dob Tuluse taloo no tidéw saén dob Begéne. <sup>18</sup> I étewe muret saén bé kaane kétoro, méuyot saén mébantug. Endob i étewe méuyot rémigo bé funay séménugue de émbantug, been i nan i métintuwe étew brab énda témuvién. <sup>19</sup> Békén ba niray Moisesey kitabe? Endob énda i ségétew begom modor de, non amuk odoro kom, énda damén télamané kom féléhuén Begén.”

<sup>20</sup> Séménumbul i de étew maro, “Sénaitanan go! Ati étewe méuyot méméléhu Beem?”

<sup>21</sup> Ménbéréh man i Jesuse mano, “Amun rénigo guy sébaane saén mémégaif galbék, ménkéségyoran gom de non gai kétérén béno. <sup>22</sup> Endob wén i sébaane kitab fantag bé kétulie niray Moisese bé gétaho. (Endob i toowe, tidéw i ni kitab dob de katufua tom.) No mélawén fiyon fo ké gai kétérén, tulié kom soy de nga gom. <sup>23</sup> Amuk tulié kom i ségétewe nga lagéy fiyon fo ké gai kétérén inok odoro kom i kitabé tidéw dob Moisese, sedek mémérit gom Begén sabaf bé kétéadi-adi guwe bé ségétewe étew ké gai kétérén? <sup>24</sup> Kagom kukumén i de énggito gom saén. Yamula fégitung gom fiyo brab kukum gom métintu.”

<sup>25</sup> Tidéw béno, i de dumo bé de étew tidéw Jerusalem ménbéréh ro maro, “Aw békén bay niy lagéye sélédéy de odoro tom inok féléhuén? <sup>26</sup> Téngténg gom, ay ni émbéréh dob adafa tome brab énda mon i gébérého ro sébanil de. I de odoro key, gélolo ron keey Beeney Kristowe sani ongot-ongoté tome. <sup>27</sup> Endob amuk gégumah kun i Kristowe, énda i gétigan de ké hon i tidéwo nuwe de. Endob gétiga tom i tidéwo ni étew.”

<sup>28</sup> Tidéw béno, amun diyo téménoro dob lawi i Tuluse ménfélénsag i Jesuse émbéréh mano, “Aw tintu gélolo gom ba Begén brab gétiga kom i tidéwo kuwe? Enda ménangéy dini ké dob kagéne saén aturan. I toowe Tulus i séménugue Begén, éndob énda gélolo gom de. <sup>29</sup> Endob gélolo guy Beene, non tidéwu dob Beene brab Beeney séménugue Begén.”

<sup>30</sup> Tidéw béno, ténlama ro kénéfo i Jesuse éndob énda i ségétew énggékéfo de non énda séna énggumah i gaiwe fénémili Tuluse. <sup>31</sup> Endob médooy de étew dob de ménlimud ménunur de, brab ménbéréh ro maro, “Beeney Kristowe, sani fénémili i Tuluse méguléw, non énda i ségétew gérigo bé de mémégaif galbék rénigo no ké békén i Kristowe.”

<sup>32</sup> Enggélingooy de Fariseoy ni késébéréh-béréh i de étew séguraw fantag bé Jesuse. Mélaw i berowe brab de odoroy de fadi, séménugu ro do mantay bé lawi i Tuluse inok kémfo bé Jesuse. <sup>33</sup> Atin ménbéréh i Jesuse dob de étew mano, “Endaén mérugay i kébatí guwe dob begome non séfuleu mangéy dob Tuluse séménugu Begén. <sup>34</sup> Sélédé kom Begén éndob éndaén gito gom Begén, non énda géangéy gom dob batío kuwe.”

<sup>35</sup> Ménsebéréh-béréh i de Judio maro, “Hon keey i ayo nuwe de, ké énda gito tom de? Aw mangéy keey dob mérayue ingéd i de Griego batíoy de Judio so, atin toroé noy de Griego? <sup>36</sup> Ati keey i atag i bénréh ne mano, ‘Sélédé kom Begén, éndob énda gito gom Begén, brab énda géangéy gom dob batío kuwe?’ ”

<sup>37</sup> Amun dob tamfaday gaiwe bé kékanduli ruwe sani toowe na fo balilaga gai, téménindég i Jesuse brab ménbéréh métanug mano, “Do étew térumén, ay gom dob Begéne, brab miném. <sup>38</sup> Non wén i Ménçulate Kébéréh i Tuluse mano, ‘I étewe munur dob Begéne, tidéw dob fédew ne rémégés i wayége miray bé umule magufusa.’ ” <sup>39</sup> I

atag i bénréh Jesuse, ay ni: i Rémogor i Tuluse mangéy dob de munur bé Jesuse atin bati dob de fédew ro. Endob énda séna nirayén i Rémogor i Tuluse non énda séna ménléhu i Jesuse brab tébule atin mule mangéy dob lawayo.

<sup>40</sup> Médooy de étew énggégélingo de, ménbérélh ro maro, “Tintu Beeney sarigoy Tuluse muret bé kékérélh ne, sani sarigone ongot-ongoté tom.”

<sup>41</sup> Bang i de dumo étew, “Beeney Kristowe ongot-ongoté tom.”

Endob séménumbul i de dumo de maro, “Ati kéfingé-fingé ne ké i Kristowe tidéw Galilea? <sup>42</sup> Non bang i Ménslate Kékérélh i Tuluse, i Kristowe séfu Dabid. Mélaw fatut i Kristowe mumah dob ingéde Betlehem non i Dabide bati dob Betlehem.” <sup>43</sup> Mélaw énda géséfagayun i de antaf fédew ro fantag bé Jesuse. <sup>44</sup> Atin ménuyot i de dumo de kémfo, éndob énda i ségétew réménigo de.

<sup>45</sup> Tidéw béno, i de guwardiya ménsefule ro mangéy dob de odoroy de fadi brab do Fariseo. Atin fénénginsaa roy de guwardiya maro, “Sedek énda kénéfo gom i Jesuse inok géuwito kom mangéy dini?”

<sup>46</sup> Séménumbul ro maro, “Enda kénéfo gey de non ménggaif gey bé kétoro ne. Non ségiyo bé kéluhanay kétoroe énggelingoo key.”

<sup>47</sup> Atin ménbérélh i de Fariseo maro, “Aw fiyon i begome, énggégéfakara no begom so? <sup>48</sup> Enda sénay ségétew begey do odoro kom taloo no do Fariseo ménunur de. <sup>49</sup> I de munur dob Beene, beroy de gérifantad étew saén, sani énda gétiga roy kitab tome. Mélaw kukuméy Tuluse bero.”

<sup>50</sup> Atin diyo soy Nikodemowe sani ségétewe so Fariseo. Been i ménangéye dob Jesuse bé gétahe de. Brab ménbérélh mano, <sup>51</sup> “Enda fakay dob kitab tomey kémukume ké énda séna énggésusinon i rénigo nuwe, brab énggelingoon i kékérélh ne.”

<sup>52</sup> Séménumbul ro maro, “Aw tidéw go so Galilea? Basa moy Ménslate Kékérélh i Tuluse, inok gétiga mo énda i sarigoy Tuluse tidéw Galilea.”

## 8

### *I libune ménsla*

<sup>1</sup> Tidéw béno, i kéluhanan ruwe ménule. Endob i Jesuse ménangéy dob tuduke féndawét Olibo. <sup>2</sup> Dob gétunduge de fuweh, amun toow géfuwén, ménangéy man i Jesuse dob lawi i Tuluse. Amun ménangéy i kéluhanay de étew dob Beene, ménasar i Jesuse brab téneroén bero. <sup>3</sup> Bé no gai, i de Fariseo brab do téromo kitab, nuwit roy libune énggétékanan ménbuwah. Atin féntindég ro dob adafa Jesuse brab de médo ni étew. <sup>4</sup> Atin bénréh ro dob Jesuse maro, “Maistéro, énggétékanan i ni libun ménbuwah. <sup>5</sup> Dob kitab tome niray Moisese, fatut ibéron batéw taman méléhu i étewe ménsla loo bé ni. Ati kékérélh me fantag bé ni?” <sup>6</sup> Fénénginsa ro dob Jesusey ni inok tukawa ro saén i Beene inok amuk békén damén katabawan i késumbul ne, wén i funa ro témbé de.

Endob ménkudung-kudung i Jesuse brab séménulat dob fantade bé tuko ténero ne. <sup>7</sup> Amun énda fo témerén ro ménginsa, témenindég i Jesuse brab bénréhén bero mano, “Ati éndae salaén begom, been i sunguwe de mibéron batéw.” <sup>8</sup> Tidéw béno, ménkudung-kudung man i Jesuse brab fentausén i késulat ne dob fantade. <sup>9</sup> Tidéw béno, amun énggelingoo roy bénréh Jesuse, ménule ro séségétew-gétew, i sunguwe ménule do lukés. Atin énda i ségétew ménféled ké békén i Jesuse saén brab ni libun. <sup>10</sup> Atin témenindég i Jesuse brab ménénginsa mano, “Di, nayo ruwe de? Aw énda i ségétew témbé beem?”

<sup>11</sup> Séménumbul i ni libun mano, “Enda, Maistéro.”

Atin bénréh Jesuse mano, “Enda so téboé ku beem. Ule go brab kagonén mésala férumán.”

<sup>12</sup> Atin témerónoréen man i Jesuse dob de étew mano, “Begéney maake solo réméndaw dob kékérélh. I furaye Begén éndaén magéwén dob délemone, yamula magéw dob gékayaé brab gédoté noy umule magufusa.”

<sup>13</sup> Ménbéréh i de Fariseo maro, “Beeme soy murete fantag bé lowoh me, mélaw énda i lantékén.”

<sup>14</sup> Séménumbul i Jesuse mano, “Fiyon fo ké Begén i murete fantag bé Begéne, toow i béréhé kuwe non gétiga kuy tidéwo kuwe brab ayo kuwe. Endob i begome, énda gétiga kom i tidéwo kuwe taloo no ayo kuwe. <sup>15</sup> Kukumé kom i énggito gome saén non do kéilawan gom saén. Endob i Begéne, énda kémukumu. <sup>16</sup> Endob amuk kémukumu, métintuy kagéne kékukum non békén saén Begén i kémukume, éndob Begey i Abaye Tulus séménugu Begén. <sup>17</sup> Ménsumat dob kitab gome, amuk ségiléw i uret i ruwowe gétew, giton toow i urete. <sup>18</sup> Ruwo gey gétew muret fantag bé Begéne. Begén brab Abaye séménugu Begén.”

<sup>19</sup> Tidéw bénó, fénénginsaa roy Jesuse maro, “Hon i gonoy Abay me de?”

Séménumbul i Jesuse mano, “Enda gétiga kom Begén taloo no Abay guwe. Amuk gétiga kom Begén, gétiga kom soy Abay guwe.” <sup>20</sup> Bénréh Jesusey ni bé kétoro ne dob lawi i Tuluse gédét dob fégono ruwe limus. Endob énda i ségétew kéménéfo de non énda séna gumah i gaiwe fénemili i Tuluse.

<sup>21</sup> Ménbéréh man i Jesuse dob berowe mano, “Tagaké kun begom, atin séléde kom Begén. Endob méléhu gom énda émfésagad i de sala gom, brab énda géangéy gom dob ayo kuwe.”

<sup>22</sup> Been i niy funay de odoroy de Judio ménféninsa maro, “Aw fétotoy moso? Aw been i nan i funa nuwe ménbéréh mano, ‘Enda géangéy gom dob ayo kuwe?’ ”

<sup>23</sup> Atin ménbéréh man i Jesuse mano, “I begome, tidéw gom fantad, éndob i Begéne tidéwu rotor. I begome, tidéw gom dob duniyae, éndob i Begéne tidéwu dob lawayo.

<sup>24</sup> Komon bénréh gu begom buluk méléhu gom moso, énda émfésagadan i de sala gom. Toow, amuk énda munur gom de ké Begéney Beene bénréh gu, énda émfésagadan i de sala gom.”

<sup>25</sup> Atin ménféninsa ro maro, “Ati mélaw i Beeme ni?”

Séménumbul i Jesuse mano, “Tidéw bé féganaye de séna bé kétoro guwe, nuret gun begom ké ati Begéne. <sup>26</sup> Atin médoor sénay de béréhé ku fantag bé de rénigo gom do tete funa kom mélukum. Toow i bénréh i séménugue Begén, komon ureté ku dob de étew i énggelingoo kuwe saén tidéw dob Beene.”

<sup>27</sup> Endob i de étew diyo, énda énggésobuto ro de ké ureté noy fantage bé Abaye Tulus.

<sup>28</sup> Mélaw ménbéréh i Jesuse mano, “Buluk tungkulé komén Begén, sani Nga i Kéilawane, bénó na gétiga kom Begéney Beene bénréh gu. Atin gétiga kom so bé énda i rigoné ku ké tidéw saén dob Begéne, éndob béréhé ku saén i ténero i Abaye Begén. <sup>29</sup> Brab dumo guy séménugue Begén. Enda téragakén Begén non démoyun rigoné kuy késuwata nuwe.”

<sup>30</sup> Atin médooy de étew énggégélingo bé de ni, ménunur ro dob Beene. <sup>31</sup> Mélaw bénréh Jesuse dob de Judio ménunur de mano, “Amuk modor gom bé ténero guwe, begom i de tintu kuyug gu, <sup>32</sup> atin gétiga kom i toowe kétoro, atin i toowe kétoro i témangyé begom.”

<sup>33</sup> Sénumbulo ro maro, “I begeye ni do séfu Abraham gey brab énda ménrifén gey, atin sede mélaw ké béréhé mo fétangéy gey?”

<sup>34</sup> Séménumbul i Jesuse mano, “Béréhé ku begom i toowe, i kéluhanay étewe rémigo tete maak riféy salae. <sup>35</sup> I riféne, fakay dédélén tidéw dob lawie. Endob i nga i gefee lawi, gébati dob nan lawi taman sa taman. <sup>36</sup> Mélaw amuk Nga i Tulusey témangyé begom, tintu gom békénén rifén. <sup>37</sup> Gétiga ku do onok Abraham gom. Endob méuyot gom méméléhu Begén, non énda tayakufé kom i kétoro guwe. <sup>38</sup> Béréhé kuy ati fénggitoy Abay guwe Begén, éndob rigoné kom mon i énggelingoo kome dob kagome abay.”

<sup>39</sup> Séménumbul ro maro, “Abraham i kageye katufuan.”

Atin bénréh Jesuse bero mano, “Amuk do tintu onok Abraham gom damén, rigoné kom soy loo bé rénigo Abraham. <sup>40</sup> Bénréh gu begom i toowe énggelingoo ku tidéw dob Tuluse, éndob méuyot gom Begén méméléhu. Endob békén loo bé nan i rénigo Abraham. <sup>41</sup> Rigoné kom i ségiléwe bé rénigoy abay gome.”

Endob ménkérit i de Judio maro, “Békén gey nga dob liyuwe, Tulus saén i Abay geye.”

<sup>42</sup> Atin bénréh Jesuse bero mano, “Amuk toow fo Abay gom i Tuluse, méimu gom damén Begén, non tidéwu dob Tuluse. Enda ménangéyu dini dob kagéne aturan, éndob Tulusey séménugue Begén. <sup>43</sup> Sedek énda gésobuto kom i béréréh kuwe ni? Non mika gom keeyén munur bé toroé kuwe. <sup>44</sup> Satanas i abay gome atin rigoné kom i kétayay Satanase. Méméléhu étew tidéw féganay brab tugién non énda i toow dob beene. Atin amuk témugi, rigoné no say adat ne non beeney bebe i kéluhanay tugiéne. <sup>45</sup> Endob toow i kagéne kékéréh, mélaw énda unuro kom Begén. <sup>46</sup> Ati géféténgténgé de begom ké wén i sala gu? Enda. Atin amuk toow i béréréh kuwe, sedek énda munur gom Begén? <sup>47</sup> I tidéwe dob Tuluse fégélingoé noy kékéréh i Tuluse. Endob békén gom tidéw dob Tuluse, mélaw énda fégélingoé kom i kékéréh i Tuluse.”

<sup>48</sup> Tidéw bénó, fénénginsaay de Judio maro, “Aw békén ba toow i bénréh geye ségétew go tidéw Samaria brab sénaitanan go?”

<sup>49</sup> Séménumbul i Jesuse mano, “Békénu sénaitanan. I toowe, basana kuy Abay guwe éndob énda basana kom Begén. <sup>50</sup> Enda fébantug-bantugu, éndob i Tuluse kétaya no ké basananu, atin Been i gétigane bé ati fatute. <sup>51</sup> Béréréh ku begom i toowe, i de modor bé kétoro guwe, énda méléhu ro.”

<sup>52</sup> Atin ménbéréréh i de Judio maro, “Béleewe ni gétiga keyén sénaitanan go. I Abrahame ménléhu, brab do sénarigoy Tuluse muret bé kékéréh ne, ménléhu ro so. Endob bénréhém i modore bé kétoro me énda méléhuén. <sup>53</sup> Aw toow go na fo gérotor bé Abrahame katufua key? Ménléhu i Abrahame brab de sénarigoy Tuluse so. Ati kékéfigitung me bé Beeme?”

<sup>54</sup> Séménumbul i Jesuse mano, “Amuk bantugé kuy lowoh guwe so, énda i lanték i bantuga kuwe. Endob i Abay guwe Tulus, Been i mirayane Begén bantugan. Béréréh kom féngadafé kom i Tuluse. <sup>55</sup> Endob énda gélolo gom de. Endob i Begéne, gélolo gu. Amuk béréréh ku énda gélolo gu de, waléyu témugi ségiléw bé begome. Endob i toowe, gélolo guy Beene, brab modoru bé kékéréh ne. <sup>56</sup> I katufua kome Abraham moror de bé kégito nuwe bé kégumah guwe. Enggit no, komon moror béní.”

<sup>57</sup> Sabaf bé ni, ménbéréréh i de Judio maro, “Enda séna ménlimo go folo gébélantuwa, éndob bénréhém bé énggit mon i Abrahame?”

<sup>58</sup> Séménumbul i Jesuse mano, “Béréréh ku begom i toowe, énda séna ménúmah i Abrahame de, i Begéne ménwénén.”

<sup>59</sup> Sonom bénó, ménémurut ro batéw inok ibéré ro dob Jesuse damén taman méléhu, éndob ménrékunéy i Jesuse brab méntékédan dob lawi i Tuluse.

## 9

### *Nuwa Jesusey langaféne*

<sup>1</sup> Atin amun ménagéw i Jesuse, énggit noy ségétewé lagéy langafén tidéw fanay kéumahén. <sup>2</sup> Atin i de kuyug Jesus ménénginsa ro maro, “Maistéro, ati funa nuwe ménúmah langafén? Non bé sala ne loo ké sala i de lukésén?”

<sup>3</sup> Atin séménumbul i Jesuse mano, “Békén sabaf bé sala ne taloo no sala i de lukésén. Endob i funa nuwe langafén inok giton i barakat i Tuluse mérigo dob beene. <sup>4</sup> Fatut rigoné tom i fégalbék i Tuluse séménugu Begén, lokut fuweh séna. Gégumah i kélunganone, bé bénó éndaén i ségétew gégalbék. <sup>5</sup> Amun diniwu dob duniyae, maak géfékaya non Begén i Soloe réméndaw dob kélawane.”

<sup>6</sup> Amun énggilid i Jesuse émbéréréh, déménura dob fantade brab fénlémbuwekén i sébuwane bé dura ne. Tidéw bénó, dénuletén dob de motoy ni lagéy langafén. <sup>7</sup> Atin ménbéréréh i Jesuse mano, “Ay go dob kérigéwe féndawét Siloam, brab furauf go diyo.” (I atag i Siloame “sénugu”.) Mélaw ménagéw i langaféne ni brab rénigo noy férigowe de. Atin amun ménsséfule, énggítionén.

<sup>8</sup> Tidéw bénó, i de dumo ro ségédét lawi brab de étew énggítito de mongot limus, ménsséfenginsa ro maro, “Aw békén ba beeney étewe déménoyun mésar mongot limus?”

<sup>9</sup> Atin séménumbul i de dumo de maro, “Been bay nan.” Endob bang i de dumo de, “Békén been i nan, ségiléw ro sa keey falas.”

Tidéw béno, i ni lagéy ménbérélh mano, “Begén bay no étew langafén bé gétaho.”

<sup>10</sup> Atin ménénginsa ro maro, “Sedek énggégito gon béeewe?”

<sup>11</sup> Atin séménumbul i ni lagéy mano, “I lagéye féndawét Jesus, fénlémbuwekén i sébuwane atin dénuletén dob de moto gu. Atin sénuguén begén mangéy mérauf dob Siloam. Tidéw béno, ménagéwu brab ménuraufu, atin sonom béno énggégítowun.”

<sup>12</sup> Atin ménénginsa ro maro, “Hon i gonoy nan de lagéy béeewe ni?”

Endob séménumbul mano, “Enda gétiga ku de.”

<sup>13</sup> Tidéw béno, nuwit roy ni lagéy éndaén langaféno mangéy dob de Fariseo. <sup>14</sup> Gai kétérén i kéfélémbuwek Jesuse bé sébuwane brab kêuwa ne bé motoy ni lagéy.

<sup>15</sup> Fénénginsaa de Fariseo ké ati kéfingé-fingé i kégégito nuwe. Atin séménumbul i ni lagéy mano, “I Jesuse, fénlémbuwekén i sébuwane brab dénuletén dob de moto gu. Tidéw béno ménuraufu, atin sonom béno énggégítowu.”

<sup>16</sup> Tidéw béno, i de dumo do Fariseo ménbérélh ro maro, “I Jesuse békén tidéw dob Tuluse non énda modorén bé ménbérélh do kitabé bé énda fakay i gémalbéké ké gai kétérén.” Endob i de dumo de ménbérélh ro maro, “Amuk i Jesuse ségétew ménsala, énda fo gérigo no bé mémégaife.” Mélaw énda géséodor i de antaf fédew ro.

<sup>17</sup> Mélaw ménénginsa man i de Fariseo dob lagéye ni maro, “Ati karang me bé Jesuse ni étew, non énggégéadi-adino no kun i de moto mo?”

Atin séménumbul i ni lagéy mano, “Beeney sarigoy Tuluse muret bé kékérélh ne.”

<sup>18</sup> Endob i de odoroy de Judío énda fo munur ro de ké langafén i ni lagéy tidéw bé do gétah, mélaw fentawag roy de Lukésen. <sup>19</sup> Atin fénénginsaa ro bero maro, “Aw nga gom i ni? Aw langafén ba tidéw fanay kékumahén? Sedek énggégitonén béeewe ni?”

<sup>20</sup> Séménumbul i de Lukésen maro, “Gétiga key beeney nga geye brab langafén tidéw fanay kékumahén. <sup>21</sup> Endob énda énggétiga key de ké ati kéfingé-fingé i kégégito nuwe béeewe, taloo no ati ménuwae de. Endob fénginsaa kom i beene, non métawanén san brab been i sémumbulone begom.” <sup>22</sup> Ménbérélh i boh ne brab idéng ne loo bé ni non mémilak ro bé de odoroy de Judío. Non sénfagayunoy de odoron éndaén féahurén dob de lawi féngadafan i étewé ké bérélhé noy Jesusey Kristowe tidéw dob Tuluse. <sup>23</sup> Been i niy funay boh i ni lagéy brab idéng ne séménumbul maro, “Métawanén i nga geye, been i fénginsaa kome.”

<sup>24</sup> Mélaw i de Fariseo fentawag ron man i lagéye ni éndaén langaféno brab ménbérélh ro maro, “Bérélhém i toowe dob adafay Tuluse. Gétiga key i Jesuse ni ségétew ménsala.”

<sup>25</sup> Mélaw séménumbul mano, “Enda gétiga ku de ké i Jesuse wén i salaén loo ké énda. Ni saén i kagéne gétigan, bé gétaho langafén éndob béeewe énggégítowun.”

<sup>26</sup> Fénénginsaa ron man maro, “Ati rénigo nuwe dob beeme? Ati kéfingé-fingé i kékéadi-adi nuwe bé de moto mo?”

<sup>27</sup> Séménumbul mano, “Bénréh gun begom, éndob énda fo fégélingoé kom de. Sede méuyot gom de man mémélingo ségule? Aw méuyot gom de ké waléy gom do kuyugén so?”

<sup>28</sup> Tidéw béno, fénéngiras ro, brab bénrého ro maro, “Beem say kuyugén. Endob i begeye kuyug Moises gey. <sup>29</sup> Gétiga key ménsébérélh i Tuluse bé Moisese bé do gétah. Endob i ni étew, énda gétiga key de ké hon i kétidéw ne de.”

<sup>30</sup> Séménumbul i ni lagéy mano, “Toow fo mémégaif i nan. Enda gétiga kom wayoy tidéwo nuwe de, éndob fén-adi-adi noy de moto gu. <sup>31</sup> Gétiga tom i Tuluse, énda fégélingoé noy de ménsala. Endob fégélingoé noy de étew méngintulus, rémigo bé kétaya nuwe. <sup>32</sup> Tidéw feganay kéklimbag bé duniyae ni énda sénay ségétew géméadi-adi ségétew langafén tidéw fanay kékumahén inok waléy gégito. <sup>33</sup> Mélaw i Jesuse, amuk békén tidéw dob Tuluse, énda gérígono no de.”

<sup>34</sup> Tidéw béno, ménkérít ro brab séménumbul ro maro, “I beeme fénggenga go toow fo ménsala, sedek beeme nay témoree begey?” Tidéw béno éndaén, fénrahur ro de dob lawie féngadafan.

<sup>35</sup> Amun énggelingoo Jesusey kénrigo ruwe bé ni lagéy, ménangéy dob beene. Amun énggito no, ménsébérél i Jesuse de mano, “Aw munur go bé Nga i Kéilawane?”

<sup>36</sup> Séménumbul i ni lagéy mano, “Maistéro, bérélém begén ké ati no étew inok géunuru de.”

<sup>37</sup> Séménumbul i Jesuse mano, “Enggito mon, non Been i Begéne sébérél beem.”

<sup>38</sup> Tidéw béno, ménbérél i ni lagéy mano, “Kadnan, munuru Beem.” Atin fénengadafén i Jesuse.

<sup>39</sup> Atin ménbérél i Jesuse mano, “Kékukum i funa kuwe ménangéy dob duniya ni. I Begéne maak solo i de maak langafén inok waléy ro gégito amuk munur ro Begén. Atin i de gégito, sani de gétigan étew, waléy ro maak langafén amuk énda munur ro Begén.”

<sup>40</sup> Wén i de Fariseo énggégélingo bé kékérél Jesuse, atin ménénginsa ro maro, “Sede? Aw do langafén gey so?”

<sup>41</sup> Séménumbul i Jesuse mano, “Amuk maak do langafén gom, énda damén i sala gom, éndob béléewe ni makom ké do gégito gomén, non makom ké toow gomén gétigan. Been i nan i funa nuwe i de sala gom énda mékedano.”

## 10

### *I binuwayae fantag bé témalimae bé de bili-bili*

<sup>1</sup> I Jesuse, ménuret sébaan binuwaya mano, “Bérélhé ku begom i toowe, i étewé mahur dob rugéy de bili-bili énda mangéyén bé bengawane atin mangéy man bé de ségiyo agéwon, i nan étew ménakaw brab tulisan. <sup>2</sup> Endob i étewé mahur mangéy bé bengaway rugéy de bili-bili, beeney témalimae bé de bili-bili. <sup>3</sup> I mantaye dob fintue ungkaé noy bengaway rugéne inok géahur i témalimae bé de bili-bili. Brab i de bili-bili gélolo roy bérél ne. Brab tawagé noy de kaan do bili-bili bé de dawét ro. Tidéw béno, fanangguwité no bero mésut tidéw dob rugéne mangéy dob de fétabtaban. <sup>4</sup> Atin amuk mésut ro, métah bero brab i de bili-bili furay ro de non gélolo roy bérél ne. <sup>5</sup> Enda furay ro bé ségiyowe étew, yamula féraréyo ro non énda gélolo roy bérél ne.” <sup>6</sup> Bénréh Jesuse beroy ni binuwaya éndob énda fo énggésobuto ro de.

<sup>7</sup> Mélaw i Jesuse ménbérél man mano, “Bérélhé ku begom i toowe, Begéney maake bengawan ahuroy de bili-bili. <sup>8</sup> I de énggétah Begén do tugién témo, beroy maake do ménakaw brab do tulisan. Endob i de kagén do étew, beroy maake bili-bili, énda fo fénggélingo ro bero. <sup>9</sup> Begéney bengawane. I kéluhanay mahure dob Begéne, méfukas ro dob de sala ro. Ségiléw ro bé de bili-bili, mahur ro brab mésut ro atin géagéw ro dob fiyowe tabtabén non talimaé ku bero. <sup>10</sup> I tulisane, sani tugiéne témo mangéy sa dini inok ménakaw brab méméléhu brab méminasa. Endob i funa kuwe ménangéy dini inok iray gu dob de kélawan i umule énda i kulang de taman sa taman.

<sup>11</sup> “Begéney fiyowe témalima bé de bili-bili, non iray guy férénawa guwe inok méfukas i de kuyug gu. <sup>12</sup> I ségetéwe étew témalima bé de bili-bili sukayan saén, békén been i gefee de, méraréy ké gégito itu-talun. Tidéw béno, i itu-talune rambaé noy de bili-bili brab béragaré no bero. <sup>13</sup> I ni étew sukayan saén tagaké noy de bili-bili non békén kaan brab énda fo méimuén bero. <sup>14</sup> Endob Begéney maake fiyo témalima bé de bili-bili. Gélolo guy de kuyug gu, brab i de kuyug gu gélolo ro Begén, <sup>15</sup> ségiléw bé kégélolo guwe bé Abay guwe Tulus brab kégélolo nuwe Begén. Atin i Begéne iray guy férénawa guwe inok méfukas i de kuyug gu dob de sala ro. <sup>16</sup> Wén i de ségiyo do bili-bili gu békén tidéw dob ni rugén. Fatut fanangguwité ku so bero brab fégélingoé roy bérél guwe. Mélaw i de kéluhanay de étew gu, waléy sébaan i rugé ruwe brab ségetéw i témalimae de.

<sup>17</sup> “I funay Abay guwe méimu Begén, non énda gulaané kuy férénawa guwe. Endob amuk méléhuu, méuyagu man. <sup>18</sup> Atin énda i géafas bé férénawa guwe tidéw dob Begéne,

éndob kétaya ku fo iray gu. Wén i kuwagib gu de miray brab wén soy kuwagib gu de médot man ségule. Been i niy sénugu i Abay guwe Begén rigoné ku.”

<sup>19</sup> Amun énggelingoo de Judio man i kékérél Jesuse, énda man énggéséodor i de antaf fédew ro. <sup>20</sup> Médooy de étew, ménbérél ro maro, “Bunég i ni étew brab rénahuko saitan. Kagom fégélingoén de.”

<sup>21</sup> Endob i de dumo de ménbérél ro maro, “Enda gébérél loo bé nan i étewe rénahuko saitan. Atin énda gaganéy ségétéwe sénaitanan i émféadi-adiwe bé de motoy langaféne inok waléy gégito.”

<sup>22</sup> Tidew béno, énggumah i gaiwe kandulioy de Judioy kékéfélé dém ruwe bé kékélinise bé lawi i Tuluse. Bé béno, gai mélégénéy. <sup>23</sup> Atin i Jesuse diyo dob lawi i Tuluse séagéw-agéw dob agéwone wén i atéfén, féndawét bé dawét i méntélatee datu Solomon. <sup>24</sup> Atin i de Judio ménslimud ro dob Jesuse brab ménenginsa ro maro, “Taman kédiron nay kékéongot-ongot me begey? Amuk Beemey Kristowe, san i fénémili i Tuluse méguléw, bérhém begey i mékéntaye.”

<sup>25</sup> Séménumbul i Jesuse mano, “Bénréh gun begom éndob énda munur gom de. I de mékégaif galbék fénrigoy Abay guwe Tulus Begén, been i da nan i émfégtigane begom fantag bé Begéne. <sup>26</sup> Endob énda munur gom de non békén gom do bili-bili gu. <sup>27</sup> I kagéne do bili-bili fégélingoé roy kékérél guwe brab gélolo gu bero, atin furay ro Begén. <sup>28</sup> Iraya ku bero umul magufusa, brab énda méléhu ro. Atin énda i géafas bero tidew dob Begéne. <sup>29</sup> I Abay guwe Tulus toow na fo gérotor bé kéluhanane. Been i méniraye bero dob Begéne. Atin énda i géafas bé de bili-bili gu tidew dob Tuluse. <sup>30</sup> I Begéne brab Abay guwe Tulus, sébaan gey saén.”

<sup>31</sup> Tidew béno, i de Judio ménurut ro batéw man inok ibéro ro batéw i Jesuse féléhué ro damén. <sup>32</sup> Endob ménbérél i Jesuse mano, “Médoonén i fiyowe galbék fénrigoy Abay guwe Tulus Begén dob téngaanga kome. Ati isuwe bé de ni funa kom Begén méméléhu?”

<sup>33</sup> Séménumbul i de Judio maro, “Békén bé de fiyo galbék i funa keye Beem méméléhu, éndob sabaf mémurka dob Tulusoy nan bérhé mo. I Beeme ségétéw go saén kéilawan, sedek bérhé mo Tulus go?”

<sup>34</sup> Tidew béno, séménumbul i Jesuse mano, “Endob wén i Ménslate Kékérél i Tuluse dob Kitab gome mano, ‘Do tulus gom.’ ” <sup>35</sup> Féntaus Jesusey kékérél ne mano, “Enggétiga tom, i Ménslate Kékérél i Tuluse toow fo toow taman sa taman. Mélaw ténavag i Tuluse do tulus i de katufua tom niraya no bé kékérél ne. <sup>36</sup> Atin Begéney fénémili i Abaye brab sénuguén mangéy dini dob duniyae. Mélaw sedek bérhé kom mémurka i bénréh guwe bé Begéney Nga i Tuluse. <sup>37</sup> Amuk énda rigoné kuy fégalbék i Abay guwe Begén, kagom munur Begén. <sup>38</sup> Endob amuk rigoné ku, fatut unur gom bé de génalbék gu, fiyon fo ké énda munur gom bé kékérél guwe, inok gétiga kom brab gésobuto kom i Abaye dini dob Begéne, atin i Begéne diyou dob Abaye.”

<sup>39</sup> Amun énggelingoo roy ni kékérél Jesuse, ténu lama ro man i kéméfoe de, éndob énggésélyah brab ménusut.

<sup>40</sup> Atin ménsefule i Jesuse mifar dob wayége Jordan dob gono Juane mautis bé gétahé de. Atin diyo ménbat. <sup>41</sup> Atin médooy étewe ménangéy dob Beene. Atin ménsebérél-bérél ro maro, “Fiyon fo ké i Juane énda i do rénigo no mékégaif, éndob toow i kéluhanay bénréh ne fantag bé Jesuse ni.” <sup>42</sup> Atin diyo médooy ménunure bé Jesuse.

## 11

### Ténébule Jesusey Lasarowe

<sup>1</sup> Wén i ségétéwe lagéy déméruruun, i dawét ne Lasaro, diyo bati dob Betania. I Mariahe brab Martahe do tuwaréyén libun bati ro so dob no ingéd. <sup>2</sup> Been i niy Mariahe léménuka bé fégéfamute dob de sékéy i Kadnane Jesus brab kénayasén bé buk ne. Atin i Lasarowe lagéyén déméruruun. <sup>3</sup> Mélaw i de libuno ménfieuwit ro kékérél mangéy dob Jesuse maro, “Kadnan, i toowe fo kégédawa mo dumo mo séloyuk, déméruruun.”

<sup>4</sup> Amun énggelingoo Jesusey ni, ménbéréh mano, “Enda méléhu i Lasarowe bé nan déruun. Ménrigoy ni inok médayéw i Tuluse, atin tidéw so dob ni médayéw soy Begéne sani Nga i Tuluse.”

<sup>5</sup> Toow fo méimu i Jesuse bé de ni sétuwaréy ro Martah, Maria, brab Lasaro. <sup>6</sup> Endob fiyon fo ké énggelingoo Jesuse déméruruun i Lasarowe, énda na ménagewén tidéw dob gono nuwe bati taman énda fentibusén nay ruwowe gétérésangan. <sup>7</sup> Tidéw bénou, ménbéréh dob de kuyugén mano, “Séfule tom mangéy Judea.”

<sup>8</sup> Endob bang i de kuyugén, “Maistéro, békén ba énda séna ménrugay i kétulamay de Judio diyo Beem méméléhu? Mélaw énda fatutén séfule gon man mangéy diyo.”

<sup>9</sup> Séménumbul i Jesuse mano, “Aw békén ba folo bra ruwo géuras i ségéfuwehe? Atin énda gébangkud i étewe magéw ké fuweh non gito noy géfekayae dob duniyae. <sup>10</sup> Endob i étewe magéw ké kélungonon gébangkud non délémon.” <sup>11</sup> Nuret Jesusey binuwayae ni inok fégétiga no bé de kuyugén bé énda gésug-sugén diyo dob Judea non énda séna fénggilidén i galbék ne. Amun énggilid Jesuse bénréh i ni, rénéfaa no mano, “I Lasarowe dumo tom séloyuk, fidong. Mangéyú diyo inok ulégé ku.”

<sup>12</sup> Atin i de kuyugén ménbéréh ro maro, “Amuk fidong, waléy adi-adi.”

<sup>13</sup> Endob i atag i bénréh Jesuse, ménléhu i Lasarowe, éndob énda énggésobutoy de kuyugén de. Marok tintu fidong. <sup>14</sup> Mélaw bénréh Jesuse fénkéntayén dob berowe mano, “Ménléhuén i Lasarowe. <sup>15</sup> Endob sabaf bé begome, mororu non énda diyou. Non wén i rigoné kuwe funa kom munur Begén. Enggomén, magéw tomén.”

<sup>16</sup> Atin ménbéréh i Tomase (féndawét so “Séfing”) dob de dumo no kuyugén mano, “Modor tom de inok méléhu tom so séréngan bé Jesuse.”

<sup>17</sup> Amun énggégumah ro diyo, énggelingoo Jesuse bé ménfotén gétérésangan i kélébeng ruwe bé Lasarowe. <sup>18</sup> I ingéde Betania, gédét saén dob Jerusalem, télén gékilomitroy kéravy ne. <sup>19</sup> Atin médooy de Judio ménangéy diyo inok féfiyoné roy de fédew ro Martah brab Maria bé kéléhu i lagéy ruwe.

<sup>20</sup> Amun énggelingoo Martahe gédét gumah i Jesuse, ménagéw bénalakén, éndob i Mariahe ménféled dob lawie. <sup>21</sup> Atin ménbéréh i Martahe dob Jesuse mano, “Kadnan, amuk dini go, énda damén ménléhu i lagéy guwe. <sup>22</sup> Endob gétiga ku fiyon fo ké béléewe ni, iray i Tuluse Beem i ati ongoté muwe de.”

<sup>23</sup> Atin ménbéréh i Jesuse mano, “Tébule i lagéy me.”

<sup>24</sup> Atin bang Martahe, “Gétiga ku tébule moso beroy kéluhanay de étew dob tamfaday de gai.”

<sup>25</sup> Séménumbul i Jesuse mano, “Begéney témbulee brab miraye umul. I étewe munur Begén, fiyon fo ké méléhu, méuyag so. <sup>26</sup> Atin i méuyage étew munur Begén, éndaén méléhuén. Munur go bé ni?”

<sup>27</sup> Atin séménumbul i Martahe mano, “Hoo Kadnan, munuru Beemey Kristowe, sani nongot-nongot geye Nga i Tuluse ménangéy dob duniyae ni.”

<sup>28</sup> Amun énggilid Martahe bénréh i ni, ménsefule mangéy dob Mariahe dumo no brab ménseguraw mano, “Enggumah i Maistérowe brab fentawagén beem.” <sup>29</sup> Amun énggelingoo Mariahey ni, ménagayas témindég brab ménagéw bénalakén i Jesuse. <sup>30</sup> (I Jesuse énda séna énggumahén dob ingéde, diyo séna dob gonoy bénalaka Martahe de.)

<sup>31</sup> Atin i de Judio diyo ro dob lawie émféfiyo bé fédew Mariahe, amun énggito roy Mariahe ménagayas témindég brab ménagéw, ménfuray ro de. Marok mangéy kémérew dob lébénge.

<sup>32</sup> Amun énggumah i Mariahe dob gono Jesuse, ménénéngkéb dob adafa nuwe brab ménbéréh mano, “Kadnan, amuk dini go, énda damén ménléhu i lagéy guwe.”

<sup>33</sup> Amun énggito Jesusey Mariahe kémérew brab de Judio ménodor de kémérew ro so, ménuray i na Jesuse brab toow fo ménchte i fédew ne. <sup>34</sup> Atin ménénginsa i Jesuse mano, “Hon i gonoy lénébéngó kome de?”

Séménumbul ro maro, “Kadnan, mangéy tom diyo.”

<sup>35</sup> Tidéw bénō, kéménrew i Jesuse. <sup>36</sup> Mélaw ménésbérēh-bérēh i de étew maro, “Téngténg gom, toow fo mégédaw i Jesuse bé Lasarowe.”

<sup>37</sup> Endob bang i de dumō de, “Enggféadi-adino noy de motoy langaféne. Sedek énda énggféadi-adino noy Lasarowe inok énda damén ménléhuén?”

<sup>38</sup> Atin amun énggégumah i Jesuse dob lébénge, toow fo méntete i fédew ne. I ni lébénge takub, atin ténléb roy bengawa nuwe bé dakéle batéw. <sup>39</sup> Tidéw bénō, ménbérēh i Jesuse mano, “Kéda kom i batéwa nan.”

Endob i Martahe, libuy ni ménléhu ménbérēh mano, “Endob mahuén i bangkay ne béléewe ni, non ménfotén gétérésangan i kélébénge de.”

<sup>40</sup> Atin ménbérēh man i Jesuse mano, “Bénréh gun dob beeme, amuk munur go, gito moy barakat i Tuluse.” <sup>41</sup> Mélaw kenda roy batéwe dob bengaway lébénge. Atin i Jesuse léménengag brab ménbérēh mano, “Abay, toow fo fésalamatu dob Beeme non fénggélingoém Begén.” <sup>42</sup> Atin gétiga ku fégélingoé mo Begén sénga tékélid. Endob dasala kuy ni béléewe non bé de étew géliwét Begén inok munur ro Beem i séménugue Begén.” <sup>43</sup> Amun énggilid bénréhén i ni, ménbérēh toow fo métanug mano, “Lasaro, sut go!” <sup>44</sup> Tidéw bénō, méntebule i Lasarowe brab ménusut. Atin méntabéd i de kémérén brab de sékéyén bé de safut fénggébaus bé lowoh ne, brab méntéléb i rangih ne bé munsalawe. Atin ménbérēh i Jesuse mano, “Kéda kom i de fénggébaus de nan inok éndaén méfukétén.”

<sup>45</sup> Médooy de Judio ménangéy témukaw bé ro Mariahe, amun énggito roy rénigo Jesuse, ménunur ro dob Beene. <sup>46</sup> Endob i de dumō bero, ménangéy ro dob de Fariseo brab nuret roy rénigo Jesuse. <sup>47</sup> Mélaw i de odoroy de fadi brab de Fariseo, ménslimud ro beroy de kéfédéway de Judio. Atin ménbérēh ro maro, “Ati rigoné tome? Non i Jesuse ni rémigo médooy do mékégaif.” <sup>48</sup> Amuk fédayaé tom i ni rigoné no, kéluhanay étewe munur dob Beene. Tidéw bénō, waléy datu i de Judio atin mékérít i datu tome tidéw Roma. Tidéw bénō, mangéy diniy de sundaloy de Romano inok binasané roy lawi i Tuluse gono tom méngadaf, loo soy ingéd tome.”

<sup>49</sup> Endob ménbérēh i Kayafase, sani gérotore fadi bé no bélintuwa mano, “Enda i lanték gom. <sup>50</sup> Aw énda ba gétiga kom de, labi na fiyo ké ségétew saén i méléhue gémantinon bé kéluhanay Judiowe, inok énda mébinasay ingéd tome?” <sup>51</sup> Bénréhén i ni békén tidéw dob kaane saén kéfégitung. Non beeney toowe gérotor fadi bé no bélintuwa, mélaw sénarigoy Tuluse émbérēh bé i Jesuse méléhu inok méuyag i de étew Judio. <sup>52</sup> Atin békén say de Judio, non i funa Jesuse méléhu inok i kéluhanay de nga i Tuluse, sani de munur dob Beene, fiyon atiy gonone tidéwo ro, waléy ro sébaan.

<sup>53</sup> Mélaw tidéw bé no gai, i de odoroy de Judio fégitungé roy ati kéféléhu ruwe bé Jesuse. <sup>54</sup> Mélaw éndaén féira-iray Jesuse dob Judea ké magéw. Yamula ménangéy Efraim gédét dob gonone énda i étew de batí. Atin diyo ménbatí beroy de kuyugén.

<sup>55</sup> Amun gédétén i kékanduli i de Judio féndawét “Témara”, médooy de étew tidéw dob de ségiyo-giyo gonon ménangéy Jerusalem. Diyo ro rénigoy adate féndawét “Félinis” inok géamung ro bé kandulie ni. <sup>56</sup> Atin sélédé roy Jesuse non énda énggito ro de diyo. Atin méniséfenginsa ro dob lawi i Tuluse maro, “Ati karang gome de, mangéy keey diniy Jesuse bé ni kékanduli, loo ké énda?” <sup>57</sup> Non i de odoroy de fadi brab de Fariseo, bénréh ro dob de étew buluk wén i ségétew gégitó bé gono Jesuse, bérhé no dob berowe inok gékéfoo ro.

## 12

<sup>1</sup> Ném séden kélunganon taman bé gaiy kékanduli ruwe féndawét “Témara”, i Jesuse ménangéy Betania, sani ingéd Lasarowe, i lagéye ténebuleén. <sup>2</sup> Diyo ténafoy roy kandulie fégbasa bé Jesuse. Bé no témegén, i lala Martahe démuwot, ménstar i ro Jesuse bero Lasaro. <sup>3</sup> Atin i Mariahe éndotén i dakéle katiya ménfeno fégéféamut féndawét nardo, toow fo balilaga, atin lénukaén dob de sékéy Jesus. Tidéw bénō, kénayasén bé buk ney de sékéy Jesus. Atin ménlégéb i duwaléy lawie bé térehung i ni fégéféamut. <sup>4</sup> Endob i ségétewe bé de kuyugén féndawét Judas Iskariot, sani ménfékéfoe de, ménbérēh mano,

<sup>5</sup> “Sedek séninggula saén i nan fégfééamut? Non amuk fénbéléy damén i nan nor, wén i médoor kurta gédotén de brab iray damén dob de méskinan.” <sup>6</sup> Endob békén toow i kéray i na nuwe bé de méskinan. Enggébérého noy no non i beene ségettew ménakaw. Beeney témimue bé kurta ruwe, brab sénga tékélid médot de.

<sup>7</sup> Endob séménumbul i Jesuse mano, “Kago élénén i Mariahe. Atin fatut itongé noy sama ne inok wén i fégfééamut bé gaiwe kélébéng bé bangkay guwe. <sup>8</sup> I de méskinan bati dob begome sénga tékélid. Endob i Begéne, éndaén mérugayu bati dini dob begome.”

<sup>9</sup> Médooy de étew énggelingoo ro diyo i Jesuse dob Betania. Mélaw ménangéy ro diyo. Békén say Jesusey funa ruwe mangéy diyo, non ménangéy ro diyo inok gito ro soy Lasarowe, sani lagéye ténébuleén. <sup>10</sup> Mélaw i de odoroy de fadi bénantak fédéw roy féléhué ro soy Lasarowe. <sup>11</sup> Non Lasarowey funay médoowe Judio téménrén modor bé kétoro i de odoro ro atin méngganay ro munur bé Jesuse.

<sup>12</sup> Bé gétunduge de fuweh, médooy de étew do ménangéy dob Jerusalem inok mamung bé ni kanduli féndawét Témara, énggelingoo roy Jesuse mangéy Jerusalem. <sup>13</sup> Mélaw méndot ro do dau bongo brab ménuts ro dob ingéde inok balaké roy Jesuse. Ménbéréh ro métanug maro, “Dayewé tom i Tuluse! Féfiyonéy Tuluse damén i ni gégumah tidéw dob Kadnane! Beeney datu tome do Judio!”

<sup>14</sup> Atin éndot Jesusey natiy kudae brab kénudaa no. Mélaw ménatuman i Ménsulate Kébéréh i Tuluse mano, <sup>15</sup> “I begome do étew dob Jerusalem, kagom mégilak. Non gégumah i datu gome kémuda dob natiwe.” <sup>16</sup> Enda fo énggésobutoy de kuyug Jesus i de ni bé no gai. Endob amun déméniyat i Jesuse, énggétédémo ro brab énggésobuto roy Ménsulate Kébéréh i Tuluse, brab been i niy rénigo ruwe dob Jesuse funan ménatuman i Ménsulate Kébéréh i Tuluse.

<sup>17</sup> Bé béri, i de médoor do étew énggégito bé kétawag ne brab kétébule ne bé Lasarowe, nuret ro dob de dumo roy fantage bé rénigo Jesuse. <sup>18</sup> Been i niy funay médoowe étew ménalak bé Jesuse dob de agéwon non énggelingoo roy rénigo nuwe ni mémégaif.

<sup>19</sup> Mélaw ménésbéréh-béréh i de Fariseo maro, “Endaén i fiyo rigoné tom, énténg gom kéluhanay étewe modor ro de.”

<sup>20</sup> Atin diyo soy do étew tidéw dob ingéde Gris. Ménangéy ro so Jerusalem inok géfengadafa ro bé no kékanduli. <sup>21</sup> Ménangéy ro dob Filipihe (sani tidéwe Betsaida, sébaan ingéd dob sakuf i Galileawe), brab ménbéréh ro maro, “Maistéro, méuyot gey géségito bé Jesuse.”

<sup>22</sup> Tidéw bérén, bénréh Filipihe bé Andree, brab ruwo ro ménangéy dob Jesuse brab bénréh ro dob Beeney kényotoy de étew. <sup>23</sup> Atin ménbéréh i Jesuse mano, “Enggumahén i gaiwe toow fo médayéw i Nga i Kéilawane, sani Begéne. <sup>24</sup> Béréhé ku begom i toowe, amuk i bénée énda mélébéngén dob fantade, énda mégonokén. Endob amuk ménlébéng, mégonok médooy. Ségiléw bé Begéne, non amuk méléhuu, médooy gégédote bé mantuwe umul. <sup>25</sup> I aruméne étew sani toowe fo gémulaan bé férénawa nuwe, méléhu. Endob i étewe énda gulaané noy férénawa nuwe dob ni duniya, gédoté noy mantuwe umul magufusa. <sup>26</sup> Atiy méuyote gémalbékón Begén fatut modor Begén, inok fiyon fo ké ati ayo kuwe, diyo soy sugu-sugué kuwe. Atin fébantug i Abay guwey étewe gémalbékón Begén.

<sup>27</sup> “Toow fo tete i fédéw guwe béléewe ni. Ati fatute béréhé ku? Enda mon gébérého ku de ké maku, ‘Abay, kago fédayaén mérigo séko dob Begéne.’ Non been i niy funa kuwe ménangéy dini inok géagéwo kuy ni kérasay.” <sup>28</sup> Tidéw bérén, déménasal i Jesuse mano, “Abay, fégito moy barakat me.”

Tidéw bérén, wén i émbéréhe tidéw dob lawayo mano, “Fénggito gun i barakat guwe atin fégito moy man ségue.”

<sup>29</sup> Atin amun énggelingoooy de ménslimud do étew diyo i ni, i de dumo de marok léte, atin i de dumo de marok télakiy no ménésbéréh bé Jesuse.

<sup>30</sup> Endob bénréh Jesuse mano, “I funay Tuluse ménbéréh békén inok gélingoo ku, yamula inok gélingoo kom so. <sup>31</sup> Béleewey gaiwe féganayéy Tulusey kékukum ne bé de tete étew. Atin fétékedanén i datu i ni duniya, sani Satanase. <sup>32</sup> Atin i Begéne, amuk métunggulu, fáfégédétay kuy kéluhanay étewé dob Begéne.” <sup>33</sup> (Bénréh Jesusey ni inok fégétiga no beroy fégéléhu ne, tunggulén dob kruse.)

<sup>34</sup> Atin ménbéréh i de étew ménlimud maro, “Ménbéréh dob Ménsulate Kébéréh i Tuluse i Kristowe kun méuyag taman sa taman. Mélaw sedek bénréhém i Nga i Kéilawane fatut tunggulén? Ati ni Nga Kéilawan?”

<sup>35</sup> Mélaw bénréh Jesuse bero mano, “I Begéne maak solo. Atin éndaén mérugay i kébatu guwe dob begome. Fétuntay gom béléewe non diniwu séna inok gétiga kom i fiyowé agéwon. Endob amuk délémonén, éndaén gito gom i agéwone. <sup>36</sup> Mélaw amun diniwu séna, unur gom Begén inok waléy gom so do solo miring Begén.”

Amun énggilid i Jesuse ménbéréh, méntékédan brab éndaén méntéfégito no bé de étew. <sup>37</sup> Fiyon fo ké énggitoy de médooy rénigo Jesuse do mékégaif, énda so munur ro de. <sup>38</sup> Dob ni méntuman i Ménsulate Kébéréh i Tuluse, sénulat Isaiase sani méntélatae sénarigoy Tuluse muret mano, “Kadnan, énda i munur bé uret geye, atin énda i énggétigan bé fénggitono muwe bé barakat me.”

<sup>39-40</sup> Atin sénulat Isaiase so mano, “I Tuluse, fénwaléyén bero langafén brab féntégasén i de fédew ro, inok énda gégitoy ro brab inok énda gésobut ro brab énda gésénule ro brab munur dob Tuluse inok tabanga no bero.” Atin been i funa ruwe énda géunur ro.

<sup>41</sup> Bénréh Isaiasey ni non bé gétahe de énggitoy noy kébarakata Jesuse brab bénréhén i fantage bé Beene.

<sup>42</sup> Fiyon fo ké loo bé ni, médooy de odoroy de Judio ménunur bé Jesuse. Endob énda fénayag ro de non mágilak ro bé de Fariseo fétékedané ro dob lawie féngadafan inok éndaén géfengadaf ro diyo. <sup>43</sup> Enda fénayag roy kénur ruwe bé Jesuse non toow na fo méuyot ro bé kédayéw i kéilawane bé kédayéw i Tuluse.

<sup>44</sup> Tidew béo, méntanug i kébéréh Jesuse mano, “I étewé munur dob Begéne, énda saén munurén dob Begéne, éndob munur so bé Tuluse séménugu Begén. <sup>45</sup> Atin i étewé énggétigo Begén, énggitoy no soy séménugue Begén. <sup>46</sup> Begéney maake solo. Ménangéyu dini dob duniyae inok rémendawu dob de étew. Mélaw i de munur dob Begéne, éndaén bati ro dob délémone. <sup>47</sup> Atin i étewé énggégélingo bé kétoro guwe éndob énda munurén de, békén Begén i kémukume de, non énda ménangéyu dini inok kukumé kuy de kéilawan, yamula fukasé ku bero dob de sala ro. <sup>48</sup> I étewé mika Begén brab énda munurén bé kagéne kétoro, mékukum dob tamfaday de gai. Atin i kémukume de, been i kétoro guwe. <sup>49</sup> Non i kagéne kétoro békén tidew dob Begéne, éndob tidew dob Abay guwe Tulus séménugu Begén. Been i ménféréhé Begén. <sup>50</sup> Atin gétiga ku, i sugu ne miray bé umule magufusa. Mélaw béréhé ku begom i sénugu i Abay guwe.”

## 13

### Nurah Jesusey de sékéy i de kuyugén

<sup>1</sup> Bé béo, ségékélungonon séden atin kémanduli i de Judio féndawét “Témara”. Atin énggétiga Jesuse, gédétén i gaiwe tagaké noy duniyae ni atin séfule mangéy dob Abay ne. Toow fo ménimu bé de kuyugén dob duniyae ni, atin fénténgténgén i kédakél i kégédaw ne bero.

<sup>2</sup> Ménama i Jesuse beroy de kuyugén. Atin i Satanase, bé gétahe de fénemanduo noy Judas Iskariote sani nga Simon Iskariote inok fékéfoén i Jesuse. <sup>3</sup> Atin i Jesuse énggétiga noy Abay ne sénarigén dob Beeney kéluhanane. Atin énggétiga noy Beene tidew dob Tuluse atin séfule mangéy dob Tuluse. <sup>4</sup> Mélaw amun ménasar ro séna dob sékuloy ahayane, téménindég i Jesuse brab kenda noy kégal ne brab nikétén i tuwaliyawe dob owok ne. <sup>5</sup> Tidew béo, rénigono no wayéy i félangganahe atin nurahén i de sékéy i de kuyugén, brab ténafo no bé tuwaliyawe nikétén dob owok ne. <sup>6</sup> Amun fégédét i Jesuse

dob Simon Pedrowe, ménbérél i Pedrowe mano, “Kadnan, aw Beem i murahe bé de sékéy gu?”

<sup>7</sup> Séménumbul i Jesuse mano, “Enda gésobuto kom i atag i ni rigoné ku béléewe ni, éndob gésobuto kom so moso.”

<sup>8</sup> “Kago”, bang Pedro. “Enda fo méuyotu de ké Beem i murahe bé de sékéy gu.”

Endob séménumbul i Jesuse mano, “Amuk énda géuraha ku begom, békén gom do toow kuyug gu.”

<sup>9</sup> Mélaw bang Pedrowe, “Kadnan, békén say de sékéy gu, éndob urahém soy de kémér gu brab uléw guwe de so.”

<sup>10</sup> Endob ménbérél i Jesuse mano, “I étewe énggilidén méndiyoh, kailangan urahé no say de sékéyén, non limfiyonén i lowoh ne. Atin limfiyo gomén saliyu bé ségétewe énda limfiyo no.” <sup>11</sup> Bénréh Jesusey ni non gétiga no wén i ségétewe bero émfékéfo de. Been i niy funa nuwe ménbérél mano, “Enda kéluhana kom limfiyo.”

<sup>12</sup> Atin amun énggilidén nurah Jesusey de sékéy i de kuyugén, kéménégal brab ménsar man dob amaane. Tidew béo, ménenginsa mano, “Aw énggésobuto kom i rénigo guwe dob begome? <sup>13</sup> Fédawété kom Begén ‘Maistéro’ brab ‘Kadnan’, atin toow fo fatut i nan non Begéney Kadnane. <sup>14</sup> Mélaw i Begéne, sani Kadna kome brab Maistéro gom, amun nurah guy de sékéy gom, fatut gom so séurah sékéy. <sup>15</sup> Ténoro gu begom i fatute adat. Rénigo guy ni inok iringé kom so. <sup>16</sup> Béréhé ku begom i toowe, énda nay rifén ké toow na fo gérator bé gefee de, brab énda nay sugu-suguén ké toow na fo gérator bé amu ne.

<sup>17</sup> Amuk énggésobuto kom i de ni, toow gom na fo moror ké rigoné kom.

<sup>18</sup> “Enda béréhé kuy ni dob begome kéluhanan, non gétiga kuy de fédew gom do fénemili gu. Mélaw gétiga ku wén i ségétew begom émfékéfo Begén. Mérigoy ni inok métuman i Ménsulate Kébérél i Tuluse mano, ‘I étewe dumo gu mama waléy sébanil Begén.’ ” <sup>19</sup> Féntaus Jesusey kóbérél ne mano, “Béréhé ku begom béléewe ni, bé énda séna ménrigo no inok amuk gérumah i gaiwe métuman i ni, géunur gom Begéney Kristowe tidew dob Tuluse. <sup>20</sup> Béréhé ku begom i toowe, i étewe témayakuf bé sugué kuwe, témayakuf so Begén. Atin i témayakufe Begén, témayakufén soy Tuluse séménugu Begén.”

<sup>21</sup> Amun énggilid Jesuse bénréh i ni, toow fo ménlidu i na nuwe atin ménbérél man mano, “Béréhé ku begom i toowe, wén sékoy ségétewe begom émfékéfo Begén.”

<sup>22</sup> Tidew béo, i de kuyugén ménggéséténgténg ro, non énda gétiga roy ati isuwe bé berowey bénréh Jesuse. <sup>23</sup> Atin ménsar dob sékulo Jesusey kuyug ne toow fo kégédawa no. <sup>24</sup> Atin kénébit Simon Pedrowey ni kuyug brab ménbérél mano, “Fénginsaém ké ati isuwe de.”

<sup>25</sup> Mélaw ménfégédét i ni kuyug dob Jesuse brab ménenginsa mano, “Kadnan, ati isuwe begey i émfékéfoe Beem?”

<sup>26</sup> Séménumbul i Jesuse mano, “I étewe iraya ku bé fane nérém gu, been i nan.” Tidew béo, amun énggérémo noy fane, nirayén dob Judase nga Simon Iskariote. <sup>27</sup> Amun énggédot Judasey fane, ménahur i Satanase dob Beene. Atin ménbérél i Jesuse mano, “Fagayas gon, rigo mo néni rigoné muwe.” <sup>28</sup> Endob énda i ségétew bé de kuyugén ménsar dob amaane, énggésobut bé funa Jesuse ménbérél bé nan. <sup>29</sup> Non i Judase beeney témidie bé de kurta ro, brab marok sénugu Jesuse mangéy méléy bé de kailanga ro bé no kékanduli. Atin i de dumo bero marok sénuguén mangéy miray kurta dob de méskinan.

<sup>30</sup> Amun énggédot Judasey fane ni, ménsut atin ménagéw. Bé béo, kélungonon.

### *I mantuwe sugu*

<sup>31</sup> Amun ménagéw i Judase, ménbérél i Jesuse mano, “Béléewe gitonén i barakat guwe sani Nga i Kéilawane. Atin béo Begéne, giton soy barakat i Tuluse. <sup>32</sup> Brab amuk béo Begéne, énggitonén i barakat i Tuluse, tidew béo fégítøy Tulusey barakat guwe. Atin rigoné noy ni magad. <sup>33</sup> Do nga gu, éndaén mérugay i kóbati guwe dob begome, brab sélédé kom

séko Begén. Endob bérhéé ku begom béleewe niy bénréh guwe dob de odoroy de Judio, ‘Enda géodor gom mangéy dob ayo kuwe.’<sup>34</sup> Atin ay niy mantuwe sugu iray gu begom: Ségedaw gom. Ségiléw bé kégédaw guwe begom, ségedaw gom.<sup>35</sup> Amuk ségedaw gom, gétigay kéluhanay de étew mélaw begom i de kuyug gu.”

<sup>36</sup> Tidéw béno, ménénginsa i Simon Pedrowe mano, “Kadnan, ayo muwe de?”

Séménumbul i Jesuse mano, “Béleewe ni, énda géodor gom Begén mangéy dob ayo kuwe. Endob gétundug gom so moso may diyo.”

<sup>37</sup> Atin bang Pedrowe, “Kadnan, sedek énda géodoru Beem béleewe ni? Ulan den ké méléhuu sabaf bé Beeme.”

<sup>38</sup> Endob ménbérhé man i Jesuse mano, “Aw toow ulan den ké méléhu go sabaf bé Begéne? Bérhéé ku beem i toowe, énda séna ukoro i férufete, dirungé mo Begén télaw gule bé énda gélolo mo Begén.”

## 14

### *Jesusey agéwone mangéy dob lawayo*

<sup>1</sup> Bang Jesuse, “Kagom émbuku taloo no tete i de fédéw gom. Unur gom bé Tuluse, brab unur gom so Begén. <sup>2</sup> Wén i médo do gonon dob lawi i Abay guwe. Atin magéwu angéyé ku tafayén i de gono kom. Enda bérhéé ku begom i ni amuk békén toow. <sup>3</sup> Tidéw béno, amuk énggilidén méntafay i de gono kom, séfuleu mangéy dini brab uwité ku begom mangéy dob batio kuwe inok sétifon tom. <sup>4</sup> Atin gétiga kom i agéwone mangéy dob ayo kuwe.”

<sup>5</sup> Endob ménbérhé i Tomase mano, “Kadnan, énda gétiga key i ayo muwe de. Ati mélaw i kégétiga keye bé agéwone mangéy diyo?”

<sup>6</sup> Séménumbul i Jesuse mano, “Begéney agéwone, Begéney toowe, brab Begéney umule. Enda i géangéy dob Abaye saliyu bé Begéne. <sup>7</sup> Amuk toow fo gétiga kom Begén, gétiga kom soy Abay guwe Tulus. Atin tidéw béleewe ni, énggétiga komén brab énggito gomén.”

<sup>8</sup> Atin bang Filipihe. “Kadnan, fégito mo begey i Abaye Tulus. Been saén i nan i kailanga keye.”

<sup>9</sup> Séménumbul i Jesuse mano, “Ménrugayén i kébati guwe dob begome. Endob taman so béleewe énda so wayo gélolo mo Begén Filipi? I énggégítowe Begén, énggito no soy Abaye. Sede mélaw ké émbérhé go, ‘Fégito mo begey i Abaye?’ <sup>10</sup> Aw énda fo munur go Begén diyou dob Abaye, atin i Abaye dini dob Begéne? I de bérhéé ku begom békén tidéw dob Begéne. Tidéw dob Abaye dini dob Begéne gémalbék. <sup>11</sup> Unur gom bé kékérhé guwe, i Begéne diyou dob Abaye, atin i Abaye dini dob Begéne. Taloo no unur gom sabaf bé de mékégaif énggito gom rénigo gu. <sup>12</sup> Bérhéé ku begom i toowe, i munure Begén gérígono noy de galbék rigoné ku. Atin gérigo na toow fo dakél mékégaif bé de kagén galbék, non mangéyu dob Abay guwe. <sup>13</sup> Atin rigoné kuy kéluhanay ongoté kome dob dawét guwe, inok fégito guy kéfiyoy Abay guwe Tulus. <sup>14</sup> Udenén éntingayén ongoté kom dob dawét guwe, rigoné ku.”

### *Fantag bé Rémogor i Tuluse*

<sup>15</sup> Féntaus Jesusey kékérhé ne mano, “Amuk méimu gom Begén, odoro kom i de sugué ku. <sup>16-17</sup> Atin ongoté ku dob Abaye, brab sémugu ségiyo tétabang sani Rémogor i Tuluse témořo bé toowe. Atin bati dob begome taman sa taman. I de étew dob duniyae sébanil bé Tuluse énda tayakufé ro de non énda gito ro de brab énda gétiga ro de. Endob i begome, gétiga kom non bati dob begome brab énda tékeda no dob begome.

<sup>18</sup> “Atin i Begéne, énda tagaké ku begom félibu, non séfuleo ku begom. <sup>19</sup> Endaén mérugayén, i de sébanil bé Tuluse éndaén gito ro Begén. Endob i begome, gito gom man Begén. Atin non méuyagu man taman sa taman, méuyag gom so taman sa taman.

<sup>20</sup> Amuk gégumah i nan gai tébuleu, gétiga kom i Begéne diyo dob Abay guwe, atin i begome dini dob Begéne, loo bé kédiyo guwe dob begome.

<sup>21</sup> “I témayakufe bé de sugu gu brab rigoné no, beeney méimue Begén. Atin i Abay guwe féimué noy étewe méimu Begén. Atin i Begéne féimué ku so brab fefégétiga ku dob beeney fantage bé Begéne.”

<sup>22</sup> Tidew béo, ménbérél i Judase (békén Judas Iskariot) mano, “Kadnan, sedek fefégétiga mo begey i fantage bé Beeme, éndob énda fayagé mo de dob de étew sébanil bé Tuluse?”

<sup>23</sup> Séménumbul i Jesuse mano, “I méimue Begén, odoro noy kétoro guwe. Atin i Abay guwe méimu de so brab i Abay guwe brab Begéne mangéy gey bati dob beene. <sup>24</sup> I étewe énda méimuén Begén, énda so odoro noy kétoro guwe. I de ni kékérél gélingoo kom békén kagén, éndob tidew dob Abaye séménugu Begén.

<sup>25</sup> “Bénréh gu dob begomey de ni lokut diniwu séna dob begome. <sup>26</sup> I témabange sani Rémogor i Tuluse, féuwit i Abaye inok fétausé noy galbék guwe. Atin toroé no begom i kéluhanane brab fefégétédémén begom i kéluhanay bénréh guwe begom.

<sup>27</sup> “Féledé kuy kagéne kétanék dob begome, inok fiyoy de fédew gom. I kétanéke iray gu begom békén loo bé kétanéke dob duniiae ni. Mélaw kagom émbuku taloo no mégilak gom. <sup>28</sup> Enggélingoo kom i bénréh guwe bé tagaké ku begom éndob séfuleo ku so begom. Amu damén ké toow gom méimu Begén, moror gom bé kéangéy guwe dob Abaye non i Abaye toow na fo gérotor Begén. <sup>29</sup> Bénréh gu begom i ni lokut énda séna ménrigo no, inok amuk métuman, munur gom de. <sup>30</sup> Enda férugayé kuy kékérél guwe dob begome non gégumah sékoy odoroy duniiae ni sani féndawéte Satanás. Endob énda i barakatén gélawan Begén. <sup>31</sup> Endob rigoné kuy kéluhanay sénugu i Abaye inok gétigay de étew i kímu guwe bé Abaye. Enggomén, magew tomén tékédan tom dini.”

## 15

### *I binuwayae fantag bé kayéwe*

<sup>1</sup> Ménbérél man i Jesuse mano, “I Begéne maak sébaan idéng kayéw atin i Abay guwe Tulus Beeney gefee bé kayéwe. <sup>2</sup> Amuk wén i do fongoy kayéwe énda mégonokén, kéléngé no. Atin limfiyoné noy de fongo mégonok inok méuman i kékégonok ruwe.

<sup>3</sup> I begome maak do fongo gu brab ménlimfiyo gomén, non ménunur gomén bé de kétoro gu. <sup>4</sup> Kagom tékédan dob Begéne atin énda tékédanu dob begome. Enda i fongo géfégonok amuk énda ménsumfatén dob idéng i kayéwe. Ségiléw bé begome non amuk sésuway gom Begén, énda gérigo gom bé fiyowe.

<sup>5</sup> “Non i Begéne maak idéng kayéw atin i begome maak do fongo. I étewe énda tékédan no dob Begéne, brab énda so tékédanu dob beene, géfégonok médo do fiyo rigonén. Endob énda i fiyo gérigo kom ké tékédan gom dob Begéne. <sup>6</sup> Atin i endae ménsumfat dob Begéne ibérén loo bé fongowe. Tidew béo, waléy mégangu. Atin i kéluhanay de fongo do mégangu, timuén inok ibérén dob aféye brab métuwé. <sup>7</sup> Endob i begome, amuk énda tékédan gom dob Begéne atin amuk modor gom bé kétoro guwe, udenén kétaya kom ongoté kom, atin gédoté kom. <sup>8</sup> Atin amuk énggéfégonok gom médo do fiyo rigonén, dayewéy de étew i Abay guwe. Atin gétiga ro mélaw do kuyug gu begom. <sup>9</sup> Féimué ku begom ségiléw bé kímu i Abay guwe Begén. Fétaus gom i kétayakuf gome bé gédaw guwe begom. <sup>10</sup> Amuk odoro kom i de sugu gu, gétaus gom bé kétayakuf gome bé gédaw guwe begom, ségiléw bé kéodoro ku bé de sugu i Abay guwe atin taus i kétayakuf guwe bé gédaw ne Begén.

<sup>11</sup> “Bénréh gu begom i ni inok méoror gom ségiléw bé Begéne inok toow tom fo séoror.

<sup>12</sup> Ay niy sugu guwe begom: ségdaw gom loo bé kégédaw guwe begom. <sup>13</sup> Amuk toow fo mégédaw i ségétéwe étew bé dumo nuwe, irayén i férénawa nuwe inok tabanga no. Been i niy toowe fo dakél kégédaw. <sup>14</sup> Begom i do dumo gu, amuk rigoné kom i sugué kuwe begom. <sup>15</sup> Endaén fédawéte ku begom do sugu-suguén, non i ségétéwe sugu-suguén, énda gétiga noy rigonéy amu ne. Yamula fédawéte ku begom do dumo gu, non bénréh gu begom i kéluhanay énggélingoo kuwe tidew dob Abay guwe Tulus. <sup>16</sup> Békén begom i ménémili Begén, yamula fénémili gu begom. Ténabar gu begom inok géfégonok gom

do fiyo galbék énda mékédano. Atin mélaw i Abaye Tulus, irayén begom i kéluhanay ongoté kome dob dawét guwe. <sup>17</sup> Ay ni mélaw i sugu guwe begom: ségédaw gom.

<sup>18</sup> “I de étew sébanil bé Tuluse dob duniyae ni, amuk mérarék ro begom, fégétédém gom i ni, géétahu na kénraréko ro. <sup>19</sup> Amuk mamung gom sébanil bé Tuluse, méimu i de tete étew begom. Endob fénémili gu begom inok sésuway gom bé de tete étew dob duniyae ni. Mélaw mérarék ro begom. <sup>20</sup> Fégétédém gom i bénréh guwe begom, ‘Enda i sugu-suguén ké gérotor na bé amu ne.’ Mélaw amuk férasayé ro Begén, férasayé ro so begom. Endob amuk wén i do étew odoro roy kagéne kétoro, odoro ro soy kagome de. <sup>21</sup> Endob i funa ruwe begom émférasay non do kuyug gu begom. Non énda gétiga roy Tuluse, sani séménugue Begén. <sup>22</sup> Amuk énda ménangéyu dini mureton bero, énda i sala ro. Endob béleewe ni énda gésélyah ro non énggélingoo roy toowe, éndob mika ro de. <sup>23</sup> Atin i de étew mérarék Begén, békén mérarék ro saén Begén non mérarék ro so bé Abay guwe. <sup>24</sup> Enggitoy mékégaife galbék rénigo gu, énda gérigonoy ségiyowe de. Amuk énda énggito ro de, énda i sala ro. Endob énggito roy de ni, gido loo mérarék ro Begén brab Abay guwe Tulus. <sup>25</sup> Endob fatut mérigoy ni inok métuman i Ménsulate Kébéréh i Tuluse mano, ‘Fiyon fo ké énda i funa ro, mérarék ro so Begén.’ ”

<sup>26</sup> Féntaus Jesusey kébéréh ne mano, “Gégumah sékoy tétabange tidew dob Abaye Tulus. Sugué ku mangéy dob begome. I dawét ne Rémogor i Tuluse, atin toroé noy toowe. Amuk gumahén dini, fégétiga no bé de étew i fantage bé Begéne. <sup>27</sup> Atin begome soy fatute muret fantag bé Begéne, non énggéséodor gom Begén tidew féganay bé kétoro guwe.”

## 16

<sup>1</sup> Féntaus Jesusey kébéréh ne mano, “Bénréh gu begom i kéluhanay de ni inok énda mékédan i késarig gome dob Begéne. <sup>2</sup> Non éndaén moso tungkasé ro begom mahur dob de lawi féngadafan. Atin gégumah moso i gaiwe, i de étew méméléhu begom, marok rígoné roy kétayay Tuluse. <sup>3</sup> Rígoné roy de ni non énda séna gélolo ro Begén taloo no Abay guwe. <sup>4</sup> Endob bénréh gu begom i de ni, inok amuk gégumah moso i nan gai kíférasay ro begom, gétédémo kom i bénréh gun begom.

“Enda bénréh gu de begom bé de gétah, non diniwu séna séodor begom. <sup>5</sup> Endob béleewe ni, muleu mangéy dob Tuluse séménugu Begén. Gido loo, énda i ségétew begom ménginsa ké hon i ayo kuwe de. <sup>6</sup> Atin béleewe, toow fo tete i de fédew gom non bénréh guy de ni. <sup>7</sup> Gido loo, béréhé ku begom i toowe, toow na fo fiyo dob begome ké magéwu, non buluk énda magéwu mangéy i tétabange dob begome. Endob amuk magéwu, sugué ku mangéy dob begome. <sup>8</sup> Atin buluk gégumah, fefégétiga no bé de étew i de sala ro. Fefégétiga no soy fantage bé fiyowe brab fantag bé kékukum i Tuluse. <sup>9</sup> Fégétiga no bero ménsala ro sabaf énda méginugut ro Begén. <sup>10</sup> Fefégétiga no beroy fantage bé fiyowe non muleu mangéy dob Abaye Tulus, atin éndaén gito gom Begén. <sup>11</sup> Atin fefégétiga no soy fantage bé kékukum i Tuluse, non i Satanase, sani odoroy kéluhanay tetee dob duniyae ni, ménkukumén.

<sup>12</sup> “Médoo nay kúyoto kuwe ureté ku begom, éndob énda séna gésobuto kom de béleewe ni, brab waléy gom émbuku ké béréhé ku. <sup>13</sup> Endob i Rémogor i Tuluse, sani témoroe bé toowe, amuk gégumah, fefégétiga no begom i kéluhanay toowe. Enda béréhé noy de kaan saén kífégitung, yamula toroé noy kéluhanay énggélingoo nuwe tidew dob Abaye, atin béréhé no begom i fantage bé kéluhanay mérigowé moso. <sup>14</sup> Dayéwé no Begén, non fefégésobutén begom i kéluhanay de kagén kétoro brab de rénigo gu. <sup>15</sup> I kéluhanay kay Abaye, kagén so. Been i niy funa kuwe ménbéréh bé i Rémogor i Tuluse, fefégésobutén begom i kéluhanay kétoro guwe.

<sup>16</sup> “Endaén mérugayén tidew béleewe ni, éndaén gito gom Begén. Enda man mérugayén tidew bénou, gito gom man Begén.”

<sup>17</sup> Atin i de dumo bé de kuyugén ménsbéréh-béréhé ro maro, “Ati atag i bénréh ne mano, ‘Endaén mérugayén tidew béleewe, éndaén gito gom Begén, brab énda man

mérugayén tidéw béno, gito gom man Begén?” Brab bénréhén so mano, ‘Non muleun mangéy dob Abaye.’<sup>18</sup> Atin ati keey i atag i ni, ‘Endaén mérugayén?’ Enda gésobuto tom i no bénréhén.”

<sup>19</sup> Atin énggétiga Jesuse méuyot ro ménginsa, mélaw bénréhén bero mano, “Aw séfénginsa gom bé ati atag i bénréh guwe begom maku, ‘Endaén mérugayén éndaén gito gom Begén, brab énda man mérugayén tidéw béno gito gom man Begén?’<sup>20</sup> Béréhé ku begom i toowe, i de tete étew dob duniiae ni, toow ro fo moror bé mérigowe dob Begéne, éndob i begome, kémérew gom non toow fo tete i de fédew gom. Endob énda man mérugayén waléy gom toow na fo moror.<sup>21</sup> Ufama, i libune kéararan, démawét non éngumahén i gaiy kékérasaya nuwe. Endob buluk ménkéumahanén, ménlifotén bé kékédawéta nuwe, sabaf bé kéoror ne bé ngae ménunur dob duniiae ni.<sup>22</sup> Ségiléw bé nan soy begome. Béleewe ni, tete i de fédew gom. Endob amuk gégumahén sékoy gaiwe gésérito tom man, waléy gom toow fo moror. Atin énda i gékédan bé kéoror gome.

<sup>23</sup> “Amuk gégumahén sékoy nan gai, éndaén ongote kom Begén. Béréhé ku begom i toowe, i Abaye Tulus, irayén begom i kéluhanay ongoté kome dob dawét guwe.<sup>24</sup> Taman so béni, énda séna ménongot gom dob dawét guwe. Ongot gom atin gédoté kom, inok toow gom fo moror.

<sup>25</sup> “Bénréh gu begom i de ni fénagéw dob binuwayae. Endob gégumah sékoy gaiwe éndaén binuwayaa ku begom, yamula fékéntayé kuy kéuret guwe fantag bé Abaye.<sup>26</sup> Buluk gégumah i nan gai, begom i de mongot dob dawét guwe dob Beene inok iraya no begom. Békén Begén i mongote.<sup>27</sup> Non i Abaye toow fo mégédaw begom. Féimué no begom non ménimu gom Begén brab ménunur gom Begén tidéwu dob Beene.<sup>28</sup> Tidéwu dob Abaye Tulus, brab ménangéyu dob duniiae. Brab béléewe tékédanu dob duniiae ni, atin muleu mangéy dob Abaye.”

<sup>29</sup> Tidéw béno, ménbéréh i de kuyugén maro, “Béleewe méméntay i kékéréh me, éndaén émbéréh go binuwaya.<sup>30</sup> Béleewe ni gétiga key gétiga moy kéluhanane, non fiyon fo ké énda séna ménginsa gey, gétiga mon i de fénginsaé key. Mélaw munur gey Beem, tidéw go dob Tuluse.”

<sup>31</sup> Atin bang Jesuse, “Aw méginugut gomén Begén?<sup>32</sup> Endob gégumah i gaiwe brab énggumahén, ké émbéragar gom, mule gom mangéy dob de lawi gom. Atin tagaké kom Begén ségétew gu saén. Endob fiyon fo ké loo bé nan, wén i dumo gu, non i Abay guwe Tulus i dumo guwe.<sup>33</sup> Béréhé kuy de ni begom, inok fiyoy de fédew gom sabaf bé késarig gome dob Begéne. Férégénoy de tete étew begom, éndob fébaraw gom non ténavananén Begén i Satanase, sani odoroy duniiae ni.”

## 17

<sup>1</sup> Amun énggilid Jesuse bénréh i de ni, léménéngag saréw dob lawayo brab ménbéréh mano, “Abay, énggumahén i gaiwe. Férito moy kéfiyo guwe funa ku fatut médayéw inok fégito gu soy kéfiyo muwe funa mo fatut médayéw.<sup>2</sup> Non sénarigém Begén i kuwagibé méguléw bé kéluhanay de kélawan, inok iray guy umule magufusa dob kéluhanay de étew nirayém Begén.<sup>3</sup> Atin ay niy kégédote bé umule magufusa: kailangan gétiga roy Beeme brab Begéne, non Beem saén i tintuwe Tulus brab Begén i sénugu me Jesu Kristo.<sup>4</sup> Fénggitoy kuy kéfiyo muwe dob duniiae, funa mo fatut médayéw atin énggilid gun i galbéké sénuguém Begén rigoné ku.<sup>5</sup> Abay, béléewe ni ay niwu dob adafa muwe, féséfuleém dob Begéney bantuge loo bé bantug tuwe tidéw féganay bé énda séna ménlimbag i duniiae de.

<sup>6</sup> “Féfégétiga kuy fantage bé Beeme dob de étew dob ni duniya nirayém Begén. Beem i gefee bero, atin nirayém bero dob Begéne, atin ménunur ro bé kékéréh me.<sup>7</sup> Béleewe énggétiga ro tidéw dob Beemey kéluhanane béréhé ku brab rigoné ku.<sup>8</sup> Non fénksamfay gu dob berowey de kékéréhém nirayém Begén, atin méngginugut ro de. Enggétiga ro toowu tidéw dob Beeme, brab ménunur ro sénuguém Begén.

<sup>9</sup> “Dasala ku bero dob Beeme. Enda dasala kuy de tete étew dob duniyae ni, éndob ongoté ku dob Beeme féfyoné moy de étew nirayém Begén non kaam so do étew. <sup>10</sup> I kéluhanay kagéné kaam so, brab i kéluhanay kaame kagén so. Atin dob berowe énggiton i kéfiyo guwe funa ku fatut médayéw. <sup>11</sup> Atin muleu séko mangéy dob Beeme, brab éndaén batiu dob duniyae ni. Endob taus i karowe kébati dob duniyae ni. Fiyo Abay, diyaga mo bero bé barakat i dawét me, sani dawét me nirayém Begén, inok waléy ro sébaan, ségiléw bé betowe sébaan. <sup>12</sup> Amun diniwu dob berowe, déniyaga gu bero bé barakat i dawét me nirayém Begén. Déniyaga gu bero inok énda i ségétew métadin bero saliyu bé ségétewe kailangan mékukum inok métuman i Ménsulate Kébérhéh. <sup>13</sup> Atin béleewe séfuleu mangéy dob Beeme. Bérhéh kuy de ni lokut diniwu séna inok i de gégélingo de toow ro fo moror séréngan bé Begéne. <sup>14</sup> Fénsamfay gu dob berowey de kaam kétoro. Atin i de tete étew dob duniyae, mérarék ro bero non éndaén mamung ro dob de tete étew ségiléw bé Begéne énda mamungu de. <sup>15</sup> Enda ongoté ku de dob Beeme ké kédané mo bero dob duniyae, éndob ongoté ku dob Beeme diyagané mo bero tidew dob Satanase. <sup>16</sup> Enda mamung ro sébanil Beem ségiléw bé Begéne énda mamungu de. <sup>17</sup> I de ni kato étew, usarém i toowe féwaléyém bero do malinis dob adafa muwe. Atin i kaame kébéréh, been i toowe. <sup>18</sup> Sénugu gu bero muret dob de étew ségiléw bé késugu me Begén mangéy dob duniyae. <sup>19</sup> Atin sabaf bé berowe, iray gu Beem i fédew guwe, inok i berowe so iray roy de fédew ro dob Beeme.

<sup>20</sup> “Békén saén i berowey dasala kuwe dob Beeme, éndob dasala ku soy de étew munur ro dob Begéne non béréh kékuret i de ni kuyug gu. <sup>21</sup> Démasalu dob Beeme Abay inok waléy ro sébaan ségiléw bé Betowe. Atin ségiléw béréh kédini muwe dob Begéne brab kédiyo guwe dob Beeme, dini ro so damén dob Betowe. Waléy ro damén sébaan inok i de étew dob duniyae munur ro béréh sénuguém Begén. <sup>22</sup> Niray gu beroy barakate nirayém Begén inok i de fédew ro waléy sébaan loo béréh Betowe. <sup>23</sup> Non i Begéne diyou dob berowe, atin i Beeme dini go dob Begéne. Mélaw waléy ro damén tintu sébaan inok i de étew dob duniyae gétiga ro Beem i séménugu Begén brab féimuém bero loo béréh kékéim me Begén.

<sup>24</sup> “Abay, i de étew nirayém Begén, méuyotu de ké i ayo kuwe begey so inok gito roy bantug guwe, sani bantuge nirayém Begén non fénimuém Begén fiyon fo ké énda séna ménlimbag i duniyae de. <sup>25</sup> Métintu Abay gu, i de étew sébanil Beem, énda gétiga ro Beem. Endob i Begéne énggétiga ku Beem. Atin i de ni kuyug, gétiga ro sénuguém Begén. <sup>26</sup> Fénggétiga ku beroy fantage béréh Beeme, brab fétausé ku so inok i kégédaw me bero waléy ségiléw béréh kégédaw me Begén, atin gédiyou dob berowe.” Been i niy dasal Jesuse.

## 18

### Kénéfo i Jesuse

<sup>1</sup> Amun énggilid i Jesuse démasal, ménagéw beroy de kuyugén ménifar ro béréh wayége féndawét Kidron. Wén i do nohok kayéw diyo atin diyo ro témenré. <sup>2</sup> Atin i Judase sani émfékéfoe de énggétiga noy ni gonon non diyo démoyun sélimud i Jesuse béréh de kuyugén. <sup>3</sup> Mélaw i Judase ménangéy diyo, fénanangguwitén i médoowe sundalo brab de mantay béréh lawi i Tuluse sénugu i de odoroy de fadi brab do Fariseo. Ménuit ro do solo brab do téla-ta brab do kulangén. <sup>4</sup> I Jesuse énggétiga non i kéluhanane mérigo séko dob Beene. Mélaw fénggédéto no bero brab ménbéréh mano, “Ati séléde kome?”

<sup>5</sup> Séménumbul ro maro, “Séléde key i Jesuse tidew Nasaret.”

Atin bang Jesuse, “Begén i no.”

Diyo soy Judase brab been i émfékéfoe béréh Jesuse. <sup>6</sup> Amun bénréh Jesuse Been i no séléde ro, énggétésunud i de sundalo brab kéluhana ro ménituwar. <sup>7</sup> Tidew béréh, ménenginsa man i Jesuse mano, “Ati séléde kome?”

Atin séménumbul ro maro, “Jesus tidew Nasaret.”

<sup>8</sup> Atin bang Jesuse, “Bénréh gun begom, Begén i Jesuse. Mélaw amuk Begén i séléde kome féagéw gom i de dumo gu ni.” <sup>9</sup> Bénréhén i ni inok métuman i kélühana ne mano, “Abay, énda i énggétadino ku fiyon ségétew béréh de étew nirayém Begén.”

<sup>10</sup> Tidéw béno, i Simon Pedrowe rénau noy sundange tidéw dob ruma ne. Atin téni bohén i ségétéwe rifén kay gérotore fadi brab sénilafén i kelingo ne fingé kuwonon. I dawét i ni rifén Malkus. <sup>11</sup> Tidéw béno, bénréh Jesuse dob Pedrowe mano, “Rumaém i sundang ma nan. Non i kékérasaya kuwe niray i Tuluse Begén, békén ba kailangan téférasyun mon?”

### Ménkukum i Jesuse

<sup>12</sup> Tidéw béno, i de sundalo beroy odoro ruwe, brab de mantay bé lawi i Tuluse, kénéfo roy Jesuse brab nikét ro. <sup>13</sup> Atin nuwit ro sungu dob Anase, térimay gérotore fadi bé no bélintuwa féndawét Kayafas. <sup>14</sup> Atin i Kayafase féngginau noy de odoroy de Judio bé gétahe de mano, “Toow na fo fiyo ké ségétéw saén i méléhue inok énda méléhu i kéluhanay de Judio.”

<sup>15</sup> Atin i Pedrowe brab ségétéwe dumo no kuyug ménfuray ro bé Jesuse. I ni ségétéw kuyug, énggéloloy gérotore fadi, mélaw énggéodor so bé Jesuse mahur mangéy dob fésawayaw lawi i gérotore fadi. <sup>16</sup> Endob i Pedrowe méntéféléed dob liyuy bengaway fésawayane. Tidéw béno, i dumo nuwe kuyug sani énggéloloy gérotore fadi ménsut brab ménsebéréh bé kénogone mantay dob bengawane, brab fénahurén i Pedrowe dob fésawayane. <sup>17</sup> I kénogone ni ménenginsa dob Pedrowe mano, “Aw békén ba beem i ségétéwe bé de kuyug i lagéye kénéfo?”

Séménumbul i Pedrowe mano, “Békén begén.”

<sup>18</sup> Mélégénéy fo bé béno gai. Mélaw i de sugu-suguén brab de guwardiya ménuyag ro aféy atin téménindég diyo ménélagang ro. Atin diyo soy Pedrowe téménindég télagang.

<sup>19</sup> Atin i gérotore fadi fénenginsaa noy Jesuse fantag bé de kuyugén brab bé de kétooroén. <sup>20</sup> Séménumbul i Jesuse mano, “Enda ménbunéy i de kétooro gu. Yamula toroé kuy kéluhanay de étew non démoyunu téromo dob de lawi féngadafan brab dob lawi i Tuluse dob téngaangay de étew, non diyo ménlimud i de Judio. Enda foy bénréh gu ké sénkém saén. <sup>21</sup> Mélaw sedek fénginsaa mo Begén? Fénginsaa moy de étew énggégélingo Begén non gétiga roy de kétooro gu.”

<sup>22</sup> Amun bénréh Jesusey ni, i ségétéwe bé de guwardiya ténamfilingén i Jesuse brab ménbéréh mano, “Aw been i nan i késumbulo muwe bé gérotore fadi?”

<sup>23</sup> Séménumbul i Jesuse mano, “Amuk tete i bénréh guwe, béréméh ati tetee de. Endob amuk toow i bénréh guwe, sedek tamfilingé mo Begén?”

<sup>24</sup> Tidéw béno, i Jesuse tafay so nikét fénuwit Anase mangéy dob toowe gérotor fadi féndawét Kayafas.

<sup>25</sup> Amun i Pedrowe diyo séna dob aféye télagang, fénenginsaay de étew diyo maro, “Aw békén ba beem soy ségétéwe bé de kuyugén?”

Endob dénirung Pedrowe mano, “Békén begén.”

<sup>26</sup> Diyo i ségétéwe rifén kay toowe gérotor fadi sani samung i étew sénilaf Pedrowey kelingo ne. Ménenginsa mano, “Aw békén ba beem i énggitó guwe dumo no bé kékéfo ruwe de dob safade?”

<sup>27</sup> Atin dénirung Pedrowe man mano, “Békén begén.” Sonom so béno, ménukoro i frufete.

<sup>28</sup> Tidéw béno, nuwit roy Jesuse tidéw dob lawi Kayafase mangéy dob lawi i méguléwe bero tidéw Roma. Toow fo géfuén bé no uras. Atin i de odoroy de Judio énda ménahur ro dob lawi i méguléwe inok odoro roy adat ruwe fantag bé kékanduli ruwe. Non amuk mahur ro dob lawi i de étew békén Judio, énda géamung ro bé kandulie féndawét ro “Témara” non marok mémérésik dob adafay Tulusey de lawi i de étew békén Judio.

<sup>29</sup> Mélaw i méguléwe féndawét Pilato ménsut tidéw dob lawi ne mangéy dob berowe brab ménenginsa mano, “Ati funa kome témébo bé ni étew?”

<sup>30</sup> Séménumbul ro maro, “Amuk énda i rénigo no tete, énda uwité key de mangéy dob beeme.”

<sup>31</sup> Atin bang Pilatowe, “Uwit gom mangéy dob kagome kukuman, brab begom i kémukum de ké ati ménbéréhe dob kitab gome.”

Endob séménumbul i de Judio maro, “Endob dob kitab gome do Romano, énda i kuwagib gey kémukum méléhu bé ségétéwe étew.” <sup>32</sup> Ménrigoy ni inok métuman i kékérél Jesuse fantag bé kaane fégéléhu, sani dob kruse. Non i adat i de Romano, féléhué roy de étew dob de krus.

<sup>33</sup> Atin i Pilatowe ménahur dob lawi ne brab ténavagén i Jesuse, atin ménénginsa mano, “Aw Beem i datu i de Judio?”

<sup>34</sup> Séménumbul i Jesuse mano, “Aw kaam sa kéfegitung i nan loo ké énggelingoo mo tidew dob de ségiyo bénréh roy nan fantag bé Begéne?”

<sup>35</sup> Atin bang Pilatowe, “Békénu ségétew Judio! Endob do falan do dumo mo Judio brab de odoroy de fadi gom i ménuwite Beem dini. Ati tete rénigo mo?”

<sup>36</sup> Séménumbul i Jesuse mano, “I sakuf i féguléwo kuwe békén dob duniiae ni. Amuk duniiae niy sakuf i féguléwo kuwe, i de kuyug gu métah ro sétiboh inok énda gékéfooy de Judio Begén. I sakuf i kagéne féguléwon békén dini.”

<sup>37</sup> Mélaw i Pilatowe ménénginsa mano, “Amuk loo bé nan, aw ségétew go datu?”

Séménumbul i Jesuse mano, “Toow i kékérél me, Begén i datue. Atin i funa kuwe ménumph brab ménangéy dob duniiae ni inok félégésobut guy toowe. Atin i de étew modor bé toowe, fégélingoé ro Begén.”

<sup>38</sup> Atin bang Pilatowe, “Ati keeyén i toowe?”

Amun énggérého Pilatowey ni, ménut man ménangéy dob de Judio brab bénréhén mano, “Enda i gétiga ku sala i ni étew.” <sup>39</sup> Endob i adat gome, sénga kanduli gom féndawé ‘Témara,’ témangéy ségétew férisu, sani ati fémilié kome. Aw méuyot gom de ké tangéyé kuy ni étew datu gom do Judio?”

<sup>40</sup> Séménumbul ro mékes maro, “Békén Been i tangéyéne. Méuyot gey de ké tangéyé moy Barabase saén.” (I Barabase ni, beeney ségétewé ménakaw.)

## 19

<sup>1</sup> Tidew béno, i Pilatowe fénbadasén i Jesuse. <sup>2</sup> Atin i de sundalo méndot ro do suwaran kélég brab lénuku ro, atin fénayaf ro bé Jesuse. Tidew béno, fénkégal roy Jesuse furo kégal toow fo métah, maak datu. <sup>3</sup> Atin déniyangka ro maro, “Méraru damén i datu i de Judio.” Atin ténamfiling ro médoogule.

<sup>4</sup> Tidew béno, ménangéy man i Pilatowe dob de étew ménribuk brab bénréhén mano, “Uwité ku mangéy dob téngaanga kome inok fégétiga ku begom énda i salaén.”

<sup>5</sup> Atin ménut i Jesuse séménayaf do lénuku suwar brab kéménégal furo. Tidew béno, ménbéréh i Pilatowe mano, “Téngténg gom, ay niy étewe.”

<sup>6</sup> Amun énggitoy de odoroy de fadi brab de guwardiya, ménkes ro maro, “Féléhuén, kélébonén dob kruse!”

Tidew béno, ménbéréh i Pilatowe mano, “Uwit gom brab begom i kémelabo de. Endob i begéne, karangé ku énda i salaén.”

<sup>7</sup> Atin bang i de ménlimud, “Dob kitab geye fatut féléhuén non béréhé no Beene kun i Nga i Tuluse.”

<sup>8</sup> Amun énggelingoo Pilatowey de ni, ménuman i kégilak ne. <sup>9</sup> Mélaw méniséfule man mahur dob lawie brab fénénginsaa noy Jesuse mano, “Hon i tidewo muwe de?” Endob énda séménumbul i Jesuse. <sup>10</sup> Mélaw bang Pilatowe, “Sedek énda sémumbul go? Aw énda gétiga mo de ké wén i kuwagib gu témangéy Beem, loo so méméléhu Beem dob kruse?”

<sup>11</sup> Atin séménumbul i Jesuse mano, “Gagané mo rigonén i nan dob Begéne sabaf saén nirayay Tuluse beem kuwagib. Been i funa nuwe i étewe ménuwit Begén dini toow na fo dakél i sala ne.”

<sup>12</sup> Amun énggelingoo Pilatowey ni, ménuyot damén témangéy bé Jesuse. Endob ménékes i de Judio maro, “Amuk fétangéyém i nan étew, sébanil go wayo bé gérotore datu Sesar dob Roma. Non i ségétewé étew émbéréh been kun i datue, beeney sébanile bé Sesare.”

<sup>13</sup> Amun énggelingoo Pilatowey kékérén ruwe, fénsutén man i Jesuse. Tidéw béno, ménasar dob saray de kémukum dob gonone féndawét Gabata dob késébéréhe Hebreo (i atag ne i suduve batéw.) <sup>14</sup> Gédétén géutuh bé no térsang atin i gétunduge fuweh, kékanduli i de Judio féndawét “Témara”. Tidéw béno, ménbéréh i Pilatowe dob de Judio mano, “Ay ni datu gome.”

<sup>15</sup> Atin ménékes man i de étew maro, “Féléhuén, kélabonén dob kruse!”

Atin ménenginsa i Pilatowe mano, “Aw méuyot gom de ké kélaboné kuy datu gome dob kruse?”

Tidéw béno, séménumbul i de odoroy de fadi maro, “Enda i ségiyo datu gey saliyu bé Sesare dob Roma.”

<sup>16</sup> Tidéw béno, naté Pilatowe dob berowey Jesuse inok kélaboné ro dob kruse. Atin nangéy roy Jesuse.

### Kénlaboy Jesuse dob kruse

<sup>17</sup> Mélaw nuwit roy Jesuse mésut dob no ingéd brab ménangéy ro dob gonone féndawét Golgota dob gonone féndawét Golgota dob késébéréh i Hebreowe (i atag ne “gonoy kulobong uléwe”). Atin bé kékagéw ruwe fénduwal ro bé Jesusey krus ne. <sup>18</sup> Amun énggégumah ron diyo, i de sundalo, kénlabo roy Jesuse dob kruse. Atin kénlabo ro soy de ruwo gétew lagéy dob de krus. I ségetéwe de fingé dob kuwono Jesuse, brab i ségetéwe de fingé dob biwong Jesuse. Atin diyo i Jesuse ténunggul dob kérara ruwe. <sup>19</sup> Atin wén i sénulat Pilatowe, féndiyo ro dob krus Jesuse mano, “I Jesuse tidéw Nasaret, datu i de Judio.” <sup>20</sup> Médooy de Judio énggébasa bé no non i ni gonon kénlaboy Jesuse dob kruse énda méravyén dob Jerusalem. Atin sénulatén dob télwe timan késébéréh, Hebreo, Latin, brab Griego. <sup>21</sup> Endob i de odoroy de fadi i de Judio ménbéréh ro dob Pilatowe maro, “Kago sulatén de ‘Datu i de Judio’. Yamula sulatém loo bé ni, ‘I ni étew ménbéréh mano, Begén i datu i de Judio.’ ”

<sup>22</sup> Endob séménumbul i Pilatowe mano, “I sénulat guwe, énda fakayén fégalinén.”

<sup>23</sup> I de sundalo, amun énggilid ron kénlaboy Jesuse dob kruse, éndot roy de kégalén, sénbaad ro fot gétew. Atin éndot ro soy lambung ne. Atin non nawél énda i kumbanga no, <sup>24</sup> i de sundalo ménsebéréh ro maro, “Katom riyasén de. Yamula sékung-kungo tom, atin i tétabane gékaan.” Ménrigoy ni inok métuman i Ménslate Kékérén i Tuluse mano, “Sénbaad roy de kégal gu brab sénkung-kungo roy lambung guwe.” Atin been i nan i rénigoy de sundalo.

<sup>25</sup> Gédét dob krus Jesuse, diyo témenindég i idéng ne, brab tuwaréy idéng ne libun, brab bawag Kleopase féndawét Maria, brab ségetéwe so Maria tidéw Magdala. <sup>26</sup> Amun énggito Jesusey idéng ne brab ségetéwe na kuyugén toow fo kégédawa no, ménbéréh dob idéng ne mano, “Iday, béleewe ni beeney nga me.”

<sup>27</sup> Atin ménbéréh so dob kuyug ne mano, “Béleewe ni beeney idéng me.” Mélaw méntidéw bé no, i kuyug Jesuse ni nuwitén i idéng Jesuse mule brab fénbatien dob lawine.

### Ménléhu i Jesuse

<sup>28</sup> Tidéw béno, amun énggétiga Jesuse ménggilidén i kéluhanane, ménbéréh mano, “Téruménu,” inok métuman i Ménslate Kékérén i Tuluse fantag bé Jesuse.

<sup>29</sup> Wén i katiae diyo ménfeno bé mélémuwe arak. Mélaw nérém roy maake gafas atin ténunggul ro dob métahé kayéw brab féndiyo ro dob ba Jesuse. <sup>30</sup> Atin amun énggéséfo no, ménbéréh mano, “Enggilidén.” Tidéw béno, méntedungul atin ménléhuén.

<sup>31</sup> Tidéw béno, i de odoroy de Judio nongot ro dob Pilatowe ké fétéfoén i sékéy i de étew dob de krus inok magad méléhu. Non i de Judio méuyot ro ké mékédan i lowoh i de étew dob de krus bé no so gai, non bé gétunduge de térsang Sabado sani gaiwe témerén ro. Brab been i térsange bé kékanduli ruwe. Mélaw toow fo mékétéfu. <sup>32</sup> Mélaw i de sundalo ténefo roy sékéy i de ruwo gétew lagéy dumo Jesuse énggésérégan kénlabo dob de krus. <sup>33</sup> Endob amun ménfégédét ro dob Jesuse, énggito ro ménléhuén. Mélaw éndaén ténefo roy de sékéyén. <sup>34</sup> Endob i ségetéwe bé de sundalo dénilékén i tébing Jesuse atin

rémenanas i darae brab wayég. <sup>35</sup> Begéney étewe énggégito bé ni ménrigo. Gétiga ku toow, brab ureté ku toow fo toow inok munur gom de. <sup>36</sup> Ménrigoy de ni inok métuman i Ménsulate Kébérélh i Tuluse mano, “Fiyon sébaan bé de bukalén, énda i météfo de.” <sup>37</sup> Brab wén soy Ménsulate Kébérélh i Tuluse mano, “Téngténgéy de étew i dénilék ruwe.”

### *I kélébénge bé Jesuse*

<sup>38</sup> Tidéw béno, wén i ségétéwe lagéy féndawét Jose tidéw Arimatea, ménangéy dob Pilatowe brab nongotén i bangkay Jesuse. I Josehe ni ségétew so kuyug Jesuse éndob énda ménfayagén non mégilak bé de odoroy de Judio. Tidéw béno, ténungkas Pilatowey bangkay Jesuse, mélaw nangéy Josehe. <sup>39</sup> Atin i Nikodemowe sani lagéye téménukaw bé Jesuse bé kélungonone, ménodor bé Josehe brab ménuit fot folo gékilo fégféamut. (I ni fégféamut mira ménsélawék bé aloewe.) <sup>40</sup> Atin i de ni lagéy bénauz roy bangkay Jesuse bé futee safut atin sénlawék roy fégféamute ni. Non been i niy adat i de Judio kélémbéng ro.

<sup>41</sup> Gédét dob gono Jesuse ménléhu, wén i do nohok kayéw diyo. Atin dob ni gonon wén i mantuwe rénigo lóbéng takub énda séna ménlébénego no. <sup>42</sup> Non bé gétunduge de térsang Sabado sani gaiwe témérén ro, fénagayas ro lénébénge i Jesuse dob lóbéngé ni, non gédét.

## 20

### *Méntébule i Jesuse*

<sup>1</sup> Amun toow fo géfuwén bé Duminggue de, kémélungon séna, ménagéw i libune féndawét Maria Magdalena mangéy dob lóbéngé. Atin énggito no ménkédan i batéwe dob béngaway lóbéngé. <sup>2</sup> Mélaw léménéntu mangéy dob Pedrowe brab ségétéwe ni bé de kuyug Jesus toow fo kégédawa no. Brab bénréhén mano, “Kénda roy bangkay i Kadname dob lóbéngé brab énda gétiga key i fénggono ruwe de.”

<sup>3</sup> Tidéw béno, i Pedrowe beroy ségétéwe ni kuyug Jesuse, ménagéw ro mangéy dob lóbéngé. <sup>4</sup> Léménéntu ro atin énggétah énggumah dob lóbéngé dumo Pedrowe kuyugén non toow na fo méraan. <sup>5</sup> Atin ménkudung-kudung sémarir, éndob énda ménahurén. Enggito no saén i de safut. <sup>6</sup> Tidéw béno, énggumah i Pedrowe, atin ménahur i beene dob lóbéngé brab énggito noy de safut ménumbuk. <sup>7</sup> Enggito no soy safute fénggébaus bé uléw Jesuse. Enda ménlawékén dob de dumo safut, éndob méndilin dob ségiyowe gonon. <sup>8</sup> Tidéw béno, ménahur soy ségétéwe ni kuyug dumo Pedrowe, sani énggétahe énggumah dob lóbéngé. Atin amun énggito no, ménunur. <sup>9</sup> Bé ni gai énda séna gésobuto roy Ménsulate Kébérélh i Tuluse fantag bé Jesuse tébule. <sup>10</sup> Tidéw béno, ménule i de ruwo ni gétew kuyug.

<sup>11</sup> Endob i Mariahe kémérew dob liyuy lóbéngé. Bé lala ne kémérew, ménkudung-kudung sémarir dob bukag i lóbéngé. <sup>12</sup> Atin énggito noy ruwowe gétew télaki kéménégal fute, ménas ro dob féniroone bé bangkay Jesuse. I ségétéwe de ménas fingé dob uléw ne atin i ségétéwe de fingé dob sékéy ne. <sup>13</sup> Atin ménbérélh ro maro, “Di, ati funa muwe kémérew?”

Atin séménumbul mano, “Nuwit roy Kadna kuwe atin énda gétiga kuy fénggono ruwe de.”

<sup>14</sup> Tidéw béno, séménling brab énggito noy Jesuse téménindég diyo, éndob énda énggélolo no de ké Beeney Jesuse. <sup>15</sup> Atin bang Jesuse, “Di, ati funa muwe kémérew? Ati sélédé muwe?”

Dob fédew Mariahe manok beeney magifate bé de nohok diyo. Mélaw ménbérélh mano, “Amuk Beemey ménwite bé bangkay i Kadna kuwe, bérélém begén i fénggono muwe de inok angéyé ku.”

<sup>16</sup> Tidéw béno, bang Jesuse, “Maria.”

Atin méntékélid ténegténgén i Jesuse brab ménbérélh dob késbérélh i de Judio mano, “Raboni!” (I atag ne Maistéro.)

<sup>17</sup> Amun énggélolo Mariahe Beeney Jesuse, ménbérél i Jesuse mano, “Kago gamakén Begén, non énda séna énggéuleu mangéy dob Abay guwe Tulus. Endob ay go dob de tuwaréy gu brab béréhém bero, mangéyu dob Abay guwe sani Tulus guwe. Been soy Abay gome brab Tulus gom.”

<sup>18</sup> Mélaw ménagéw i Maria Magdalenahe nangéyén bénréh dob de kuyug bé énggitoy Kadnane brab ati de bénréhén de.

<sup>19</sup> Amun kélungononén bé no Duminggu, i de kuyug Jesus ménsélimud ro dob lawie atin kénandado roy de fintu non mégilak ro bé odoroy de Judio. Atin tékow énggitoy Jesuse téménindég dob kérara ruwe. Atin ménbérél mano, “Fiyoy de fédew gom damén.” <sup>20</sup> Tidéw bénou, fénténgténgén beroy de fali dob de kémérén brab tébing ne. Atin i de kuyugén toow ro fo ménoror non énggitoy. <sup>21</sup> Tidéw bénou, ménbérél man i Jesuse mano, “Fiyoy de fédew gom damén. Sugué ku begom loo bé késugu i Abay guwe Begén.” <sup>22</sup> Tidéw bénou, niyufén bero brab ménbérél mano, “Tanggaf gom i Rémogor i Tuluse. <sup>23</sup> Amuk fésagada kom i ségétewe bé de salaén, émfésagadan. Buluk énda fésagada kom de, énda émfésagadan no.”

### Enggito Tomase

<sup>24</sup> I ségétewe bé de folo bra ruwo kuyug Jesuse féndawét Tomas (féndawét so “Séfing”) énda diyoén bé no gai méntéfégíttoy Jesuse. <sup>25</sup> Mélaw i de dumo no kuyug nuret ro dob beene maro, “Enggito gey i Kadnane”.

Endob ménbérél i Tomase mano, “Enda fo munuru de taman énda gito guy fali i de kélabo dob de kémérén brab taman énda géahuro kuy de dau kémér gu dob de fali dob de kémérén brab dob tébing ne.”

<sup>26</sup> Ménifus i ségéfadiyane tidéw bénou, ménsélimud man i de kuyug Jesus brab diyo soy Tomase. Fyon fo ké i de fintu ménkandado, tékow méntéfégíttoy Jesuse téménindég dob kérara ruwe. Atin i Jesuse ménbérél mano, “Fiyoy de fédew gom damén.” <sup>27</sup> Tidéw bénou, ménbérél i Jesuse dob Tomase mano, “Téngténgém i de ni. Fédiyoém i de dau kémérém dob de kémér gu, brab féahurém i kémér me dob tébing guwe ni. Kagonén magalang-galang. Unur go Begén.”

<sup>28</sup> Tidéw bénou, ménbérél i Tomase mano, “Beemey Kadna kuwe brab Tulus gu.”

<sup>29</sup> Atin bang Jesuse, “Aw munur go Begén non énggitoy mo Begén? Toow fo méror i de munur Begén fiyon fo ké énda séna énggitoy ro Begén.”

<sup>30</sup> Médoo na do mékégaif rénigo Jesuse énggitoy de kuyugén éndob énda ménsulatén dob ni libro. <sup>31</sup> Ménsulat i de ni inok munur gom bé Jesusey Kristowe, sani Nga i Tuluse. Atin sabaf bé kéunur gome bé Jesuse gédoté kom i umule magufusa.

## 21

<sup>1</sup> Tidéw bénou, méntéfégíttoy man i Jesuse dob de kuyugén dob dogote féndawét Tiberias. Loo bé niy énggéagéwo nuwe. <sup>2</sup> Diyo i Simon Pedrowe bero ro Tomas (féndawét so Séfing) brab Natanael tidéw Kana dob sakuf i Galileawe, brab ruwowe gétew nga Sebedeo féndawét Juan brab Santiago, brab ruwowe gétew kuyug Jesuse dumo ro. <sup>3</sup> Atin i Pedrowe ménbérél dob berowe mano, “Mangéyu tugés.”

Atin séménumbul ro maro, “Modor gey beem.” Mélaw ménagéw ro ménangéy ro méda dob awange. Endob énda i sébaan énggédot ro sédo bé no ménségékélungonon.

<sup>4</sup> Amun sémbang i térsange, diyo i Jesuse téménindég dob dénsaane. Endob i de kuyugén énda gétiga ro de ké Beeney Jesuse. <sup>5</sup> Tidéw bénou, ménbérél i Jesuse mano, “Do adih, wén i énggédot gom sédo loo ké énda?”

Séménumbul ro maro, “Enda.”

<sup>6</sup> Atin ménbérél man i Jesuse mano, “Lawu gom i fukét gome fingé dob kuwonoy awange atin gégédot gom de sédo.” Mélaw lénawu roy fukét ruwe loo bé kékérél Jesuse

de. Tidéw béno, énggégédot ro toow fo médoos sédo. Atin énda génaga roy mégénge bé fukéte dob awange non toow fo émbégat i de médoos sédo.

<sup>7</sup> Atin i ségétewé ni bé de kuyug toow fo ménggédaw i Jesuse de, ménbéréh dob Pedrowe mano, “Beeney Kadnane!” Amun énggelingoo Pedrowe, “Beeney Kadnane”, kéménégal (non kénda noy kégal ne) brab ménagayas ménantéfor dob wayége atin léménangoy mangéy dob dénsaane. <sup>8</sup> I de dumo do kuyugén ménfuray ro dob dénsaane ménda awang, génuyud roy fukéte ménféno sédo. Enda mérayuén tidéw dob dénsaane, wén keey i siyow folo gémitroy kérayu ne. <sup>9</sup> Amun déménunggu ron, énggito roy mégébarawe aféy wén i féntanang de sédo. Wén soy fan de. <sup>10</sup> Atin bang Jesuse, “Uwit gom diniy dumoy de sédo énggédot gom.”

<sup>11</sup> Mélaw i Pedrowe ménénik dob awange inok gédoté noy fukéte. Tidéw béno, génuyudén mangéy dob dénsaaney fukéte ménféno do dakél sédo. Fiyon fo ké ménféno bé dakéle sédo, mératuh bra limo folo bra télew, énda ménkusi i fukét ruwe. <sup>12</sup> Atin bang Jesuse bero, “Enggomén, mama tom.” Enda i ségétew bé de kuyugén émbaraw ménénginsa ké ati Beene ni, non énggétiga ron Beeney Jesuse Kadnan. <sup>13</sup> Mélaw i Jesuse ménfégédét dob fane brab méndot de brab béraadén dob berowe, loo soy de sédo.

<sup>14</sup> Been i niy gétéléwe gule méntéfíttoy Jesuse dob de kuyugén tidéw bé kétébule ne.

#### *I Jesuse brab Pedrowe*

<sup>15</sup> Amun énggilid ron mama, ménénginsa i Jesuse dob Simon Pedrowe mano, “Simon, nga Jonas, aw toow na fo méimu go Begén bé kéimu i kéluhanay de ni Begén?”

Séménumbul i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” <sup>16</sup> Tidéw béno, ménénginsa man i Jesuse mano, “Simon, nga Jonas, aw toow fo méi mu go Begén?”

Séménumbul man i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” <sup>17</sup> Atin ménénginsa i Jesuse bé gétéléw ne gule mano, “Simon, nga Jonas, aw méimu go Begén?” Mémente i fédéw Pedrowe non fénénginsaa Jesuse gétéléw gule mano, “Aw méimu go Begén?”

Mélaw séménumbul i Pedrowe mano, “Kadnan, gétiga moy kéluhanane, gétiga moy kéimu guwe Beem.”

Atin bang Jesuse, “Fagifatém i de bili-bili gu. <sup>18</sup> Béréhé ku beem i toowe, amun ménguwéd go séna, géikéto moy sintoro muwe, atin mangéy go dob kétaya muwe ayo mo. Endob buluk lukés gon, ségerun go kémawa, atin ségiyyoy marake beem atin uwité no beem mangéy dob kéikaa muwe ayo mo.” <sup>19</sup> (Bénréh Jesusey ni dob Pedrowe nureténi atiy fégéléhu ne funay Tuluse émbantug.) Tidéw béno, bang Jesuse bé Pedrowe, “Furay go Begén.”

<sup>20</sup> Atin séménling i Pedrowe, atin énggito noy toowe ni fo kégédawa Jesuse kuyugén, sani kuyuge ménfégédét dob Jesuse bé kéama ruwe dob kékandulie brab ménénginsa mano, “Kadnan, ati émfékéfoe Beem?” <sup>21</sup> I Pedrowe, amun énggito noy ni ségétew kuyug, ménénginsa dob Jesuse mano, “Ati mosoy géagéwoy ni étew?”

<sup>22</sup> Séménumbul i Jesuse mano, “Amuk méuyotu de ké méuyag taman bé késéfule guwe dob duniyae ni, ati mélaw i kaame de? Furay go Begén.”

<sup>23</sup> Sabaf mélaw bé ni, ménlégéb dob de kuyug Jesuse i urete bé i ni kuyug énda kun méléhuén. Endob békén bénréh Jesuse ké énda méléhuén. I bénréh Jesuse saén mano, “Amuk méuyotu de ké méuyag taman bé késéfule guwe, ati mélaw i kaame de?”

<sup>24</sup> Begénéy nan kuyug Jesuse bénrého no! Enggito guy kéluhanay de ni ménrigo brab sénusat gu dob ni. Atin gétiga key i kéluhanay de ni ménusat toow fo toow.

<sup>25</sup> Médoos nay de éntingayén rénigo Jesuse tidéw bé de ni. Endob amuk sulatén kéluhanan, kloh sa keeyén i duniyae fégonon bé kéluhanay librowe ménusat.

## I de Rénigoy de Apostol

I ni sulat, been i niy fétalousoy Fiyowe Uret sénulat Lukase. I Lukase, been i ségétéwe doktor. Atin sénulatén i ni dob ségétéwe gérotor étew féndawét Teofilo.

Been i niy sulate fantag bé de rénigoy de kuyug Jesus amun déméniatén i Jesuse. Féndawét Jesuse bero “do apostol” non sénuguén bero inok muret ro. (I atag i “apostole” sénugu.) Sénulat Lukasey fantage bé de rénigoy de apostol brab de kékérén ro. I galbék i de apostol, been i kéurete bé Fiyowe Uret fantag bé Jesuse inok géunur i de étew dob Beene.

I Rémodor i Tuluse, Been i téménabangane bé de apostol inok gérigono roy de mékégaif brab inok émbaraw ro muret fantag bé Jesuse.

<sup>1</sup> Teofilo,

Dob sunguwe libro gu, sénulat gu dob beemey fantage bé kéluhanay de rénigo Jesus brab de téneroén tidew dob gaiwe féngganayén i kégalbék ne, <sup>2</sup> taman dob gaiwe féndiyat i Tulusey Jesuse mangéy dob lawayo. Amun énda séna déméniatén de, fénémanduo no bé barakat i Rémodor i Tulusey de fénémilién do kuyugén féndawét do Apostol (i atag i ni do sénugu). <sup>3</sup> Méntefégitoy Jesuse dob berowe médoogule tidew bé kéléhu ne taman fot folo gétérésangan inok toow fo gétiga ro méntébule. Dob de ni do gai méntefégitoy dob berowe, téneroén i fantage bé kéguléw i Tuluse. <sup>4</sup> Atin amun ménsélimud i Jesuse beroy de kuyugén bénréhén bero mano, “Kagom séna tékédan dob Jerusalem. Endob ongot-ongot gom i fénasad i Abay guwe begom, sani bénréh guwe nén begom. <sup>5</sup> I Juane ménautis bé wayége éndob éndaén mérugayén bautison gom bé Rémodor i Tuluse.”

<sup>6</sup> Wén i no ségiyo gai ménsélimud i Jesuse beroy de apostol. Atin fénénginsaa ro maro, “Kadnan, aw béléewe ni bay gaiwe féséfuleé moy kuwagibe émfétindég bé ingéd tome Israel?”

<sup>7</sup> Séménumbul i Jesuse mano, “Békénén fatut gétiga kom i de gai non i Abay guwe saén i wéne aturano bé de gai. <sup>8</sup> Endob amuk gégumah i Rémodor i Tuluse dob begome, waléy gom barakatan. Atin mélaw begomey murete fantag bé Begéne dob de étew dob Jerusalem, brab dob kéluhanay de ingéd dob Judea brab Samaria, brab dob kéluhanay de ingéd dob duniyae ni.”

### *I kédiyat Jesuse*

<sup>9</sup> Amun énggilid Jesuse bénréh i ni, féndiyat i Tulusey Jesuse mangéy dob lawayo atin ténéngténg ro taman méntéléb bé de rawén. <sup>10</sup> Amun déméniatén i Jesuse, i lala ruwe séna lémgag dob lawayo, tékow méntefégitoy ruwowe gétew lagéy kéménégal ro fute téménindég diyo dob sékulo ruwe. <sup>11</sup> Brab ménbérén ro maro, “Do étew tidew Galilea, sedek lémgag gom saréw dob lawayo? I Tuluse féndiyatén i Jesuse mangéy dob lawayo, atin séfule so moso loo bé kégito gome de déméniat.”

<sup>12</sup> Tidew bénou, i de apostol ménséfule ro mangéy Jerusalem tidew dob tuduke féndawét Olibo, ségékilometroy kéranyu ne. <sup>13</sup> Amun énggégumah ron dob ayo ruwe ni ingéd, méntaus ro dob sibéye dob rotor i lawie gono ro bati. I de ni ro Pedro, Juan, Santiago, Andres, Filipi, Tomas, Bartolome, Mateo, Santiago nga Alfeo, Simon sani ségétéwe toow fo gulaané noy ingéd ne, brab Judas nga Santiago. <sup>14</sup> Sénga tékélid sélimud ro inok démasal ro beroy de libun brab Mariahe idéng Jesuse, loo soy de tuwaréy Jesus do lagéy.

<sup>15</sup> Amun ménifus i firoye gétérésangan, ménsélimud i de munur bé Jesuse, wén i mératuh bra ruwo folo gétew. Atin téménindég dob téngaanga ruvey Pedrowe brab ménbérén mano, <sup>16</sup> “Do dumo gu, énda fakayén ké énda métuman i Ménslate Kékérén i Tuluse, fénbérén i Rémodor i Tuluse bé Datu Dabidey fantage bé Judase, sani ménwuite bé de kéménéfo bé Jesuse. <sup>17</sup> I Judase, ségétew betom, brab fénémili ménamung bé galbék tome.” Been i bénréh Pedrowe.

<sup>18</sup> Atin i kurtae énggédotén bé ni tete rénigo no bé Jesuse fénggébélényen fantad, atin diyo ménlawu brab ménléhu non ménbétus i sur ne atin méntandég i de téneekén. <sup>19</sup> Atin énggélingoo kéluhanay de étew dob Jerusalem i ni ménrigo, mélaw féndawét roy ni fantad “Akeldama”, dob karowe késébéréh. (I atag ne “Démara fantad”.)

<sup>20</sup> Féntaus Pedrowey kébéréh ne mano, “Sénulat dob de Kanta tidew dob Ménsulate Kébéréh i Tuluse mano, ‘I lawi ne taus i kétagake de damén atin énda i bati diyo fiyon ségétéw.’ Brab ménusat so mano, ‘Wén damén i émfétaus bé galbék ne.’

<sup>21-22</sup> “Mélaw,” bang Pedrowe, “fatut mémili tom ségétew mantu dumo tom muret fantag bé kétóbule Jesuse. Fatut beeney étewe dumo tom ménséodor-odor bé kédiniy Kadna tome séna, tidew bé kéuret Juane bé kébautis ne taman bé kédiyat Jesuse mangéy dob lawayo.”

<sup>23</sup> Mélaw ménémili ro ruwo gétew lagéy, ro Matias bero Jose Barsabas (féndawét so Justo). <sup>24</sup> Tidew béno déménasal ro maro, “Kadnan, gétiga moy fédew i kéluhanay étewe. Mélaw fefégétiga mo begey ké ati isuwe fénémiliém bé de ruwo ni gétew, <sup>25</sup> inok waléy apostol brab mamung émfétaus bé galbéké téragak Judase amun ménuleén mangéy dob gonone fatut ayono.” <sup>26</sup> Tidew béno, sénbunuto ro atin ménfémili i Matiase. Mélaw i Matiase ménwaléy apostol beroy de folo bra sébaan, brab ménamung bero.

## 2

### *I kégumah i Rémogor i Tuluse*

<sup>1</sup> Amun énggumahén i gayi kékanduli ruwe féndawét Pentekostes, i kéluhanay de méninugut bé Jesuse, ménslimud ro dob sébaane gonon. <sup>2</sup> Atin tékow wén i énggélingoo ro tidew dob lawayo toow fo métanug maak émbagér réfuruh. Atin ménlégéb dob lawie gono ro ménvars. <sup>3</sup> Tidew béno, énggito roy de maak dila rino aféy ménlégéb brab méntétagatag dob bumbunay séngae ségétew bero. <sup>4</sup> Atin fénémanduoy Rémogor i Tuluse bero. Atin ménsebéréh-béréh ro do séségiyo-giyo do késébéréh non fénbéréh i Rémogor i Tuluse bero.

<sup>5</sup> Dob Jerusalem, wén i do Judio do ménintulus ménbati diyo. Tidew ro dob de séségiyo-giyo ingéd dob duniya. <sup>6</sup> Amun énggélingoo roy ni démégüs, médooy de étew ménangéy diyo brab ménslimud ro. Brab ménkéségiyonan ro non amun ménsebéréh i de étew méninugut bé Jesuse, i séngae étew énggélingoo noy kaane késébéréh. <sup>7</sup> Non toow fo ménkéségiyonan ro, ménsefenginsa ro maro, “Aw ati ni? Aw békén ba kéluhanay de ni do étew tidew ro Galilea? <sup>8</sup> Sedek gélingoo tom bero sébéréh bé kéluhanay de késébéréh dob de ingéd ténidéwo tom? <sup>9</sup> Tidew tom dob Partia, dob Media, dob Elam, dob Mesopotamia, dob Judea, dob Kapadosia, dob Ponto, dob Asia. <sup>10</sup> Dob Frigia, dob Pamilia, dob Egipto, dob de ingéd sakuf i ingéde Libia gédét dob Siren, brab dob Roma, <sup>11</sup> do Judio brab do békén do Judio éndob ménwaléy do munur bé kétoro i de Judio. Tidew tom dob Kreta, brab dob Arabia. Atin i séngae ségétew betom énggélingoo no bero sébéréh-béréh dob kaane késébéréh fantag bé toowe fo ménkaif rénigoy Tuluse.” <sup>12</sup> Atin toow fo ménkaif ro brab énda énggésobuto roy ni ménrigo. Mélaw ménsefenginsa ro maro, “Ati atag i ni ménrigo?”

<sup>13</sup> Endob i de dumo do étew déniyangka roy de kuyug Jesus brab ménbéréh ro maro, “Molon i de ni do étew.”

### *I kéuret Pedrowe*

<sup>14</sup> Tidew béno, téménindég i Pedrowe beroy de folo bra sébaan do dumo no apostol brab ménbéréh métanug dob de ménslimud étew mano, “Do dumo gu do Judio brab kéluhanay de étew bati dob Jerusalem, toow gom fégélingo i béréhé kuwe ni inok gésobuto kom. <sup>15</sup> I de ni do étew énda molon ro loo bé kégéitung gome de, non géraraan lémowot sénay térsange ni. <sup>16</sup> Endob ménuman béléewe niy bénréh i méntélatae sénarigoy Tuluse muret bé kébéréh ne féndawét Joel mano, <sup>17</sup> ‘Ay niy rigoné kuwe dob de tamfaday de gai, bang i Tuluse. Iray gu témantuy Rémogor guwe dob kéluhanay étewe. Brab i de nga gom do lagéy brab libun, béréhé roy de kébéréh gu. Atin i de kénogo lagéy

gom gito roy toowe tidéw dob Tuluse, brab i de lukés gom so gito roy toowe tidéw dob Tuluse amuk téméginéf ro. <sup>18</sup> Atin fiyon foy de sugu-sugué ku, do lagéy brab do libun, ureté roy kékérén guwe non tantuno ku bero irayan bé Rémogor guwe. <sup>19</sup> Atin rémigowu do mékégaif dob lawayo brab dob fantade. Giton i darae, aféye, brab mégéfole bél. <sup>20</sup> Atin i téresange waléy délémon, brab i téresang kélungonone waléy furo maak dara. Been i niy mérigowe ké énda séna gégumah i émbantuge gaiy Kadnane kémukum. <sup>21</sup> Atin i kéluhanay mongote tabang dob Kadnane, méfukas ro dob de sala ro.” ”

<sup>22</sup> Atin féntaus Pedrowey kékérén ne mano, “Do dumo gu do Judio, fégélingo gom i ni! I Jesuse tidéw Nasaret, Beeney fénuit i Tuluse. Atin i de mékégaif do galbék fénrigoy Tuluse de, been i fégétuwana kome bé i Jesuse, Beeney tidéwe dob Tuluse. Atin énggétuwa komén i ni non i kéluhanay de ni, ménrigo dob kérara gome. <sup>23</sup> Enggétigay Tulusey ati mérigowe non bénantak i Tuluse fékéfoén i Jesuse brab nirayén begom atin fénléhu gom fénkélabo bé de tete étew dob kruse. <sup>24</sup> Endob i Tuluse ténébuleén i Jesuse brab ténungkasén tidéw dob kédawét i kéléhue non énda fo fakayén gétaus méléhu i Jesuse.

<sup>25</sup> “Loo bé bénréh Dabide bé do gétah fantag bé Jesuse mano, ‘Démoyun gito guy Kadnane dob sékuwo kuwe, Beeney dumo guwe dob kuwono kuwe, mélaw énda mélilaku. <sup>26</sup> Sabaf bé ni, toow fo fiyoy fédéw guwe brab béréhé kuy kérora guwe. Enda émbukuu bé lowoh guwe non wén i inam gu. <sup>27</sup> Non énda tagaké mo Begén dob gonoy de ménléhu. Brab énda fédayaé moy lowoh i fiyowe sugu-sugué mo ké mérénah. <sup>28</sup> Ténoroém begén i agéwone dob kékuyage. Atin sabaf bé Beem i dumo guwe, féororénu.’ ”

<sup>29</sup> Féntaus Pedrowey kékérén ne mano, “Do dumo gu, toow fo béréhé ku begom i fantage bé katufua tome Dabid. I beene ménléhu brab lénébeng, atin taman béléewe ni ay ni soy lébeng ne. <sup>30</sup> Beeney ségétewé sénarigoy Tuluse muret bé kékérén ne. Atin énggétiga noy fénasad i Tuluse dob beene bé i ségétewé bé de séfuén waléy datu loo bé beene. <sup>31</sup> Enggétiga Dabide ké ati rigonéy Tuluse, komon énggérého noy fantage bé kétébule Kristowe mano, ‘Enda méntagakén dob gonoy de ménléhu brab énda mérénah i lowoh ne.’ <sup>32</sup> I Jesuse ni féntébule i Tuluse, brab kéluhana key énggítio bé ni. <sup>33</sup> Atin i Abay ne Tulus, féndiyatén i Jesuse mangéy dob kuwono nuwe, sani toowe fo basanan gonon. Atin i Jesuse, éndotén dob Beeney Rémogor i Tuluse loo bé fénasad ne. Mélaw i gito gome brab gélengoo kome bé béniy barakat i Rémogor i Tuluse nirayén begey. <sup>34</sup> I bénréh Dabide, békén fantag bé lowoh ne non énda déméniyat i Dabide mangéy dob lawayo, éndob been i ménbérén mano, ‘Bénréh i Kadnane dob Kadna kuwe mano, sar go fingé dob kuwono kuwe, <sup>35</sup> taman tabana kuy de sébanil Beem.’ <sup>36</sup> Mélaw, i de kéluhana tom do Judio, fatut gétuwa tom i Jesuse ni, sani kénlabo gome dob kruse, féndawét i Tulusey Kristowe Kadnan.” Been i niy bénréh Pedrowe.

<sup>37</sup> I de étew, amun énggélengoo roy ni, ménbuku i de fédéw ro. Atin ménénginsa ro dob Pedrowe brab dob de dumo no apostol maro, “Do dumo gey, ati fatute rigoné key?”

<sup>38</sup> Atin séménumbul i Pedrowe mano, “I séngae ségétew begom fatut gésénule bé de salaén brab fébautis inok fégito noy kékunur ne bé Jesu Kristowe, inok i de salaén émfésagadan. Tidéw bénio, i Tuluse irayén i Rémogor ne dob begome. <sup>39</sup> Non i ni fasad i Tuluse, katom brab kay de nga tom, brab kay kéluhanay de étew dob de mérayu, non kay kéluhanay fénémili i Kadna tome Tulus munur dob Beene.”

<sup>40</sup> Atin médooy nay bénréh Pedrowe bero fantag bé toowe brab fénfagayu no bero mano, “Sésuway gom bé de tete étew inok énda mélukum gom so.” <sup>41</sup> Atin médooy étewé ménunur bé kékérén Pedrowe brab ménfébautis ro, brab labi ro télew ngibu ménuman dob de kuyug Jesus bé bénio. <sup>42</sup> Atin sénga tékélid fégélingoé roy kétoro i de apostol, atin ménseodor-odor ro maak do sétuwaréy ro. Brab séréngan ro mama brab démasal.

<sup>43</sup> Atin i de apostol, fénrigoy Tuluse bero do médooy mékégaif galbék, mélaw toow fo ménngaii i kéluhanay de étew. <sup>44</sup> Atin i kéluhanay de munur bé Jesuse, démoyun ro sélimud atin i kéluhanay de languntama ro séntukid-tukid ro. <sup>45</sup> Atin fénbélénroy de

fantad ro brab de tamuk ro inok sétukid-tukidé ro loo bé atiy de kailanga ro. <sup>46</sup> Sénga fuweh sélimud ro dob lawi i Tuluse, brab séréngan ro mama dob de lawi ro. Brab lala ruwe mama, toow ro fo moror brab térifantad. <sup>47</sup> Sénga tékélid dayewé roy Tuluse brab mégédaw i de étew bero. Atin sénga fuweh umanay Kadnane bero bé de mantu ménfukas étew.

## 3

*I kéuwaé bé fikate*

<sup>1</sup> Wén i no sébaan fuweh, géraraan lémuug i térésange de, sani uras i kédasal i de Judio, i ro Pedrowe brab Juane ménangéy ro dob lawi i Tuluse. <sup>2</sup> Dob bengaway lawi i Tuluse féndawé “Fiyo Fintu”, wén i ségétéwe lagéy fikat tidéw fanay kéumahén. Sénga fuweh uwitéy de dumo no mangéy dob ni bengawan inok mongot limus dob de étew mahur diyo. <sup>3</sup> Amun énggito noy ro Pedrowe brab Juane mahur, ménongot limus dob berowe. <sup>4</sup> Tidéw bénou, ténéngténg ro Pedrowe brab Juaney ni lagéy fikat brab ménbéréh i Pedrowe mano, “Enténgén gey.” <sup>5</sup> Mélaw ténéngténgén bero, manok iraya ro kurta. <sup>6</sup> Endob i Pedrowe ni ménbéréh mano, “Enda i kurta gu taloo no bélowan, éndob iray gu beem i wéne dob begéne. Sabaf bé barakat i dawé Jesu Kristowe tidéw Nasaret, béréhé ku beem, agéw go!” <sup>7</sup> Atin génamak Pedrowey kuwonone kémérén brab féntindégén. Sonom bénou, tékow ménbagér i de sékéyén. <sup>8</sup> Atin méntésongkow témidébrab méngeagéw. Atin ménahur dob lawi i Tuluse bero ro Pedrowe brab Juane, magéw brab sayaw-sayaw brab dayewé noy Tuluse. <sup>9</sup> Atin énggitoy kéluhanay de étew i ni lagéy magéw brab dayewé noy Tuluse. <sup>10</sup> Atin amun énggélolo ron beeney fikate démoyun mésar mongot limus dob “Fiyowe Fintu”, toow ro fo méngeaif bé ni ménrigo dob beene.

<sup>11</sup> Atin i lala ne géménamak dob ro Pedrowe brab dob Juane dob kuridore féndawé “Kuridor Solomone” ménfégédét léméntu mangéy dob berowey kéluhanay de étew non méngeaif ro bé ni ménrigo. <sup>12</sup> Amun énggito Pedrowey de étew ni, ménbéréh dob berowe mano, “Do dumo gu do Judio, sedek méngeaif gom bé ni? Sedek téngténgé kom begey loo bé nan? Aw makom ké méngeagéw i ni lagéy sabaf bé barakat geye taloo no sabaf bé fiyowe kíféngintulus gey?” <sup>13</sup> Endob Been i Tuluse fengadafé Abrahame, Isak, brab Jakob, brab de katufua tom, i ménirayane toow fo gérotor barakat dob Jesuse, sénuguén. Endob niray gom dob de gémamak kukuman, brab ménika gom de dob adafa Pilatowe inok kukumé no, fiyon fo ké ménuyot de témanéy. <sup>14</sup> I Jesuse ni métintu brab énda i salaén, éndob ménika gom de brab énda fentangéy gom de. Yamula fentangéy gom uman i ségétéwe étew ménméléhu. <sup>15</sup> Atin fénléhu gom i Jesuse sami miraye bé umule magufusa. Endob ténébule i Tuluse brab énggito gey i ni. <sup>16</sup> Barakat i dawé Jesusey énggféadi-adiwe bé ni lagéy fikat gélolo gom. Ménrigoy ni sabaf bé kénur geye bé Jesuse. Been i funa nuwe énggéagéw dob téngaanga kome.

<sup>17</sup> “Atin béléewe do dumo gu, gétiga ku énda énggétiga kom i rénigo gome brab de odoro tom bé kíféhéhu gome bé Jesuse. <sup>18</sup> Endob bé ni rénigo gom, ténumay Tulusey bénréh i de sénarigo no muret bé kóbéréh ne bé gétaho, bé i Kristowe fatut ferasayén. <sup>19</sup> Mélaw tagak gom i de tete adat gom brab unur gom bé Tuluse inok fésagada no begom bé de sala gom. <sup>20</sup> Atin mélaw wén i do gai féfiyonéy Tulusey de fédéw gom. Atin féuwtén i Jesuse mangéy dob begome. Been i Kristowe, sani fénemili ne máguléw begom. <sup>21</sup> Atin béléewe, i Jesuse bati séna dob lawayo taman bé kégumah i gaiwe féantunéy Tulusey kéluhanane. Been i niy bénréh i de sénarigoy Tuluse muret bé kóbéréh ne bé gétaho. <sup>22</sup> Non i Moisese ménbéréh bé gétaho dob de Judio mano, ‘I Tuluse sémugu moso ségétew sarigo no loo bé begéne. Been i ségétéwe bé de séfu tom. Unuro kom i kéluhanay béréhé nuwe begom.’ <sup>23</sup> Atin i kéluhanay étewé énda munur ro de, fégananéy Tuluse bero tidéw dob de étewén, brab binasané no bero.’ Been i niy kóbéréh Moisese. <sup>24</sup> Bénréh i de dumo so sénarigoy Tulusey fantage bé de mérigo bé de ni do gai, tidéw dob Samuele brab dob kéluhanay de énggétundug dob beene. <sup>25</sup> Atin i de fasad i Tuluse bénréh i de sénarigo

no bé do gétah, kagom so. Atin kagom soy fasad i Tuluse dob de katufua kom. Non bénréhén dob Abraham mano, ‘Féfiyoné kuy kéluhanay étewe dob duniyae fénagéw dob de séfuém.’<sup>26</sup> Komon amun fén-uwit i Tulusey Kristowe, sénuguén sungu mangéy dob betome do Judio inok féfiyoné no betom bé kékésénule ne betom bé de tete rigoné tom.” Been i niy kékéréd Pedrowe.

## 4

*I Pedrowe brab Juane dob adafay de kékédéwan*

<sup>1</sup> Amun émbéréd sénay ro Pedrowe brab Juane dob de étew, énggégumah i de fadi, brab kafitay de mantay bé lawi i Tuluse, brab de Saduseo sani de étew énda munur ro bé kétébulee. <sup>2</sup> Atin ménkérít ro non téménoro i ro Pedrowe brab Juane dob de étew bé i Jesuse méntébule. Mélaw fénggito ro wén i kétébule. <sup>3</sup> Mélaw kénéfo ro bero, atin non sémingkufén bé béo, fénrisu ro bero taman bé démoe de. <sup>4</sup> Endob médooy ménunure bé de étew énggégélingo bé kékéréd Pedrowe, atin i de munur énggégumah limo ngibuy kedooy de lagéy de saliyu na bé de libun de.

<sup>5</sup> Amun bé démoe de, ménsélimud dob Jerusalem i de odoroy de Judio brab de lukés bero brab de témoro kukuman. <sup>6</sup> Bero soy gérotore fadi féndawét Anas, brab Kaifas, brab Juan, brab Alejandro brab kéluhanay samung i ni gérotor fadi. <sup>7</sup> Atin féntindég roy de ruwo ni gétew apostol dob adafa ruwe brab fénénginsaa ro bero maro, “Ati gefee bé barakate brab ati gefee bé dawéte fénggérigo gom bé ni?”

<sup>8</sup> Tidéw béo, fénémanduoy Rémogor i Tulusey Pedrowe atin mélaw sémenumbul mano, “Do odoro key brab do lukés gey. <sup>9</sup> Amuk fénginsaa kom begey fantag bé fiyowe rénigo gey dob ni lagéy fikat brab ati kékéadi-adi geye de, <sup>10</sup> fégétiga ku dob kéluhana kome brab dob kéluhanay de Judio. I funay ni lagéy téménindég dob adafa kome ménadi-adi, non bé barakat i dawéte Jesu Kristowe tidéw Nasaret. Been i fénléhu gome dob kruse éndob ténebule i Tuluse. <sup>11</sup> Wén i ménsulate fantag bé Jesuse dob Ménsulate Kékéréd i Tuluse mano, ‘I batéwe nikaa kom do rémigo lawi, been i ménwaléye toow fo mélaga batéw.’ I Jesuse, Been i nan batéw nikaa kom. <sup>12</sup> Been saén i Mémukase,” bang Pedrowe, “non énda i ségiyo dob duniyae ni géfukas bé étewe.”

<sup>13</sup> Toow fo ménggaif i de odoroy de Judio bé kékéréd ro Pedrowe brab Juane muret. Ménlabi na foy kégaij ruwe non énggétuwa roy énda i féngganad ro Pedrowe brab Juane. Atin mélaw énggélolo ro soy beroy de dumo Jesus. <sup>14</sup> Endob énda i gébéréd ro, non énggito roy lagéye ni fikat ménadi-adi téménindég dob sékulo Pedrowe brab Juane. <sup>15</sup> Mélaw fénuts ro bero tidéw dob sénlimudo ruwe sibéy. Tidéw béo ménésbéréd-béréd ro maro, <sup>16</sup> “Ati kérigo tome bé de ni étew? Non kéluhanay de étew ni dob Jerusaleme ni, énggétiga roy mékégaife ni rénigo ro. Mélaw énda gédirungo tom de. <sup>17</sup> Endob géléé tom saén bero bé éndaén bérédhé roy fantage bé Jesuse inok énda métarakén.”

<sup>18</sup> Mélaw ténavag ro man bero mahur brab bénréh ro bero bé békénén bérédhé roy fantage bé Jesuse taloo no témoro ro labité roy dawéte. <sup>19</sup> Endob i Pedrowe brab Juane sémenumbul ro maro, “Fégitung gom ké ati isuwe métintu dob adafay Tuluse, odoro key i kagome sugu loo ké odoro key i sugu i Tuluse. <sup>20</sup> Non énda fakayén témérén gey muret fantag bé énggito geye brab bé énggélino keye.” <sup>21</sup> Endob i de odoron toow na fo féninkél roy kégélé ruwe bero bé békénén ureté roy fantage bé Jesuse. Tidéw béo, ténangéy ro bero. Enda géodusana ro bero non bé kedooy de étew démayéw bé Tuluse sabaf bé mékégaife rénigo ro. <sup>22</sup> Non i lagéye ni fén-adi-adi ro fotén folo gébélantuwa i idad ne, brab fikatén tidéw fanay kúmahén.

<sup>23</sup> Amun méntangéyén i ro Pedrowe brab Juane, ménule ro mangéy dob de dumo ro munur bé Jesu Kristowe. Atin nuret roy kékéréd i odoroy de fadi brab de odoroy de Judio. <sup>24</sup> Amun énggélino ro ni, ménséréngan ro démasal dob Tuluso maro, “Kadnan, Beemey léménimbage bé lawaye brab fantade brab dogote brab kéluhanay éntingayéne. <sup>25</sup> Fénbéréd i Rémogor me bé katufua keye Dabid sugu-sugué mo mano, ‘Sedek ménkérít

i de étew békén Judio? Brab sedek bantakéy de étew i éndae gérigono ro dob Tuluse? <sup>26</sup> I de datu téménafay ro brab de méguléw dob duniyae ni ménsélimud ro inok sébanil ro bé Kadnane brab Kristowe fénuwitén.’ Been i niy sénulat Dabide.”

<sup>27</sup> Atin féntaus roy kédasal ruwe maro, “Méntuman i Ménsulate Kébérém non ménsélimud i ro Herode brab Ponsio Pilatowe dob ni ingéd beroy de étew békén Judio brab de dumo gey Judio. Ménsélimud ro sébanil bé Jesuse sani fiyowe sugu-sugué mo fénémiliém méguléw. <sup>28</sup> Ménsélimud ro rémigo bé kéluhanay éntingayéne fatut mérigo dob kaame kétayan brab dob barakat me mérigo. <sup>29</sup> Atin bé bénii Kadnan, fégitungém i de tete kékérém ro begey brab tabanga mo begey do sugu-sugué mo inok émbaraw gey muret bé kékérém me. <sup>30</sup> Brab féuwitém i barakat me émféadi-adi brab émférigo begey bé de mékégaif dob dawét i fiyowe sugu-sugué mo Jesus.”

<sup>31</sup> Amun énggilid ron démasal, ménkuyung i lawie sénlimudo ro brab fénémanduoys Rémogor i Tuluse bero. Tidew bénii, ménbaraw ron muret bé kékérém i Tuluse.

### Séntukid-tukid roy de languntama ro

<sup>32</sup> Atin i kéluhanay de munur bé Kristowe, ségiléw i de fédew ro brab itunga ro. Atin énda i isu bero gefe bé de languntama ro, éndob falan karo kéluhanan non séntukid-tukid ro. <sup>33</sup> Atin wén i barakat i de apostol féntaus roy kéuret ruwe fantag bé kétébule i Kadnane Jesus. Brab i Tuluse toow fo mégédaw bero. <sup>34</sup> Atin énda i ségétew bero wén i kulang bé kéfaguyag ne non fébéléy roy de fantad ro taloo no do lawi ro atin i kurtae gédoté ro, <sup>35</sup> iray ro dob de apostol. Atin saaré roy kurtae dob katabuwane kailangay kéluhanane.

<sup>36</sup> Atin wén i ségétew bero féndawét Jose. Beeney ségétew tidew Siprus brab séfu i Lebitawe. Féndawét i de apostol so “Bernabe”. (I atag i ni “Ségétew émféfiyo fédew”.)

<sup>37</sup> Fénbéléyén i fantad ne atin nirayén dob de apostol i kurtae de.

## 5

### Ananias brab Safira

<sup>1</sup> Wén i ségétew lagéy féndawét Ananias, beroy bawag ne féndawét Safira, fénbéléy roy dumoy fantad ruwe. <sup>2</sup> Endob nitongén i dumoy kurtae brab ménagayun soy bawag ne de. Atin nirayén i sama i kurtae dob de apostol. Endob bénréhén bé nirayén i kéluhanane. <sup>3</sup> Mélaw bénréh Pedrowe dob beene mano, “Ananias, sedek féndayaém i Satanase mémanduon beem? Non téménugi go dob Rémogor i Tuluse, non nitongém i dumoy kurtae énggédotém bé fénbéléy me fantad. <sup>4</sup> Amun énda séna fénbéléyém i fantad me, beem i gefee de. Atin amun fénbéléy mon, kaam soy kurtae de. Endob sedek bénantakém rénígoy ni? Békén téménugi go dob étewe, yamula dob Tuluse téménugi go!” <sup>5</sup> Amun énggelingoo Ananiasey ni, méntuwar brab ménléhu. Atin i kéluhanay de énggégélingo fantag bé ni, toow ro fo ménggilak. <sup>6</sup> Atin ménahur i de kénogo lagéy brab éndot roy bangkay ne brab bénauz ro atin nangéy ro lénébeng.

<sup>7</sup> Amun ménifus i télewe géuras, énggumah i bawag ne, éndob énda séna énggétiga noy ati ménrigowe. <sup>8</sup> Tidew bénii, fénénginsaa Pedrowe mano, “Bérém begén, aw been say niy kurtae énggédot i fantad gome?”

Atin séménumbul mano, “Hoo, been say nan.”

<sup>9</sup> Mélaw bénréh Pedrowe de mano, “Sedek téngkad gom i Rémogor i Tuluse? I bawag me mantu séna ménléhu atin i de ménangéy de lémbéng, ay nan ron dob liyuwan, brab i beeme témundug so.” <sup>10</sup> Sonom bénii, méntuwar so brab ménléhu dob adafa Pedrowe. Amun ménahur i de kénogo lagéy, énggito ro ménléhuén. Mélaw nangéy ro so lénébeng dob doror i bawag ne. <sup>11</sup> Atin toow fo méngkégilakan i kéluhanay de munur bé Kristowe, loo soy de kéluhanay de ségiyo étew énggégélingo bé ni.

### Médooy de mékégaif

<sup>12</sup> Atin i de apostol, médooy de mékégaif rénígo ro énggitoy de étew. Brab i kéluhanay de munur bé Kristowe ménsélimud ro diyo dob “Kuridor Solomone” dob lawi i Tuluse.

<sup>13</sup> Enda i ségétew ménamung bé de énda munur bé Kristowe, fiyon fo ké fiyoy kékéréh i de étew fantag bé de munur. <sup>14</sup> Endob minut médooy de étew do lagéy brab do libun munur bé Kadnane. <sup>15</sup> Atin ménbantug i de mémégaif rénígoy de apostol. Mélaw nuwit i de étew dob de aguwon i de démérueun. Féniro ro bero dob de katri brab dob de bénékah ikam inok buluk témara i Pedrowe, gébela i anlung ne dob berowe. <sup>16</sup> Atin énggumah soy médoowe étew tidew dob de kloh ingéd géliwét dob Jerusalem. Brab nuwit roy de démérueun bero brab de étew rénahukoy de saitan. Atin kéluhana ro ménadi-adi.

### *I kérasay i de apostol*

<sup>17</sup> Tidew béo, i gérotore fadi brab de dumo no sani de Saduseo, ménadaléw ro bé de apostol. Mélaw ménésfagayun ro bé rigoné ruwe. <sup>18</sup> Atin kénéfo roy de apostol brab fénrisu ro bero. <sup>19</sup> Endob bé béo kélungonon, nungka i télaki Kadnaney de bengaway férисуноне. Tidew béo nuvitén bero mésut brab bénréhén mano, <sup>20</sup> “Taus gom dob lawi i Tuluse brab uret gom dob de étew i fantage bé ni mantu umul.” <sup>21</sup> Tidew béo, nodoroy de apostol i bénréh i télakiwe ni. Mélaw amun géfuwénén, ménahur ro dob lawi i Tuluse brab téménoro ro.

Atin i gérotore fadi brab de dumo no, ténavag roy de odoroy de Judio inok sélimud i de kékédéway de Judio. Tidew béo, séminugu ro mangéy dob férисуноне inok uwité roy de apostol mangéy dob adafa ruwe. <sup>22</sup> Endob amun énggumah i de sénugu dob férисуноне, énda énggito roy de apostol. Mélaw ménésfule ro mangéy dob de kékédéwan do ménlimud brab nuret ro maro, <sup>23</sup> “Amun énggégumah gey dob férисуноне, énggito gey i de bengawan do ménkandado brab diyo soy de guwardiya mantay dob liyuwe. Endob amun nungka gey, énda i énggito gey étew dob rahure.” <sup>24</sup> Mélaw i de odoroy de fadi brab kafitane odoroy de guwardiya bé lawi i Tuluse, amun énggelingoo roy ni, toow ro fo ménggaif. Atin fégitungé roy ati énggérigonoy de apostol. <sup>25</sup> Tidew béo, wén i énggégumahe ménlolok dob berowe mano, “I de lagéy do fénrisu gom, diyo ro témoreo bé de étew dob lawi i Tuluse.” <sup>26</sup> Mélaw ménangéy i kafitane dob lawi i Tuluse beroy de guwardiya no. Atin kénéfo roy de apostol brab nuwit ro séfule. Endob énda féndawéto ro bero non mágilak ro bé de étew diyo ké ibéro ro bero batéw inok féléhué ro bero.

<sup>27</sup> Nuwit roy de apostol mangéy dob adafay de ménlimud do odoron. Atin i gérotore fadi ménbéréh dob bero mano, <sup>28</sup> “Génlé geyén begom bé kagomén témoreo fantag bé Jesuse, éndob énda nodoro kom de. Téngténg gom, ménlegébén dob Jerusaleme niy kétoro gome, atin bénréh gom, begey i ménméléhue bé Jesuse.”

<sup>29</sup> Endob sémenumbul i Pedrowe brab de dumo no do apostol maro, “Fatut odoro key i Tuluse, békén étew. <sup>30</sup> Amun énggilid gomén fénléhu i Jesuse bé kékélabo gome de dob kruse, i Tulus i de katufua tom i ménfétébulee de. <sup>31</sup> Atin féndiyat i Tuluse mangéy dob kuwono nuwe inok Been i Méguléwe brab Mémukase. Mélaw Been i émfésagade bé de sala tom do Judio amuk gésénule tom. <sup>32</sup> Géureto key i de ni non énggito gey, loo soy Rémogor i Tuluse muret, sani Rémogore iray i Tuluse dob de étew munur dob Beene.”

<sup>33</sup> Atin i de odoron ni ménlimud, amun énggelingoo roy ni, toow ro fo ménkérít brab ménuyot ro ké féléhuén i de apostol ni. <sup>34</sup> Endob i ségétewe bé de Fariseo féndawéti Gamaliel téménindég dob kérara ruwe ménlimud. Beeney témoree bé kitabe brab toow fo fégadatay de étew. Atin fénfésutén i de apostol. <sup>35</sup> Tidew béo ménbéréh mano, “Do dumo gu do Judio, ingata kom ké ati kérigo gome bé de ni do étew. <sup>36</sup> Bé do gétah wén i ségétewe étew féndawéti Teudas, ménbéréh been kun i toowe ménbantug gérotor étew. Atin fot ratuh gétew i ménwaléye kuyugén. Endob wén i ménméléhu de atin i de kuyugén ménbéragar ro brab énda i énggérigono ro. <sup>37</sup> Tidew béo, dob de gaiy késinsuse bé émfélistay kéluhanay de étew, énggumah man i ségétewe étew féndawéti Judas tidew Galilea. Atin médooy soy ménwaléye kuyugén. Endob amun fénléhu soy Judase, ménbéragar soy de kuyugén. <sup>38</sup> Ségiléw so keeyén bé kéléhu Jesuse. Mélaw bérhéku begom, katom kémukum brab fédayaé tomén i de ni do étew. Non amuk aturay kéilawane saén, énda soy gérigono ro brab énda i rugaya ro. <sup>39</sup> Endob amuk aturay Tuluse, énda gégléo tom bero, non waléy tom saén sébanil bé Tuluse.”

Atin i de ménlimud do kéfédewan, ménagayun ro bé bénréh Gamaliele ni. <sup>40</sup> Tidéw béno, fénahur ron man i de apostol brab féntafés ro bero. Atin génlé ron man bero bé békénén muret ro fantag bé Jesuse. Tidéw béno, ténangéy ro bero. <sup>41</sup> I de apostol amun ménsut ron tidéw dob de ménlimud do odoron, toow ro fo ménoror non kénarang i Tuluse médait ro kéfasangan brab kémalanen sabaf bé kéunur ruwe bé Jesu Kristowe. <sup>42</sup> Atin sénga fuweh ménangéy ro dob lawi i Tuluse brab dob de lawi i de étew. Atin diyo ro téromo bé Fiyowe Uret fantag bé Jesu Kristowe.

## 6

*I de fitéw gétew do tétabang*

<sup>1</sup> Bé do no do gai, amun minutén médooy de munur bé Kristowe, wén i de tete kégébaa no bé de munur do Judio do sébérél Griego dob de munur do Judio do sébérél Hebreo. Ménbérél i de Judio do sébérél Griego bé émfédaya kun i de baléw bero, énda méirayan ro bé de kailanga ro sénga fuweh. <sup>2</sup> Mélaw i de folo bra ruwo gétew do apostol ténimu roy kéluhanay de munur bé Kristowe brab bénréh ro dob berowe maro, “Enda fiyo no ké begey i sémaare bé de kailanga kom sénga fuweh, non fatut gey démoyun muret bé kékérél i Tuluse, brab énda fatut diguré key i galbék geye. <sup>3</sup> Mélaw do dumo gey, fémili gom fitéw gétew lagéy, do météldté brab fémanduo Rémogor i Tuluse. Atin iray gey beroy aturane bé de ni, <sup>4</sup> inok i begeye do apostol fakay gey démasal brab muret fantag bé Tuluse sénga tékélid.”

<sup>5</sup> Atin ménagayun i kéluhana ruwe bé bénréh i de apostol ni. Mélaw fénémili roy Estebane, ségétew méégét i kéunur ne brab fémanduo Rémogor i Tuluse. Fénémili ro soy ro Filipihe, Prokoro, Nikanor, Timon, Parmenas, brab Nikolas tidéw Antiokia ségétew békén Judio, éndob ménrugayén i kéunur ne bé kukumay de Judio. <sup>6</sup> Atin nuwit ro bero mangéy dob de apostol. Tidéw béno, ténégéy de apostol i de bumbuna ro bé kédasala ruwe bero inok tabangay Tuluse bero bé mantuwe ni aturan.

<sup>7</sup> Atin mélaw ménlégbén i urete fantag bé Tuluse. Atin minut médooy munure bé Kristowe dob Jerusalem. Atin médoonén i de fadi ménaganay so munur.

*I kékéfoe bé Estebane*

<sup>8</sup> Atin i Estebane toow fo fénfiyoy Tuluse inok wén i barakatén rémigo do mémégaif dob téngaangay de étew. <sup>9</sup> Endob wén i de étew ménsebanil bé Estebane. Beroy de étew dob simbaane féndawé “Méntangéy étew”. I de dumo bero do Judio tidéw Sirene, brab tidéw Alejandria, I de ni do étew beroy de dumoy de Judio tidéw. Silika brab Asia, ménghanay ro séédél bé Estebane. <sup>10</sup> Endob toow fo fénggétigay Rémogor i Tulusey Estebane émbérél. Mélaw énda i ségétew gésumbul bero. <sup>11</sup> Mélaw niraya ro kurta i de étew inok bérélhé roy éndae toow fantag bé Estebane maro, “Enggelingoo key i ni étew ménbérél tete fantag bé Moisese brab Tuluse.” <sup>12</sup> Mélaw fénkérít roy de étew brab de odoroy de Judio brab de téromo kitab. Atin kénéfo roy Estebane brab nuwit ro dob adafay de ménlimud do kéfédewan. <sup>13</sup> Tidéw béno, nuwit roy de étew émbérél bé éndae toow fantag bé Estebane maro, “I Estebane ni démoyun émbérél tete fantag bé méméfuwe lawi i Tuluse brab de kukuman sénulat Moisese. <sup>14</sup> Enggelingoo key bénréhén bé i Jesuse tidéw Nasaret, gébaé no kun i lawi i Tuluse brab fégaliné noy adate énggégéganada tom tidéw dob Moisese.” <sup>15</sup> Tidéw béno, ténéngténg i kéluhanay de odoron i Estebane. Atin énggito roy rangih ne maak falas télaiki.

## 7

*I kékéfoe bé Estebane*

<sup>1</sup> Mélaw i gérotore fadi fénenginsaa noy Estebane mano, “Aw toow i de ni?”

<sup>2</sup> Atin séménumbul i Estebane mano, “Do dumo gu brab do lukés gu, fégélingo gom i bérélhé kuwe ni. I toowe fo ménbantug barakatan Tulus ménéfégito dob katufua tome Abraham amun bati de séna dob Mesopotamia, bé énda séna ménagewén de mangéy Haran. <sup>3</sup> Atin bénréhén de mano, ‘Tagakém i de samungém brab ingéd me atin agéw go

mangéy dob gonone toroé ku beem.’<sup>4</sup> Mélaw ténagakén i ingéd ne Kaldeo brab ménagéw mangéy Haran, atin diyo ménbati. Atin amun ménléhu i boh Abrahame, fénagéw i Tuluse man mangéy dob ni ingéd gono kom bati béleewe ni.<sup>5</sup> Bé do no do gai, énda nirayay Tulusey Abrahame fantad fiyon kloh. Endob fénasad i Tuluse dob Abrahame bé irayén dey ni fantad brab dob de séfuen témundug de, fiyon fo ké énda sénay nga Abrahame de.<sup>6</sup> Ay niy bénréh i Tuluse bé Abrahame mano, ‘I de séfum bati ro dob ségiyowe ingéd toow fo mérayu atin waléy ro do rifén diyo. Atin mérasay ro taman fot ratuh gébélantuwa.<sup>7</sup> Endob kukumé kuy de étew rémifén bero. Atin i de séfum tékédan ro dob nan ingéd atin féngadafé ro Begén dob ni gonon.’ Been i niy bénréh i Tuluse.”<sup>8</sup> Atin fentaus Estebaney kékérén ne mano, “Tidéw bénou, sénugu i Tuluse dob Abrahamey ni adat sani kétulie inok wén i tanda bénou ni fasad. Mélaw ténuli Abrahamey nga ne Isak amun ménwaléwén gétérésangan ménmah. Atin i Isake ténulién soy nga ne Jakob. Atin i Jakobe ténulién soy de folo bra ruwo gétew ngaén. Atin beroy de katufua tom do Judio.

<sup>9</sup> “Endob i de nga Jakob ménhaléw ro bénou tuwaréy ruwe fénawé Jose. Mélaw fénbéléy ro atin ménhaléy rifén dob ingéde Egipto. Endob Tulus i dumou nuwe.<sup>10</sup> Atin ténabangay Tuluse inok énda i sug-sugén fiyon fo ké médooy kérégénone. Atin amun diyo i Josehe dob adafay datue dob Egipto, fénfiyoy Tuluse brab niraya no kégétawan. Mélaw ménuyot i datue de. Tidéw bénou fénwaléy i datuey Josehe odoron dob no ingéd brab beene soy odorone dob lawi i datue ni.<sup>11</sup> Tidéw bénou, énggumah i dakéle lénggob dob ingéde Egipto brab dob Kanaan. Atin toow ro fo ménrasay. Atin i de katufua tom énda i amaé ro.<sup>12</sup> Mélaw amun énggelingoo Jakobe wén i faréy dob Egipto, sénuguén i de ngaén, sani de katufua tom mangéy diyo bénou gésungu nuwe.<sup>13</sup> Dob gérubo nuwe gule ménangéy ro diyo, ménfégéloy Josehe dob de dumou no sétiman boh. Atin énggétuway datuey fantage bénou de samung Jose.<sup>14</sup> Mélaw fénfamfay Josehey kékérén ne bénou fénangéyén i boh ne Jakob brab kéluhanay de samungén. Atin fitéw ro folo bra limo kéluhanan.<sup>15</sup> Tidéw bénou, ménagéw i ro Jakobe mangéy Egipto. Atin diyo ménléhu loo soy de ségiyo katufua tom.<sup>16</sup> Atin nuwit i de bangkay ro mangéy Sekem, atin lénébénig ro dob lénébénig bénléy Abrahame dob de étew Hamor.”

<sup>17</sup> Atin fentaus Estebaney kékérén ne mano, “Amun gédétén i gaiwe métuman i fasad i Tuluse dob Abrahame, toowén fo médooy de Judio dob Egipto.<sup>18</sup> Atin bénou, ségiyónen i datue dob Egipto, atin énda énggétiga noy fantage bénou Josehe.<sup>19</sup> Enda fo fiyoy ni datu. Féngakara noy de katufua tom. Atin fénrasayén fo bero toow. Non fénégésén i de katufua tom bénou ibéré roy de nga ro inok méléhu.<sup>20</sup> Atin bénou no do gai, ménmah i Moisese, toow fo fiyo nga. Rénitoy idéng ne sungu dob lawi ruwe taman télén gétérésang kélunganon.<sup>21</sup> Amun fénliyu roy ngae dob lawie, éndot i libune nga i datue dob Egipto. Atin fénagifatén maak kaan so nga.<sup>22</sup> Mélaw ménoro i Moisese bénou kéluhanay kégétuwane dob Egipto. Atin ménhaléy énggétigan étew dob de kékérén brab dob de rigoné no.

<sup>23</sup> “Amun fotén folo gébélantuwa i Moisese, ménuyot témukaw bénou de dumou no do Judio.<sup>24</sup> Atin amun énggumah dob de dumou no, énggito noy kédusay ségitew tidéw Egipto bénou dumou nuwe Judio. Mélaw ténabangén i dumou nuwe ni Judio brab séminuli fénléhuén i étew tidéw Egipto.<sup>25</sup> Brab mano ké i de dumou no do Judio énggésobuto roy been i usaréy Tuluse témabang bero inok métangéy ro. Endob énda énggésobuto ro de.<sup>26</sup> Bé gétunduge de fuweh, énggito noy ruwowe gétew Judio sétiboh. Atin génléen bero mano, ‘Kagom sétiboh! Ségiléw gom falan Judio.’<sup>27</sup> Endob i ségitew de férerasayé noy dumou nuwe ni, dénién i Moisese brab ménbérén mano, ‘Békén beem i odoro keye taloo no kékédewa key.<sup>28</sup> Aw ménuyot go méméléhu begén loo bénou kékéléhu me bénou ségitew tidéw Egipto natémégéno?’<sup>29</sup> Amun énggelingoo Moisese ni, ménrarey tidéw Egipto brab ménangéy batu dob ingéde fénawé Madian. Atin diyo énggébawag brab wén i ngaén ruwo gétew lagéy.”

<sup>30</sup> Atin fentaus Estebaney kékérén ne mano, “Amun ménifus i fote folo gébélantuwa, ménfégito dob Moisese télakiwe dob mérinoe kayéw dob gonone énda i étew de

bati, gédét dob tuduke féndawét Sinai. <sup>31</sup> Toow fo ménggaif i Moisese bé ni énggito no. Atin amun ménfégédét inok gito no fo toow, énggelingoo noy béréh i Kadnane mano, <sup>32</sup> ‘Begéney Tuluse fénengadaf i de katufua kom, ro Abraham, Isak, brab Jakob.’ Atin i Moisese léménukub bé kégilak ne brab éndaén gétengténg no de. <sup>33</sup> Atin ménbéréh man i Kadnane mano, ‘Kéda moy sinilas me non i gono muwe témindég mékétéfu fantad. <sup>34</sup> Enggito guy kéférasaye bé de étew gu dob Egipto. Brab énggelingoo kuy de dogés ro. Mélaw ménlusu inok fétangéy gu bero. Atin béléewe, sugué ku beem magéw mangéy Egipto.’ ”

<sup>35</sup> Atin féntaus Estebaney kékéréh ne mano, “Nikaay de dumo no Judio Moisese bé kékéréh ruwe maro, ‘Békén beem i odoro key taloo no kékédéwa key!’ Endob beeney sénugu i Tuluse méguléw bero brab émfétangéye bero. Atin i télakiwe méntefégit doob beene doob mérinoe kayéw i témenabangane de. <sup>36</sup> Atin fénanangguwitén i de étew mésut tidéw Egipto. Rénigo noy de mékégaif dob Egipto brab dob dogote féndawét ‘Furo Dogot’ brab dob gonone énda i bati diyo amun ménagéw ro diyo béréh fote folo gébélantuwa. <sup>37</sup> Atin i Moisesey ménbéréh doob de Judio mano, ‘Emféuwit i Tuluse mangéy doob begome ségettew sarigo no muret béréh ne ségiléw béréh ne begén. Been soy ségettew béréh de séfu Israele.’ ”

<sup>38</sup> Atin féntaus Estebaney kékéréh ne mano, “Moisesey dumoy de Judio ménsélimud doob gonone énda i ségettew étew bati diyo, bero soy de katufua tom brab télakiwe ménsébéréh de doob tuduke Sinai. Brab beeney énggégédote béréh i Tuluse inok irayén so doob betome. I kékéréh i Tuluse ni énda ménkéda no taman sa taman.

<sup>39</sup> “Endob i de katufua tom énda ménodor ro béréh de sugu Moises. Yamula ménika ro de brab ménuyot ro séfule mangéy Egipto. <sup>40</sup> Mélaw bénréh ro doob Arone sani ofo Moisese maro, ‘Rigo go do kéninontow inok wén i féngadafé key, brab inok wén i manangguwit betom. Non énda gétiga key ké ati énggérigono Moisese sani ménanangguwite betom tidéw Egipto.’ ”

<sup>41</sup> Atin féntaus Estebaney kékéréh ne mano, “Béréh no do gai réménigo ro kéninontow maak falas nati safi. Atin témenulak ro doob adafa nuwe brab kénandulio ro inok fégito roy kéror ruwe béréh ni rénigo ro. <sup>42</sup> Endob sabaf béréh ni, ténaak i Tuluse bero brab féndayaén bero ménadaf béréh de giton doob lawayo loo béréh sénulat i sénarigoy Tuluse féndawét Amos mano, ‘Do étew Judio, békén Begén i ténulaka kome doob gonone énda i ségettew de bati béréh lala i kédéyo gome béréh ménfote folo gébélantuwa. Yamula ségiyoy fénengadaf gome. <sup>43</sup> Non nuvit gom i batoy sébaane tulus féndawét Molok brab sébaane kéninontow maak giton tulus féndawét Renfan. Do kéninontow i fénengadaf gome, mélaw féangeyé ku begom fingé na diyo béréh ingéde Babilonia.’ ”

<sup>44</sup> Atin féntaus Estebaney kékéréh ne mano, “I de katufua tom wénén i ginise lawi sani tandaé énda tagakéy Tuluse bero. Nuwit ro amun ménagéw ro doob gonone énda i étew de bati. Rénigo roy ni loo béréh bénréh i Tuluse béréh Moisese, ségiléw béréh fénggitoy Tuluse de. <sup>45</sup> Amun ménifus i firoye gébélantuwa, i de katufua tom énggédot roy ni tidéw doob de lukés ro. Atin i de katufua tom nuwit ro doob de ingéd ténaa ro béréh gaiy kédédel i Tuluse béréh de étew mésut doob do no gonon inok wén i batoy de Judio. Atin i odoro ruwey lagéyé féndawét Josue. Atin fénbati roy lawi i Tuluse diyo taman béréh gaiy Datu Dabide. <sup>46</sup> Toow fo ménswat i Tuluse béréh Dabide. Atin nongotén doob Tuluse inok tungkasé no rémigo béréh lawi i Tuluse, sani Tuluse fénengadaf Jakobe. <sup>47</sup> Endob i nga Datu Dabide féndawét Solomon i réménigowe béréh nan lawi.

<sup>48</sup> “Endob béréhé ku begom, i toowe fo gérotor Tulus énda batién doob de lawi rénigoy kékéréh. Non bénréh i ségettew sénarigoy Tuluse féndawét Isias mano, <sup>49</sup> ‘Bang i Tuluse, laway i sara kuwe, atin i duniyaey ténaa kuwe béréh sékéy gu. Enda i lawi gérigono kom inok batoy ku taloo no térenou ku. <sup>50</sup> Békén ba Begén i réménigowe béréh kéluhanay éntingayéne?’ ”

<sup>51</sup> Atin féntaus Estebaney kékéréh ne mano, “Toow fo métégas i de uléw gom! Enda séna fo ménfégalin i de fédéw gom loo béréh kétayay Tuluse. Brab toow gom fo do énda

mégélingo bé kékérél i Tuluse. Ségiléw gom so bé de katufua kom non atuho kom i Rémogor i Tuluse sénga tékélid. <sup>52</sup> I de katufua kom fénrasay roy kéluhanay de sénarigoy Tuluse muret bé kékérél ne bé do gétah. Fénléhu roy de sénugu i Tuluse muret fantag bé Kristowe sani métintuwe fo Sugu-suguéy Tuluse. Atin i begome, kénéfo gom brab fénléhu gom i Kristowe. <sup>53</sup> Enggétanggafa kom i de kukuman féniray i Tuluse bé de télaki, éndob énda nodoro kom de.” Been i niy bénréh Estebane.

### *I kéféléhue bé Estebane*

<sup>54</sup> Amun énggelingoooy de odoron i kékérél Estebane, toow ro fo ménkérít. Kémigét i de kifé ro bé kékérít ruwe. <sup>55</sup> Endob i Estebane toow fo fénémanduoy Rémogor i Tuluse, brab léménéngag dob lawayo, atin énggito noy kéréndaw i Tuluse brab énggito noy Jesuse témindég dob kuwonoy Tuluse. <sup>56</sup> Atin ménbérél i Estebane mano, “Téngténg gom! Enggito guy lawayo ménungka, brab i Nga i Kéilawane témindég fingé dob kuwonoy Tuluse.”

<sup>57</sup> Toow fo ménkérít i de odoron ni, mélaw néféng roy de kékérél ro brab ménékes ro. Atin sénréngana roy magayase de gémamak. <sup>58</sup> Atin séngguyud ro mésut dob ingéde ni brab nibéro ro batéw. Atin i de témebo de, kenda roy de gérubo lafin bé de kégal ro, atin fénled ro dob kénogo lagéye féndawét Saulo. <sup>59</sup> Atin i lala ruwe mibéron batéw bé Estebane, déménasal dob Kadnane mano, “O Kadnan Jesus, tanggafém i rémogor guwe!” <sup>60</sup> Atin ménlingkuwéd brab ménbérél métanug mano, “Kadnan, fésagadém i ni sala ro.” Sonom béno, ménléhu.

## 8

### *I kérasay i de munur*

<sup>1-2</sup> Atin i Saulowe ménagayun bé kékérél Estebane. Atin i Estebane, lénébeng i de étew munur bé Kristowe brab toow fo rénuung ro. Atin méntidéwén bé no térsang i kékérasayay de munur bé Kristowe. Brab kéluhana ro, saliyu bé de apostol, ménbéragar ro tidéw Jerusalem mangéy Judia brab Samaria.

<sup>3</sup> Atin i Saulowe ténulama no binasanén i kékéngintulus i de munur bé Kristowe, ahuro noy séngae lawi brab kéfoé no séguyudén i de étew munur bé Kristowe. Brab uwité no bero dob férisonone, do lagéy brab do libun.

### *I kélégb i Fiyowe Uret dob Samaria*

<sup>4</sup> Atin amun ménbéragar i de étew munur bé Kristowe dob de ségiyo ingéd, nuret roy fantage bé Jesuse. <sup>5</sup> Atin i Filipiwe ménangéy dob sébaane ingéd diyo dob Samaria, atin diyo nureté i Jesuse Been i Kristowe sani fénemili i Tuluse méguléw. <sup>6</sup> I de étew, amun énggelingoo roy kékérél ne brab énggito roy kéluhanay de mérégaif rénigo no, toow fo fénggelingoo roy kékérél Filipihe. <sup>7</sup> Féféraréyén i de saitan réménahuk dob de médoou étew, atin ménékes ro bé lala ruwe tékédan. Brab fén-adi-adi noy médoowe do fikat brab do kimoyén. <sup>8</sup> Mélaw toow fo ménoror i de étew dob no ingéd.

<sup>9</sup> Wén i ségetéwe lagéy dob no ingéd féndawét Simon, ségetéw béliyan. Bé de énggétah do gai, fénggaifén i médoowe do étew dob Samaria bé de tete kékagakarén. Ménfabantug-bantug bé beene kun i gérotore étew. <sup>10</sup> Atin i kéluhanay de étew dob no ingéd do méskinan brab do kawasa, fénggelingoo roy. Bénréh ro maro “I ni étew féndawét Ménfabantug Barakatan, sani barakat i Tuluse.” <sup>11</sup> Ménrugay i kékégaif ne bero bé de tete kékagakarén. Mélaw toow ro fo fénggelingoo. <sup>12</sup> Endob amun énggelingoooy de étew i Fiyowe Uret nuret Filipiwe fantag bé kékéulgéw i Tuluse brab Jesu Kristowe, ménunur ro brab ménfembautis ro, do lagéy brab do libun. <sup>13</sup> Atin fiyon i Simone ménunur so bé Kristowe. Brab amun ménbautisén, démoyun ménodor bé Filipiwe. Atin toow fo ménngai i Simone bé de énggito no rénigo Filipiwe.

<sup>14</sup> Amun énggelingoooy de apostol dob Jerusalem i kétayakuf i de étew dob Samaria bé kékérél i Tuluse, fénuit roy ro Pedrowe brab Juane mangéy diyo. <sup>15</sup> Amun énggégumah ro diyo, dénasala roy de étew munur bé Kristowe inok tayakufé roy

Rémogor i Tuluse. <sup>16</sup> Non i Rémogor i Tuluse, énda séna énggumahén dob berowe fiyon ségétew. Ménbautison ro saén inok fégito roy kéunur ruwe bé Kadnane Jesus. <sup>17</sup> Tidéw béno, ténégé Pedrowe brab Juaney de bumbuna ro. Atin téngaf roy Rémogor i Tuluse.

<sup>18</sup> Atin énggitoy béliyane ni Simon i kétanggaf ruwe bé Rémogor i Tuluse bé kétégéy de apostol bero. Mélaw bénréhén dob Pedrowe brab Juane bé iraya no bero kurta. <sup>19</sup> Brab bénréhén mano, “Irayanu so bé ni barakat inok amuk wén i téngé ku, gétanggaf so bé Rémogor i Tuluse.”

<sup>20</sup> Endob séménumbul i Pedrowe mano, “Mékukum go damén begom i kurta me, non mamo ké gébéléyo mo bé kurtaey niray i Tuluse. <sup>21</sup> Enda fakay go mamung bé galbék geye non énda séna métintuy fédew me dob adafay Tuluse. <sup>22</sup> Fatut go gésénule bé ni tete kéfégitungém brab dasal go dob Kadnane inok fésagada no beem bé ni salaém. <sup>23</sup> Non énggito guy toow fo mésina go brab bénlanggu i salae beem.”

<sup>24</sup> Tidéw béno, séménumbul i Simone mano, “Dasala kom begén dob Kadnane inok énda i métuman damén bé de bénréh gom dob begéné.”

<sup>25</sup> Atin i ro Pedrowe brab Juane, amun énggilid ron muret bé gétiga ruwe fantag bé Kristowe, brab bénréh roy kóbéréh i Kadnane, ménséfule ro mangéy Jerusalem. Bé késéfule ruwe, ménawét ro dob médoowe do ingéd dob Samaria brab nuret roy Fiyowe Uret diyo.

### *I Filipihe brab odorone*

<sup>26</sup> Atin i Filipihe, sénugu i télikay Kadnane mano, “Tafay go brab angéy go déligdigan dob agéwone tidéw Jerusalem mangéy Gasa.” (I ni agéwon éndaén i étew de magéwon.)

<sup>27</sup> Mélaw ménangéy diyo i Filipihe. Tidéw béno, énggabalaka noy ségétewe lagéy kafun sarigoy baiwe dob ingéde Etiopia. Beeney ségétewe gérotor étew mitong bé kurtae dob no ingéd. I ni étew séfule bé béno bé kéagéw ne ménangéy méngadaf dob Jerusalem.

<sup>28</sup> Diyo dob kalesah ne brab basané noy librowe sénulat i méntelatae sénarigoy Tuluse féndawét Isaias. <sup>29</sup> Atin bénréh i Rémogor i Tuluse dob Filipihe mano, “Ay go fégédét diyo brab odor go bé nan kalesah.” <sup>30</sup> Mélaw i Filipihe ménségéta mangéy fégédét brab énggelingoo noy kóbasa nuwe bé librowe sénulat Isaiase. Atin fénénginsaa Filipihe mano, “Aw gésobuto moy nan basané mo?”

<sup>31</sup> Séménumbul i ni sarigon mano, “Ati kégésobut guwe de ké énda i témo de begén?” Tidéw béno, féndaén i Filipihe dob kalesah ne atin ménséfingé ro ménsar. <sup>32</sup> Ay niy ménsulate dob libro Isaiase, bénasa no, “Beeney maake bili-bili fénléhu. Beeney maake nati bili-bili mantés ké kéléngén i buk ne, non énda fo ménbéréhén fiyon sétaga. <sup>33</sup> Toow fo ménfémala brab énda métintuy kékukume de. Atin énda i gébéréh fantag bé de séfuén non ménléhuén brab éndaén dini ro dob duniye ni.”

<sup>34</sup> Atin ménénginsa i ni sarigon dob Filipihe mano, “Ati ni étew ménsulat dob ni? Aw bénréh i sarigoy Tulusey fantage bé kaane lowoh taloo no ségiyo étew?” <sup>35</sup> Tidéw béno, fénggétiga Filipihe dob beeney atag ni bénasa no brab nuretén i Fiyowe Uret fantag bé Jesuse. <sup>36</sup> Atin amun diyo ro séna lowoh aguwon, énggumah ro dob gonone wén i wayé de. Atin ménbéréh i ni odoron mano, “Ay wén i wayé dob ni. Aw fakayu mébautis?”

<sup>37</sup> Séménumbul i Filipihe mano, “Fakay bautisé ku beem amuk tintu gon munur bé Kristowe dob fédew me.”

Atin séménumbul i ni sarigon mano, “Munuru bé Jesu Kristowe, bé Beeney Nga i Tuluse.”

<sup>38</sup> Atin i ni sarigon fentéré noy kalesah ne brab ménlus bero Filipihe ménangéy dob wayége atin bénautis Filipihe. <sup>39</sup> Amun géménaun ron tidéw dob wayége ni, nuwit i Rémogor i Kadnaney Filipihe. Endaén énggitoy sarigone niy Filipihe, éndob méntaus magéw toow fo moror. <sup>40</sup> Atin i Filipihe méntekow énggégumah dob sébaane ingéd féndawét Asdod. Atin tidéw diyo ménuret bé Fiyowe Uret fantag bé Jesuse dob kéluhanay de ingéd énggétaraa no bé kéagéw ne mangéy dob ingéde féndawét Sesaria.

*I kewaléy Saulowe munur*

<sup>1</sup> Atin i Saulowe bé do no do gai, fentausén soy kérigo nuwe bé de kuyug i Kadnane. Non ménbéréd féléhué no kun bero. Atin ménangéy dob gérotore fadi, <sup>2</sup> brab ménongot sulat dob beene mangéy dob de odoroy de Judio dob de lawi féngadafra ro dob ingéde Damasko inok kéfoé noy kéluhanay étewe gito no diyo do modor dob Agéwo Jesuse brab uwité no bero mangéy Jerusalem, do lagéy brab do libun.

<sup>3</sup> Atin ménagéw i Saulowe mangéy Damasko. Amun gédétén dob no ingéd, méntékow wén i réndaw tidéw dob lawayo géliwé de. <sup>4</sup> Atin ménggétéléngkéb i Saulowe dob fantade brab énggelingoo noy émbéréhe mano, “Saulo! Sedek ferasayé mo Begén?”

<sup>5</sup> Ménenginsa i Saulowe mano, “Ati Beeme, Kadnan?”

Atin séménumbul mano, “Bégéney Jesuse ferasayé mo. <sup>6</sup> Tindég go brab taus go mangéy Damasko, atin diyo wén i étewe béréhé no beem i fatute rigoné mo.”

<sup>7</sup> Atin i de étew dumo Saulowe magéw, téménréni ro. Ménantés ro non énggelingoo roy émbéréhe ni éndob énda gito ro de. <sup>8</sup> Atin i Saulowe téménindég brab bénékahén i de moto no, éndob énda gérito no. Mélaw narak i de dumo no taman Damasko. <sup>9</sup> Atin méntéléw gétérésangan énda gérito no, brab énda ménamaén taloo no méniném.

<sup>10</sup> Atin diyo dob Damasko wén i ségetéwe kuyug Jesuse féndawét Ananias. Atin wén i fénggitoy Tuluse dob beene non ténavag i Kadnane mano, “Ananias!”

Séménumbul mano, “Ay niwu so Kadnan.”

<sup>11</sup> Atin ménbéréd i Kadnane mano, “Angéy go dob agéwone féndawét ‘Mééntang’ brab taus go dob lawi Judase brab fénginsaém diyo i lagéye féndawét Saulo tidéw Tarsus. Démasal sénay ni étew béní. <sup>12</sup> Brab wén i fénggitoy Kadnane, brab dob ni énggito noy ségetéwe lagéy féndawét Ananias énggumah dob beene brab ténege no inok gérito man.”

<sup>13</sup> Séménumbul i Ananiase mano, “Kadnan, énggelingoo kuy uret i médoowe étew fantag bé ni lagéy, brab kéluhanay tetee rénigo no dob de kuyugém dob Jerusalem.

<sup>14</sup> Atin ménangéy dini dob Damaskowe ni non wén i kuwagibe tidéw dob de odoroy de fadi inok kéfoé noy kéluhanay munure Beem brab de lémabit bé dawéti me ké démasal ro.”

<sup>15</sup> Endob ménbéréd i Kadnane mano, “Angéy go diyo non fénemili guy ni étew inok waléy sugu-sugué ku muret fantag bé Begéne dob de étew békén Judio brab dob de datu brab dob de Judio so. <sup>16</sup> Brab fégétiga ku dob beene bé waléy so toow fo mérasay sabaf bé kéunur ne Begén.”

<sup>17</sup> Mélaw ménagéw i Ananiase mangéy diyo. Amun énggumah dob lawie ménahur so brab ténege noy Saulowe ni. Atin bénréhén de mano, “Saulo, dumo gu, sénugu i Kadnane begén mangéy dob beeme. Beeney Jesuse sani méntefégitowé dob beeme dob aguwone bé kéangéy me dini. Sénuguén begén inok waléy go man gérito brab fémanduo Rémogor i Tuluse beem.” <sup>18</sup> Sonom bénó, i de maak éner ménlawu tidéw dob de moto Saulo brab énggítio. Atin ménagayas témindég brab ménfábautis. <sup>19</sup> Amun énggilid mama, ménsefule i kékagér ne. Atin ménbati i Saulowe dob de kuyug Jesus dob Damasko bé ménfiroye gétérésangan.

*I kékuret Saulowe dob Damasko*

<sup>20</sup> Atin i Saulowe ménagayas ménahur dob de lawi féngadafay de Judio brab nureté i fantag bé Jesuse. Bénréhén mano, “I Jesuse ni, Beeney Nga i Tuluse.”

<sup>21</sup> Atin i kéluhanay de énggelingo de toow ro fo ménggaif brab ménsefenginsa ro maro, “Aw békén ba beeney étewe tidéw Jerusalem méméléhu bé de munur bé Jesuse? Aw békén ba ménangéy dini inok kéfoé noy de kuyug Jesus, inok uwité no mangéy dob odoroy de fadi dob Jerusalem?”

<sup>22</sup> Endob ménwaléy toow fo émbagér muret i Saulowe brab féngétiga no dob de Judio dob Damasko i Jesuse, Been i Kristowe, sani méguléwe tidéw dob Tuluse ongot-ongoté ro. Atin énda i énggésumbul bero.

<sup>23</sup> Amun ménifus i firoye gétérésangan, i de Judio ménsélimud ro atin ménséfagayun ro bé féléhué roy Saulowe. <sup>24</sup> Fuweh na kélungonon i kékantaya ruwe de dob de bengaway ni ingéd inok féléhué ro. Endob wén i ménlolok dob Saulowe fantag bé ni rigoné ro. <sup>25</sup> Mélaw wén i no kélungonon, i de kuyugén nuwit roy Saulowe dob gérotore diding fénggédiding bé ni ingéd. Atin nahur ro dob dakéle biton brab ténuntu ro mangéy fingé bala dob faliluwangay didinge ni.

<sup>26</sup> Atin ménule i Saulowe mangéy Jerusalem brab témlama magiyamongan bé de kuyug Jesus. Endob mégilak ro de brab énda munur ro de ké ménwaléyén kuyug Jesuse.

<sup>27</sup> Tidew béno, i Bernabewe nuvitén i Saulowe mangéy dob de apostol. Atin i Bernabewe nuretéen dob berowey kétéfégito Kadnane brab késébérén ne dob Saulowe dob aguwone. Atin bénréh Bernabewe soy kébaraw Saulowe muret fantag bé Jesuse dob Damasko.

<sup>28</sup> Mélaw i Saulowe ménbati dob berowe dob Jerusalem. Brab séménugud muret fantag bé Kadnane dob kéluhanay de gonon dob Jerusalem. <sup>29</sup> Atin ménsébérén brab ménséédél bé de Judio do sébérén Griego. Mélaw témlama ro féléhuén i Saulowe. <sup>30</sup> Amun énggétigay de dumo no munur bé Jesuse, dénura ro mangéy Sesaria brab fénule ro mangéy Tarsus.

<sup>31</sup> Atin bé do no gai, énda ménrasay i de munur bé Kristowe dob Judea brab dob Galilea brab dob Samaria. Ménwaléy ro do méégét munur brab méninut ro médoor non ténabangay Rémogor i Tuluse bero, non toow fo féngadafé roy Kadnane.

### *I rénigo Pedrowe*

<sup>32</sup> Atin i Pedrowe, démoyun ménagéw mangéy dob de médoor do ingéd. Amun nangeyén ténuakaw i de dumo no munur bé Kristowe dob Lida, <sup>33</sup> diyo énggébalaka noy ségétewe lagéy féndawét Eneas. I Enease ni kimoyén brab ménwaléwén gébélantuwa i éndae kégétekén. <sup>34</sup> Atin ménbérén i Pedrowe dob beene mano, “Eneas, uwaé Jesu Kristowe beem. Tek go brab dili moy iroo muwa nan!” Sonom béno énggétek i Enease ni. <sup>35</sup> Enggitoy kéluhanay de étew dob Lida brab dob Saron i ni lagéy ménadi-adi. Mélaw ménunur ro bé Kadnane.

<sup>36</sup> Atin diyo dob Jopa, wén i ségétewe libun munur so bé Kristowe féndawét Tabita. (Taloo no Dorkas dob késébérén Griego. Atin i atag ne “séladéng”.) Sénga tékélid rémigo fiyo dob de méskinan, brab tabanga no bero. <sup>37</sup> Bé do no gai, ménwaléy démeruun brab ménléhu. Mélaw i de dumo no, nurah roy bangkay ne brab féndiyo ro dob sibéye dob rotor i lawie. <sup>38</sup> Enda mérayu i ingéde Jopa dob ingéde Lida. Mélaw i de kuyug Jesus dob Jopa, amun énggelingoo ro diyo i Pedrowe dob Lida, séménugu ro ruwo gétew lagéy mangéy diyo inok bérhé ro dob Pedrowe bé magayas mangéy dob berowe. <sup>39</sup> Mélaw ménodor i Pedrowe bero. Amun énggumah ron, nuwit roy Pedrowe mangéy dob sibéye dob rotor i lawie. Atin i kéluhanay de libun do baléw ménfégédét ro dob Pedrowe, kémérew ro brab fénggito roy de kégal rénigo Dorkase bé kúuyag ne séna. <sup>40</sup> Tidew béno, fénsut Pedrowe bero dob sibéye atin ménlingkuwé démasal. Tidew béno, sénaréwén i bangkaye brab ménbérén mano, “Tabita, tek go!” Tidew béno, bénékahén i de moto no brab amun énggito noy Pedrowe, méntek. <sup>41</sup> Atin i Pedrowe, génamakén i de kémérén brab féntindégén. Tidew béno, ténawagén i kéluhanay de munur bé Kristowe brab de libun do baléw, atin fénggito no beroy Dorkase ménuyag. <sup>42</sup> Atin i urete fantag bé ni ménlegéb dob ingéde Jopa. Mélaw ménwaléy médooy ménunure bé Kadnane. <sup>43</sup> Atin ménrugay i Pedrowe dob Jopa. Ménbati dob lawi i ségétewe lagéy gémalbék léminis do kulit safi féndawét Simon.

### *I Pedrowe brab Korneliowe*

<sup>1</sup> Dob Sesaria, wén i ségétewe lagéy féndawét Kornelio. Beeney kafitay de sundalo tidew Roma sani de sundalo féndawét ro “Do tidew Italiana”. <sup>2</sup> I ni kafitan toow fo méngeintulus, loo soy kéluhanay de dumo no dob kaane kuréngon. Démoyn miray tabang dob de Judio do méskinan. Brab sénga tékélid démasal dob Tuluse. <sup>3</sup> Wén i no

sébaan fuweh, géraraan lémudug i térsange de, wén i fénggitoy Tuluse dob beene. Tintu fo énggito noy télakiy Tuluse ménahur dob lawi ne. Atin ténawag i télakiwe ni mano, "Kornelio!"

<sup>4</sup> Atin ténéngténgén i télakiwe ni brab toow fo ménggilak. Atin séménumbul mano, "Ati no?"

Atin ménbéréh i télakiwe ni mano, "Mésuwat i Tuluse bé kégédaw me bé de fiyo rénigo mo brab kédasal me. Atin énggétédémo no beem. <sup>5</sup> Béleewe ni, sugu go do étew mangéy Jopa inok angéyé roy ségetéwe lagéy féndawét Simon Pedro. <sup>6</sup> Diyo bati dob lawi i lagéye gémalbék léminis do kulit safi féndawét so Simon. I ni lawi gédét dob dogote."

<sup>7</sup> Tidéw béno, méntékédan i télakiwe ni. Atin i Korneliowe ténawagén i ruwowe gétew bé de sugu-sugué no, brab ségetéwe bé de sundalo no toow fo méngintulus. Beene soy ségetéwe bé de sarigo no. <sup>8</sup> Atin bénréhén beroy ni ménrigo. Tidéw béno, sénuguén bero mangéy dob ingéde Jopa.

<sup>9</sup> Dob gétunduge de fuweh, amun gédét ron dob Jopa, i Pedrowe ménénik dob datare atéf i lawie batio no brab déménasal. Géutuhén bé béno. <sup>10</sup> Atin toowén fo mélafay brab ménuyot fo mama. Endob i lala i de étew dob nan lawi témafay séna bé amaé ruwe, wén i fénggitoy Tuluse dob Pedrowe ni. <sup>11</sup> Enggito noy lawaye ménungka brab wén i maake dakél safut térimféna mangéy fantad ténutun fot i sugud ne. <sup>12</sup> Diyo ménfuyut i kéluhanay séségiyo-giyowe do binatang do magéw brab do rémagaf dob fantade brab do kloh manok. <sup>13</sup> Brab énggelingoo noy émbéréhe mano, "Pedro, étek go! Sumbaliém brab amaém."

<sup>14</sup> Endob séménumbul i Pedrowe mano, "Aba, énda fo gérigono ku de, Kadnan. Non tidéw féganay, énda séna ménamau bé de amaén liyén dob adat geye do Judio."

<sup>15</sup> Atin énggelingoo no man i émbéréhe ni mano, "Kago béréhén liyén taloo no tete i bénréh i Tuluse fiyo." <sup>16</sup> Télém gule ménrigoy ni. Tidéw béno, i ni méntutun ménbatun séfule mangéy dob lawayo.

<sup>17</sup> I lala Pedrowe mégitung bé atiy atag i ni énggito no, énggumah i de sénugu Kornelio. Non amun fénénginsa roy hon i lawie gono Pedrowe bati, ménangéy ro diyo. Brab diyo ro dob liyuy béngawane. <sup>18</sup> Atin téménawag ro brab fénénginsa ro ké diyo bati i lagéye féndawét Simon Pedro.

<sup>19</sup> Atin i Pedrowe tafay so fégitungé noy atiy atag i ni énggito no. Tidéw béno, i Rémogor i Tuluse ménbéréh dob Pedrowe mano, "Pedro, wén i télém gétew lagéy séméléd beem. <sup>20</sup> Tek go brab lus go, brab kago magalang-galang modor bero non Begén i séménugu bero." <sup>21</sup> Mélaw ménlus i Pedrowe brab bénréhén bero mano, "Begén i nan sélédé kom. Ati funa kome séméléd begén?"

<sup>22</sup> Séménumbul ro maro, "Sénugu kafitan Korneliowe begey mangéy dini. I ni étew toow fo métintu brab méngintulus, atin i kéluhanay de Judio fégadato ro. Ménbéréh i télakiwe dob beene bé féangeyé no beem dob lawi ne inok fégélingoé noy ati béréhé muwe." <sup>23</sup> Atin i Pedrowe ténayakufén bero dob lawie ni batio no, brab ménbatu ro diyo ségékelungonon.

Atin bé démoe de ménodor bero brab wén soy do dumo bé de munur bé Kristowe dob Jopa ménodor de. <sup>24</sup> Dob gétunduge de fuweh, énggumah ro dob Sesaria. Diyo nongot-nongot Korneliowe bero. Atin ténawagén i kéluhanay de samungén brab do dumo no séloyuk. Mélaw diyo ro so. <sup>25</sup> Amun énggumahén i Pedrowe, bénalak Korneliowe brab ménlingkuwéd dob adafa Pedrowe inok féngadafé no. <sup>26</sup> Endob féntindég Pedrowe brab ménbéréh mano, "Tindég go, non i begéne kéilawanu so loo bé beema nan." <sup>27</sup> Atin féntaus Pedrowey késébéréh-béréh ruwe bé lala ruwe mahur dob lawie ni, atin énggito noy médoowe étew ménlimud. <sup>28</sup> Tidéw béno ménbéréh i Pedrowe mano, "Gétiga komén i adat geye do Judio. Enda fakayén dob kitab geye ké sémugud gey mangéy dob de lawi gom do békén Judio taloo no sélawék gey begom. Endob fénggétigay Tuluse begén bé mantuwe ni séna, bé fiyon fo ké ati no étew, éndaén fégitungé ku de ménkérésik. <sup>29</sup> Mélaw

amun fén-angéy gom begén dini, éndaén ménsédélu de. Mélaw fénginsaa ku begom, ati funa kome ménfétawag begén?"

<sup>30</sup> Séménumbul i Korneliowe mano, "Amun naméntéléwo, loo so béni géraraan lémudug i térsange de, déménasalu dob lawi guwe ni. Méntékow méntéfégito lagéye toow fo sémlinang i kégal ne téménindég dob téngaanga kuwe. <sup>31</sup> Atin ménbéréh mano, 'Kornelio, énggelingoo Tulusey kédasal me brab énggétédémo noy kégédaw me brab de fiyo rénigo mo. <sup>32</sup> Mélaw sugu go étew mangéy Jopa témawag bé lagéye féndawét Simon Pedro. Diyo bati dob lawi i lagéye gémalbék léminis do kulit safi féndawét Simon gédét dob dogote.' <sup>33</sup> Mélaw ménagayasu séménugu mangéy témawag beem. Atin mégédaw go non ménangéy go dini. Atin ay ni gey ménlimud dob adafay Tuluse inok mégélingo bé féreréh i Kadnane beem."

### *I kékéréh Pedrowe*

<sup>34</sup> Atin ménbéréh i Pedrowe mano, "Béleewe ni énggétiga ku, i Tuluse énda i isu ramigo no bé de étew. <sup>35</sup> Non tayakuféy Tulusey étewe mégadatan de brab rigoné noy fatute kétayay Tuluse, fiyon fo ké ati katufua nuwe taloo no ké ati tidéwo nuwe de. <sup>36</sup> Gétiga kom i kéiray i Tuluse bé kékéréh ne dob de Judio. Dob berowe fénayagén i Fiyowe Uret fantag bé kékéfiyowe fédéw sabaf bé Jesu Kristowe. Endob Beeney Kadnay kéluhanane. <sup>37</sup> Gétiga kom ké ati ménrigowe dob kéluhanay de ingéd dob Israel, méngganay dob Galilea amun i Juane nureté i fantage bé kékautis ne. <sup>38</sup> Brab énggétiga kom i fantage bé Jesuse tidéw Nasaret. I Tuluse nirayén témantu dob Beeney Rémogor ne brab barakat ne. Séménugud dob kéluhanay de ingéd, rémigo bé fiyowe brab fén-adi-adi noy de étew fénrasay Satanase. Enggérigono noy de ni non dob Beeney Tuluse. <sup>39</sup> Brab begey i énggétowe bé de ni rénigo no dob de ingéd i de Judio brab dob Jerusalem. Endob i de étew fénléhu roy Jesuse dob kruse. <sup>40</sup> Endob ténébule i Tuluse dob gétéléw ne gétérésang brab fénggito noy Jesuse ménuyag. <sup>41</sup> Enda méntéfégito no dob kéluhanay étewe éndob dob begeye saén méntéfégito do fénemili i Tuluse. Ménséréngan begey mama brab miném amun méntébuleén. <sup>42</sup> Atin sénuguén begey mangéy muret bé Fiyowe Uret dob kéluhanay étewe brab muret bé Beeney fénemili i Tuluse kémukum bé de méuyag brab bé de ménléhu. <sup>43</sup> Atin i kéluhanay de énggétah do sénarigoy Tuluse muret bé kékéréh ne, nuret roy fantage bé Jesuse. Atin bénréh ro bé i kéluhanay munure dob Beene, fésagaday Tulusey de sala ro sabaf bé barakat i dawéti ne." Been i niy bénréh Pedrowe.

### *I kégumah i Rémogor i Tuluse dob de békén Judio*

<sup>44</sup> Amun émbéréh sénay Pedrowe, i Rémogor i Tuluse méntérimféna mangéy dob kéluhanay de mégélingo bé uret ne. <sup>45</sup> Atin i de kuyug Jesus do dumo Pedrowe ménodor de tidéw Jopa do Judio ro. Atin toow ro fo ménggaif bé kéiray i Tuluse so témantu bé Rémogor ne dob de étew békén Judio. <sup>46</sup> Enggétiga ro niray i Tulusey Rémogor ne dob de békén Judio non énggelingoo roy késébéréh ruwe bé de ségiyo késébéréh énda gétiga ro de brab dénayéw roy Tuluse. Mélaw bénréh Pedrowe bero mano, <sup>47</sup> "I de ni do étew ténanggaf roy Rémogor i Tuluse, ségiléw so bé betome. Mélaw énda fakayén ké énda bautisé ro bé wayége." <sup>48</sup> Mélaw bénréhén bero fatut fébautis ro inok féténgténg roy kénur ruwe bé Jesu Kristowe. Tidéw bénro, fénbati ro nay Pedrowe dob berowe bé ménfiroye gétérésangan.

### *I Pedrowe dob Jerusalem*

<sup>1</sup> Atin i de apostol brab de dumo ro munur bé Kristowe dob Judea, énggelingoo roy fantage bé de étew békén do Judio ménwaléy ro munur bé kékéréh i Tuluse. <sup>2</sup> Mélaw amun ménénagé i Pedrowe mangéy Jerusalem, i de munur bé Kristowe do Judio, dénowoy roy Pedrowe, <sup>3</sup> maro, "Séménugud go mangéy dob lawi i de békén Judio, sani de énda méntuli. Atin ménséréngan go na bero mama." <sup>4</sup> Mélaw nuret Pedrowe beroy kéluhanay ménrigowe tidéw féganay.

<sup>5</sup> Ménbéréh i Pedrowe mano, “Amun diyou dob Jopa, déménasalu atin wén i fénggitoy Tuluse begén. Énggito gu tidéw dob lawayoy maake dakél safut ténutun fot i sugud ne. Atin méntréna dob téngaanga kuwe. <sup>6</sup> Tidéw béno, téneungténg gu fo toow atin énggito gu diyo ménfuyut i séségiyo-giyowe do ayam brab do mérayar binatang do magéw brab do rémagaf dob fantade, brab do kloh manok. <sup>7</sup> Tidéw béno énggelingoo kuy émbéréhe mano, ‘Pedro, tindég go, sumbaliém brab amaém.’ <sup>8</sup> Endob sémenumbulu maku, ‘Aba, énda fo gérigono ku de, Kadnan. Non énda séna énggéamau bé kéluhanay amaéne ménbéréh liyén dob adat geye do Judio.’ <sup>9</sup> Endob énggelingoo ku man ségule i ni émbéréh tidéw dob lawayo mano, ‘Kagonén béréhén liyén taloo no tete i bénréh i Tuluse fiyo.’ <sup>10</sup> Téléw gule ménrigoy ni. Tidéw béno, ménbatun séfule mangéy dob lawayoy ni maak safut ménféno do binatang. <sup>11</sup> Bé béno so, énggumah dob lawie gono ku bat i télewe gétew lagéy sénugu tidéw dob ingéde Sesaria mangéy témauwag begén. <sup>12</sup> Atin i Rémogor i Tuluse bénréhén begén bé magéwu brab békénu magalang-galang modor bero. Tidéw béno, ménodor so begén i de ném ni gétew do munur do dumo gu tidéw Jopa mangéy Sesaria. Amun énggumah geyén dob lawi Korneliowe, ménahur gey. <sup>13</sup> Atin bénréhén begey i fantage bé téakiwe énggito no dob lawi ne. Atin bénréh i téakiwe de kun mano, ‘Sugu go étew mangéy témauwag bé lagéye féndawét Simon Pedro dob Jopa. <sup>14</sup> Ureté no beem i funa muwe méfukas dob de salaém begom i de samungém.’ Been i niy bénréh i téakiwe de kun.”

<sup>15</sup> Atin féntaus Pedrowey kébéréh ne mano, “Amun ménghanayu séna émbéréh dob de étew ni dob Jopa, i Rémogor i Tuluse ménlus mangéy dob berowe ségiléw bé kéangéy ne dob betome do Judio bé féganayo. <sup>16</sup> Tidéw béno énggétédémo kuy bénréh i Kadnane mano, ‘I Juane mautis bé wayége éndob bautison gom bé Rémogor i Tuluse.’ ”

<sup>17</sup> Atin féntaus Pedrowey kébéréh ne mano, “Enggitonén i kériray i Tuluse bé Rémogor ne dob de ni étew békén Judio ségiléw bé kériray ne de dob betome amun ménunur tom bé Kadnane Jesu Kristo. Mélaw énda i kuwagib gu mélén bé Tuluse miray bé Rémogor ne dob berowe.”

<sup>18</sup> Amun énggelingoo roy ni kébéréh Pedrowe, témenrén ron bé kéadowoy ruwe de. Atin dénayéw roy Tuluse maro, “Mégédaw so wayoy Tuluse bé de étew békén Judio non amuk gésénule ro, gédoté ro soy umule magufusa.”

### *I de munur dob Antioquia*

<sup>19</sup> I de munur bé Kristowe ménbéragar ro non bé kéferasaye bero tidéwén bé kéféléhue bé Estebane. Mélaw énggégumah ro dob de mérayu ingéd. I de dum de dob Fenisia atin i de dum de dob Sipri brab dob Antioquia. Atin nuret roy Fiyowe Uret dob de Judio saén.

<sup>20</sup> Endob wén i de dum de tidéw Sipri brab do tidéw Sirin, amun énggégumah ro dob Antioquia nuret ro so dob de békén Judio Fiyowe Uret fantag bé Kadnane Jesus. <sup>21</sup> Atin i barakat i Kadnane té nabangén bero funay médoowe do étew énggésénule brab ménunur bé Kadnane.

<sup>22</sup> Atin i urete fantag bé de ni énggumah dob de munur bé Kristowe dob Jerusalem. Mélaw fénuit roy Bernabewe mangéy Antioquia. <sup>23</sup> Amun énggumah diyo, énggito noy kégédaw i Tuluse bero. Toow fo ménoror i Bernabewe brab bénréhén bero kéluhanan bé fédayday ro bé kéunur ruwe dob kéluhanay de fidéw ro brab modor ro bé de sugu i Kadnane. <sup>24</sup> Toow fo fiyo étew i Bernabewe ni. Fénémanduoy Rémogor i Tuluse brab méégét i kéunur ne. Mélaw sabaf bé kétoro ne, médooy de énggésénule brab ménunur ro bé Kadnane.

<sup>25</sup> Tidéw béno, ménangéy Tarsus i Bernabewe inok sélédé noy Saulowe. <sup>26</sup> Amun énggito no, nuvitén mangéy Antioquia. Atin ménsegébélantuwa diyo ro beroy de munur bé Kristowe brab té ménoro ro dob de médooy étew. Atin diyo dob Antioquia, ménfeganay i kétawage bé de munur bé Kristowe “Kristiyano”.

<sup>27</sup> Bé do no do gai, wén i de sénarigoy Tuluse muret bé kébéréh ne énggumah dob Antioquia tidéw Jerusalem. <sup>28</sup> Téménindég i ségétéwe bero féndawét Agabo brab fénbéréh i Rémogor i Tuluse bé wén moso i géumah dakél lénggob dob kéluhanay de ingéd dob

duniyae ni. (Atin énggégumah i ni bé gaiy kékéfuglén Klaudiowe dob Roma.) <sup>29</sup> Atin i de kuyug, ménséfagayun ro bé émféuwit ro tabang bé atiy tamay gagané ruwe mangéy dob de dumo ro do kuyug bati dob Judea. <sup>30</sup> Atin been i niy rénigo ruwe, brab fénuwit ro bé ro Saulowe brab Bernabewey karowe tabang do kurta mangéy dob de odoroy de munur diyo dob Judea.

## 12

### *I kérasay i de munur*

<sup>1</sup> Bé do no do gai, féngganay i datue féndawét Herod i kékérasay ne bé de dumo bé de munur bé Kristowe. <sup>2</sup> I Santiagowe dumo Juane sétiman idéng, fénféléhu Herode bé sundange. <sup>3</sup> Atin amun énggito no toow fo ménsuwat i de Judio bé ni rénigo no, fénkéfóén i Pedrowe. (Ménrigoy ni bé gaiy kékanduli i de Judio féndawét “Témara”, sani kandulie mama ro fan énda i fégéféruck de.) <sup>4</sup> Amun énggékéfoo roy Pedrowe, fénrisu ro brab fénbantaya ro bé fote lumfuk do sundalo. Wén i fot gétew dob séngae de sétumfuk. Atin bénantak Herode kukumén i Pedrowe dob téngaangay de étew amuk gilid i kékanduli ruwe. <sup>5</sup> Mélaw ménbati i Pedrowe dob férisunone. Atin i de dumo no munur bé Kristowe téménantu ro démasal dob Tuluse inok tabanga noy Pedrowe.

### *I kétangéy Pedrowe tidéw dob férisunone*

<sup>6</sup> Amun ségékélungonon séden i télaa Herode kémukum bé Pedrowe, bé no kélungonon ménfidong i Pedrowe dob kérara i ruwowe gétew sundalo mantayan de. Brab nikét roy Pedrowe bé ruwowe timan sangkali. Atin wén soy do sundalo mantay dob bengaway férisunone ni. <sup>7</sup> Atin tékow méntéfégíttoy télaiki Kadnane brab ménggékaya i sibéy ne dob férisunone. Atin i télaikiwe ni kénuyungén i Pedrowe dob wara nuwe inok ulégé no brab ménbérél mano, “Fagayas go tek!” Sonom béno ménukoh i de sangkali dob de kémérén. <sup>8</sup> “Sintoro go brab sinilas go”, bang i télaikiwe ni. Atin nodoro Pedrowey bénréh i télaikiwe ni. Ménbérél man i télaikiwe ni mano, “Kégalém i géruwowe lafin kégalém brab odor go begén.” <sup>9</sup> Atin ménodor i Pedrowe bé télaikiwe ni brab ménusut. Endob énda gétiga no de ké toow i ni rénigoy télaikiwe ni, look fénggitoy Tuluse de dob téginéfe saén. <sup>10</sup> Ténaraa roy sunguwe brab géruwowe gonoy de sundalo ni do mantay. Tidéw béno, énggumah ro dob bengaway férisunone ni futow i fintu ne. Atin ménungka so fiyon fo ké énda i ménungka de. Atin amun énggésut ron, ménauts ro magéw brab amun énggéliuno ron i sébaane aguwon, tékow ménalfa i télaikiwe ni.

<sup>11</sup> Tidéw béno énggétiga Pedrowe nén i ni ménrigo, mélaw énggékérého no mano, “Béleewe énggétiga kun toow wayoy ni ménrigo! Sénugu i Kadnaney télaiki nuwe témangéy begén inok énda gérigono Herode brab de Judioy kétaya ruwe rigoné ro dob begéne.”

<sup>12</sup> Amun énggétiga noy ni, ménauts mangéy dob lawi Mariahe idéng Juan Markose. Diyo ménlimud i médoowe étew démasal. <sup>13</sup> Amun énggumah i Pedrowe, téménuktuk dob liyuy fintue dob fésayawane. Atin ménfégédét i ségétéwe sugu-suguén kénogon féndawét Roda inok angéyé no susinén. <sup>14</sup> Amun énggélolo noy bérél Pedrowe, toow fo ménoror. Endob énda nungkaén i fintue. Yamula sabaf bé kéror ne ménsegéta séfule mangéy dob de étew brab bénréhén bero i Pedrowe diyo dob liyuwe. <sup>15</sup> Endob ménbérél ro maro, “Bunég go!” Endob énda téméré no émbérél bé i Pedrowe diyo dob liyuwe. Mélaw bénréh ro maro, “Télaiki Pedro keey i no.”

<sup>16</sup> Tafay so témuktuk i Pedrowe ni. Tidéw béno nungka roy fintue ni brab amun énggito roy Pedrowe, toow ro fo ménggaif. <sup>17</sup> Endob séniniyasa Pedrowe bero bé féantés ro, brab nuretéen beroy kékéfésut i Kadnane de tidéw dob férisunone. Atin ménbérél mano, “Uret gom i ni dob Santiagowe brab dob de dumo tom munur bé Kristowe.” Tidéw béno, ménagéw i Pedrowe mangéy dob ségiyowe gonon.

<sup>18</sup> Amun géfuwénén, i de sundalo mantayan bé Pedrowe, toow ro fo ménggaif brab ménggilak. Enda énggétiga ro de ké ati énggérigono Pedrowe. <sup>19</sup> Atin fénsléd Herodey

Pedrowe. Atin amun énda énggito ro de, fénénginsaa Herodey de mantay bé férisunone, atin fénféléhuén bero. Tidew béo, léménudug i Herode mangéy Sesaria tidew Judea brab diyo ménrugay batí.

### *I kéléhu Herode*

<sup>20</sup> Bé béo gai, ménkérít i Herode bé de étew tidew Tiro brab de étew tidew Sidon. Mélaw ménséfagayun ro mangéy ro dob beene. Bé énda séna ménangéy ro dob Herode, ménsébéréh ro bé sarigo nuwe dob lawi ne féndawét Blasto bé odoro no bero mangéy dob Herode inok ongoté ro de ké kédané noy kékérít ne bero. Non énda i ségiyo édoto ro bé amaé ruwe ké békén dob ingéde sakuf Herode.

<sup>21</sup> Amun énggumahén i télaa ruwe mangéy diyo, i Herode kéménégál kégal datu brab ménsar dob saray datue. Tidew béo nureto no bero. <sup>22</sup> Atin ménkes i de étew démayéw bé Herod maro, “Tulus i ni émbéréh, békén kéilawan.” <sup>23</sup> Sonom béo, kénukum i télakiy Kadnaney Herode non ténayakufén i kénéfengadaf ruwe de, brab énda fénéfengadafé no bero bé Tuluse. Mélaw ménsofotén i lowoh ne atin ménléhu.

<sup>24</sup> Atin béo do no gai, i urete fantag bé Tuluse ménlégéb dob de ingéd atin minut so médooy munure bé Kristowe.

<sup>25</sup> Atin i ro Bernabewe brab Saulowe amun énggilid ron i galbék ruwe, ménséfule ro tidew Jerusalem mangéy Antiokia, brab nuwit roy Juan Markose.

## 13

### *I késugue bé Saulowe brab Bernabewe*

<sup>1</sup> Diyo dob Antiokia, wén i de sénarigoy Tuluse muret bé kékéréh ne brab do téromo. I de ni, ro Bernabe, Saulo, Simeon (féndawét so mitam lagéy), Lusio (tidew Sirin), brab Manaen (sani dumo Herode ménggéséruk). <sup>2</sup> Wén i no sébaan fuweh, amun ménengadaf ro dob Tuluse brab ménfuwasa ro, i Rémogor i Tuluse ménbéréh mano, “Iray gom Begén i ro Bernabewe brab Saulowe inok rigoné roy galbéké fénemili gu iray gu bero.” <sup>3</sup> Mélaw ménfuwasa ro brab déménasal ro brab ténege roy ro Bernabewe brab Saulowe. Tidew béo sénugu ro bero.

### *Dob Síprus*

<sup>4</sup> Atin i Bernabewe brab Saulowe do sénugu i Rémogor i Tuluse, ménagéw ro mangéy Selusia, atin tidew Selusia ménda ro barko mangéy dob bungéde féndawét Síprus. Ménodor soy Juan Markose. <sup>5</sup> Amun téménéfad ro dob ingéde Salamis, nuret roy kékéréh i Tuluse dob de lawi fénéfengadafay de Judío. Atin téménabang soy Juan Markose.

<sup>6</sup> Atin amun énggífara ronén i ni bungéd mangéy dob ingéde Pafos, diyo énggébalaka roy béliyan ségétew Judío féndawét Bar-Jesus. (I dawét ne Elimas dob késébéréhé Griego.) Bénréhén been kun i sénarigoy Tuluse muret bé kékéréh ne. <sup>7</sup> Brab i ni béliyan, been i dumoy ségétewé gobernador dob no bungéd féndawét Sergio Paulo, toow fo météldté. Atin i ni gobernador féntawagén i ro Bernabewe brab Saulowe non méuyot mégélingo bé kékéréh i Tuluse. <sup>8</sup> Endob i béliyan ni Elimas, toow fo ménsébanil bero. Atin ténułama no balengén i fédew i ni gobernador inok énda munurén. <sup>9</sup> Tidew béo, i Saulowe (féndawét so Pablo) toow fo fénemanduoy Rémogor i Tuluse. Atin fénandangén fo toow i ni béliyan. <sup>10</sup> Brab ménbéréh i Pablowe mano, “I beema nan, nga Satanás go! Tintu sébanil go bé kéluhanay fiyowe. Ménfeno go bé tugie brab akar. Atin télamané mo féwaléyén tugi i toowe tidew dob Kadnane. <sup>11</sup> Bé béní so, kukuméy Tuluse beem bé waléy go langafén brab mérugay énda gérito go.”

Sonom béo, i Elimase ménlangafén brab séménlé d'étew marak de. <sup>12</sup> Atin i gobernadore ni ménunur bé Kristowe amun énggito noy ni ménrigo. Toow fo ménggafé békétoroe fantag bé Kadnane.

### *Dob Antiokia sakuf i ingéde Pisidia*

<sup>13</sup> Atin i Pablowe brab de dumo no ménda ro man barko dob Pafos, brab énggégumah ro dob gonone féndawét Perga sakuf i ingéde féndawét Pamfilia. Endob i Juan Markose

ménsesuway bero atin ménséfule mangéy Jerusalem. <sup>14</sup> Atin tidéw Perga, méntaus ro mangéy Antiochia sakuf i ingéde Pisidia. Atin bé gaiwe kétérén, ménahur ro dob lawie féngadafay de Judio brab ménsar ro. <sup>15</sup> Amun énggilid i kébasawe bé de kitab sénulat Moisese brab de sénulat i de sénarigoy Tuluse, i de odoron dob lawie féngadafan fénbéréh roy ro Pablowe brab Bernabewe maro, “Do dumo gey, amuk wén i kéuyoto kom bérhé kom dob de étew ni émféfiyo bé de fédew ro, kagom séko méangga, bérhé gom so bero.”

<sup>16</sup> Mélaw téménindég i Pablowe brab séniniyasa no bero bé de kémérén inok mantés ro. Tidéw bénou, ménbéréh mano, “Do dumo gu do Judio, brab begome do étew békén Judio do méngintulus, toow gom fégélingo. <sup>17</sup> I Tuluse féngadafé tom do Judio, i ménémilie bé de katufua tom. Atin fénwaléyén bero médo amun ménbati ro dob mérayue ingéd Egipto. Endob fénésut i Tuluse so bero tidéw Egipto bé barakat ne. <sup>18</sup> Atin téningkéloy Tuluse bero bé ménfote folo gébélantuwa dob gonone énda i étew de bat. <sup>19</sup> Amun énggilid ténaba noy de fitew timan ingéd dob Kanaan, nirayén i fantade ni dob de Judio. <sup>20</sup> I kérugay i kéluhanay de ni fot ratuh bra limo folo gébélantuwa.

“Atin amun énggilid i ni, nirayay Tuluse bero do kéfédewan inok wén i mékuléw bero taman dob gai Samuele, ségétew sénarigoy Tuluse muret békéréh ne. <sup>21</sup> Tidéw bénou, i de Judio ménongot ro dob Tuluse datu ro. Atin fénémili i Tulusey ségétewe lagéy féndawétl Saulo nga Kis tidéw dob katufua Benjamene. Atin ménwaléy datu roy Saulowe bé ménfote folo gébélantuwa. <sup>22</sup> Amun kénday Tulusey Saulowe, Dabid i fénwaléy ne datu ro. Bénréh i Tuluse mano, ‘Enggito guy Dabide, nga Jessewe, kénswata ku. Rigoné noy kétaya kuwe.’ ”

<sup>23</sup> Atin féntaus Pablowej kékéréh ne mano, “Jesusay ségétewe bé de séfu Datu Dabid. Brab Beeney fénwaléy i Tuluse Mémukas békéréh ne. <sup>24</sup> Amun énda séna féngganay Jesusay galbék ne, i Juan Bautistawe, nureténe dob kéluhanay de étew do Judio békéréh ne. <sup>25</sup> Atin amun gédétén gilid i galbék Juane, bénréhén dob de étew mano, ‘Békén katabawan i kékarang gome begén. Non békénu Kristo sani ongot-ongoté kome. Endob gérumah gétundug begén. Atin gérotor na begén brab fiyon foy ikét i safatos ne, énda médaite de mukoh.’ ”

<sup>26</sup> Atin féntaus Pablowej kékéréh ne mano, “Do dumo gu do séfu Abraham, brab de begom do békén Judio do méngintulus so, betom i fén-uwitoy Tuluse békéréh ne. <sup>27</sup> I de étew dob Jerusalem brab de odoro ro énda énggétiga ro de ké Jesusay Mémukase. Brab énda énggésobuto roy ménsulate kékéréh i de sénarigoy Tuluse muret békéréh ne. <sup>28</sup> Atin fiyon fo ké loo békéréh ne, ténuma ro soy ménsulate békéréh ne. <sup>29</sup> Amun énggétumana ron i kéluhanay Ménsulate Kékéréh i Tuluse fantag békéréh ne. <sup>30</sup> Endob ténébule i Tulusey Jesusay. <sup>31</sup> Atin dob ménfiroye gétérésangan, médo gule méntefégitoy Jesusay dob de étew ménodor de amun ménagéw mangéy Jerusalem tidéw Galilea békéréh ne. Atin béléewe ni, beroy ménurete dob de Judio. <sup>32-33</sup> Brab ay ni gey inok ureté key dob begomey ni Fiyo Uret, sani Urete fantag békéréh ne. <sup>34</sup> Atin bénréhén so dob Tuluse mano, ‘Enda fédayaé moy lowoh i fiyowe sugu-sugué mo mérénah.’ ”

<sup>34</sup> Atin féntaus Pablowej kékéréh ne mano, “Ay niy bénréh i Tuluse fantag békéréh ne. <sup>35</sup> Atin bénréhén so dob Tuluse mano, ‘Enda fédayaé moy lowoh i fiyowe sugu-sugué mo mérénah.’ ”

<sup>36</sup> Atin féntaus Pablowe man i kékéréh ne mano, “I ni sulat békén fantag békéréh ne. <sup>37</sup> Endob ténébule i Tulusey Jesusay,

énda ménrénah i lowoh ne. <sup>38</sup> Mélaw do dumo gu, fatut gétiga kom i sabaf bé Jesuse saén i géureto keye begom, wén i kéfésagadén bé de sala gom. <sup>39</sup> Atin i kéluhanay de méginugut dob Beene émfésagad i de sala ro. Enda émfésagad gom sabaf bé kéodoro kome bé de kitab sénulat Moisese. <sup>40</sup> Mélaw, ingat gom inok énda mérigo dob begomey bénréh i de sénarigoy Tuluse maro, <sup>41</sup> ‘Téngténg gom, begom i de démiyangka bé Tuluse. Mégaif gom bé rigoné kuwe bé bénii brab méléhu gom non énda méngginugut gom de, fiyon fo ké wén i témenoro de begom.’ ” Been i niy bénréh Pablowe.

<sup>42</sup> Tidew béno, ménsutén i Pablowe brab Bernabewe tidew dob lawie ni féngadafan. Atin bé lala ruwe mésut, rénafit i de étew man bero séfule bé gétunduge gai kétérén inok ureto ro man bero ségule fantag bé de ni. <sup>43</sup> Amun ménsutén i kéluhanane, médooy de Judio brab do békén Judio do ménggéodor bé kéféngintulus i de Judio, ménodor ro bé ro Pablowe brab Bernabewe. Atin i de ni apostol, nureto ro bero bé fétausé roy kétayakuf ruwe bé kégédaw i Tuluse bero.

<sup>44</sup> Amun dob gétunduge man gai kétérén, gédét kéluhanay de étew dob no ingéd ménangéy ro dob lawie féngadafan inok mégélingo ro man bé kékérén Kadnane. <sup>45</sup> Atin toow fo ménaléw i de Judio amun énggito roy de médooy do étew. Mélaw ménbérén ro sébanil bé de béréhé Pablo, brab fénéngiras ro. <sup>46</sup> Endob toow na fo ménfébaraw émbérén i ro Pablowe brab Bernabewe maro, “Fatut ureté key i kékérén i Tuluse dob begome do Judio sungu. Endob amun ménika gom de, fénggito gom énda médaït gom gégédot bé umule magufusa. Mélaw tagaké key begom brab mangéy gey muret dob de békén Judio. <sup>47</sup> Non been i niy sugue niray i Kadnane begey mano, ‘Féuwit gu begom maak do solo dob de étew békén Judio, inok i kéluhanay étewe dob duniiae ni gélingoo roy kékret gome brab méfukas ro.’ ”

<sup>48</sup> I de étew békén Judio, amun énggélingoo roy ni kékret Pablowe brab Bernabewe, toow ro fo ménoror brab dénayéw roy kékérén Kadnane. Atin i de étew fénemili i Tuluse gégédot bé umule magufusa, ménunur ro bé Kristowe.

<sup>49</sup> Atin i kékérén Kadnane ménلالag dob kéluhanay de gonon dob no ingéd. <sup>50</sup> Endob i de Judio rénimbur roy de odoron do lagéy dob no ingéd brab de gérotor libun do békén Judio do méngintulus. Atin féngganaya roy kéferasay ruwe bé ro Pablowe brab Bernabewe brab fénfraréy ro bero dob no ingéd. <sup>51</sup> Mélaw i de apostol ni, téntagtag roy de bubuk sébuwan dob de sékéy ro inok fefégtiga ro bé de étew bé kukuméy Tuluse bero. Atin méntaus ro mangéy Ikonium. <sup>52</sup> Atin i de munur dob Antiokia dob sakuf i ingéde Pisidia, toow ro fo ménoror brab fénemanduoy Rémogor i Tuluse bero.

## 14

### Dob Ikonium

<sup>1</sup> Atin loo so bé ménrigowe dob Antiokia, i ménrigowe dob Ikonium. I Pablowe bero Bernabewe ménahur ro so dob lawie féngadafay de Judio. Atin toow fo fiyoy kétoro ruwe, mélaw médooy de Judio brab do békén Judio ménunur bé Kristowe. <sup>2</sup> Endob wén i de Judio do énda méginugut ro brab rénimbur roy de étew békén do Judio inok waléy ro mémérit bé de munur. <sup>3</sup> Endob i ro Pablowe brab Bernabewe, ménrugay ro na ménbati diyo. Brab ménfébaraw ro muret fantag bé Kadnane. Atin niray Kadnane bero barakat inok gérito ro do mémégaif. Mélaw énggétigay de étew ni, toow i kékret ruwe fantag bé kégédaw i Tuluse. <sup>4</sup> Endob énda géséfagayun i de étew dob no ingéd. I de dumo bé de étew ménagayun ro dob de Judio. Atin i de dumo bero ménagayun ro dob de apostol.

<sup>5</sup> Tidew béno, i dumo bé de Judio brab de dumo bé de étew do békén Judio, beroy de odoro ro, bénantak ro bé dusné ro brab ibéro ro batéw i de apostol inok méléhu ro.

<sup>6</sup> Endob amun énggélingoo de apostol i ni bantak ro, ménraréy ro mangéy Listra brab Derbe, brab dob de ségiyo gonon dob sakuf i ingéde Lisonia. <sup>7</sup> Atin diyo nuret roy Fiyowe Uret.

### Dob Listra

<sup>8</sup> Atin diyo dob Listra, wén i ségétéwe lagéy fikat non ménsadil i de sékéyén brab énda géagéwén tidéw fanay kéumahén. <sup>9</sup> Ménsar brab fénggélingoén i kétoro Pablowe ni. Atin énggito Pablowej kéunur ne funa no fakay waléy adi-adi. Mélaw ténéngténg Pablowe fo toow. <sup>10</sup> Atin féntanugén i kékérén ne mano, “Fééntang go tindég.” Sonom béno, ménagayas tésongkow témindég i ni lagéy brab ménadi-adi, brab ménagéw-agéw. <sup>11</sup> Amun énggitoy de étew i rénigo Pablowe ni, ménkes ro dob karowe késébérén dob no ingéd Lisonia maro, “Ménlus i de tulus méntéfuwaléy ro do kéilawan mangéy dob betome!” <sup>12</sup> Mélaw féndawét ro Seus i Bernabewe brab féndawét ro Hermes i Pablowe non beeney murete. Non Seus brab Hermes i ruwowe bé de tulus kun féngadaféy de étew ni. <sup>13</sup> Atin i lawie féngadafa ro bé tulus ruwe féndawét Seus, diyo dob liyuy bengaway ingéd ruwe. Atin amun énggélingooy béliya ruwey ni rénigo Pablowe brab Bernabewe, nuwito no do safi brab do flores inok témulak beroy de étew dob adafay de apostol.

<sup>14</sup> Amun énggétiga ro Bernabewe brab Pablowej ni rénigo ro, sénkusi roy de kégal ro inok fégito roy kéika ruwe bé ni rigoné ro. Brab léménéntu ro mangéy dob kérara i de étew ni ménribuk brab ménkes ro maro, <sup>15</sup> “Kagom rigonén i nan! Do kéilawan gey so loo bé begoma nan. Ménangéy gey dini inok ureté key i Fiyowe Uret fantag bé Jesuse inok ikaa komén i de ni do adat énda i do lantékén. Méuyot gey de ké féngadafé kom i tintuwe Tulus sani réménigowe bé lawaye, fantad, dogot, brab kéluhanay éntingayéne. <sup>16</sup> Bé de énggétah do gai, féndaya i Tuluse rigonéy de étew i kéluhanay karowe kétayan. <sup>17</sup> Endob tidéw féganay, sénga tékélid fénggétiga noy fantage bé Beene dob de kégédaw rénigo no. Iraya no begom rana tidéw dob lawayo inok méruck i de nohok gom ké gai ro. Iraya no begom amaé kom atin féfiyoné noy de fédew gom.” <sup>18</sup> Endob fiyon fo ké loo bé nan i kékérén ne, ménkérégénan i Pablowe brab Bernabewe gémélé bero bé kétulaka ruwe bero.

<sup>19</sup> Endob wén i do Judio énggégumah dob no ingéd do tidéw Antiokia sakuf i ingéde Pisidia brab do tidéw Ikonium. Atin bénaleng roy fédew i de étew ni inok sébanil ro bé Pablowe. Mélaw nibéro ro batéw i Pablowe ni inok méléhu ro damén. Tidéw béno, génuyud ro mésut i Pablowe tidéw dob ni ingéd, atin ténagak ro non marok ménléhuén. <sup>20</sup> Endob amun énggégumah i de dumo no munur bé Kristowe atin sénliwéto ro, téminindég i Pablowe brab ménahur man dob no ingéd. Atin bé démoe de ménagéw i ro Pablowe brab Bernabewe mangéy Derbe.

### I késéfule ruwe mangéy Antiokia

<sup>21</sup> Amun énggumah ro dob Derbe, nuret Pablowe brab Bernabewey Fiyowe Uret atin médooy ménunure bé Kristowe. Tidéw béno, ménfule ro mangéy Listra brab Ikonium brab Antiokia dob sakuf i ingéde Pisidia. <sup>22</sup> Brab fénbagér roy fédew i de munur diyo brab bénrého ro bero bé fétausé roy kéodor ruwe brab késarig ruwe bé Jesuse. Brab ménbérén ro maro, “Kamarasayan tom na médooy gule sungu atin géahur tom dob kégéulgéw i Tuluse.” <sup>23</sup> Atin dob séngae do ménlimud do munur, i de apostol, ménémili ro do étew inok waléy ro odoroy de munur. Atin démasal ro brab fuwasa ro atin sarigé ro bero dob Kadnane, sani unuro ruwe.

<sup>24</sup> Atin ménagéw ro témará béré ingéde Pisidia atin énggumah ro dob Pamfilia. <sup>25</sup> Nuret roy Fiyowe Uret dob ingéde Perga. Tidéw béno léménudug ro mangéy Atalia. <sup>26</sup> Tidéw Atalia, ménada ro barko séfule mangéy Antiokia, dob sakuf i ingéde Siria sani ingéde gonoy de dumo ro munur séménarig bero dob Tuluse inok tabanga no bero bé galbék ruwe mantu séna fénggilid ro.

<sup>27</sup> Amun énggumah ro dob Antiokia, lénimud roy de munur bé Kristowe atin nuret roy kéluhanay de rénigoy Tuluse béré kéagéw ruwe brab fantag bé kékérén i Tuluse béré agéwone inok i de étew békén do Judio géunur ro béré Kristowe. <sup>28</sup> Atin ménrugay ro ménbati diyo beroy de dumo ro munur béré Kristowe.

<sup>1</sup> Bé beno, wén i de étew ménangéy Antiokia tidéw Judea brab ténero roy de munur bé Kristowe maro, “Taman énda fétuli gom loo bé ménbéréhe dob kitabe sénulat Moisese, énda méfukas gom dob de sala gom.” <sup>2</sup> Endob i Pablwe brab Bernabewe ménika ro bé kétero ruwe ni brab toow ro fo ménkérít brab ménasdél ro bé de ni do étew. Atin ménagayun ro kéluhanan bé i ro Pablwe brab Bernabewe brab de dumo do munur dob Antiokia, mangéy ro dob de apostol brab dob de odoroy de munur dob Jerusalem inok fénginsaé roy fantage bé ni.

<sup>3</sup> Atin i de étew do munur dob Antiokia sénugu ro bero mangéy Jerusalem. Atin bé kéagéw ruwe, énggétara ro dob de ingéd féndawé Fenisia brab Samaria. Atin diyo nuret roy fantage bé de étew do békén Judio ménwaléy do munur. Mélaw i de munur dob do no ingéd toow ro fo ménoror amun énggelingoo roy de ni. <sup>4</sup> Amun énggégumah ro dob Jerusalem, i de munur brab de apostol brab do odoron, ténayakuf ro bero. Atin i Pablwe brab Bernabewe nuret roy kéluhanay rénigoy Tuluse dob berowe. <sup>5</sup> Endob i de dumo bé de Fariseo do ménwaléy munur bé Kristowe, téménindég ro brab ménbéréh ro maro, “Fatut tulién i de étew do békén Judio do ménwaléy munur bé Kristowe brab fatut suguéen ro bé odoro roy kéluhanay de kukuman sénulat Moisese.”

<sup>6</sup> Atin ménslimud i de apostol brab do odoron inok sétiawané roy fantage bé ni. <sup>7</sup> Amun ménrugay ron ménsebérh-bérh, téménindég i Pedrowe brab ménbérh mano, “Do dumo gu, énggétiga kom i ni: Bé i kéluhana tome dini, fénemili i Tuluse begén bé do gétah inok ureté kuy Fiyowe Uret dob de békén Judio inok munur ro so. <sup>8</sup> I Tuluse gétiga noy fédew i kéluhanay étewe. Atin fenténgtengén i kétayakuf ne bé de békén Judio bé kéiray ne bé Rémodor ne dob berowe ségiléw so bé kéiray ne de dob betome. <sup>9</sup> Enda fénsebida no betom bé berowe non léninisén soy de fédew ro non ménunur ro bé Kristowe. <sup>10</sup> Aw méuyot gom rémigo bé kéikaay Tuluse funa no kémukum begom? Aw féodoro kom beroy de sugu tidéw dob kitab Moisese fiyon foy de katufua tom brab betome énda énggéodoro tom de? <sup>11</sup> Békén i nan! Munur tom bé méfukas tom sabaf bé kégédaw i Kadnane Jesus, betom ségiléw so bé berowe.”

<sup>12</sup> Tidéw beno, ménantés ro kéluhanan amun énggelingoo roy bénréh ro Bernabewe brab Pablwe fantag bé de mékégaif fénrigoy Tuluse bero amun diyo ro dob de étew békén Judio. <sup>13</sup> Amun énggilid ron émbéréh, ménbérh i Santiagowe mano, “Do dumo gu, fégélingo gom! <sup>14</sup> I Simon Pedrowe, mantu séna nureté dob betomey sunguwe kégédaw i Tuluse dob de békén Judio amun fénemilién i de dumo bero ménwaléy so do kaan étew munur bé Beene. <sup>15</sup> Ségiléw so bé niy bénréh i de méntelata do sénarigoy Tuluse muret bé kérhéne. Non sénulat ro mano, <sup>16</sup> ‘Ménbérh i Kadnane mano, séfuleu moso dob de séfu Datu Dabid. Brab fétindégé ku man bero non ségiléw ro bé sébaane lawi ménrundas. <sup>17</sup> Rigoné kuy ni inok i kéluhanay de étew munur ro dob Begéne, loo soy de étew békén Judio do fénemili gu waléy kagén do étew. <sup>18</sup> Been i niy bénréh i Kadnane, sani ménfégétigane bé de ni tidéw féganay.’”

<sup>19</sup> Atin fentaus Santiagowey kérhéne ne mano, “I kagéne de karang, énda damén férégéno tom i de étew békén Judio énggésénule ron brab munur ro bé Tuluse. <sup>20</sup> Yamula, sulata tom bero, bé békén ro sa mama bé amaéne ménwaléyén mékérésik dob adafay Tuluse non ténulak dob de kéninontow, brab békén ro bigaén, brab békén amaé roy de binatang énda ménsumbalién, brab békén ro mama dara. <sup>21</sup> Fatut rigoné roy ni inok énda mékérít i de Judio non ménrugayén i de kitab sénulat Moisese, ménbasanén dob kéluhanay de lawi féngadafay de Judio sénga gai kétérén, atin ménureté dob kéluhanay de ingéd.”

### *I sulate mangéy dob de munur do békén Judio*

<sup>22</sup> Tidéw beno, i de apostol brab de odoron brab kéluhanay de munur bé Kristowe, ménagayun ro ménemili bé de dumo bero. Atin fenuwit ro bero mangéy Antiokia ménodor ro bé Pablwe brab Bernabewe. Brab fénemili roy Judase (féndawé so Barsabas) brab Silase sani de ruwo gétew toow fo basanay de munur. <sup>23</sup> Atin fenuwit ro beroy sulate ni émbéréh mano, “I de begey do apostol brab do odoron, sani de dumo gom

munur bé Kristowe dob Jerusalem, ségifaé key begom do dumo gey munur bé Kristowe do békén Judio bati dob Antiokia, dob Siria, brab dob Silisia. <sup>24</sup> Enggélingoo key wén i do dumo gey ménangéy dob begome brab fénbuku roy de fédéw gom bé de kébérél ro. Endob énda sénugu gey bero rémigo bé de ni. <sup>25</sup> Mélaw méniséfagayun gey ménémili do lagéy inok sugué key bero mangéy dob begome. Modor ro bé Pablwe brab Bernabewe sani de kégédawa key do dumo tom. <sup>26</sup> Beroy de étew niray roy férénawa ruwe dob galbék i Kadna tome Jesu Kristo. <sup>27</sup> Mélaw sugué key i ro Judase brab Silase inok ureté ro dob begomey ségiléwe bé ni sénulat gey. <sup>28</sup> I Rémogor i Tuluse fénggésobutén begey brab ménagayun gey bé éndaén férégénon gom saliyu bé de ni do sugu: <sup>29</sup> Kagom mama bé étingayéne ténułak dob de kéninontow, brab kagom mama dara, brab kagom mama bé de binatang énda ménsumbalién, brab kagom bigaén. Fiyo ké odoro kom i de ni. Been say niy béréhé keye begom. Salamat.”

<sup>30</sup> Tidéw béno, ménagéw i de sénugu ro ni mangéy Antioquia. Amun énggégumah ro diyo, ténawag roy kéluhanay de munur bé Kristowe brab niray roy ni sulat. <sup>31</sup> I de étew diyo amun énggébasana roy ni sulat, toow ro fo ménoror bé de ni kébérél funay de fédéw ro ménfiyo. <sup>32</sup> Atin i ro Judase brab Silase (beroy de sénarigoy Tuluse muret bé kébérél ne), ménrugay i kéureto ruwe bé de étew inok waléy fiyoy de fédéw ro brab inok waléy méégét i kéunur ruwe bé Kristowe. <sup>33</sup> Atin ménbati ro diyo bé ménfiroye géfadiyan. Tidéw béno, fénséfule i de dumo ro munur bero mangéy Jerusalem dob de étew séménugu bero. Atin ménbérél ro mano, “Fiyo damén i kéagéw gome.” <sup>34</sup> Endob i Silase ménbati dob Antioquia.

<sup>35</sup> I Pablwe brab Bernabewe ménbati ro dob Antioquia bé ménfiroye gétérésang kélungonon. I berowe brab de médo do dumo ro munur bé Kristowe, nuret ro brab ténero roy kébérél i Kadnane dob de étew.

### *I késésuway Pablwe brab Bernabewe*

<sup>36</sup> Enda ménrugayén tidéw béno, i Pablwe bénréhén dob Bernabewe mano, “Séfule to mangéy dob de ingéd nureto to bé kébérél i Kadnane inok angéyé to tukawén i de dumo tom munur bé Kristowe brab inok gétiga to ké ati falas ruwe diyo.” <sup>37</sup> Atin i Bernabewe méuyot de ké uwitén i Juane Markose. <sup>38</sup> Endob i Pablwe ménika muwit bé Juan Markose non téragakén bero dob Pamfilia brab énda ménfédaydayén modor bero dob galbék i Tuluse. <sup>39</sup> Mélaw i Pablwe brab Bernabewe toow ro fo énggésédél fantag bé Juan Markose. Tidéw béno ménsésuway ro. Nuwit Bernabewey Juan Markose ménda bé barkowe mangéy Siprus. <sup>40</sup> Atin i Pablwe fénémilién i Silase modor de. Atin i de dumo ro do munur déménasal ro dob Kadnane inok Been i manangguwit bero bé kéagéw ruwe brab mégédaw bero. <sup>41</sup> Atin ménagéw ro mangéy Siria brab Silisia, brab fénbagér roy kéunur i de dumo ro munur bé Kristowe dob de ni do ingéd.

## 16

### *Ménodor i Timoteowe*

<sup>1</sup> Atin i Pablwe ménangéy dob de ingéd féndawét Derbe brab Listra. Diyo wén i ségetéwe lagéy munur bé Kristowe féndawét Timoteo. I idéng ne ségetéw libun Judio, munur bé Kristowe. Endob i boh ne békén Judio, i beene ségetéw lagéy Griego. <sup>2</sup> Atin i kéluhanay de munur bé Kristowe dob Listra brab Ikonium bénréh roy fiyoye fantag bé Timoteowe. <sup>3</sup> Atin i Pablwe ni ménuyot muwit bé Timoteowe ni modor bero. Mélaw ténułien loo bé adat i de Judio. Réngi noy ni inok énda siyawéy de Judio de, non i kéluhanay de Judio dob de ingéd ayo ro, gétiga roy békén Judio boh ne. <sup>4</sup> Atin ménagéw ro man. Amun ménawét ro dob de ingéd, nuret ro dob de munur bé Kristowey de sugu sénfagayunoy de apostol brab do odoron bé késélimud ruwe dob Jerusalem. Atin bénréh ro bero bé odoro roy de ni do sugu. <sup>5</sup> Mélaw i de ménlimud do munur bé Kristowe ménwaléy émbagér i kéfeginugut ruwe brab méninut ro médo sénga fuweh.

### *Dob Troas*

<sup>6</sup> Ménagéw ro témara bé de sakuf i de gonon féndawét Frigia brab Galasia, non i Rémogor i Tuluse énda ténungkasén bero muret dob Asia. <sup>7</sup> Amun énggumah ro dob gonone féndawét Misia, téménlama ro mangéy Bitinia. Endob i Rémogor Jesuse énda ténungkasén bero mangéy diyo. <sup>8</sup> Mélaw léménudug ro mangéy dob ingéde Troas dob fédoror i dogote, témara bé gonone Misia. <sup>9</sup> Amun bé kélungonone de wén i énggétéginefo Pablwe, non wén i fénggitoy Tuluse de. Atin énggito noy ségétéwe lagéy tidéw Masedonia téménindég brab nongotén dob Pablwe mano, “Ay go dini dob Masedoniawe ni brab tabangén gey.” <sup>10</sup> Amun énggilid i ni téginéf, ménagékés gey mangéy Masedonia, non gétiga key ténavag i Tuluse begey dob Masedonia inok toroé key diyo i Fiyowe Uret.

#### *Dob Filipos*

<sup>11</sup> Dob Troas, ménda gey barko fééntang mangéy dob bungéde Samotrasia. Atin bé gétunduge de fuweh, méntaus gey mangéy Neapolis. <sup>12</sup> Atin tidéw man Neapolis, ménagéw gey dob ingéde féndawét Filipos. Been i niy mélagae dakél ingéd dob sakuf i Masedoniawe. Brab médooy de étew tidéw Roma bati diyo. Atin ménbati gey diyo bé ménfiroye gétérésangan. <sup>13</sup> Bé gaiy kétéréne, ménsut gey tidéw dob ingéde ni brab ménangéy gey dob fédoror i dakéle wayég, non makey ké diyo i gonoy de Judio démasal. Amun énggumah gey diyo, ménsar gey brab ménsebéréh-béréh gey i de libun ménlimud diyo. <sup>14</sup> I ségétéwe bé de ni do libun, i dawét ne Lidia, tidéw dob ingéde féndawét Tiatira. I galbék ne émfébéléy bé de balilaga furo safut. Tintu fo méngintulus i ni libun. Atin fentayakuf i Kadnaney fédéw ne atin ménunur bé de kétoro Pablo. <sup>15</sup> Mélaw ménfébautis i ni libun brab de dumo no sétifon. Tidéw béo bénréhén begey mano, “Amuk gékaranga kom tintuwu fo munur bé Kadnane, ay gom dob lawi guwe atin diyo gom bati.” Mélaw fénodorén begey.

#### *I Pablwe dob férisunone*

<sup>16</sup> Wén i no sébaan fuweh, bé lala geye magéw mangéy dob gonone démasal, wén i ségétéwe rifén kénogon énggébalaka no begey. Rénahukoy saitane, komon gébérého noy ati mérigowe moso dob de gérumah do gai. Atin dakél i gédotéy de gefe de kurta bé ni galbékén béréhé noy ati mérigowe moso dob de étew. <sup>17</sup> Atin ménfuray begey ro Pablwe brab ménkes mano, “I de ni do étew, beroy sugu-suguéy toowe fo gérotor Tulus. Ureté ro dob begomey atiy géfukase begom.” <sup>18</sup> Beeniy rénigo nuwe bé ménfiroye gétérésangan taman ménrarék i Pablwe. Mélaw sénaréwén téneungténgén i ni kénogon brab ménbéréh dob saitane mano, “Dob barakat Jesu Kristowe, sugué ku beem tékédan dob ni kénogon!” Sonom béo, méntékédan i saitane dob beene. <sup>19</sup> Endob i de gefe bé ni rifén, amun énggito ro éndaén gégedot ro de kurta, ménkérít ro fo toow. Atin kénéfo roy ro Pablwe brab Silase, atin génuyud ro bero mangéy dob de gémamak kukuman dob fadiyane. <sup>20</sup> Atin nuwit ro bero mangéy dob adafay de odoron tidéw Roma, brab bénréh ro maro, “I de ni do étew, do Judio. Rimburé roy katome ni ingéd. <sup>21</sup> Toroé roy adate sébanil bé de kukuma tom. Do Romano tom, brab énda fakayén odoro tom i nan adat toroé ro.” <sup>22</sup> Atin médooy de étew ménamung lémubag bé ro Pablwe brab Silase.

Atin i de odoron fénkéda roy de kégal ro Pablo brab Silas brab fénbadas ro bero. <sup>23</sup> Amun énggilid ro bénadas fo toow i ro Pablwe brab Silase, fénrisu ro bero, atin bénréh ro dob mantaye bé férisunone bé toow fo bantaya no bero. <sup>24</sup> Mélaw fénahurén bero dob sibéye dob kérara i férisunone brab fénatungén i de sékéy ro dob toowe fo émbégat do dakél kayéw inok énda géagéw ro.

<sup>25</sup> Amun kérara kélungononén, i ro Pablwe brab Silase déménasal ro brab kéménanta ro dob Tuluse. Atin fénggélingo i de dumo ro férisu. <sup>26</sup> Atin méntékow léménuba toow fo émbagér, atin i férisunone ni ménkuyung fo toow. Brab sonom so béo, ménungka i kéluhanay de fintu. Atin ménukoh i de sangkali fénggéikét bé de sékéy i de férisu. <sup>27</sup> Atin ménulég i mantaye bé de férisu. Amun énggito no ménungka i kéluhanay de fintu, manok énggésut i kéluhanay de férisu. Mélaw nawitén i sundang ne dob ruma

ne brab fétotoyén damén, non gétiga no féléhuéy de odoron amuk énggésut i de férisu. <sup>28</sup> Amun gédétén damén fétotoy, ténawag Pablwe mékes mano, “Kago fétotoy, ay ni gey so kéluhanan!”

<sup>29</sup> Atin i mantaye ni bé de férisu, téménawag ménongot solo brab ménségéta mahur dob férisunone ni. Toow fo léménukub bé kégilak ne, brab méntéléngkéb dob adafay de sékéy ro Pablo brab Silas. <sup>30</sup> Tidew béno, nuwitén bero mésut brab fénénginsaa no bero mano, “Ati fatute rigoné ku inok méfukasu dob de sala gu?”

<sup>31</sup> Atin séménumbul ro maro, “Unur go bé Kadnane Jesus atin méfukas go. Beeme brab de samungém so.” <sup>32</sup> Atin nuret roy kékérén i Kadnane dob beene brab dob kéluhanay de dumo no sétifon. <sup>33</sup> Atin bé béno so kélunganon, i mantaye ni nurahén i de fali ro. Atin tidew béno, ménagayas ménfélautis beroy de samungén. <sup>34</sup> Atin fénlowotén i ro Pablwe brab Silase dob lawi ne brab fénamaén bero. Atin i ni ségékuréng toow fo ménoror non ménunur ron bé Tuluse.

<sup>35</sup> Atin bé géfuwéne de, i de odoron bé no ingéd, sénugu roy de sarigon mangéy dob férisunone inok tangéyé ro bero. <sup>36</sup> Mélaw i mantaye bé férisunone bénréhén dob Pablwe mano, “I de méguléw séménugu ro bé féesutén go brab Silase. Mélaw ésut gomén brab kagomén émbuku.”

<sup>37</sup> Endob ménbérén i Pablwe dob de sarigon mano, “Enda i funa ro begey kémukum. Gido loo bénadas ro begey dob téngaangay médoowe étew, brab fénrisu ro begey fiyon fo ké énda méntiyawan gey. Brab i begeye do Romano so! Atin béléewe bunéyé ro saén i kéféesut ruwe begey! Enda fakayén! Bérén gom dob de méguléw tidew Roma, beroy mangéye dini émféesut begey.”

<sup>38</sup> Atin i de sarigon ménséfule ro dob de méguléw tidew Roma brab nuret roy kékérén Pablwe. Atin amun énggelingoo ro Romano so wayoy ro Pablwe brab Silase, toow ro fo ménngilak. <sup>39</sup> Mélaw ménagéw ro mangéy dob férisunone brab nongot ro dob Pablwe brab Silase bé fésagadé ro bero. Tidew béno, nuwit ro bero mésut tidew dob férisunone brab nongot ro dob berowe bé tékédan ronén dob ni ingéd. <sup>40</sup> Atin i ro Pablwe brab Silase, amun ménuts ronén dob férisunone, méntaus ro mangéy dob lawi Lidiahe. Atin diyo énggito roy de dumo ro munur bé Kristowe. Brab bénréh ro beroy fiyowe inok fiyoy de fédew ro. Tidew béno méntékédan ro.

## 17

### Dob Tesalonika

<sup>1</sup> Atin amun méntaus magéw i ro Pablwe brab Silase, énggétara ro dob de ingéd fénawé Amfipolis brab Apolonia, atin énggégumah ro dob ingéde fénawé Tesalonika. Atin diyo wén i lawie féngadafan kay de Judio. <sup>2</sup> Atin i Pablwe loo bé adat ne ménahur dob lawie ni féngadafan. Méntéléw gé-Sabadoy no, sani gayi kététré ruwe, i Pablwe ménsébérén-bérén bé de étew atin i kékérén ne tidew dob Ménsulate Kékérén i Tuluse. <sup>3</sup> Fénggétiga no bero tidew dob ni ménsulat bé mérásay i Kristowe brab tébule. Ménbérén i Pablwe mano, “Béréné ku begom i toowe fantag bé Jesuse. Beeney Kristowe, sani fénémili i Tuluse méguléw.” <sup>4</sup> Atin wén i de ménunur bero brab nodoro roy ro Pablwe brab Silase. Loo soy médoowe do Griego ménintulus brab do gérator do libun.

<sup>5</sup> Endob i de Judio ménadaléw ro, mélaw lénimud roy de tete étew do énda i galbék ro tidew dob de aguwon atin rénimbur roy ingéde ni. Atin dénunsuk roy lawi i ségétéwe lagéy fénawé Jason inok sélédé roy ro Pablwe brab Silase, brab inok uwité ro bero dob adafay de médo étew. <sup>6</sup> Endob amun énda énggito ro bero, nuwit roy Jasone brab de dumo no munur bé Kristowe mangéy dob de méguléw bé ni ingéd. Atin ménkes ro maro, “Wén i de étew réménimbur bé kéluhanay de ingéd. Atin béléewe ni, ay ni ro énggégumah dob katome ni ingéd. <sup>7</sup> Atin i Jasone ni, fénbatién bero dob lawi ne. I kéluhana ruwe réménigo ro bé békéne fatut dob kitabe tidew dob Datu tome dob Roma. Non bénréh roy wén i ségiyo datu, sani fénawéte Jesus.” <sup>8</sup> Amun énggelingoo roy ni kékérén, ménrimbur i de médo do étew ménlimud brab de méguléw bé ni ingéd.

<sup>9</sup> Tidéw béno, i de méguléw fénégés roy Jasone brab de dumo no mayad loo bé adat ruwe inok métangéy ro. Tidéw béno fénsut ro bero.

#### Dob Berea

<sup>10</sup> Amun kélungononén, i de dumo ro munur bé Kristowe, fénuwit roy Pablowe brab Silase mangéy dob ingéde féndawét Berea. Amun énggégumah ro diyo, ménangéy ro dob lawie féngadafay de Judio. <sup>11</sup> Atin i de étew dob Berea, toow na fo fiyoy adat ruwe bé de étew dob Tesalonika. Toow ro fo méuyot mégélingo bé kétoro Pablowe. Atin féganadé roy Ménsulate Kébérél i Tuluse sénga fuweh inok susiné ro ké toow i kétoro Pablowe.

<sup>12</sup> Atin médo ro ménwaléy munur bé Kristowe. Loo soy de Griego, do lagéy brab do libun do gérotor dob no ingéd. <sup>13</sup> Endob i de Judio dob Tesalonika, amun énggéléingoo roy Pablowe muret bé kébérél i Tuluse dob Berea, ménangéy ro diyo brab rénimbur roy de médo étew diyo. <sup>14</sup> Mélaw i de munur bé Kristowe fénagayas ro fénuwit i Pablowe mangéy dob féderor i dogote, éndob ménbati i Silase brab Timoteowe dob Berea. <sup>15</sup> I de déménuran bé Pablowe ménodor ro de taman Atenas. Tidéw béno ménséfule ro mangéy Berea. Atin nuvit roy kébérél Pablowe dob ro Silase brab Timoteowe bé furay ro de magad.

#### Dob Atenas

<sup>16</sup> I lala Pablowe ongot-ongot bero dob Atenas, toow fo ménbuku non médo foy de kéninontow dob no ingéd. <sup>17</sup> Mélaw i Pablowe ménbérél bé de Judio brab de békén do Judio do méngintulus dob lawie féngadafan. Brab sénga fuweh ménbérél-bérél so dob fadiyane bé de étew témara. <sup>18</sup> Ménsbérél soy Pablowe bé de maistéro témore bérél kégéitung i de Griego diyo féndawét Epikureo brab Estoiko. Atin ménbérél i de dumo bero maro, “Ati bérél nan félangka-langka étew énda i gétiga-tiga no?”

Atin bang i de dumo de, “Bérél no keeyén i de tulus dob de ségiyo ingéd.” Bénréh roy ni non nuret Pablowej fantage bé Jesuse brab kétébulee. <sup>19</sup> Mélaw nuvit roy Pablowe mangéy dob adafay de ménlimud do odoron, sani féndawét ruwe Areopayo brab ménbérél ro maro, “Méuyot gey gétigan fantag bé ni mantu kétoro bérél mo. <sup>20</sup> Enda gésobuto key i de dumo bérél non toow fo ségiyo bérél kageye kégéitung. Brab méuyot gey de ké gétiga key i atag i de ni.” <sup>21</sup>(Loo bérél nuvit roy kébérél ruwe non i kéluhanay de étew dob Atenas brab de étew tidéw dob de ségiyo ingéd bati diyo, méuyot ro mégélingo brab séuret-uret bérél mantu uret sénga tékélid.)

<sup>22</sup> Mélaw témenindég i Pablowe dob téngaangay kéluhanay de odoron diyo ménlimud. Atin ménbérél mano, “Do étew dob Atenase ni, énggito gu toow gom fo mégéror méngadaf. <sup>23</sup> Non amun ménsgud-sugudu dob kagome ni ingéd brab téneqténg guy de gono kom méngadaf, énggito guy sébaane gono kom méngadaf témulak. Wén i sénulate de mano, ‘Dob ni, féngadafén i tuluse énda gélolono.’ I nan féngadafé kom fiyon fo ké énda gélolo gom de, Been i ni ureté ku begom. <sup>24</sup> I Tuluse lémenimbag bérél duniyae ni brab kéluhanay éntingayéne. Been i Kadnay lawaye brab duniyae. Atin énda batién dob de lawi rénigoy kéilawane. <sup>25</sup> Atin énda i éntingayén kailanga no géiray i étew tidéw dob de génalbéko no. Non Beeney méniraye bérél kéuyage brab férénawawe dob kéluhanay de étew brab Been soy miraye bérél kéluhanay éntingayéne kailanga tom. <sup>26</sup> Tidéw dob ségétewe étew, rénigo noy kéluhanay de séségiyo-giyo do étew brab bénragarén betom dob duniyae ni. Atin Been i ménemilie bérél de gai tom brab de gono tom bati. <sup>27</sup> Rénigo noy ni inok i de étew sélédé roy Tuluse brab dob késéléd ruwe de, gito ro so keeyén. Endob i toowe, énda mérayu i Tuluse dob betome do étew. <sup>28</sup> ‘Non tidéw dob Beeney kéuyag tome brab férénawa tome brab kégéagéw tome.’ Loo so bérél nuvit bénréh i de dumo gom do muret binuwaya maro, ‘Betome soy de ngaén.’”

<sup>29</sup> Atin féntaus Pablowej kébérél ne mano, “Non betom i do nga i Tuluse, katom karangén de ké i falas i Tuluse loo bérél falas i de kéninontow do bélowan taloo no do filak taloo no do batéw rénigoy kéilawane. <sup>30</sup> Féndaya i Tulusey éndae kégéloy de étew de bérél do gétah, brab énda kénukumén bero. Endob béléewe ni sénuguén i kéluhanay de

étew dob kéluhanay de ingéd bé fatut ro gésénule bé de tete rigoné ro brab fatut tagaké ro.<sup>31</sup> Non fénemili i Tuluse nén i gaiwe ké kukumé non i kéluhanay de étew dob duniyae ni bé toowe fo métintu. Atin i fékukumé nuwe Been i fénemili ne. Atin fénggélolo noy ni dob kéluhanay de étew bé kéfétébule ne de tidew bé kéléhu ne.”

<sup>32</sup> I de dumō bé de étew diyo, amun énggelingoo roy kékérél Pablōe fantag bé kétēbulee, déniyangka roy Pablōe. Endob i de dumō de ménbérél ro maro, “Méuyot gey man mégélingo beem muret féruman fantag bé de ni.”<sup>33</sup> Mélaw méntékedan i Pablōe tidew dob de ménlimud ni do étew.<sup>34</sup> Atin i de dumō bé de étew ni ménwaléy ro munur bé Jesuse brab nodoro roy Pablōe. Ségétew beroy lagéye féndawét Dionisio, ségétew kéfédewan diyo. Brab ségétew so libun féndawét Damares brab wén soy do ségiyo do étew do ménunur.

## 18

### Dob Korinto

<sup>1</sup> Amun énggilid i ni, méntékedan i Pablōe dob Atenas brab ménangéy dob ingéde féndawét Korinto. <sup>2</sup> Diyo énggabalaka noy ségétewé Judio féndawét Akila tidew Ponto. Mantu séna énggumah tidew Italia beroy bawag ne féndawét Prisila, non i datue féndawét Klaudio, féntékeda noy kéluhanay de Judio diyo dob Roma. Atin nangéy Pablōe bero lénangu. <sup>3</sup> Atin ménbati diyo non ségiléw i galbék ruwe Akilawe rémigo tulda. Brab téanabanga no bero gémalbék. <sup>4</sup> Sénga gai kétérén, ménangéy i Pablōe dob lawie féngadafay de Judio, atin ménsebérél bé de étew diyo inok i de Judio brab de békén Judio waléy ro géunur bé Kristowe.

<sup>5</sup> Amun énggumah i ro Silase brab Timoteowe tidew Masedonia, éndaén géménalbék i Pablōe saliyu bé kéuret ne fantag bé Jesuse. Nureténe dob de Judioy Jesusey Kristowe, sani fénemili i Tuluse méguléw. <sup>6</sup> Amun ménwaléy ro sébanil bé Pablōe brab bénrého ro do tete, téntagtag Pablōwey de bubuk sébuwan dob kégal ne, brab ménbérél mano, “Békénén kagén aturan ké énda méfukas gom. Yamula do begom soy séndito kom de. Tidew béléewe ni mangéyun muret dob de békén Judio.”<sup>7</sup> Mélaw méntékedan diyo brab ménangéy bati dob lawi i ségétewé lagéye békén Judio méngintulus féndawét Titio Justo. Ménsedoror i lawi ne dob lawie féngadafay de Judio. <sup>8</sup> Atin i lagéye féndawét Krispo, beeney méguléwe bé lawie féngadafan. I ni lagéye tintu fo ménunur bé Kadnane, loo soy kéluhanay de samungén. Atin wén i de médo do ségiyo étew dob Korinto énggelingoo roy Fiyowe Uret, brab ménunur ro brab ménfábautis ro.

<sup>9</sup> Wén i no sébaan kélunganon, i Pablōe wén i énggétéginéfo no brab i Kadnane ménsebérél de mano, “Kago mégilak! Fétausém i kéuret me. Fiyon fo ké ati mérigowe, kago térenon i galbék me.<sup>10</sup> Non démoyunu modor beem. Enda gésug-sug go non médooy de kagén étew dob ni ingéd.”<sup>11</sup> Mélaw ménbati diyo bé rugay i ségébélintuwae bra ném gétérésang kélunganon téromo bé kékérél i Tuluse.

<sup>12</sup> Amun ménwaléy gobernador i lagéye féndawét Galion dob Akaya, ménselimud i de Judio brab kénéfo roy Pablōe brab nuwit ro dob adafay gobernadore ni inok kukumé no. <sup>13</sup> Atin bénréh ro maro, “I ni lagéy, féféngintulusé noy de étew bé békéne fatut dob kitab geye.”

<sup>14</sup> Amun émbérélén damén i Pablōe, ménbérél i gobernador Galione dob de Judio mano, “Amuk tete i rénigo nuwe taloo no énda nodoro noy kukumay de Romano, fakay gétingkélo ku begom do Judio brab begén i kémukum de.<sup>15</sup> Endob i de ni funa kom de sébanil, been say fantage bé de dawét brab de kékérél dob kagome kitab. Mélaw begom séden i kémukum de, non békén begén i kémukum de.”<sup>16</sup> Brab féntékeda no bero dob gonone ni kémukum. <sup>17</sup> Tidew béo, kénéfo roy lagéye méguléw bé lawie féngadafay de Judio féndawét Sostenes brab lénubag ro dob téngaangay gonone kémukum. Endob féndaya Galione saén, brab énda méntete i fédew ne de.

<sup>18</sup> Amun ménggilid i ni, ménbati nay Pablowe dob Korinto bé ménfiroye gétérésangan. Tidéw béno, ménggétaw dob de dumo no munur bé Kristowe. Amun énggumah dob Senkrea, ménfétébungow non méntumanén i fasade rénigo no. Tidéw béno, ménda barko bero ro Prisila brab Akila mangéy Siria. <sup>19</sup> Amun énggumah ro dob Efeso, ténagak Pablowej ro Akilawe brab Prisilawe atin ménangéy dob lawie féngadafay de Judio. Atin diyo ménsébéréh bé de Judio. <sup>20</sup> Atin nongot ro dob beene ké férugay na batí dob berowe. Endob énda ménagayu no. <sup>21</sup> Yamula amun mégétawén, bénréhén bero mano, “Amuk kétayay Tuluse, séfuleu so mangéy dini.” Tidéw béno, ménda barko brab méntékédan dob Efeso.

<sup>22</sup> Amun déménunggu dob Sesaria ménangéy i Pablowe Jerusalem inok angéyé no ségifaén i de munur bé Kristowe diyo. Tidéw béno, méntaus mangéy Antioquia. <sup>23</sup> Atin ménbati saén diyo bé ménfiroye géfadiyan. Tidéw béno ménagéwén man. Atin ménawét man dob de gonon dob sakuf i de ingéd féndawét Galasia brab Frigia brab fénégétén i kéunur i kéluhanay de kuyug Jesus diyo.

### *Fantag bé Apolose*

<sup>24</sup> Atin wén i ségétéwe Judio féndawét Apolos tidéw Alejandria, énggumah dob Efeso. Toow fo fiyo muret brab tintu fo gétiga noy Ménssulate Kébéréh i Tuluse. <sup>25</sup> Méntoro fo bé fantage bé Agéwoy Kadnane. Atin toow fo émbagér i kéuret ne brab kétoro ne fantag bé Jesuse. Katabuwan fo brab toow i kétoro ne, éndob i gétiga nuwe saén i kébautis Juane. <sup>26</sup> Atin méngganay fébaraw émbéréh dob lawie féngadafay de Judio diyo, atin énggelingoo ro Akilawe brab Prisilawe. Mélaw nuwit ro mangéy dob lawi ruwe brab nuret ro dob beeney kéluhanay éndae séna gétiga no fantag bé Agéwoy Tuluse. <sup>27</sup> Tidéw béno, ménuyot i Apolose mangéy Akaya. Mélaw i de dumo no munur bé Kristowe dob Efeso, ténabanga ro atin séménulat ro dob de dumo ro munur bé Kristowe dob Akaya inok tayakufé ro ké gégumah diyo. Atin amun énggégumah i Apolose diyo, toow fo dakél i kétabang ne bé de étew do ménwaléy munur bé Kristowe sabaf bé kégédaw i Tuluse. <sup>28</sup> Non tabanan i de Judio de ké séédél ro dob téngaangay de médoor étew. Non tidéw dob Ménssulate Kébéréh i Tuluse fénggélolo noy Jesuse, Beeney Kristowe.

## 19

### *I Pablowe dob Efeso*

<sup>1</sup> Amun diyo i Apolose dob Korinto, i Pablowe ménawét dob de ingéd fingé dagé taman énggumah dob Efeso. Atin diyo énggitoy de dumoy de kuyug Jesus. <sup>2</sup> Brab fénénginsaa no bero mano, “Amun munur gomén, aw énggumahén i Rémogor i Tuluse dob begome?” Séménumbul ro maro, “Enda gétiga key de ké wén i Rémogor i Tuluse.”

<sup>3</sup> Atin ménénginsa man i Pablowe mano, “Ati funa kome ménfébautis?”

Séménumbul ro maro, “Ménfébautis gey bé Juane inok fégito gey i kéunur geye bé kétoro ne.”

<sup>4</sup> Atin ménbéréh man Pablowe mano, “I kébautis Juane, been i nan i fégéolonone bé kégésénule i de étew bé de sala ro. Atin bénréh Juane dob de Judio bé fatut ro munur bé étewé gégumah gétundug de, sani Jesuse.”

<sup>5</sup> Amun énggelingoo roy ni, ménfébautis ro inok fégito roy kéunur ruwe bé Kadnane Jesus. <sup>6</sup> Atin ténégé Pablowe bero atin énggumah i Rémogor i Tuluse dob berowe. Atin énggésébéréh ro bé de ségiyo késébéréh énda gétiga ro de brab nuret roy kébéréh i Tuluse. <sup>7</sup> Gédét ro folo bra ruwo gétew diyo.

<sup>8</sup> Bé rugay i méntéléwe gétérésang kélunganon diyo, i Pablowe démoyunén mahur dob lawie féngadafay de Judio brab ménsébéréh bé de Judio diyo. Atin toow fo émbaraw muret émféunur bero bé kégéulgéw i Tuluse. <sup>9</sup> Endob i de dumo bero toow fo métégas i de uléw ro, mélaw mika ro munur. Atin ménbéréh ro na tete fantag bé Agéwoy Kadnane dob téngaangay kéluhanay de étew ménlimud. Mélaw méntékédan i Pablowe diyo brab nuwitén i kéluhanay de kuyug Jesus. Atin féntausén i kétoro ne bero dob sékuwelahane ka Tiranowe sénga fuweh. <sup>10</sup> Atin téménoro diyo bé ménruwowe gébélantuwa. Mélaw i

kéluhanay de étew bati dob Asia, do Judio brab do békén Judio, énggelingoo roy kékéréh i Kadnane.

### *I de nga Eskeba*

<sup>11</sup> Atin fénrigoy Tuluse do médoor mékégaif i Pablwe. <sup>12</sup> Fiyon i de munsala brab do tuwaliya nusar Pablwe, uwitén dob de démeruun atin waléy ro adi-adi brab i de saitan réménahuk dob de étew, ménraréy ro. <sup>13</sup> Atin wén i do Judio démoyun magéw brab do démedél saitan réménahuk dob de étew. Atin ténulama ro nusar i dawét i Kadnane Jesus fégédédél ro saitan. Ménbéréh ro dob de saitan maro, “Dob dawét Jesuse sani ureté Pablwe, sugué key beem méraréy.” <sup>14</sup> I de dumō bé de ni do lagéy réménigo bé de ni, been i de fitew gétew nga i ségetéwe gérotor fadi i de Judio féndawét Eskeba.

<sup>15</sup> Endob dénawaay saitane bero mano, “Gélolo guy Jesuse brab Pablwe, éndob ati begoma nan?”

<sup>16</sup> Tidew béno, sénayaway lagéye bero rénahukoy saitane brab énda énggégaga ro bé ni lagéy. Atin lénubagén bero. Mélaw ménraréy ro tidew dob lawi ne ménfali brab ménlékas ro. <sup>17</sup> Atin i kéluhanay de étew bati dob Efeso, do Judio brab do békén Judio énggelingoo roy fantage bé ni. Mélaw toow ro fo ménggilak. Atin ménumanan i kékantug i dawét i Kadnane Jesus. <sup>18</sup> Atin médooy soy de munur bé Kristowe ménangéy dob téngaangay de étew atin ménémayag bé de tete rigoné ro. <sup>19</sup> Atin i de dumō bero do béliyan nuwit roy de nusar ro do libro béliyan. Atin ténambak ro bero brab ténuwég ro dob téngaangay de étew. Atin bénilang ro ké firoy i laga i de ni do libro, énggégumah limo folo ngibu dob karowe kurta. <sup>20</sup> Atin loo bé niy kélalag i kékéréh i Kadnane dob de étew diyo, brab minut médooy de étew munur de.

### *I kérimbure dob Efeso*

<sup>21</sup> Amun énggilid i de ni, ménuyot magéw i Pablwe mawét dob de gonon sakuf i de ingéd féndawét Masedonia brab Gresia mangéy Jerusalem. Brab ménbéréh i Pablwe mano, “Amuk gérumahu dob Jerusalem, fatutu so mangéy Roma.” <sup>22</sup> Endob fénétah Pablwey de ruwo gétew témabangan de ro Timoteo brab Erasto mangéy Masedonia. Atin i beene ménbatni na dob Asia.

<sup>23</sup> Bé do no do gai, toow fo mégukét i de étew dob Efeso sabaf bé Agéwoy Kadnane.

<sup>24</sup> Diyo wén i ségetéwe lagéy fanday féndawét Demetrio, ménidot médooy do étewén rémigo do kéninontow do filak. Atin i de ni kéninontow rénigo ro loo bé lawie féngadafan bé libune tulus ro féndawét Diana, atin fébéléy ro brab gégedot ro de médooy kurta.

<sup>25</sup> Tidew béno, i ni fanday féndawét Demetrio ténawagén i kéluhanay de étewén rémigo do kéninontow beroy de dumō ro na géségléw galbék brab bénréhén dob berowe mano, “Gétiga kom i funa tome kawasa non bé ni galbék tom do rémigo kéninontow.” <sup>26</sup> Endob énggit gomén brab énggelingoo komén i rigoné Pablwe ni. Bénréhén dob de étew, i de tulus do rénigo tom békén kun tintu tulus. Atin médooy de étew énggféunurén. Békén saén dob ingéd tome ni Efeso, éndob loo soy kéluhanay de ingéd dob Asia. <sup>27</sup> Mélaw ménbinasa keeyén i katome ni galbék sabaf bé nan kétoro, non émbéréh tete i de étew fantag bé katome ni galbék. Brab saliyu na bé nan, tagakéy de étew moso i lawie féngadafé tom bé libune tulus Diana. Atin been i nan i funay ménbantuge tulus Diana mékédan. Beeney féngadaféy kéluhanay de étew dob ingéde Asia brab dob duniiae ni, éndob éndaén mosoén fégadata ro de.”

<sup>28</sup> I de ménlimud do étew, amun énggelingoo roy ni, toow fo ménkérit ro brab ménkes ro maro, “Toow fo ménbantuge i Dianahe sani tulus tome do tidew Efeso.” <sup>29</sup> Tidew béno, rénimbur roy ingéde. Atin kenéfo roy ruwowe gétew lagéy tidew Masedonia ménodor bé Pablwe féndawét Gayo brab Aristarko. Atin fénagayas ro nuwit mangéy dob dakéle lawi dob adafay de ménlimud do étew. <sup>30</sup> Atin i Pablwe ménuyot damén mangéy so dob adafay de ménlimud ni do étew. Endob i de dumō no munur énda fénagéw ro de. <sup>31</sup> Atin i de dumō bé de máguléw dob Asia sani de dumō Pablo, ménfúwit ro kékéréh nongot ro so bé békén mangéy i Pablwe dob adafay de étew ni ménlimud. <sup>32</sup> Atin toow fo

ménrimbur i kéluhanay de étew ni ménlimud atin kéluhana ro mékes séségiyo-giyoy bérhé ruwe, non i kédoono ruwe énda gétiga roy funa ruwe ménslimud.<sup>33</sup> I de dumero marok Alejandrowey funa ruwe ménslimud non féntindég i de Judio dob adafay de étew. Atin i Alejandrowe séniniyasa noy de étew bé békén ro selekén inok émbéréh bé mamfil so dob berowe.<sup>34</sup> Endob amun énggétiga ro Judio soy beene, ménkes ro séréngan bé ménruwowe géuras maro, “Toow fo ménbantug i Dianahe, sani tulus tome do tidéw Efeso.”

<sup>35</sup> Tidéw béno, i ségétéwe bé de méguléw bé ni ingéd, féntanékén i de étew brab ménbéréh mano, “Do dumero gu dob Efesowe ni, i kéluhanay de étew énggétiga ro dob Efesowe niy gonoy lawie féngadafan bé ménbantuge tulus Diana brab mémétefuwe batéw ménlawu tidéw dob lawayo.<sup>36</sup> Enda i gédirung de. Mélaw kagomén mémérit taloo no rémigo gom tete bé éndae métayéw funa no.<sup>37</sup> Nuwit gom diniy de étew ni fiyon fo ké énda mon ménénakaw ro dob de lawi féngadafan taloo no ménbéréh ro tete fantag bé tulus tome Diana.<sup>38</sup> Mélaw i Demetriowe beroy de dumero no fanday, amuk wén i téboé ro, fatut ro mangéy dob de kémukum bé fatute gai. Atin fakay témbo ro diyo.<sup>39</sup> Endob amuk wén nay ségiyo kétaya kom, fakay fétiyawa kom bé kéluhanay de étew sélimud begey do odoro kom.<sup>40</sup> Non fakay betom i météboe bé ni késérimbur ménrigo béléewe ni. Brab énda géséliyah tom de non énda foy funa tom mérímbur.”<sup>41</sup> Amun énggilid bénréhén i ni, fénuleén i kéluhanay de étew.

## 20

### *Dob Masedonia brab Akaya*

<sup>1</sup> Amun éndaén sérimbur ro, féntawag Pablowey kéluhanay de munur bé Kristowe inok sélimud ro. Atin fénbagérén i de fédéw ro bé kékéréh ne. Tidéw béno, ménggétawén dob berowe brab ménagéw mangéy Masedonia.<sup>2</sup> Nangeyén ténukaw i de ingéd diyo brab fénfiyo noy fédéw i de munur bé de kétoroén. Atin mémétaus magéw taman énggumah dob Akaya.<sup>3</sup> Atin ménbati diyo télén gétérésang kélunganon. Amun magéwén damén mangéy Siria, énggelingoo noy bénantak i de Judio diyo féléhué ro. Mélaw ménsefule i Pablowe témara bé Masedoniawe.<sup>4</sup> Atin wén i de lagéy de ménodor ro Sopater nga Piro tidéw Berea, ro Aristarko brab Segundo tidéw Tesalonika, Gayo tidéw Derbe, brab Timoteo, brab Tikiko brab Trofimo do tidéw Asia.<sup>5</sup> I de ni do lagéy méméah ro mangéy Troas atin nongot-nongot ro begey diyo.<sup>6</sup> Amun énggilid i kékandulione bé kékamae bé fane énda i fénggfééruk de, ménnda gey barko tidéw Filipos mangéy Troas. Ménlimo gétérésangan tidéw bé no, énggumah gey dob Troas atin diyo énggumaha key i de dumero gey. Atin ségéfadiyan gey ménbati diyo.

### *Dob Troas*

<sup>7</sup> Bé sunguwe fuweh bé no fadiyan, ménslimud gey mama bé fane émfégétédém bé kéléhu Jesuse. Atin i Pablowe ménuret toow fo mérugay énggumah kérara kélunganon, non magéw so bé démoe de.<sup>8</sup> Atin médooy de solo dob sibéye dob rotor i lawie gono key ménslimud.<sup>9</sup> I nan sibéy, been i towe fo gérotor dob lawie ni télén géandana i kégérotor ne. Wén i kénogo lagéy diyo féndawét Eutiko, ménstar dob faliluwangay gérotore ni sibéy. Endob énggfidong i ni kénogo lagéy, non toow fo métaah i uret Pablowe. Tidéw béno, ménlawu mangéy fantad tidéw dob gono nuwe ni ménstar brab ménléhu. Atin amun nangéy ro fénurut, énggitro ro ménléhuén.<sup>10</sup> Endob ménlus soy Pablowe brab fénagayasén nangéy nékéf. Brab ménbéréh mano, “Kagom émbuku, méuyag so!”<sup>11</sup> Tidéw béno, ménénik man i Pablowe brab sénkébeng-kébengén i fane atin ménama. Atin féntausén i kékureto nuwe bero taman sémbangén i téresange. Tidéw béno, ménagéw i Pablowe.<sup>12</sup> Atin nuwit i de étew mule i kénogo lagéye ni méuyag. Atin ménfiyoy de fédéw ro non ménuyag so.

### *Dob Milet*

<sup>13</sup> Tidéw béno, ménsésuway gey bé Pablowe dob Troas, atin ménda gey barko mangéy Asos. Diyo nongot-nongot gey i Pablowe loo bé késugu ne begey, non ménuyot mémantad tidéw Troas mangéy Asos. <sup>14</sup> Amun énggéségitó gey dob Asos, ménda soy Pablowe dob barkowe, atin kéluhanan key méntaus mangéy Mitilin. <sup>15</sup> Tidéw béno, ménangéy gey Kios bé démoe de. Atin bé gétunduge de fuweh énggumah gey dob Samos. Dob gétunduge de man fuweh énggumah gey dob Milet. <sup>16</sup> Atin i Pablowe ménuyot de ké témara gey saén dob Efeso inok énda méanggaén dob Asia non toow fo magayas. Méuyot de ké gérumah dob Jerusalem bé gaiy Pentekostese, amuk fakay.

### Ménggétaw i Pablowe

<sup>17</sup> Mélaw tidéw Mileto, i Pablowe ménfieuwit kébéréh mangéy Efeso brab féntawagén i de odoroy de munur bé Kristowe diyo inok balaké ro. <sup>18</sup> Amun énggumah ronén, ménbéréh i Pablowe mano, “Enggétiga kom i kébati guwe dob begome tidéw fanay kégumah gu dob sakuf i ingéde Asia. <sup>19</sup> Atin gétiga kom rénigo guy galbék i Kadnane bé béno. Atin énda téfégérotoru, yamula kéménrewu sabaf bé kégédaw guwe begom. Atin téméningkélou bé kéluhanay de mérégén énggagéwo ku bé de tete rénigoy de Judio dob begéne. <sup>20</sup> Enda i sébaan dénígur gu bé funa kome fiyo dob de kétoro gu begom dob adafay médoowe étew taloo no dob de lawi gom. <sup>21</sup> Méégét i kébéréh guwe dob de Judio loo so dob de békén Judio bé fatut ro gésénule bé de sala ro atin munur ro bé Kadnane Jesus brab rigoné roy kétayay Tuluse. <sup>22</sup> Atin béléewe ni fénémanduoy Rémogor i Tuluse begén bé mangéyu Jerusalem. Atin énda gétuwa ku de ké ati mérigowe dob begéne diyo. <sup>23</sup> Been say niy gétuwa kuwe, dob séngae ingéd nawéto ku, i Rémogor i Tuluse féningatén begén bé méférisuwu brab mérégén i géagéwo kuwe. <sup>24</sup> Endob énda gulaané kuy umul guwe brab ulan den ké méléhuu, amuk géfégiliid gu saén i galbéké niray i Kadnane Jesus begén, sani kéurete bé Fiyowe Uret fantag bé kégédaw i Tuluse.

<sup>25</sup> “Ménangeyu dob begome kéluhanan muret fantag bé kégéguléw i Tuluse bé de étewén. Atin gétuwa ku béni, éndaén géségitó tom man ségule. <sup>26</sup> Mélaw bérhéku begom béléewe ni, amuk wén i ségetéw begom énda munurén bé Jesuse, békénén atura ku. <sup>27</sup> Non nuret gun begom i kéluhanay kétayay Tuluse. <sup>28</sup> Ingat gom brab diyaga gom i de lowoh gom loo soy de munur sénarig i Rémogor i Tuluse begom inok énda mékédan i de kéunur gom. Begom i maake témalima bé de bili-bili. Atin i de munur bé Jesuse beroy de maak do bili-bili. Atin i Tulusey gefee bé de bili-bili sabaf bé kéléhu i Nga ne. <sup>29</sup> Gétuwa ku, amuk tékédanun dini, wén i do gérumah do tugién témore. Atin féteteé roy de fédéw i de munur. <sup>30</sup> Atin wén mosoy do étew so dob begome ménlimud, émbéréh bé de tugi inok géuwito roy de munur dob békéné katabawan agéwon. <sup>31</sup> Mélaw ingat gom, brab kagom lifotén i de ténero gu begom kéluhanan, fuweh na kélungonon bé méntéléwe gébélantuwa. Atin toow fo kénrewo kuy kétoro guwe begom sabaf bé kégédaw guwe begom.

<sup>32</sup> “Atin béléewe ni, sarigé ku begom dob Tuluse non tabanga no begom. Atin i kéuret guwe fantag bé kégédaw ne tabanga no so begom. Beeney émfébagére bé de kéunur gom, brab Been say miraye bé de kéfiyonon loo bé rigoné nuwe dob kéluhanay de étewén. <sup>33</sup> Enda méningaru bé éntingayéne kagom, fiyon filak, taloo no bélodon taloo no kégal. <sup>34</sup> Gétiga kom i kégalbék guwe inok gédoté kuy kéluhanay kailanga keye begey i de dumogu. <sup>35</sup> Fénggito gu begom i kéluhanay de rénigo gu bé fatut mégéror tom inok gétabanga tom i de étew mérasay. Brab katom lifotén i kébéréh i Kadnane Jesus mano, ‘Toow na fo moror i étewe miray bé étewe médot.’ ”

<sup>36</sup> Amun énggilid i Pablowe émbéréh, ménlingkuwéd ro kéluhanan brab déménasal ro. <sup>37</sup> Kéménrew ro kéluhanan brab nékéf roy Pablowe atin narék ro. Tidéw béno ménggétawén. <sup>38</sup> Ménlabi foy kétete i fédéw ruwe bé bénréh Pablowe bé éndaén kun gito ro de férumen. Tidéw béno, dénura ro mangéy dob barkowe édaa no.

## 21

*I kéagéw geye mangéy Jerusalem*

<sup>1</sup> Amun énggégfégétaw geyén dob berowe, ménda gey brab méntaus gey mifar fééntang saréw dob bungéde Kos. Amun bé démoe de énggumah gey dob bungéde Rodas. Tidéw béno méntaus gey mangéy Patara. <sup>2</sup> Diyo énggito gey i sébaane barko mangéy Fenisia, mélaw ménda gey diyo. <sup>3</sup> Ménagéw gey taman énggékulaya key i bungéde Siprus, atin témenara gey saén mangéy de fingé déligdigan atin méntaus gey mangéy Siria. Atin déménunggu gey dob ingéde Tiro non féntefad roy de médoor do uwit diyo. <sup>4</sup> Atin diyo énggito gey i de munur bé Kristowe, mélaw ménbati gey diyo ségefadiyan. Atin non fénemanduoy Rémogor i Tuluse bero, féngginau roy Pablwe bé békén taus mangéy Jerusalem. <sup>5</sup> Endob amun énggumahén i gaiwe magéw gey, méntékédan gey dob no inged. Atin i kéluhana ruwe dénura ro begey mangéy dob barkowe, bero soy de bawag ro brab de nga ro. Atin amun énggumah gey dob dénsaane, ménlingkuwéd gey kéluhanan brab déménasal gey. <sup>6</sup> Amun énggilid gey démasal, ménggétaw gey. Tidéw béno, ménda geyén man dob barkowe ni, atin ménule ro so kéluhanan.

<sup>7</sup> Atin tidéw Tiro méntaus gey magéw taman énggumah gey dob ingéde féndawét Tolemaida. Diyo énggito gey i de dumo gey munur bé Kristowe. Atin témenréni gey diyo ménsegétérésangan. <sup>8</sup> Dob gétunduge de fuweh, méntaus gey mangéy Sesaria. Amun énggumah gey diyo, ménbati gey dob lawi i ségétéwe lagéy muret bé Fiyowe Uret fantag bé Jesuse féndawét Filipi. Beeney ségétéwe bé de fitew gétew ménrugayén fénemili dob Jerusalem waléy témbang. <sup>9</sup> Atin wén i do fot gétew do ngaén falan kénogon do muret so bé kékéréh i Tuluse. <sup>10</sup> Ménfiroy gétérésang tidéw bé kégumah gey diyo, énggumah i ségétéwe lagéy tidéw Judea féndawét Agabo. Beeney sénarigoy Tuluse muret bé kékéréh ne. <sup>11</sup> Tidéw béno, ménfégédét dob begeye brab éndotén i sintoro Pablwe brab nikétén i de kaan sékéy brab de kémérén brab ménbéréh mano, “Ay niy bénréh i Rémogor i Tuluse mano, ‘I gefee bé ni sintoro ikétéy de Judio dob Jerusalem loo bé ni brab atéé ro dob de étew békén Judio.’ ”

<sup>12</sup> Amun énggelingoo key i ni, i begeye brab de dumo gey munur diyo ménfégédaw-gédaw gey bé Pablwe bé békén damén taus mangéy Jerusalem. <sup>13</sup> Endob i Pablwe sémenumbul mano, “Sedek kémérew gom? Kagom fébukuén begén! Fakayun féikét dob Jerusalem brab fakayun méléhu sabaf bé Kadnane Jesus.”

<sup>14</sup> Atin énda fo génaga gey i gémelée bé Pablwe. Mélaw témenréni gey gémelé de brab ménbéréh gey makey, “Mérigo damén i kétayay Kadnane.”

<sup>15</sup> Amun énggilid i firoye gétérésangan, témenifés gey atin méntaus gey mangéy Jerusalem. <sup>16</sup> Atin wén i do ménodor begey do munur bé Kristowe do tidéw Sesaria brab nuwit ro begey mangéy dob lawi i lagéye fébatio ro begey. Been i ségétéwe lagéy tidéw Siprus féndawét Mason. Beeney ségétéwe bé de toow fo énggétah do munur bé Kristowe.

*Ténukaw Pablwey Santiagowe*

<sup>17</sup> Atin amun énggumah gey dob Jerusalem, i de dumo gey do munur bé Kristowe ménoror ro témayakuf begey. <sup>18</sup> Atin bé gétunduge de fuweh, i begeye Pablwe nangéy gey ténukaw i Santiagowe, sani odoroy de munur dob Jerusalem. Atin diyo soy kéluhanay de odoroy de munur bé Kristowe. <sup>19</sup> Amun gilid sénggifa Pablwe bero, nureténi i kéluhanay fénrigoy Tuluse de dob de békén Judio. <sup>20</sup> Amun énggelingoo roy ni, dénayéw roy Tuluse. Atin bénréh ro dob Pablwe maro, “Gétiga mo adih, firoy ngibuy Judiowe ménunur bé Kristowe, atin toow fo nodoro roy de kukuman tidéw dob Moisese. <sup>21</sup> Enggelingoo roy fantage bé kétoro me kun dob kéluhanay de Judio bati dob de ségiyo ingéd beroy de békén Judio bé békénén odoro roy de kukuma Moises. Brab bénréhém kun éndaén tulién i de nga ro taloo no odoron i adat i de Judio. <sup>22</sup> Ati mélaw i fatute rigoné tom? Non gélingoo ro sékoy fantage bé kégumah me dini. <sup>23</sup> Mélaw rigo moy ni béréhé key beem. Wén i do fot gétew lagéy dini, réménigo ro fasad dob Tuluse loo bé adat tome do Judio. <sup>24</sup> Mélaw odor go bero brab amung go bé adat i kénélinise dob

adafay Tuluse. Atin sukaya mo bero bé ni kéfélinis. Tidéw béo, fétébungow ro loo bé adat tome do Judio. Mélaw fégito mo dob kéluhanay étewe bé odoro moy kukuma Moisese, inok gétiga ro kéluhanan bé békén toow i urete fantag bé beeme. <sup>25</sup> Endob fantag man bé de étew do békén Judio do ménwaléy munur bé Kristowe, sénulata key bero bé békén ro mama bé éntingayéne ténulak dob de kéninontow, taloo no mama dara, taloo no mama bé éntingayéne énda ménsumbalién, taloo no ké bigaén ro.” Been i niy bénréh ro Santiagowe dob Pablwe.

<sup>26</sup> Mélaw dob gétunduge de fuweh, nuwit Pablwey de fot ni gétew do lagéy brab ménfélinis ro dob adafay Tuluse loo bé adat ruwe do Judio. Tidéw béo ménahur dob lawi i Tuluse, atin fénggétiga no dob de fadi i gaiy kégélibid i kéfelinise brab kériray ruwe tulak bé de ni fot gétew lagéy.

### *I kékéföe bé Pablwe*

<sup>27</sup> Amun gédétén gilid i fitéwe gétérésangan, wén i de Judio tidéw Asia énggito roy Pablwe dob lawi i Tuluse. Atin rénimbur roy de étew ni ménlimud atin kénéfo roy Pablwe. <sup>28</sup> Ménkes ro maro, “Do dumo gey do Judio, tabangan gey! Been i niy étewe démoyun mangéy téromo dob kéluhanay de étew dob séngae ingéd bé békén odoro roy kukumane tidéw dob Moisese. Brab sébanil betom do Judio brab lawi i Tuluse. Atin saliyu na bé ni, ménuwit do békén Judio mahur dob lawi i Tuluse ni. Mélaw fénwaléyén mékérésik i mékétifuwe ni gonon.” <sup>29</sup> (Loo bé niy kékéréh ruwe non énggito roy ségétewe lagéy békén Judio fénawé Trofimo tidéw Efeso ménseodor bé Pablwe mangéy Jerusalem. Atin marok nuwit Pablwe mahur dob lawi i Tuluse ni.)

<sup>30</sup> Ménrimbur i de étew dob Jerusalem. Atin maak dunuk i étewe gégumah tidéw dob kéluhanay de gonon diyo. Kénéfo roy Pablwe brab génuyud ro mésut tidéw dob lawi i Tuluse. Tidéw béo, fénintu roy bengawane. <sup>31</sup> Amun télamané ro damén féléhuén, wén i ménangéye mélolok dob odoroy de sundalo tidéw Roma, bé mérimbur i kéluhanay étewe dob Jerusalem. <sup>32</sup> Sonom so béo, i odoroy de sundalo ni, nuwitén i de sundalo no ségéta mangéy dob gonoy de étew ni. Atin amun énggitoy de étew ni énggumah i de sundalo beroy odoro ruwe, ténréno roy kélubag ruwe bé Pablwe. <sup>33</sup> Tidéw béo, i odoroy de sundalo ni, ménfégédét dob Pablwe brab kénéfoén. Atin fénikétén bé de sundalo no bé ruwowe timan sangkali. Tidéw béo fénénginsaa no bero mano, “Ati ni étew? Ati rénigo nuwe?” <sup>34</sup> Atin ménkes i de étew ni séségiyo-giyoy késumbul ruwe. Atin i odoroy de sundalo ni énda énggésobuto noy ni ménrigo non toow ro fo selekén. Mélaw fénuwitén i Pablwe bé de sundalo no mangéy dob kutae. <sup>35</sup> Amun énggumah ron dob gédøy kutae, nénat i de sundaloy Pablwe non bé kékérít i de étew ni. <sup>36</sup> Ménfuray i de étew ni mékes maro, “Féléhu gom!”

### *I kéuret Pablwe*

<sup>37</sup> Amun gédét ron féahurén dob kuta i de sundalo ni, ménbéréh i Pablwe dob odoroy de sundalo ni mano, “Aw fakay gésébéréhu beem?”

Atin séménumbul i odoroy de sundalo ni mano, “Aw gétigan go wayo sébéréh Griego? <sup>38</sup> Makuk beemey étewe tidéw Egipto méngganay bé késétibole bé de gémamak kukuman. Atin ménanangguwit fot ngibu do méméléhu do étewén brab ménangéy ro bati dob gonone énda i do étew de bati.”

<sup>39</sup> Séménumbul i Pablwe mano, “I begéne, ségétewu Judio tidéw Tarsus dob Silisia, sani ménbantuge ingéd. Aw fakay so dob beeme ké gébéréhu dob de étew ni?”

<sup>40</sup> Atin ténungkas i odoroy de sundalo ni. Mélaw téménindég i Pablwe dob gédane brab séniniyasa noy de étew bé fétanék ro. Amun méntanék ronén, ménbéréh i Pablwe dob Hebreowe, sani késébéréh i de Judio.

ségétéwu Judio ménumah dob Tarsus dob Silisia. Endob dob Jerusaleme ni ménruku. Atin méngganadu dob toowe fo ménbantug témoiro féndawét Gamaliel. Atin toow fo téneroén begén bé de adat tom do Judio loo bé kukumay de katufua tom. Atin toow fo ménuyotu modor bé kétayay Tuluse ségiléw so bé begome ni béléewe.<sup>4</sup> Férasay gu brab fénléhu guy de étew munur bé Jesuse. Atin kénéfo guy de lagéy brab do libun brab fénrisu gu bero.<sup>5</sup> I gérotore fadi brab kéluhanay de kéfédewan, gébéréh ro toow i ni béréhé ku begom. Niraya ro begén sulat mangéy dob de dumo tom Judio dob Damasko. Atin ménangéyu diyo inok kéfoé kuy de munur bé Kristowe diyo, atin uwité ku damén dob Jerusaleme ni ikétén bé sangkalie inok kukumén ro.

<sup>6</sup> “Endob amun géutuh téresang, diyou dob agéwone gédét dob Damasko. Atin méntekow wén i réndaw tidéw dob lawayo mangéy dob begéne.<sup>7</sup> Sonom béo, ménggétélengkébu dob fantade, atin énggelingoo kuy émbéréhe mano, ‘Saulo! Sedek ferasayé mo Begén?’<sup>8</sup> Tidéw béo ménenginsau maku, ‘Ati beeme Kadnan?’ Atin séménumbul mano, ‘Bégéney Jesuse tidéw Nasaret, sani ferasayé muwe.’<sup>9</sup> Atin i de dumo gu ménodor begén, énggito roy ni réndaw éndob énda énggelingoo roy béréhé ni ménsébéréh begén.<sup>10</sup> Atin fénénginsaa ku maku, ‘Kadnan, ati fatute rigoné ku?’ Atin séménumbul i Kadnane mano, ‘Tindég go brab taus go mangéy Damasko. Atin diyo wén i étew béréhé no dob beemey kéluhanay kétayay Tuluse rigoné mo.’<sup>11</sup> Bé béo so, ménwaléyu langafén non bé réndawe ni énggito gu. Atin narak i de dumo gu begén taman énggumah gey dob Damasko.”

<sup>12</sup> Atin féntaus Pablouey kékéréh ne mano, “Atin diyo wén i ségétéwe lagéy féndawét Ananias. Toow fo méngintulus brab toow fo nodoro noy de kitab tom. Atin tintu fo fénggadata noy kéluhanay de Judio bati diyo.<sup>13</sup> Atin ménangéy dob begéne brab ménbéréh mano, ‘Saulo, dumo gu, gérito gonén!’ Sonom béo, énggégítowu man atin ténéngteng gu.<sup>14</sup> Atin ménbéréh man mano, ‘I Tuluse, fénéngadaf i de katufua tom, fénémilién beem inok gétigan i kétaya nuwe, brab inok giton i métintuwe sugu-sugué no féndawét Jesus, brab inok gélingoon i kékéréh ne.<sup>15</sup> Non waléy go muret dob kéluhanay de étew fantag bé Kristowe émbéréh bé énggito muwe brab énggelingoo muwe.<sup>16</sup> Atin béléewe, kagonén téangga-angga. Tindég go brab fábautis gon, brab dasal go dob Kadnane. Atin i de salaém mékédan.’”

<sup>17</sup> Atin féntaus Pablouey kékéréh ne mano, “Tidéw béo ménséfuleu mangéy Jerusalem. Atin amun déménasalu dob lawi i Tuluse, wén i fénggitoy Tuluse begén.<sup>18</sup> Enggito guy Kadnane brab ménbéréh dob begéne mano, ‘Fagayas go, tagakém i Jerusaleme ni, non i de étew dini énda tayakufé roy kéuret me fantag bé Begéne.’<sup>19</sup> Atin séménumbulu maku, ‘Kadnan, gétiga roy démoyune kéagéw gu mangéy kémfo brab lémubag bé de munur Beem dob de lawi féngadafa ro.<sup>20</sup> Atin amun féléhué roy Estebane sani ségétéwe muret fantag bé Beeme, diyou de so ménagayun de. Begén i ménantay bé de kégal i de ménméléhu de.’<sup>21</sup> Endob ménbéréh i Kadnane dob begéne mano, ‘Agéw go. Sugué ku beem mangéy mérayu dob de békén Judio.’”

<sup>22</sup> Atin amun bénréh Pablouey ni fantag bé de étew békén Judio, éndaén mégélingo i de étew de. Atin ménkes ro toow fo métanug maro, “Féléhu gom, énda médait méuyag i ni étew.”<sup>23</sup> Atin ménkes ro, brab sénatwér roy de bubuk sébuwan mangéy rotor bé kékérít ruwe brab kenda roy de dumo bé de kégal ro brab nafir ro dob rotoro.<sup>24</sup> Mélaw i odoroy de sundalo ni, fenuwitén i Pabloue mahur dob kutae ni, brab sénuguén i de sundalo no bé badasé ro inok gébérého noy ati rénigo nuwe, sani funay de Judio ni mékes brab mékérít.<sup>25</sup> Endob amun nikét roy Pabloue inok badasé ron damén, ménbéréh i Pabloue dob ségétéwe kafitan mano, “Aw fakay badasén i ségétéwe Romano fiyon fo ké énda séna ménkukumén ménusal?”

<sup>26</sup> Atin amun énggelingoo kafitaney ni bénréh Pabloue, ménangéy dob odoroy de sundalo brab ménbéréh mano, “Ati rigoné muwe? I ni étew ségétéw wayo Romano.”

<sup>27</sup> Mélaw i odoroy de sundalo ménangéy dob Pabloue brab ménenginsa mano, “Aw Romano go wayo?”

Séménumbul i Pablwe mano, “Hoo.”

<sup>28</sup> Atin ménbéréh i odoroy de sundalo ni mano, “I begéne, Romanowu so. Brab dakél i énggabayada kuwe inok waléyu Romano.”

Atin ménbéréh man i Pablwe mano, “Endob i begéne, ménunahu ségétew Romano.”

<sup>29</sup> Sonom béno, i de sundalo ni madasén damén bé Pablwe énggésunud ro. Atin i odoroy de sundalo ni toow fo ménggilak non fénikétén bé de sangkali i ségétewe so Romano.

### *Dob adafay de kéfédewan*

<sup>30</sup> Atin i odoroy de sundalo ni ménuyot de ké gétiga noy funay de Judio ni témbé bé Pablwe ni. Mélaw bé gétunduge de fuweh, fénkéda noy de sangkali fénggéikét ro bé Pablwe. Atin sénuguén i de odoroy de fadi brab kéluhanay de kéfédeway de Judio sélimud. Tidéw béno, nuwitén i Pablwe brab féntindégén dob adafa ruwe ménlimud.

## 23

<sup>1</sup> Atin ténéngténg Pablwey de ménlimud ni brab ménbéréh mano, “Do dumo gu Judio, toow fo fiyoy fédew guwe dob adafay Tuluse fantag bé de rénigo gu taman so béléewe ni.” <sup>2</sup> Tidéw béno, i gérotore fadi féndawét Ananias, sénuguén i de étew téménindég gédét dob Pablwe bé tamfilingé roy ba ne. <sup>3</sup> Atin ménbéréh i Pablwe mano, “I beema nan ubo-ubo go méngintulus! Tamfilingéy Tuluse so moso beem. Kukumé mo begén dob kitabe éndob rénigo moy éndae fakay dob kitabe bé kéfétamfiling me begén.”

<sup>4</sup> Tidéw béno, ménbéréh i de étew gédét dob Pablwe maro, “Sedek émbéréh go tete loo bé nan dob gérotore fadi i Tuluse?”

<sup>5</sup> Séménumbul i Pablwe mano, “Do dumo gu, énda gétuwa ku de ké beeney gérotore fadi. Amuk énggétiga ku, énda damén fémalané ku de. Non bénréh i Ménsulate Kébéréh i Tuluse mano, ‘Kago émbéréh tete fantag bé odoro kome.’”

<sup>6</sup> Atin amun énggito Pablwey de dumo do lukés Saduseo brab de dumo do Fariseo, féntanugén i kékéréh ne dob de ménlimud do odoron mano, “Do dumo gu, i begéne, ségétewu Fariseo brab i de lukés gu do Fariseo so. Mékukumu béni sabaf bé kénur guwe bé kétébule i de ménléhu.”

<sup>7</sup> Amun énggilid bénréh Pablwey ni, méngganay so séédél i de Fariseo brab de Saduseo, atin ménsebaad ro. <sup>8</sup> (Non i de Saduseo énda munur ro bé kétébulee, taloo no munur ro bé wén i do télaki taloo no do rémogor. Endob i de Fariseo munur ro bé kéluhanay de ni.) <sup>9</sup> Atin minut métanug i kékékes ruwe. Atin i de dumo bé de témoreo kitab do Fariseo, téménindég ro brab émbagér i kékéréh ruwe maro, “Enda i funa key kémukum bé ni lagéy. Wén keey i rémogor taloo no télaki tintu ménsebéréh de.”

<sup>10</sup> Atin minut toow fo méduf i késéédél ruwe ni. Atin i odoroy de sundalo ni, mágilak de ké mébinasay Pablwe ni. Mélaw sénuguén i de sundalo no mangéy dob kérara i de ménlimud étew brab nuwit roy Pablwe séfule mangéy dob kutae.

<sup>11</sup> Dob gétunduge de kélungonon, téménindég i Kadnane dob sékulo Pablwe brab ménbéréh mano, “Fébaraw go. Nuretém i fantage bé Begéne dob Jerusaleme ni. Atin fatut mangéy go so muret dob Roma.”

### *I bantak i de Judio*

<sup>12</sup> Atin bé géfuwéne de, wén i de dumo Judio ménselimud ro inok géséfagayun ro bé ati rigoné ruwe. Atin ménsefasad ro bé énda mama ro taloo no miném taman énda géféléhuo roy Pablwe ni. <sup>13</sup> Labi fot folo gétew i réménigowe bé ni. <sup>14</sup> Tidéw béno, ménangéy ro dob de odoroy de fadi brab dob de odoroy de Judio brab ménbéréh ro maro, “Séménafa gey bé énda mama gey taman énda géféléhuo key i Pablwe. <sup>15</sup> Mélaw ay niy rigoné tome. I begome brab de kéfédewan, féuwit gom kékéréh mongot dob odoroy de sundalo tidéw Roma bé uwité noy Pablwe mangéy dob begome. Atin ubo-ubo toow fo méuyot gom ménginsaan bé Pablwe. Endob i begeye bonoé key dob de agéwon.”

<sup>16</sup> Endob i lagéye nga i libu Pablwe énggelingoo noy ni bantak ro. Mélaw ménangéy dob kutae brab fénlolokén i ni dob Pablwe. <sup>17</sup> Tidéw béno i Pablwe, ténawagén i

ségétéwe bé de sundalo brab ménbérél mano, “Uwitém i ni kénogo lagéy mangey dob odoro kome. Non wén i béréhé no de.” <sup>18</sup> Atin nuwit i sundalowey ni kénogo lagéy mangey dob odoro nuwe brab ménbérél dob odoro nuwe mano, “Féntawag i férisuwe Pablo begén brab féndura no begén i ni kénogo lagéy non wén kun i béréhé no beem.”

<sup>19</sup> Tidéw béno, narak i odoroy de sundaloy ni kénogo lagéy brab ménférayu ro inok ruwo ro saén. Tidéw béno, fénénginsaa no mano, “Ati no béréhé mo begén?”

<sup>20</sup> Atin séménumbul mano, “I de odoroy de Judio ménsefagayun ro bé ongoté ro dob beemey féuwitém démo i Pablowe mangéy dob de ménlimud do kéfédewan. Ubo-ubo saén fénginsaa roy Pablowe inok méuman i gétiga ruwe fantag bé beene. <sup>21</sup> Endob kago magayun bé nan. Non wén i labi fot folo gétew do lagéy rékunéy dob de agéwon inok bonoé ro. Séménafa ro bé énda kun mama ro taloo no miném ro taman énda géféléhuo roy Pablowe ni. Ténafaya ron béeleewe ni brab ongot-ongoté ro séden i kaame kégayun.”

<sup>22</sup> Atin séménumbul i odoroy de sundalo ni mano, “Kago ureténi ni bénréhém begén dob de ségiyo.” Tidéw béno, fénuleén i ni kénogo lagéy.

#### *Sénugu i Pablowe mangéy dob Felikse*

<sup>23</sup> Tidéw béno, i odoroy de sundalo ni, téménawag ruwo gétew kafitan brab bénréhén bero mano, “Tafay gom ruwo ratuh sundalo, brab fitew folo do kuda brab do sundalo kémudaan bero, brab ruwo ratuh do sundalo muwit dilék inok magéw ro mangéy Sesaria alas siyow séko bé ni kélungonon. <sup>24</sup> Atin tafay gom soy kudae kudaa Pablowe brab uwit gom mangéy dob Gobernadore Feliks. Ingata kom fo toow inok énda gésug-sugén.”

<sup>25</sup> Tidéw béno, séménulat i odoroy de sundalo ni mano, <sup>26</sup> “Ay niy sulate tidéw dob Klaudio Lisiase mangéy dob Gobernador Felikse. Fiyo téresang. <sup>27</sup> I ni lagéy kénéfó i de Judio brab féléhué ron damén. Endob amun énggétiga ku ségétew so Romano, fénanangguwit guy de sundalo gu brab nangéy gey tétabang. <sup>28</sup> Atin tidéw béno, ménuyotu de ké gétiga kuy funa ruwe de témo. Mélaw nuwit gu mangéy dob de ménslimud do témiawan. <sup>29</sup> Atin bé béno, énggétiga ku énda i tete rénigo no, funa ro de méméléhu taloo no férisonén. Fantag saén bé de kitab roy funa ruwe de témo. <sup>30</sup> Amun énggétiga kuy bénantak i de Judio bé féléhué ro, fénagayas gu fénuit mangéy dob beeme. Atin bénréh gu dob de témo de bé mangéy dob beeme mélolok bé kéluhanay funa ruwe de témo.”

<sup>31</sup> Amun fénggilid i odoroy de sundaloy sulat ne, nodoroy de sundaloy sugu ne. Mélaw nuwit roy Pablowe mangéy Antipatris bé no kélungonon. <sup>32</sup> Bé gétunduge de fuweh ménsefule i de ménagéw saén do sundalo mangéy Jerusalem. Endob i de sundalo do kémuda, beroy déménurane bé Pablowe taus mangéy Sesaria. <sup>33</sup> Amun énggumah ro dob Sesaria, fénira-ira roy Pablowe dob gobernadore brab niray ro soy sulate. <sup>34</sup> Atin bénasay gobernadorey sulate ni. Tidéw béno, fénénginsaa noy Pablowe ké ati ingéde tidéwo no. Atin séménumbul i Pablowe mano, “Tidéwu Silisia.”

<sup>35</sup> Atin ménbérél i gobernadore mano, “Fégélingoé ku beem dob gaiwe gégumah i de témo beem.” Tidéw béno, fénbantaya noy Pablowe dob lawie fénrigo télate Datu Herode.

#### *I kétébo i de Judio bé Pablowe*

<sup>1</sup> Ménlimo gétérésangan tidéw béno, i gérotore fadi féndawét Ananias ménangéy Sesaria beroy de dumo no odoroy de Judio brab ségétéwe gétigan bé kitab i de Romano féndawét Tertulo. Ménangéy ro dob adafa Felikse, sani gobernadore, inok téboé roy Pablowe. <sup>2</sup> Atin i Felikse, amun féntawagén i Pablowe, fénbérélén i Tertulowe. Mélaw féngganaya noy témoi bé Pablowe mano, “Gobernador Feliks, toow fo fégadata key beem. Atin fiyoy kéguléw me non i gay kaame kéguléw énda sénay ménstiboh de. Atin médooy de rénigo mo fiyo inok minut waléy fiyoy ingéd tome ni. <sup>3</sup> Atin sabaf bé ni, toow fo moror gey de brab fésalamat gey kéluhanan dob beeme sénga tékélid.

<sup>4</sup> Endob inok énda kélébuwan go méangga, éndaén férugayé kuy kébéréh guwe. Mélaw fégédawan gey brab fégélingoén gey fiyon magad saén. <sup>5</sup> Enggétiga key i Pablowe ni toow fo samuk non rénimburén i de Judio dob kéluhanay de ingéd dob duniiae ni. Atin beeney odorone bé ségéklasiwe kéfengintulus féndawét Nasareno. <sup>6</sup> Atin ténlama no fénwaléy mékérésik i mékétéfuwe lawi i Tuluse, bé rénigo nuwe liyén. Mélaw kénéfo gey brab kukumé key damén dob kageye kitab. <sup>7</sup> Endob i odoroy de sundalo féndawét Lisiás nangeyén nafas dob begeye bé lala geye de ménfélubag. <sup>8</sup> Tidéw béno, bénréhén begey bé angéyé key kun téboén i ni étew dob beeme. Atin amuk fénginsaa moy ni lagéy, gétiga moy kéluhanay funa keye de témbo.” <sup>9</sup> Tidéw béno, i de Judio ménamung ro so témbo brab bénréh roy toow i de bénréh Tertulo ni.

### *I kéamfilo Pablowe bé lowoh ne*

<sup>10</sup> Tidéw béno, i gobernadore fénbérén i Pablowe. Atin ménbérén i Pablowe mano, “Gétiga ku toow gon fo ménrugay kémukum dob ni ingéd brab gétigan go odoro key do Judio. Mélaw toowu fo moror émbérén bé kéamfilo kuwe bé kagéne lowoh dob adafa muwe. <sup>11</sup> Ménfolo bra ruwo gétérésang saén i kégumah guwe dob Jerusaleme ni inok méngintulusu. Fakay go ménginsa dob de ségiyo étew inok toow fo gétiga moy ni. <sup>12</sup> Atin i de Judio, énda énggitro begén méniséédél bé de étew dob lawi i Tuluse taloo no rénimbur guy de étew dob de lawi féngadafan taloo no dob ségiyowe ingéd dob Jerusalem. <sup>13</sup> Atin énda i feféngito ro émféféngintoow bé kétébo ruwe begén. <sup>14</sup> Endob fayagé ku beem i kéfengadaf guwe bé Tuluse fénéngadaf i de katufua key bé kéodor guwe dob Agéwo Kristowe. Been i niy bénréh i de étew ni békén toow kéfengintulus. Endob munuru so bé kéluhanay de kitab sénulat Moisese brab kéluhanay sénulat i de méntélata do sénarigoy Tuluse muret bé kébéréh ne. <sup>15</sup> Ségiléw so bé de ni étew témbo begén, munuru so bé kéfétébule i Tuluse bé de ménléhu, do fiyo étew loo soy de tete étew. <sup>16</sup> Atin mélaw démoyunu toow fo témélama rémigo fiyo dob adafay Tuluse brab dob adafay de étew inok énda i sala gu.

<sup>17</sup> “Amun dob ménfiroye gébelintuwa énda ménbatiu dob Jerusalem, méniséfuleu mangéy diyo inok uwité kuy kurta i de dumo gu Judio brab inok témulaku. <sup>18</sup> Atin been i niy rénigo guwe bé kérito ruwe begén dob lawi i Tuluse, amun giliud ménfélinis dob adafay Tuluse loo bé adat geye. Enda toow médooy étewe dumo gu diyo brab énda i rénimbur gu diyo. <sup>19</sup> Endob wén i de Judio énggumah diyo do tidéw Asia. Bero damén i mangéy dob beeme témbo begén amuk wén i funa ro begén témbo. <sup>20</sup> Taloo no fébérén i de étew ni ménangéy dini ké ati salae énggitro dob begéne bé kédini guwe dob adafay de ménlimud do Judio do sétiawan, <sup>21</sup> saliyu bé sébaane bénréh gu métanug amun diyou dob adafa ruwe maku, ‘Kukumé kom begén non munuru bé kétébule i de ménléhu.’”

<sup>22</sup> Atin i Gobernador Felikse, toow fo gétiga noy fantage bé Agéwo Jesuse, mélaw téménréni kémukum. Atin ménbérén mano, “Fégilidé kuy kékukum guwe amuk gégumah i Lisiase sani odoroy de sundalo tidéw Jerusalem.” <sup>23</sup> Atin sénuguén i kafitane bé bantaya noy Pablowe, éndob niraya no so kuwagib i Pablowe rémigo bé kétaya nuwe. Brab ténungkasén soy de dumo Pablo magifat de.

<sup>24</sup> Amun énggilid i firoye gétérésangan, méniséfule mangéy diyo i Felikse brab bawag ne Drusila ségetéw libun Judio. Atin fentawag roy Pablowe brab féngélingo roy kéuret ne fantag bé kéunur ne bé Jesu Kristowe. <sup>25</sup> Endob amun fentaus Pablowej kéuret ne fantag bé mééntange kéfaguyag brab kédigure bé de tete kétayan brab gaiwe gégumah i kékukum i Tuluse, ménwaléy ménnggilak i Felikse. Mélaw ménbérén mano, “Fakay gon séfule brab fétawagu man beem ké wén i gai gu.” <sup>26</sup> Atin i dob fédew Felikse ni, mano ké iraya Pablowe kurta. Mélaw fentawagén médooy gule inok séuret-uret de.

<sup>27</sup> Amun énggilid i ruwowe gébelintuwa, békénén Feliks i gobernadore. Endob i Felikse ménuyot de ké mésuwat i de Judio de, mélaw féndayaén i Pablowe dob férisunone. Atin i ménwaléye gobernador i lagéye féndawét Porsio Festo.

## 25

*I Pablowe brab Festowe*

<sup>1</sup> Amun énggildi i télisé gétérésangan tidéw bé kégumah Festowe dob sakuf i Judea, ménagéw tidéw Sesaria atin ménangéy Jerusalem. <sup>2</sup> Atin i de odoroy de fadi brab de odoroy de Judio ménangéy ro dob beene brab nuret ro diyo i funa ruwe téménébo bé Pablowe. <sup>3</sup> Atin ménfégédaw-gédaw ro dob Festowe ni bé féuwitén i Pablowe mangéy Jerusalem, non bénantak ro féléhuén dob de agéwon. <sup>4</sup> Séménumbul i Festowe mano, “I Pablowe ménférisu dob Sesaria, atin séfuleu so magad mangéy diyo. <sup>5</sup> Mélaw i de odoro kom fatut ro modor begén mangéy Sesaria brab tébo gom i nan étew ké wén i tete rénigo no.”

<sup>6</sup> Atin i Festowe ménbati na dob berowe bé ménlabiwe ségéfadiyan. Tidéw béno ménsefule mangéy Sesaria. Atin bé gétunduge de fuweh, ménangéy mésar dob gono nuwe kémukum brab séménugu bé uwitén i Pablowe mangéy dob adafa nuwe. <sup>7</sup> Amun éngégumah i Pablowe, i de Judio tidéw Jerusalem téménindég ro géliwét de, brab bénréh roy kéluhanay gétimale fo kétébo ro de. Endob énda i toow géfégito ro bé kétébo ruwe de. <sup>8</sup> Endob i Pablowe bénréhén i kéamfilo nuwe bé lowoh ne mano, “Enda i rénigo gu tete dob kitab geye do Judio, taloo no réménigowu tete sébanil bé lawi i Tuluse, taloo no dob toowe fo gérотор datu dob Roma.”

<sup>9</sup> Endob i Festowe méuyot de ké mésuwat i de Judio de, mélaw fénénginsaa noy Pablowe mano, “Aw méuyot go mangéy Jerusalem inok diyo kukumé ku beem ké toow i de kétébo ro beem?”

<sup>10</sup> Séménumbul i Pablowe mano, “Ay niy gono muwe kémukum, non wén i kuwagibém tidéw dob toowe fo gérотор datu dob Roma. Atin ay niwu dob adafa muwe brab beem i fatute kémukum begén. Enda i rénigo gu tete dob de Judio brab fiyon i beeme gétiga moy ni. <sup>11</sup> Amuk wén i rénigo gu tete dob kitabe atin fatutu féléhuén, énda méuyotu méraréy. Endob amuk énda toow i kéluhanay kétébo i de Judio begén, éndaén fatutu iray dob berowe. Ongoté ku dob beeme bé mangéy do adafay toowe fo gérотор datu dob Roma inok been i kémukume begén. Non ségétewu so Romano, brab wén i kuwagib gu méukum dob adafay datue dob Roma.”

<sup>12</sup> Tidéw béno, ménréh i Festowe dob de dumo no témabang. Amun énggildi, ménbérh i Festowe mano, “Amun nongotém i mangéye dob adafay datue dob Roma, mélaw uwitén go mangéy diyo.”

*I Pablowe brab Agripawe*

<sup>13</sup> Amun ménngélfas i firoye gétérésang, énggumah i datue féndawét Agripa brab bawag ne féndawét Berenis dob Sesaria. Nangéy ro ténuakaw i Festowe diyo. <sup>14</sup> Amun ménfiroy ron gétérésang énggumah diyo, nuret Festowe dob Agripahey fantage bé Pablowe mano, “Wén i ménférisuwe lagéy dini bé Feliks sénay máguléwe de. <sup>15</sup> Amun ménangéy Jerusalem, i de odoroy de fadi brab de odoroy de Judio, ténébo ro dob begéne atin nongot roy féléhuén. <sup>16</sup> Endob bénréh gu dob berowe bé békén adat tom Romanoy matée bé ségétewé étew méntébo ké énda séna énggésétengaang roy de témbo de taloo no énda séna méniraya no gai mamfilon bé kaane lowoh. <sup>17</sup> Atin amun ménangéy ro dini, fénagayas gu so bé démoe de féntawag dob gono kuwe kémukum i ni lagéy. <sup>18</sup> Amun énggésétengaang ron, téménindég i de téménébo de brab ménbérh ro. Endob énda wayoy tete rénigo no funa ro de témbo. <sup>19</sup> Endob i funa ruwe saén séédél i fantage bé kéfénçintulus ruwe brab fantag bé ségétewé lagéy féndawét Jesus. Ménléhuén i ni étew éndob i Pablowe bénréhén méuyag kun. <sup>20</sup> Bé béno, énda gétiga kuy fiyowe kétiyawa ku bé ni, mélaw fénénginsaa kuy Pablowe ké méuyot mangéy Jerusalem atin diyo kukumén. <sup>21</sup> Endob i Pablowe nongotén bé bantayan brab mangéy dob adafay datu tome dob Roma inok been i témiyawane de. Mélaw fénéfule gu man dob férisonone taman énda séna gégéuwito ku de mangéy dob datue dob Roma.”

<sup>22</sup> Atin ménbérh i Agripahe dob Festowe mano, “I begéne so, Méuyotu ké gélingoo kuy nan lagéy.”

Atin séménumbul i Festowe mano, “Fégélingoém fo démo.”

<sup>23</sup> Amun bé démoe de, énggumah i ro Agripahe brab Berenise, beroy de odoroy de sundalo brab do gérotor étew dob no ingéd. Atin toow fo fégadatan ro ménahur dob gonone kémukum. Atin i Festowe séménugu bé uwitén i Pablwe mangéy dob dakélé ni sibéy. <sup>24</sup> Brab ménbérélh i Festowe mano, “Datu Agripa brab do kéluhanan kom dini, ay niy lagéye ténebo i kéluhanay de Judio dob begéne, dini brab dob Jerusalem. Brab mékes ro énda kun médaitén méuyag. <sup>25</sup> Endob énda mon i énggito gu de funan de méméléhu. Atin amun nongotén i mangéye dob toowe fo gérotor datu tom dob Roma, ménuyotu de ké féuwit mangéy diyo. <sup>26</sup> Endob énda i gétiga ku sulaté ku mangéy dob datu tome fantag bé ni étew. Mélaw Datu Agripa, fén-angéy gu dob adafa muwe beroy kéluhanay ni étew inok amuk gilid énggésusino komén, wén i gésulata ku mangéy dob datue dob Roma. <sup>27</sup> Non gétiga ku bé békén fatut féuwit i ségétéwe férisu mangéy dob datue dob Roma ké énda i féodorén de kétébo de.”

## 26

<sup>1</sup> Atin ménbérélh i Agripahe dob Pablwe mano, “Tungkasé ku beem émbérélh bé kéamfilo muwe bé lowoh me.”

Atin bántér Pablwey de kémérén bé kékérélh ne mano, <sup>2</sup> “Datu Agripa, toowu fo moror béléewe non gébérého ku beem i kéamfilo kuwe bé lowoh guwe fantag bé kéluhanay de kétébo i de Judio begén. <sup>3</sup> Non toow fo gétiga moy kéluhanay de adat tom do Judio brab de funa tom séédél. Mélaw ongoté ku dob beeme, kago mératér mégléingo begén.

<sup>4</sup> “Gétigay kéluhanay de Judioy kagéne adat tidéw fanay kékloh gu dob kagéne ingéd loo so dob Jerusalem. <sup>5</sup> Ménrugayén énggétiga ro begén, brab géfayaga ro toow i ni ké kétaya ro, ségétéwu toow fo méngintulus mamung dob de Fariseo modor fo toow bé de kitab tom. <sup>6</sup> Atin béléewe ni kukuménu non bé inam guwe, sani késarig guwe bé fénasad i Tuluse bé de katufua key. <sup>7</sup> Been soy ni fasade ongot-ontotéy kéluhanay tome do Judio, do sénaar dob foloe bra ruwo gétribo, non wén soy inam ro de. Mélaw méngintulus ro fuweh na kélunganon. Atin sabaf bé ni inam gu o Datu, ténebo i de Judio begén. <sup>8</sup> Endob sedek toow fo mérégén i kénur gome bé kékétébule i Tuluse bé de ménléhu?”

<sup>9</sup> Atin fentaus Pablwey kékérélh ne mano, “Atin fiyon i begéne, bé gétahe makuk fatut rígoné kuy kéluhanay sébanile bé de étew munur bé Jesuse tidéw Nasaret. <sup>10</sup> Atin bé gétaho, been i niy rénigo guwe dob Jerusalem. Atin méndotu kuwagib tidéw dob odoroy de fadi atin médooy fénrisu guwe bé de munur bé Tuluse. Brab amun kukumén ronén bé féléhuén ro, ménagayunu de so. <sup>11</sup> Atin médooy gule ménangéy dob de lawi fénadafan inok férasayé ku bero. Atin ténulama gu bero fénégés démirung bé kénur ruwe bé Jesuse. Atin bé kékérít guwe bero ménangéy dob de ségiyo ingéd inok férasayé ku bero diyo.

<sup>12</sup> “Been i nan i funa kuwe ménangéy Damasko, non tidéw dob de odoroy de fadi, wén i kuwagib gu kémfo bé de munur bé Jesuse diyo. <sup>13</sup> Atin, Datu, amun diyou dob de agéwon mangéy Damasko bé géutuhe térsang, énggito guy réndawe toow na fo géfekaya tidéw bé térsange, tidéw dob lawayo mangéy dob begéne brab dob de dumogu. <sup>14</sup> Atin kéluhana key énggétélengkéb dob fantade. Atin énggelingoo kuy émbérélh ménésbérélh begén dob késbérélh tome Judio mano, ‘Saulo! Sedek férasayé mo Begén? Beem soy kérégénane bé nan rígoné mo non maak ayam go séménifa sabaf bé kédédél i gefee beem.’ <sup>15</sup> Tidéw bénó ménénginsau maku, ‘Ati Beeme, Kadnan?’ Atin séménumbul mano, ‘Begény Jesuse sani férasayé muwe. <sup>16</sup> Tindég go! Méntefégitowu dob beeme inok beemey fémilié kuwe waléy sugu-sugué ku. Uretém dob de étew i kégito muwe Begén béléewe ni brab de féténgténg gu beem moso. <sup>17</sup> Tabanga ku beem inok énda gébinasanay de Judio brab de békén Judio beem. Atin sugué ku beem mangéy muret dob de étew do békén Judio. <sup>18</sup> Féfégésobutém beroy fantage bé Begéne inok gésénule ro tidéw dob délémone agéwon brab gito roy géfekayaé tidéw dob Tuluse. Atin inok éndaén munur ro dob barakat Satanase, yamula munur ro bé barakat i Tuluse. Atin inok sabaf

bé kéunur ruwe Begén i de sala ro émfasagadan, atin waléy ro so do étew i Tuluse sabaf bé kéunur ruwe dob Beene.’ ”

<sup>19</sup> Atin féntaus Pablowe kékérél ne mano, “Mélaw Datu Agripa, nodoro kuy no énggito gu tidew dob lawayo. <sup>20</sup> Mélaw ménuretu sungu dob Damasko, tidew béno dob Jerusalem. Tidew béno dob kéléhanay de ingéd i de Judio, tidew béno dob ingéd i de békén Judio. Nureto ku bero bé fatut ro gésénule bé de sala ro brab munur ro bé Tuluse. Atin feférito roy kégésénule ruwe bé de fiyo rigoné ro. <sup>21</sup> Been i niy funay de Judio kéménéfo begén dob lawi i Tuluse brab féléhué ron damén begén. <sup>22</sup> Endob taman so béléewe ni, tétabangay Tuluse so begén. Mélaw béléewe ni téménindégu dini muret dob kéléhanay de étew do gérotor brab do gérifantad. Atin i kéuret guwe ségiléw bé kékérél Moisese brab de étew sénarigoy Tuluse muret bé kékérél ne mérigo. <sup>23</sup> Bénréh roy fantage bé Kristowe, bé fatut kun ferasayén brab féléhuén. Atin Beeney sunguwe tébule inok fukasé noy de Judio brab de békén Judio.”

<sup>24</sup> Amun émbérél sénay Pablowe bé kékamfilo nuwe bé lowoh ne, ménkes i Festowe mano, “Pablo, bunég go! I dakéle kégétiga moy funa muwanan ménwaléy bunég.”

<sup>25</sup> Endob séménumbul i Pablowe mano, “Gobernador Festo, békénu bunég. I ni kékérél gu métintu brab toow. <sup>26</sup> Datu Agripa, gétiga moy kéléhanay de ni. Mélaw énda mégilaku de émbérél dob beeme. Non gétiga ku, énda méndirungén dob beeme non ménrigoy de ni dob gonone gétigay kéléhanay de étew. Ménlalag mélaw i kéurete de. <sup>27</sup> Datu Agripa, aw munur go bé kékérél i de étew sénarigoy Tuluse muret bé kékérél ne? Gétiga ku munur go de.”

<sup>28</sup> Tidew béno ménbérél i Agripahe dob Pablowe mano, “Dob ni foko kéureté, aw gékaranga mo géfuwaléyo mo begén munur bé Kristowe?”

<sup>29</sup> Séménumbul i Pablowe mano, “Fiyon fo ké foko taloo no métaah, dasalé ku dob Tuluso bé i beeme brab kéléhanay de étew ni mégélingo begén, waléy gom munur bé Kristowe ségiléw bé begéne éndob békén maférisu loo bé begéne.”

<sup>30</sup> Tidew béno téménindég i datue, brab gobernadore brab libune féndawét Berenis brab kéléhanay de étew diyo atin ménagéw ro. <sup>31</sup> Amun ménagéw ron, ménésbérél-bérél ro maro, “I ni étew, énda i tete rénigo no funan de méméléhu taloo no férisunén.”

<sup>32</sup> Atin ménbérél i Agripahe dob Festowe mano, “Amuk énda saén nongotén i mangéye dob datue dob Roma, fakayén damén tangeyén.”

## 27

### *I kéagéw Pablowe mangéy Roma*

<sup>1</sup> Amun sénfagayuno ron i émféuwite begey dob barkowe mangéy Roma dob sakuf i dakéle ingéd Italiya, naté roy ro Pablowe beroy de ségiyo do férisu dob odoroy de sundalo tidew Roma féndawét Julio. I de ni do sundalo, féndawét ro “Do sundaloy Datue”.

<sup>2</sup> Ménda gey dob barkowe tidew Adramitio, non tafayén mangéy dob de ingéd dob sakuf i Asiawe. Ménodor begey i Aristarkowe ségétew Masedonian tidew Tesalonika. <sup>3</sup> Amun bé démoe de déménunggu gey dob Sidon. Atin i Juliowe, sani odoroy de sundalo, toow fo mégédaw bé Pablowe brab ténungkasén mangéy lémangu bé de dumo no inok fagifaté ro. <sup>4</sup> Atin méntaus gey magéw tidew diyo. Atin rénumfak i réfuruhey barko geye, mélaw ménengindoror gey bé bungéde féndawét Siprus fingé tégon inok mékélung gey bé réfuruhe. <sup>5</sup> Tidew béno, nifar gey i dogote mangéy bé doror i de ingéd féndawét Silisia brab Pamfilia taman énggégumah gey dob Mira, sébaan ingéd dob sakuf i Lisiawe. <sup>6</sup> Atin diyo énggitoy kafitaney sébaane barko tidew Alejandria mangéy Italia, mélaw féndaén begey dob ni barko.

<sup>7</sup> Atin ménntana i kéagéw geye bé ménfiroye gétérésangan brab ménrégén i kéagéw geye taman téménara gey dob ingéde féndawét Kinido. Atin éndaén méntaus gey mangéy fingé diyo non rumfakéy réfuruhey barko geye. Mélaw ménifar gey mangéy fingé bé déligdigay bungéde Kreta inok mékélung gey bé réfuruhe. Atin téménara

gey méngindoror bé gonone Salmon. <sup>8</sup> Atin ménéngindoror gey brab ménrégén foy kégumah geye dob ingéde féndawét “Fyo Dungguon” gédét dob ingéde Lisia.

<sup>9</sup> Atin ménrugay gey na diyo batí taman éndaén mékégilak i magéwe dob dogote bé do no do gai non gai mélégénéy. Mélaw féngginau Pablowe bero mano, <sup>10</sup> “Enggito gu toow fo mékégilak i kéagéwe tidéw dini. Médooy de mébinasa bé de uwit dob barkowe brab barkowe so. Brab wén soy do dumo betom méléhu.” <sup>11</sup> Endob i odoroy de sundalo énda ménagayu no bé bénréh Pablowe, yamula nodoro noy kékérén i kafitane bé barkowe brab gefee de. <sup>12</sup> Atin énda kun fyo térenon i dungguone ni ké gai mélégénéy. Mélaw ménuyot i kédoono ruwe ké magéw ro inok gégumah ro dob Fenisia dob bungéde Kreta. Been i niy dungguone fingé dob élédoj déligdigane brab élédoj tégnone. Mélaw fiyoy téméréne diyo taman gilid i gaiwe mélégénéy.

### I défuke

<sup>13</sup> Atin bé bénó so, méniyuf i réfuruhe énda émbagérén tidéw déligdigan. Mélaw i de étew dob barkowe maro ké fakayén i tause magéw mangéy Fenisia, loo bé bénantak ruwe. Brab bénatu ron i fériwatune atin ménagéw ro ménéngindoror bé dénsaane dob Kreta. <sup>14</sup> Endob énda ménrugayén tidéw bénó, i towe fo émbagér réfuruhe féndawét “Tégenoy Sébangane” énggumah tidéw fantad. <sup>15</sup> Atin énggélá i ni réfuruhe dob barko geye. Atin énda fakay gey gétaus magéw rémumfak bé réfuruhe ni. Mélaw féndaya gey séden i kieuwit i réfuruhe begey. <sup>16</sup> Atin amun énggétara gey dob sébaane kloh bungéd féndawét Kauda fingé sébangan, ménalang i réfuruhe diyo. Atin i klohe awang bénégéng i barkowe, éndot ro tidéw dob dogote éndob toow fo mérégén. <sup>17</sup> Atin amun ténaléy ron i awange ni, nikét roy géliwéte bé barkowe ni bé de dakél taléy inok énda mérundasén. Mégilak ro ké mélébénéng i barkowe dob fantad i dogote non éndaén ménalémén gédét dob Libia. Mélaw kénda roy layage brab méntéanur séden i barkowe modor bé kéfanir i réfuruhe de. <sup>18</sup> Atin énda so témenréni émbagére ni défuk. Mélaw dob gétunduge de fuweh féngganaya roy lémawue bé de uwit dob barkowe ni. <sup>19</sup> Atin bé gétunduge de man fuweh nibér roy de dumoy de usarén dob barkowe. <sup>20</sup> Ménfiroy gétérésangan, i éndae kégito gey bé térsange taloo no do gitoon atin démayday soy défuke ni. Tidéw bénó, éndaén foy inam gey ké méuyag gey na.

<sup>21</sup> Amun ménrugayén i éndae kégéama i de étew ni, témenindég i Pablowe dob téngaanga ruwe brab ménbérén mano, “Do dumo gu, amuk fénggelingo gom saén begén, énda damén méntékédan tom dob Kreta, brab énda damén i do ménsinggula brab do ménbinasa. <sup>22</sup> Endob béléewe ni ay niy béréhé kuwe begom, kagom mégilak non énda i ségétew méléhu betom. Endob i barkowe ni mébinasa. <sup>23</sup> Non bé nakélungonono méntefégitob begéney téakiy Tuluse, sani Tuluse féngadafé ku brab gefee bé lowoh guwe. <sup>24</sup> Ménbérén i téakiwe ni dob begéne mano, ‘Kago mégilak Pablo! Non fatut go témindég dob adafay datue dob Roma. Atin sabaf bé kégédaw i Tuluse beem, tabangé no soy kéluhanay de dumo mo ni dob kéagéw gome inok énda méléhu ro.’ <sup>25</sup> Mélaw,” bang Pablowe, “kagom mégilak non sémarigu dob Tuluse bé métuman i kéluhanay de bénréhén begén. <sup>26</sup> Endob méfanir tom mangéy dob sébaane bungéd.”

<sup>27</sup> Ménfoloén bra fot gékélungonon i kéfanir i réfuruhe bé barko geye dob dogote Medeteranean. Tidéw bénó amun kérara kélungononén, i de étew gémalbék dob barkowe marok gédét geyén dob fantade. <sup>28</sup> Mélaw lénawu roy taléye wén i fériwatun de, inok témbuné roy kénalém ne. Atin énggétiga ro fot folo gémitroy kénalém ne. Atin énda ménrugayén tidéw bénó, lénawu ron man i taléye ni atin télik folo gémitro séden i kénalém ne. <sup>29</sup> Atin non bé kégilak ruwe ké mésanggat i barkowe dob de dakél batéw, mélaw lénawu roy fote fériwatun tidéw dob igor i barkowe brab déménasal ro inok fuwehén damén. <sup>30</sup> Atin i de étew gémalbék dob barkowe ni sénfagayuno roy méraréye damén. Mélaw ténuantu roy klohe awang dob dogote. Ubo-ubo lawué roy de fériwatun dob uléw i barkowe ni. <sup>31</sup> Endob ménbérén i Pablowe dob odoroy de sundalo brab dob de sundalo no mano, “Amuk tékédan i de étew ni gémalbék dob barkowe ni, énda méuyag

gom.” <sup>32</sup> Mélaw kénléng i de sundaloy de taléy fénggéikét bé awange ni brab féndaya ro mélawu inok méanur sésuway bé barkowe.

<sup>33</sup> Amun mangéyén fuweh, nongot Pablowey mama ro kéluhanan brab ménbérén mano, “Ménfoloén bra fot gétérésangan i kéongot-ongot gome atin énda i nama gom.

<sup>34</sup> Mélaw ama gom! Toow fo kailanga kom i mamae inok méuyag gom. Bérhéhé ku begom i ni, énda i sébaan betom wén i sug-sugén.” <sup>35</sup> Amun énggilid bénréhén i ni, ménidot i Pablowe bé fane brab ménfésalamat dob Tuluse dob téngaanga ruwe. Tidew béno bénadén brab ménama ro. <sup>36</sup> Atin éndaén ménbuku ro atin ménama ro kéluhanan.

<sup>37</sup> Ruwo gey ratuh bra fitew folo bra ném kéluhanan. <sup>38</sup> Amun ménbésor ronén, nibér roy de faréy dob dogote inok waléy féngkag i barkowe.

### Ménbinasay barkowe

<sup>39</sup> Amun géfuwénén, wén i énggito geye fantad éndob i de étew gémalbék dob barkowe, énda gélolo ro de ké ati no gonon. Endob énggito roy linéke brab dob dénsaane de wén i do médo de farék. Atin ménfagayun ro amuk fakay diyo ro démunggu. <sup>40</sup> Mélaw kénléng roy de fériwatun brab féndaya ro ménlawu dob ménaléme de. Atin nukoh ro soy ikét i de suwil. Tidew béno, ténunggul roy layage inok faniréy réfuruhe mangéy dob dénsaane. Mélaw ménagéw gey. <sup>41</sup> Endob i barkowe ni ménrangat dob fanser i dogote brab téménrén diyo. Ménlébéng i lulung i barkowe ni atin ménrundas i ulina nuwe non énggóbela diyo i émbagére do bagé.

<sup>42</sup> Sénfagayunoy de sundaloy méméléhue bé de férisu inok énda i gélonguy brab géféraréy bero. <sup>43</sup> Endob i odoroy de sundalo mika de ké féléhuén i Pablowe. Mélaw génléén i de sundalo no bé éndaén féléhuén i de férisu. Atin sénuguén i de gétigan lémonguy bé téfélaway ron dob dogote sungu brab lémonguy mangéy dob dénsaane.

<sup>44</sup> Atin i de dumo bero énda gétigan ro lémonguy, sénuguén bero ménidot bé de fafan brab do réfa i barkowe inok rémantaw ro. Atin i kéluhana keye énggégumah dob dénsaane, énda i énggésug-sug begey.

## 28

### Dob Malta

<sup>1</sup> Amun énggégumah geyén dob dénsaane énda ménkaid gey, wén i ménbéréhe dob begeye bé Malta wayoy dawét i no bungéd. <sup>2</sup> Toow fo mégédaw i de étew dob no ingéd begey. Non amun réménana brab toow fo mélégénéy, ménuyag ro aféy brab ténuganul ro begey. <sup>3</sup> Atin i Pablowe ménurut do kayéw fégésénuk. Atin amun féndioén i de kayéw dob aféye, ménut i ulée tidew dob de kayéw ni non kéedufan bé aféye brab kénékeén i kémér Pablowe brab ménbiti-bitin diyo. <sup>4</sup> I de étew bati dob no ingéd amun énggito roy ulée ni ménbiti-bitin dob kémér Pablowe, ménchéh-bérén ro maro, “Ménméléhu étew keeyén i ni lagéy, non fiyon fo ké énda ménléhuén dob dogote, bagié soy méléléhue.” <sup>5</sup> Endob kénuyung Pablowey kémér ne atin ménlawu i ulée ni dob aféye brab énda i kaidén. <sup>6</sup> Nongot-nongot i de étew ké lémbag i kémér Pablowe loo ké tékow métuwar brab méléléhu. Endob amun ménrugayén i kéongot-ongot ruwe de atin énda i énggérigono no de, ménfégalin i de itunga ro brab ménbérén ro maro, “Ségétew tulus i nan.”

<sup>7</sup> Enda méravyén tidew diyo i fantade kay lagéye féndawét Publio. Beeney méguléwe bé no bungéd. Atin ténayakufén begey dob lawi ne bé méncléwe gétérésangan brab toow fo méngédaw begey. <sup>8</sup> Atin i boh Publiwe démeruun méniro dob kamawe non toow fo démfug brab mégudu. Atin i Pablowe ménahur dob sibéy ne. Tidew béno, ténégé no brab déménasal atin modor so béno, ménadi-adi so. <sup>9</sup> Sabaf bé ni ménrigo, i kéluhanay de démeruun do étew dob no ingéd ménangéy ro dob Pablowe. Atin kéluhana ro ménadi-adi. <sup>10</sup> Atin niraya ro begey médo do éntingayén. Brab amun ménada geyén dob barkowe, niraya ro begey bé kéluhanay éntingayéne kailanga key bé kéagéw geye.

<sup>11</sup> Diyo wén i sébaane barko tidew Alejandria féndawét “Do Séfing Tulus”, non téménrén diyo bé gaiwe mélégénéy. Mélaw amun énggéléfas i téliséwe gétérésang

kélungonon, ménda gey. <sup>12</sup> Atin déménunggu gey dob ingéde féndawét Sirakusa brab téménréni gey diyo télaw gétérésangan. <sup>13</sup> Atin tidew diyo, méntaus gey mangéy Regio. Atin bé démoe de déménufar i réfuruhe tidew déligdigan brab énggumah gey dob Peteoli bé ménruwowe gétérésangan. <sup>14</sup> Atin diyo énggito gey i de dumo gey munur bé Kristowe brab fénbati ro begey diyo ségfadiyan. Tidew béo, méntaus gey magéw mangéy Roma. <sup>15</sup> I de dumo gey munur bé Kristowe bati dob Roma, énggelingoo roy lalag i kégumah geye. Mélaw ménagéw i de dumo bero mangéy dob ingéde féndawét “Foro de Apio” brab de dumo de ménangéy “Tres Tabernas” inok balaké ro begey. Amun énggito Pablwe bero, ménfésalamat dob Tuluso brab ménbagér i fédew ne.

#### *Dob Roma*

<sup>16</sup> Amun énggégumah gey dob Roma, ténungkas roy Pablwe bati dob sébaane lawi beroy ségtéwe sundalo mantayan de.

<sup>17</sup> Amun énggéléfas i télewe gétérésangan, fentawag Pablwey odoroy de Judio inok sélimud ro. Amun ménsélimud ron, bénréh Pablwe bero mano, “Do dumo gu, fiyon fo ké énda i rénigo gu sébanil bé de dumo tom do Judio taloo no bé adate tidew dob de katufua tom, fénrisu ro begén dob Jerusalem atin naté ro begén dob de Romano. <sup>18</sup> Atin i de méguléw tidew Roma fénénginsaa ro begén brab tangéyé ron damén begén non gétiga ro énda i rénigo gu tete funa ku méléhu. <sup>19</sup> Amun énda ménagayun i de Judio de, nongot guy mangéye dob datue dob Roma, fiyon fo ké énda i fégétébo gu bé de dumo gu Judio. <sup>20</sup> Been i niy funa kuwe ménongot géségito begom brab sébéréh begom. I funa kuwe ménikét bé de sangkali ni non bé kéunur guwe bé Kristowe, sani inam i kéluhanay de Judio.”

<sup>21</sup> Atin séménumbul ro maro, “Enda sénay énggédot gey sulat tidew Judea fantag bé beeme. Atin i de dumo tom do Judio ménangéy dini tidew diyo énda mon i nuret ro tete fantag bé beeme. <sup>22</sup> Endob méuyot gey mégélingo ké ati kaame de kékégitung non gétiga key dob kéluhanay de gonon, wén i do étew émbéréh ro tete fantag bé kaame kékéngintulus.”

<sup>23</sup> Mélaw ménfagayun ro mémili térsang sélimud bé Pablwe. Atin toow fo médooy ménangéye dob lawie gono Pablwe bati bé no térsang. Atin tidew fanay géfuwen énggumah kélungonon i kéto Pablwe bero fantag bé kékéngintulus i Tuluse bé de étewén. Atin ténulama no bero fén-unur bé Jesuse bé kélabit ne bero bé de sénulat Moises brab de étew sénarigoy Tuluse muret bé kékéngintulus. <sup>24</sup> Atin i de dumo bero énggénur bé kékéngintulus ne, éndob i de dumo bero énda fo munur ro de. <sup>25</sup> Mélaw amun ménékédan ro, ménsebaad ro bé kékéngintulus Pablwe mano, “Toow i fénbéréh i Rémogor i Tuluse bé Isaiase ségtéw sénarigoy Tuluse muret bé kékéngintulus ne dob de katufua kom, <sup>26</sup> mano, ‘Agéw go mangéy dob de ni do étew brab bérhéhém bero, Mégélingo gom éndob énda gésobuto kom de, brab témeéngténg gom éndob énda gito gom de. <sup>27</sup> Non métégas i de uléw i de étew. Ménfeng i de kelingo ro, brab ménléfédéng i de moto ro. Amuk énda loo no bé nan, gégitoy de moto ro, brab gégléngi i de kelingo ro, brab gésobut i de itunga ro, brab balengé roy de fédew ro mangéy dob Begéne inok féadi-adiné ku bero.’ ”

<sup>28</sup> Féntaus Pablwey kékéngintulus ne mano, “Mélaw fatut gétiga kom i uret i Tuluse fantag bé kékéngintulus ne ménuretén dob de békén Judio. Atin i berowe fégélingoé ro fo toow.”

<sup>29</sup> Amun énggilid bénréh Pablwey ni, ménule i de Judio séédél ro fo toow.

<sup>30</sup> Atin bé rugay i ménruwowe gébélantuwa, ménbati i Pablwe dob lawie gono no mafin. Atin ténayakufén i kéluhanay de étew mangéy de témukaw. <sup>31</sup> Atin nuretén i kékéngintulus i Tuluse, atin ménbaraw ténoréen i fantage bé Kadnane Jesu Kristo brab énda i géménlé de.

## I Sulat Pablowe dob de Munur bé Kristowe dob Roma

Been i niy sébaane bé de sénulat Pablo fégétoro bé de munur bé Jesu Kristowe. Bé gétahe, toow fo mérarék i Pablowe bé de munur bé Jesuse, atin ménuyot méméléhu bero. Endob tidew béno, méntefigitoy Jesuse dob Pablowe tidew dob lawayo. Tidew béno, bénalengén i fédew Pablowe brab ménwaléy munur bé Jesuse. Tidew man béno, ménwaléy i Pablowe bantugan muret fantag bé Jesuse. Séménugud mangéy dob de médooy do ingéd inok féunuré noy de étew dob Jesu Kristowe. Atin médooy de ménunur sabaf bé kéuret Pablowe ni.

Amun sénulat Pablowej ni sulat dob de munur do bati dob Roma, énda séna énggéangéyén de diyo. Endob ménuyot foy Pablowe mangéy diyo. Mélaw sénulatén i ni fégéségifaén bero. Sénulatén soy ni inok toroé no bero fantag bé Jesu Kristowe. Ténoro Pablowe so bé i kéluhanay de étew, wén i do sala ro. Atin i bayad i salae, been i kélöhue. Endob i Tuluse, sénuguén i Nga ne Jesu Kristo dob duniiae ni inok féléhuén. Ménléhu i Jesuse génantino noy de kélawan. Mélaw fésagadéy Tulusey de sala i de étew amuk munur ro bé Jesuse. Atin i de munur bé Jesuse, féwaléyéy Tuluse bero métintu dob adafa nuwe. Been i niy kétoroe dob ni sulat Pablowe ni.

<sup>1</sup> Begénye Pablowe sulata ku begom do munur bé Jesuse dob ingéde Roma. Begénye ségétewe sugu-sugué Jesu Kristowe. Fénemili i Tuluse begén waléy apostol inok ureté kuy Fiyowe Uret fantag bé Jesuse.

<sup>2</sup> I ni Fiyo Uret, fénasad i Tuluse bé do gétah bé kénéfusat ne bé de sénarigo no muret bé kékérén ne dob Mékétéfuwe Libro. <sup>3</sup> Atin i ni uret, been i niy fantage bé Nga i Tuluse, sani Kadna tome Jesu Kristo. Ségétew so kélawan non ménunah tidew dob katufua nuwe Datu Dabide. <sup>4</sup> Atin i Jesuse ni, Mékétéfu so Tulus non fénggitoy noy Been i Nga i Tuluse bé kétébule ne bé barakat ne. <sup>5</sup> Atin sabaf bé sénugu Kristowe begén, niray i Tuluse begén i fiyowe galbék gu non fénwaléy i Tuluse begén ségétew apostol inok émbantug i Kristowe. Atin mélaw démoyunu magéw muret témore dob de étew dob kéluhanay de ingéd inok munur ro so bé Jesuse. <sup>6</sup> Atin fiyon i begome do munur bé Kristowe dob Roma, fénemili i Tuluse so begom waléy do kuyugé Jesuse.

<sup>7</sup> Mélaw sulata kuy kéluhana kome dob Roma do kénimuoy Tuluse brab fénemilién waléy kuyugén.

I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédew.

### Fésalamat i Pablowe bé Tuluse

<sup>8</sup> Ay niy sunguwe bérhéku begom: Fésalamatu bé Tuluse dob Jesu Kristowe sabaf bé begome. Non énggelingoo y kéluhanay étewey fantage bé kénur gome. <sup>9</sup> Sabaf bé Tuluse, mégéroru gémalbék muret bé Fiyowe Uret fantag bé Nga ne Jesu Kristo. Atin énggétigay Tulusey kédasala kuwe begom sénga tékélid. <sup>10</sup> Atin démoyunu mongot bé kédasala kuwe bé fefakayéy Tulusey kéagéw guwe mangéy témuak begom amuk kétaya no, non ménrugayén i kétaya kuwe témuak begom. <sup>11</sup> Non toow fo méuyotu géségito begom inok gétoroo ku begom i ténero i Rémodor i Tuluse begén funa kom waléy méégét i kénur gome. <sup>12</sup> Mélaw séféfiyo tom fédew bé kénur tome bé Kristowe.

<sup>13</sup> Do dumogu, méuyotu kétigá kom i ni, médoonén gule bénantak guy mangéye témuak begom éndob wén foy manggae begén. Méuyotu damén mangéy diyaan inok géfénuro kuy de étew békén Judio dob begome dob Roma bé Jesuse, loo bé rénigo guwe dob de békén Judio dob de ségiyo ingéd. <sup>14</sup> Non maak wén i dakél utong gu dob kéluhanay de étew. Atin i bayad guwe de, been i kéuret guwe fantag bé Jesuse. Fatut ureté ku dob de métiledtéd brab dob de légléngén, dob de énggégéganad brab dob de énda énggégéganad. <sup>15</sup> Mélaw toowu fo méuyot muret bé Fiyowe Uret dob begome so do bati dob Roma.

*I Fiyowe Uret*

<sup>16</sup> Enda fo mémalawu muret bé ni Fiyo Uret non fiyon fo ké ati munure de, i sunguwe do Judio brab tidéw béno do békén Judio, been so fukaséy Tuluse inok énda mékukumén.

<sup>17</sup> Non ménfayag dob Fiyowe ni Uret bé féwaléyéy Tuluse métintuy de étew munur bé Kristowe sabaf saén bé kéunur ruwe. Non wén i Ménsulate Kébérélh i Tuluse mano, “I étewe ménwaléy métintu sabaf bé kéunur ne bé Tuluse, méuyag taman sa taman.”

*Ménsala i Kéilawane*

<sup>18</sup> Atin i Tuluse dob lawayo, fénggito noy kékérit ne bé de tete adat i de étew brab de sala ro. Non sabaf bé de tete rigoné ro, alangé roy toowe kétoro. <sup>19</sup> Kukuméy Tuluse bero non magad damén gésobuto roy fantage bé Tuluse. Non fénkéntayéy Tuluse nén i kéfégétiga nuwe de dob berowe. <sup>20</sup> Mélaw énda i funay ségétéwe étew góbérélh mano, “Enda gétiga ku de ké wén i Tulus.” Non tidéw bé kélémbag i Tuluse bé duniiae ni, énggétuwanén i magufusae barakat i Tuluse bé ati lénimbag ne fiyon fo ké énda giton i Tuluse. Atin sabaf so bé atiy lénimbag ne, fatut gétigay kéluhanay étewe bé tintu Tulus i Tuluse. <sup>21</sup> I de ni do étew énda munur ro bé Tuluse, gétiga roy fantage bé Tuluse éndob énda fégadata ro de loo damén bé fatute. Enda so fésalamata ro de. Yamula i kéfégitung ruwe ménwaléy énda i lantékén brab maak délémon. Non éndaén gésobuto roy toowe tidéw dob Tuluse. <sup>22</sup> Atin fiyon fo ké bérélhé ro do métileédtéd ro, éndob ménwaléy ro do dufang. <sup>23</sup> Non énda féngadafé roy barakatane Tulus magufusa, yamula féngadafé roy de kéninontow rénigo ro loo bé falas i kéilawane énda magufusaén, brab do kloh manok, brab do binatang, brab do ulé.

<sup>24</sup> Atin non toow fo dufang i de ni do étew, téngak i Tuluse bero brab féndayaén bero rémigo do tete kétaya ro. Atin mélaw toow fo tete brab mékémala de kérigo ro bé de lowoh ro. <sup>25</sup> Atin énda munur ro bé toowe fantag bé Tuluse. Yamula munur ro bé de tugi. Féngadafé roy de lénimbag i Tuluse, énda féngadafé roy Beene léménimbag bé de ni. Médayéw damén i Tuluse taman sa taman. Amen.

<sup>26</sup> Atin sabaf bé kétakag ruwe bé Tuluse, téngak i Tuluse bero brab féndayaén bero rémigo bé de tete do mékémala kétaya ro. Fiyon i de libun bero, ménwaléy ro maak lagéy. Mika ro sétyan bé de lagéy loo damén bé fatute. Yamula sétyan ro falan bero do libun. <sup>27</sup> Atin i de lagéy rigoné roy tete loo so bé ni. Ménwaléy ro maak libun. Mika ro sétyan bé de libun loo damén bé fatute. Yamula sétyan ro falan bero do lagéy. Rigoné roy toowe fo tete funa ro fatut mémala. Atin mékukum ro loo bé fatute sabaf bé de tete rigoné ro bé de lowoh ro.

<sup>28</sup> Sabaf bé kéika ruwe munur bé Tuluse, téngak i Tuluse bero brab féndayaén bero bé de tete kéfégitung ro. Mélaw rigoné roy de tintu fo tete énda damén fatutén rigonén.

<sup>29</sup> Atin falan tete i démoyune fénggitung ro. Ménwaléy ro do tete étew, do arumén, do rémigo tete, do toow fo médaléw, do méméléhu, do méuyot sétiboh, do tugién, do dusa, brab do gémeno. <sup>30</sup> Atin démoyun émbérélh ro tete fantag bé de dumo ro brab mérarék ro bé Tuluse. Enda fégadata roy dumo ruwe brab toow ro fo félangka-langka. Toow ro fo furung mégitung bé de tete rigonén. Atin énda odoro roy sugu i de lukés ro. <sup>31</sup> Atin furah ro brab énda tumané roy de fasad ro. Atin énda mégédaw ro taloo no méuray i na ruwe bé dumo ruwe. <sup>32</sup> Enggétiga roy kébérélh i Tuluse bé fatut méléhu i étewe rémigo bé de ni do késalaan. Endob fiyon fo ké loo bé ni, fétausé ro soy de tete rigoné ro, atin méuyot ro de uman ké mamung soy de dumo étew bé de ni do rigoné ro.

*I kékukum i Tuluse*

<sup>1</sup> Mélaw gétiga tom fatut kukumén i de tete étew. Endob énda i ségétéw begom gékukum bé de ni do étew non fatut gom so mékukum. Non rémigo gom so tete ségiléw bé berowe. Mélaw amuk dowoyé kom bero, dénowoy gom soy de lowoh gom. <sup>2</sup> Atin gétiga tom méentang i kékukum i Tuluse bé de étew rémigo tete loo bé de ni. <sup>3</sup> Fiyon fo ké dowoyé kom i de ni do tete étew, éndob fiyon i begome rémigo gom so tete ségiléw bé

berowe. Mélaw kagom fégitungén de ké gésélyah gom bé kékukum i Tuluse. <sup>4</sup> Makom keeyén ké éndaén kailanga kom odoron i kétayay Tuluse non toow fo mégédaw i Tuluse brab tingkélé noy kékérít ne. Endob gétiga kom damén i funay Tuluse mégédaw brab témingkél inok gésénule gom bé de sala gom. <sup>5</sup> Endob toow fo métégas i de atura kom funa kom mika gésénule. Mélaw méumanan i kékérity Tuluse begom. Atin toow na fo gétimal i kékukum i Tuluse begom bé gaiwe fégito noy méntange kékukumén. <sup>6</sup> Non iray i Tulusey fatute irayén dob séngae étew sabaf bé de rénigo no. <sup>7</sup> Wén i do étew rigoné roy fiyowe sénga téklid non méuyot ro de ké dayewéy Tuluse bero brab fégadata no bero brab iraya no bero bé umule magufusa. Mélaw tintu fo iray i Tuluse beroy umule magufusa. <sup>8</sup> Endob wén soy do étew toow fo do métitung. Mika ro rémigo fiyo, yamula rémigo ro tete. Mélaw toow fo émbégat i kékukum i Tuluse bero, non tintu fo mékérít bé de rigoné ro. <sup>9</sup> Toow fo kérasayan brab kérégénan i kéluhanay de étew rémigo tete, dob de Judio sungu, tidew béno dob de étew békén Judio. <sup>10</sup> Endob i de étew rémigo bé fiyowe, dayewéy Tuluse bero brab iraya no bero bantugan brab kédané noy kékuku ruwe. Sungu-sungu dob de Judio, tidew béno dob de étew békén do Judio. <sup>11</sup> Non i kékukum i Tuluse toow fo mééntang, atin énda i ramigo no.

<sup>12</sup> I de étew békén do Judio, énda gétiga roy de sugu i kitabe tidew dob Moisese. Mélaw amuk gésala ro, kukuméy Tuluse bero, éndob énda usaré noy kitabe fégukumén bero. Endob i de Judio, gétiga roy de sugu i kitabe tidew dob Moisese. Mélaw amuk gésala ro, kukuméy Tuluse bero bé kitabe. Atin i bayad i sala i de étew kéléhu. <sup>13</sup> Non i Tuluse énda féwaléyé no métintuy étewe mégélingo saén bé kitabe. Yamula béréhéy Tuluse métintuy de étew modor bé kitabe. <sup>14</sup> I de étew békén do Judio, énda gétiga roy kitabe tidew dob Moisese. Endob fiyon fo ké énda gétiga roy kitabe, wén i no géodoro ro soy atiy ménsugue dob kitabe. Non gétiga ro dob de fédew roy atiy fatute rigonén. Mélaw maak wén soy kitab dob de fédew ro. <sup>15</sup> Bé de fiyo rigoné ro, fégito ro gétiga ro dob de fédew roy fatute dob kitabe. Atin gétiga ro so dob de itunga roy fatute brab tete. Non amuk rigoné roy fiyowe, moror ro. Endob amuk rigoné roy tete, tete soy fédew ruwe de. <sup>16</sup> Mélaw loo bé niy kékukum Jesu Kristowe bé de ménbunéy do kégéitung i de kékukum i Tuluse loo bé ménbéréhe dob Fiyowe Uret ureté ku.

### Fantag bé de Judio

<sup>17</sup> Atin fantag bé begome do Judio. Méuyot gom de fo ké fédawét gom i de lowoh gom do "Judio". Atin sémarig gom bé kéodoro kome bé kitabe brab félangka-langka gom non begom i fénemili i Tuluse. <sup>18</sup> Gétiga kom i kétayay Tuluse rigoné kom atin gétiga kom i fatute non ténero i kitabe begom. <sup>19</sup> Makom ké begom i manangguwite bé de étew maak langafén non énda gétiga roy fantage bé Tuluse. Brab makom ké begom i do maak solo émfégito bero bé agéwone mangéy dob Tuluse. <sup>20</sup> Atin makom ké begom i do téromo bé de dufang, brab do maistéro dob de étew mantu séna méngganad fantag bé Tuluse. Loo bé niy kégéitung gome non niray i Tuluse begom i kitabe, atin diyo giton i tintuwe kégétigan brab toowe. <sup>21</sup> Démoyun gom téromo dob de ségiyo, éndob fatut toroé kom i kagome lowoh. Téromo gom makom, "Kagom ménakaw", éndob ménakaw gom so. <sup>22</sup> Béréhé kom makom, "Kagom lémamfa". Endob lémamfa gom so. Brab bénréh gom mika gom bé de kéninontow, éndob mahur gom dob de lawi fénégadafan inok ménakaw do kéninontow. <sup>23</sup> Félangka-langka gom non niray i Tulusey kitabe dob begome. Endob fémalané kom i Tuluse bé éndae kéodoro kom bé kitabe. <sup>24</sup> Wén i Ménsulate Kébéréh i Tuluse mano, "Ménbéréh i de békén Judio tete fantag bé Tuluse non bé de tete rénigo gom do Judio."

<sup>25</sup> Atin i begome do Judio, makom ké toow fo mélaga i kétulie begom. Atin toow, wén i lagaén amuk odoro kom i kitabe. Endob amuk énda odoro kom i kitabe, énda i laga i kétulie begom. <sup>26</sup> Ufama, i étewe békén Judio, fiyon fo ké énda méntulién, amuk odoro noy kitabe, maak méntuli so dob adafay Tuluse. <sup>27</sup> Mélaw i de étew békén Judio do énda méntulién, amuk modor ro bé kitabe, fégito ro bé fatut ménbukum gom. Non énda odoro kom i kitabe fiyon fo ké dob begome sénulat i kitabe ni, brab do méntuli gom. <sup>28</sup> Non i

étéwe métandaan saén i lowoh ne bé kétulie de éndob énda séna méntintuy fédew ne, békén tintu Judio. Non i funane fétuli békén saén dob lowohe.<sup>29</sup> Yamula i tintuwe Judio, been i étewe métintuy fédew ne. Non maak méméntili i fédew ne non fénwaléy i Rémogor i Tuluse métintuy fédew ne. Békén i kitabey ménféwaléye de méntintu. Atin i étewe ménwaléy méntintu non bé galbék i Rémogor i Tuluse, médayew i Tuluse de, fiyon fo ké énda médayew i de étew de.

## 3

<sup>1</sup> Amuk toow i ni, aw wén i laga i étewe ké Judio loo ké énda? Aw wén i laga i kétulie loo ké énda? <sup>2</sup> Toow fo dakél i laga ne. Non wén i do dakél kéfiyonon niray i Tuluse dob betome do Judio. I sunguwe de, sénarig i Tuluse dob betomey Ménssulate Kébérén. <sup>3</sup> Fiyon fo ké i de dumo tom do Judio énda munur ro bé Kébérén i Tuluse, been so tumanéy Tulusey fasad ne. <sup>4</sup> Non fiyon fo ké i kéluhanay de kélawan do tugién, énda tugién i Tuluse. Non wén i ménssulate kébérén Dabide fantag bé Tuluse mano, “Falan fo toow brab métintuy kébérén me. Atin amuk wén i témo Beem, Been so témaban i Tuluse.”

<sup>5</sup> Endob amuk wén i dufang émbérén mano, “Amuk rémigo tom tete, fiyo so, non gétigay de étew i kétugoy Tuluse amuk gito roy kétete tome. Non mas gésobuto roy fiyowe rigonéy Tuluse bé de rigoné tom. Mélaw énda fatutén kukuméy Tuluse betom.” Endob toow fo dufang i étewe gébérén loo bé ni. <sup>6</sup> Békén toow i nan dufang kébérén, non amuk énda métintuy Tuluse, énda gékukumo noy kélawane.

<sup>7</sup> Atin amuk wén soy dufang étew émbérén mano, “Fiyo so ké tugién tom inok giton i éndae kétugiéy Tuluse. Mélaw gédayéwoy de étew i Tuluse non toow na fo fiyoy Tuluse bé betome. Mélaw énda fatut tom mékukum bé de sala tom.” Endob toow fo dufang i ni kébérén. <sup>8</sup> Non ségiléw bé niy dufange kébérén mano, “Rémigo tom tete inok méumanan i fiyowe.” Toow fo dufang i nan kétugitung. Endob wén i do étew téménifu begén bé bénréh gu kun i nan kédufangan. Endob énda i énggékérén ku loo bé nan. Fatut mékukum i de étew ménbérén tugién fantag bé begéne loo bé nan. Atin mékukum ro mon.

*Enda i métintu étew*

<sup>9</sup> I betome do Judio, katom fégitungén de ké toow na fo fiyoy katome gohon bé de étew békén do Judio. Non fénggitoy gun begom i funa tome ségiléw. Enda i sébidana tom do Judio brab de békén Judio non kéluhana tom énggésala. <sup>10</sup> Non wén i Ménssulate Kébérén i Tuluse mano, “Enda i métintu dob adafay Tuluse, fiyon ségétew. <sup>11</sup> Enda i gésobut bé Tuluse, brab énda i séméléd bé agéwone mangéy dob Tuluse. <sup>12</sup> Non i kéluhanay étewe téragak roy Tuluse. I kéluhanane réménigo tete. Enda i réménigo fiyo, fiyon ségétew. <sup>13</sup> I de ba ro maak do lébengé énda métamfurén. Non toow fo tete i de kégébaa ro. Atin toow ro fo émbagér témugi. I de kébérén ro maak bisa ulé. <sup>14</sup> Démoyun ron mémula brab méméttete fédew i de kébérén ro. <sup>15</sup> Toow ro fo magad méméléhu. <sup>16</sup> Atin i kéluhanay géayo ruwe mébinasa brab kétasangan. <sup>17</sup> Sétiboh saén i gétiga ruwe. <sup>18</sup> Atin énda fo fégadata roy Tuluse.” Been i niy Ménssulate Kébérén i Tuluse.

<sup>19</sup> Atin énggétiga tom i ni: I kitabe tidew dob Moisese kay de Judio, sani de téménlama modor bé ni kitab. Sénulatén inok énda i funay étewe gébérén bé énda i salaén. Atin mélaw i kéluhanay kélawane fakay kukuméy Tuluse. <sup>20</sup> Non i kélawane réménigo bé éndae fakay dob kitabe. Mélaw énda i étew ménwaléy métintu dob adafay Tuluse sabaf bé kéodoro nuwe bé kitabe. I funane wén i kitab inok fégito noy sala i étewe.

*I kétintuy Tuluse*

<sup>21</sup> Endob béléewe ni, fénggitoy Tulusey kétintu nuwe bé étewe. Békén sabaf bé kéodoro étewe bé kitabe. Nuret i Ménssulate Kébérén i Tulusey fantage bé de ni. <sup>22</sup> I Tuluse, féwaléyé no métintuy étewe sabaf bé kétunur ne bé Jesu Kristowe. Rigoné noy ni dob kéluhanay de munur bé Kristowe non énda i ramigoy Tuluse. <sup>23</sup> I kéluhanay étewe énggésala brab toow fo kulang i kéluhanane dob fatute kétayay Tuluse. <sup>24</sup> Gido loo, sabaf bé kégédaw i Tuluse saén, fénwaléyén betom métintu non bé kétunur tome bé Jesu

Kristowe sani kémédane bé de sala tom. <sup>25</sup> Sabaf bé de sala tom, kukuméy Tuluse damén betom bé kéléhue. Endob i Tuluse fénféléhuén i Jesu Kristowe inok gantino no betom bé de sala tom, brab inok mékedan i kékukum i Tuluse betom. Mélaw fésagadéy Tuluse betom bé de sala tom sabaf bé kéunur tome bé Jesuse, sani tulake niray i Tuluse. Rénigoy Tulusey ni inok fégito noy kééntang i kékukum ne. Bé do gétah, énda kénukumén i de étew ménalsa non toow fo témingkél i Tuluse. <sup>26</sup> Gido loo, fatut kukuméy Tulusey de sala. Been i niy funa nuwe kénukumén i Jesuse. Rénigo noy ni inok fégito noy kééntang i kékukum ne. Atin mélaw béelewe ni, fénwaléyén métintuy de étew munur bé Jesuse.

<sup>27</sup> Mélaw énda i funa tom félangka-langka. Non énda ménwaléy tom métintu sabaf bé kéodoro tome bé kitabe. Yamula ménwaléy tom métintu sabaf bé kéunur tome bé Jesu Kristowe. <sup>28</sup> Been i niy funa kuwe ménbéréh bé funay étewe waléy métintu, békén sabaf bé kéodorone bé kitabe, yamula sabaf saén bé kéunure bé Jesuse. <sup>29</sup> Non i Tuluse békén saén i de Judioy géfengadafe de, éndob fiyon foy de békén Judio géfengadafe ro soy Tuluse. <sup>30</sup> Non sébaan saén i Tuluse. Atin ségiléw i kékétintu nuwe bé de Judio brab de békén Judio, sabaf saén bé kéunur ruwe bé Jesuse. <sup>31</sup> Endob kagom fégitungén de ké ikaa tomén i kitabe. Békén! Non amuk munur tom bé Jesuse, géodoro tom mélaw i kitabe.

## 4

*Fantag bé Abrahame*

<sup>1</sup> Ufama, i Abrahame, sani katufua keye do Judio. <sup>2</sup> Amuk ménwaléy métintu non bé kéodoro nuwe bé de sugu i Tuluse, wén i funa no félangka-langka. Endob gétiga tom ménalsa soy Abrahame, atin mélaw énda i funa no félangka-langka. <sup>3</sup> Non wén i Mén sulfate Kébéréh i Tuluse mano, “Ménunur i Abrahame bé Tuluse. Atin mélaw kénarang i Tuluse métintu sabaf bé kéunur ne.” <sup>4</sup> Ufama, amuk wén i ségétew étew gémalbék, gédoté noy sahud ne. Atin médait sémahud. Békén saén niray de non sahudén bé gémalbék nuwe. <sup>5</sup> Endob békén loo bé nan i kékétintuy Tuluse betom do munur dob Beene. Non féwaléyé no betom métintu sabaf saén bé kégédaw ne. Enda médait tom médot bé ni non énda gémalbék tom de. Ménalsa tom, gido loo kénarang i Tuluse betom métintu non bé kéunur tome bé Jesuse. <sup>6</sup> Been i niy atag i kékéréh Dabide bé méoror kun i étewe ménwaléyén métintu dob adafay Tuluse békén sabaf bé galbék ne. <sup>7</sup> Bénréh Dabide mano, “Méoror i de étew fén sagaday Tulusey de sala ro brab ménkedan i de tete rénigo ro. <sup>8</sup> Toow fo méoror i étewe lénifot i Kadnaney de salaén.” <sup>9</sup> Atin i ni kifiéyonon, békén saén niray dob de Judio, sani de méntuli. Yamula niray so dob de békén Judio, sani de énda méntuli. Non wén i ni Mén sulfate Kébéréh i Tuluse lénabit gu bé gétahé mano, “Ménunur i Abrahame bé Tuluse, atin mélaw kénarang i Tuluse métintu sabaf bé kéunur ne.” <sup>10</sup> Ati gaiwe de fénwaléy i Tuluse métintuy Abrahame? Féntintuy Tulusey Abrahame bé énda séna méntulién de. <sup>11</sup> Tidew béo, ménfétuli i Abrahame. Atin i funa nuwe ménfétuli inok wén i tanda fégito no bé kékétintuy Tuluse de sabaf bé kéunur ne fiyon fo bé énda séna méntulién de. Mélaw i Abrahame ménwaléy maak katufuay de munur bé Tuluse, sani de ménwaléy métintu dob adafa nuwe, fiyon fo ké énda séna méntuli ro. <sup>12</sup> Beene soy katufuay de Judio do munur, éndob békén saén sabaf bé kékétuli ruwe. Yamula sabaf so bé ségiléw i kéunur ruwe bé Abrahame fiyon fo ké énda séna méntulién de.

*I Kéunure*

<sup>13</sup> I Tuluse fénasada noy Abrahame brab de séfuén bé irayén i duniyae dob berowe. Endob i funay Tuluse réménigo bé ni fasad békén sabaf bé kéodoro Abrahame bé kitabe. Yamula non ménunur bé Tuluse funa no so ménwaléy métintu. <sup>14</sup> Non amuk i fénasad i Tuluse irayén dob de étew modor bé kitabe, énda i atag i kéunur i étewe brab énda i laga i fasad i Tuluse. <sup>15</sup> Endob énda waléy tom métintu bé kéodor tome bé kitabe, non been i kitabey funay Tuluse mékerit betom. Non énda géodoro tom de. Endob amuk énda i kitab, énda géféliso tom de.

<sup>16</sup> Rénigoy Tulusey fasad ne sabaf bé kéunur Abrahame de, inok giton i fasad i Tuluse sabaf saén bé kégédaw ne, békén sabaf bé galbék i étewe. Atin i fasade ni kay kéluhanay de séfu Abraham. Non kay de Judio modor bé kitabe brab kay de étew so békén Judio munur loo bé Abrahame. Non i Abrahame, beeney maake katufuay kéluhanay de munur, do Judio brab de békén Judio. <sup>17</sup> Non wén i Ménsulate Kébérélh i Tuluse dob Abrahame mano, “Féwaléyé ku beem katufuay de étew dob de médoor ingéd.” Mélaw dob adafay Tuluse, i Abrahame ménwaléy katufuay de munur bé Tuluse non ségiléw i kéunur ruwe bé beene. I Tuluse unuro tom, toow fo barakatan brab fakay tébuleé noy de ménléhu brab gélimbaga noy de éntingayén énda séna ménlimbagén. <sup>18</sup> I Abrahame ménunur bé Tuluse fiyon fo ké éndaén i inamén géfégéngä. Mélaw ménwaléy katufuay de étew dob de médoor ingéd. Non wén i Ménsulate Kébérélh i Tuluse mano, “I de séfuém waléy ro médoor loo bé kédoooy de gitoon dob lawayo.” <sup>19</sup> Bé beno gai toowén fo lukés i Abrahame, gédét mératuh gébélantuwa i idad ne, brab gétiga no éndaén fakayén géfégéngä. Atin gétiga no soy bawag ne Sarah éndaén fakayén géfégéngä non toowén fo lukés so. Endob fiyon fo ké loo bé niy kélubay i lowoh ne, émbagér i kéunur Abrahame bé Tuluse. <sup>20</sup> Brab énda ruwo-ruwoy fédew ne fantag bé fasad i Tuluse de, yamula fénégétén i kéunur ne brab dénayéwén i Tuluse. <sup>21</sup> Non tintu fo séménarig dob Tuluse bé rigoné noy atiy fénasad ne dob beene. <sup>22</sup> Atin mélaw kénarang i Tuluse métintu sabaf bé kéunur ne. <sup>23</sup> Atin bang i ni Ménsulat Kébérélh i Tuluse mano, “Kénarang i Tuluse métintu” békén saén fantag bé Abrahame. <sup>24</sup> Yamula sénulatén so dob betome do munur bé Tuluse, sani téménébulee bé Jesuse Kadna tom, inok karangéy Tuluse so betom métintu sabaf bé kéunur tome. <sup>25</sup> Non i Jesuse sénugu i Tuluse inok féléhuén gémantinon betom sabaf bé de sala tom. Tidew beno, ménébule, inok waléy tom métintu dob adafay Tuluse.

## 5

*I kénéfintuy Tuluse*

<sup>1</sup> Mélaw i Tuluse fénwaléyén betom métintu dob adafa nuwe sabaf bé kéunur tome bé Kadna tome Jesu Kristo. Atin sabaf bé ni rénigo Jesuse, éndaén mérékrit i Tuluse betom. <sup>2</sup> Atin non bé kéunur tome bé Jesuse, fénfakayén i kégédote bé kégédaw i Tuluse béléewe. Mélaw toow tom fo moror non gétiga tom rémendaw tom moso loo bé Tuluse. <sup>3</sup> Atin békén saén i niy funa tome moror. Moror tom so bé de mérégén géagéwo tom non sabaf bé de kérégénon, waléy tom géfedayday munur. <sup>4</sup> Atin amuk géfedayday tom munur, mésuwat i Tuluse betom. Atin amuk mésuwat i Tuluse betom, waléy émbagér i inam tome. <sup>5</sup> Atin i inam tome métuman, non fénggitoy Tulusey kégédaw ne betom bé kéray ne bé Rémodor ne mangéy dob de fédew tom.

<sup>6</sup> Amun maak do férisu tom séna bé de sala tom brab énda gétabanga tom i lowoh tome, i Tuluse ténabangén betom dob fénemili ne gai. Non ménléhuén i Nga ne Jesus inok fukasé no betom do tete étew. <sup>7</sup> Toow fo mérégén i ségétéwe étew méléhu inok tabangé noy métintuwe étew. Gido loo, wén so keey i ségétéwe étew méléhu inok tabangé noy métintuwe étew. <sup>8</sup> Endob i Tuluse, fénggitoy noy kégédaw ne betom, non fiyon fo ké ménalsa tom de séna, ménléhu i Kristowe génantino no betom. <sup>9</sup> Atin béléewe ni, ménwaléy tom métintu dob adafay Tuluse sabaf bé kéléhu Kristowe. Mélaw toow na fo gétiga tom bé mífukas tom tidew dob kékukum i Tuluse sabaf bé Kristowe. <sup>10</sup> Bé gétahe de, sébanil i Tuluse betom, éndob sabaf bé kéléhu i Nga ne, ténayakufén man betom. Mélaw non béléewe ni do dumoy Tuluse nén betom, tintu gétiga tom mífukas tom sabaf bé kétibule i Nga ne. <sup>11</sup> Atin békén saén bé ni! Méoror tom fo toow non bé kégédaw i Tuluse fénggitoy no fénagéw dob Kadna tome Jesu Kristo. Been i niy funay Tuluse ménkédan i kérít ne betom brab ténayakufén betom.

*I Adame brab Kristowe*

<sup>12</sup> I funa nuwe wén i do tete dob duniyae ni, non ménalsa i sunguwe étew fénawé Adam. Atin kéléhu i bayad i salae. Tidew beno, léménégéb i tetee mangéy dob kéluhanay étewe. Mélaw i kéluhanay kílawane méléhu non i kéluhanane ménalsa. <sup>13</sup> Fiyon fo ké

énda séna niray Moisesey kitabe de, wénén i do sala dob duniyae ni. Endob amun énda sénay kitab de, énda so ménbilang i de sala de. <sup>14</sup> Gido loo, ménléhu i kéluhanay étew tidew dob Adame taman dob Moisese, fiyon foy de étew énda ménsala ro loo bé kékéfélis Adame bé sugu i Tuluse.

I Adame maak anlung Kristowe non wén i gédotéy kélawane tidew dob berowe. <sup>15</sup> Endob békén ro ségiléw non i iray i Tuluse békén ségiléw bé sala Adame. Médooy étewé ménléhu sabaf bé sala Adame. Endob toow na fo dakél i kégédaw i Tuluse irayén bé kékésagad ne bé médoowe étew sabaf bé kégédaw Jesu Kristowe. <sup>16</sup> Atin loo so bé ni, békén ségiléw i kégédaw i Tuluse bé sala Adame. Non mékukum i kélawane sabaf bé sébaane saén sala Adame. Endob amun médooy de étew réménigo médooy do sala, ménwaléy métintuy kélawane dob adafay Tuluse sabaf saén bé kégédaw ne. <sup>17</sup> Sabaf bé sala Adame, méléhu i kéluhanay kélawane. Endob toow na fo mékégaif i rénigo Jesuse non sabaf bé kégédaw Jesu Kristowe, gédotén i kékésagad i Tuluse brab kékétintu nuwe. Atin i de étew do waléy métintu sabaf bé kégédaw i Tuluse, beroy Tuluse méguléw.

<sup>18</sup> Mélaw amuk sabaf bé sébaane sala Adame, mékukum i kéluhanane de, ségiléw so bé sébaane fiyo rénigo Jesu Kristowe. Non sabaf bé rénigo Jesuse, méfukas i kéluhanane inok énda mékukum ro brab gédoté roy umule magufusa. <sup>19</sup> Non i médoowe ménwaléy ménsala sabaf bé Adame énda modorén bé sugu i Tuluse, éndob médooy ménwaléye métintu dob adafay Tuluse sabaf bé kéodor Jesuse bé sugu i Tuluse.

<sup>20</sup> I funay Tuluse nirayén i kitabe inok méuman i kégítone bé salae. Endob amun minut médooy kégítone bé salae, toow na fo méuman i kégédaw i Tuluse bé kélawane. <sup>21</sup> Mélaw fiyon fo ké dakél i bagér i salae non méléhu i de étew, toow na fo barakatan i kégédaw i Tuluse non féwaléyé no betom métintu. Mélaw méuyag tom taman sa taman sabaf bé Kadna tome Jesu Kristo.

## 6

### *Maak ménléhu i tafaye adat*

<sup>1</sup> Ati mélaw i fégitungé tome? Wén keey i dufang gébéréh bé fatut fétausé tom kun i késala tome inok méuman i kékésagad i Tuluse brab kégédaw ne betom. Endob békén fo katabuwan i nan. <sup>2</sup> Enda fakayén ké taus tom mésala non i sunguwe adat tom maak ménléhuén brab ménwaléy tomén métintu. <sup>3</sup> Aw énda gétiga kom de kéluhanan bé amun bénautis tom, fenggito tom ménwaléy tom do dumo Jesu Kristowe, maak ménamung tom so bé kéléhu ne? Non Been i géménantinon betom. <sup>4</sup> Mélaw amun bénautis tom maak ménamung tom so bé kéléhu ne brab kélébénge de. Atin sabaf bé barakat i Tuluse, méntébule i Kristowe. Ménrigoy ni inok wén soy katom bé mantuwe umul brab adat.

<sup>5</sup> Non amuk ménamung tom so bé kéléhu Kristowe, tintu fo géamung tom so bé kétébule ne. <sup>6</sup> Atin gétuwa tom i ni, i tafaye umul tom brab adat tome maak ménléhuén énggéodor bé Kristowe dob kruse, inok i tafaye adat ménsala mékédanén. Mélaw békénén riféy salae betom, non éndaén géfégéso no betom rémigo tete. <sup>7</sup> Non i étewe ménléhuén, éndaén gésalaén. <sup>8</sup> Atin non maak ménléhu tomén séréngan bé Kristowe, munur tom bé méuyag tom so betom ro Kristowe. <sup>9</sup> Non gétiga tom éndaén méléhu ségule i Kristowe non méntébuleén. Mélaw éndaén gétabanay léhuone de. <sup>10</sup> Ménléhu saén ségule inok gantino noy kéléhu i kélawane non bé de sala tom. Atin méntébule, brab i umul ney funay Tuluse mésuwat. <sup>11</sup> Mélaw loo so bé ni, fatut tédemé kom bé éndaén kailanga kom i rémigowe sala, non maak ménléhu gom séréngan bé Jesuse. Atin tédem gom i mantuwe umul gom brab adat gome sabaf bé kewaléy gome do dumo Jesu Kristowe brab i umul gomey funay Tuluse mésuwat.

<sup>12</sup> Mélaw, do dumo gu, kagom fédayaén i de tete kétaya kom émfésala bé de lowoh gom dob duniyae ni. Kagom magayun bé de tete. <sup>13</sup> Atin kagom fédayaén i réfa i de lowoh gom mésala usaré kom fégérigo gom tete. Yamula iray gom i lowoh gome dob Tuluse inok usaré no bé fiyowe rigonén. Non been i fatute rigoné kom do ménfukasén tidew dob kéléhue brab wénén i mantu umul gom brab adat. <sup>14</sup> Mélaw kagomén fédayaén

i salae méguléwon begom, non éndaén sémarig gom bé kéodoro kome bé kitabe. Yamula sémarig gom bé kégédaw i Tuluse.

### *I kérigowe bé fiyowe*

<sup>15</sup> Wén keey i dufang gébéréh bé fatut fétausé tom kun soy késala tome non éndaén sémarig tom bé kéodor tome bé kitabe, atin sémarig tom saén bé kégédaw i Tuluse. Endob békén i nan. <sup>16</sup> Gétiga kom, amuk mamfun gom, waléy gom do rifén. Mélaw amuk modor gom bé amu gome sala, méléhu gom. Endob amuk modor gom bé amu gome Tulus, waléy gom métintu. <sup>17</sup> Fésalamatu bé Tuluse non fiyon fo ké riféy salae begom bé do gétah, ménwaléy gom so méégét munur bé toowe kétoro fantag bé Jesuse énggelingoo kom. <sup>18</sup> Atin amun méntangéy gomén tidew dob salae, ménwaléy gom do métintu sugu-suguéy Tuluse. <sup>19</sup> I funa kuwe ménbéréh bé ni ufama fantag bé riféne brab amue, inok magad i kégésobut gome bé kétoro guwe. Bé do gétah, maak do rifén gom bé de tete kétaya kom. Mélaw namfuno kom i de tete do mékérésik rigoné kom brab ménumanan i de sala gom. Endob béleewe ni téféwaléy gom rifén dob métintuwe inok gérigono kom i fiyowe kétayay Tuluse.

<sup>20</sup> Bé do gétah, amun riféy salae séna begom, énda gétiga kom i fantage bé fiyowe brab métintuwe. <sup>21</sup> Bé do no gai, énda gédoté kom i barase sabaf bé de tete rénigo gom. Kéléhu saén i gédoté kome de sabaf bé de ni sala. Atin béleewe ni mémala gom fantag bé de rénigo gom bé do gétah. <sup>22</sup> Endob béleewe ni méntangéy gomén dob salae brab ménwaléy gom do sugu-suguéy Tuluse. Atin i gédoté kome baras i fiyowe umul taman sa taman brab fiyowe adat funa kom gérigo bé kétayay Tuluse. <sup>23</sup> Non i étewe mésala, gédote noy bayad i salae, sani kéléhue. Endob i étewe munur bé Kadna tome Jesu Kristo, iray i Tulusey umule magufusa dob beene.

### 7

#### *Fantag bé kitabe*

<sup>1</sup> Do dumogu, gésobuto kom damén i ni non énggétiga kom i fantage bé kitabe. I kitabe wén i atura no bé étewe taman méuyag séna. <sup>2</sup> Ufama, i libune wén i bawagén. Ménbéréh dob kitabe bé énda fakayén sétayan bé ségiyowe saliyu bé bawag ne taman méuyag ro séna. Endob amuk ménléhuén i bawag ne, fakayén mawag ségiyo. <sup>3</sup> Mélaw amuk sétayan bé ségiyowe lagéy ké méuyag sénay bawag ne, énggélamfa brab énda nodoro noy kitabe. Endob amuk ménléhuén i bawag ne, fakayén mawag ségiyo brab énda ménslaén. <sup>4</sup> Mélaw do dumogu, ségiléw so bé betome, non amun ménléhuén i Kristowe génantino no betom, maak ménléhu tom so. Mélaw éndaén kailanga no odoro tom i kitabe niray Moisese. Atin béleewe méuyag tom man séréngan bé Jesuse sabaf bé kétébule ne. Non i betome maak lowoh Kristowe brab Been i uléw tome. Mélaw gérigono tom i atiy kétayay Tuluse. <sup>5</sup> Bé do gétah, ménodor tom séna bé de tete kétaya tom. Atin non wén i de médo do énda fakayén dob kitabe, toow fo ménuyot tom de rémigo. Atin non rénigo tom, ménkukum tom bé bayad i salae, sani kéléhue. <sup>6</sup> Endob béleewe, munur tomén bé Jesuse, mélaw fénukasén betom dob kitabe. Atin mélaw éndaén kailanga tom i modore bé kitabe inok waléy tom métintu, non amun ménléhu i Jesuse, maak ménléhu tom so funa tom ménfukas. Atin béleewe ni, wén i mantuwe agéwon fatut odoro tom. Been i Rémogor i Tuluse, sani tétabangane betom. Mélaw éndaén kailanga tom i modore bé tafaye agéwon inok waléy tom métintu, sani kitabe tidew dob Moisese.

<sup>7</sup> Ati mélaw i gébérého tome fantag bé kitabe? Aw been i kitabey funa tome gésala? Békén! Yamula, i kitabe, fénggito no begén i de sala gu. Ufama, amuk énda énggétiga kuy kitabe mano, "Kago mingar," énda gétiga kuy fantage bé kéingare. <sup>8</sup> Mélaw amun énggétiga ku tete i mingare, ménumanan i kéuyot guwe mingar sabaf bé kitabe. Non amuk énda i kitab, énda i bagér i salae. <sup>9</sup> Amun énda séna gétiga kuy fantage bé kitabe, énda méuyotu rémigo sala. Endob amun énggétiga kun i kitabe, toow fo ménuyotu rémigo sala, <sup>10</sup> atin ménwaléyu médait méléhu. I funay Tuluse méniray bé kitabe, inok

i de munur de méuyag ro taman sa taman. Endob ménsébélue non been uman i funa kuwe méukum méléhu non énda géodoro ku de. <sup>11</sup> Fénggakaray salae begén bé kitabe, atin kénukum i salae begén méléhu bé kitabe.

<sup>12</sup> Endob i kitabe, tidew dob Tuluse, brab métintu brab fiyo brab mécétéfu. <sup>13</sup> Wén keey i dufang góbéréh bé i fiyowe kitab i funa tome méukum méléhu. Endob békén toow i ni. Yamula, de sala tom i funa tome méukum méléhu non énda géodoro tom i fiyowe kitab émfégito bé de sala. Mélaw sabaf bé kitabe, giton toow fo tete i de sala tom.

<sup>14</sup> Gétiga tom fiyoy kitabe non tidew dob Rémogor i Tuluse. Endob riféy salae begén non kéilawanu saén. <sup>15</sup> Enda gésobuto kuy rigoné kuwe. Non i kétaya kuwe rigonén, énda gérigono ku de. Yamula gérigono ku uman i kéikaa kuwe rigoné ku. <sup>16</sup> Atin amuk rigoné kuy éndae fakay dob kitabe, fiyon fo ké mikau de rémigo, giton i kéfagayu kuwe bé métintuy kitabe. <sup>17</sup> Mélaw, békén begén i rémigowe bé de ni do sala. Yamula rigoné teteetee dob lowoh guwe. <sup>18</sup> Gétiga ku énda i fiyo dob tafaye adat gu. Non fiyon fo ké méuyotu fo rémigo bé fiyowe, éndob énda gérigono ku de. <sup>19</sup> Non énda gérigono kuy fiyowe kétaya ku rigoné ku. Yamula gérigono kuy teteetee kéikaa ku. <sup>20</sup> Atin amuk rigoné kuy békéne kétaya ku, békén begén i rémigowe de. Yamula rigoné teteetee dob lowoh guwe.

<sup>21</sup> Ay niy mérigowe dob begéne. Amuk méuyotu rémigo fiyo, élénéy teteetee dob lowoh guwe. <sup>22</sup> Endob i fiyowe dob fédew guwe toow fo méuyot modor bé kétayay Tuluse. <sup>23</sup> Endob i teteetee dob lowoh guwe sébanil bé fiyowe dob fédew guwe. Atin fégésé no begén rémigo bé békéne kétayay Tuluse. Mélaw maak ménférisuwu dob salae. <sup>24</sup> Toowu fo mécégédaw-gédaw. Ati gétabange begén inok énda rifénu dob kagéne ni lowoh toow fo tete funa ku méukum méléhu? <sup>25</sup> I Tuluse, Been saén i gétabange begén. Mélaw toow fo fésalamata kuy Tuluse! Non télangéyén begén sabaf bé rénigoy Kadna tome Jesu Kristo.

Mélaw i fédew guwe modor bé kétayay Tuluse, fiyon fo ké i lowoh guwe géodor bé teteetee.

## 8

### *I mantuwe adat*

<sup>1</sup> I betome do ménwaléy dumo Jesu Kristowe, énda kukuméy Tuluse betom. <sup>2</sup> Non sabaf bé kewaléy tome dumo Jesu Kristowe, i Rémogor i Tuluse fénukasén betom brab nirayén betom i umule magufusa. Atin mélaw éndaén i mémégés betom mésala funa tom méléhu. <sup>3</sup> I kitabe énda gétabanga no betom, non énda géodoro tom de. Endob i Tuluse, Been i témabangane betom. Sénuguén i Nga ne Jesus inok waléy kéilawan éndob énda i salaén. Tidew bénou, ménléhu i Jesuse génantino no betom inok mécédan i de sala tom. Mélaw éndaén kailanga tom i modore bé de tete kétaya tom. <sup>4</sup> I funay Tuluse réménigo bé ni inok géodoro tom i fatute dob kitabe. Fakay i ni amuk fémanduoy Rémogor i Tuluse betom, brab éndaén fémanduoy teteetee kétayay de lowoh tom betom. <sup>5</sup> Non i de étew fémanduoy teteetee kétayay de lowoh ro, fégitungé ro saén i fantage bé teteetee kétayay de lowoh ro. Endob i de étew fémanduoy Rémogor i Tuluse, fégitungé roy fiyowe loo bé kétayay Rémogor i Tuluse. <sup>6</sup> I étew fémanduoy teteetee kétayay lowoh ne, méléhu. Endob i étew fémanduoy Rémogor i Tuluse, méuyag taman sa taman, atin éndaén mécérit i Tuluse de. <sup>7</sup> Non i de étew fémanduoy de tete kétayay de lowoh ro, sébanil bé Tuluse. Non énda modor ro bé kitab i Tuluse non énda gagane ro de. <sup>8</sup> I de étew fémanduoy teteetee kétayay de lowoh ro, énda gáfésuwata roy Tuluse.

<sup>9</sup> Endob i begome, éndaén fémanduoy teteetee kétayay de lowoh gom begom. Yamula fémanduoy Rémogor i Tuluse begom, amuk bat i Rémogor i Tuluse dob begome. Atin i éndae batoy Rémogor Kristowe, békén so kuyug Kristowe. <sup>10</sup> Endob amuk bat i Kristowe dob de fédew gom, fiyon fo ké méléhu i de lowoh gom sabaf bé de sala gom, méuyag gom taman sa taman non métintu gom dob adafay Tuluse. <sup>11</sup> I Tuluse, Been i téménébulee bé Kristowe. Atin amuk bat i Rémogor i Tuluse dob de fédew gom, tébuleé no so begom bé Rémogor ne bat i dob begome.

<sup>12</sup> Mélaw do dumo gu, kailanga tom i modore, éndob békén i tetee kétayay de lowoh tom i fatute odoro tom. <sup>13</sup> Non amuk odoro kom i fémandu i tetee kétayay de lowoh gom, méléhu gom. Endob amuk odoro kom i fémandu i Rémogor i Tuluse, tagaké kom i tetee tafay adat brab méuyag gom taman sa taman. <sup>14</sup> Non i de fémanduooy Rémogor i Tuluse, beroy de nga i Tuluse. <sup>15</sup> Non i Rémogor i Tuluse nirayén dob betome, békén fénwaléyén betom do rifén mégilak bé Tuluse. Yamula fénwaléyén betom do nga i Tuluse. Atin sabaf bé Rémogor i Tuluse, gétawaga tom i Tuluse “Boh tom.” <sup>16</sup> Atin i Rémogor i Tuluse, Been i émfégésobute betom bé do nga Tulus tom. <sup>17</sup> Atin amun do ngaén betom, gédoté tom moso i de kéfijonon fénasadén betom. Atin gédoté tom soy de éntingayén gédoté Kristowe. Non amuk mérasay tom ségiléw bé kérasay Kristowe, gédoté tom i toowe fo fiyo séréngan bé Beene.

### *I gaiwe moso*

<sup>18</sup> Atin dob karang guwe de, ulanden bé de kérasay tom dob duniyae ni béleewe. Non toow na fo dakél i bantugane gédoté tom moso. <sup>19</sup> Non i kéluhanay de éntingayén lénimbag i Tuluse, toow fo ongot-ongoté roy gaiwe fégitoy Tulusey de ngaén. <sup>20</sup> Non i de éntingayén lénimbagén, éndaén ménfiyo ro, békén dob karowe kétayan éndob dob kétayay Tuluse non Been i kéménukume de. Endob wén soy inam de, <sup>21</sup> non i kéluhanay lénimbag ne, fégaliné no so inok éndaén mérénah ro, brab éndaén riféy kélöhue bero, non féwaléyéy Tuluse bero mantu loo bé kéféwaléy ne bé de ngaén mantu. <sup>22</sup> Non gétiga tom taman béleewe ni, i kéluhanay de lénimbagén démorong ro loo bé kédorong i kéumahane libun. Non ongot-ongoté roy kéfuwaléye bero mantu. <sup>23</sup> Atin békén saén i berowe. Non i betome, énggédot tomén i Rémogor i Tuluse, sani tandaé bér wén nay iray i Tuluse betom. Mélaw démorong tom so dob de fédew tom bé kéongot-ongot tome bé kéfuwaléy i Tuluse betom do ngaén brab kégali nuwe bé de lowoh tom. <sup>24</sup> Ménfukas tom sabaf bé inam tome bé Tuluse émféantu betom inok méuyag tom taman sa taman. Endob amuk gito tomén, békénén inam. Non wén i inam tom amuk énda séna gito tom i no ongot-ongoté tom. <sup>25</sup> Endob amuk wén i inam tom atin énda séna gito tom i no inam tom, témingkél tom ongot-ongot.

<sup>26</sup> Loo so bé nan i kétabangay Rémogor i Tuluse betom amuk énda tintu méégét i kéunur tome. Non énda gétiga tom i atiy fatute dasala tom. Endob fédasaléy Rémogor i Tuluse betom dob de fédew tom usaré noy de éntingayén énda góbérého tom de. <sup>27</sup> Atin i Tuluse, sani gétiga noy de fédew tom, gésobuto noy kédasal i Rémogor ne non démasal mongot tétabang betom do munur loo bé kétayay Tuluse.

<sup>28</sup> Atin gétiga tom i ni. I de betom fénimu i Tuluse, sani de étew fénémilién sabaf bé kétaya nuwe, fiyon atiy mérigowe dob betome, rigonéy Tulusey nan bé kétifiono tome. <sup>29</sup> Non bé do gétah, énggétigay Tuluse nén atiy isuwe do waléy ngaén. Atin fénémilién bero inok rénigo no bero waléy loo bé Nga ne Jesus, inok i Beene waléy ofo tom. <sup>30</sup> Atin i de betom do fénémili, fénunurén betom, atin fentintu no betom, maak énda i sala tom. Atin féamungé no so betom bé kégérotor Kristowe.

### *I kégédaw i Tuluse*

<sup>31</sup> Amuk fégitungé tom i fantage bé ni, gétiga tom i ni: I Tulusey dumo tome. Mélaw énda i gétaban betom. <sup>32</sup> I Tuluse énda ménikaén miray bé buntunge Ngaén Jesus. Yamula tébulakén fénggéganti no betom kéluhanan. Amuk loo bé nan i kégédaw ne, irayén so betom i kéluhanay kailanga tome. <sup>33</sup> Enda i gétébo betom do fénémili i Tuluse. Non Tulusey ménféwaléye betom métintu dob adafa nuwe. <sup>34</sup> Enda i gékukum betom. Non i Jesu Kristowe, Been i ménléhu brab méntébule brab déméniat mangéy dob kuwonoy Tuluse inok ongoté no fésagadan tom. <sup>35</sup> Enda i gékédan bé kégédaw Kristowe betom. Fiyon fo ké kérégénan tom, taloo no wén i émférasay betom, taloo no méléyaf tom, taloo no méskinan tom, taloo no kakaidan tom, taloo no méléhu tom, énda gékédana roy kégédaw Kristowe betom. <sup>36</sup> Non wén i Ménsulate Kébéréh i Tuluse

mano, “Kakaidan tom féléhuén sénga tékélid sabaf betom i do kuyugén. Maak do bili-bili tom gédét do sumbalién.” <sup>37</sup> Mélaw fiyon fo ké kakaidan tom, témaban tom so sabaf bé Jesuse sani mégédawe betom. <sup>38</sup> Non gétiga ku énda i gékedan bé kégédaw i Tuluse betom, fiyon fo ké méléhu tom taloo no méuyag tom. Fiyon i de télaki taloo no do saitan, énda gékedana roy kégédaw Jesuse betom. Enda i éntingayén dob ni béleewe taloo no mangéy séna dini, gégaga de. I de barakat ro énda gégaga ro. <sup>39</sup> Enda i éntingayén dob rotoro, taloo no dob ménaléme, gégaga de. Enda i sébaan lénimbag gékedan bé kégédaw i Tuluse betom fénagewén dob Kadna tome Jesu Kristo.

## 9

*Fantag bé de Judio*

<sup>1</sup> Wén i béréhé ku begom. Atin i ni béréhé ku, toow fo toow. Munuru bé Kristowe, mélaw énda témugiu. I Rémogor i Tuluse bati dob fédew guwe brab mémanduon begén. Mélaw gétiga ku, toow i ni béréhé ku begom. <sup>2</sup> Toow fo tete i fédew guwe béleewe ni brab démawét i fédew guwe non bé de étew gu, do dumo gu Judio, non énda munur ro bé Kristowe. <sup>3</sup> Amuk gagané ku saén, méuyotu damén méukum gémantinon bero, brab waléyú sésuway bé Kristowe, inok i de dumo gu do Judio waléy ro munur bé Kristowe. <sup>4</sup> Beroy de ténayakuf i Tuluse bé do gétah maak do ngaén. Fénggito no beroy barakat ne, brab fénasada no bero féfiyoné no bero. Brab nirayén beroy kitabe, brab fatute adat bé kéfengadafe, brab do fasad. <sup>5</sup> Fénemili i Tulusey de katufua ro. Brab i Kristowe, ségetew bero amun ménwaléy kéilawan, non ménumphah ségetew Judio. Mélaw i Tuluse, sani méguléwe bé kéluhanane, médayew dam taman sa taman! Amen!

<sup>6</sup> Enda bénréh gu de ké énda tumanéy Tulusey fasad ne dob de Judio. Non békén kéluhanay de Judio do tintu méngintulus loo bé fatute damén. <sup>7</sup> Békén kéluhanay de Judio, sani de séfu Abraham, do tintu méngintulus. Non bénréh i Tuluse dob Abrahame bé do gétah mano, “Do séfu i nga me Isak saén i de tintu séfuém.” <sup>8</sup> Ay niy atag i ni, békén kéluhanay de séfu Abraham do nga i Tuluse. Non i Isake ménumphah sabaf bé kéunur Abraham bé fasad i Tuluse. Atin ségiléw so béleewe ni. Non i de étew do séfu Isake tidew dob fasad i Tuluse dob Abrahame, i ménwaléye do nga i Tuluse. <sup>9</sup> Non fénasad i Tuluse bé Abrahame mano, “Bé fatute gai, séfuleu. Atin bé bénou, géfégéngé i bawag me Sarah ségetew nga lagéy.”

<sup>10</sup> Atin békén saén i ni. Non i nga ruwe féndawét Isak wén i ruwo gétew ngaén bé bawag ne Rebekah. Beroy de séfing féndawét Jakob brab Esaw. <sup>11-12</sup> Atin amun obor sénay Rebekahe de, bénréh i Tuluse de mano, “I ofoe de waléy sugu-suguéy tuwaréye de.” Mélaw bénréh i Tulusey fantage bé ati mérigowe dob de ni do nga, fiyon fo ké énda séna ménumphah ro, brab fiyon fo ké énda séna réménigo ro fiyo taloo no tete. Réningoy Tulusey ni inok gétiga tom i kéfemili i Tuluse bé békén sabaf bé fiyowe rigonéy de étew taloo no bé tete, yamula sabaf bé kétayay Tuluse saén. <sup>13</sup> Non wén i Ménsulate Kébéréh i Tuluse mano, “Toow na fo fénimu guy Jakobe bé Esawe.”

<sup>14</sup> Amuk loo bé ni, aw gébérého tom ba énda méentang i rigonéy Tuluse? Békén! <sup>15</sup> Non ménbéréh i Tuluse dob Moisese bé do gétah mano, “I étewé kétaya ku kéruray na guwe, méuray i na guwe de. Atin mégédawu bé étewé kétaya ku kégédawa ku.” <sup>16</sup> Mélaw i funay Tuluse féfiyoné no étewé békén sabaf bé réningoy étewé loo ké kétayay étewé. Yamula i funa nuwe saén émféfiyo bé étewé non bé kégédaw ne de. <sup>17</sup> Non wén i ni Ménsulat Kébéréh i Tuluse dob datue dob Egipto mano, “I funa kuwe beem ménféwaléy datu inok fégiyo guy barakat guwe sébanil beem, atin émbantugu mélaw dob kéluhanay sugud i duniiae ni.” <sup>18</sup> Mélaw gétiga tom mégédaw i Tuluse bé de étew kétaya no kégédawa no. Brab fétégasé noy uléw i de étew kétaya no fétégasé no.

<sup>19</sup> Atin amuk sumbulo kom begén bé bénréh guwe makom, “Sedek kukuméy Tulusey de étewé ké énda munur ro sabaf bé kétégas i Tuluse bé de uléw ro? Enda i géatuh bé Tuluse.” <sup>20</sup> Endob énda i kuwagib gom sémumbul démowoy bé Tuluse loo bé nan. Ufama, i binanggae énda gériklamo no dob réménigowe de mano, “Sedek rénigo mo begén loo

bé ni?” Ségiléw so bé étewe, énda fatut riklamo no dob Tuluse. <sup>21</sup> Non i rémigowe bé ruwowe timan binangga, fiyon fo ké sébaan saén i fégérígowe de, sani métégase fantad, wén i kuwagibén rémigo bé sébaane de toow na fo fiyo brab balilaga.

<sup>22</sup> Ségiléw so bé rénigoy Tuluse. Méuyot i Tuluse émfégito bé kékérít ne brab émfégétigan bé barakat ne. Atin toow fo téningkélén i kékérít ne bé de étew fatut métukum. <sup>23</sup> Atin méuyot so émfégito bé toowe kéfiyo no, énggiton dob dakélé kégédawén betom do méntafayén féwaléyé no fiyo loo bé Beene. <sup>24</sup> Non betom i de fénémili i Tuluse, békén saén tidew dob de Judio, yamula fiyon foy tidéwe dob de békén Judio so. <sup>25</sup> Non wén i Kébérél i Tuluse fénsluatén bé Hoseawe mano, “I de étew békén kagén, féwaléyé ku bero do kagén étew. Atin i de étew énda séna mégédawu bero, mégédawunén bero. <sup>26</sup> Atin dob ingéde bénrého ku bé békén ro do kagén étew, diyo fédawétén ro do nga i méuyage Tulus.” <sup>27</sup> Atin ménbérél soy Isaiase bé do gétah fantag bé de Judio mano, “Fiyon fo ké médooy de Judio loo bé kédooy de farék dob de dénsaan énda kéluhana ro méfukas dob de sala ro, éndob kloh saén. <sup>28</sup> Non i Kadnane fagayasé no kukumén i kéluhanay kéilawane.” <sup>29</sup> Atin ménbérél soy Isaiase bé do gétah mano, “I barakatane Kadnan Tulus, amuk énda mécumay i na nuwe betom do Judio, météy tom métukum kéluhanan loo bé kékukum ne bé de étew dob Sodom brab dob Gomora.”

<sup>30</sup> Ay niy atag i ni bénréh gu. I de békén Judio, fiyon fo ké énda téménlama ro waléy métintu, wén i do ménwaléy métintu bero dob adafay Tuluse sabaf bé kéunur ruwe.

<sup>31</sup> Endob i de Judio, énda waléy ro métintu fiyon fo ké télamané roy waléye métintu bé kéodoro ruwe bé kitabe. <sup>32</sup> Sede? Non énda sémenarig ro bé Jesu Kristowe. Yamula sémenarig ro bé de rigoné ro. Mélaw maak énggébangkud ro dob dakélé batéw. <sup>33</sup> Non wén i Ménsulate Kébérél i Tuluse mano, “Fédiyoé kuy batéwe dob Sion, sani ingéd i de Judio. Atin i de étew énda mécinugut ro de, maak gébangkud ro brab mélawu ro. Endob i de étew munur ro de, féfiyoné ku bero.”

## 10

<sup>1</sup> Do dumogu, ay niy kétaya kuwe brab kédasal guwe dob Tuluse: Méuyotu de fo ké méfukas i de dumogu Judio dob de sala ro. <sup>2</sup> Gétiga kuy témantu ro méngintulus, éndob békén katabawan i kékéngintulus ruwe non békén toow i kétoroe unuro ro. <sup>3</sup> Enda nodoro roy aguwone fantag bé kékétintuy Tuluse bé étewe. Yamula téménlama ro rémigo karo agéwon waléy métintu, sani kéodoro ruwe bé kitabe. Atin mélaw énda ménodor ro bé agéwoy Tuluse. <sup>4</sup> Wén i mantuwe agéwon mangéy dob Tuluse. Been i kéunure bé Jesu Kristowe. Mélaw i de munur bé Kristowe waléy ro métintu. Atin éndaén kailanga roy modore bé kitabe inok waléy ro métintu.

<sup>5</sup> Sénulat Moisesey fantage bé kékwaléye métintu sabaf bé kéodorone bé kitabe mano, “Amuk wén i étew tintu fo modor bé kitabe énda félisé no de, gédoté noy umule magufusa.” <sup>6</sup> Endob ay niy Ménsulate Kébérél i Tuluse fantag bé kékwaléye métintu sabaf bé kéunure mano, “Kagom fégitungén de ké kailanga kom sélédén i Kristowe dob lawayo inok féangéyé kom fantad mangéy dob betome. <sup>7</sup> Atin kagom fégitungén de ké kailanga kom i mangéye dob gonoy de ménléhu inok angéyé kom tébuleén i Kristowe.”

<sup>8</sup> Non ay niy Ménsulate Kébérél i Tuluse mano, “Toow fo gédét i kékérél i Tuluse dob begome. Diyo dob de ba gom brab dob de fédew gom.” Atin been i niy Fiyowe Uret fantag bé kéunure bé Kristowe ureté key. <sup>9</sup> Non amuk fayagé kom i Jesuse Kadnan bé de ba gom, brab amuk toow fo mécinugut gom dob de fédew gom bé ténebule i Tulusey Jesuse, méfukas gom dob de sala gom. <sup>10</sup> Non i kéunure dob de fédew i funane waléy métintu dob adafay Tuluse. Brab bé kékayage de bé baey funane méfukas dob de sala.

<sup>11</sup> Non wén i Ménsulate Kébérél i Tuluse mano, “I kéluhanay munure de gédoté ro saén i fiyowe.” <sup>12</sup> Non dob adafay Tuluse énda i sébidanay de Judio brab de békén Judio. Enda i ramigoy Tuluse. Non i Kristowe, Been i Kadnay kéluhanay de munur dob Beene, brab tabangé noy kéluhanay de témawag mongot dob Beene. <sup>13</sup> Non wén i Ménsulate Kébérél i Tuluse mano, “I kéluhanay de témawag bé Kadnane mongot tabang, méfukas ro.”

<sup>14</sup> Endob énda gétawagay de étew de amuk énda séna munur ro de. Atin énda géunur ro amuk énda séna énggelingoo roy fantage bé Jesuse. Atin énda gélingoo ro de amuk énda i muret fantag bé Jesuse dob berowe. <sup>15</sup> Atin énda i géuret de amuk énda i séménugu bé murete. Wén i Ménsulate Kébérél i Tuluse fantag bé ni mano, “Toow fo fiyoy kégumah i de étew magéw mangéy muret bé Fiyowe Uret.” <sup>16</sup> Endob békén kéluhanay de mégélingo munur bé Fiyowe Uret. Non wén i sénulat Isaiase dob Ménsulate Kébérél i Tuluse mano, “Kadnan, kloh i de munur bé uret geye.” <sup>17</sup> Mélaw géunur i étewe amuk gélingoo noy toowe uret fantag bé Kristowe.

<sup>18</sup> Wén keey i émbérél mano, “I funay de étew énda munur non énda séna énggelingoo ro de.” Endob békén toow i nan non i kéluhana ruwe énggelingo ron. Non wén i Ménsulate Kébérél i Tuluse mano, “I urete énggelingoon dob kéluhanay sugud i duniiae, atin i kébérél ménlégéb dob kéluhanane.” <sup>19</sup> Atin amuk wén i émbérél mano, “Endob i de Judio énda énggésobuto ro de keey,” énda toow i nan. Non sénulat Moisese dob Ménsulate Kébérél i Tuluse mano, “Fédaléwé ku begom do Judio non fukasé kuy de békén Judio. Atin fékéríté ku begom non mégédawu bé de étew énda énggétiga ro Begén bé do gétah.” <sup>20</sup> Atin ménkéntay i késulat Isaiase de so mano, “I de étew énda sénléd ro Begén, énggétiga roy fantage bé Begéne non fénfégétiga ku bero.” <sup>21</sup> Endob bénréhén i fantage bé de Judio mano, “Toow fo métégas i de uléw ro brab énda modor ro bé kétaya kuwe. Non fiyon fo ké démoyun tawagé ku bero, éndob mika ro mégélingo.”

## 11

### *Fantag bé de Judio moso*

<sup>1</sup> Gido loo, kagom fégitungén de ké ténakak i Tuluse nén i de Judio. Fiyon i begéne, ségétewu so Judio tidéw dob katufua keye Abraham brab ségétewu so séfu Benjamen, ségétewu so Judio. <sup>2</sup> I Tuluse énda ténakakén i de kaan do étew fénémilién bé do getah. Gétiga kom damén i sénulat Eliase fantag bé sala i de Judio. Déménasal i Eliase dob Tuluse mano, <sup>3</sup> “Kadnan, fénléhu i de Judiroy de sénarigo mo muret bé kébérél me. Atin généba roy de ahayan do tulakan gonoy de étew méngadaf Beem. Atin begén séden i ménsamae méngadaf Beem, brab méuyot ro so méméléhu begén.” <sup>4</sup> Endob i Tuluse séménumbul mano, “Wén i fitew ngibu do dumo mo do Judio fénliyu gu inok énda mamung ro méngadaf bé kéninontowe Baal.” <sup>5</sup> Ségiléw so bé béléewe ni, non wén soy kloh fénémili i Tuluse bé de Judio sabaf bé kégédaw ne bero. <sup>6</sup> Fémilié noy de étewén békén sabaf bé de rénigo ro, yamula sabaf saén bé kégédaw ne bero. Non amuk fémilié noy de étew sabaf bé galbék ruwe, békén sabaf saén bé kégédaw ne bero.

<sup>7</sup> Amuk loo bé nan, i de Judio énda gito roy sélédé ruwe, sani kétintuwe. Non kloh saén bé de Judiroy ménwaléye de métintu, sani de fénémili i Tuluse. Atin i de dumo de ménwaléy métégas i de uléw ro. <sup>8</sup> Non wén i Ménsulate Kébérél i Tuluse mano, “I Tuluse fénwaléyén bero énda gégéitung brab énda gérito brab énda gélingo inok énda gésobut ro taman béléewe ni.” <sup>9</sup> Atin bénréh Dabide so dob Ménsulate Kébérél i Tuluse mano, “Gégéitung ro damén bé énda i sala ro non bé de médo do kéfiyonon niray i Tuluse bero. Mélaw méukum ro damén. <sup>10</sup> Waléy ro damén do langafén, inok énda gérito ro. Brab waléy ro damén do sungungan taman sa taman sabaf bé de émbéyat kérégénon oboé ro.”

<sup>11</sup> Mélaw i de dumo gu do Judio maak énggébangkud ro sabaf énda ménunur ro bé Kristowe. Endob kagom fégitungén de ké ménlawu ro brab énda géfétindégo Tuluse bero. Non i kéika ruwe bé Kristowe, ménwaléy kéfiyonoy de békén Judio. Non i urete fantag bé Kristowe ménlégéb dob de békén Judio funa ro ménfukas dob de sala ro. Ménrigoy ni inok i de Judio waléy ro médaléw. <sup>12</sup> I kégésala i de Judiroy funay kéluhanay étewe fénfiyoy Tuluse. Non sabaf bé kéika i de Judio de, ménwaléy do munur i de békén Judio. Mélaw méumanan i kéfiyonone iray i Tuluse bé gaiwe gésénule i de Judio brab munur ro bé Kristowe.

### *Ufama bé Kayéwe*

<sup>13</sup> Atin fantag man bé begome do békén Judio, wén i béréhé ku begom. I begéne ségétewu apostol sénugu mangéy dob begome do békén Judio. Atin i funa kuwe magayas gémalbék, <sup>14</sup> inok i de dumo gu do Judio waléy ro damén médaléw bé kéfukase begom funay de dumo bero waléy so moso munur bé Kristowe inok méfukas ro so. <sup>15</sup> Non amun ménika i Tuluse bé de Judio, énggésénule i de békén Judio atin ménwaléy ro do dumoy Tuluse. Atin mélaw méumanan i kéfiyonone iray i Tuluse amuk séfule i de Judio waléy dumoy Tuluse, non maak do ménléhu do méntébule.

<sup>16</sup> Atin non i Abrahame munur bé Tuluse, wén so mosoy do séfuén waléy munur bé Tuluse. Non amuk fiyoy darir i kayéwe, fiyo soy de fongo no. <sup>17</sup> I de Judio ségiléw ro bé kayéwe mégonok. Atin Tulusey gefee de. Atin kénléngén i dumoy de fongo. Atin i begome, sénumfat i Tuluse begom diyo atin fénwaléyén begom do mantu fongoy kayéw i Tuluse. Mélaw gégédot gom so do kéfiyonon tidéw dob Tuluse ségiléw bé de Judio. <sup>18</sup> Endob kagom fégítungén de ké toow gom fo gérotor na bé de Judio. Non ségiléw gom so do falan fongo. Atin fatut gétiga kom i ni, i darire uyagé noy fongowe, békén i fongowey muyage bé darire.

<sup>19</sup> Atin amuk émbéréh gom makom, “I Tuluse kenda noy de dumoy de Judio inok tanggafé no betom do békén Judio.” <sup>20</sup> Toow i nan. Endob i funa ruwe ménkédan non énda munur ro. Atin i funa kome ménsumfat non munur gom. Mélaw ingat gom, brab kagom félangka-langka. <sup>21</sup> Non amuk kénléng i Tulusey de sungu do fongo sani de Judio, kéléngé no so begom do mantu fongo amuk témérén gom so munur. <sup>22</sup> Mélaw énggiton i kégédaw i Tuluse brab kékukum ne. Kukumé noy de étew énda munur ro. Endob toow fo mégédaw begom amuk fédayday gom témayakuf bé kégédaw ne. Endob amuk énda fédayday gom, kédané no begom loo bé de sungu do fongo. <sup>23</sup> Atin i de Judio, amuk éndaén fédayday ro mika bé Tuluse brab amuk munur ro bé Jesuse, tayakuféy Tuluse man bero brab sumfaté no bero dob sunguwe gonon dob kayéw ne non fakay rigonéy Tulusey ni. <sup>24</sup> Non amuk i de fongo tidéw dob ségiyowe kayéw, sani begome do békén Judio, fakay sumfaté no dob kayéw ne, toow na fo magad i késufat ne ségule bé de fongo tidéw dob nan kayéw, sani de Judio.

### *I kégédaw i Tuluse*

<sup>25</sup> Do dumo gu, méuyotu de fo ké gétiga kom i toowe tidéw dob Tuluse fiyon fo ké énda gésobutoy de étew de bé gétahé. I funa kuwe de émfégétigan begom inok énda fédayéwdayéw gom non makom ké toow gom na fo gérotor bé de Judio. I kétégas i uléw i de Judio, énda démaydayén. Non wén so moso i gai gésénule ro. Been i gaiwe moso ké munur i kéluhanay de békén Judio fénemili i Tuluse. <sup>26</sup> Tidéw bénou, i kéluhanay de Judio méfukas ro so. Non wén i Ménsulate Kébéréh i Tuluse mano, “Wén i mémukase gégumah tidéw dob de Judio inok féwaléyé no métintuy de Judio. <sup>27</sup> Atin kédané kuy de sala ro loo bé fénasad guwe bero.” <sup>28</sup> I de dumo bé de Judio ménwaléy ro sébanil bé Tuluse non énda munur ro bé Fiyowe Uret. Ménrigoy ni inok méfukas gom do békén Judio. Gido loo, mégédaw i Tuluse bé de Judio non beroy de fénemilién, atin non bé fasad i Tuluse dob katufuay de Judio. <sup>29</sup> Non i Tuluse énda méfégalin i kégédaw ne bé atiy fémilié nuwe brab iraya nuwe kéfiyonon. <sup>30</sup> Atin fantag man bé begome do békén Judio, bé do gétah énda modor gom bé de sugu i Tuluse. Endob béléewe énggédot gom i kégédaw i Tuluse non fénlis i de Judio. <sup>31</sup> Atin loo soy berowe, non fiyon fo ké énda modor ro bé de sugu i Tuluse béléewe ni, fakay i Tuluse méuray i na nuwe bero brab fésagadé no bero moso loo bé rénigo nuwe dob begome sabaf bé kégédaw ne. <sup>32</sup> Non i Tuluse, maak fénférisu noy kéluhanay de étew sabaf bé de sala ro brab fénggito no médait ro mékukum. I funa nuwe réménigo bé ni inok mégédaw bé kéluhanane bé káfesagad ne.

<sup>33</sup> Toow fo mégédaw i Tuluse! Toow fo gétigan i Tuluse brab météldté! Enda i gésobut bé kégétiga nuwe taloo no rigoné nuwe. <sup>34</sup> Non wén i Ménsulate Kébéréh i Tuluse mano, “Enda i étew gésobut bé kégétigay Tuluse taloo no kégédaw ne. Atin énda i gégéginay

bé Tuluse.” <sup>35</sup> Atin wén soy Ménsulate Kébérél i Tuluse mano, “Enda i géfélét dob Tuluse inok wén i utongén.” <sup>36</sup> Non i Tulusey léménimbage bé kéluhanay de éntingayén, brab Beeney muyage brab méguléwe bé kéluhanane. Atin i kéluhanay de éntingayén kaan inok médayéw. Médayéw damén i Tuluse taman sa taman. Amen.

## 12

### *I galbéke kay Tuluse*

<sup>1</sup> Mélaw do dumo gu, sabaf bé dakéle gédaw i Tuluse betom, ongoté ku dob begome ké fédaya gom i Tuluse méguléwon begom. Been i maake tulak gom énda méléhuén. Fatut tintu fo fiyoy rigoné kome inok mésuwat i Tuluse de. Been i fatute kékéngintulus gom. <sup>2</sup> Atin kagom miring bé adat i de tete dob duniyae ni. Yamula fédaya gom i Tuluse fégaliné no begom bé kékéwaléy ne mantu bé de kékégitung gom. Tidéw béno, gétiga kom i kétayay Tuluse sani fiyowe brab métintuwe brab mékésuwate.

<sup>3</sup> Atin non niray i Tuluse begén i aturane, bérélhé ku begom i ni: Kagom fégitungén de ké toow gom na fo gérotor bé de dumo gom. Yamula téritantad gom brab i séngae ségétew begom fatut kékmarang bé lowoh ne loo bé kéunure niray i Tuluse dob beene.

<sup>4</sup> Ufama, fégitung gom i lowoh i étewe. Wén i médoo do réfaén. Atin i de réfa lowoh békén ségiléw i de rigoné ro. <sup>5</sup> Atin ségiléw so bé niy betome do munur bé Kristowe. Non fiyon fo ké médoo tom, ménwaléy tom maak do réfa i lowoh Kristowe. Atin maak sésumfat tom kéluhanan. <sup>6</sup> Toow fo mégédaw i Tuluse. Non tidéw dob Beene wén i do séségiyo-giyo kékfurungo tom. Mélaw fatut rigonéy séngae ségétew i kékfurungone niray i Tuluse de. Amuk i ségétew betom furung muret bé kékérél i Tuluse, fatut muret loo bé kéunure niray i Tuluse de. <sup>7</sup> Amuk furung go tétabang, tabang go. Amuk furung go témo, toro go. <sup>8</sup> Amuk furung go émféfiyo fédew, rigo mo. Amuk furung go miray, iray go témantu. Amuk furung go méguléw, fégérör go féguléw. Amuk furung go mégédaw, férororém i na muwe mégédaw.

<sup>9</sup> Atin békén ubo-ubo saén i kégédaw gome bé de dumo gom. Atin fatut ikaa kom i tete. Atin lékafit gom dob fiyowe. <sup>10</sup> I betome, do sédumon tom sabaf bé Kristowe, mélaw fatut tom ségédaw. Atin fatut méraan i na tome séfégadat. <sup>11</sup> Kagom faukén, yamula fatut fégérör gom rémigo bé kétayay Kadnane sabaf bé fiyowe fédew gom. <sup>12</sup> Fatut moror tom non wén i inam tom dob Tuluse. Atin fatut témingkél tom bé de mérégén. Atin fatut démoyun tom démassal. <sup>13</sup> Atin fatut sétukidé tom i éntingayéné katom dob de dumo tom munur bé Kristowe amuk méskinan ro. Brab fatut tayakufé tom i de étew dob de lawi tom fiyon fo ké énda gélolo tom de séna.

<sup>14</sup> Kagom ongotén i kékukum i Tuluse bé de étew émférasay begom. Yamula fatut dasal gom dob Tuluse inok féfiyoné no bero. <sup>15</sup> Fatut mamung tom moror bé de étew moror brab mamung tom kémérew dob de étew kémérew. <sup>16</sup> Fatut waléy sébaan i fédew tome do munur bé Jesuse. Atin kagom félangka-langka, yamula fatut tom séloyuk bé de étew téritantad. Atin kagom fégitungén de ké do toow gom fo métileétdé.

<sup>17</sup> Amuk wén i réménigo tete dob begome, kagom sémuli. Yamula fatut rigo gom saén i fiyowe inok énda i géadowy begom. <sup>18</sup> Rigo gom i fiyowe taman gagané kom inok énda i ségiyo étew mékérit begom. <sup>19</sup> Atin do dumo gu, fégétédém gom i ni, kagom sémuli bé tete. Yamula fédaya gom i Tuluse sémuli bé kérít ne. Non wén i Ménsulate Kébérél i Tuluse mano, “Bégén i sémuli. Bégén i kékukum, bang i Kadnane.” <sup>20</sup> Atin fatut odoro tom i ni Ménsulat Kébérél i Tuluse mano, “Amuk mélawayaf i sébanile beem, féamaém. Atin amuk térumén, féinémém. Non amuk rigoné moy ni, waléy de mémala.” <sup>21</sup> Kagom fédayaén i tete sémugu begom rémigo tete. Yamula rigo gom fiyo inok tabanan i tete.

## 13

### *Fantag bé de gémamak kukuman*

<sup>1</sup> Fatut i kéluhanay étewe modor bé sugu i de gémamak kukuman. Non i kéluhanay méguléwe, nirayay Tuluse bero aturan. Atin i ménfétindége bé gobernowe, Tulus.

<sup>2</sup> Mélaw i sébanile bé gobernove, sébanil bé féntindég i Tuluse, atin mélaw mémukum i no étew. <sup>3</sup> Non i de rémigo fiyo énda kailanga ro mégilak bé de gémamak kukuman. Yamula i de rémigo tete kailanga ro mégilak ro bero. Amuk méuyot gom ké énda i funa kom mégilak bé de méguléw, rigo gom saén i fiyowe. Atin dayewé ro so begom. <sup>4</sup> Non i de méguléw, berowey sugu-suguéy Tuluse inok fiyoy goho kome. Endob amuk rémigo gom tete, fatut mégilak gom bero non wén i kuwagib ro kémukum. Berowey suguéy Tuluse kémukum bé de rémigo tete. <sup>5</sup> Mélaw fatut tom modor bé sugu i de gémamak kukuman. Békén saén sabaf bé kékukum ruwe éndob sabaf so bé gétiga tom i fatute.

<sup>6</sup> Been i ni soy funa tome mayad buwis. Non i de méguléw, berowey de sugu suguéy Tuluse amuk rigoné roy fatute rigoné ro. <sup>7</sup> Mélaw fatut bayada tom bé katabuwaney kéluhanay buwis tome. Atin fatut fégadata tom i de gémamak kukuman.

<sup>8</sup> Kagom mutong. I maake utong gom saén i kégédaw i dumo gome, atin bayada kom bé gédawe sénga tékélid. Non i tintuwe mégédaw bé dumo nuwe tumané noy kitabe. <sup>9</sup> Non wén i mén sulfate dob kitabe mano, “Kagom lémamfa. Kagom méméléhu. Kagom ménakaw. Kagom mingar.” Atin i de ni sugu brab de dumo de, fakay odoro tom amuk modor tom bé ni sugu mano, “Fégédaw go bé dumo muwe, ségiléw bé kégédaw me bé kaame lowoh.” <sup>10</sup> I étewe mégédaw bé dumo nuwe, énda rigoné noy tetee dob beene. Mélaw i kégédawe, been i niy kétumane bé kéluhanay de kitab.

<sup>11</sup> Atin fatut ségédaw tom non gétiga tom i ni gai. Endaén mérugayén tidéw béléewe, séfule i Kristowe. Béléewe toow na fo gédét i nan gai bé amun méngganay gomén munur bé Kristowe. Mélaw fatut mingat tom de brab kagom iringén i ségétéwe fidong. <sup>12</sup> Non béléewe ni maak kélungonon éndob gédétén fuweh, sani késéfule Kristowe. Mélaw fatut kédané tom i de tete adat tom tidéw dob déléfone. Atin fatut tom rémigo fiyo non been i niy maake kulangé tom niray Kristowe betom do étew bati dob géfékaya. <sup>13</sup> Fatut rigoné tom i fiyowe loo bé fatute rigonén dob géfékaya. Mélaw kagom téolo-olon, taloo no mamung bé de tete karagiya, kagom sétayan bé ségiyowe saliyu bé bawag gome, kagom sékérít, brab kagom médaléw. <sup>14</sup> Yamula ongot gom dob Kadnane Jesu Kristo tabanga no begom rémigo bé fatute. Atin kagom odoron i de tete kétayay de lowoh gom loo bé tafaye adat gom.

## 14

### Fantag bé amaéné

<sup>1</sup> Amuk wén i dumo gom munur bé Kristowe, éndob énda séna méégét i kéunur ne, tayakuf gom. Atin kagom séédél de ké ati kaane karang. <sup>2</sup> I étewe méégét i kéunur ne, gékaranga noy fakay amaé noy kéluhanay de amaén. Endob i étewe énda séna méégét i kéunur ne, karangé noy fénéngalaf saén i fakaye amaé no. <sup>3</sup> I étewe mama bé kéluhanay amaéne, békén fatut siyawé noy dumo nuwe ké mama saén fénéngalaf. Atin i étewe mama saén fénéngalaf, békén fatut dowoyé noy dumo nuwe ké mama bé kéluhanane. Non ségiléw ro ténayakuf i Tuluse bero. <sup>4</sup> Enda fatutén ké kukumé tom i dumo tome. Non ségiléw tom do sugu-suguéy Tuluse. Mélaw Tulus saén i fatute kémukum betom bé ati fiyowe brab tetee. Atin i dumo gome munur bé Jesuse rigoné noy fiyowe non i Kadnaney témabanga ne de.

<sup>5</sup> Loo so bé de gai. Wén i do étew kémarrang bé wén kun i toow na fo mémétefu gai. Endob wén soy do ségiyo étew kémarrang bé i kéluhanay de gai fantay-fantay ro dob adafay Tuluse. Fatut fégitungéy séngae ségétéw i kétayay Tuluse. Tidéw bénou fatut rigoné noy ati karangé nuwe kétayay Tuluse. <sup>6</sup> Amuk wén i étew karangé no wén i gai toow na fo mémétefu, rigoné no inok basana noy Kadnane. Amuk wén i étew mama bé kéluhanay amaéne, rigoné no inok basana noy Kadnane. Gétiga tom i ni non fésalamata no dob Tuluse sabaf bé amaé no. Atin amuk wén i étew énda mamaén bé kéluhanay de amaén, rigoné no inok basana noy Kadnane brab fésalamata no so dob Tuluse. <sup>7</sup> Non i betome do munur bé Jesuse, i funa tome méuyag brab méléhu békén

inok rigoné tom saén i kétaya tome. <sup>8</sup> Yamula amuk méuyag tom séna, rigoné tom i funay Kadnane médayéw. Brab amuk méléhu tom, méléhu tom inok médayéw i Kadnane de. Mélaw amuk méuyag tom taloo no méléhu tom, kay Kadnane betom. <sup>9</sup> I funa Kristowe féndayaén i kéféléhue de atin méntébule, inok Been i Kadnane féguléwo noy de méuyag brab de ménléhu. <sup>10</sup> Mélaw kagomén dowoyén i de dumō gom munur bé Jesuse. Brab kagomén siyawén i de dumō gom munur. Non kéluhana tom so moso témindég dob adafay Tuluse bé gaiy kékukum ne. Mélaw Tulus saén i kémukume. <sup>11</sup> Non wén i Ménsulate Kébéréh i Tuluse mano, “Loo bé kétoow i kéuyag guwe, i kétoow i kéluhanay étewe lémingkuwéd dob adafa kuwe. Atin i kéluhanay étewe fayagé ro Begén i Tuluse.” Been i bénréh i Kadnane. <sup>12</sup> Mélaw fétindégéy Tulusey séngae étew dob adafa nuwe inok bérhéhe roy kéluhanay de rénigo ro.

<sup>13</sup> Mélaw kagomén kukumén i de dumō gom. Yamula fatut mingat tom inok i de dumō tom énda gésala ro sabaf bé de rénigo tom. <sup>14</sup> Sabaf sétiman i fédéw guwe bé Kadnane Jesus, toow fo gétiga ku ténungkas i Tuluse betom mama bé kéluhanay amaéne. Endob amuk wén i étew karangé no liyén dob adafay Tulusey sébaane amaén, békén de fatut mama. <sup>15</sup> Endob amuk gito no begom mama, atin waléy tete i fédéw ne de, énda mégédaw gom de. Mélaw kagom amaén i amaéne funay dumō gome gésala. Non i Jesuse ménléhu inok mékédan i de salaén. <sup>16</sup> Atin amuk wén i fiyo rénigo gom éndob kénarang i de étew sala, kagom rigonén de mon, inok énda gébéréh ro tete fantag bé begome. <sup>17</sup> Non dob kéféguléw i Tuluse bé de étewén, énda mélaga i de amaén taloo no do inémén. Endob i toowe fo mélaga i kétintuwe brab kéfiyoy fédéwe, brab kéorore sabaf bé kéfemandu i Rémogor i Tuluse. <sup>18</sup> Amuk modor tom bé Kristowe loo bé ni, mésuwat i Tuluse betom. Atin mésuwat soy de ségiyo étew betom.

<sup>19</sup> Mélaw fatut démoyun télamané tom rigonén i funa tome fiyoy de fédéw tom brab funa tome waléy méégét i kéunur tome. <sup>20</sup> Kagom binasanén i rigonéy Tuluse sabaf bé amaéne saén. Ténungkas i Tuluse betom mama bé kéluhanay amaéne. Endob kagom mama bé éntingayéne funay dumō gome gésala. <sup>21</sup> Ay niy fatute. Kagom mama karne, taloo no miném arak taloo no rémigo éntingayén funay dumō gome gésala. <sup>22</sup> Odoro kom i de kékarang gom fantag bé de amaén. Endob kagom séédél bé de dumō gom fantag bé de ni non Tulus i mélugléwe begom. Méoror i étewe fiyoy fédéw ne non rigoné noy gékaranga nuwe fiyo. <sup>23</sup> Endob i étewe amaé noy gékaranga nuwe tete, kukuméy Tuluse non gétiga no gésala ké rigoné no. Non amuk rigoné tom i gékaranga tome tete, gésala tom de.

## 15

<sup>1</sup> Atin i betome méégétén i kéunur tome, fatut tingkélo tom i de énda séna méégét munur, brab fatut tabanga tom bero. Enda fatut rigoné tom i de katom kétayan saén. <sup>2</sup> Yamula fatut rigoné tom soy mékésuwate dob de dumō tom inok waléy méégét i kéunur ruwe. <sup>3</sup> Non fiyon i Jesu Kristowe énda rénigo noy kaane kétayan. Non wén i Ménsulate Kébéréh i Tuluse mano, “I de tete bénréh ro dob Tuluse, bénréh ro so dob Begéne.” Sénulatén i ni inok giton rénigo Jesusey kétayay Tuluse fiyon fo ké fénrasay ro. <sup>4</sup> Non i kéluhanay Ménsulate Kébéréh i Tuluse, ménusulat inok métoro tom, brab inok wén i inam tom sabaf bé kewaléy tome témingkél brab sabaf bé kéfiyoy de fédéw tom ké masa tom bé Ménsulate ni Kébéréh i Tuluse. <sup>5</sup> I Tuluse fétinkélé no betom brab féfiyoné noy de fédéw tom. Mélaw fésétimané no damén i de fédéw tom miring bé Jesu Kristowe, <sup>6</sup> inok séréngan tom démayéw bé Tuluse Abay Kadna tom Jesu Kristo.

<sup>7</sup> Mélaw sétayakuf gom maak do sétuwaréy ségiléw bé kétayakuf Kristowe betom, inok médayéw i Tuluse de. <sup>8</sup> Bérhéhe ku begom, i Kristowe ménwaléy maak sugu-suguéy de Judio inok fégito no tintu fo tumanéy Tulusey fasad ne fénasadén dob katufuay de Judio bé do gétah. <sup>9</sup> Atin rénigo noy ni inok i de békén Judio dayéwé ro soy Tuluse sabaf bé kégédaw ne. Non wén i Ménsulate Kébéréh i Tuluse mano, “Toow fo dayéwé ku Beem Tulus, brab dayéwéy de békén Judio so Beem. Dayéwé key Beem bé de kanta gey.” <sup>10</sup> Atin

wén soy ni Ménsulat Kébérél i Tuluse mano, “I de begom do békén Judio, oror gom séréngan bé de Judio do fénemili étew.” <sup>11</sup> Atin wén soy ni Ménsulat Kébérél i Tuluse mano, “I de begom do békén Judio, dayew gom i Kadnane. Atin i kéluhanay étewe fatut dayewé roy Tuluse.” <sup>12</sup> Atin sénulat Isaiase soy ni mano, “Gégumah i ségétewe étew séfu Jessehe. Atin Beeney waléye méguléw bé de békén Judio. Atin sémarig ro dob Beene.”

<sup>13</sup> Atin i Tuluse, sani miraye kéfyonon ongot-ongoté tom, féororé no damén begom, brab féfyoné no damén i de fédew gom sabaf bé kéunur gome de, inok minut méégét i inam gome dob Tuluse sabaf bé barakat i Rémogor ne.

<sup>14</sup> Atin fantag bé begome do dumo gu, gétiga ku fiyoy de adat gom brab médooy de gétiga kom brab gétigan gom sétoro. <sup>15</sup> Gido loo, ménbarawu témoreo begom dob ni sulat inok énda gélifoto kom de. Ménbarawu non niray i Tuluse begén i aturane, <sup>16</sup> inok muretu dob begome do békén Judio. Non sénugu Jesu Kristowe begén rémigo bé ni. Gémalbéku maak fadi non ureté kuy Fiyowe Uret i Tuluse inok i begome do békén Judio waléy gom maak ténułak dob Tuluse. Atin tayakuféy Tuluse begom non féntintuy Rémogor i Tuluse begom. <sup>17</sup> Atin non bé kétabang Jesu Kristowe begén, énda mémalawu émbérél fantag bé kéluhanay rigoné kuwe bé galbék i Tuluse. <sup>18</sup> Endob i gébérého kuwe saén i fantage bé fénrigo Kristowe begén bé kéusar ne begén. Non wén i de begom do békén Judio ménodor bé sugu i Tuluse sabaf bé kétoro guwe brab rénigo guwe. <sup>19</sup> Non i barakat i Rémogor i Tuluse fénrigo no begén i médoowe do mékégaif. Mélaw amun ménagéwu tidew dob ingéde Jerusalem taman dob ingéde Iliriko, tintu fo nuret guy Fiyowe Uret fantag bé Jesu Kristowe. <sup>20</sup> Toow fo méuyotu muret bé Fiyowe Uret dob de ingéd énda séna énggégélingo i de étew fantag bé Kristowe. Non mikau muret saén dob de étew énggégélingo ron fantag bé Jesuse tidew dob de ségiyo étew. <sup>21</sup> Non wén i Ménsulate Kébérél i Tuluse mano, “I de étew énda séna énggélingo roy fantage bé Beene, gétiga ro moso. Atin i de étew énda séna ménureton ro, gésobuto ro moso.”

<sup>22</sup> Been i niy funa kuwe médoonén gule ménangga mangéy dob begome. Non ménggéroru magéw mangéy dob de séségiyo-giyo ingéd. <sup>23</sup> Endob béléewe ni, énggilidén i rigoné kuwe dob de ni gonon. Atin ménrugayén i kéuyot guwe mangéy dob begome. <sup>24</sup> Mélaw méuyotu mangéy dob begome. Non magéwu mangéy Espaniya, atin fiyo ké mawétu dob begome singkow bé kéagéw guwe mangéy diyo. Atin amuk gilidén i fiyowe kétukaw gu begom, fiyo ké tabanga kom damén begén bé kéagéw guwe mangéy Espaniya. <sup>25</sup> Endob béléewe ni mangéyu Jerusalem inok uwité kuy tabange kay de munur bé Jesuse bati diyo. <sup>26</sup> Non wén i niray i de munur bé Kristowe dob Masedonia brab Akaya kay de méskinan do munur bé Kristowe diyo dob Jerusalem. Niray ro non been i kétaya ruwe. <sup>27</sup> Toow ro fo moror témañbang non maak wén i utong ro bé de munur dob Jerusalem. Non i de Judio ténuñido ro bero bé kéunur ruwe bé kéangéy guwe dob de békén Judio. Mélaw i de békén Judio, fatut témañbang ro miray kurta dob de méskinan do Judio dob Jerusalem. <sup>28</sup> Atin amuk fégilidé kuy ni galbék atin géiraya kun beroy kéluhanay ni kurta, tausu néni mangéy Espaniya brab mawétu dob begome. <sup>29</sup> Atin gétiga ku amuk mangéyu dob begome, féfyoné Kristowe betom sabaf bé kéagéw guwe.

<sup>30</sup> Atin do dumo gu, non bé kéunur tome bé Kadna tome Jesu Kristo brab non bé késégédaw tome tidew dob Rémogor i Tuluse, ongoté ku begom dasal gom témantu inok tabangay Tuluse begén. Amuk rigoné kom i ni, géamung gom bé galbék guwe. <sup>31</sup> Dasala kom begén inok i de énda munur dob Judea énda fésug-sugé ro begén. Brab dasal gom inok moror i de munur dob ingéde Jerusalem sabaf bé uwité kuwe bero. <sup>32</sup> Amuk mérigoy ni brab amuk kétayay Tuluse, gétausu mangéy dob begome, brab toowu fo moror. Mélaw géséfifiyo tom do fédew bé kétukaw guwe begom. <sup>33</sup> I Tuluse, sani funa tome fiyoy fédew tome, fémanduo no damén begom kéluhanan. Amen.

<sup>1</sup> Wén i ségétéwe libun féndawét Febe mangéy dob begome. Beeney dumo tome so munur bé Jesuse brab fiyoy adat ne. Atin béléewe tétabang gémalbek dob de munur dob ingéde Senkrea. <sup>2</sup> Tayakuf gom damén sabaf bé Kadnane loo bé fatute rigoné tom do munur bé Jesuse. Atin tabang gom bé atiy kailanga nuwe, non médooy ténabang ne, atin ténabangén so begén.

<sup>3</sup> Atin félégérarém gom begén i Prisilahe brab Akilahe. Non beroy de dumo gu géménalbék bé galbék Jesu Kristowe. <sup>4</sup> Niray roy férénawa ruwe bé kétabanga ruwe begén, gédét ro féléhuén. Mélaw fésalamata ku bero loo soy de étew békén Judio do munur bé Kristowe. <sup>5</sup> Atin félégérarém gom so begén i de munur sélimud dob lawi ro Prisilahe brab Akilahe. Brab félégérarém gom so begén i Epenetowe, sani kégédawa kuwe dumo gu. Beeney sunguwe étew ménunur bé Kristowe dob Asia. <sup>6</sup> Atin félégérarém gom so begén i Mariahe, sani mégérore gémalbék begom. <sup>7</sup> Atin félégérarém gom so begén i Andronikowe brab Juniase, sani de dumo gu Judio. Bé gétahe, beroy de dumo gu do férisu. I de apostol toow fo basana ro bero, brab ménunur ro bé Jesuse bé énda séna munuru de.

<sup>8</sup> Atin félégérarém gom so begén i Ampliatowe, sani kégédawa kuwe dumo tom munur bé Kadnane. <sup>9</sup> Atin félégérarém gom so begén i Urbanowe, sani dumo tome gémalbék bé galbék Jesu Kristowe. Brab félégérarém gom so begén i Estakiwe, sani kégédawa kuwe dumo gu. <sup>10</sup> Atin félégérarém gom so begén i Apolose, sani ménfégítowe bé kímu ne bé Kristowe. Atin félégérarém gom so begén i de étew dob kuréng Aristobuluse. <sup>11</sup> Atin félégérarém gom so begén i Herodione, sani dumo guwe Judio. Atin félégérarém gom so begén i de étew dob kuréng Narsisuse munur bé Kadnane.

<sup>12</sup> Atin félégérarém gom so begén i Trifaenawe brab Trifosowe, sani de gémalbék bé galbék i Kadnane. Atin félégérarém gom so begén i Peruse, sani kégédawa kuwe dumo gu, sani mégérore gémalbék bé galbék i Kadnane. <sup>13</sup> Atin félégérarém gom so begén i Rufuse, sani ménbantuge gémalbék kay Kadnane. Atin félégérarém gom so begén i idéng ne, sani maake idéng gu so sabaf bé kégédaw ne begén. <sup>14</sup> Atin félégérarém gom so begén i Asinkrituse, Flegon, Hermes, Patrobas, Hermas, brab de dumo ro munur. <sup>15</sup> Atin félégérarém gom so begén i Filologuse, Julia, brab Nereuse, brab libu nuwe brab Olimpase brab kéluhanay de dumo ro munur.

<sup>16</sup> Atin fégito gom i kégédaw gome amuk sémégifa gom. I kéluhanay de munur fésamfayé roy késégifa ruwe begom.

<sup>17</sup> Atin do dumo gu, ongoté ku dob begome bé ingat gom bé de émféséédél brab témojo bé ségiyowe kétoro bé féngganad gome. Férayu gom de inok énda kédané roy kéunur gome. <sup>18</sup> Non i de ni do étew, énda rigoné roy kétayay Kadnane Jesu Kristo. Yamula rigoné roy karowe kétayan. Atin tugio roy de énda séna féngganadén bé de furung kékérén ureté ro. <sup>19</sup> I kéluhana keye, énggelingoo key i fantage bé kéodoro kome bé Fiyowe Uret funa ku moror. Méuyotu fo ké gétiga kom i kéluhanay fiyowe. Endob énda damén gétiga kom i tetee. <sup>20</sup> Atin i Tuluse, sani émféfiyowe bé fédew tome, tabanga no begom inok tabana kom sékoy Satanase.

Atin mégédaw fo damén i Kadnane Jesus begom.

<sup>21</sup> I Timoteowe, sani dumo guwe gémalbék, ségifaé no begom. Atin i Lusiowe brab Jasone brab Sosipatare do dumo gu Judio, ségifaé ro so begom.

<sup>22</sup> Atin i begéne, Tersio sani fénsulat Pablwe bé ni, ségifaé ku so begom sabaf bé Kadnane.

<sup>23</sup> Atin i Gayowe, sani gefee bé lawie batio key brab sélimudo keye do munur, ségifaé no so begom. Atin i Erastowe, sani mitonge bé kurtae dob ni ingéd, brab Kartuse dumo tom, ségifaé ro so begom.

<sup>24</sup> Atin mégédaw fo damén i Kadna tome Jesu Kristo begom kéluhanan. Amen.

<sup>25</sup> Dayewé tom i Tuluse. Géféeégéto noy de kéunur tom bé Jesuse. Gérigono noy ni sabaf bé Fiyowe Uret fantag bé Jesu Kristowe ureté ku. Been i niy Fiyowe Uret énda gésobutoy de étew de non ménbunéy ménrugayén. <sup>26</sup> Endob béléewe, i Fiyowe Uret fantag bé Jesuse

giton dob de sénulat i de sénarigoy Tuluse muret bé kékéréh ne. Atin non sénugu i magufusae Tulus, fégétiga key bé de étew dob kéluhanay de ingéd, inok i kéluhanay de étew damén méginugut ro de.

<sup>27</sup> Atin médayéw damén i sébaane Tulus. Enda i ségiyo saliyu bé Beene. Gétiga noy kéluhanane. Médayéw damén sabaf bé Jesu Kristowe taman sa taman. Amen.

*Pablo*

## I Sunguwe Sulat Pablowe dob de Munur bé Kristowe dob Korinto

Been i niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Korinto. Atin i de dumo bé de étew diyo ménwaléy ro munur bé Jesu Kristowe sabaf bé kéuret Pablowe.

Endob amun méntékédan i Pablowe diyo, wén i de dumo bé de munur diyo rénigo roy tete. Atin i de dumo de, wén i de ménénginsa fantag bé ati fatute rigoné ro sabaf bé kénéur ruwe. Médooy de fénginsaé ro non mantu ro séna munur bé Kristowe.

Mélaw séménulat i Pablowe inok sumbulo no bero bé de fénginsaé ro. Nugar Pablowe soy de dumo bero do ménsala.

<sup>1</sup> Begénye Pablowe, fénémili i Tuluse ménwaléy apostol Jesu Kristowe sabaf bé kétayay Tuluse. I Sostenese dumo tom munur bé Jesuse brab begéne, sulata key begom <sup>2</sup> do munur bé Tuluse bati dob Korinto. Fénémili i Tuluse begom inok waléy mélénis dob adafa nuwe sabaf bé Jesu Kristowe. Ménwaléy gom do étew i Tuluse beroy kéluhanay de étew dob kéluhanay de ingéd munur bé Jesu Kristowe, sani Kadna ruwe brab Kadna tome so.

<sup>3</sup> I Abay tome Tuluse brab Kadna tome Jesu Kristo toow fo mégédaw damén begom brab iray ro damén i métanéke do fédew.

### *I kéfyonone sabaf bé Kristowe*

<sup>4</sup> Toow fo démoyunu fésalamat bé Tuluse non bé kégédaw ne begom fénagéw dob Jesu Kristowe. <sup>5</sup> Non toow fo fénfiyoy Tuluse begom bé kewaléy gome do dumo Jesu Kristowe. Mélaw tintu fo énggésobuto kom i toowe kétoro brab gétigan gom so téromo de. <sup>6</sup> Ménwaléy toow fo méégét i kénéur gome bé ténero geye begom fantag bé Kristowe. <sup>7</sup> Mélaw i Tuluse nirayén begom i kéluhanay kéfurunge kailanga kom tidéw dob Rémogor ne, bé lala gome ongot-ongot bé késéfule i Kadna tome Jesu Kristo. <sup>8</sup> Beeney émféégeté bé kénéur gome taman dob tamfadai duniyae, inok énda i sala gom dob gaiy késéfule ne. <sup>9</sup> Toow fo gésarig tom bé Tuluse, sani ménémilie betom inok waléy tom do dumoy Nga ne Jesu Kristo, sani Kadna tome.

### *Ménsébaad ro*

<sup>10</sup> Do dumo gu, sabaf bé kékéulgéw i Kadna tome Jesus betom ongoté ku begom kagom sébaad-baad. Yamula séfagayun gom inok waléy ségiléw i de fédew gom brab de kékégitung gom. <sup>11</sup> Non do dumo gu, bénréh i de étew do dumo Kloewe démoyun gom kun séédél. <sup>12</sup> Wén kun i do dumo begom émbéréh maro, “Kuyug Pablo gey i begeye.” Atin i de dumo de kun émbéréh maro, “Kuyug Apolos gey i begeye.” Brab i de dumo begom émbéréh ro maro, “Kuyug Pedro gey i begeye.” Atin i de dumo do émbéréh maro, “Kuyug Kristo gey i begeye.” <sup>13</sup> Toow fo tete i nan. Maak sénuvak-ufak gom i Kristowe. Békén begén i ménléhue dob kruse inok méfukas gom bé de sala gom. Brab énda ménbautis gom inok waléy gom do kagén kuyug.

<sup>14</sup> Fésalamatu dob Tuluse non békén begén i ménautise begom saliyu bé Krispowe brab Gayowe. <sup>15</sup> Mélaw énda i gébéréh de ké ménbautis gom dob dawét guwe. <sup>16</sup> (Bénautis guy Estabanase brab kéluhana ro ségélawi. Endob éndaén i ségiyo énggétédémo ku bénautis gu.) <sup>17</sup> I funa Kristowe begén séménugu békén ké maus. Yamula sénuguén begén muret bé Fiyowe Uret. Atin énda fénfurungén begén muret loo bé de étew dob duniyae ni, inok i de étew mégélingo, énda munur ro saén sabaf bé kéfurung guwe émbéréh. Yamula munur ro sabaf bé barakat i Tuluse. Mélaw énda émbunéy i barakat Kristowe mémukas bé de étew sabaf bé kéléhu ne dob kruse.

### *I kékéitung Tuluse*

<sup>18</sup> I de étew méukum ro, marok énda i laga i kéurete fantag bé kéléhu Jesuse dob kruse. Endob i betome do ménfukasén dob de sala tom, gétiga tom toow i Fiyowe Uret brab fégito noy barakat i Tuluse. <sup>19</sup> Wén i Ménsulate Kébéréh i Tuluse fantag bé ni mano, “Binasané kuy kégétigay de méngganad. Atin fégito gu énda i laga i kéfégitung i de étew marok do métileédted ro.” <sup>20</sup> Mélaw gétiga tom énda i laga i kégétigay de énggégéganad taloo no de métileédted taloo no de furung émbéréh dob ni duniya. Non fénggitoy Tuluse énda i lanték i kégétigay kéilawane.

<sup>21</sup> Toow fo gétigan i Tuluse. Bénantakén bé énda gésobutoy de étew de sabaf bé de kégétiga ro saén. Yamula ménswat i Tuluse mémukas saén bé de étew munur bé Fiyowe Uret ureté key, fiyon fo ké béréh i de étew énda i laga i Fiyowe Uret. <sup>22</sup> I de Judio méuyot ro gérito do mékégaif inok géunur ro de. Atin i de étew tidew Akaya méuyot ro mégélingo bé de gétigan muret inok géunur ro de. <sup>23</sup> Endob ureté tom i fantage bé Kristowe ménléhu dob kruse. Endob i de Judio mika ro de. Atin i de étew békén Judio fégitungé ro énda i lagaén. <sup>24</sup> Endob i de étew do fénemili i Tuluse munur ro, do Judio brab do békén Judio, gétiga roy barakat i Tuluse brab kégétiga nuwe fénggitoy no dob kéléhu Jesu Kristowe. <sup>25</sup> Non i kégétigay Tuluse toow na fo gérotor bé kégétigay de étew, fiyon fo ké fégitungé ro énda i lagaén. Atin i barakat i Tuluse toow na fo émbagér tidew bé kébagér i de étew, fiyon fo ké wén i do étew fégitungé ro énda i bagér i Tuluse.

<sup>26</sup> Do dumogu, fégétédém gom i ni. Amun fénwaléy i Tuluse begom do munur, énda sénay médoo begom do gétigan, brab énda sénay médoo begom do odoron, taloo no do gérotor étew. <sup>27</sup> Endob i Tuluse fénemilién i de étew léngléngén ro dob adafay kéilawane inok kémalianan i de étew marok toow ro fo gétigan. Atin fénemilién i de étew do gérifantad dob adafay kéilawane inok kémalianan i de étew do téfégérotor. <sup>28</sup> I Tuluse fénemilién i de étew diyangkaén brab ikaan brab énda i laga ro kun dob duniye ni inok fégito no énda i laga i de éntingayén karangéy de étew toow fo mélaga. <sup>29</sup> Mélaw énda i étew géfélangka-langka dob Tuluse. <sup>30</sup> Gido loo, fénwaléyéy Tuluse betom dumogu. Atin i kéluhanay de kégétiga tom tidew dob Tuluse fén-angéyén bé Kristowe. Atin sabaf so bé Kristowe, ménwaléy tom do métintu brab malinis dob adafay Tuluse brab ménfukas tom bé de sala tom. <sup>31</sup> Mélaw toow i Ménsulate Kébéréh i Tuluse mano, “Amuk wén i méuyot fébantug-bantug, fatut fébantug-bantug saén bé atiy rénigoy Kadnane.”

## 2

### *I Fiyowe Uret*

<sup>1</sup> Atin do dumogu, amun énggégumahu dob begome, nuret guy Fiyowe Uret i Tuluse. Endob énda ménfurungu émbéréh taloo no muret loo bé ségétewe wén i kégétiga no. <sup>2</sup> Non ménuyotu saén muret dob begome fantag bé Jesu Kristowe brab fantag bé kéléhu ne dob kruse. <sup>3</sup> Mélaw amun énggumahu dob begome, toowu fo ménggilak brab léménukub, non gétiga ku énda furungu muret. <sup>4</sup> Atin amun nureto ku begom, énda ménusaru bé furunge kékéréh taloo no kégétigan. Yamula i Rémogor i Tuluse diyo dob begéney ménfénure begom bé barakat ne, <sup>5</sup> inok i kéunur gome békén sabaf bé kégétigay étewe. Yamula munur gom saén sabaf bé barakat i Tuluse.

### *I kégétigay Tuluse*

<sup>6</sup> Endob i toowe, toroé kuy tintuwe ménalém kégétigan dob de étew méégét i kéunur ruwe. Endob i ni kégétigan békén tidew dob kéilawane taloo no tidew dob de méguléw dob duniye ni do gai. Non mékédan i kféguléw ruwe. <sup>7</sup> Yamula toroé kuy ménaléme kégétigay Tuluse, sani ménbunéye non énda fénggitoy Tuluse de bé do gétah. Non amun énda séna lénimbag i Tulusey duniye ni, énggétiga non i atiy rigoné nuwe bé fukasé no betom inok méuyag tom taman sa taman dob lawayo. <sup>8</sup> Enda i ségétew méguléw dob duniye ni énggésobuto noy ni ménalém kégétigan. Non amuk énggésobuto ro, énda damén fénléhu roy barakatane Kadnan dob kruse. <sup>9</sup> Non wén i Ménsulate Kébéréh i Tuluse mano, “Enda i ségétew énggégito taloo no énggégélingo taloo no énggégéitung

bé de fiyo do languntaman ténafoy i Tuluse kay de étew méimu de.” <sup>10</sup> Atin i de ménbunéy bé do gétah, fénggésobut i Rémogor i Tuluse dob betome. Non gétigay Rémogor i Tulusey kéluhanane, fiyon i de ménalém kéfégitung i Tuluse. <sup>11</sup> Enda i gétigan bé atiy dob kéfégitung i ségetéwe étew saliyu bé beene so. Ségiléw so bé Tuluse. I Rémogor i Tuluse saén i gétigane bé atiy dob kéfégitung i Tuluse. <sup>12</sup> Atin énggédot tom i Rémogor i Tuluse bati dob de fédew tom. Békén rémogor tidew dob duniyae ni, éndob Rémogor i Tuluse. Fégétiga no betom i kéluhananay niray i Tuluse betom.

<sup>13</sup> Mélaw toroé tom i téno i Rémogor i Tuluse betom, békén tidew saén dob kégétigay étewe. Toroé tom i toowe tidew dob Rémogor i Tuluse dob de étew bati i Rémogor i Tuluse diyo dob de fédew ro. <sup>14</sup> Endob i étewe énda diyo i Rémogor i Tuluse dob fédew ne, énda gétayakufo noy de éntingayén tidew dob Rémogor i Tuluse non énda gésobuto no de. Atin karangé noy énda i lagaén non i Rémogor i Tuluse saén i émfégésobute de. <sup>15</sup> I étewe batioy Rémogor i Tulusey fédew ne, gésobuto noy kéluhanane. Endob i étewe énda diyo i Rémogor i Tuluse dob beene, énda gésobuto noy kéfégitung i de étew diyo i Rémogor i Tuluse dob berowe. <sup>16</sup> Non wén i Ménssulate Kébérél i Tuluse mano, “Enda i gétigan bé atiy dob itungay Tuluse brab, énda i gétoro bé Tuluse.” Endob i betome do munur, fénggito Kristowe betom i kéfégitung ne.

### 3

#### *Do sugu-suguéy Tuluse*

<sup>1</sup> Do dumo gu, amun diyou séna dob begome, énda énggóbérého ku begom i ségiléwe bé kékérél guwe dob de étew fénémanduo Rémogor i Tuluse. Non kailanga kuy émbéréhé dob begome maak do nga munur bé Kristowe. Non odoro kom sénay de tete kétaya kom. <sup>2</sup> Mélaw énda gétooro ku begom bé de ménalém kégétigan, non ségiléw gom bé ngae énda géamaa noy métégase amaén, éndob ratah saén. Fiyon béleewe ni, énda gésobuto kom i ménaléme gétooro gu. <sup>3</sup> Non odoro kom sénay de tete kétaya kom. Wén sénay do médaléw brab do séédél begom. Mélaw giton dob begomey kéodoro kome bé de tete kétaya kom, ségiléw bé de énda munur bé Jesuse. <sup>4</sup> Non amuk wén i émbéréh begom maro, “Begey i kuyug Pabloue”, brab émbéréh i de ségiyo maro, “I begeye do kuyug Apolos gey”, fégiton gom i késégiléw gome bé de énda séna munur.

<sup>5</sup> Fégitung gom i fantage bé de ni. I begéne, sani Pabloue, ati begéne? Atin ati Apolose? Ségiléw gey falan do sugu-suguéy Kadnane saén. Fénuret i Tuluse begey inok munur gom. Rigoné key saén i galbék sénu i Tuluse sénga ségetéw begey rigoné key. <sup>6</sup> Maak do gémalbék gey dob fantade. I begéne ségiléwu bé mohoke. Atin i Apolose ségiléw bé mitisone de wayég. Endob Tulusey émfééruke bé de nohok. <sup>7</sup> Mélaw békén i mohoke taloo no mitisone de wayég i fatute de médayéw. Endob Tulus saén i fatute de médayéw non Been i émfééruke de. <sup>8</sup> I mohoke brab mitisone de wayég, énda i isu bero toow na fo gérotor. Atin irayay Tuluse bero baras loo bé kédakél i de galbék rénigo ro. <sup>9</sup> Non i begeye Apolosey de sugu-suguéy Tuluse brab sétabang gey gémalbék. Atin i begome maak do nohok i Tuluse.

Atin ségiléw gom bé sébaane lawi rénigoy Tuluse. <sup>10</sup> Atin i Tuluse fénwaléyén begén ségetéw furung rémigo lawi. Mélaw begén i ménfédiyoe bé batéwe gonoy de liléy ménbunsud. Atin ségiyo man i émfétause bé kérigowe bé ni lawi. I atag i ni, wén i ségiyo témo i begom béleewe ni. Atin i émfétause bé galbék fatut ingata noy rigoné nuwe. <sup>11</sup> Atin sébaan saén i batéw i lawi i Tuluse. Been i Jesu Kristowe fénwaléy i Tuluse maak batéw non Been saén i unuro tome. <sup>12</sup> Atin i de rémigo bé lawi i Tuluse, médooy de fégérigo ro de. Atin i de séségiyo-giyo fégérigo bé lawie ségiléw bé de séségiyo-giyo gétooro. Amuk fiyoy gétoroe maak do bélwon brab do filak brab do balilaga do batéw. Enda métuwégi de ni do éntingayén. Endob amuk énda fiyoy gétoroe, ségiléw bé de kayéw brab do kéroon. I de ni do éntingayén magad do métuwégi. <sup>13</sup> Bé gaiwe moso séfule i Kadnane mangéy kémukum, giton i galbék i kéluhananay de étew. Atin téngkadé noy de galbék ro bé aféye. Amuk fiyo, énda métuwégi. Endob amuk tete, métuwégi.

<sup>14</sup> Atin amuk énda métuwégi galbék i ségétewé étew, gédoté noy baras ne tidew dob Tuluse. <sup>15</sup> Endob amuk météyi métuwégi galbék i ségétewé étew, énda gédoté noy baras ne fiyon fo ké ménfukas inok énda mékukumén. Ségiléw bé étewé énggéraréy tidew dob métuwégi lawi éndob énda i énggéwito no.

<sup>16</sup> Gétiga kom damén i begome maak lawi i Tuluse non diyo i Rémogor ne batidob de fédew gom. <sup>17</sup> Atin amuk wén i minasa bé lawi i Tuluse, binasanéy Tuluse soy nan étew, non i lawi i Tuluse mémétefu. Atin begom i nan lawi.

<sup>18</sup> Kagom tugion i lowoh gome. Non amuk wén i ségétew begom manok toow fo gétigan dob adafay de dumonodob duniyae ni, fatut waléy énda i gétiga no dob adafay de étew, inok waléy toow fo gétigan dob adafay Tuluse. <sup>19</sup> Non i kégétigane dob duniyae ni énda i lagaén dob adafay Tuluse. Non wén i Ménsulate Kébéréh i Tuluse mano, “Usaréy Tulusey de akar i de énggétigan do étew fégélangkébén bero.” <sup>20</sup> Atin wén i Ménsulate Kébéréh i Tuluse mano, “I Kadnane gétiga noy kékéfítung i de gétigan do étew énda i lagaén.”

<sup>21</sup> Mélaw kagom fégélangka-langka i kékuray gome bé de étew. Non i begeye do sugusugué kom, békén gey funa kom félangka-langka. <sup>22</sup> Atin i begéne brab Apolose brab Pedrowe, niray i Tuluse begey dob begome inok tabanga key begom. Fiyon i duniyae ni, brab de éntingayén gégumah moso, brab de éntingayén béléewe ni, brab fiyon i de umul brab kéléhu, niray i Tuluse inok féfiyoné no begom. <sup>23</sup> Atin i begome ka Kristowe, brab i Kristowe kay Tuluse.

## 4

### *Do apostol*

<sup>1</sup> Atin fantag bé begeye do témore, fatut karangé kom begey do sugu-sugué Kristowe. Non sénarig i Tuluse dob begeyey de ménalém kékébéréhén. <sup>2</sup> Atin i sarigone fatut odoro noy de sugu i amu ne. <sup>3</sup> Endob énda émbukuu fantag bé ati kékéfítung gome begén taloo no i kékéfítung i de ségiyo étew begén. Fiyon i begéne, énda kukumé kuy kagéne lowoh. <sup>4</sup> Enda tete i fédew guwe fantag bé de rénigo gu. Gido loo, énda séna gito no ké fiyo taloo no ké tete i de rénigo gu, non Kadnaney kémukume begén. <sup>5</sup> Mélaw kagom sékukum béléewe ni. Yamula ongot-ongot gom i késéfule i Kadnane. Non fégito no bé beno i kéluhanay rénigoy de étew do énda séna gito no béléewe ni. Atin fégito no soy ati dob fédew i kéluhanay étew. Bé beno gai, i Tuluse dayewé noy séngae ségétew look énda, sabaf sa bé de rénigo ro.

<sup>6</sup> Do dumonodob énggélabito kuy dawéti guwe brab Apolose. Endob i begeye do ufama saén inok gétiga kom bé fatut odoro kom saén i fénsulat i Tuluse. Mélaw kagom karangén de ké toow na gérotor i ségétewé témore bédumonodob nuwe témore. <sup>7</sup> Fégítungé kom keey do toow gom na fo gérotor bé de ségiyo. Endob dufang i nan kékéfítung. Non i kéluhanay de éntingayén do kagom, Tulus i méniraye de dob begome. Mélaw kagom félangka-langka, non énda foy éntingayén do kagom saliyu bé de gédoté kom tidew dob Tuluse.

<sup>8</sup> Fégítungé kom keeyén bé éndaén kailanga kom i tabange tidew dob Tuluse. Fégítungé kom keeyén bé énggédot gom i kéluhanay de kékifyonon tidew dob Tuluse. Fégítungé kom keeyén bé béléewe ni méguléw gom séréngean bé Kristowe fiyon fo ké i begeye do apostol énda séna méguléw gey. Endob i toowe, énda séna méguléw gom. Endob méuyotu damén ké béléewe ni méguléw gom inok méguléw gey so béniséréngean begom. <sup>9</sup> Non dob karang guwe de, rénigoy Tuluse begey do apostol do toow fo gérifantad. Ségiléw gey bé de férisu gédétén féléléhuen dob téngaangay kéluhanay de étew brab de télaki. <sup>10</sup> I kékakarang i de ségiyo étew begey, do dufang non munur gey bé Kristowe. Endob i begome, makom ké do toow gomén gétigan sabaf bé Kristowe. Atin i begeye toow gey fo kun mélubay. Endob i begome, makom ké émbagér gomén. Atin énda fégadatay de étew begey fiyon fo ké fégadatay ro begom. <sup>11</sup> Atin taman so béléewe ni i begeye mélawayaf gey brab térumén gey, brab kulang i de kégal gey. Brab ferasayén gey lubagén brab énda i lawi gey. <sup>12</sup> Mégéror gey gémalbék inok gédoté key i de kailanga key. Atin amuk ingonéy de étew begey, dasala key bero inok féfiyonéy Tuluse bero. Amuk

férasayén gey, fédayaé key saén. <sup>13</sup> Amuk wén i émbéréh tete fantag bé begeye, sumbulo key bé fiyowe kébéréd saén. Maak do ruhuk gey saén. Taman béeleewe ni siyawéy de étew begey dob duniyae.

<sup>14</sup> Do dumo gu, békén sénulat guy ni ké fémalané ku begom. Yamula inok toroé ku begom maak do gulaané ku nga gu. <sup>15</sup> Non fiyon fo ké médooy témoree begom fantag bé Kristowe, ségétew saén i maake abay gom, sani begéne. Non ménwaléy gom munur bé Kristowe amun nuret guy Fiyowe Uret dob begome. <sup>16</sup> Mélaw ongoté ku begom iring gom begén. <sup>17</sup> Been i funa kuwe sémugu bé Timoteowe mangéy dob begome. Been i toowe fo kégédawa ku maak nga gu sabaf bé Kadnane, brab modor bé de sugué ku de. Amuk gérumah dob begome, félégétédémén begom i de kétooro gu fantag bé de adat tom sabaf bé Kristowe, ségiléw bé ténero guwe dob de munur dob kéluhanay de ingéd.

<sup>18</sup> Wén i do dumo begom do ménwaléy félangka-langka non marok éndaén séfuleu mangéy diyaan. <sup>19</sup> Endob séfuleu so mangéy diyaan amuk kétayay Tuluse. Atin bé bénou, susiné kuy kédooy énggérigonoy de félangka-langka, békén i de kébéréd ro saén. <sup>20</sup> Non i kéféguléw i Tuluse betom békén dob kébérédhe saén, éndob dob barakat ne. <sup>21</sup> Ati isuwe kétaya kom? Amuk énda témérén gom bé de tete rigoné kom, séfuleu moso férasayé ku begom. Endob amuk tagaké kom i de tete adat gom, séfuleu mégédaw begom.

## 5

*Wén i ségétew bero ménsala*

<sup>1</sup> Wén i énggelingoo kuwe bé wén kun i ségétewe begom réménigo toow fo tete. Lénamfaén kun i bawag i boh ne. Fiyon i de énda méngintulus, énda gérigono roy loowe bé ni. <sup>2</sup> Gido loo, toow gom fo wayo félangka-langka. Endob fatut gom damén mémala brab émbuku. Atin fatut énda tungkasé kom méngintulus sélimud begom i ni étew réménigo bé ni. <sup>3</sup> I begéne, fiyon fo ké mérayuu dob begome maak diyou so dob begome non doyuné ku so begom fégítungén. Atin sabaf bé atura kuwe, kénukum gun i ni étew ménsala, loo bé rigoné kuwe damén ké diyou dob begome. <sup>4</sup> Amuk sélimud gom, maak diyou so non diyo soy fédéw guwe. Mélaw dob atura kuwe tidéw dob Kadnane Jesu Kristo, <sup>5</sup> sugué ku begom miray bé ni étew dob Satanase inok binasané noy lowoh ne. Tidéw bénou, gésénule damén, atin mélaw énda mékukum i rémogor ne bé gaiy kékukum i Kadnane Jesus.

<sup>6</sup> Kagom damén félangka-langka. Gétiga kom i kébérédhe mano, “Géférerukoy klohe saén fégféreruk i kéluhanay fane.” <sup>7</sup> Atin i étew ni ménsala, ségiléw bé fégféreruke bé fane. Fatut kédané kom tidéw dob begome inok énda waléy gom tete kéluhanan. Yamula waléy gom damén tintu fiyo. Atin gétiga ku méntintu gomén bénou sabaf bé kéunur gome bé Kristowe. Non i Kristowe ségiléw bé natife bili-bili fénléhu ténulak bé gaiy kandulie fénawé “Témara”. Non fénléhuén i Jesuse ténulak gémantinon betom inok méfukas tom bé de sala tom. <sup>8</sup> Mélaw rigoné tom i mantuwe kandulie sani kéamae émfégétédém bé kétulake bé Jesuse. Atin fatut amaé tom saén i fane énda i fengféreruk de. I atag i ni, fatut kéra kom i de tafay tete adat gom atin fatut toow fo fiyoy de adat gom brab béréd gom saén i toowe.

<sup>9</sup> Amun sénulata ku begom bé gétahé, bénréh gu begom bé kagomén séloyuk bé de étew mékérésik i de adat ro. <sup>10</sup> Endob i kébéréd guwe ni, fantag bé de békén munur bé Jesuse, sani de bigaén, de arumén, brab de lémiful, brab de méngadaf bé de kéninontow. Non amuk dini gom dob duniyae ni, kailanga kom séloyuk bero sénga tékélid. <sup>11</sup> Endob i bénréh guwe, been i fantage bé de étew émbéréh do munur bé Jesuse éndob do toow fo bigaén, do arumén, look méngadaf ro do kéninontow, look émbéréh do tete tugi fantag bé de étew, do molon, do lémiful. Kagom séloyuk bé de ni do étew émbéréh do munur ro kun bé Jesuse éndob taus ro mésala loo bé de ni. Fiyon mama, kagom séréngan bero.

<sup>12-13</sup> I de étew énda munur ro bé Jesuse, énda i atura tom kémukum bero, non Tulus saén i kémukume bero. Endob i de dumo gom ménbéréd munur ro bé Jesuse, fatut kukum

gom bero amuk ménsala ro loo bé ni. Non wén i Ménsulate Kébérél i Tuluse mano, “Kéda kom i tetee étew dob begome.”

## 6

*Fantag bé késébanil-banile*

<sup>1</sup> Amuk wén i méuyot témbé begom bér dumo gome munur bér Jesuse, kagom téboén de dob adafay de gémamak kukuman do békén munur. Yamula, fatut téboé kom dob adafay de dumo gom munur. <sup>2</sup> Enda keey gétiga kom de, do betom munur i kémukume moso bér kéluhanay de étew dob duniyae ni. Atin amuk betom i kémukume bér duniyae ni, gékukumo tom i kéluhanay de kloh éntingayén béléewe ni. <sup>3</sup> Enda keey gétiga kom de, betom i kémukume moso bér de télaki dob lawayo. Mélaw toow fo fakay tom sétiyawan béléewe ni dob fantade. <sup>4</sup> Mélaw amuk wén i témbé begom bér dumo gome munur, énda fatutén téboén dob adafay de gémamak kukuman non énda munur ro bér Jesu Kristowe. <sup>5</sup> Fémala-mala gom! Aw énda foy ségétew gétigan begom témiyawan bér de ménsébanil dob begome munur bér Jesuse? <sup>6</sup> Endob réménigo gom wayo énda fiyo non sétébo gom dob adafay de étew gémamak kukuman, énda munur ro bér Jesuse.

<sup>7</sup> Atin sabaf bér de késétébo gom, giton fo toow i kékulang i késarig gome bér Tuluse. Toow na fo fiyo ké fédaya gom ké wén i déménufang begom taloo no ké wén i léméniful begom. <sup>8</sup> Endob i toowe, begom i de ménsala brab do léméniful bér de dumo gom munur. <sup>9</sup> Gétiga kom damén i de étew énda métintu ro, énda féguléwoy Tuluse bero. Fétuntay gom. I de bigaén, brab de méngadaf bér de kéninontow, brab do lémamfa, brab do bakla, énda géahur ro dob kéguléw i Tuluse. <sup>10</sup> Atin loo soy de ménakaw, brab de arumén, brab do molon, brab do émbérél do tete tugi fantag bér de étew, brab do lémiful, énda so géahur ro dob kéguléw i Tuluse. <sup>11</sup> Bér do gétah, wén i do dumo begom loo bér nan. Endob béléewe ni ménlinis gomén tidew dob de sala gom, atin do ménwaléy gomén do étew i Tuluse. Fénwaléyén begom do métintu bér barakat i Kadnane Jesu Kristo brab Rémogor i Tuluse.

*I fiyowe adat*

<sup>12</sup> I betome do munur, fakay gérígono tom i kéluhanay éntingayéne amuk énda teteén. Gido loo, békén kéluhanay éntingayéne fiyo. Fiyon fo ké fakay rigoné kuy kéluhanane, éndob békén fo fatut waléyu maak riféy de rigoné ku. <sup>13</sup> Ufama, i sure, kay amaéne. Atin i amaéne kay sure. Toow i nan. Endob wén moso i gai kédanéy Tulusey sure brab amaéne.

Atin i lowohe békén fégésébiga. Yamula rénígoy Kadnaney lowoh i de étew inok rigoné so. Mélaw énda fatutén sumfata tom bér sundale. Toow fo tete i ni. <sup>16</sup> Gétiga kom damén i ni. I étewe sumfaté noy lowoh ne dob sundale, waléy ro sétiman lowoh. Non wén i Ménsulate Kébérél i Tuluse fantag bér sébawage mano, “I de ruwo gétew waléy ro sétiman lowoh.” <sup>17</sup> Endob i étewe sumfaté noy fédew ne dob Kadnane waléy ro sétiman fédew.

<sup>18</sup> Mélaw kagom témayan bér ségiyowe saliyu bér de bawag gom. I de dumo do sala énda sébanilén bér lowohe loo bér ni. Endob i étewe bigaén, ménsala sébanil bér lowoh ne.

<sup>19</sup> Gétiga kom damén i lowoh gome maak lawi i Tuluse non i Rémogor i Tuluse nirayén begom, bati dob de fédew gom. Mélaw i lowoh gome békén kagom. <sup>20</sup> Yamula Tulus i gefee bér de lowoh gom non bénléyén begom, atin i Nga ney fénggébayad ne de amun ménléhu dob kruse mémukas betom. Mélaw usar gom i de lowoh gom bér funay Tuluse médayéw.

## 7

*Fantag bé késébawage*

<sup>1</sup> Atin fantag man bé de fénénginsa gom begén dob de sulat gom, ay niy késumbulo kuwe de. Fiyo ké énda mawag i lagéye. <sup>2</sup> Endob sabaf médooy de étew do bigaén, fiyo ké i séngae lagéy fatut mawag ségétew libun, brab i séngae libun fatut mawag ségétew lagéy. <sup>3</sup> Atin fantag man bé de sébawag, fatut ro séfidong. I lagéye énda fatutén émbéréh “Kago” dob bawag ne. Loo soy libune énda fatutén émbéréh “Kago” dob bawag ne. <sup>4</sup> Non i libune békén been i gefee bé lowoh ne, non kay bawag ne. Atin i lagéye békén so been i gefee bé lowoh ne, non kay bawag ne. <sup>5</sup> Mélaw kagom élénén i bawag gome ké rigoné noy kailanga nuwe. Endob amuk i de sébawag énda séfidong ro bé firoye kélungonon inok démasal ro, fakay. Endob amuk gilid i no, fatut fétausé roy késéfidong ruwe inok énda kudiyunéy Satanase bero sabaf bé kétayay lowoh ruwe.

<sup>6</sup> Enda sugué ku begom bé de ni bénréh gu. Yamula féginau gu saén begom bé fiyo ké énda sébawag gom. <sup>7</sup> Non méuyotu de damén ké iringé kom begén énda i bawag gu. Endob énda ségiléw tom kéluhanan. Non irayay Tulusey séngae ségétew kaan kékfurungan loo bé étewe énda mawagén. Atin i de ségiyo étew, irayay Tuluse bero ségiyo kékfurungan.

<sup>8</sup> Ay niy bérhékuwe dob de énda séna bawagén brab dob de baléw: Toow na fo fiyo ké énda mawag gom, ségiléw bé begéne. <sup>9</sup> Endob amuk énda gétingkélo kom i kétayay de lowoh gom, toow na fo fiyo ké mawag gom. Non toow na fo fiyoy mawage bé kérégénan gom sabaf bé kétayay lowohe.

<sup>10</sup> Atin fantag man bé begome wénén i do bawag gom, ay niy bérhékuwe dob begome. Been i niy sugu i Kadnane, békén saén kagén. I libune békén fo fatut ké ségélak bé bawag ne. <sup>11</sup> Endob amuk wén i libun génlak i bawag ne, énda fo fakayén ké mawag man ségiyo. Endob fakay séfule dob bawag ne. Atin i lagéye békén fo fatut ké gélaké noy bawag ne.

<sup>12</sup> Atin fantag man bé begome do sébawag, ay niy kagéne saén féginau dob begome. (Non énda sénugu i Kadnaney ni.) Amuk wén i lagéy dumo tom munur bé Jesuse éndob i bawag ne énda munurén, atin i bawag ne ni mika ségélak, énda fatutén ké gélaké no. <sup>13</sup> Atin amuk wén i libun dumo tom munur bé Jesuse, éndob i bawag ne énda munurén, atin i bawag ne mika ségélak, énda fatutén gélaké no. <sup>14</sup> Non i bawage énda séna munurén, waléy malinis dob adafay Tuluse sabaf bé bawag ne munur bé Jesuse. Amuk békén loo bé ni, i de nga ro énda malinis ro dob adafay Tuluse maak do nga i de békén méngintulus. Endob i toowe fo, malinis ro dob adafay Tuluse. <sup>15</sup> Endob i bawage énda munurén, amuk gélaké noy bawag ne, fédaya gom gélaké no. Fakay i ni, non kétayay Tuluse ké métanék i kékabati tome. <sup>16</sup> Fatut fédayaé no ké gélaké bawag ne, non fiyon fo ké énda ségélakén, énda so gétiya no de ké sabaf bé beene waléy géunur i bawag ne loo ké énda.

<sup>17</sup> Atin fiyon fo ké atiy gohoy séngae ségétew betom bé gaiwe fén-unur i Tuluse betom fatut fétausé tomén. Non niray i Kadnaney nan gohon. Been i sugué kuwe dob de munur dob kéluhanay de ingéd. <sup>18</sup> Amuk i ségétewe begom méntulién bé énda séna ménwaléyén de munur bé Jesuse, éndaén fatutén ké kédané noy kétuli ne béléewe. Atin amuk i ségétewe begom énda séna méntulién amun ménwaléyén munur, éndaén fatutén fétuli béléewe. <sup>19</sup> Non ulanden ké méntuli gom loo ké énda. I toowe fo mélaga i kéodoro kome bé de sugu i Tuluse. <sup>20</sup> Mélaw fiyon fo ké atiy gohoy séngae ségétew betom bé gaiwe fén-unur i Tuluse betom, fatut fédayday tomén loo bé nan. <sup>21</sup> Amuk ségétew go rifén bé gaiwe ménwaléy gon munur, kago émbuku de. Endob amuk fakay tangéyén go, rigo mo. <sup>22</sup> Non amuk ségétew go rifén bé gaiwe ménunur go, féwaléyé Kadnane beem békénén rifén dob adafa nuwe. Atin loo so bé ni, amuk békén go ségétew rifén bé gaiwe ménunur go, waléy go rifé Kristowe. <sup>23</sup> I Tuluse bénléyén betom amun nirayén i buntunge Ngaén fénléhu géméantinon betom. Mélaw békén tom fatut waléy riféy kékawane saén. Yamula riféy Tuluse betom. <sup>24</sup> Do dumo gu, fiyon fo ké atiy goho tome bé gaiwe fén-unur i Tuluse betom, fatut fétausé tom, non Tulus i dumo tome.

<sup>25</sup> Atin fantag man bé de étew énda sénay bawag ro, énda i gébérého ku sugu tidew dob Kadnane. Endob ay niy karang guwe de, brab ségétewu gésarigo kom non bé kégédaw

i Kadnane begén. <sup>26</sup> I karang guwe de, fiyo ké énda mawag gom non mérégén i de gai béléewe ni. <sup>27</sup> I étewe énda i bawagén, békén fatut sélédé no. Atin i étewe wén i bawagén, békén fatut gélaké no. <sup>28</sup> Endob amuk wén i étew méuyot mawag, fakay. Békén sala i mawage. Endob géagéw gom mérégén. Been i niy funa kuwe énggékéréh bé kagom fatut mawag béléewe ni, non mikau de ké kérégénan gom loo bé de kékérégénay de sébawag.

<sup>29</sup> Non bérhéhé ku begom do dumo gu, éndaén mérugay i gai tome. Mélaw tidéw béléewe ni, i étewé wén i bawagén, fatut mégéror rémigo bé galbék i Kadnane maak énda i bawagén. <sup>30</sup> Ségiléw so bé de tete fédewén, brab de fiyo fédewén, brab de wén do languntama ro brab do énda i languntama ro. Ulanden non fatut ro mégéror rémigo bé galbék i Kadnane. <sup>31</sup> Atin amuk musar tom bé de éntingayén dob duniyae ni, békén fatut toowé tom gulaanén. Non éndaén mérugay i duniyae ni.

<sup>32</sup> Méuyotu de fo ké énda émbuku gom. I lagéye énda i bawagén toow na fo mégéror rémigo bé galbék i Kadnane non énda i mangga de. Mélaw i fégitungé nuwe saén i funay Kadnane mésuwat. <sup>33</sup> Endob i lagéye bawagan, fégitungé noy de éntingayén dob duniyae ni inok fésuwaté noy bawag ne. <sup>34</sup> Sabaf bé ni, mésébaad i kéfégitung ne. Ségiléw so bé libune énda i bawagén, fégitungé no saén i fantage bé Kadnane inok toow fo mégéror rémigo bé galbék i Kadnane. Endob i libune wén i bawagén, fégitungé noy de éntingayén dob duniyae ni non méuyot de ké fésuwaté noy bawag ne.

<sup>35</sup> Békén bénréh guy ni ké énda fébawagé ku begom. Békén! Bénréh guy ni inok tabanga ku begom rémigo bé fatute brab inok mégéror gom rémigo bé galbék i Kadnane, atin énda i mangga begom bé ni.

<sup>36</sup> Fantag man bé de ménséfasad sébawag moso, amuk méuyot ro de ké éndaén fétausé roy késébawag ruwe inok énda i angga ro rémigo bé galbék i Tuluse, fiyo. Endob amuk méuyot ro fo séfidong, fatut ro sébawag loo bé kétaya ruwe. Enda mésala ro amuk sébawag ro. <sup>37</sup> Endob i lagéye, amuk énda i mémégés de éndob toow fo kétaya no ké éndaén fétausé no bawagén i libune fénasada no bawagé no, fiyo so. <sup>38</sup> Mélaw, fiyo ké bawagé noy kénogone fénasada no. Endob toow na fo fiyo ké énda bawagé no de.

<sup>39</sup> I libune wén i bawagén, énda fakayén ké mawag ségiyo taman méuyag sénay bawag ne. Endob amuk ménléhu i bawag ne, fakay man mawag bé kétaya nuwe, éndob fatut ségétew so munur bé Kadnane Jesus. <sup>40</sup> Endob toow na fo méoror ké éndaén mawagén ségule. Beeniy kéfégitung guwe de. Atin gékaranga ku, fénggésobut i Rémogor i Tuluse begén i ni.

## 8

### *Fantag bé amaéne*

<sup>1</sup> Atin fantag man bé fénénginsa gome ké fakay tom mama bé amaéne ténuak dob adafay de kéninontow, ay niy késumbul guwe de. Gétiga tom kéluhanan énda i barakat i de kéninontow. Gétiga tom énda i lanték ro. Endob i de étew marok do gétigan ro, waléy ro félangka-langka. Endob békén tom fatut félangka-langka, yamula fatut mégédaw tom inok féfiyoné tom i fédew i de dumo tom. <sup>2</sup> I étewe manok toow fo gétigan, énda séna gétiga noy ati fatute gétiga no. <sup>3</sup> Endob i étewe toow fo féimué noy Tuluse, géloy Tuluse non ménwaléy étew i Tuluse.

<sup>4</sup> Na, fantag man bé amaéne ténuak dob adafay kéninontowe, gétiga kom i kéninontowe énda méuyagén taloo no Tulus. Non sébaan saén i Tuluse, atin éndaén i ségiyo de.

<sup>5</sup> Bénréh i de dumo do étew wén kun i médo do tulus brab kadnan dob lawayo brab dob fantade. Atin toow, wén i médo féngadaféy de étew. <sup>6</sup> Endob gétiga tom, sébaan saén i Tuluse, sani Abaye ménfélimbag bé kéluhanane. Been i odoro tome brab féngadafé tom sénga téklid. Atin sébaan saén i Kadnane sani Jesu Kristowe léménimbag bé kéluhanay éntingayéne brab Beeney funa tome méuyag.

<sup>7</sup> Endob békén kéluhanay étewe gétiga roy ni. Wén i de dumo étew marok do tulus i de kéninontow non beeniy karowe kénunur bé do gétah bé énda séna ménunur ro de bé Jesuse. Mélaw amuk mama ro bé amaéne ténuak dob adafay kéninontowe, marok

énggérigo ro bé salae funa ro tete fédew. <sup>8</sup> Endob gétiga tom, békén amaén i funay Tuluse betom mésuwat. Non amuk mama tom de, loo so ké énda mama tom de, ulanden dob Tuluse.

<sup>9</sup> Gido loo, ingat gom inok i de rigoné kom, békén funay dumogome énda séna méégét i kéunur ne, waléy gésala. <sup>10</sup> I begome wén i gétiga kom, amuk mama gom dob lawie féngadafan bé kéninontowe, atin amuk énggitoy ségétéwe énda séna gétiga noy fantage bé de ni kétoro, waléy so méuyot de mama, fiyon fo ké dob fédew ne sala i mamae bé amaéne ténuak dob adafay kéninontowe. <sup>11</sup> Mélaw i ni étew énda séna méégét i kéunur ne, énggésug-sug, non rénigo noy gékaranga nuwe mésala de. Enda fiyoy nan, non beene soy funa Kristowe ménléhu inok mékédan i sala ne. Mélaw i kégétiga muwe wayoy funay dumogmuwe waléy gésala. <sup>12</sup> Mélaw amuk rigoné moy ni, beem i mésalae sébanil bé Kristowe non mésala go sébanil bé dumogmuwe bé kéfésala me bé dumogmuwe énda méégét i kéunur ne. <sup>13</sup> Mélaw amuk sabaf saén bé karnehey funay dumogmuwe gésala, kagon mama de inok énda mésala i dumogmuwe de.

## 9

### Fantag bé sahud i de apostol

<sup>1</sup> Enda i ségiyo étew géatur begén non ségétéwu apostol brab non méntéfegito Kadna tome Jesus dob begéne. Atin i begome, ménunur gom bé Jesuse sabaf bé kétoro guwe begom. <sup>2</sup> Mélaw fiyon fo ké i de ségiyo do étew énda fégéoloné ro begén ségétéw apostol, fatut fégéoloné kom begén non i kéunur gomey fégéolonone bé i begéne ségétéwu apostol. Non begén i murete fantag bé Kadnane dob begome do étew dob Korinto.

<sup>3</sup> Atin amuk wén i démowoy begén, ay niy késumbulo kuwe de: <sup>4</sup> Aw békén ba fatutu irayan kéama gu bé kégalbék guwe témořo fantag bé Kristowe? <sup>5</sup> Aw énda bay kuwagib gu miring bé rénigoy de dumogu do apostol brab de tuwaréy Jesus brab Pedrowe? Non kéluhana ro wén i do bawag ro munur so bé Jesuse. Atin amuk magéw ro, uwité roy de bawag ro. Mélaw wén soy kuwagib gu rémigo damén bé nan. <sup>6</sup> I Bernabewe brab begéne, énda fatut gey gémalbék saliyu bé kétoro geye saén. Fatut irayan gey amaén bé kétoro geye saén. Sedek énda mérigoy ni loo bé mérigowe dob de ségiyo témořo? <sup>7</sup> Ufama, énda i ségétéw sundalo been soy mayadan bé kaane lowoh bé kégalbék ne sémundalo. Ségiléw so bé mohoke, wén i kuwagibén mama bé de kéntéwén. Loo soy témalimae bé de bili-bili, fatut gédoté noy de dumogatas i de bili-bili talimaé no.

<sup>8</sup> I ni bénréh gu békén saén tidew dob kélawane, non been soy niy ménbéréhe dob kukumay Tuluse. <sup>9</sup> Ménbéréh dob kitabe sénulat Moisese mano, "I ayame sad-sadé noy faréye inok mérek, békén fatut ikétén i ba ne." Atin i Tuluse békén saén bénréhén i ni fantag bé ayame. <sup>10</sup> Non bénréhén so fantag bé begeye do muret bé Fiyowe Uret. I démaduwe brab kémétéwe wén i inam ro gégédot bé kéntéw ruwe. <sup>11</sup> Atin ségiléw so bé begeye. Nohok gey i kékérén i Tuluse dob begome inok méuyag gom taman sa taman. Mélaw fatut irayan gey amaé key inok méuyag gey dob duniyae ni. <sup>12</sup> Non amuk i de ségiyo témořo begom wén i kuwagib ro médot tidew dob begome, toow na fo dakél i kuwagib geye de.

Gido loo, énda séna ménongot gey tidew dob begome. Yamula féndaya gey kéluhanay mérégéne inok énda saén méangga i kéuret geye bé Fiyowe Uret fantag bé Kristowe. <sup>13</sup> Gétiga kom damén i de étew gémalbék dob lawi i Tuluse, mama ro so diyo. Atin i de fadi témulak, mama ro so bé dumoy ténuak ruwe. <sup>14</sup> Ségiléw soy ni bé begeye. Non sénugu i Kadnane bé fatut médot i de témořo bé kéfaguyag ruwe tidew dob de témořo ro.

<sup>15</sup> Endob fiyon fo ké wén i kuwagib gu médot bé kéfaguyag guwe tidew dob de témořo gu, énda séna ménongotu dob berowe. Atin békén sémulatu béri inok mongotu dob begome. Mikau fo mongot dob begome. Toowu na fo méuyot ké méléhuu mélawayaf kisak mékédan i funa kuwe félangka-langka, sani kégalbék guwe fiyon fo ké énda médotu sahud. <sup>16</sup> Endob énda i kuwagib gu félangka-langka sabaf bé kéuret guwe bé Fiyowe Uret. Non sénugu i Kadnane begén muret fantag bé Kristowe. Atin mélaw amuk énda rigoné

ku de, toowu fo mékégédaw-gédaw non mékukumu fo toow. <sup>17</sup> Amuk muretu sabaf bé kétaya kuwe saén, gédoté kuy sahud guwe de. Endob sénugu i Tuluse bégén, mélaw fatut rigoné ku sabaf sénarigén i ni galbék dob begéné. <sup>18</sup> Ati mélaw i sahud guwe de? Ay ni: Been i dakéle kéoror gu bé kéuret guwe bé Fiyowe Uret fiyon fo ké énda mongotu bé kéfaguyag guwe loo damén bé kuwagib guwe de.

<sup>19</sup> Atin fiyon fo ké békénu ségétew rifén, waléy maak riféy kéluhanay étewe inok tabangé ku bero waléy do munur bé Jesuse. <sup>20</sup> Mélaw amuk diyou dob de Judio, iringé kuy adat i de Judio inok munur ro. Fiyon fo ké énda kailanga no modoru bé kitabe tidéw dob Moisese, modoru de amuk diyou dob de modoron de inok munur ro bé Jesuse. <sup>21</sup> Atin amuk diyou dob de békén Judio, iringé ku soy adat ruwe inok munur ro so bé Jesuse. Endob fiyon fo ké éndaén modoru bé kitab Moisese, modoru bé kitab Kristowe. <sup>22</sup> Atin amuk diyou dob de étew énda séna gétiga roy fatute amaé tom bé kéluhanay de amaén, énda amaé kuy amaéne karangé ro énda fiyo no. Rigoné kuy ni inok tabanga ku bero munur bé Jesuse. Mélaw rigoné kuy adat i de udenén étew dumo gu inok i de dumo bero waléy géunur bé Jesuse.

<sup>23</sup> Rigoné kuy kéluhanay de ni inok munur ro bé Fiyowe Uret fantag bé Jesuse, inok gédoté ku soy de kéfiyonon iray i Tuluse sabaf bé kélégéb i Fiyowe Uretén. <sup>24</sup> Gétiga kom damén i ni. Amuk sékuya i de étew, kéluhana ro léméntu, éndob ségétew saén i témbabane brab gégédote bé barase. Mélaw fégérör gom loo bé sékuyaé inok barasay Tuluse begom moso. <sup>25</sup> I étewe sékuya toow fo fégérör bé rigoné nuwe inok waléy émbagér i lowoh ne. Rigoné noy ni inok témbaban, atin gédoté noy barase de énda fo métinkélén. Endob i betome mégérör gémalbék bé galbék i Kadnane, gédoté tom soy katome baras énda mébinasa no taman sa taman. <sup>26</sup> Beeniy funa kuwe magayas féntang léméntu mangéy dob fégilidoy sékuyaane. Atin ségiléwu bé ségétewé sémuntuk, toow fo tiliké no inok toow fo guraté no. <sup>27</sup> Atin i lowoh guwe ni, amuk wén i tete kétaya no, dusané ku inok énda modoru bé nan tete kétaya ku. Rigoné kuy ni inok i begéne témenoro bé médoowe, énda waléy mékédan i kagéne baras.

## 10

<sup>1</sup> Do dumo gu, méuyotu de ké gétiga kom i énggagéwoy de katufua tom amun ménodor ro bé Moisese. Déniyagay Tuluse bero kéluhanan. Non ténléb i rawéne bero bé kéagéw ruwe brab énggiefara roy dogote féndawét Furo Dogot. <sup>2</sup> Mélaw maak bénautison ro bé rawéne brab dogote inok waléy ro do kuyug Moises. <sup>3</sup> Atin ménama ro kéluhanan bé amaéne tidéw dob Tuluse. <sup>4</sup> Atin méniném ro kéluhanan bé wayége tidéw dob Tuluse, non féniném i Tuluse bero bé wayége tidéw dob sébaane batéw ménodor bero. I ni batéw been i Kristowe. <sup>5</sup> Gido loo, énda ménsuwat i Tuluse bé kédoono ruwe. Mélaw médooy ménléhue bero diyo dob gonone énda i étew de batí.

<sup>6</sup> I funa nuwe ménrigoy de ni inok wén i do ufama témozo betom, inok gétiga tom énda fatut féngonoyé tom i de tete éntingayén loo bé berowe. <sup>7</sup> Enda fatut tom méngadaf bé de kéninontow loo bé rénígoy de dumo bero. Non wén i Ménsulate Kébéréh i Tuluse mano, “Ménsar ro dob adafa nuwe mama brab miném. Tidéw bénó, téminindég ro mésayaw dob adafa nuwe.” <sup>8</sup> Atin énda fatut tom bigaén loo bé rénígoy de dumo bero, non kénukum i Tuluse bero bé kéléhu i ruwowe folo bra télew ngibu bé ségétérésangane. <sup>9</sup> Atin békén fatut tukawa tom i Kadnane bé de rigoné tom do tete loo bé rénígoy de dumo bero, funay de ulé kéméneke bero atin ménléhu ro. <sup>10</sup> Atin énda fatut tom riklamo loo bé rénígo ruwe funay Tuluse sénuguén i téliké méméléhu bero.

<sup>11</sup> I funay de ni do ménrigo inok wén i do ufama témozo brab émféingat bé kéluhanay étewe, non éndaén mérugay i tamfaday gaiwe tidéw béléewe ni.

<sup>12</sup> Mélaw, i étewe manok toow fo méégét i kéunur ne, fatut mingat inok énda mésalaén.

<sup>13</sup> I de kétukawa no bé séngae ségétew étew békén saén ménantu, non i kéluhanay kélawane ménukawanén loo bé begome. Atin toow tom fo gésarig bé Tuluse non énda fédayaé no betom métukawan bé kétukawe gélamfas na betom. Non bé gaiwe

métukawan tom, tintu fébagéré no betom inok wén i kétingkél tom, inok énda damén gérigo tom sala.

<sup>14</sup> Mélaw do gulaané ku do dumo gu, kagom méngadaf bé de kéninontow. <sup>15</sup> Gétiga kom i fatute, mélaw fégitung gom i de bénréh gu inok gétiga kom ké toow look énda.

<sup>16</sup> Amuk mamung tom bé “komiyuniyune” fégétédémé tom i kéléhu Kristowe, mama tom fan brab miném tom arak fénssalamata key dob Tuluse. I inémé tome, been i dara Kristowe sétukidé tom. Atin i amaé tome, been i lowoh Kristowe sétukidé tom. <sup>17</sup> Sébaan i fane. Mélaw i kéluhana tome waléy sébaan so non mama tom bé sébaane fan.

<sup>18</sup> Fégitung gom i fantage bé de étew Judio. I kéluhanay de mama bé ténulake, séréngan ro do méngadaf bé Tuluse. <sup>19</sup> Ay niy atag i ni kétoro gu begom. I kéninontowe, rénigoy étewe saén. Atin mélaw énda i atag i amaéne ténulak dob adafay de kéninontow.

<sup>20</sup> Gido loo, békén saén do kéninontow i de féngadafé ro, ké témulak ro do saitan so. Békén Tulus i féngadafé ruwe. Mélaw mikau de ké mamung gom bé kénéngadafé bé de saitan. <sup>21</sup> I betome do munur bé Kristowe, amuk mama tom bé komiyuniyone, fégétédémé tom i Kadnane Jesus brab Beeney féngadafé tome. Mélaw énda fakay tom mama so bé de amaén ténulak dob adafay de saitan non maak mamung tom méngadaf bé de saitan. <sup>22</sup> Békén fatut fédaléwé tom i Kadnane. Non toow fo barakatan brab gékukumo no betom, atin énda gésélyah tom de.

<sup>23</sup> Fiyon fo ké fakay rigoné tom i kéluhanane békén fiyoy kéluhanay de rigonén. Atin fiyon fo ké fakay rigoné tom i kéluhanane, békén fégétabang bé de dumo tom i kéluhanay de rigonén. <sup>24</sup> Békén fatut tabanga tom saén i de katom lowoh. Fatut tabanga tom soy de dumo tom.

<sup>25</sup> Fakay amaé tom i de udenén karne fébéléy dob fadiyane, brab békén fatut fénginsaé tom ké ténulak dob adafay de kéninontow, inok énda waléy tete i de fédew tom amuk amaé tom. <sup>26</sup> Non ténungkas i Tuluse betom mama bé kéluhanay amaéne dob Ménsulate Kébérélén mano, “Tulusey gefee bé duniyae brab kéluhanay éntingayéne.”

<sup>27</sup> Amuk wén i ségétew étew énda munurén bé Kristowe atin séngkaté no begom mama, brab amuk magéw gom mangéy diyo, fatut amaé kom i kéluhanay féama ne begom. Endob kagom fénginsaén de ké ténulak i amaéne ni dob kéninontowe, inok énda waléy tete i de fédew gom ké mama gom de. <sup>28-29</sup> Endob amuk wén i émbérélén de begom mano, “I ni amaén ténulak dob adafay kéninontowe”, kagom amaéne de, inok i ménbérélén mano, “Amuk fakay amaé kuy atiy kétaya kuwe, sedek énda géamaa ku de sabaf saén bé ségétewé étew énda gétiga no de ké ténungkas i Tuluse betom mama bé kéluhanane? <sup>30</sup> Sedek wén i démowoy begén bé amaéne fénssalamata ku dob Tuluse?”

<sup>31</sup> Ay ni késumbul guwe de: Amuk wén i rigoné kom look amaé kom look inémé kom, rigo gom i kéluhanane inok médayéw i Tuluse de. <sup>32</sup> Mélaw kagom rigonén i funay dumogome tete i fédew ne, fiyon Judio, taloo no békén Judio, loo soy de munur bé Kristowe.

<sup>33</sup> Iring gom i rigoné kuwe. Kétaya ku ké démoyun fésuwaté kuy kéluhanay étewe. Enda rigoné kuy kéfionoy kagéne saén lowoh, yamula rigoné ku soy funay kéluhanay de étew fiyo inok munur ro so bé Jesuse brab méfukas ro bé de sala ro.

## 11

<sup>1</sup> Mélaw iring gom begén loo bé kéiring guwe bé Kristowe.

### Fantag bé de libun

<sup>2</sup> Do dumo gu, dayewé ku begom, non démoyun fégétédémé kom begén brab odoro kom i de kétoro gu begom. <sup>3</sup> Atin méuyotu de ké géssobuto kom i ni. I lagéye uléw i bawag ne. Atin i Kristowey uléw i lagéye. Atin Tulus i uléw Kristowe. <sup>4</sup> Mélaw i lagéye amuk ureté noy kébérélén i Tuluse taloo no démasal, fatut énda météléb i uléw ne inok fégito noy Kristowe uléwén. <sup>5</sup> Endob i libune amuk ureté noy kébérélén i Tuluse taloo no démasal, fatut téléléb noy uléw ne inok énda émfémalay bawag ne. Non amuk énda, ségiléw bé

libune ménérih i uléw ne. <sup>6</sup> Atin amuk énda télélébé noy uléw ne, fatut fékélengén i buk ne. Endob toow fo mékémala ké ménkéleng i buk i libune taloo no ménérih i uléw ne, mélaw fatut télélébé noy uléw ne. <sup>7</sup> Endob i lagéye énda fatut télélébé noy uléw ne ké démasal taloo no ké muret bé kékéréd i Tuluse. Non beeney maake anlung i Tuluse non niray i Tuluse dey aturay duniyae ni. Békén libuney funay bawag ne médayéw. <sup>8</sup> Non i sunguwe lagéy békén tidéw dob libune. Yamula libuney tidéwe dob lagéye. <sup>9</sup> Atin i lagéye békén lénimbag inok kay libune. Yamula lénimbag i libune inok kay lagéye. <sup>10</sup> Mélaw fatut télélébey libuney uléw ne inok fiyon i de télaki gétiga roy lagéy i uléw ne. <sup>11</sup> I betome do munur bé Kadnane, i lagéye brab libune fatut sétabang. Non i libune kailanga noy kétabang i lagéye. Atin i lagéye kailanga noy kétabang i libune. <sup>12</sup> Non loo bé gétaho, i sunguwe libun tidéw dob sunguwe lagéy, béleewe i lagéye mumah tidéw dob libune. Atin i kéluhanane tidéw dob Tuluse, non Been i lérimbagé békén kéluhanane.

<sup>13</sup> Begom séden i mégitunge de. Aw fakay ba démasal i ségitewé libun dob simbaane amuk énda télélébé noy uléw ne? Gétiga tom énda fakayén. <sup>14</sup> Atin gétiga tomén dob de fédew tom bé énda fo fiyo no ké métaah i buk i lagéye. Toow fo mékémala. <sup>15</sup> Endob toow fo fiyo ké métaah i buk i libune funa no médayéw. Non niray dey buk ne inok météléb i uléw ne. <sup>16</sup> Amuk wén i mika bé ni kétoro, ay niy késumbul guwe de. Enda i ségiyo adat ténero gey saliyu bé ni bé kékéngadafé. Atin ménagayun soy kéluhanay de munur bé Tuluse dob kéluhanay de ingéd.

### I kéama i Kadnane

<sup>17</sup> Ay niy ségiyowe na béréréh ku begom. Enda dayewé ku begom sabaf bé késelimud gome méngadaf. Non énda fiyoy rigoné kome, rigoné kom i tetee. <sup>18</sup> Non énggelingoo ku, buluk sélimud gom kun, ménsebaad-baad gom. Atin gétiga ku wén i kétoow i ni. <sup>19</sup> Gido loo, kailanga kom i mésébaade inok toow fo giton i isuwe tintu fo sémarig bé Tuluse. <sup>20</sup> Amuk sélimud gom mama bé amaéy Kadnane sani komiyuniyune, énda fiyoy nan rigoné kom. Mélaw békén gom tintu mama bé amaéy Kadnane. <sup>21</sup> Non amuk mama gom, i de dumo begom toow fo arumén. Mélaw i de dumo de mule ro mélafay. Atin saliyu na bé nan, waléy i de dumo begom molon ké sélimud gom. <sup>22</sup> Sedek énda mama gom brab miném dob de kagom lawi? Non bé kéarumé kome, fémalané kom i de méskinan begom. Mélaw i de ségiyo étew émbéréd ro tete fantag bé begome do munur bé Jesuse. Ati mélaw i fiyowe béréréh ku? Enda fo dayewé ku begom loo damén bé kétaya kome de. Yamula béréréh ku begom, toow fo tete i rigoné kome.

<sup>23</sup> Non i ténero guwe begom fantag bé komiyuniyune ségiléw so bé kétoro i Kadnane de begén. Bé kélunganone fénkéfo Judasey Kadnane Jesus, éndot Jesusey fane. <sup>24</sup> Atin amun gilid ménfésalamat dob Tuluse, sénsala sébanil bé Kadnane. Atin ménbéréd mano, “Ay niy lowoh guwe, niray inok méfukas gom. Ama gom i ni fégétédémo kom Begén.” <sup>25</sup> Loo so bé no, amun énggilid ro mama fétémégén, éndotén i tabue. Brab ménbéréd mano, “I ni tabu, beeniy mantuwe fasad i Tuluse rénigo bé dara guwe. Amuk miném gom de, rigo gom fégétédémo kom Begén.”

<sup>26</sup> Non taman so bé késéfule i Kadnane, sénga mama gom bé fane ni brab miném dob tabue ni, fégito gom i késarig gome bé kéléhu ne fégéfukas begom. <sup>27</sup> Mélaw amuk wén i étew mama bé éfay Kadnane brab miném dob tabu ne, éndob énda méégét i kékégitung ne fantag bé atag i komuniyone ni, ménala sébanil bé Kadnane. Non énda basana noy lowoh ne brab dara ne. <sup>28</sup> Mélaw fatut susinéy séngae étew i kaane lowoh ké fiyo taloo no tete i kékéngadaf ne. Amuk gékaranga no fiyo, fakay mama bé fane brab miném dob tabu i Kadnane. <sup>29</sup> Endob amuk wén i étew mama de brab miném de, atin énda rénigo no de inok fégétédémé noy kéléhu i Kadnane, kukuméy Tuluse de sabaf bé nan rénigo no. <sup>30</sup> Beeniy funa kome médooy de mélubay begom brab do démeruun, atin wén soy do ménléhu begom. <sup>31</sup> Endob amuk susiné tom na sunguy de katom lowoh bé kékéngadaf tome bé Kadnane, énda kukuméy Tuluse betom. <sup>32</sup> Endob bé kékifit i Tuluse betom béleewe ni, toroé no betom inok énda kukumé no betom moso loo bé gétimale kékukumén bé de étew énda munur ro bé Jesuse.

<sup>33</sup> Mélaw do dumo gu, amuk sélimud gom mama bé komiyuniyone, kagom magayas. Yamula séongot-ongot gom. <sup>34</sup> Atin amuk wén i mélafay, fatut mama na métah dob lawine. Atin tidéw béno, mangéy sélimud. Mélaw énda kukuméy Tuluse begom ké sélimud gom. Atin fantag man bé de ségiyo kékéginau gu begom, béréhé ku fo ké séfuleu mangéy diyaan.

## 12

### *I iray i Rémogor i Tuluse*

<sup>1</sup> I kéuyoto kuwe béréhé ku begom i fantage bé de iray i Rémogor i Tuluse. Do dumogu, méuyotu de fo ké gésobuto kom i de ni. <sup>2</sup> Bé gétahe, amun énda séna munur gom bé Jesuse, wén i ménfíféngadaf begom bé de kéninontow. Atin sabaf bé ni, énggésala gom, fénéngadaf gom i de kéninontow, sani de énda méuyag. <sup>3</sup> Mélaw méuyotu de ké gétiga kom i ni. I étewe fémmanduoy Rémogor i Tuluse, énda géfémulaa noy Jesuse. Brab énda soy étew gébérén mano, "Jesusey Kadna kuwe," saliyu bé fénémanduoy Rémogor i Tuluse.

<sup>4</sup> Médoor gékélasiy de kékéfurancon iray i Rémogor i Tuluse, éndob sébaan saén i tidéwo ruwe sani Rémogor i Tuluse. <sup>5</sup> Médoor gékélasiy kégalbéké, éndob sébaan saén i Kadnane galbékéon. <sup>6</sup> Médoor gékélasiy de rigoné tom, éndob sébaan saén i Tuluse émférigo de dob betome kéluhanan. <sup>7</sup> I Rémogor i Tuluse niraya noy séngae ségétew betom bé sébaane kékéfurancon inok fégétabang tom bé kéluhanay de dumo tom munur. <sup>8</sup> Non i Rémogor i Tuluse, irayén dob de dumo étew i kékéfurunge émbérén bé toowe kégétigan. Atin dob ségiyowe man étew, irayén i kékéfurunge émfégésobut bé ménaléme kétoro. <sup>9</sup> Atin dob de ségiyo, irayén i émbagére kéunur. Atin dob de ségiyo, irayén i kégétigane muwa. Endob sébaan saén i Rémogor i Tuluse miray de. <sup>10</sup> Atin dob de ségiyo, irayén i barakate inok gérigo ro do mékégaif. Atin dob de ségiyo, irayén i kékéfurunge muret bé kékébérén i Tuluse. Atin irayén dob de ségiyoy kékéfurunge mégélolo bé barakate ké atiy tidéwo nuwe de, inok gétiga ro ké tidéw dob Tuluse loo ké tidéw dob Satanase. Atin irayén dob de ségiyoy kékéfurunge sébérén bé de séségiyo-giyo késébérén énda séna gétiga ro de. Atin irayén dob de ségiyoy kékéfurunge émfégésobut bé de ni do késébérén. <sup>11</sup> Atin fiyon fo ké médoor gékélasiy de kékéfurancon irayén, sébaan saén i Rémogor i Tuluse miray de. Atin irayén saén dob séngae ségétew kétaya no iraya no de.

### *Maak lowoh*

<sup>12</sup> I Kristowe ségiléw bé sébaane lowoh. Atin betomey maake réfa i lowoh Kristowe. Wén i do séségiyo-giyo kékéfurungo tom ségiléw bé rigonéy de réfa i lowohe. Endob sébaan saén i lowohe. <sup>13</sup> I begome kéluhanan, do Judio taloo no do békén Judio, do rifén taloo no do békén rifén, sébaan saén i Rémogor i Tuluse ménautison betom. Mélaw ménwaléy tom maak sébaan lowoh fémmanduoy Rémogor i Tuluse.

<sup>14</sup> Sébaan saén i lowoh i ségétewé étew éndob médooy de réfaén. <sup>15</sup> Ufama, amuk émbérén i sékéye mano, "Békénu réfa i lowohe non békénu kémér," békén toow i nan. Non i sékéye, fiyon fo ké énda gégamakén loo bé kémére, réfa i lowohe soy beene. <sup>16</sup> Atin amuk émbérén i kékéingoe mano, "Békénu réfa i lowohe non békénu moto," békén toow i nan. Non i kékéingoe, fiyon fo ké énda gégito no loo bé motowe, réfa i lowohe soy beene. <sup>17</sup> Ufama, amuk i sébaane lowoh falan saén moto, énda gégélingoén. Atin amuk falan saén kékéingo, énda gétéréhungén. <sup>18</sup> Endob énda lénimbag i Tulusey étewe loo bé nan. Non rénigo noy de séségiyo-giyo réfa i lowoh i étewe loo bé kétayay Tuluse de. <sup>19</sup> Mélaw amuk ségéréfa saén i lowohe, énda médawétén lowoh. <sup>20</sup> Endob i toowe, médooy tom do réfa i lowoh Kristowe.

<sup>21</sup> Mélaw i motowe énda gébéréhén dob kémére mano, "Enda kailanga ku beem." Atin i uléwe énda gébéréhén dob sékéye mano, "Enda kailanga ku beem." <sup>22</sup> I toowe, i de réfa i lowohe fégitungé tom do énda fo toowén balilaga, beroy de toow fo do kailangan. <sup>23</sup> Atin i de réfa i lowohe fégitungé tom do toow fo gérifantad, toowé tom fo talimaén. Atin i de dumo réfaén énda toowén fiyo, toowé tom féfiyonén bé kégale. <sup>24</sup> Enda kailanga no

rigonén dob de dumoy réfa i lowohe do fiyo falas. Non rénigoy Tulusey de lowoh tom inok talimaé tom i de réfaén karangé tom énda balilaga ro. <sup>25</sup> Mélaw békén fatut sésinay de réfa i lowohe non rénigoy Tuluse bero inok sétabang ro. <sup>26</sup> Atin amuk kédaillétan i ségéréfae bé lowohe, kédaillétan ro so kéluhanan. Atin amuk médayéw i ségéréfae de, méroror ro kéluhanan.

<sup>27</sup> Mélaw betomey lowoh Kristowe, brab kéluhanan tom do réfa i lowoh ne. <sup>28</sup> I betome do munur maak sébaan saén i lowoh tome. Atin niray i Tuluse dob séngae ségétew betom i kaane galbék. Fénémili i Tulusey de étew gémalbék loo bé ni. I sunguwe de, rénigo noy dumoy de étew do apostol. I géruwowe de, rénigo noy de dumoy de muret bé kébéréh ne. I gétéléwe de, rénigo noy de dumoy de témo. I de dumoy de rénigo no bero gétigan rémigo bé de mécégaif. I de dumoy de rénigo no bero gétigan muwa bé de démeruun. I de dumoy de rénigo no bero témabang bé de dumoy ro. I de dumoy de rénigo no bero do fiyo odoron. Atin rénigo noy de dumoy de furung sébéréh bé séségiyo-giyowe késébéréh énda gétiga ro de. <sup>29</sup> Enda fakayén ké kéluhanan tom do apostol, taloo no do muret bé kébéréh i Tuluse, taloo no do témo, taloo no do rémigo bé de mécégaif. <sup>30</sup> Enda fakayén ké kéluhanan tom muwa bé de démeruun, taloo no gésébéréh bé de séségiyo-giyo késébéréh énda gétigano, taloo no émfégésobut bé de ni do késébéréh. <sup>31</sup> Mélaw fatut ongoté kom dob Tulusey de kéfurungan toow fo balilaga.

Endob wén na foy toow de balilaga sani kégédawe.

## 13

### I kégédawe

<sup>1</sup> Fyon fo ké gésébéréhu bé de séségiyo-giyo késébéréh i de étew brab de téaki, éndob amuk énda mégédawu, énda i laga i kéfurung guwe non ségiléwu saén bé selekéne agung taloo no loo bé selekéne banting. <sup>2</sup> Atin fyon fo ké furungu témo béréh i Tuluse, brab gésobuto kuy de ménalém kébéréh tidew dob Tuluse, brab fyon fo ké toowu fo gétigan, brab toow fo émbagér i kéunur guwe inok géféaguwo kuy de tuduk, éndob amuk énda mégédawu, énda foy lanték gu. <sup>3</sup> Atin fyon fo ké iray guy kéluhanay de languntama ku inok tabanga kuy de méskinan, brab iray guy lowoh guwe fétuwégu béréh de étew, éndob amuk énda mégédawu, énda i baras gédoté ku.

<sup>4</sup> I étewe mégédaw toow fo tingkélo noy de dumoy no. I étewe mégédaw rigoné noy fiyowe dob de dumoy no. I étewe mégédaw énda médaléwén béréh de dumoy no. I étewe mégédaw énda félangka-langkaén taloo no fébantug-bantug. <sup>5</sup> I étewe mégédaw énda lémidis-ligisén. I étewe mégédaw énda arumé no. I étewe mégédaw énda magadén mécérit. I étewe mégédaw magad fésagada noy de dumoy no. <sup>6</sup> I étewe mégédaw énda mérororé béréh tete. Yamula méroror béréh fiyowe brab métintuwe. <sup>7</sup> Atin i étewe mégédaw tingkélé noy kékerasaya nuwe ké tete i de rigonéy de dumoy no dob beene. Fédayaé no sa bero. I étewe mégédaw, énda mécédan i késarig ne taloo noy inam ne béréh fiyoy de rigonéy de dumoy no étew.

<sup>8</sup> I de kéfurung émbéréh béréh i Tuluse, mécédan moso. I de kéfurung sébéréh béréh de séségiyo-giyo késébéréh énda gétiga no, mécédan so moso. I kégétigane, mécédan so moso. Endob i kégédawe énda mécéda no. <sup>9</sup> Non kulang sénay kéfurung tome émbéréh béréh i Tuluse brab de kégétiga tom. <sup>10</sup> Endob amuk gumah i gaiwe iray i Tuluse betom i tintuwe fiyo, mécédan i de éntingayén do kulang.

<sup>11</sup> Bé kéénga guwe séna émbéréhu loo béréh ngae, brab i kéfégítung guwe, nga so. Endob amun ménwaléyun métuwa, ménkédanén i de adat gu loo béréh ngae. <sup>12</sup> Ségiléw so béréh betome. Béleewe ni, i kégétiga tome brab kégésobut tome béréh Tuluse, kloh saén. Ségiléw béréh anlunge téngténgé tom dob rébure féngalungan. Endob amuk gégumah moso i gaiwe gito tomén foy Jesu Kristowe, gésobuto tomén i kéluhanane, ségiléw béréh kégésobut i Tuluse de betom, békénén maak anlunge.

<sup>13</sup> Mélaw télew i éntingayéne énda mécéda no: kéunur, inam, brab kégédaw. Endob i toow de fo imfortante, been i kégédawe.

## 14

*I iray i Rémogor i Tuluse*

<sup>1</sup> Mélaw fatut tom toow fo méuyot bé kégédawe bé de dumo tom. Atin fatut so méuyot tom bé de dumo do kéfurungon tidéw dob Tuluse. Labi-labi na foy murete bé kékéréh i Tuluse. <sup>2</sup> I étewe sébéréh bé késébéréhe énda gétiga no, dob Tuluse saén sébéréh, békén dob étewe. Non énda gésobuto ro de. Béréhé no saén i de ménbunéy non fédéréh i Rémogor i Tuluse de. <sup>3</sup> Endob i étewe muret bé kékéréh i Tuluse, ureté no dob de étew inok tabanga no bero émféégét bé de kéunur ro brab féginauné no bero, brab émféfiyo bé de fédew ro. <sup>4</sup> I étewe sébéréh bé késébéréhe énda gétiga no, tabanga no saén i kaane lowoh. Endob i murete bé kékéréh i Tuluse, tabanga noy kéluhanay de munur mégélingo.

<sup>5</sup> Méuyotu de damén ké gésébéréh gom kéluhanan bé de késébéréh énda gétiga kom de, éndob toowu de na fo méuyot ké ureté kom i kékéréh i Tuluse. Toow na fo gérotor i étewe ureté noy kékéréh i Tuluse bé étewe sébéréh bé késébéréhe énda gétiga no, saliyu ké béréhé noy atag i bénréh ne inok géfifiyono noy fédew i de dumo no munur. <sup>6</sup> Mélaw do dumo gu, amuk gégumahu diyaan atin sébéréhu bé késébéréhe énda gétiga tom de, énda gétabanga ku begom. Toow na fiyo ké ureté ku begom i fénggitoy Tuluse begén, taloo no béréhé ku begom i de gétiga ku, taloo no ureté ku begom i kékéréh i Tuluse, taloo no toroé ku begom. Non amuk rigoné kuy de ni, tabanga ku begom.

<sup>7</sup> Ufama, fégitung gom i de baat. I faléndage taloo no fégérung, amuk i ségétéwe étew énda gétiga noy kéiyuf ne bé faléndage taloo no énda gétiga noy kékébit ne bé fégérungs, ati fanu-fanuy kégétigay de mégélingo de ké atiy linggengé nuwe. <sup>8</sup> Atin amuk wén i sundalo iyufé noy témburiwe inok mangéy sétiboh i de dumo no, éndob énda fékéntayé noy kéiyuf ne bé témburiwe, ati fanu-fanuy kégésobut ruwe de ké fatut ro magayas mangéy sétiboh. <sup>9</sup> Ségiléw so bé begome, amuk sébéréh gom bé késébéréhe énda gétiga kom de, énda mon i gésobut de. Mélaw énda i atagén brab énda i lagaén. <sup>10</sup> Médooy de séségiyo-giyo do késébéréh dob duniyae ni, éndob wén i atag i séngae késébéréh. <sup>11</sup> Endob amuk énda gésobuto kuy késébéréh i dumo guwe séuret-uret, énda fo gésésobutan gey. <sup>12</sup> Atin i begome, toow fo méuyot gom de ké gégédot gom bé de kéfurung tidéw dob Rémogor i Tuluse. Endob fatut télama gom usar i de kéfurung émfébagér bé kéunur i de dumo gom.

<sup>13</sup> Mélaw i étewe furung sébéréh bé késébéréhe énda gétiga no, fatut démasal dob Tuluse mongot kégétigan émfégésobut bé atag i késébéréh ne dob de dumo no. <sup>14</sup> Non amuk fédasaléy Rémogor i Tuluse begén dob késébéréhe énda gétiga ku de, moror i rémogor guwe fiyon fo ké énda gésobutoy itunga kuwe de ké atiy atag ne. <sup>15</sup> Ati mélaw i fiyowe rigoné ku? Fatut fédayaé kuy Rémogor i Tuluse émfédasal begén dob rémogor guwe. Endob usaré ku soy itunga kuwe ké démasalu. Fatut fédayaé kuy Rémogor i Tuluse émfékanta begén dob rémogor guwe, éndob fatutu so kémanta dob itunga kuwe. <sup>16</sup> Amuk i ségétéwe étew dayewé noy Tuluse bé rémogor ne saén, i de étew énda gétiga roy fantage bé ni kéfurung, énda fo gésobuto ro de. Mélaw énda géséfagayun ro maro, “Amen” non énda gésobuto ro de. <sup>17</sup> Fiyon fo ké fiyoy káfésalamat ne dob Tuluse, énda géfífagéro noy kéunur i de dumo no.

<sup>18</sup> Fésalamatu dob Tuluse, non toow na fo gésébéréhu bé késébéréhe énda gésobuto ku de bé begome kéluhanan. <sup>19</sup> Endob amuk sélimudu bé de dumo gu munur bé Kristowe inok mèngintulus, toow na fo méuyotu sébéréh bé késébéréhe gésobutoy kéluhanane fiyon sétaga saén bé médoowe kékéréh énda gésobuto ro de. Mélaw gétoroo kuy de étew.

<sup>20</sup> Do dumo gu, kagom miring bé káfégitung i de nga. Endob iring gom i káfégitung i de nga fantag bé tetee non énda gétiga roy tetee. Saliyu na bé nan, iring gom i káfégitung i étewe gétigan. <sup>21</sup> Wén i Ménslate Kékéréh i Tuluse mano, “Sugué ku mangéy dob de Judiyo de étew ségiyoy de késébéréh ro tidéw dob ségiyowe ingéd. Endob fiyon fo ké mérigo ni, énda so fégélingoé ro Begén, bang i Kadnane.” <sup>22</sup> Mélaw i kéfurunge sébéréh bé késébéréhe énda gétiga no, niray i Tuluse inok i de énda munur gélolo ro tidéw dob

Tuluse. Endob i kéfurunge muret bé kékérén i Tuluse, niray i Tuluse inok émfébagér i kéunur i de munur.

<sup>23</sup> Mélaw amuk sélimud gom do munur, atin sébérén gom bé késébérén énda gétiga kom de, atin gérumah i étewé énda munurén taloo no énda gétiga noy fantage bé ni kéfurung niray i Tuluse, manok bunég gom. <sup>24-25</sup> Endob amuk kéluhana kom muret bé kékérén i Tuluse, atin i étewé énda séna munurén bé Jesuse ménangéy témukaw begom, gésobuto noy késébérén gome. Mélaw waléy gétiga noy de salaén, atin gésénule. Mélaw lémingkuwéd méngadaf bé Tuluse brab émbérén mano, “Tulus i tintuwe mémandou begom.”

<sup>26</sup> Mélaw do dumo gu, amuk sélimud gom méngadaf, fiyo ké wén i kémanta, brab wén soy témo, brab wén soy muret bé atiy fénggitoy Tuluse de. Atin fatut wén soy émbérén dob séségiyo-giyowe késébérén énda gétiga no, brab fatut wén soy émfégésobut bé ni késébérén. Rigo gom i kéluhanay de ni émfébagér bé kéunur i de dumo gom. <sup>27</sup> Atin amuk wén i gétigan sébérén bé késébérén énda gétiga no, fatut ruwo loo ké télén saén i rémigowe de. Atin fatut sétélés-télés ro émbérén. Atin fatut wén soy émfégésobut bé kékérén ruwe. <sup>28</sup> Endob amuk énda i émfégésobut de, fatut mantés ro kéluhanan atin sébérén ro séden bé Tuluse dob de fédew ro. <sup>29</sup> Atin fakay émbérén i ruwowe taloo no télén gétew étew muret bé kékérén i Tuluse. Brab i kéluhanay étew fatut fégélingoé ro fo toow inok gétiga ro ké katabawan i kétoro ruwe taloo no békén. <sup>30</sup> Atin amuk wén i ségétew bé de ménsar mégélingo, wén i fénggitoy Tuluse de, fatut témérén i émbérén inok gérén i ni étew. <sup>31</sup> Fakay kéluhana kom muret bé kékérén i Tuluse, éndob sétélés-télés gom muret, inok métoro brab émféfiyoy fédew i kéluhanane. <sup>32</sup> I kéluhanay de étew niray Tuluse kégétigan muret bé kékérén ne, fatut séongot-ongot brab sétélés-télés ro muret. <sup>33</sup> Non mika i Tuluse ké mégukét i késélimud gome, yamula méuyot bé mélosoe.

Atin wén soy ni sugu gu begom, sani ségiléwe bé rigonéy de munur dob kéluhanay de ingéd. <sup>34</sup> I de libun fatut féantés ro ké gai sélimud ro méngadaf, non énda fatutén ké émbérén ro. Non dob kitab i de Judio, i libune fatut saén mégélingo brab séodor-odor saén. Enda fakay ro méguléw. <sup>35</sup> Atin amuk méuyot ro méganad, fatut ménginsa ro dob de bawag ro dob de lawi ro, non mékémala ké émbérén i de libun ké sélimud gom dob simbaane.

<sup>36</sup> Kagom fégitungén de ké tidew saén dob begomey kékérén i Tuluse, taloo no makom ké begom saén i nirayan de. Toow fo békén i nan. <sup>37</sup> Amuk wén i ségétew begom manok niray i Tulusey kékérén ne, look wén i kéfurunge tidew dob Rémogor i Tuluse, fatut magayun bé do sugu i Tulusey de ni kétoro sulaté ku dob begome. <sup>38</sup> Atin amuk wén i étew énda modorén bé ni sulat, kagom fégélingoén de.

<sup>39</sup> Mélaw do dumo gu, fatut méuyot gom muret bé kékérén i Tuluse. Endob kagom fétérénén i étewé émbérén dob késébérén énda gésobuto no de. <sup>40</sup> Endob fatut féfiyo gom i de adat gom brab fétanék gom ké sélimud gom méngintulus.

## 15

### Fantag bé kétébule Kristowe

<sup>1</sup> Atin béléewe, do dumo gu, fégétedém gu begom i Fiyowe Uret nuret gun begom bé do getah. Bé bénou tintu ménunur gom bé ni Fiyowe Uret fantag bé Jesu Kristowe taman so béléewe ni. <sup>2</sup> Non i Fiyowe Uret nuret gu dob begome, been i mémukase begom tidew dob de sala gom. Non énda kukuméy Tuluse begom amuk démayday gom munur. Non amuk énda fédayday gom, békén gom tintu munur.

<sup>3</sup> Atin i Fiyowe ni Uret, ténero gu begom i ténero begén. Toow fo gérotor i ni kétoro. I Kristowe ménléhu génantino no betom inok énda mékukum tom sabaf bé de sala tom. Been soy kéuret i Ménsulate Kékérén i Tuluse. <sup>4</sup> Atin lénébeng i Kristowe brab méntébule dob gétéléw ne gétérésang loo bé kéuret i Ménsulate Kékérén i Tuluse. <sup>5</sup> Tidew bénou, méntéfégito dob Pedrowe. Tidew bénou, méntéfégito dob kéluhanay de folo bra ruwo kuyugén. <sup>6</sup> Tidew bénou, méntéfégito dob labiwe limo ratuh do dumo tom munur amun

ménlimud ro. I kédoono ruwe méuyag ro séna béleewe ni, éndob i de dumo bero ménléhu ron. <sup>7</sup> Tidéw béno, méntefégito dob Santiagowe. Tidéw béno dob kéluhanay de apostol.

<sup>8</sup> Atin amun gilid méntefégito dob berowe, méntefégito so dob begéne énggékuray. Atin ménunuru maak ségétewu nga ménfégés i kéumah ne. Non fiyon fo ké mikau de munur, fén-unur i Tuluse so begén. <sup>9</sup> Atin begéne foy toowe gérifantad bé kéluhanay de apostol, non amun énda séna munuru de, toow fo fénrasay guy kéluhanay de munur bé Jesuse. Mélaw énda médaitu fédawétén apostol. <sup>10</sup> Endob sabaf saén bé kégédaw i Tuluse, fénwaléyén begén apostol. Atin non bé kégédaw ne, wén i fiyowe ménrigo. Non toow na mégéror i kagéne galbék bé de dumo do apostol. Endob békén begén i gémalbéke. Yamula tabangay Tuluse de begén. <sup>11</sup> Atin ulanden ké énggéklingoo kom i Fiyowe Uret tidéw dob begéne look tidéw dob de dumo gu apostol. Non ségiléw i de kétoro gey. Atin been i nan i nunuro kome.

### Fantag bé kétébule i de munur

<sup>12</sup> Atin ay niy ténero guwe begom: Méntebule i Jesu Kristowe. Mélaw sedek i de dumo begom émbérélh bé énda kun fakayén tébule i de ménléhu moso? <sup>13</sup> Non amuk énda fakay tébule i de ménléhu, fiyon i Kristowe énda séna méntebuleén. <sup>14</sup> Atin amuk énda méntebule i Kristowe, énda foy lanték i kétoro geye brab énda i funa tom munur. <sup>15</sup> Atin békén saén i ni, non amuk loo bé nan i begeye, do tugién gey sébanil bé Tuluse. Non begey i ménbérélh bé féntebule i Tulusey Kristowe. Mélaw tugién gey amuk énda tébule i de ménléhu, loo soy Kristowe. <sup>16</sup> Non amuk énda tébule i de ménléhu, énda so tébule i Kristowe. <sup>17</sup> Atin amuk énda méntebule i Kristowe, énda i lanték i kénéun gome. Mélaw énda séna mémédan i de sala gom brab mémukum gom. <sup>18</sup> Atin amuk énda i kétébule, i de ménléhu do munur bé Kristowe, énda man méuyag ro, yamula mémukum ro so. <sup>19</sup> Atin amuk i inam tome bé Kristowe taman saén dob kéléhu tome, toow tom fo mémégédaw-gédaw bé kéluhanay étewe.

<sup>20</sup> Endob i toowe, méntebule i Kristowe. Mélaw gétiga tom tébule soy kéluhanay de ménléhu. Non Beeney sunguwe saén méntebule. <sup>21</sup> I funay kéluhanay étewe méléhu non ménssala i sunguwe étew, sani Adame. Atin i funay kéluhanay étewe tébule, non bé rénigoy ségétewé sani Jesuse. <sup>22</sup> I kéluhanay kélawane méléhu non énggédot tom i kéléhue tidéw dob katufua tome Adam. Atin ségiléw so bé ni, i kéluhanay munure bé Kristowe tébule, non énggédot roy umule énda i tamana no tidéw dob Beene. <sup>23</sup> I sunguwe méntebule inok méuyag taman sa taman, Been i Jesu Kristowe. Tidéw béno, do betom kuyugén i gétunduge tébule dob gaiwe séfule moso. <sup>24</sup> Tidéw béno dob tamfaday de gai, i Kristowe tabana noy kéluhanay de mémélu do sébanil dob Tuluse. Binasané noy atura ruwe brab barakat ruwe. Atin irayén i kéféguléwe dob Tuluse Abayén. <sup>25</sup> Non i Kristowe kailanga noy mémélu taman tabanay Tulusey kéluhanay de sébanil de. <sup>26</sup> Atin i toowe fo géfuran tabana Jesuse sébanil dey kéléhue. <sup>27-28</sup> Non wén i Ménsulate Kébérélh i Tuluse mano, “I Tuluse rígoné noy Kristowe mémélu bé kéluhanane.” Mélaw féguléwe Kristowey kéluhanane saliyu saén bé Tuluse, non Been i ménféguléwe bé Kristowe. Atin amuk Kristoy mémélu bé kéluhanane, tidéw béno féguléwén bé Abay ne Tuluse i Beene. Mélaw Kristowey mémélu bé kéluhanane, brab Tulusey mémélu bé Kristowe brab kéluhanane so.

<sup>29</sup> Amuk énda i kétébule i de ménléhu, ati funay de étew fábautis gémani bé de ménléhu? <sup>30</sup> Atin amuk énda i kétébule, sedek fédidayday gey rémigo bé galbék i Tuluse béni ké kakaidan gey sénga tékélid? <sup>31</sup> Do dumo gu, i de sébanil bé Tuluse, sénga fuweh i kéléhue mémélu begén. Atin gétigay Tuluse toow i ni loo bé kétéow i kéléhue gome sabaf bé kénéun gome bé Kadna tome Jesu Kristo. <sup>32</sup> Toowu fo kérégénan dob ni ingéd, Efeso. Non i de sébanil begén maak do mérayar binatang méuyot ro begén mémélu. Mélaw amuk énda i kétébule, énda i funa ku gémalbék. Amuk énda i kétébule, modoru bé kébérélh mano, “Mama tom, brab miném tom brab mémélu tom béleewe ni, non démo méléhu tom.”

<sup>33</sup> Ingat gom inok énda munur gom bé éndae toow. Non amuk séloyuk gom bé de étew do tete i de adat ro, waléy gom de géiring. <sup>34</sup> Féfiyo gom i de adat gom, brab tagak gom i de tete rigoné kom. Fatut mémala gom non wén i do dumo gom énda gétiga roy toowe kétoro fantag bé Tuluse.

<sup>35</sup> Endob amuk wén i ménginsa mano, “Ati kéfingé-fingé i kékétébule i Tuluse bé de ménléhu? Brab ati falas i lowoh ruwe?” <sup>36</sup> Ay niy késumbul guwe de. Toow fo dufang i da nan kéfenginsa. Non i bénee lóbéngén dob fantade ké ohokén. Tidéw béno, méuyag. <sup>37</sup> Amuk mohok gom, énda ohoké kom i dakéle idéng kayéw, yamula ohoké kom i bénee saén. <sup>38</sup> Tulusey méniraye bé lowoh i bénee loo bé kétaya nuwe de. Atin i séngae klase béne wén i kaan mantu lowoh ké mérükén.

<sup>39</sup> I kéluhanay de lénimbag do mérénawa, séségiyo-giyoy de lowoh ro. I kélawané ségiyoy lowoh ne. I de binatang ségiyo soy de karo lowoh. I de kloh manok brab do sédo ségiyo soy de lowoh ro.

<sup>40</sup> Wén i do séségiyo-giyo do lowoh dob lawayo brab dob fantade. Atin i kéluhanay de lénimbag i Tuluse, falan fiyoy de falas ro. Endob énda ségiléw i kéfiyoy de lowoh dob lawayo brab de lowoh dob fantade. <sup>41</sup> Ufama, fiyoy falas i de solo dob lawayo éndob békén ségiléw. I téresange ségiyoy falas ne, i téresang kélungonone ségiyo soy kaane falas, i de gitoon ségiyo so. Fyon i de gitoon énda kéluhana ro ségiléw i de falas ro.

<sup>42</sup> Ségiléw so bé niy kétubule i de ménléhu. Non amuk ménlébéngén i ménléhue, mébinasay lowoh ne. Endob amuk méntébuleén, éndaén mébinasay lowoh ne non mantu nén brab méuyag taman sa taman. <sup>43</sup> Amuk ménlébéngén i bangkaye, teteén i falas ne brab éndaén i bagérén. Endob amuk méntébuleén, toowén fo fiyoy falas ne brab émbagérén. <sup>44</sup> I bangkaye lénébéng, tidéw dob fantade ni. Endob féwaléyéy Tuluse mantuy lowoh ne inok médait ro méuyag beroy Tuluse taman sa taman. Mélaw amuk wén i lowoh médait dob duniyae ni, wén soy lowoh médait dob lawayo. <sup>45</sup> Non wén i Ménsulate Kébéréh i Tuluse mano, “I sunguwe étew, sani Adame, nirayay Tuluse férénawa inok méuyag dob duniyae ni.” Endob i Kristowe, sani féndawéte “Géruwowe Adam”, Been i miraye bé umule magufusa inok méuyag tom taman sa taman dob lawayo. <sup>46</sup> Békén i umule dob lawayoy énggéeatahe, non énggéeatah i umule dob duniyae ni. <sup>47</sup> I Adame, sani sunguwe étew, ménlimbag bé fantad i duniyae ni. Endob i Kristowe, sani maake géruwo Adam, tidéw dob lawayo. <sup>48</sup> I kéluhanay kélawané, ségiléw i lowoh ruwe bé Adame tidéw dob fantade. Endob i kéluhanay waléye kuyug Kristowe, ségiléw moso i lowoh ruwe bé Kristowe dob lawayo. <sup>49</sup> Amuk kéluhana tom ségiléw bé Adame tidéw dob duniyae, gégumah so moso i gaiwe waléy tom so ségiléw falas bé Kristowe tidéw dob lawayo.

<sup>50</sup> Do dumo gu, ay niy atag i bérhékuwe begom. I de lowoh tom ni méléhu non énda géahurén dob lawayo. I loowe bé ni lowoh, énda gédoté noy umule magufusa.

<sup>51</sup> Féhélingo gom i ni ménbunéy fénggétigay Tuluse begén. Enda kéluhana tom méléhu, éndob méfégalin i de lowoh tom bé de mantu lowoh. <sup>52</sup> Toow fo magad i kéfégali nuwe, loo bé ségulee kémérék-mérék i motowe, ké émbéréh i toowe géfuray témburi. Atin modor so ké fébéréh i Tulusey ni témburi, i kéluhanay de méléhu tébule ro. Atin i de lowoh ro émfégalin inok éndaén méléhu ro, non mélumas tom kéluhanan. <sup>53</sup> Non i tafaye lowoh fatut mélumas inok éndaén méléhuén. Fatut émfégalin i mébinasawe lowoh inok éndaén mébinasa no. <sup>54</sup> Atin amuk ménfégalinonén i tafaye lowoh bé mantuwe lowoh éndaén méléhuén, bé béno métumanén i Ménsulate Kébéréh i Tuluse mano, “Endaén i méléhu non kénday Tuluse nén non téhaba nonén.” <sup>55</sup> Mélaw éndaén mégilak tom méléhu non éndaén i kéléhu. Atin éndaén i funan émbuku bé kéléhue non méntabananén. <sup>56</sup> I funa nuwe wén i kéléhu non ménasala tom. Atin i funa nuwe ménasala tom non énggéliso tom i kukumay Tuluse. <sup>57</sup> Endob fésalamat tom bé Tuluse non bé rénigo nuwe. Non éndaén mégilak tom bé kéléhue non fénukasén betom sabaf bé rénigoy Kadna tome Jesu Kristo.

<sup>58</sup> Mélaw, do dumo gu do kégédawa ku, fébagér gom i késarig gome bé Kadnane inok énda mékédano. Fégéror gom dob galbék i Kadnane. Non gétiga tom énda mésinggula i galbék tome, amuk rigoné tom kay Kadnane.

## 16

### *I tabange kay de munur dob Jerusalem*

<sup>1</sup> Atin wén i ségiyowe sugu gu begom. Fatut timu gom kurta fégétabang gom bé de dumo gom munur bé Jesuse dob Judea. Sénugu gu soy ni dob de munur dob ingéde Galasia. <sup>2</sup> Sénga Duminggu, fatut témafay i séngae ségétew begom bé atiy iray ne dob Tuluse. Fatut iray gom dob Tulusey baade gédoté kom. Itong gom inok amuk gégumahu diyaan, éndaén kailanga kom i térimue. <sup>3</sup> Atin amuk gégumahu diyaan, sugué kuy de étew fénémili gom mangéy dob Jerusalem inok uwité roy de iray gom. Atin émféuwitu so do sulat émfégétigan bé de étew dob Jerusalem fantag bé kétabang gome. <sup>4</sup> Atin amuk kailanga ku soy magéwe mangéy dob Jerusalem, féodoré ku bero.

### *I bantak Pablowe*

<sup>5</sup> Mangéy diyaan ké gilidu néen téménara dob ingéde Masedonia. Non métahu mangéy diyo. <sup>6</sup> Atin amuk gumahu dob begome, batiu na keey diyaan firoy gétérésang kélungonon look taman gilid i basa barate. Atin amuk tausu magéw, fiyo ké tabanga kom begén bé kéagéw guwe dob atiy ayo kuwe. <sup>7</sup> Non énda méuyotu mawét diyaan ké magadu de saén. Yamula méuyotu de damén ké batiu na diyaan bé firoye gétérésang kélungonon, amuk fakay dob Kadnane.

<sup>8</sup> Endob batiu na dob Efesowe ni taman gilid i kandulie féndawét Pentekostes. <sup>9</sup> Non dini médooy de méuyot mégélingo bé Fiyowe Uret toroé ku. Endob médooy soy sébanile de begén.

<sup>10</sup> Atin i Timoteowe, amuk gégumah diyaan, fégédaw gom de brab tayakuf gom. Non gémalbék so kay Kadnane, ségiléw bé begéne. <sup>11</sup> Atin énda fatutén ké siyawé kom. Yamula fégadata kom atin amuk taus i kéagéw ne séfule mangéy dob begéne, fatut tabanga kom. Non ongot-ongoté ku beroy de dumo no munur.

<sup>12</sup> Atin fantag man bé dumo tome Apolos, féngginau gu fo bé angéyé no begom tukawén diyaan beroy de dumo no munur. Endob mika séna mangéy diyaan béléewe. Yamula mangéy fo kun diyaan ségiyo gai.

<sup>13</sup> Fatut mingat gom, brab fédayday gom i kéunur gome bé Jesuse. Kagom mémala fantag bé kéunur gome. Yamula fébaraw gom brab fébagér gom. <sup>14</sup> Atin fiyon atiy rigoné kome, fégédaw gom.

<sup>15</sup> Gétiga kom i fantage bé Stefanase brab de dumo no ségélawi. Beroy de sungu ménunur bé Kristowe dob Akaya. Toow ro fo mégéror témabang bé de dumo ro munur.

<sup>16</sup> Mélaw, méuyotu ké fédaya gom i kékéfulew i de étew loo bé beene brab kéluhanay étewe mamung bé karowe galbék.

<sup>17</sup> Toow fo mororu bé kégumah ro Stefanase, brab Fortunatowe brab Akaikowe dini. Non tétabang ro begén bé kégundoy guwe begom. <sup>18</sup> Féniyo roy fédew guwe loo bé kékéfyo ruwe bé de kagom so fédew. Mélaw fatut fégadata kom i de étew loo bé nan.

<sup>19</sup> I de munur dob kéluhanay de ingéd dob Asia ségifaé ro begom kéluhanan. I ro Akilawe brab Prisilawe, toow ro fo ségifaén so begom sabaf bé Kadnane. Loo soy de munur sélimud dob lawi ruwe, ségifaé ro so begom. <sup>20</sup> Atin i kéluhanay de dumo tom munur dini, ségifaé ro so begom.

Fatut fégito gom i kégédaw gome amuk ségifaén gom.

<sup>21</sup> Taman saén dob niy béréhé kuwe begom. I begéne, Pablo, sulaté kuy ni géfuray kékéfyo bé kagéne kémér. Ségifaé ku so begom.

<sup>22</sup> Amuk wén i do énda émféimu bé Kadnane, kukuméy Tuluse damén bero. Séfuleén damén i Kadnane. (Maranata.)

<sup>23</sup> Atin fétauséy Kadnane Jesus damén i kégédaw ne begom.

<sup>24</sup> Toowu fo méimu begom sabaf bé kéunur tome bé Jesu Kristowe.

1 Korinto 16:24

240

*Pablo*

1 Korinto 16:24

## I Géruwowe Sulat Pablowe dob de Munur bé Kristowe dob Korinto

Ay niy sébaane bé de sénulat Pablo, sani ménbantuge muret fantag bé Jesu Kristowe. I ni sulat, been i niy géruwowe sulat sénulat Pablowe dob de munur do bati dob ingéde Korinto. Dob sunguwe sulat Pablowe, téneroén i de étew bé ati fatute rigoné ro. Atin dob ni géruwo sulatén, bénréh Pablowej kéror ne sabaf bé kéodor ruwe bé ni kétoro.

Diyo dob Korinto, wén i do étew ménbérédéh bé békén kun tintu apostol i Pablowe. Mélaw dob ni so sulat, bénréh Pablowej funa nuwe toow fo tintu apostol, non toow fo mégoror lémégéb bé Fiyowe Uret fantag bé Jesu Kristowe. Mégoror gémalbék, fiyon fo ké toow fo mérásay sabaf bé kéuret ne ni.

<sup>1</sup> Begénye Pablowe, ségétew apostol sénugu Jesu Kristowe non been i galbéke kétayay Tuluse rigoné ku. I begeye Timoteowe, ségétew so dumo gu munur bé Jesuse, sulata key begom do munur dob ingéde Korinto brab dob kéluhanay de ingéd dob Akaya.

<sup>2</sup> I Tuluse Abay tom brab Kadnane Jesu Kristo mégédaw damén begom brab iray ro damén begom i métanéke fédew.

### Fésalamat dob Tuluse

<sup>3</sup> Fatut tom fésalamat bé Tuluse sani Abay i Kadna tome Jesu Kristo. Toow fo mégédaw i Abaye Tulus, atin Been i tidéwoy kéluhanay tabange. <sup>4</sup> Tabanga no betom dob kéluhanay de kérégéno tom inok gétabanga tom soy de dumo tom amuk kérégénan ro fiyon ati klasi nuwe. Iraya tom so bero tabang loo bé tabange niray i Tuluse betom. <sup>5</sup> Non amuk toow fo mérásay tom loo bé Kristowe sabaf bé kéunur tome de, gédoté tom soy tintuwe kétabang tidéw dob beene. <sup>6</sup> I funa keye téférasay inok gédoté kom i tabange brab inok méfukas gom bé de sala gom. Atin amuk métabangan gey, métabangan gom so brab gédoté kom i bagére inok géfédayday gom témingkél bé de kérégénon ségiléw bé begeye. <sup>7</sup> Atin i késarig geye begom, méégét non gétiga key amuk mérásay gom ségiléw bé begeye sabaf bé kéunur gome bé Kristowe, tabangay Tuluse so begom ségiléw bé kétabang ne begey.

<sup>8</sup> Do dumo gey, méuyot gey de ké gétiga kom i fantage bé kérasay geye dob ingéde Asia. I de étew diyo, toow fo fénrasay ro begey, atin mélaw makey ké éndaén méuyag gey. <sup>9</sup> Makey ké méléhu geyén bé béno. Endob ménrigoy ni inok énda sémarig gey bé kageye lowoh, yamula fatut sarigo key saén i Tuluse sani témébulee bé de ménléhu. <sup>10</sup> Ténabangén begey dob de makakaid inok énda méléhu gey sabaf bé de makakaid. Atin gétiga key tabangé no begey sénga tékélid. Sémarig gey bé énda téréno noy kétabang ne begey. <sup>11</sup> Atin fatut tabanga kom begey bé de kédasal gom, inok médooy étewe fésalamat dob Tuluse non bé tabangay nirayén begey sabaf bé kédasal i de médooy étew.

<sup>12</sup> Do dumo gey, wén i funa key fédayéw-dayéw, brab gétiga key toow fo toow i ni. Fiyoy de rénigo gey dob begome brab dob kéluhanay de étew, non modor gey bé kétayay Tuluse. Atin tabangay Tuluse begey inok béréhé key i fiyowe brab toowe, békén dob kageye kégétigan éndob sabaf saén bé kégédaw i Tuluse. <sup>13-14</sup> Sulata key begom bé gébasana kome brab gésobuto kom. Méuyotu de damén ké gésobuto komén fo toow i de énda séna énggésobuto kom toow béleewe ni inok bé gaiwe séfule i Kadnane Jesus, moror gom sabaf bé begeye atin i begeye moror gey so sabaf bé begome.

<sup>15-16</sup> Atin non gétiga ku fo toow gésobuto kom i ni, bénantak guy mangéye sémugud dob begome sungu bé do gétah bé kéangéy guwe dob ingéde Masedonia. Atin bénantak gu soy mawéte man ké séfuleu inok gétabanga ku begom ruwo gule, brab gétabanga kom so begén bé kéagéw guwe mangéy Judea. <sup>17</sup> Endob énda énggérígono kuy ni. Mélaw makom keeyén bé méfégalin i itunga kuwe sénga tékélid. Brab makom keeyén bé ségiléw i kéfégitung guwe bé de étew dob duniiae ni énda sarigon ro non magad fo fégaliné roy de itunga ro. Békén loo bé nan. <sup>18</sup> Béréhé ku begom i toowe, ségiléw bé kétoow i Tuluse, tintu fo bénantak guy rigoné kuy fénasad guwe begom. <sup>19</sup> Non témélamawu miring bé

Jesu Kristowe Nga i Tuluse, sani ureté keye begom ro Silase brab Timoteowe. Non i Jesuse énda magad fégaliné noy itunga nuwe. Yamula tumané noy kéluhanay de béréhé no. <sup>20</sup> Non i Jesusey téménumane bé kéluhanay fénasad i Tuluse. Been i niy funa tome émbéréh “Amen” (i atag ne “toow”) fantag bé kékéréh i Tuluse inok médayéw i Tuluse. <sup>21</sup> I Tuluse, Beeney émféégéte bé kéunur tome bé Kristowe inok tintu tom do dumo no. Atin Tulus soy ménémilie betom. <sup>22</sup> Brab téndanda no begey inok gélolon Beeney gefee begey. Atin nirayén betom i Rémogor ne batidob de fédew tom inok fégétiga no betom i irayén i kéluhanay fénasad ne.

<sup>23</sup> Amuk énda toow i béréhé kuwe begom, kukuméy Tuluse damén begén. Gétiga roy funa kuwe énda ménangéy diyaan dob Korinto inok énda gédowoyo ku begom. <sup>24</sup> Enda méuyot gey sémuji begom ké ati fatute unuro kom. Non gétiga key méégétén i kéunur gome bé Kristowe. Yamula sétabang tom gémalbék inok toow gom na fo moror.

## 2

<sup>1</sup> Atin do dumo gu, toow fo fénggitung gu bé énda mangéy diyaan amuk féteteé ku saén i de fédew gom ségiléw bé gétaho. <sup>2</sup> Non amuk féteteé kuy de fédew gom, ati émféfiyowe bé kagéne fédew? Enda, non énda géfífiyono kom i fédew guwe amuk féntete guy de fédew gom. <sup>3</sup> Beeniy funa kuwe sémujiat dob begome bé do gétah. Ménikau mangéy dob begome, non i begome fatut damén féororé kom begén. Endob amuk ménangéy diyaan bé beno, féntete gom saén i fédew guwe. Gétiga ku fo toow, amuk mororu, moror gom so. <sup>4</sup> Amun sénulata ku begom, toow fo tete i fédew guwe brab émbukuu brab énggékérewu. I funa kuwe sémujiat békén ké féteteé kuy de fédew gom. Yamula inok fégétiga ku begom i toowe kéimu gu begom kéluhanan.

### Kéfésagad bé ségétéwe ménsala

<sup>5</sup> I étewa nan ménsala diyaan, énda fénteteén i fédew guwe, yamula fénteteén i de fédew gom, taloo no de fédew i de dumo saén begom. Non énda méuyotu de ké fékélébuwanén i kédusawe de bé ni kékéréh gu. <sup>6</sup> Katabuwanén i kékukum i kédoono kome de. <sup>7</sup> Atin béléewe ni, fatut fésagad gomén brab féfiyo gom i fédew ne, non amuk énda, mékédan keeyén i késarig ne bé Tuluse sabaf bé kélébuwan i kétete i fédew ne. <sup>8</sup> Mélaw, ongoté ku begom bé fégétiga kom dey toow i kéimu gome de. <sup>9</sup> I funa kuwe sémujiat dob begome bé gétaho inok téngkadé ku begom brab inok gétiga ku ké modor gom bé kéluhanay de sugué ku begom. <sup>10</sup> Atin amuk fésagadé kom i ségétéwe étew, fésagadé ku so. Atin amuk wén i ménsala, fésagada ku inok moror gom. Gétiga Kristowe tintu fo fésagadé ku. <sup>11</sup> Atin i funa kuwe rémigo bé ni, inok énda lifulé Satanase betom. Non gétiga tomén i tetee bantakén.

<sup>12</sup> Amun énggumahu dob ingéde Troas inok muretu bé Fiyowe Uret fantag bé Kristowe, énggito gu ténavay i Kadhaney agéwo kuwe bé galbék guwe diyo. <sup>13</sup> Gido loo, toow fo ménbukuu non énda énggito gu diyo i dumo tome munur Tito. Mélaw ménggétawu dob de étew diyo, atin méntausu magéy dob ingéde Masedonia.

<sup>14</sup> Endob toowu fo fésalamat bé Tuluse. Non sabaf bé kéunur tome bé Kristowe, féténgténgén betom dob kéluhanay de étew inok fégétiga noy barakat ne. Mélaw sabaf bé betome, wén i de étew dob kéluhanay de gonon gétiga roy fantage bé Kristowe.

<sup>15</sup> Maak do dukah tom ténuwégi Kristowe brab ténuakén dob adafay Tuluse. Atin i amut ne mélégéb dob de étew do ménfukas brab dob de étew so énda ménfukas ro. <sup>16</sup> Dob de étew énda munur bé Kristowe, maak ahu ménléhu i kétoro tome fantag bé Fiyowe Uret, non mékukum ro sabaf bé nan kétoro. Endob dob de étew munur dob Kristowe, maak mamut i kétoro tome non fégétiga no bero bé iray i Tuluse beroy umule magufusa. Toow fo Fiyoy Urete ni. Mélaw énda i étew tintu médait lémégéb de. <sup>17</sup> Endob i begeye, énda ségiléw gey bé de ségiyo do témo. Non i berowe, ureté roy kékéréh i Tuluse inok gédoté roy kurtae. Endob sabaf Tulus i sémujiat begey, gétiga no ureté key i toowe, non begey i do sugu-sugué Kristowe.

*I mantuwe aguwon*

<sup>1</sup> Ati kéfégitung gome de, aw félangka-langka geyén man fantag bé de ni? Enda. Enda ségiléw gey bé de ségiyo témore kailanga ro nay sulate tidéw dob de ségiyo étew émfégito bé kuwagib ruwe témore inok tayakufé kom bero. Atin kailanga ro soy sulate tidéw dob begome amuk mangéy ro témore dob de ségiyo. <sup>2</sup> Endob i begeye, énda kailanga key i de sulat loo bé nan. Non i kéunur gomey maake sulat ménusat dob de fédéw gey inok gétigay kéluhanay de étew i fantage bé de kétoro gey. <sup>3</sup> Atin gétiga roy begom i de maak do sulat tidéw dob Kristowe, fénksamfayén dob begeye. Atin i fénggésulate de békén tinta, yamula Rémogor i méuyage Tulus i fénggésulate de. Atin i sulatane de békén do batéw loo bé kitabe niray Moisese, yamula i de fédéw gey i sulatane de.

<sup>4</sup> I funa keye gébéréh loo bé ni non sémarig gey bé Tuluse, sabaf bé Kristowe. <sup>5</sup> Enda gébérého key de ké kagey kégétigan i funa keye gérigo bé ni galbék. Non Tuluse saén i funa keye de gérigo. <sup>6</sup> Tulus i ménirayane begey kégétigan inok gétoroo key i mantuwe agéwon. Atin i mantuwe ni agéwon, békén nirayén begey i kitabe, yamula nirayén begey i Rémogor i Tuluse. Non amuk sémarig tom bé kéodoro tome bé kitabe niray Moisese, méléhu tom. Endob amuk sémarig tom bé Rémogor i Tuluse, irayén i mantuwe umul magufusa dob betome.

<sup>7</sup> Bé do gétah, amun sénulat i Tulusey kitabe dob de batéw, fénggito noy barakat ne. Amun énggito Moisesey kéréndaw i Tuluse, réménéndaw soy kaane falas, funay de Judio énda géténgténg de, fiyon fo ké ménlumén i kéréndaw ne. Mélaw amuk loo bé nan i barakat i kégumah i kitabe muwit kéléhu, <sup>8</sup> toow na fo fiyoy rigonéy Rémogor i Tuluse. <sup>9</sup> Amuk barakatan i galbéke kémukum bé de étew, labi na fo dakél i barakat i galbéke émfétintu bé de étew. <sup>10</sup> Mélaw i kitabe toow fo barakatan bé gétaho, éndob éndaén i barakatén béléewe ni. Non béléewe ni, wén na foy toow barakatan tidéw bé beene. <sup>11</sup> Non amuk barakatan i kitabe wén i tamana no, labi na fo barakatan i mantuwe agéwon énda i tamana no.

<sup>12</sup> Atin sabaf bé ni késarig tom bé énda mémédan i ni, toow tom fo émbaraw muret. <sup>13</sup> Enda ségiléw tom bé Moisese ténlébén i falas ne inok énda gitoy de Judioy kélum i kéréndaw ne taman mémédan. <sup>14</sup> Endob toow fo métégas i de uléw i de Judio. Mélaw taman so béléewe ni mémélab so tafay i de kégésobut ro. Mémélab i de kégésobut ro amuk gébasana roy kitabe sani tafaye agéwon. Endob amuk wén i ségétew bero waléy dumo Kristowe sabaf bé kéunur ne de, mémédan i kétéléb i itunga nuwe brab toow fo gésobuto no. <sup>15</sup> Taman so béléewe ni amuk basané roy kitabe tidéw dob Moisese, mémélab i de itunga ro. <sup>16</sup> Endob amuk munur ro bé Kadnane, mémédan i kétéléb i de itunga ro. <sup>17</sup> I Kadnane ni ménlabit, Been i Rémogor i Tuluse. Atin i étewé bat i Rémogor i Tuluse dob beene, ménfukas dob kitabe, non éndaén kailanga no modor de inok méfukas bé de salaén. <sup>18</sup> Mélaw i kéluhana tome do munur bé Kristowe, giton i anlung i kéréndaw i Kadnane dob falas tome, non énda métélab i de kéfégitung tom. Non giton i mantuwe adat tom miring bé Kristowe. Non i Rémogor i Tulusey mégaline betom loo bé kéfiyoy Kadnane. Mélaw minut fijo miring bé Kadna tome Jesu Kristo.

<sup>1</sup> I Tuluse mégédaw begey, atin mélaw fénémilién begey inok rigoné tom i ni galbék. Mélaw énda mémédan i kéror geye bé galbék geye. <sup>2</sup> Dénigur gey i de tete brab de ménbunéy do rigonén toow fo do mémála. Enda témuji gey brab énda fégaliné key i kékéréh i Tuluse. Yamula bérhé key i tintuve fo toow inok i kéluhanay étewé gétiga ro do métintu gey, brab inok gétigay Tuluse so. <sup>3</sup> Non amuk ménbunéy i Fiyowe Uret ureté key, ménbunéy saén dob de étew énda méfukas ro dob de sala ro. <sup>4</sup> Enda munur ro non ténléb Satanasey kéfégitung ruwe. Been i féngadaféy de étew dob duniiae ni. Télisénoy de kéfégitung ro inok énda gito roy kégéfékaya i Fiyowe Uret fantag bé kégérotor Kristowe, sani tintuve anlung i Tuluse. <sup>5</sup> Non énda muret gey inok waléy gey émbantug.

Yamula ureté key i Jesu Kristowe, Been i Kadnane, inok Been i waléye émbantug. Atin ureté key bé begeyey témabangane begom inok médayéw i Jesuse. <sup>6</sup> Amun lénimbag i Tulusey kéluhanay éntingayéne, ménbérél mano, “Mékédan damén i délémore brab waléy wén damén i géfékaya.” Been soy émfégékayaé bé de itunga tom inok gésobuto tom i kéfiyoy Tuluse fénténgtén dob Jesu Kristowe.

<sup>7</sup> Endob i de betom, maak do binangga tom saén nahuron drantung inok giton i barakate dob de lowoh tom békén katom, yamula kay Tuluse. <sup>8</sup> Démoyun gey mérasay éndob énda méntabanan gey. Wén i do no, énda gésobuto key de, éndob énda mémédan i kéunur geye de. <sup>9</sup> Médooy de sébanil begey, éndob énda tagakéy Tuluse begey. Wén i no fédawéto ro begey, éndob énda tagakéy Tuluse begey. Wén i no fédawéto ro begey, éndob énda mébinasa gey. <sup>10</sup> Ségiléw gey bé Jesuse non sénga tékélid médooy de mérarék begey, brab méuyot ro méméléhu begey. Mélaw giton i kéuyag Jesuse béléewe ni non Been i témabangane begey. <sup>11</sup> Amuk méuyag gey séna, démoyun gey gédét damén méléhu sabaf bé kéuret geye fantag bé Jesuse. Mérigoy ni inok giton i Jesuse méuyag non tabanga no begey démoyun. <sup>12</sup> I funa keye démoyun kakaidan non bé kéuret geye fantag bé Jesuse. Endob ulandenén, non been i niy funa kome gégédot bé umule magufusa.

<sup>13</sup> Wén i Ménsulate Kébérél i Tuluse mano, “Ménunuru de, mélaw bérhéku.” Ségiléw so bé begeye, non munur gey de, mélaw bérhékey. <sup>14</sup> Non gétiga key i Tuluse sani téménébulee bé Kadnane Jesus, tébuleé no so begey brab begome brab féangéyé no betom dob adafa nuwe dob lawayo. <sup>15</sup> Atin i funa keye téférasy inok gédoté kom i de kéfiyonon. Atin bé lala ne minut médooy gégédote bé kégédaw i Tuluse, waléy so médooy de fésalamat dob Tuluse inok toow fo médayéw.

<sup>16</sup> Been i niy funa keye énda mémédan i kéoror geye gémalbék. Non fiyon fo ké démoyun gey waléy lukés brab minut mélubay i lowoh geye, fébagéréy Tulusey kéunur geye sénga fuweh. <sup>17</sup> Atin i de kérasay gey béléewe do kloh saén brab mémédan so moso. Atin sabaf bé de kéfédayday gey bé de ni kérégénon, toow na fo médayéw gey dob lawayo diyo moso, brab énda témérén Mélaw toow na fo dakél i ni moso bé de kérégénon béléewe. <sup>18</sup> Non i de gulaané key békén i de éntingayén giton dob duniyae ni. Yamula toow gey fo méuyot bé de éntingayén do énda gito no. Non i de éntingayén giton dob duniyae ni, do méalfa ro moso. Endob i de énda séna giton, sani de éntingayén iray i Tuluse, énda mémédan ro.

## 5

<sup>1</sup> Non gétiga key i ni. I de lowoh tom dob duniyae ni maak do lawi saén bation bé firoye gébélantuwa taman mémédanén, san ké méléhu tomén. Endob i Tuluse rénigo no soy de lawi tom dob lawayo. Been i de mantu do lowoh tom méuyag taman sa taman. <sup>2</sup> Atin non bé de kérégénon béléewe, toow fo méuyot tom de ké gédoté tomén magayas i de mantu lowoh tom dob lawayo. <sup>3</sup> Amuk gédoté tomén i mantuwe lowoh tom, éndaén mémédano. <sup>4</sup> Endob amuk bati tom séna dob de lowoh tom dob duniyae ni, gédogés tom bé de kérégénon. Gido loo, énda fo méuyot tom témagak bé tafaye lowoh tom. Yamula méuyot tom saén kémégal bé mantuwe lowoh inok i tafaye lowoh méumbayan bé mantuwe de éndaén méléhuén. <sup>5</sup> Tulus i téménafaye bé de ni inok mérigo dob betome moso. Brab nirayén betom i Rémogor ne maak tising tandaén bé kétuma nuwe bé kéluhanay de ni moso.

<sup>6</sup> Mélaw toow fo méégét i kéunur tome sénga tékélid. Gétiga tom amuk bati tom séna dob de tafay lowoh tom dob duniyae ni, énda gébati tom sétifon bé Kadnane diyo dob lawayo. <sup>7</sup> Non dob de rigoné tom béléewe ni, énda furay tom bé atiy gito tome, yamula furay tom bé atiy unuro tome. <sup>8</sup> Tintu fo émbagér i kéunur tome brab méuyot tom témagak bé de tafay lowoh tom inok mule tom bati sétifon bé Kadnane. <sup>9</sup> Gido loo, i toowe fo kétaya tom rigoné tom i késuwata nuwe fiyon udenén gono tom, dini taloo no diyo dob lawayo. <sup>10</sup> Non i kéluhana tome kailangan fo mémukum dob adafa Kristowe. Atin i séngae ségétew étew gédoté noy ati fatute barasén look kékukume de sabaf bé de rénigo no, fiyo loo soy teteet dob duniyae ni.

### *Do dumoy Tuluse*

<sup>11</sup> Atin non gétiga key i kégilake bé kékukum i Kadnane, télamané key féunurén i de étew. Gétigay Tulusey dé fédew gey brab méuyot gey de so ké gétiga kom soy de fédew gey. <sup>12</sup> I funa kuwe sémulat bé de ni kékérél gu, békén inok dayewé kom begey. Yamula inok gétiga kom i fiyowé rigoné key brab inok gétiga kom i sémumbulone bé de étew dayewé ro saén i falas i étewe, békén i adat ne. <sup>13</sup> Wén keey i do étew mégitung marok do bunég gey. Endob i funa ruwe marok bunég gey non toow fo rigoné key témantuy kétayay Tuluse. Endob gétiga kom énda bunég gey, non gétiga kom gémalbék gey inok tabanga key begom. <sup>14</sup> Toow fo mégédaw i Kristowe begey funa key mégéror gémalbék. Gétiga key ménléhu i ni ségétew étew inok méuyag i kéluhanay de étew. Mélaw maak ménléhu i kéluhanane sabaf bé kégantino Kristowe bero. <sup>15</sup> Ménléhu gémenantinon bé kéluhanay étewe inok i de méuyag, éndaén rigoné roy kétaya ruwe. Yamula rigoné roy kétaya Kristowe, sani ménléhue brab méntébulee inok éndaén mékukum ro.

<sup>16</sup> Mélaw i kífégitung geye békén loo bé kífégitung i de étew énda munur ro bé Kristowe. Endob bé do gétah, i kífégitung geye loo saén bé kílawane, funa key makey ké kílawan saén i Kristowe. <sup>17</sup> I étewe waléy dumo Kristowe sabaf bé kénur ne de, ménwaléy mantu étew. I tafaye adatén métagakén atin ménwaléyé mantuy adat ne. <sup>18</sup> Tulus i réménigowé bé de ni, non sabaf bé Kristowe, fénwaléyé betom éndaén sébanil dob Beene. Non séloyukén begey. Atin fégalbék no begey inok féunuré key i de étew inok waléy so séloyuk i Tuluse bero. <sup>19</sup> Mélaw ay niy kéuret geye: I Tuluse nusarén i Kristowe mémukas bé de kílawan inok waléy tom séloyuk bé Tuluse atin fénsgadén i de sala tom. Atin sénarigo no begey muret fantag bé kíféwaléy ne betom séloyuk dob Beene.

<sup>20</sup> Mélaw begey i de sarigo Kristo muret bé kóngot i Tuluse. Féongoté no begey bé fagayun gomén bé kétaya nuwe. Non kétayay Tuluse féwaléyé no begom do dumo no séloyuk. <sup>21</sup> Enda i sala Kristowe. Endob sabaf bé kéluhanay de sala tom, kénukum i Tulusey Kristowe, inok waléy tom métintu loo bé Tuluse non bé kewaléy tome do dumo Kristowe sabaf bé kénur tome de.

## 6

<sup>1</sup> Non begey i do témabang bé galbék i Tuluse, ongoté key begom do téménanggaf bé kégédaw i Tuluse, usar gom i kégédaw ne fégérigo bé fiyowé. Kagom mika de. <sup>2</sup> Non wén i Ménsulate Kékérél i Tuluse mano, “Dob fatute gai, fénggelingo guy de kédasalém, atin tétabang gu beem dob fatute gaiy kékufas guwe bé kílawane.” Féngelingo gom: Béleewe niy gaiwe fatut tayakufé kom i kégédaw i Tuluse. Béleewe niy gaiwe fatut fédaya gom i Tuluse mémukas begom bé de sala gom.

<sup>3</sup> Toow fo ingata key i de rigoné key inok énda i géfíka gey munur brab inok énda i géadowy bé galbék geye lémégéb bé Fiyowé Uret. <sup>4</sup> Yamula, dob kéluhanay de rigoné key, fégito gey begey i de sugu-suguéy Tuluse. Non fiyon fo ké kérégénan gey brab kérasayan gey, témingkél gey. <sup>5</sup> Atin ménlubag gey, ménférisu gey, ménggésug-sug gey bé de mérimbur étew. Atin wén i no talawan geyén gémalbék, atin mélaw énda géama gey, brab énda géfidong gey. <sup>6</sup> Atin énda i rénigo gey mékérésik adat, brab gésobuto key i kékérél i Tuluse, brab téméningkél gey, brab tétabanga key i de étew. Atin Rémogor i Tulusey mémantuone begey brab toow gey fo méngédaw. <sup>7</sup> Atin nuret gey i towe kétoro, brab i barakatane Tulus tabanga no begey. Mélaw bé kéluhanay de ni fénggito gey, begey i de sugu-suguéy Tuluse. Atin i métintuwe brab fiyowey maake kélung gey brab dilék gey. <sup>8</sup> Wén i do masanan begey, éndob wén soy do émfémala begey. Wén i do démayéw begey, éndob wén soy do méngiras begey. Wén i do ménbérél do tugién gey kun, éndob toow i de bérélhé key. <sup>9</sup> Wén i de étew émbérél énda kun gélolo ro begey, éndob toow fo gélolon gey. Gédét geyén méléhu sénga téklid, éndob méuyag gey so. Ménkukum gey éndob énda méléhu gey. <sup>10</sup> Fiyon fok wén i do émfétete bé de fédew gey, éndob démoyun moror gey. Maak toow geyén fo méskinan, éndob sabaf bé begeye,

médooy de étew ménwaléy ro maak kawasa taman sa taman. Maak énda i do kagey bé de éntingayén, éndob wén i kagey bé de kéluhanay de iray i Tuluse.

<sup>11</sup> Do dumō gey dob Korinto, bénréh geyén begom i kéluhanay dob de fédéw gey, brab énda i ménbunéy de. <sup>12</sup> Enda kulang i kéimu geye begom, éndob kulang i kagome kéimu begey. <sup>13</sup> Bérhéh ku begom do maak nga gu, féimuén gey loo bé kéimu geye begom.

#### *Kagom mawag bé de énda munur*

<sup>14</sup> Kagom sébawag bé de étew énda munur ro bé Kristowe. Non énda ségiléw i fiyowe brab tete, mélaw énda fakay ro waléy sébaan. Enda fakay sétifon i géfekaya brab délémons. <sup>15</sup> I Kristowe brab Satanase énda géséfagayun ro. Atin énda waléy sétiman fédéw i étewe munur bé Kristowe bé étewe énda munurén bé Kristowe. <sup>16</sup> I lawi i Tuluse, sani gonone méngadaf, énda fakayén ké diyo so féngadafén i de kéninontow. Atin i betome maak lawi batioy méuyage Tulus. Non bénréh i Tuluse mano, “Batiu dob de kagén étew brab modoru bero. Atin begén i féngadafé ruwe, brab beroy de étew gu.” <sup>17</sup> Atin bénréh i Kadnane so mano, “Tagak gom i de étew féngadafé roy de kéninontow brab sésuway gom bero. Férayu gom dob de mékérésik adat ro, atin tanggafé ku begom. <sup>18</sup> Waléyu Boh gom, atin waléy gom do nga gu do lagéy brab do libun. Been i niy bénréh i toowe fo barakatan Kadnan.”

## 7

<sup>1</sup> Do dumō gu, been i niy de fénasad i Tuluse betom rigoné no. Mélaw tagaké tom i kéluhanay de tete, dob lowoh tome taloo no dob fédéw tome. Atin linisé tom i de lowoh tom brab télamané tom rigonén i de malinis dob adafay Tuluse inok toow fo métintu tom. Rigoné tom i ni non fégadata tom i Tuluse.

#### *I kéoror Pablwe*

<sup>2</sup> Fatut toow gom féimu begey. Enda i rénigo gey tete dob ségétéwe étew, taloo no fénsala gey, loo ké lénañis gey. <sup>3</sup> Enda bérhéh kuy de ni ké dowoyé ku begom. Non loo bé bénréh guwe bé do gétah, toow fo gulaané ku begom. Amuk méuyag gey look méléhu gey, mégédaw gey so begom. <sup>4</sup> Toow fo sémarig gey begom brab géfélangka-langka gey sabaf bé begome. Mélaw fiyon fo ké kérasayan gey, fiyoy de fédéw gey, brab toow gey fo moror sabaf bé begome.

<sup>5</sup> Atin amun énggumah gey dini dob Masedonia, énda fo énggétérén gey. Non toow fo ménkérégénan gey. Ménseédél begey i de sébanil begey. Atin ménbuku gey fantag bé de mantu munur bé Kristowe. <sup>6</sup> Endob i Tuluse toow fo gétiga noy émféfiyowe bé de fédéw i de étew tete i de fédéw ro. Mélaw fénororén i de fédéw gey bé kégumah Titoe. <sup>7</sup> Atin békén saén i kégumah ney funa keye ménoror, non loo soy bénréh ne fantag bé kékéfiyo gome bé fédéw ne. Atin nureténe begey i kéuyot gome géségito begén. Brab toow gom fo kun énggésénule atin fénagayas gom bénréh dob de étew témo begén i kéamfilo kome begén. Mélaw toowu na fo moror.

<sup>8</sup> Non fiyon fo ké méntete i de fédéw gom bé sulat guwe, énda énggésénule de ménféuwit dob begome. Endob bé do gétah, énggésénule de brab ménuyotu de damén ké éndaén fénuit gu de dob begome amun énggétiga ku ménwaléy tete i de fédéw gom.

<sup>9</sup> Endob béléewe ni toow fo mororu, éndob békén sabaf bé kétete i de fédéw gom. Yamula mororu béléewe ni non énggésénule gom. Non ténagak gom i de tete rigoné kom sabaf bé kétete i de fédéw gom. Fénsénule i Tuluse begom brab nusarén i kétete i de fédéw gom. Mélaw fiyoy rénigo geye dob begome bé nan sulat. <sup>10</sup> Non amuk féteteéy Tulusey fédéwe, muwit kégésénule brab kédigur bé de sala. Brab beeniy muwite bé kékukume. Mélaw toow fo fiyoy nan kétete fédéw. Endob i kétete i fédéw i de étew énda munur bé Kristowe, muwit kéléhu. <sup>11</sup> Endob i begome, fégitung gom i fiyowe rénigoy Tuluse dob begome sabaf bé kétete i de fédéw gom. Non sabaf bé kétete i de fédéw gom, tintu méuyot gom rémigo bé fiyowe, brab toow fo méuyot gom émfégiyote bé éndaén i sala gom béléewe ni. Atin ménkérít gom brab ménbuku gom bé salae rénigoy ségétéwe begom. Atin méuyot gom émfésuwat begén. Mélaw, sabaf bé kétete i de fédéw gom,

kénukum gom i ni sala, atin fénténgténg gom bé békén kagom sala i ni. <sup>12</sup> Mélaw i funa kuwe séménulat dob begome bé gétahé békén saén sabaf bé nan étew ménsala, taloo noy étewe énggésalaa no. Yamula gétigay Tuluse séménulatu inok fégétiga ku dob begomey kédakél i kégédaw gome begey. <sup>13</sup> Been i niy funay de fédew gey ménfiyo. Atin ménumanan foy kéfiyoy de fédew gey. Non i Titoe fénororén begey bé kéuret ne fantag bé kénéoror gome de. <sup>14</sup> Ménfélangka-langkau fo muret dob Titoe fantag bé begome, atin fénggito gom foy kétoow i kéuret guwe. Démoyun gey émbérélh bé toowe dob begome. Atin ségiléw so énggito Titoey kétoow i funa keye félangka-langka fantag bé begome. <sup>15</sup> Mélaw minut dakél i kéimu ne begom, bé lala ne gétédém bé kéuyot gome modor bé de sugu gu, brab kébasana kome de. <sup>16</sup> Toowu fo méoror non gésarigo ku fo begom toow.

## 8

*I kéiraye dob Tuluse*

<sup>1</sup> Atin do dumogey, méuyot gey de fo ké gétiga kom i ménrigowe dob de munur bé Kristowe dini dob Masedoniawe ni bé kégédaw i Tuluse. <sup>2</sup> Fiyon fo ké toow ro fo kérasayan brab kérégénan, toow ro fo moror. Mélaw fiyon fo ké toow fo méskinan ro, toow ro fo méngédaw méniray kurta fégétabang bé de dumogro munur. <sup>3</sup> Atin béréhé ku begom i toowe, niray roy gagané ruwe. Tidew bénog, ménuman ron man miray non been i niy kétaya ruwe rigoné ro. <sup>4</sup> Komon nongot ro fo dob begeye ké tungkasé key bero mamung témabang bé de dumogtom munur bé Kristowe dob ingéde Judea. <sup>5</sup> Toow gey fo ménggaif non rénigo roy békéne fo bantak fédew gey gérigono ro. I sunguwe de niray roy de lowoh ro brab de fédew ro dob Kadnane. Tidew bénog, non rénigo roy kétayay Tuluse, nodoro roy de sugu gey. <sup>6</sup> Atin non Titoey méngganaye bé ni rigonén, féngginau gey bé fétausé noy kétimu ne kurta fégétabang bé de munur dob Judea inok géfégilido kom i galbéké ni rénigo gom bé kégédaw gome. <sup>7</sup> Gétiga ku énda kulang gom bé de kénur gom, taloo no de kéuret gom, loo soy de kégtiga kom, loo soy kétaya kome témabang, loo soy kégédaw gome begey. Mélaw méuyot gey de ké fégito gom soy énda i kulang bé kégédaw gome bé kéiraye.

<sup>8</sup> Enda sugué ku de begom, éndob méuyot de ké gétiga kom i fantage bé de dumogom munur dob de ségiyo gonon. Témantu ro fo témabang. Beeniy funa kuwe émbérélh de dob begome béléewe, inok iringé kom bero. Mélaw gétiga ku ké toow gom fo mégédaw. <sup>9</sup> Gétiga tom i kégédaw i Kadna tome Jesu Kristo. Non fiyon fo ké toow fo kawasa dob lawayo, ménwaléy méskinan dob duniyae ni bé kewaléy ne kéilawan inok waléy gom kawasa dob lawayo sabaf bé kétérifiantad ne.

<sup>10</sup> Atin féginauné ku begom bénog, fiyo ké fégilidé kom i féngganaya kome galbék bé no énggéétah bélintuwa. Begom i de sungu téménimu do kurta fégétabang, atin begom soy de sungu méuyot témabang. <sup>11</sup> Mélaw fatut fétausé kom taman géfégilido kom. Fatut méuyot gom magayas mégilid de ségiléw bé káfagayas gome bé kékantak gome de. Atin iray gom i atiy wéne begom. <sup>12</sup> Amuk méuyot gom miray bé atiy wéne begom, mésuwat i Tuluse témayakuf bé nan. Endob i Tuluse énda méuyotén ké iray gom i éndae gagané kom.

<sup>13</sup> Enda méuyot gey de ké kérégénan gom sabaf bé de kétabang gom miray dob de ségiyo inok éndaén kérégénan ro. Endob kétaya key ké ségiléw-giléw i kéluhanane. <sup>14</sup> Béléewe ni gétabang gom bé de ségiyo non gaba-gabay kagome káfaguyag. Endob kulang foy karowe de. Atin dob gaiwe kulang gom brab gaba-gaba roy berowe, tabangé ro so begom. Mélaw ségiléw-giléw i késétabang gome. <sup>15</sup> Non wén i Ménsulate Kébérélh i Tuluse mano, “I étewe énggétimu médo, énda gaba-gaba no. Atin i étewe énggétimu kloh saén, énda so kulangén.”

<sup>16</sup> Toow fo ménfésalamat gey dob Tuluse non bé kéuyot Titoe mégédaw begom loo bé kégédaw geye begom. <sup>17</sup> Amun nongot gey dob beene ké tabanga no begom, toow fo ménuyot de rémigo. Atin non toow fo méuyot témabang begom, mélaw méuyot mangéy diyaan. <sup>18</sup> Féodoré key bé Titoey ségétéwe dumogtom munur, mégérör fo muret bé Fiyowe

Uret, funa no toow fo fégadatay de munur dob de ségiyo ingéd. <sup>19</sup> Atin saliyu na bé nan, beeney fénemili i de munur dob de séségiyo-giyo ingéd inok modor begey bé kéagéw geye mangéy muwit bé kurtae fégétabang bé de méskinan munur bé Kristowe. Rigoné key i ni galbék inok médayéw i Kadnane de brab fégito gey i kéuyot geye témabang.

<sup>20</sup> Méuyot gey ké modor i de ni étew non toow gey fo mingat bé kéuwit geye bé ni dakél iray inok énda i témo begey. <sup>21</sup> I kétaya keye rigoné key i fatute dob adafay Tuluse loo so dob adafay étewe.

<sup>22</sup> Atin saliyu na bé ni, sugué key soy ségétewe dumo tom munur. Médoonén fo gule ténéngkad gey atin mélaw gétiga key méuyot fo témabang. Atin béléewe ni toow na fo méuyot témabang begom non dakél foy késarig ne dob begome. <sup>23</sup> Atin i Titoe, beeney dumo guwe gémalbék témabang begom. Atin i de étew modor bé Titoe, beroy de sénarigoy de munur dob de séségiyo-giyo ingéd mangéy témabang begom inok médayéw i Kristowe. <sup>24</sup> Fégito gom i kégédaw gome bero inok i de munur dob de ségiyo ingéd gétiga roy kégédaw gome brab gétiga ro so toow i funa keye gáfélangka-langka fantag bé begome.

## 9

<sup>1</sup> Endaén kailanga kuy sémulate dob begome fantag bé kétabang gome bé de dumo tom munur do méskinan dob Judea. <sup>2</sup> Non gétiga ku toow gom fo méuyot témabang. Brab dénayéw gu begom dob de munur dini dob Masedoniawe ni. Bénréh gu bero maku, “I de dumo tom munur dob ingéde Akaya, tafay ron témabang tidéw bé no énggéétah bélintuwa.” Amun énggelingoo roy ni, i kédoono ruwe ménwaléy méuyot témabang.

<sup>3</sup> Mélaw béléewe ni, sugué ku mangéy dob begomey de ni do dumo tom munur inok tabanga ro begom métuman i ni brab gétafaya komén i tabang gome loo bé bénréh geye. Giton mélaw toow i kédayéw geye begom. <sup>4</sup> Non amuk i de étew tidéw Masedonia modor ro begén mangéy diyaan, atin amuk énda i ténafay gom kurta, toow fo mémala gey de, brab kémalianan gom de so. Non makey ké wén i ténafay gom kurta. <sup>5</sup> Mélaw, makuk fiyo ké sugué ku métah mangéy diyaan i de ni do dumo tom munur inok gétafaya kom i iray gome, sani fénasad gome. Mélaw amuk gégumahu diyaan, méntafayén i de iray gom. Mélaw giton i kéuyot gome miray énda ménfégés gom de.

<sup>6</sup> Fégétédém gom i ni, i étewe mohok kloh, kémétew so kloh. Atin i étewe mohok médo, kémétew so médo. <sup>7</sup> Mélaw, sénga ségétew étew fatut irayén i bénantak ne irayén. Atin békén fatut miray ké tete i fédew ne de taloo no ké manok ménfégés de saén. Non toow fo mégédaw i Tuluse bé étewe toow fo moror ké miray. <sup>8</sup> Atin i Tuluse géirayén begom i mas na médo bá de kailanga kom inok démoyun gaba-gabay kéfaguyag gome atin géiray gom so tabang dob de ségiyo. <sup>9</sup> Non wén i Ménslate Kébérén i Tuluse mano, “Iraya no témantuy de méskinan, brab i kégédaw ne énda i tamana no.” <sup>10</sup> Atin i Tuluse irayén i de báne dob de mohok, inok mama i de étew. Mélaw iraya no so begom do báne, sani de kétabang gom dob de ségiyo, inok dakél i gékétéwo kome, sani de médo do fiyo rénigo gom sabaf bé dakéle kégédaw gom. <sup>11</sup> Démoyun iray i Tuluse begom i katabuwane inok gétantu gom miray tabang sénga tékélid, inok médooy fésalamat bé Tuluse sabaf bé tabange tidéw dob begome uwité key. <sup>12</sup> Non i ni galbék rigoné kom, békén saén i kétabange bé de munur, éndob been soy funay de médo étew fésalamat dob Tuluse.

<sup>13</sup> Atin amuk gito roy dakéle kégédaw gom loo bé ni, médooy démayéwe bé Tuluse sabaf bé kéodor gome bá sugu Kristowe, brab sabaf bé kéégét i kéunur gome bá Fiyowe Uret fantag bé Kristowe, non mégédaw gom miray dob berowe brab dob kéluhanay de ségiyo.

<sup>14</sup> Atin mélaw dasala ro begom dob Tuluse atin toow fo gulaané ro begom. Atin i funa ruwe gémulaan begom non bá dakéle kégédaw gom bero tidéw dob Tuluse. <sup>15</sup> Mélaw fésalamat tom dob Tuluse non bá Nga ne Jesu Kristo toow fo mélaga nirayén betom.

<sup>1</sup> Atin i begéne, sani Pablowe, wén i ongoté kuwe dob begome. Wén i de ménbéréh térifantadu kun ké diyou dob begome. Endob amuk énda kun diyou dob begome, toowu fo émbaraw sémulat dob begome. Endob ongoté ku dob begome bé toowe mélanat kékéréh loo bé kégédaw Kristowe. <sup>2</sup> Ongoté ku dob begome, féfiyo gom i de rigoné kom inok énda kailanga kuy fébarawé ke géumahu dob begome, loo bé rigoné kuwe dob de étew émbéréh bé i begeye kun ségiléw gey i de étew énda munur ro bé Kristowe. Non rigoné key kun i de tete kétaya key. <sup>3</sup> Toow kélawan gey saén, éndob énda sarigo key i kékagér i kélawan fégésétiboh sébanil bé Satanase. <sup>4</sup> Non i kékuret geye énda ségiléwén bé kékuret i de tete étew dob dunyae ni. Yamula i kékuret geye tidéw dob Tuluse brab wén i barakatén inok témaban gey bé de kétoro énda toowén. <sup>5</sup> Férito gey énda toow i kéluhanay uret i de étew sébanil bé Tuluse brab kékéréh i de étew félangka-langka malang bé toowe kétoro fantag bé Tuluse. Atin fiyon i de kékégitung ro énda toowén, fégaliné key inok modor so bé de sugu Kristo. <sup>6</sup> Atin amuk férito gom tintu odoro kom i de sugu Kristo, tidéw bénou kukumé key i de ségiyo munur amuk énda modor ro bé de suguén.

<sup>7</sup> Kagom téngténgén saén i falas i étewe, yamula fatut fégítung gom soy fantage bé fédew ne. Amuk wén i étew gékaranga no been i sugu-sugué Kristowe, fatut karangé no so begey, do sugu-sugué Kristowe so. <sup>8</sup> Non énda mémalawu félangka-langka bé aturane niray i Kadnane begey. Non nirayén dob begeye inok féegeté key i kénur gome, énda mébinasa gom de. <sup>9</sup> Mikau ké fégítungé kom fégilaké ku saén begom dob de sulat gu. <sup>10</sup> Endob wén keeyén i étew émbéréh mano, “Dob de sulat Pablo, toow fo émbaraw brab émbagér. Endob amuk dini dob betome, toow fo mélanat i de kékéréhén brab énda furungén muret.” <sup>11</sup> Endob i étewe mégitung loo bé nan, fatut gétiga noy ni. I de sénulat gey béléewe ni, fiyon fo ké sérayu tom, been soy nan i de rigoné key ké gésétengaang tomén.

<sup>12</sup> Endob énda féségiléwé key i begeye bé de étew do félangka-langka. Toow ro fo dufang, non marok bero saén i do gérotor, brab dayéwé ro soy de karo lowoh brab de étew miring bé adat ruwe. <sup>13</sup> Endob i begeye, énda talawan gey démayéw bé de lowoh gey, non béréhé key saén i de rénigo gey dob galbéké niray i Tuluse begey, loo bé de rigoné key dob begome. <sup>14</sup> Atin énda talawan gey démayéw bé de lowoh gey, non begey i de sungu ménangéy diyaan muret dob begome bé Fiyowe Uret fantag bé Kristowe. <sup>15</sup> Enda félangka-langka gey fantag bé galbék i de ségiyo dob de ségiyo gonon énda sénugu i Tuluse begey. Endob méuyot gey de ké amuk minut émbagér i kénur gome, gétabanga kom begey émféunur bé de dumo gom dob kagome ingéd. <sup>16</sup> Tidéw bénou, géureto key i Fiyowe Uret dob de ingéd gélyu begom. Mélaw énda fégéfélangka-langka gey i galbék i ségiyowe étew.

<sup>17</sup> Non wén i Ménsulate Kékéréh i Tuluse mano, “Fiyon atiy méuyote félangka-langka, fatut félangka-langka sabaf saén bé rénigoy Kadnane.” <sup>18</sup> Non i étewe dayéwé noy kaane lowoh, énda i lanték i kédawéw ne. Endob amuk Tulus i démayéwe bé ségétewe, giton médait médayéw.

## 11

### *Do ubo-ubo apostol*

<sup>1</sup> Méuyotu de damén ké tingkélo kom na begén kloh bé kékuret guwe ni fiyon fo ké maak dufangu. <sup>2</sup> Toowu fo médaléw fantag bé begome loo bé kédaléw i Tuluse. Non i begome ségiléw gom bé ségétewe kénogon fentisingonén. Atin i Kristowe maak beeney lagéye ménfétisingon bé ni kénogon. Atin begéney maake ménfétisingon de brab toow fo méuyotu de ké gésébawag ro. <sup>3</sup> Mégilaku de ké tagaké kom i Kristowe loo ké éndaén modor gom bé de suguén taloo no ké éndaén gulaané kom de. Embukuu ké fésélawékom i toowe fantag bé Kristowe bé tugi i de ségiyo kékengadaf. Amuk rigoné kom i nan, géiringo kom moso i sala i sunguwe libun féndawét Eba, non méndurat bé kétugiéy ulée, sani Satanase. <sup>4</sup> Non amuk wén i ségétew étew géumah dob begome, brab muret ségiyo

kétoro fantag bé Jesuse bé kétoro geye, munur gom de wayo. Taloo no fiyon fo ké ureté roy ségiyowe rémogor brab ségiyowe kékéngintulus, munur gom de so wayo, fiyon fo ké énda ségiléwén bé kageye kétoro.

<sup>5</sup> Atin i do no étew diyaan do ubo-ubo do gérotor do apostol ro, gétiga ku énda i ségitew bero toow na fo gérotor begén. <sup>6</sup> Fiyon fo ké énda furungu muret, énda kulang i kégétiga kuwe. Fénggito gey begom médoonén gule i kéluhanay de rénigo gey.

<sup>7</sup> Nuret gu dob begomey Fiyowe Uret i Tuluse, éndob énda fénbayada ku de begom, fiyon kloh. Atin ménterifantadu inok waléy gom gérotor. Aw békén ba fiyoy nan rénigo gu? <sup>8</sup> Amun diyou dob begome gémalbék, i de munur bé Kristowe dob ségiyowe gonon i ménayadane begén. Mélaw énggédotu dob berowe inok gétabanga ku begom.

<sup>9</sup> Atin amun diyou dob begome, énda ménongotu kurta tidew dob begome fiyon fo ké wén i kailanga ku. Yamula i de dumo tom munur dob Masedonia, nuwito ro begén bé kéluhanay de kailanga ku. Atin loo so bé do gétah, énda fo doté ku mosoy tabange tidew dob begome. <sup>10</sup> Atin been i niy funa kuwe félangka-langka. Non énda méndotu kurta tidew dob begome loo so dob de udenén ingéd dob Akaya. Atin énda so médotu moso tidew dob begome. Been i fasad guwe brab gétiga ku fo toow loo bé kétoow i kétoro Kristowe. <sup>11</sup> Fégitungé kom keey énda méimuu begom non bé de ni kékérén gu. Endob gétigay Tuluse, toow fo féimué ku begom.

<sup>12</sup> Fétausé ku rigonén i de rigoné ku béléewe ni, mélaw énda mongotu tabang tidew dob begome, inok i de téfégérotor do ubo-ubo saén do apostol, énda i funa ro félangka-langka brab inok énda gébérén ro ségiléw i karowe rigonén bé kageye de. <sup>13</sup> I berowe, békén tintu ro apostol Kristowe. Yamula do ubo-ubo ro saén, brab do témugi ro. Magakar ro saén inok makom ké do tintu ro do apostol Kristowe. <sup>14</sup> Endob énda mégaifu de, non gétiga ku fiyon i Satanase géfarino noy falas ne loo bé falas i télaikiy Tuluse. <sup>15</sup> Mélaw énda mérégéno ké ubo-ubo i de sugu-sugué Satanas inok maak do tintu sugu-suguéy métintuwe Tulus. Endob mékukum ro moso loo bé fatute sabaf bé de ni do tete rigoné ro.

### I kérasy Pablowe

<sup>16</sup> Séguleé ku man bérén, kagom fégitungén de ké dufangu. Endob amuk karangé kom begén dufang, tingkélonu inok wén i funa ku géfélangka-langka loo bé ségitew dufang. <sup>17</sup> I ni béréné ku begom béléewe ni, békén tidew dob Kadnane, non fébantug-bantugu saén loo bé ségitew dufang. <sup>18</sup> Endob non médooy de émbérén félangka-langka sabaf saén bé de éntingayén dob ni duniya, fakay so félangka-langkau. <sup>19</sup> Atin non makom keey ké toow gom fo do métillédtéd, fatut moror gom témingkélon bé de dufang. <sup>20</sup> Non amuk wén i téfégérotor étew sugué no begom, taloo no afasé noy de languntama kom, taloo no lifulé no begom, taloo no félangka-langka dob téngaanga kome, taloo no tamfilingé no begom, tingkélo kom brab fédayaé kom saén. <sup>21</sup> Toow fo émbaraw ro, éndob i begeye énda émbaraw gey loo bé nan. Makom keeyén ké talaw gey non énda i rénigo gey tete loo bé nan dob begome.

Atin amuk félangka-langka ro, géfélangka-langkau so, fiyon fo ké dufang i ni kékérén fégéfélangka-langka. <sup>22</sup> Félangka-langka ro non do Judio ro. Endob ségitew so Judio. Atin béréné ro do étew Israel ro, éndob loo soy begéne. Atin béréné ro do séfu Abraham ro, éndob ségitew so séfu Abraham. <sup>23</sup> Gétiga ku émbérén béri maak ségitew bunég, éndob énda gétérén. Aw béréné ro beroy de sugu-sugué Kristo? Endob i begéne ségitew so sugu-sugué Kristowe, atin toowu na fo mégéror gémalbék bé berowe. Mas médoonén gule ménférisuwu sabaf bé kéuret guwe bé Kristowe. Mas médoonén so gule ténafésu, brab mas médoonén gule gédétun méléhu. <sup>24</sup> Limo gule bénadas i de Judio begén bé télewe folo bra siyow gule badas. <sup>25</sup> Télew gule bénadas i de Romano begén. Atin wén i no gai, i de étew nibéro ro begén batéw taman marok méléhuu néen. Télew gule ménférisuwu sabaf bé kéuret guwe bé Kristowe. <sup>26</sup> Dob démoyune kéagéw gu, médooy de makakaid do énggagéwo ku: do makakaid dob de wayég dunuk, do

makakaid dob do tulisan, do makakaid sabaf bé de dumo gu Judio brab do békén Judio so, de makakaid dob de ingéd brab dob de gonon énda i do étew de batí, brab do makakaid dob dogote. Atin wén soy do makakaid tidéw dob de ubo-ubo saén do dumo gu munur, éndob i toowe, sébanil ro begén. <sup>27</sup> Toowu fo géménalbék, brab wén i no énda géfidongu. Atin wén i no mélayafu brab téruménu, atin kulang i amaé kuwe brab kégal guwe, brab énda i batí ku. <sup>28</sup> Atin békén saén i nan, non démoyunu émbuku fantag bé kéluhanay de sélimud do munur bé Kristowe. <sup>29</sup> Non amuk wén i kérasayan sabaf mélubay i kéunur ne, mérasayu so bé kékuku guwe. Taloo no amuk wén i ségétew munur gésala sabaf wén i ménfésala de, tete i fédew guwe de brab mékérítu bé ménfésala de.

<sup>30</sup> Enda méuyotu félangka-langka, éndob amuk félangka-langkau, béréhé ku saén i de fantag bé de kérégéno ku inok giton énda fo furungu. <sup>31</sup> I Tuluse sani Abay i Kadnane Jesus, médayew damén i dawéti ne taman sa taman. Gétiga no toow i kékéréd guwe. <sup>32</sup> Bé do gétah amun diyou de séna dob ingéde Damasko, wén i ségétewe méguléw diyo fénemili Datu Aretase. Atin sénuguén i de sundalo no mantay dob bengaway no ingéd inok kéfoé ro begén. <sup>33</sup> Endob wén do témenabang begén, nahur ro begén dob dakélé biton. Atin ténuntu ro begén dob faliluwangay didinge fénggélangkat bé no ingéd. Mélaw énggféralaréy.

## 12

<sup>1</sup> Kailanga kuy fébantug-bantuge fiyon fo ké énda i lanték gu. Béréhé ku béléewe niy fantage bé de fénggitoy Kadnane begén loo soy de fénayagén dob begén. <sup>2</sup> Wén i gélolo guwe lagéy munur bé Kristowe, atin ménfoloén bra fot gébelintuwa i kéuwt i Tuluse de mangéy dob towe fo gérotor laway. Endob énda saén gétiga ku de ké toow énggéangéy diyo taloo no fénggitoy Tuluse de saén. Tulus saén i gétigane de. <sup>3</sup> Mélaw énda gétiga ku de ké ménangéy i lowoh ne dob bélowané fantad loo ké rémogor ne saén. Tulus saén i gétigane de. <sup>4</sup> Enggélingooy ni étew diyo i de éntingayén énda géréréhoy de kélawan de, brab énda fo fakayén béréhéy étew. <sup>5</sup> Mélaw fébantug-bantugu sabaf bé ni étew, éndob énda fébantug-bantugu fantag bé kagéne lowoh saliyu saén bé de éntingayén fégito no énda fo furungu de. <sup>6</sup> Amuk fébantug-bantugu, énda rigoné ku de loo bé ségétewe dufang non béréhé kuy towe. Endob énda fébantug-bantugu non mikau de ké karangéy de étew begén toowu na fo gérotor bé fatute. Non fatut karangé ro begén sabaf saén bé de gito ro rigoné ku brab de gélingoo ro béréhé ku.

<sup>7</sup> Atin inok énda géfélangka-langkau sabaf bé de fiyo énggito gu, nirayén begén i déruune toow fo démawét. Atin i Satanase nusarén fégéferasayén begén inok énda géfélangka-langkau. <sup>8</sup> Télém gule déménasalu dob Kadnane fantag bé ni ongoté ku ké kédané noy ni déruun. <sup>9</sup> Endob séménumbul i Kadnane mano, “Kégédaw guwe saén i kailanga muwe. Non toow fo minut dakél i barakat guwe téma bang ké toow fo minut go mélubay.” Mélaw mororu félangka-langka sabaf bé de kélubay gu inok fébagéré Kristowe begén bé barakat ne. <sup>10</sup> Atin mélaw toow fo mororu sabaf bé de kélubay gu, brab kéingone begén, brab kédusawe begén, brab kégérasaye begén, brab de mérégén géagéwo ku sabaf bé kéunur guwe bé Kristowe. Non gétiga ku amuk mélubayu, wén soy gai fébagéré Kristowe begén.

<sup>11</sup> Béléewe ni rigoné kuy rigoné ségétewe dufang non fébantug-bantugu. Endob fénégés gom de begén rémigo non fatut damén begom i mamfilone begén. Non fiyon fo ké gérfantadu, toowu na fo gérotor bé da nan do ubo-ubo saén do apostol diyo dob begoma nan. <sup>12</sup> Atin amun diyou dob begome, fénggitoy gu dob begomey ségétewu fo tintu apostol. Non rénigo guy de mékégaif fiyon fo ké énggédaydaya kuy de mérégén. <sup>13</sup> I rénigo guwe dob begome ségiléw so bé rénigo guwe dob de munur dob de ségiyo ingéd saliyu saén bé ni. Enda méndotu kurta dob begome fégétabang gom begén loo bé kéédot guwe dob de ségiyo. Amuk karangé kom énggésalu sabaf bé ni, fésagadanu!

<sup>14</sup> Beeniy gételewoy kétay guwe mangéy témuak begom, éndob énda mongotu kurta fégéfaguyag gu tidéw dob begome. Non begomey gulaané kuwe, békén i kurta

gome. Ufama, i de nga békén fatut miray kéfaguyag dob de lukés ro, yamula i de lukés roy fatute miray kéfaguyag dob de nga ro. Atin begomey maake do nga gu non ménunur gom sabaf bé kéuret guwe. <sup>15</sup> Atin toowu de fo moror ké géétéyo ku miray i kéluhanay languntama kuwe brab férénawa guwe fégétabang begom. Endob maak minut kloh i kéimu gome begén bé lala guwe minut dakél i kéimu guwe begom.

<sup>16</sup> Gétiga kom bé énda fénrégéno ku begom non énda i nongot gu kurta dob begome. Endob wén keeyén i émbéréhe begom mano, “I Pablwe toow fo tugién, fénagakara no betom, brab lénifulén betom.” <sup>17</sup> Endob ati étewe fénagakara ku, taloo no ténuvio ku, taloo no léniful gu? Enda! Aw wén i éndot gu tidéw dob begome bé késugu guwe bé de sarigo ku mangéy dob begome? Enda! <sup>18</sup> Nongot guy Titoe magéw mangéy diyaan brab sénugu gu modor soy ségétéwe dumo tom munur. Aw wén i éndot Titoe tidéw dob begome, taloo no lénafisén begom? Enda! Aw békén ba ségiléw i rénigo geye non sébaan saén i kétaya keye rigonén, sani témaabange begom?

<sup>19</sup> Makom keey ké bérhé key i de ni inok fétengténg gey begom énda i sala gey. Békén i nan. Non gétigay Tulusey, bérhé key saén i félébh Kristowe begey. Do dumo gu, i kéluhanay de rigoné key, rigoné key inok émbagér i kéunur gome. <sup>20</sup> Toow fo émbukuu ké géumahu dob begome, gito gu begom rémigo bé békéne kétaya ku. Atin gito gom mélaw begén rémigo bé békéne kétaya kom. Been ké gumaha ku begom, séédél, mésérédaléw, sékérit, séitung, séingon, ségéno, séfélango-langka, brab sérimbur. <sup>21</sup> Atin ménbukuu amuk géumahu diyaan, fémalanéy Tuluse begén dob téngaanga kome, non gékérewu sabaf bé de médoob begom do ménsala bé do gétah, éndob énda séna énggésénule ro témagak bé de tete rigoné ro loo bé de kékigaé ro brab de tete kétaya ro.

## 13

<sup>1-2</sup> Beeniy gétéléwe gule kétukaw gu begom. Atin wén i Ménsulate Kébéréh i Tuluse mano, “Amuk wén i ségétew étew ténebo ménsala, kailangan wén i ruwo gétew taloo no télew gétew énggégito de atin fayagé roy ati énggito ruwe fantag bé ni kétébo.” Mélaw amuk géumahu diyaan, fégélingoé kuy de kétébo gom brab kukumé kuy de étew ménsala. Bénréh gun i ni dob begome bé do gétah amun nangéy gu begom ténuwo nuwe gule. Atin bérhé ku man ségule dob ni sulat. <sup>3</sup> Bé béo gai, amuk géumahu diyaan, fégito gu begom i kéluhanay émféngintoowe bé de kékéréh gu, toow fo tidéw dob Kristowe. Amuk wén i rigoné no dob begome, énda mélubayén, yamula fégito noy barakat ne dob begome. <sup>4</sup> Non fiyon fo ké maak énda i barakat Kristowe bé kéléhu ne dob kruse, méuyag béléewe ni sabaf bé barakat i Tuluse. Atin ségiléw bé begeye, maak énda i barakat gey non kérégénan gey sabaf bé kéunur geye bé Kristowe. Endob sabaf so bé kéunur geye bé Kristowe, i barakat i Tulusey muyage begey inok taus i kétabanga keye begom.

<sup>5</sup> Sétengkad gom inok gétiga kom ké tintuy kéunur gome bé Kristowe loo ké énda. Atin gétiga kom damén ké bat i Kristowe dob de fédew gom. Amuk énda bat i Kristowe dob begome, énda séna tintuy kéunur gome de. <sup>6</sup> Atin gétiga kom damén begey i de tintu apostol Jesu Kristowe. <sup>7</sup> Atin démasal gey dob Tuluse énda damén rigoné kom i tetee. I funa keye démasal loo bé ni békén ké fégito gey toow fo mégulit i kageye galbék ménféunur begom. Yamula démasal gey loo bé ni inok rigoné kom i fatute fiyon fo ké maak énda mégulit i de rénigo gey. <sup>8</sup> Non amuk modor gom bé toowe kétoro, énda fégito gey begom i atura keye. Non énda usaré key i atura keye rémigo sébanil bé toowe, yamula usaré key i atura keye témaabang bé de étew inok modor ro bé toowe kétoro. <sup>9</sup> Atin toow fo mororu amuk gito gu begom émbagér i kéunur gome atin mélaw énda fégito gey i atura keye. Mélaw démasal gey inok minut émbagér i kéunur gome. <sup>10</sup> Been i niy funa kuwe sémulat bé de ni amuk énda diyou dob begome. Mélaw amuk géumahu diyaan énda damén kailanga kuy démusawe kémukum begom. Non niray i Kadnane begén i aturay ségétéwe apostol inok fébagéré kuy kéunur gome, békén kukumé ku begom.

<sup>11</sup> Taman saén dob niy sulaté kuwe begom. Féfiyo gom fo toow i de rigoné kom, odoro kom i de kéféginau gu begom. Séfagayun gom brab fétanék gom i fédéw gome. Mélaw i Tuluse, sani toowe fo mégédaw begom brab mirayan begom bé métanéke, démoyun diyo dob begome.

<sup>12</sup> Atin amuk séségifa gom fatut fégito gom i késégédaw gome.

I kéluhanay de munur bé Kristowe bati dob de ségiyo ingéd ségifaé ro begom.

<sup>13</sup> Atin mégédaw damén i Kadnane Jesu Kristo begom, brab mégédaw damén i Tuluse begom, loo soy Rémogor i Tuluse démoyun damén bati dob kéluhanay de fédéw gom.  
*Pablo*

## I Sulat Pablwe dob de Munur bé Kristowe dob Galasia

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablwe dob ingéde Galasia, atin médooy de étew ménwaléy munur bé Jesuse sabaf bé kéuret ne. Séménulat i Pablwe dob berowe.

I kédoonoy de étew do bati dob Galasia, békén Judio. Mélaw énda ménodor ro bé kitabe taloo no adat i de Judio. Endob dénowoy i de Judioy de munur bé Jesuse brab ténero ro bé kailanga ro soy modore bé kitab i de Judio.

Endob i Pablwe, énggétiga no énda kailangay de étew i modore bé kitab i de Judio inok méfukas ro dob de sala ro. Yamula kailanga ro saén i munure bé Jesu Kristowe. Mélaw séménulat i Pablwe dob de munur do bati dob Galasia inok toroé no bero bé énda kailanga roy modore bé kitab i de Judio.

<sup>1-2</sup> Begéney Pablwe, sulata ku begom do munur bé Jesu Kristowe dob de ingéd sakuf i Galasiawe. I begéne brab kéluhanay de dumo gu munur dini, ségifaé key begom. I begéne ségétewu apostol békén sénugu i kéilawane, taloo no kéilawan saén i méniraye aturan dob begéne. Yamula i Jesu Kristowe brab Abay tome Tulus sani téménébulee bé Jesusey ménémilie begén, brab de ménféwaléy begén apostol brab de séménugu begén.

<sup>3</sup> I Abay tome Tulus brab Kadnane Jesu Kristo, mégédaw ro damén begom brab fétanéché ro damén i de fédew gom.

<sup>4</sup> I Kristowe, nirayén i umul ne bé kéléhu ne dob kruse inok i de sala tom émfésagad, brab inok énda mékukum tom loo bé de étew rémigo tete béléewe ni. I funa Kristowe nirayén i umul ne, non nodoro noy kétayay Abay tome Tulus. <sup>5</sup> Médayéw i Tuluse damén taman sa taman! Amen.

### Sébaan saén i Fiyowe Uret

<sup>6</sup> Toow fo ménggaifu bé rénigo gome. Sedek toow fo magad i kétagak gome bé Tuluse sani ménfounure begom sabaf bé kégédaw Kristowe. Non balengé kom i de fédew gom brab munur gom bé ségiyowe "Fiyo Uret". <sup>7</sup> Endob i toowe, énda i ségiyo Fiyo Uret non sébaan saén i toowe kétoro. Endob wén i do étew diyaan fénbuku ro begom bé de tugién kétoro ro non méuyot ro mégalin bé toowe Fiyo Uret fantag bé Jesu Kristowe. <sup>8</sup> Endob amuk wén i muret atin i kéuret ne énda ségiléwén bé kageye kéuret fantag bé Jesuse dob begome, mékukum damén mangéy dob emfernowo. Fiyon fo ké do téaki taloo no begey, amuk fégaliné key i toowe kétoro, mékukum gey so damén! <sup>9</sup> Bénréh geyén begom atin béréhé ku man ségule béléewe ni. Amuk wén i téromo fantag bé Jesuse atin énda ségiléwén bé kétoroe nunuro komén bé do gétah, mékukum damén mangéy dob emfernowo!

<sup>10</sup> Enggito gomén dob ni sulat énda sélédé kuy kédayéw i étewe. Non méuyotu saén ké Tulus i démayéwe begén. Amuk méuyotu de saén ké mésuwat i de étew begén, éndaén damén tausu waléy sugu-sugué Kristowe.

<sup>11</sup> Do dumo gu, méuyotu de ké gétiga kom i ni, i Fiyowe Uret ténero gu begom békén tidew dob kéilawane. <sup>12</sup> Non énda énggédot gu de tidew dob étewe, brab énda i ségiyo de téménoro begén. Yamula fénggétiga Jesu Kristowe begén.

<sup>13</sup> Enggélingoo kom i fantage bé tafaye adat gu. Toowu fo ménodor bé kétoro i de dumo gu Judio. Atin i de munur bé Kristowe, fénrasay gu fo bero toow brab ténlama gu béninasay kéfengintulus ruwe inok éndaén i étew munur bé Jesuse. <sup>14</sup> I kédooy de dumo gu do Judio ségiléw gey idad, énda gérénégo ro begén bé kéodoro kuwe bé kétoro i de Judio. Brab toow na fo nodoro kuy adat i de katufua key.

<sup>15</sup> Endob fiyon fo ké loo bé nan, i Tuluse toow fo mégédaw begén. Non bé énda séna ménumahu de, fénémili non begén inok waléy sugu-sugué no. <sup>16</sup> Atin sabaf bé kétaya nuwe, fénggito no begén i Nga ne Jesus inok ureté kuy fantage bé Beene dob de békén Judio. Endob énda i féntoroo ku fantag bé Kristowe. <sup>17</sup> Atin énda ménangéyu dob ingéde

Jerusalem inok ménginsau dob de sungu do apostol. Yamula ménagayasu mangéy dob ingéde féndawét Arabia. Tidéw béno, méniséfuleu mangéy dob ingéde Damasko. <sup>18</sup> Atin télén gébélintuwa tidéw béno, ménangéyu Jerusalem inok tukawé kuy Pedrowe. Brab ménbatiu dob beene ruwo gégadiyan. <sup>19</sup> Atin bé béno, énda i ségétew énggito gu bé de dumo do apostol saliyu saén bé Santiagowe sani tuwaréy i Kadnane Jesus.

<sup>20</sup> Béréhé ku begom bé toow i ni sulaté ku begom, békén tugi. Gétigay Tuluse so toow i ni.

<sup>21</sup> Tidéw béno, ménangéyu dob de ingéd dob Siria brab dob Silisia. <sup>22</sup> Bé do no do gai, i de munur bé Kristowe dob Judea, énda séna énggébalaka ro begén taloo no gélolo ro begén. <sup>23</sup> Enggelingoo ro saén i bénréh i de étew fantag bé begéne maro, “I étewe toow fo fénrasayén betom bé do gétah brab ténlama no kédanén i kéunure bé Kristowe, béléewe ni ménbalengén i fédew ne brab ménwaléyén wayo muret fantag bé Kristowe.” <sup>24</sup> Mélaw dénayéw roy Tuluse sabaf bé begéne ménwaléy munur bé Kristowe.

## 2

<sup>1</sup> Folo bra fot gébélintuwa tidéw béno, méniséfuleu man mangéy Jerusalem begey Bernabewe. Brab nuwit gu soy Titoe. <sup>2</sup> Méniséfuleu non fénggétigay Tuluse begén bé fatutu mangéy diyo. Atin ménslimud gey i de odoroy de munur, éndob énda i ségiyo étew diyo. Atin nuret gu dob berowey Fiyowe Uret ténero gu dob de békén Judio. Rénigo guy ni inok énda mécédan i kéluhanay galbék guwe sani kéfúnur guwe bé de békén Judio. <sup>3</sup> Endob ménswat ro bé galbék guwe. Mélaw i dumo guwe Tito, fiyon fo ké ségétew békén Judio, énda fénégés ro de fétuli. <sup>4</sup> Endob bé béno, wén i de étew do ubo-ubo saén munur bé Kristowe brab ménamung ro dob begeye, méuyot ro de fo ké tulien. I de ni do étew, i funa ruwe ménamung dob begeye, inok susiné ro saén ké modor gey bé kitabe niray Moisese loo ké énda. Brab méuyot ro de ké féwaléyé ro begey riféy kitabe, fiyon fo ké ménfukas geyén bé kéodorone bé kitabe tidéw dob Moisese sabaf bé kéunur geye bé Jesu Kristowe. <sup>5</sup> Endob énda fo ménagayun gey de, inok énda mésélawék i ségiyowe kétoro bé Fiyowe Uret ténero gey begom.

<sup>6</sup> Atin i de odoron diyo, énda numana roy de kagén kétoro non katabuwanén. (Féndawét gu bero do odoron non bero kun i odoroy de munur bé Kristowe. Endob ulanden dob begéne non gétiga ku énda i isu ramigoy Tuluse.) <sup>7</sup> Atin i de ni do odoron gétiga ro fénemili i Tuluse begén inok muret bé Fiyowe Uret dob de békén Judio loo bé kéfemili i Tuluse bé Pedrowe inok muret dob de Judio. <sup>8</sup> Non i Tuluse fénwaléyén begén apostol dob de békén Judio ségiléw bé kéféwaléy ne bé Pedrowe apostol dob de Judio. <sup>9</sup> Atin i de odoron diyo ro Santiago, Pedro, brab Juan, énggésobuto ro niray i Tuluse begén i ni galbék. Mélaw ménsealamano ro begey Bernabewe fégétanda bé kégéséfagayu keye. Ménfagayun gey bé i Bernabewe brab begéne magéw gey mangéy muret dob de békén Judio atin i berowé mangéy ro muret dob de Judio. <sup>10</sup> Wén i sébaane saén nongot ro, sani kétabange bé de méskinan do munur bé Kristowe bati dob Jerusalem. Endob toow fo ménuyotu néntémabang bero, bé énda séna ménongot ro.

<sup>11</sup> Endob amun ménangéy i Pedrowe dob Antiokia, bénréh gu dob beene dob adafay de munur bé békén fo fatut i rénigo nuwe. <sup>12</sup> Ay niy rénigo nuwe. Amun énda séna énggumah i de Judio sénugu Santiagowe, i Pedrowe sérénagan mama bé de békén Judio. Endob amun énggumah ron, éndaén ménserénga no mama bé de békén Judio. Non mágilak bé de Judio do téromo bé kailangan métuli i de békén Judio. <sup>13</sup> Tidéw béno, i kéluhanay de Judio do munur diyo, ménngilak ro so loo bé kégilak Pedrowe. Mélaw éndaén sérénagan ro mama bé de békén Judio do munur so. Atin fiyon i Bernabewe ménamung so. Enda fiyoy rénigo ruwe fiyon fo ké gétiga roy fatute. <sup>14</sup> Amun énggito guy rénigo ruwe ménsebanil bé Fiyowe Uret, bénrého kuy Pedrowe dob téngaaing kéluhana ruwe makú, “Pedro, fiyon fo ké i beeme ségétew go Judio, éndob téngagak mon i adat i de Judio. Sede mélaw ké fégésé moy de békén Judio modor bé adat i de Judio?” Beeniy kégélé guwe bé Pedrowe.

*I Kéunure*

<sup>15</sup> I begeye, ménunah gey do Judio, békén gey do étew békén Judio do ménsala. <sup>16</sup> Gido loo, gétiga tom i funay étewe waléy métintu dob adafay Tuluse. Békén sabaf bé kéodor ne bé kitabe tidew dob Moisese. Yamula sabaf saén bé kéunur ne bé Jesu Kristowe. Atin i begeye do Judio, ménunur gey so bé Jesu Kristowe inok waléy gey métintu sabaf bé kéunur geye dob Beene. Békén sabaf bé kéodor geye bé kitabe tidew dob Moisese. Non énda i ségetew waléy métintu sabaf bé kéodor ne bé kitabe. <sup>17</sup> I de begey do Judio, amuk ménwaléy gey métintu sabaf bé Kristowe, giton ménsala gey so ségiléw bé de békén Judio. Endob kagom fégitungén de ké Kristowey muwite bé salae. Békén i nan! <sup>18</sup> Endob amuk séfuleu modor bé kitabe tidew dob Moisese fiyon fo ké ténagak gun, fégito guy begéne ségetewu toow fo ménsala, non énda ménodoru bé kitabe. <sup>19</sup> Maak ménléhuun, atin mélaw éndaén kailanga no modoru bé kitabe tidew dob Moisese. Endob méuyagu non énggédot guy mantuwe umul tidew dob Tuluse. Atin sabaf bé kéunur guwe bé Kristowe, maak ménsérénganu de méléhu dob kruse, non been i géménantinon begén. <sup>20</sup> Mélaw békénén begén i méuyage, yamula méuyag i Kristowe dob begéne. Atin i kéuyag guwe bèleewe ni, méuyagu non bé kéunur guwe bé Jesuse Nga i Tuluse. Toow fo mégédaw begén. Ménléhu inok méuyagu. <sup>21</sup> Enda mikau bé kégédaw i Tuluse. Endob amuk waléy métintuy kéilawane sabaf bé kéodor ne bé kitabe, énda i atag i kéléhu Kristowe.

## 3

*Fantag bé kitabe*

<sup>1</sup> Do étew dob Galasia, toow gom fo dufang! Sedek fénggélingo gom i de étew manangguwit begom témagak bé Fiyowe Uret? Toow fo ménkéntay i kétoro guwe begom fantag bé rénigo Jesu Kristowe amun ménléhu dob kruse. <sup>2</sup> Wén i fénginsaé kuwe begom, ati kégédot gome bé Rémogor i Tuluse? Aw sabaf bé kéodor gome bé kitabe tidew dob Moisese? Békén! Non gédoté kom i Rémogor i Tuluse sabaf saén bé kégélingo gome brab kéunur gome bé Fiyowe Uret fantag bé Jesuse. <sup>3</sup> Aw toow gom fo dufang? Ménwaléy gom métintu sabaf bé késarig gome bé Rémogor i Tuluse. Aw makom ké géumana kom i kétintu gome sabaf bé késarig gome bé de lowoh gom? Enda fakayén! <sup>4</sup> Aw mén singgula i de kéfiyonon énggédot gom sabaf bé kéunur gome bé Jesuse? Enda fo damén mésinggulaén. <sup>5</sup> Aw niray i Tulusey Rémogor ne dob begome brab rénigo noy de mékégaif galbék dob téngaanga kome non nodoro kom i kitabe tidew dob Moisese? Enda! Yamula sabaf bé kégélingo gome brab kéunur gome bé Fiyowe Uret fantag bé Jesuse.

<sup>6</sup> Ségiléw so bé ménrigowe dob katufua keye Abraham. Non wén i Mén sulfate Kébéréh i Tuluse mano, “I Abrahame, ménunur bé Tuluse. Atin sabaf bé kéunur ne, kénarang i Tuluse métintu.” <sup>7</sup> Mélaw fatut gésobuto kom i ni: I de étew munur bé Tuluse ségiléw bé kéunur Abrahame, beroy de ménwaléy do tintu séfu Abrahame, sani de tintu Judio. <sup>8</sup> Wén i Mén sulfate Kébéréh i Tuluse bé fétintunéy Tuluse soy de békén Judio sabaf bé késarig ruwe. Mélaw nuret i Tuluse dob Abrahamey Fiyowe Uret bé do géyah, mano, “Fénagéw dob beeme, féfiyoné kuy kéluhanay de étew dob duniyae.” <sup>9</sup> I Abrahame ménunur bé Tuluse, mélaw i beene fénfiyoy Tuluse. Atin ségiléw so bé ni, i kéluhanay de étew munur, féfiyonéy Tuluse so bero.

<sup>10</sup> Endob i de étew sémarig bé kéodoro ruwe bé kitabe tidew dob Moisese, mékukum ro. Non bang i Mén sulfate Kébéréh i Tuluse, “I étewe énda démoyuno modor bé kéluhanay de sugu dob kitabe, kukuméy Tuluse.” <sup>11</sup> Mélaw gésobuto tom bé énda i ségetew ménwaléy métintu dob adafay Tuluse sabaf bé kéodor ne bé kitabe tidew dob Moisese. Non wén soy Mén sulfate Kébéréh i Tuluse mano, “I étewe ménwaléy métintu sabaf bé kéunur ne bé Tuluse, méuyag taman sa taman.” <sup>12</sup> Endob i étewe sémarig bé kéodoro nuwe bé kitabe, békén ségetew sémarig bé Tuluse. Non wén i Mén sulfate Kébéréh i Tuluse mano, “I étewe modor sénga tékélid bé kéluhanay de sugu i kitabe tidew dob Moisese, méuyag taman sa taman.”

<sup>13</sup> Endob gétiga tom bé énda i ségétew gérigo bé nan. Gido loo, i Kristowe fénukasén betom inok énda mékukum tom bé kitabe. Non i Kristowe ménkukumén génantino no betom. Non wén i Ménssulate Kébérélh i Tuluse mano, “I étewe ménléhu bénitin dob kayéwe, ménrigo non kénukum i Tuluse.” <sup>14</sup> Atin i funa Jesuse féndayaén i kéféléhue de loo bé nan, inok i kéfiyonone fénasad i Tuluse nirayén dob Abrahame, irayén so dob de békén Judio sabaf bé Jesu Kristowe. Mélaw gédoté tom i Rémogor i Tuluse fénasadén sabaf bé kéunur tome bé Jesu Kristowe.

<sup>15</sup> Do dumo gu, ay niy ufamawe. Amuk wén i ruwo gétew ménséfagayun brab rénigo roy fasade bé késulat ruwe bé de dawét ro, énda i gékédan de taloo no géuman de. <sup>16</sup> Atin loo so bé niy, rénigoy Tuluse fasad dob Abrahame brab dob séfu ne. I Ménssulate Kébérélh i Tuluse énda ménbérélhén mano, “de séfuém” non énda médo no. Ménbérélh saén mano, “séfuém”, atin i atag i ni ségétew saén, sani Kristowe. <sup>17</sup> Atin ay niy atag i bénréh guwe ni. I Tuluse rénigo noy fasade dob Abrahame. Atin fot ratuh bra télélw folo gébélintuwa tidew béno, énggumah i kitabe tidew dob Moisese. Endob i kitabe énda gékédana noy fasade non toow fo tumanéy Tulusey fasad ne. <sup>18</sup> Non amuk iray i Tulusey de kéfiyonon sabaf bé kitabe, békénén sabaf bé fasade. Endob i toowe, niray i Tulusey de kéfiyonon dob Abrahame sabaf saén bé fasad ne.

<sup>19</sup> Atin amuk loo bé nan, ati ulane bé kitabe? Niray i kitabe inok giton i sala i étewe taman géggumah i séfu Abrahame, sani fénasad i Tuluse. I ni kitab i Tuluse, fénuitén bé de télaki mangéy dob ségétewé kefédewan sani Moisese. <sup>20</sup> Endob amun niray i Tulusey fasad ne dob Abrahame énda kailanga noy kefédewané non ségétew saén i réménigowé bé fasade, sani Tuluse.

<sup>21</sup> Aw makom ké énda géséfagayun i kitabe brab fasad i Tuluse? Kagom fégitungén de loo bé nan. Non amuk i kitabe muwit umul magufusa dob betome, fakay tom waléy métintu sabaf bé kitabe. <sup>22</sup> Endob wén i Ménssulate Kébérélh i Tuluse bé i kéluhana tome do kéilawan dob duniyae ni mékukum tom sabaf bé de tete rigoné tom. Mélaw i Tuluse ténuma noy fasad ne dob betome sabaf saén bé kéunur tome bé Jesu Kristowe. Atin féfiyoné no betom sabaf saén bé kéunur tome.

<sup>23</sup> Amun énda séna fénggétiga no betom i mantuwe aguwon mangéy dob lawayo, sani kéunure bé Jesuse, maak ménférisu tom dob kitabe. Atin énda géésut tom taman énda fénggito no betom i mantuwe aguwon. <sup>24</sup> Mélaw kitab i méguléw betom taman dob kéggumah Kristowe inok waléy tom métintu sabaf bé kéunur tome de. <sup>25</sup> Atin béléewe ni ménwaléy tomén munur bé Kristowe, mélaw i kitabe éndaén féguléwo no betom.

<sup>26</sup> Atin ménwaléy gom do nga i Tuluse sabaf bé kéunur gome bé Jesu Kristowe. <sup>27</sup> Atin ménfératis gom inok féténgténg gom i kéunur gome bé Kristowe. Mélaw ménwaléy gom loo bé Kristowe non ménwaléy gom do dumo no. <sup>28</sup> Mélaw i de Judio brab de békén Judio, ségiléw ro. Fiyon i de rifén brab de békén rifén, do lagéy brab do libun, falan ro ségiléw. I kéluhana tome do munur bé Kristowe ségiléw-giléw tom dob adafay Tuluse. <sup>29</sup> Amuk do kuyug Kristo gom, ménwaléy gom so do maak séfu Abrahame brab gédoté kom i kéluhanay fénasad i Tuluse.

#### 4

<sup>1</sup> Ufama, amuk wén i kawasa étew brab ménléhu atin wén i ségétew ngaén fénledén. I nan nga, amuk méngeuwé séna, maak sugu-suguén saén, fiyon fo ké been i gefee bé kéluhanane. <sup>2</sup> Brab wén i do sénarigoy ménélatae bohén témalima de brab mégatur de. Endob amuk dakélén i ni nga brab géggumahén dob idade bénréh i boh ne, gédoté non i kéluhanane. <sup>3</sup> Ségiléw so bé betome, amun énda séna munur tom bé Kristowe, maak do rifén tom, non bé do gétah nodoro tom i de rémogor do uléw dob duniyae ni. <sup>4</sup> Endob amun énggumahén i fatute gai, i Tuluse sénuguén i Nga ne dob duniyae ni. Atin ménwaléy kéilawan bé kéumah ne dob ségétewé libun. Tidew béno, nodoro noy kitabe

tidéw dob Moisese. <sup>5</sup> Rénigo noy ni inok fukasé no betom do étew maak do ménférisu dob kitabe inok waléy tom do nga i Tuluse.

<sup>6</sup> Atin i Tuluse sénuguén i Rémodor i Nga ne mangéy bati dob de fédéw tom. Been i émbéréhe dob de fédéw tom mano, “Abay gu Tulus”. Rénigoy Tulusey ni inok gétiga tom do ngaén so betom. <sup>7</sup> Mélaw békén tomén do rifén, yamula ménwaléy tom do nga i Tuluse. Mélaw gédoté tom i kéluhanay éntingayéne kay de ngaén.

<sup>8</sup> Bé do gétah, énda séna gélolo gom i Tuluse. Mélaw bé do no gai, rifén gom dob kéluhanay de tabaré kom do tulus, éndob békén tintu Tulus. <sup>9</sup> Endob béleewe ni, gélolo gomén i Tuluse non fénemilién begom. Mélaw sedek méuyot gom séfule dob de tafay kénéngintulus gom, énda i lantékén? Aw méuyot gomén man waléy rifén ségule dob de ni? <sup>10</sup> Sedek fégadata kom i de gai, do bélantuwa brab do téresang kélungonon brab do téresang sabaf bé kitabe? <sup>11</sup> Ménbukuu fantag bé begome non maak ménsinggula i kéluhanay de ténero gu begom.

<sup>12</sup> Ongoté ku begom do dumogu, iring gom begén, loo bé kéiring guwe begom bé kétak guwe bé kitabe tidéw dob Moisese. Atin énda séniyaw gom begén, <sup>13</sup> fiyon fo ké énggétiga kom i kédéruu kuwe bé do no do gai. Endob been i niy funa kuwe éngguret bé Fiyowe Uret dob begome bé gésunguwe. <sup>14</sup> Endob énda séniyaw gom begén taloo no ménika gom begén, fiyon fo ké ménkérégénan gom fo toow sabaf bé kédéruu kuwe. Yamula tényakuf gom begén maak ségétew télakiy Tuluse look maak begéney Jesu Kristowe. <sup>15</sup> Brab toow gom fo ménoror bé beno. Tintu gétiga ku ké amuk fakay sa damén, fiyon i de moto gom iray gom fégétabang begén. Endob sedek ménbaleng i de fédéw gom? <sup>16</sup> Aw ménsébanil gom begén sabaf bé kéuret guwe bé toowe?

<sup>17</sup> I de ségiyo étew témoiro begom bé de énda toow, fiyoy de rigoné ro dob begome, éndob énda fo fiyoy funa ruwe rémigo bé de ni. Méuyot ro de ké tagaké kom begén inok bero saén i de dumogom séloyuk. <sup>18</sup> Enda tete i késédumone amuk fiyoy funane de. Méuyotu de ké séloyuk gom bé kéluhanay étewe, békén ké begén saén. Brab amuk énda diyou dob begome, fatut wén i do ségiyo do dumogom séloyuk. <sup>19</sup> Maak do gulaané ku do nga gu begom. Ségiléw bé libune kéararan ongot-ongoté noy kéumah i nga ne, démwawéti fédéw guwe sabaf bé begome taman ségiléw i adat gome bé Kristowe. <sup>20</sup> Toowu fo méuyot damén ké diyou dob begome béleewe ni, inok séuret-ureté tom i fiyowe. Non émbukuu fo toow beni. Atin beeniy funa kuwe sémulat loo bé ni.

<sup>21</sup> I begome do méuyot modor bé kitabe, fétuntay gom i atag i kitabe. <sup>22</sup> Non ménbérélh i kitabe bé i Abrahame wén i ruwo gétew ngaén lagéy. I ségétew de ngaén bé bawag ne rifén féndawéti Agar, atin i ségétew de ngaén bé bawag ne békén rifén féndawéti Sarah.

<sup>23</sup> I kéumah i nga ne bé libune rifén ségiléw bé kéumah i kéluhanay de nga. Endob i kéumah i nga ne bé libune békén rifén, ménrigo non fénasad i Tuluse bé Abrahame fiyon fo ké toow fo lukésen i Abrahame brab bawag ne Sarah brab énda i nga ro. <sup>24</sup> I de ni do ruwo gétew libun maak binuwaya. Ay niy atag ne. Wén i ruwo gékelasi do étew, do étew riféy kitabe brab de étew békén riféy kitabe. I libune féndawéti Agar, ségiléw bé tafaye aguwon, sani kéodore bé kitabe énggédot Moisese dob tuduke Sinai. Brab i kéluhanay de ngaén, do rifén non i Agare rifén. <sup>25</sup> I riféne ni libun Agar anlung i tuduke Sinai dob Arabia, ségiléw bé de Judio dob Jerusalem non beroy de riféy kitabe tidéw dob tuduke Sinai. <sup>26</sup> Endob i bawag Abrahame féndawéti Sarah békén rifén. Maak do ngaén betom non békén riféy kitabe betom. <sup>27</sup> Non bang i Ménusulate Kébérélh i Tuluse, “I beeme libun énda énggáfégénga go, oror go! Fiyon fo ké énda ménkédawétan go bé kékumaha muwe, fatut mékes go bé kéoror me! Non fiyon fo ké téragak i bawag me beem, toow na fo médooy kaame do nga bé libune wén i bawagén.”

<sup>28</sup> Mélaw do dumogu, i begome do nga i Tuluse so sabaf bé fasad ne, ségiléw bé Isake ménumah dob Sarahe non fénasad i Tuluse bé Abrahame, fiyon fo ké lukés ron. <sup>29</sup> Atin bé beno, i nga Abrahame ménumah loo bé kéumah i de nga dob duniye ni, fénrasayén i

tuwaréy ne ménunah sabaf bé tabang i Rémogor i Tuluse. Ségiléw so bé de mérigo dob betome béléewe ni non i de riféy kitabe férasayé ro betom.<sup>30</sup> Ay niy Ménslate Kébéréh i Tuluse mano, “Féféraréyém i libune rifén brab nga ne, non i nga i riféne énda fakayén gégédot bé de languntaman iray dob nga i békéne rifén. Non i kéluhanane kay nga i békéne rifén.”<sup>31</sup> Mélaw, do dumo gu, békén tom maak do nga rifén. Yamula i betome maak do nga i békéne rifén.

## 5

<sup>1</sup> I Kristowe ténangéyén betom. Békénén do riféy kitabe betom. Non éndaén kailanga tom i modore bé kitabe. Mélaw kagom man waléy riféy kitabe ségule.

<sup>2</sup> Begénye Pablowe, mélaw fégélingo gom i béréhé kuwe ni begom. Amuk sarigo kom i kétulie begom inok méfukas gom bé de sala gom, énda fukasé Kristowe begom.<sup>3</sup> Atin géléé ku man begom ségule. I étewe fétuli inok méfukas bé de salaén, kailanga no soy modore bé kéluhanay kitabe.<sup>4</sup> I begome do sémarig bé kéodoro kome bé kitabe inok waléy gom métintu, énggésesuway gom bé Kristowe, brab énda tayakufé kom i kégédaw i Tuluse.<sup>5</sup> Endob i begeye, munur gey bé Kristowe. Mélaw sémarig gey bé Rémogor i Tuluse féwaléyé no begey do métintu sabaf bé kéunur geye.<sup>6</sup> Non amuk munur tom bé Jesu Kristowe, ulanden ké métuli tom look énda. I toowe saén mélaga i kéunur tome bé Jesuse. Atin giton i kéunur tome bé de kégédaw tom.

<sup>7</sup> Bé do gétah, tintu fo munur gom bé toowe kétoro. Ati ménanangguwite begom sésuway bé toowe kétoro?<sup>8</sup> I kéfanangguwite begom sésuway bé toowe, békén galbék i Tuluse. Non Been i téménawage begom inok munur gom de.<sup>9</sup> I tugie kétoro begom ségiléw bé fégéféruke bé fane. Non fiyon fo ké kloh saén i fégéféruke de, mélégéb dob kéluhanay fane.<sup>10</sup> Endob fiyon fo ké loo bé nan, sémarigu bé Kadnane tabanga no begom inok énda munur gom bé de ségiyo kétoro saliyu bé kagéne kétoro. Atin fantag man bé nan étew fénbukuén begom bé de tugi kétoro, gétiga ku kukuméy Tulusey nan étew.

<sup>11</sup> Do dumo gu, wén keeyén i émbéréh begom bé toroé ku soy fatut gom fétuli. Endob amuk toow i nan, sedek taman so béléewe niy kéferasay i de Judio begén? Non taman so béléewe ni, mékérít ro begén bé kétoro guwe fantag bé kéléhu Kristowe dob kruse, sani funa tome saén méfukas bé de sala tom.<sup>12</sup> I da nan do étew ménfébuku begom bé de tugi kétoro ro bé fatut gom fétuli, méuyotu de damén ké fékafun ron fo!

<sup>13</sup> Do dumo gu, fénemili i Tuluse betom inok méfukas tom dob kitabe. Endob fiyon fo ké loo bé nan, énda fatut odoro tom i de tete kétayay de lowoh tom. Yamula fatut ségédaw tom inok démoyun tabanga tom i de dumo tom munur bé Jesuse.<sup>14</sup> Non i kéluhanay de sugu dob kitabe tidéw dob Moisese géodoron so amuk rigonén i ni sébaan sugu, “Fégédaw go bé dumo muwe, loo bé kégédaw me bé kaame lowoh.”<sup>15</sup> Endob amuk démoyun gom séédél brab séfétete fédew, binasané kom i kégéngintulus gome.

<sup>16</sup> Mélaw ay niy béréhé kuwe begom: odoro kom i fémandu i Rémogor i Tuluse, atin mélaw énda odoro kom i de tete kétayay de lowoh gom.<sup>17</sup> Non i de tete kétayay de lowoh tom toow fo sébanil bé kétayay Rémogor i Tuluse. Enda fo séfagayun ro. Mélaw wén i no, énda gérigono tom i fiyowe kétaya tom rigonén.<sup>18</sup> Endob amuk odoro kom i fémandu i Rémogor i Tuluse, énda kailanga kom i modore bé kitabe tidéw dob Moisese.

<sup>19</sup> Gélolo tom i de tete kétayay de lowoh tom, sani do kébigaén, brab do toow fo tete do rigonén,<sup>20</sup> brab kégéngadaf bé de kéninontow, brab do kébéliyan brab do rémamut, brab do étew démoyun mérarék brab sétiboh, do médaléw, do sékérít, brab do arumén, brab do sébaad-baad atin do sébanil ro,<sup>21</sup> brab do mingar, brab do molon, brab do sérimbur, brab do ségiyo na tete do rigonén. Béréhé ku man begom ségule, i de ni do étew énda géahur ro dob kégéngintulus gome.

<sup>22</sup> Endob gélolo tom soy de étew modor bé fémandu i Rémogor i Tuluse. Beroy de étew gulaané roy de dumo ro, brab moror ro, brab fiyoy de fédew ro, brab témingkél ro ongot-ongot, brab mégédaw ro, brab rigoné roy fiyowe, brab gésarigon ro,<sup>23</sup> brab térifantad ro,

brab énda modor ro bé de tete kétayay de lowoh ro. Amuk rigoné tom i de ni, énda félisé tom i de sugu tidéw bé do gétah. <sup>24</sup> Atin i kéluhana tome do étew ka Jesu Kristowe, maak fénléhu tomén i de tete adat tom dob krus Jesuse. Mélaw téngak tom i tafaye adat tom brab de tete kétaya tom. <sup>25</sup> I Rémodor i Tulusey mirayane betom bé mantuwe umul, mélaw fatut odoro tom i fémandu ne. <sup>26</sup> Katom félangka-langka, taloo no séfekérit taloo no séingar.

## 6

<sup>1</sup> Do dumo gu, amuk énggétékasa kom ménsala i dumo gome munur, fatut i de begom fémanduoy Rémodor i Tuluse gélé gom inok énda tausén mésala. Endob fatut mélémak saén i kékéréd gome de. Brab ingat gom so inok énda so gésala gom. <sup>2</sup> Atin fatut sétabang gom sénga tékélid, non amuk rigoné kom i ni, modor gom bé sugu Kristowe. <sup>3</sup> Atin amuk wén i étew manok tintunén fo fiyoy adat ne éndob énda fo toowén, tugio noy kaane lowoh. <sup>4</sup> I kéluhana kome fatut susi gom i de lowoh gom. Amuk fiyoy de rigoné kom, fatut moror gom de. Endob kagom usarén i adat i dumo gome fégétémbo gom bé kagome adat. <sup>5</sup> Non i séngae ségétew étew mékukum dob adafay Tuluse sabaf bé de rénigo no. Mélaw kagom sékukum.

<sup>6</sup> I de étew ténero fantag bé Jesuse, fatut tukidé roy kéfiyono ruwe dob témore de.

<sup>7</sup> Kagom munur bé éndae toow. Enda i ségétew géfagakara noy Tuluse. Gétiga noy kéluhanane. Mélaw buluk atiy ohokéy ségétewe, been soy nan i kétewé nuwe. Atin loo so bé ni, i Tuluse irayén i fatute dob séngae ségétew étew sabaf bé rénigo nuwe. <sup>8</sup> I étewe rémigo bé tetee non odoro noy tetee kétayay lowoh ne, gédoté noy kéléhue énda i tamana no. Endob i étewe rémigo bé kétayay Rémodor i Tuluse, gédoté noy umule magufusa tidéw dob Rémodor i Tuluse. <sup>9</sup> Mélaw katom lugotén rémigo bé fiyowe. Non amuk fédayday tom bé fiyowe rigoné tom, gédoté tom moso i fiyowe baras tom tidéw dob Tuluse. <sup>10</sup> Mélaw fatut démoyun tom rémigo bé fiyowe dob kéluhanay étewe, brab labi na fo dob de dumo tom munur bé Jesuse.

<sup>11</sup> Téngténg gom i kédakél i de késulat gu, non begén i sémulat bé de ni géfuray kékéréd bé de kagén kémér. <sup>12</sup> I de étew fégésé ro begom fétuli, félangka-langka ro brab méuyot ro saén ké dayewéy de dumo ro bero kélawan. Méuyot ro fétuli begom non mégilak ro ké ferasay i de dumo ro bero Judio sabaf bé késarig ruwe bé kéléhu Kristowe. <sup>13</sup> I de étew témore bé fatut gom fétuli inok modor gom bé kitabe, i berowe énda so mon modor ro démoyun bé kitabe. Méuyot ro de ké fétuli gom inok dayewéy de dumo ro bero Judio sabaf bé kétéfétuli gome. <sup>14</sup> Endob i begéne, i kagéne saén funan fédayew-dayew i Kadna tome Jesu Kristo sabaf bé kéléhu ne dob kruse. Non éndaén rifénu dob de tete kétayan dob duniiae ni brab éndaén géfégésoy de tete kétayan begén rémigo sala, sabaf bé kéléhu Jesuse dob kruse. <sup>15</sup> Ulanden ké métuli i ségétewe étew, look énda. I toowe saén mélaga i kewaléy i adate mantu sabaf bé Kristowe. <sup>16</sup> Atin i de étew modor bé ni ténero gu, mégédaw damén i Tuluse bero brab iraya no damén bero bé métanéke fédew, loo so dob kéluhanay étew i Tuluse.

<sup>17</sup> Atin ay niy tamfaday bérédé kuwe begom dob ni sulat. Tidéw béleewe ni, fiyo damén ké éndaén i ségétew émférégénon begén. Non i de laas gu dob lowoh guwe ni, beeniy émfégitowe bé begéney tintuwe sugu-sugué Jesuse. Non i de étew sébanil bé Jesuse bénadas ro begén médoogule.

<sup>18</sup> Do dumo gu, mégédaw fo damén i Kadna tome Jesu Kristo begom kéluhanan. Amen.  
Pablo

## I Sulat Pablowe dob de Munur bé Kristowe dob Efeso

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Efeso, atin wén i do étew diyo ménwaléy ro do munur bé Jesu Kristowe sabaf bé kéuret ne. Séménulat i Pablowe dob berowe.

Amun sénulat Pablowej ni, ménférisu de néni sabaf bé kéuret ne fantag bé Kristowe. I funa Pablowe séménulat bé ni, non énggelingoo noy éndaén séodor-odor i de fédew i de munur diyo. Endob mika i Pablowe de ké énda sétiman i fédew i de kéluhanay de munur, fiyon fo ké do Judio ro look do békén Judio ro. Mélaw sénulatén i ni dob de békén Judio do munur bé Kristowe. Ténoroén bero bé fatut sétiman fédew i kéluhanay de munur bé Jesu Kristowe, non maak sébaan saén i lowoh ruwe, atin i Jesuse, Been i uléw ruwe.

<sup>1</sup> Begéney Pablowe, sani apostole sénugu Jesu Kristowe non beeniy kétayay Tuluse. Sulata ku begom do dumo gu munur bé Jesu Kristowe do bati dob Efeso, sani de énda témérén modor bé kétaya nuwe.

<sup>2</sup> I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédew.

<sup>3</sup> Toow fo fésalamat tom bé Tuluse sani Abay i Kadna tome Jesu Kristo. Non nirayén betom i kéluhanay kéfionone dob lawayo sabaf bé kéunur tome bé Kristowe. I de ni kéfionon kay de rémogor tom, békén kay de lowoh tom. <sup>4</sup> Bé do gétah, amun énda séna ménlimbag i duniye de, fénemili i Tuluse néni betom sabaf bé Kristowe inok waléy tom do métintu étew dob adafa nuwe énda i do sala tom.

<sup>5</sup> Atin non toow fo mégédaw betom, bénantakén i émféwaléye betom do ngaén sabaf bé rénigo Jesu Kristowe. Rénigo noy ni non been i niy kétaya nuwe. <sup>6</sup> Dayewé tom i Tuluse non bé fiyowe kégédawén betom bé kéray ne bé toowe fo gulaané no Ngaén, Jesu Kristo. <sup>7</sup> Non sabaf bé kéléhu Kristowe, fénukasén betom dob de sala tom, non fénsagad non i de sala tom. Toow fo mégédaw i Tuluse! <sup>8</sup> Enda gétémbunon i kégédaw i Tuluse betom! Atin fénggétiga no brab fénggésobutén betom i fantage bé Beene. <sup>9</sup> Atin fénggétiga no betom i ménbunéye bantakén bé sunguwe fantag bé kérigo nuwe betom bé Kristowe. Fénggétiga no betom non been i niy kétaya nuwe rigoné no. <sup>10</sup> Atin ay niy bénantak ne rigoné no. Amuk géumahén i fatute gai, féwaléyé noy kéluhanane dob lawayo brab dob duniye ni sétiman uléw, atin Kristowey uléw ruwe.

<sup>11</sup> I kéluhanay de rénigoy Tuluse, rénigo no non kétaya no brab bénantakén rigoné no. Atin been soy funa nuwe fénemilién betom bé énda séna ménlimbag i duniye de inok waléy tom do étewén sabaf bé kéunur tome bé Kristowe. <sup>12</sup> Mélaw i begeye do Judio do sungu munur bé Kristowe, toow fo dayewé key i barakatane Tulus.

<sup>13</sup> Ségiléw so dob begome. Non amun énggelingoo kom i toowe kétoro sani Fiyowe Uret fantag bé kfukase dob de sala, ménunur gom so bé Kristowe. Mélaw i Tuluse nirayén begom i Rémoor ne inok bati dob de fédew gom loo bé fénasad ne. Rénigo noy ni inok wén i tanda bé kfukas gome. <sup>14</sup> Atin i Rémoor i Tuluse ni, Been soy maake tising inok tintu gétiga tom tumanéy Tulusey kéluhanay fénasad ne irayén betom brab fégilidé noy kfukas ne betom dob de sala tom. Toow fo dayewé tom i barakatane Tulus!

<sup>15</sup> Mélaw amun énggelingoo kuy fantage bé kéunur gome bé Kadnane Jesus brab kégédaw gome bé kéluhanay de dumo gom munur, <sup>16</sup> énda fo témérén fésalamat dob Tuluse sabaf bé begome. Atin dasala ku begom dob Tulus. <sup>17</sup> Atin ongoté ku dob Tulus i Kadna tome Jesu Kristo sani barakatane Abay tom, bé irayén begom i Rémoor ne. Atin i Rémoor i Tuluse ni féwaléyé no begom métildtéed brab fégéétiga no begom i Tuluse inok toow fo waléy gétiga kom i Tuluse. <sup>18</sup> Ongoté ku so dob Tulus, fégéésobuté no begom inok gétiga kom i de médo do kfionon gédoté tom. Been i inam tome sabaf bé kfémili ne betom inok munur tom bé Kristowe. <sup>19</sup> Atin démasalu so inok waléy gétiga kom i kédakél i barakat i Tuluse témabang betom do munur. Atin i ni barakat i Tuluse,

<sup>20</sup> funa no énggáfétébule bé Kristowe brab énggafédiyat de mangéy mésar dob kuwono nuwe. <sup>21</sup> I Kristowe, Beene foy toowe gérotor méguléw. Toow na fo gérotor bé kéluhanay de datu, do odoron, do amu, brab do barakatan étew. Atin i dawét ne toow na fo gérotor bé kéluhanay de dawét dob de ni do gai brab dob de gai gégumah moso. <sup>22</sup> Atin i Tuluse, fénwaléyén i Kristowe méguléw bé kéluhanane inok tabangé no betom do munur de. <sup>23</sup> Atin i kéluhana tome do munur, maak betom i lowoh Kristowe brab Been i uléw tome. Enda i kulang dob Beene brab énda i kulang dob lawayo taloo no dob fantade sabaf bé Beene.

## 2

<sup>1</sup> Bé do gétah, maak do ménléhu gomén sabaf bé de sala gom. <sup>2</sup> Bé béno, ménodor gom bé de tete adat i do étew sébanil bé Tuluse. Brab ménodor gom bé Satanase sani datu i de barakatan saitan dob lawayo brab méguléw bé de étew énda modor ro bé Tuluse. <sup>3</sup> I toowe, bé gétahe, kéluhana tom ménamung bero modor bé de tete kétayay de lowoh tom brab de tete itunga tom. Atin bé béno, ségiléw tom so bé kéluhanay kéilawane, non mékérít i Tuluse betom, brab fatut mékukum tom.

<sup>4</sup> Endob i Tuluse toow fo ménuray i na nuwe betom brab toow fo mégédaw betom. <sup>5</sup> Mélaw fiyon fo ké maak ménléhu tom sabaf bé de sala tom, nirayén so betom i mantuve umul séréngan bé kékétébule ne bé Kristowe. Mélaw i funa tome saén méfukas dob de sala tom non bé kégédaw i Tuluse. <sup>6</sup> Sabaf ménwaléy tom do dumo Kristowe, maak méntébule tom séréngan de inok mamung tom so dob Beene méguléw dob lawayo. <sup>7</sup> I funa nuwe réménigo bé ni, inok féténgténgén taman sa taman i dakéle kégédawén betom bé Jesu Kristowe. <sup>8</sup> Non ménfukas tom dob de sala tom sabaf bé kégédaw i Tuluse amun ménunur tom. Ménkédan i kékukum ne betom békén sabaf bé galbék tome, yamula nirayén betom i umule magufusa sabaf saén bé kégédaw ne. <sup>9</sup> Mélaw énda géfélangka-langka tom sabaf bé kfukas tome, non énda ménfukas tom dob de sala tom sabaf bé fiyowe galbék tom. Yamula sabaf saén bé gédaw i Tuluse. <sup>10</sup> Sabaf bé kéunur tome bé Jesu Kristowe, lénimbag i Tuluse betom inok wén i mantu umul tom brab mantu adat tom. Fénwaléyén betom mantu inok rigoné tom i fiyowe galbék ténafadéyén rigoné tom.

<sup>11</sup> I de begom do békén Judio, fégétédém gom i sunguwe goho kom. I de Judio, rigoné roy adat ruwe fétuli (sani tanda i lowoh ruwe), atin fédawét ro begom do “Békén tuli”. <sup>12</sup> Bé béno, bé énda séna munur gom, ménrésuway gom bé Jesu Kristowe, brab énda mén-amung gom dob de étew fénémili i Tuluse. Brab békén kagom i fasad i Tuluse bé de étewén. Bé béno, fiyon fo ké méuyag gom dob duniiae ni, énda i inam gom brab énda gélolo gom i tintuwe Tulus. <sup>13</sup> Endob béléewe ni, munur gomén bé Jesu Kristowe funa kom ménwaléy do dumo no. Mélaw éndaén mérayu gom dob Tuluse non fénfégédét i Tuluse nén begom sabaf bé kéléhu Kristowe génantino no begom.

<sup>14</sup> Sabaf bé Kristowe, i begeye do Judio brab de begom do békén Judio, ménwaléyén sébaan i uléw tome. Mélaw éndaén sébanil tom brab ménwaléy tomén sédumon sabaf bé kéléhu Jesu Kristowe dob kruse. <sup>15</sup> Atin amun ménléhuén, fénukasén betom inok éndaén kailanga tom i modore bé de sugu i kitab i de Judio. Atin i betome do ruwo gékélasi do étew, fénwaléyén betom sébaan mantu gékélasi do étew ménodor dob Beene. Mélaw ménkédan i késébanil tome. <sup>16</sup> Atin kénda noy késékérít tome do Judio brab do békén Judio sabaf bé kéléhu ne dob kruse. Atin fénwaléyén betom ségékélasi do étew inok séfule tom méngadaf bé tintuwe Tulus. <sup>17</sup> I Kristowe ménangéy dob duniiae ni brab nuretén i Fiyowe Uret fantag bé kékéday kékérít i Tuluse. Nuretén i ni dob begeye do Judio do gédét dob Tuluse loo so dob begome do békén Judio do mérayu dob Tuluse. <sup>18</sup> Atin sabaf bé kéunur tome bé Kristowe, i betome, do Judio brab do békén Judio, fakay tom géfégédét dob Abaye Tulus sabaf bé tabang i Rémogor ne.

<sup>19</sup> Mélaw i begome do békén Judio, éndaén sésuway gom bé de étew i Tuluse. Yamula ménwaléy tom sédumon sétiman Abay sani Tuluse, sabaf bé kéunur tome bé Kristowe.

<sup>20</sup> Atin i betome do munur bé Kristowe, ségiléw tom bé sébaane lawi féntindég i Tuluse

dob sébaane dakél batéw. I Kristowe, Been i nan i maake batéw. Atin i de apostol brab de sénarigoy Tuluse muret bé kékérén ne, beroy de maak do liléy i nan lawi. <sup>21</sup> Mélaw émbagér i ni lawi sabaf bé Jesu Kristowe, brab Beeney funa tome ménwaléy lawi i Tuluse féngadafan de. <sup>22</sup> Atin i begome do békén Judio brab de kéluhana tom munur, féwaléyéy Tuluse betom sébaan lawi fébatio no bé Rémogor ne.

## 3

<sup>1</sup> Atin sabaf bé kéluhanay de ni, dasala ku begom dob Tuluse. Atin i begéne Pablo ségétew munur bé Jesu Kristowe, ménférisuwu non fénférisu ro begén amun nuret gu begom do békén Judioy fantage bé Jesuse. <sup>2</sup> Gétiga ku énggelingoo kom i kégédaw i Tuluse begén bé sénarigén dob begéney ni galbék muret dob begome fantag bé Kristowe inok méfukas gom so. <sup>3</sup> Bé do gétah, ménbunéy i bantak i Tuluse. Endob fénggétiga no begén. Sénulat gun begom i klohe fantag bé de ni. <sup>4</sup> Atin amuk gébasana kom i sulat guwe ni, gétiga kom i kégésobut guwe bé ni ménbunéy kétoro fantag bé Kristowe. <sup>5</sup> Bé do gétah, i Tuluse énda fénggétiga no dob de étew i fantage bé ni ménbunéy. Endob béléewe ni, dob kétabang i Rémogor ne, fénggétiga noy ni dob begeye do apostol brab dob de sénarigo no muret bé kékérén ne. <sup>6</sup> Atin ay niy ni ménbunéy. I begome do békén Judio, féfiyonéy Tuluse so begom loo so bé de Judio, sabaf bé kéunur gome bé Fiyowe Uret. Atin mélaw ménwaléy tom maak sétiman lowoh brab Kristowey uléwe. Mélaw waléy so kagom i de fasad iray i Tuluse bé de munur bé Jesu Kristowe.

<sup>7</sup> Atin i begéne, fénemili i Tuluse begén inok waléyé sugu-sugué no magéw mangéy muret bé Fiyowe Uret. Atin i Tuluse férigo no begén i ni galbék sabaf bé kégédaw ne begén brab sabaf bé barakat ne ménggféwaléy begén sugu-sugué no. <sup>8</sup> Begéney toowe fo gérifantad bé kéluhanay de munur bé Kristowe. Gido loo, fénfiyoy Tuluse begén bé késugu ne begén mangéy dob de békén Judio muret bé Fiyowe Uret fantag bé de toow fo fiyo do kéfiyonon gédotén sabaf bé kéunure bé Kristowe. <sup>9</sup> Brab sénuguén begén inok fefégésobut gu dob kéluhanay de étew i fantage bé kétumay Tuluse bé de bantakén. I Tuluse, sani léménimbage bé kéluhanane, bénunéyén i bantak ne bé do getah. <sup>10</sup> I funa nuwe bénunéyén i bantak ne, inok bé béléewe ni usaré no betom do munur bé Kristowe fefégétiga no dob de barakatan do odoron do méguléw dob lawayoy fantage bé de médo do kégétigay Tuluse. <sup>11</sup> I funa nuwe réménigo bé ni, non tumané noy bénantak ne bé do gétah bé énda séna ménlimbag i de éntingayén de. Atin ténuma non béléewe ni nusarén i Kadna tome Jesu Kristo. <sup>12</sup> Atin ménwaléy tom do dumo Kristowe sabaf bé kéunur tome de. Mélaw éndaén mémala tom fégédét dob Tuluse. <sup>13</sup> Mélaw, do dumo gu, ongoté ku dob begome, bé kagom tete i de fédew gom bé kérasay guwe ni bé kétabanga kuwe begom. Yamula fatut moror gom de non kéfiyono kom i funa kuwe mérasay inok féfiyonéy Tuluse begom.

<sup>14</sup> Amuk fégitungé kuy kéluhanay de rénigoy Abaye Tulus dob betome, lémingkuwédu brab démasalu dob Beene. <sup>15</sup> I kéluhanay de munur dob duniyae ni taloo no dob lawayo, ténavagén betom do étewén. <sup>16</sup> Atin ongoté ku dob Tuluse bé usaré noy dakéle barakatén fégéfebagér bé de fédew gom bé barakat i Rémogor ne. <sup>17</sup> Brab ongoté ku so bé fébatié noy Kristowe dob de fédew gom sabaf bé kéunur gome. Atin ongoté ku so bé fébagér noy de kégédaw gom, <sup>18</sup> inok i begome brab kéluhanay de dumo tom munur bé Kristowe gédoté tom i kégétigane inok gésobuto tom i kédakél i kégédaw Kristowe betom. <sup>19</sup> Hoo, méuyotu de ké gétiga kom i kégédaw ne, fiyon fo ké énda i ségétew étew tintu gésobut de fo, inok énda témerén bat i Tuluse dob de fédew gom brab énda so témerén i Tuluse mémanduon begom inok maak ménfeno gom bé tintuwe Tulus.

<sup>20</sup> Dayewé tom i Tuluse, sani témbangane betom bé barakat ne, brab toow na fo médooy gérígono nuwe bé de ongoté tom brab de fégitungé tom. <sup>21</sup> I kéluhana tome do munur brab i Jesu Kristowe, dayewé tom damén i Tuluse taman sa taman. Amen.

## 4

<sup>1</sup> Mélaw i begéne, sani ménférisuwe sabaf bé rénigo guy galbék i Kadnane, ongoté ku dob begome bé rigo gom i fiyowe loo bé adate kétayay Tuluse, non begom i de étew fénémili i Tuluse inok munur de. <sup>2</sup> Fatut démoyun gom térfantad brab métanék i adat gome brab tingkél gom. Atin fatut fégito gom i kégédaw gome bé de késétingkél gom. <sup>3</sup> Atin tintu fo ingat gom inok énda fésésuwayén i de fédew gom taloo no sébanil gom, non i Rémogor i Tuluse fénwaléyén betom sédumon brab ségiléw i de fédew tom inok énda séédél tom. <sup>4</sup> Non sébaan saén i lowohe, sani de betom do munur bé Kristowe, atin Been i uléwe. Atin sébaan saén i Rémogore mémanduon betom kéluhanan. Atin sébaan saén i inam tome sani umule magufusa sabaf bé kéfémili i Tuluse betom. <sup>5</sup> Atin sébaan saén i Kadnane sani Kristowe, brab sébaan saén i unuro tome sani Kristowe, brab Been saén i funa tome ménbautis. <sup>6</sup> Sébaan saén i Tuluse, sani Abay i kéluhanay de étew, sani Kadnay kéluhanane. Been i batie dob kéluhana tome do munur brab férigo no betom kéluhanan i kaane galbék.

<sup>7</sup> I séngae ségétew betom munur de, iraya no kéfurung loo bé kétaya Kristowe iraya no de. <sup>8</sup> Non wén i Ménsulate Kébérél i Tuluse mano, “Amun déméniyat mangéy dob lawayo, nuvitén i médoowe do férisu. Atin wén i de nirayén bé de étewén.” <sup>9</sup> Ati atag i “déméniate mangéy dob lawayo?” Ay niy atag ne: bé sunguwe ménlus mangéy dob duniyae. <sup>10</sup> Mélaw i Beene ménlus, sani Kristowe, Beene soy déméniate. Atin ménangéy dob toowe fo gérotor laway inok diyo dob kéluhanay de gonon. <sup>11</sup> Atin Beeney méniraye bé de kéfurungoy de étew. I de dumō betom, fénémilién waléy apostol. Atin i de dumō de sénarigén dob berowey murete bé kékérél ne. I de dumō de muret bé Fiyowe Uret. Atin i de dumō de, fénwaléyén do pastor. Brab i de dumō de, fénwaléyén do téromo. <sup>12</sup> Rénigo noy ni inok tafayé no betom kéluhanan dob galbék i Tuluse, inok waléy émbagér i lowoh Kristowe, sani de betom do munur de. <sup>13</sup> Mélaw waléy ségiléw i de fédew tom bé kéunur tome brab kégétiga tome bé Jesu Kristowe Nga i Tuluse. Atin waléy méeégét i kéunur tome de brab waléy géiringo tom i tintuwe fiyo adat Kristowe. <sup>14</sup> Atin amuk mérigo ni, békén tomén maak do nga, magad munur bé de séségiyo-giyo do tugi kétoro i de étew do magakar. <sup>15</sup> Yamula, i betome fatut démoyun ureté tom i toowe bé lala tome mégédaw bé de dumō tom. Atin fatut maak méruk tom inok énda i kulang dob kéunur tome brab minut tom loo bé Kristowe sani uléw tome. <sup>16</sup> Non i betome do munur bé Kristowe, maak betom i sébaane lowoh, brab Beeney uléwe. Atin i kéluhanay de réfa i lowohe toow fo fiyoy késumfat ruwe sabaf bé Kristowe. Mélaw amuk sétabang i de réfaén, fiyo brab méruk i lowohe. I atag i ni, amuk rigoné tom i de séségiyo-giyo galbék niray i Kadnane, waléy tom minut ségiléw bé Kristowe sabaf bé késégédaw tome.

<sup>17</sup> Amun begéney sénarigoy Kadnane muret, ay niy bérélhé kuwe begom: Kagomén rigonén i ségiléwe bé adat i de békén ménintulus, non énda i lanték i de itunga ro. <sup>18</sup> Brab délémon i de kégétung ro. Enda i karo bé mantuwe umul tidew dob Tuluse non énda i gétiga-tiga ro sabaf bé kétégas i de uléw ro. <sup>19</sup> Enda mémala ro fantag bé de tete adat ro. Atin odoro ro saén i de tete kétayay de lowoh ro, brab témantu ro fo rémigo bé kéluhanan de udenén klasi do tete.

<sup>20</sup> Endob i begome, amun ménunur gomén bé Kristowe, békén i nan i ténoroe begom. <sup>21</sup> Non toow fo énggelingoo kom i fantage bé Jesuse. Brab amun ménwaléy gom do kuyugén, ténoréo begom i toowe tidew dob Beene. <sup>22</sup> Mélaw tagak gom i tafaye itunga kom brab de tete adat gom brab de kétaya kom bé do gétah, non toow fo tete i de kétayay de lowoh gom témugion begom funa kom waléy mébinasa. <sup>23</sup> I de fédew gom brab de itunga kom fatut fo waléy mantu. <sup>24</sup> Fatut féwaléy gom mantuy de adat gom lénimbag i Tuluse ségiléw bé Beene. Tidew béo, giton métintu gom brab fiyo gom.

<sup>25</sup> Mélaw kagomén témugi! Fatut kéluhana kom bérélhé kom i toowe dob de dumō gom. Non i begome do munur ségiléw tom do réfa i lowoh Kristowe atin Been i uléwe.

<sup>26</sup> Atin amuk mécérit gom, kagom fédayaén de gésala gom bé kékérit gome. Atin kagom férugayén de ké mécérit gom, kagom fégumahén de témégén. <sup>27</sup> Inok énda fakayén

fanangguvité Satanase begom. <sup>28</sup> I ménakawe fatut témérén ménakaw. Atin fatut gémalbék inok gédoté noy méntintuve kéfaguyag atin inok gétabanga noy de méskinan. <sup>29</sup> Kagom émbéréh tete. Yamula bérélh gom i fiyowe dob de dumo gom sani kébéréhé gétabang bero brab géféeégét bé kéunur ruwe. Témabang gom mélaw bé de mégélingo begom bé ati kailangay de fédew ro. <sup>30</sup> Atin kagom rigonén i kéikaay Rémogor i Tuluse, sani funa nuwe tete i fédew ne. Non i Rémogor i Tuluse, Been i tanda i Tuluse émfégito bé do étew i Tuluse betom. Brab Been i maake tising émfégito bé fégilidéy Tuluse moso i kéfukas ne betom dob de sala tom. <sup>31</sup> Fatut kéda komén kéluhanan i kékérit gome brab kétete i de fédew gom bé de dumo gom. Kagom fémalanén i de dumo gom taloo no bérého kom bero tete. Brab kagomén sémiyaw. <sup>32</sup> Yamula fatut gom ségédaw brab séfésagad gom, loo bé kéfésagad i Tuluse begom sabaf bé Kristowe.

## 5

<sup>1</sup> Atin non ménwaléy gomén do nga i Tuluse toow fo gulaané no, fatut iring gom de. <sup>2</sup> Fatut démoyun gom ségédaw loo bé kégédaw Kristowe betom funa no nirayén i férénawa nuwe fénggékufkas betom. Ménwaléy maak dukah ténuak toow fo mamut, sani funay Tuluse ménswat.

<sup>3</sup> Atin non do étew i Tuluse begom, kagom arumén, taloo no bigaén gom, taloo no rémigo gom bé tete. Atin kagom séuret-uret fantag bé de ni. <sup>4</sup> Atin kagom so labitén i de tete do mékérésik brab do dufang do késébéréh. Yamula fatut usaré kom i de ba gom fésalamat dob Tuluse. <sup>5</sup> Non béréhé ku begom i toowe, i de étew do bigaén taloo no do rémigo tete, énda géahur ro dob kégéguléw Kristowe brab Tuluse. Atin énda so géahur i de étew do arumén non i kéaruméne ségiléw bé kégéngadafé kéninontow.

<sup>6</sup> Kagom munur bé de tugién uret énda i lantékén. Non wén i de étew témoro bé ulanden ké tete i de rigonén. Endob been i de niy funay Tuluse mékérít brab kukumé noy de étew énda modor ro bé de suguéen. <sup>7</sup> Mélaw kagom séloyuk bé de ni do tete étew. <sup>8</sup> Bé do gétah, rénigo gom i de tete brab maak ménagéw gom dob délémone. Endob amun ménwaléy gomén munur bé Kadnane, magéw gom dob géfekaya. Mélaw rigo gom i fiyowe loo bé fatute rigonéy de étew i Kadnane. <sup>9</sup> Non amuk magéw gom dob géfekaya, gérigono kom i fatute brab métintuve brab toowe. <sup>10</sup> Féganad gom i adate émfésuwat bé Kadnane. <sup>11</sup> I de étew bati séna dob délémone, sani de énda séna gétiga roy Kadnane, kagom mamung bé de tete rigoné ro énda i lantékén. Yamula fégito gom i fiyowe adat inok témérén ro damén bé de tete rigoné ro. <sup>12</sup> I de ménbunéy do tete fo rigoné ro, toow fo mékémala fiyon fo ké labitén saén. <sup>13</sup> Endob amuk rémendaw i Soloe, giton tete foy de ni do ménbunéy. <sup>14</sup> Atin mélaw waléy ro bati dob géfekaya. Non wén i binuwayae fantag bé de tete étew mano, “I beeme fidong, tékénal go, brab tébule go! Atin i Kristowe rémendaw dob beeme.”

<sup>15</sup> Mélaw fétuntay gom i de adat gom. Kagom iringén i rigonéy de étew énda gétiga roy fatute. Yamula iring gom i rigonéy de étew toow fo gétigan. <sup>16</sup> Toow fo tete i de rigonén dob de ni do gai. Mélaw amuk wén i fiyo gérigono kom, fagayas gom rigo. <sup>17</sup> Mélaw kagom rémigo kédufangan. Yamula fétuntay gom i kétayay Tuluse, inok gétiga kom.

<sup>18</sup> Atin kagom molon bé arake funa kom mébinasa. Yamula fatut maak méféno gom bé Rémogor i Tuluse. <sup>19</sup> Atin amuk séuret-uret gom, sébéréh gom bé de kanta tidew dob Ménsulate Kébéréh i Tuluse. Brab kanta gom i de kanta démayéw bé Kadnane loo bé kéfemandu i Rémogor i Tuluse. Atin fatut kémanta gom dob Tuluse bé de fédew gom. <sup>20</sup> Fatut fésalamat gom bé Abaye Tulus sénga tékélid sabaf bé kéluhanay de kéfiyonon nirayén dob begome. Atin labit gom i dawét i Kadna tome Jesu Kristo ké fésalamat gom.

*Fantag bé de sébawag*

<sup>21</sup> Fatut térifantad gom brab sébasa gom inok giton i kébasana kome bé Kristowe.

<sup>22</sup> I begome do libun bawagan, fatut odoro kom i sugu i bawag gome, ségiléw bé kéodoro kome bé de sugu i Kadnane. <sup>23</sup> Non i lagéye, beeney uléw i bawag ne ségiléw bé Kristowey uléw i de munur. Non betom i maake lowohén brab Been i uléwe sabaf bé

kéfukas ne betom. <sup>24</sup> Mélaw i de libun do bawagan, fatut odoro roy de sugu i de bawag ro loo bé kéodoro tome do munur bé de sugu Kristo.

<sup>25</sup> Atin i begome do lagéy bawagan, fatut mégédaw gom bé de bawag gom loo bé kégédaw Kristowe betom do munur de. Gétiga tom i kégédaw ne betom non nirayén i férénawa nuwe bé kéfukas ne betom. <sup>26</sup> Rénigo noy ni inok waléy tom malinis dob adafay Tuluse, sabaf bé kéfábautis tome dob wayége brab kéodoro tome bé kékérén ne. <sup>27</sup> Rénigo noy ni inok i kéluhanay de munur maak bawag Kristowe, uwitén dob adafa nuwe toow fo malinis, brab métintu énda i salaén. Féwaléyé no betom fiyo inok gétanggafa no betom. <sup>28</sup> Fatut i de lagéy mégédaw ro bé de bawag ro loo bé kégédaw ruwe bé karowe lowoh. I lagéye mégédaw bé bawag ne mégédaw so bé lowoh ne, non ménwaléy ro maak sétiman lowoh. <sup>29</sup> Non énda i étew ikaa noy kaane lowoh. Yamula féamaé no brab talimaé no, ségiléw bé kétalima Kristowe betom do munur de. <sup>30</sup> Non betom i de réfa i lowoh ne. Brab Beeney uléwe. <sup>31</sup> Non wén i Ménslate Kékérén i Tuluse mano, “Been i niy funay lagéye témagak bé boh ne brab idéng ne inok mawag. Atin i ni ruwo gétew étew waléy sébaan i lowoh ruwe.” <sup>32</sup> Been i niy sébaane fo dakél toow fénggétigay Tuluse betom dob Ménslate Kékérén. Atin gésobuto kuy atag i ni fantag bé Kristowe brab de betom do munur de. <sup>33</sup> Gido loo, i atag ne fantag so bé késébawage. Non i séngae lagéy fatut mégédaw bé bawag ne. Brab i séngae libun fatut basana noy bawag ne.

## 6

*Fantag bé de nga brab de lukés ro*

<sup>1</sup> Atin i begome do nga, fatut odoro kom i sugu i de lukés gom, non been i nan i fatute rigonéy de munur bé Kadnane. <sup>2</sup> Wén i sugue dob kitabe mano, “Basana moy boh me brab idéng me.” Been i niy sunguwe sugu wén i fasade, <sup>3</sup> mano, “Amuk basana moy de lukésém, féfiyoné ku beem brab méraru go dob duniyae ni.”

<sup>4</sup> Atin i begome do boh brab do idéng, amuk sugué kom i de nga gom, kagom fékéritén bero. Yamula fitit gom bero brab féginau gom bero dob kétoro i Kadnane.

<sup>5</sup> Atin i begome do rifén, fatut odoro kom i sugu i de amu gom, brab fatut basana kom bero brab mégilak gom bero. Rigo gom i ni tidéw dob fiyowe fédéw gom maak odoro kom i de sugu Kristo. <sup>6</sup> Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom, rigo gom i kétayay Tuluse maak begom i de rifé Kristo. <sup>7</sup> Atin fatut moror gom ké gémalbék gom, maak Kadnan i galbéko kome, békén saén kéilawan. <sup>8</sup> Atin fégétédém gom i ni, i Kadnane barasa noy séngae ségétew étew, fiyon fo ké rifén taloo no békén, sabaf bé fiyowe rénigo no.

<sup>9</sup> Atin i begome do amu, fatut féfiyo gom i kérigo gome bé de rifé kom. Kagom fégilakén bero bé de tete kékérén gom. Fégétédém gom i ni, i begome brab de rifé kom ségiléw gom so falan riféy Tuluse dob lawayo, brab énda i isu ramigo no.

*I de kulangén iray i Tuluse*

<sup>10</sup> Do dumo gu, ay niy tamfaday bérhé kuwe begom dob ni sulat. Fébagér gom dob barakat i Kadnane inok émbagér i kélunur gome. <sup>11</sup> Usar gom i kéluhanay de kulangén niray i Tuluse begom inok géatuh gom bé Satanase brab de tete akarén. <sup>12</sup> Non békén do kéilawan i dumo tome sétiboh. Yamula sétiboh tom bé de saitan brab do tete odoron dob délémone ni duniya brab dob lawayo. <sup>13</sup> Mélaw béléewe ni gamak gom i de kulangén tidéw dob Tuluse inok amuk gérumah i tete gai dunsukoy Satanase begom, géatuh gom de. Tidéw bénou, amuk gilid i késétibohe, témanban gom.

<sup>14</sup> Mélaw ingat gom. Bérhé gom i toowe, Been i niy maake légét gom kay sundalowe. Atin rigo gom i métintuwe. Been i niy maake futow fégékélung gom bé de kuméng gom.

<sup>15</sup> Atin uret gom démoyun i Fiyowe Uret fantag bé kétanéke tidéw dob Kristowe. Been i niy maake safatos gom kay sundalowe. <sup>16</sup> Atin féginugut gom bé Kadnane sénga tékélid. Been i nan i maake kélung gom. Mélaw énda guratén gom bé de mérino séléb fégéfana

Satanase begom. <sup>17</sup> Tayakuf gom i kéfukas i Tuluse begom dob de sala gom. Non been i niy maake futow sayaf fégétéléb bé de uléw gom. Atin usar gom i kébérén i Tuluse, non been i niy maake sundang gom tidéw dob Rémogor i Tuluse. <sup>18</sup> Dasal gom sénga tékélid ongot gom tabang dob Tuluse. Atin fédaya gom fédasaléy Rémogor i Tuluse begom. Fatut mingat gom sénga tékélid brab dasala kom soy de dumo gom munur inok tabangay Tuluse so bero. <sup>19</sup> Atin dasala kom so begén inok fémanduoy Tuluse begén muret bé kébérén ne, brab inok énda mégilaku émfégétigan bé de Fiyo Uret ménbunéy bé do géyah. <sup>20</sup> Atin sabaf bé Fiyowe ni Uret, begén i ségétéwe sénarigon magéw mangéy muret. Gido loo, béleewe ni ay niwu dob férisunone sabaf bé kéuret guwe. Mélaw dasalanu inok émbarawu muret bé Fiyowe Uret loo bé fatute.

<sup>21</sup> I Tikikowe, sani kégédawa tome dumo tom munur brab gésarigone sugu-suguéy Kadnane rémigo bé galbék ne, beeney murete begom bé goho kuwe ni dini inok gétiga kom i ati rigoné kuwe. <sup>22</sup> Been i niy funa kuwe de sémugu mangéy dob begome inok ureté noy fantage bé de goho key dini brab inok féfiyoné noy de fédéw gom.

<sup>23</sup> I Abaye Tulus brab Kadnane Jesu Kristo, mégédaw ro damén bé kéluhana kome do munur brab iray ro damén begom i métanéke fédéw brab émfééégét bé de kénur gom. <sup>24</sup> Atin mégédaw damén i Tuluse bé kéluhanay de énda témérén féimu bé Kadna tome Jesu Kristo taman sa taman.

Pablo

## I Sulat Pablowe dob de Munur bé Kristowe dob Filipos

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Filipos atin wén i de étew diyo ménwaléy ro do munur bé Jesuse sabaf bé kéuret ne. Séménulat i Pablowe dob berowe.

Amun sénulat Pablowej ni, ménférисunén sabaf bé kéuret ne fantag bé Kristowe. I de munur diyo bati dob Filipos, amun énggelingoo ro ménférисuy Pablowe, sénugu roy ségétéwe bero mangéy bati sétifon bé Pablowe dob férисunone inok tabanga no brab fagifaté no. Ménféwit ro so kurta fégébayad bé fégéfaguyag Pablowe amun ménférisu. Mélaw sénulat Pablowej ni sulat émfésalamat dob berowe sabaf bé tabang ruwe de.

Fiyon fo ké ménférисuy Pablowe, toow fo méoror sabaf bé kéunur ne bé Jesu Kristowe. Séménulat soy Pablowe dob de munur do bati dob Filipos inok énda témérén ro munur, fiyon fo ké ati kérasaye gégumah dob berowe. Ténoro Pablowe bero bé fatut ro méoror sabaf bé Kristowe.

<sup>1</sup> I begeye Pablo brab Timoteo do sugu-sugué Jesu Kristowe. Sulata key begom do munur bé Jesu Kristowe dob Filipos brab dob de odoro kom do munur brab do témabang.

<sup>2</sup> I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédew.

<sup>3</sup> Fésalamatu dob Tulus tome sénga gétédémo ku begom. <sup>4</sup> Atin sénga dasala ku begom kéluhanan, toowu de fo moror, <sup>5</sup> non bé kétabanga kome begén bé galbék guwe muret bé Fiyowe Uret tidew fanay kéunur gom taman so béleewe ni. <sup>6</sup> Mélaw gétiga kuy ni: I fiyowe rigonén féngganay i Tuluse dob begome, fétausé no taman dob gaiwe séfule i Jesu Kristowe moso. <sup>7</sup> Toow fo gulaané ku begom kéluhanan. Fatut gulaané ku begom non tétabanga kom begén bé galbék guwe. Fiyon fo ké béleewe ni diniwu dob férисunone ni loo so bé do gétah bé kétoro guwe brab késumbul guwe fantag bé Fiyowe Uret, tétabanga kom so begén bé ni galbék niray i Tuluse non mégédaw betom. <sup>8</sup> I Tuluse gétiga no toow foy ni béréhé ku begom. Toowu fo mégundoy begom brab féimué ku fo begom loo bé kéimu Jesu Kristowe betom.

<sup>9</sup> Atin démasalu dob Tuluse bé minut dakél i késégédaw gome brab minut so dakél i kégétiga kome bé toowe brab fatute, <sup>10</sup> inok géfémilio kom i tintuwe fiyo. Mélaw énda i sala gom fégétibo begom dob gaiwe séfule i Kristowe moso. <sup>11</sup> Atin gérigo gom bé médoowe fiyo sabaf bé kéféléy Kristowe begom métintu, inok médayéw brab basanay Tuluse.

<sup>12</sup> Do dumo gu, méuyotu de ké gétiga kom i ni: I kéluhanay de ménrigo dob begéne, been i da nan i téménabange bé kélégéb i Fiyowe Uret. <sup>13</sup> Non i kéluhanay de sundalo mantay dob lawi i datue ni brab kéluhanay de étew so dini, gétiga roy funa kuwe ménférisu dini non begén i sugu-sugué Kristowe. <sup>14</sup> Atin sabaf so bé kérésisu guwe, i kédoonoy de dumo gu munur ménwaléy émbagér i késarig ruwe bé Kadnane. Mélaw méninut ro émbaraw brab éndaén mégilak ro muret bé kékéréh i Tuluse.

<sup>15</sup> I de dumo de ureté roy fantage bé Kristowe non médaléw ro begén brab méuyot ro de ké gélawana roy de rénigo gu. Endob i de dumo de, fiyoy funa ruwe muret fantag bé Kristowe. <sup>16</sup> Ureté roy fantage bé Kristowe sabaf bé kégédaw ruwe non gétiga ro fénemili i Tuluse begén muret brab sémumbulon bé de étew sébanil bé Fiyowe Uret. <sup>17</sup> Endob i de dumo de, énda fo fiyoy funa ruwe muret bé Fiyowe Uret. Non muret ro sabaf saén bé kéuyot ruwe waléy émbantug. Atin marok géumana roy kékérégéna kuwe dob férissunone ni.

<sup>18</sup> Endob ulanden! Mororu sabaf bé kéuret ruwe fantag bé Kristowe. Fiyon fo ké tete i funa ruwe muret bé Fiyowe Uret loo ké fiyo, i toowe fo mélaga ké ureténi i Kristowe. <sup>19</sup> Atin énda témérénu moror, non gétiga ku gégumah soy gaiwe métangéyú dob férissunone ni, sabaf bé de kédasal gom brab dob tabang i Rémogor Jesu Kristowe.

<sup>20</sup> Atin i toowe fo kétaya ku brab wén i inam gu bé gétausu rémigo bé kétaya nuwe inok énda i funa ku mémala. Atin démoyun damén émbarawu fo toow inok i kéluhanay de rigoné ku, been i de niy funa Kristowe médayéw. Mélaw fiyon fo ké méuyagu taloo no méléhuu, médayéw i Kristowe sabaf bé kéluhanay de rigoné ku. <sup>21</sup> I karang guwe de, i funa kuwe méuyag inok médayéw i Kristowe. Endob amuk méléhuu, toow na fo fiyo, non diyou dob lawayo. <sup>22</sup> Mélaw énda gétiga kuy isuwe fémilié ku. Non amuk méuyagu, gétausu rémigo bé fiyowe galbékén. <sup>23</sup> Endob méuyotu méléhu inok gétékédanun dob duniyae ni brab inok géséloyukun bé Kristowe dob lawayo, inok toow na fo fiyoy kébati guwe. <sup>24</sup> Endob toow na fo fiyo ké méuyagu dini inok gétaus i kétabanga kuwe begom. <sup>25</sup> Atin sabaf bé ni, gétiga ku tausu séna méuyag. Atin batiu dob begome kéluhanan inok gétabanga ku begom émféégét bé kéunur gome bé Kadnane brab émfétaus bé kéoror gome sabaf bé kéunur gome, <sup>26</sup> inok amuk géséfuleu mangéy dob begome, méumanan i funa kome démayéw bé Jesu Kristowe sabaf bé begéne.

<sup>27</sup> Endob fiyon fo ké ati mérigowe dob begéne, fatut féfiyo gom i de adat gom loo bé kétoro i Fiyowe Uret fantag bé Kristowe, inok fiyon fo ké énda géangéyu diyaan, gétiga ku énda émbaleng i de fédew gom. Yamula gélingoo ku bé sébaan i de fédew gom brab méuyot gom gémalbék bé galbék i Tuluse inok waléy médooy étewe munur bé Fiyowe Uret fantag bé Jesu Kristowe. <sup>28</sup> Atin kagom mégilak bé de sébanil begom. Non amuk énda mégilak gom bero, gétiga ro niray i Tuluse begom i umule magufusa, atin gétiga ro so kukuméy Tuluse bero. <sup>29</sup> Non mégédaw i Tuluse begom, nirayén begom i kuwagibe munur bé Kristowe loo soy kérasaye sabaf bé Kristowe. <sup>30</sup> Non béleewe ni kéluhana tomén mérasay. Enggito gomén i kérasay guwe sabaf bé ni galbék bé do gétah, brab énggelingoo komén i fantage bé kérasay guwe béleewe ni. Atin béleewe ni, mérasay gom so loo bé ni.

## 2

*Fantag bé Kristowe*

<sup>1</sup> Do dumo gu, ménwaléy émbagér i de fédew gom sabaf bé kéunur gome bé Kristowe. Atin ménwaléy fiyoy de fédew gom sabaf bé kégédaw Kristowe. Atin ménwaléy gom sédumon sabaf bé Rémogor i Tuluse. Atin ménwaléy gom ségédaw brab méséuray na. <sup>2</sup> Mélaw, sabaf bé de ni, ongoté ku dob begome, fésébaa kom saén i de fédew gom brab de itunga kom, brab fésébaa kom saén i de kétaya kom, brab fébagér gom i késégédaw gome. Toowu fo moror begom amuk rigoné kom i de ni. <sup>3</sup> Atin kagom rémigo bé de étingayén non bé kéuyot gome saén émbantug look inok waléy gom gérotor. Yamula téritantad gom brab kagom fégitungén de ké toow gom na fo gérotor bé de dumo gom. <sup>4</sup> Atin kagom saén fégitungén i fantage bé de kagom do kailangan. Yamula fégitung gom soy ati kétabanga kome bé de dumo gom. <sup>5</sup> Fatut iring gom i adat Jesu Kristowe brab itunga nuwe. <sup>6</sup> Non fiyon fo ké ségiléw bé Tulusey Kristowe, énda fégitungé no fatut témulama rémeféng bé Tuluse. <sup>7</sup> Yamula tétagakén i kégérotor ne brab méntéféwaléy ségétew sugu-suguén bé kéumah ne dob kéilawane. <sup>8</sup> Atin amun ménwaléyén ségétew kéilawan, toow fo méntéritantad bé kéodoro nuwe bé de sugu i Abay ne Tulus taman so bé kéféléhue de dob kruso. <sup>9</sup> Atin sabaf bé ni, toow fo fénwaléy i Tuluse gérotor brab nirayén dey dawéte toow na fo gérotor bé kéluhanay de ségiyo dawét, <sup>10</sup> inok amuk labitén i dawét Jesuse, i kéluhanay de étew dob lawayo, brab dob duniyae ni, loo soy dob fantad i duniyae, lémingkuwéd ro. <sup>11</sup> Atin kéluhana ro fayagé roy Jesu Kristowe, Been i Kadnane, inok médayéw i Abaye Tulus.

<sup>12</sup> Mélaw do dumo gu, odor gom bé de sugu gu. Amun diyou séna dob begome, toow fo nodoro kom i de sugu gu. Atin béleewe amun éndaén diyou dob begome, fatut na fo odoro kom i kéluhanay de sugu gu. Mélaw fédayday gom i kégalbék gome dob kéodoro kome bé Tuluse brab dob kégadat kome de inok méfukas gom dob kékukume énda

i tamana no. <sup>13</sup> Non démoyun i Tuluse diyo dob begome brab tabanga no begom inok kétaya kom brab gérigono kom i késuwata nuwe.

<sup>14</sup> Rigo gom i kéluhanay kétaya nuwe, kagom riklamo de taloo no séédél gom de, <sup>15</sup> inok waléy gom do métintu étew nga i Tuluse brab énda i do sala gom fégétébo i de étew begom fiyon fo ké sélawék gom bé de tete étew bati dob déléfone ni duniya. Ségiléw gom bé de giton dob lawayo, <sup>16</sup> non ureté kom dob berowey fantage bé mantuwe umul. Atin amuk rigoné kom i ni, toowu fo moror sabaf bé begome dob gaiwe moso séfule i Kristowe. Non giton énda ménsinggula i kéluhanay rénigo guwe bé kétabang guwe begom inok munur gom.

<sup>17</sup> Iray guy kéuyag guwe keeyén maak tulak dob Tuluse. Amuk lee, méororu séréngan begom, atin maak umanén dob kagome tulak iray gom dob Tuluse sénga fuweh bé kéunur gome de. <sup>18</sup> Atin loo soy begome, fatut so moror gom séréngan begén amuk mérigo ni.

<sup>19</sup> Sémarigu bé Kadnane Jesus bé fakay séko sugué kuy Timoteowe mangéy dob begome. Atin amuk séfule mélaw mangéy dini, gébérého no begén i fantage bé begome funay fédéw guwe waléy fiyo. <sup>20</sup> Been saén i dumo guwe dini gulaané no so begom. <sup>21</sup> I de ségiyo étew, fégitungé ro saén i fantage bé de karo kéfyonon. Enda fégitungé roy fantage bé galbék Jesu Kristowe. <sup>22</sup> Endob i Timoteowe, gétiga kom toow fo fiyoy adat ne. Ténabangén begén lémégéb bé Fiyowe Uret loo bé kétabang i ségétéwe nga bé abay ne gémalbék. <sup>23</sup> Mélaw, méuyotu de sémugu mangéy diyaan amuk toowén fo gétiga kuy mérigowe dob begéne. <sup>24</sup> Atin sémarigu so dob Kadnane bé énda mérugayén tidéw béni, i begéne so géangéyu so dob begome.

<sup>25</sup> Atin gékaranga ku kailangan fo sugué ku séfule mangéy dob begomey dumo tome Epafrodit. Beeney dumo guwe géménalbék muret bé Fiyowe Uret fiyon fo ké wén i do sébanil begey. Beeney sénugu gome mangéy dob begéne inok tabanga no begén, atin béléewe ni féséfuleé kun mangéy dob begome. <sup>26</sup> Toowén fo mégundoy begom kéluhanan brab mélidu i na nuwe non énggelingoo kom i kédéruu nuwe. <sup>27</sup> Toow fo ménfasang démeruun, gédétén fo méléhu. Endob toow fo ménuray i nay Tuluse de loo soy begéne. Non amuk ménléhu de, méuman i kétete i fédéw guwe de. <sup>28</sup> Mélaw toow fo méuyotu de ké géuleén mangéy diyaan non gétiga ku toow gom de fo moror ké géségito gom, brab éndaén mélaw i funa ku émbuku. <sup>29</sup> Mélaw fatut toow gom de fo moror témayakuf non beeney dumo tome munur bé Kadnane. Atin fatut basana kom loo soy de étew loo bé beene ni. <sup>30</sup> Non géfédéw fo méléhu bé kégalbék nuwe bé Kristowe. Nirayén i férénawa nuwe bé kétabanga nuwe begén bé galbék guwe énda gétabang gom de.

### 3

<sup>1</sup> Mélaw, do dumo gu, ay niy de tamfaday de bérhéhé ku begom dob sulat guwe ni. Oror gom sabaf bé Kadnane! Atin ulanden ké séguleé ku man sulatén i fantage bé de sénulat gun begom bé do géyah. Non amuk séguleé ku man bérhéhen i de ni, mas kloh i kaid gome. <sup>2</sup> Ingata kom i de étew tete i de rigoné ro. Fégésé ro begom mémali bé de lowoh gom non sénugu i Tuluse kun. <sup>3</sup> Endob i toowe, betomey de tintu étew i Tuluse, békén i berowe. Non maak ténuli i Tuluse betom sabaf bé késarig tome bé Jesuse. Non féngadafé tom i Tuluse dob Rémogor ne brab moror tom sabaf bé kéunur tome bé Jesu Kristowe. Enda sémarig tom bé de adat loo bé kétulie loo bé de rigoné ro. <sup>4</sup> Endob amuk fatut i késarige bé de adat loo bé nan, fakayu de so gésarig. Atin amuk wén i étew gékaranga no toow fo nodoro noy adat i de kéilawan brab gésarig de, labi na foy begéne. <sup>5</sup> Non amun ménségfadiyan sénay kéumah guwe de, méntulun. Begén i ségétéwe séfu Benjamene, séfu i katufua keye Israel. Tintuwu fo Judio. Atin fantag man bé kitab i de Judio, toow fo nodoro ku non ségétéwu Fariseo. <sup>6</sup> Atin non toow fo odoro kuy de adat i de Judio, fénrasay gu foy de munur bé Jesuse. Atin fantag so bé kéodore bé kitabe inok i étew waléy métintu, énda fo énggafélico ku de. <sup>7</sup> Bé do géyah, makuk i kéluhanay de ni méumanan i kétintu guwe de. Endob béléewe ni gétiga ku fo énda i do lantékén. Atin

ténagak guy de ni atin gésarigu bé Kristowe. <sup>8</sup> Atin békén saén i de niy de téngak gu, non téngak guy kéluhanane inok gédoté kuy towe na fo fiyo, sani kégétiga kuwe bé Kadna kuwe Jesu Kristo. Sabaf bé Kristowe téngak guy kéluhanay de éntingayén. I kéfégitung guwe de, maak do réhuk saén do nibér gu inok gédoté kuy Kristowe, <sup>9</sup> brab waléyu dumo no. Brab inok waléyu métintu dob adafay Tuluse sabaf bé kéunur guwe bé Kristowe. Enda waléyu métintu sabaf bé kéodoro kuwe bé kitabe. Mélaw i funa kuwe waléy métintu békén tidéw dob lowoh guwe, yamula tidéw dob Tuluse sabaf bé kéunur guwe bé Kristowe. <sup>10</sup> I towe fo kéuyoto ku béleewe ni ké gétiga ku fo toow i Kristowe brab barakat ne sani Kaane barakat sabaf bé kétébule ne. Atin méuyotu de so ké géamungu bé de kérasayén loo bé kéiray ne bé férénawa nuwe dob kruse, <sup>11</sup> inok i begéne so gétébuleu so moso.

<sup>12</sup> Enda béréhé kuy de ni ké ménwaléyun fo métintu loo bé ni taloo no éndaén foy sala gu. Békén! Endob fédaydayu brab télamané ku inok mérigo moso i kéluhanay de ni, non been i niy funa Kristowe fénwaléyén begén kaan. <sup>13</sup> Do dumo gu, gétiga ku fo toow, énda séna mémentuman i de ni dob begéne. Endob i sébaane télamané ku rigonén, sani lémifote bé de rénigo gu bé do gétah inok géfégitungo kuy de gérigono ku moso. <sup>14</sup> I begéne ségiléwu bé ségétéwe sékuya. Fééntangu léméntu taman dob tamfaday sékuyaane inok témabanu brab gédoté kuy baras guwe, sani kébati guwe dob lawayo sabaf bé kétawag i Tuluse begén sabaf bé Jesu Kristowe.

<sup>15</sup> Loo bé nan i fatute fégitungéy kéluhanay de méégét munur. Endob amuk wén i dumo begom énda magayun no bé begéne, i Tuluse fefégétiga no begom i katabuwane.

<sup>16</sup> Endob fatut odoro tom i kétoroe nodoro tomén taman so béleewe ni.

<sup>17</sup> Atin do dumo gu, fédayday gom iring begén, brab iring gom i de étew ségiléw i adat ruwe bé begeye. <sup>18</sup> Médoonén gule bénréh guy ni bé do gétah. Atin béleewe ni kéréwo kuy kékéréh guwe de man ségule dob begome. Médooy de étew toow fo tete i de adat ro. Brab sabaf bé de ni tete rigoné ro, giton dob niy sébanil ro bé kéurete fantag bé kéléhu Kristowe dob kruse. <sup>19</sup> Atin géangéy ro moso dob emfernowo, non i maake tulus ro sani de tete kétayay de lowoh ro. Atin félangka-langka ro bé de tete rigoné ro funa ro damén fatut mémala. Atin fégitungé ro saén i fantage bé de éntingayén dob duniyae ni. <sup>20</sup> Endob i betome, dob lawayo diyo i tintuwe ingéd tom. Atin ongot-ongoté tom i mémukase betom ké séfuleén mangéy dini tidéw dob lawayo, sani Kadna tome Jesu Kristo. <sup>21</sup> Amuk gégumahén i nan gai, fégaliné noy de ni gérifantad lowoh tom brab rigoné no loo bé kaane barakatan lowoh. Atin rigoné noy ni dob barakat ne sani barakat ne fégéféguléwén bé kéluhanay éntingayéne.

#### 4

<sup>1</sup> Mélaw do dumo gu, fédayday gom i késarig gome bé Kadnane brab odor gom bé de suguéen. Toow fo gulaané ku begom brab mégundoyu fo begom. Mororu fo sabaf bé begome, brab géfédawéy-dayéwu fo sabaf bé begome.

<sup>2</sup> Atin i begome Eudia brab Sintiki, ongoté ku dob begome, séfagayun gomén non i begome sédumon sabaf bé Kadnane. <sup>3</sup> Atin i beeme so, sani tintuwe dumo gu gémalbék, ongoté ku dob beeme tabanga moy de ni libun inok géséfagayun ro. Non mégéror ro téménabangan begén bé galbéke lémégéb bé Fiyowe Uret, bero ro Klemente brab de ségiyo dumo gu gémalbék. I kéluhanay de dawét ro ménslatén dob libroy Tuluse sani listanane bé de dawét i de étew gégedot bé umule magufusa.

<sup>4</sup> Oror gom sénga tékélid sabaf bé Kadnane. Séguleé ku man béréhén: Oror gom!

<sup>5</sup> Atin fatut ségdaw gom non gédétén i késéfule i Kadnane. <sup>6</sup> Atin kagom émbuku. Yamula dasal gom dob Tuluse brab ongot gom i de kailanga kom brab fatut so fésalamat gom dob Beene ké mongot gom. <sup>7</sup> Atin i kétanéke tidéw dob Tuluse, diyagané noy de fédew gom sabaf bé kewaléy gome do dumo Jesu Kristowe inok énda émbuku gom. Toow fo fiyoy kétanéke tidéw dob Tuluse, mélaw énda gésobutoy de étew de.

<sup>8</sup> Atin do dumo gu, umana kuy de ni sulate ku bé ni sa: Fégitung gom i de éntingayén do fiyo, brab toow, brab métintu, brab malinis. I de ni éntingayén funay de étew médayéw brab mébasanan amuk rigoné ro. <sup>9</sup> Atin rigo gom i de ténero gu begom brab de énggito gom rénigo gu. Atin mélaw diyo dob begomey Tuluse, sani miraye bé kétanéke dob betome.

<sup>10</sup> Toow fo dakél i kéroror guwe brab kédayéw guwe bé Kadnane non fénggito gom man i kégédaw gome begén. Ménrugayén énda fénggito gom de fiyon fo ké méuyot gom de émfégito, énda fakayén. <sup>11</sup> Békén béréhé kuy ni sabaf bé wén i kulang bé de kailanga ku. Non téneroén begén i ni, bé fiyon fo ké atiy goho kuwe, fatut fo kasukudanu. <sup>12</sup> Enggéagéwo kuy mérasaye kéfaguyag loo soy gaba-gabawe kéfaguyag. Atin téneroén begén bé fatutu kasukudan sénga tékélid dob séngae gonon, fiyon fo ké mélawayafu taloo no bésoru, fiyon fo ké mérasay i kéfaguyag guwe taloo no gaba-gaba. <sup>13</sup> Gérigono kuy kéluhanane sabaf bé tabang Kristowe émfébagér begén.

<sup>14</sup> Endob toow fo fiyoy rénigo gome dob begéne, non té nabanga kom begén dob gaiwe ménkérégénanu. <sup>15</sup> I begome batí dob Filipos, gétiga kom fo toow bé begom saén i de munur téménabangan begén amun té nagak guy gono kome dob Masedonia dob gaiwe mantu séna nuret guy Fiyowe Uret. Enda i ségiyo do munur ménamung begom mirayan begén kurta. <sup>16</sup> Atin amun diyou séna dob Tesalonika, médoó gule fén-uwito kom begén tabang. <sup>17</sup> Enda béréhé kuy ni ké iraya kom man begén. Yamula kétaya ku fo ké dakél i barase gédoté kom sabaf bé gédaw gome. <sup>18</sup> Enggédot gun i tabange fénuit gom begén bé Epafroditowe. Atin toow fo gaba-gabay fénuit gome begén. Mélaw ménwénén i kéluhanay kailanga kuwe béléewe ni. I nan do niray gom maak toow fo mamut tulak émfésuwat bé Tuluse brab gétanggafa no. <sup>19</sup> Atin i Tulus guwe, iraya no begom bé kéluhanay kailanga kome tidéw dob toow fo kékawasa no sabaf bé Jesu Kristowe. <sup>20</sup> Médayéw damén i Abay tome Tulus taman sa taman. Amen.

<sup>21</sup> Ségifaé kuy kéluhana kome do munur bé Jesu Kristowe diyaan. Atin i de dumo gu dini ségifaé ro so begom. <sup>22</sup> Atin i kéluhanay de munur dob ni gonon ségifaé ro so begom, labi na foy de munur batí dob lawi i datue ségifaé ro so begom. <sup>23</sup> Mégédaw damén begom kéluhanan i Kadnane Jesu Kristo.

Pablo

## I Sulat Pablowe dob de Munur bé Kristowe dob Kolosas

Ay niy sébaane bé de sénulat Pablo, sani ménbantuge muret fantag bé Jesu Kristowe. I Pablowe ni, énda séménugudén mangéy dob ingéde Kolosas, éndob énggélolo noy odoroy de munur diyo féndawét Epafras. I Epaphrase ni, ménwaléy munur non énggélinooy noy kéuret Pablowe dob ingéde Efeso.

Amun sénulat Pablowej ni, ménférisu de nén sabaf bé kéuret ne fantag bé Kristowe. Ménangéy i Epaphrase dob Pablowe brab bénréhén dob beene bé wén i do tugién témore énggumah dob de munur do bati dob ingéde Kolosas. Bénréh i de ni tugién témore bé wén kun i de télaki do mas na gérotor bé Jesu Kristowe atin wén so kun i do étew fatut féngadaféy de étew. Atin i de ni tugién témore, bénréh ro so bé de munur bé Kristowe, fatut ro kun modor bé kitab i de Judio.

Mélaw séménulat i Pablowe dob de munur do bati dob Kolosas inok toroé no bero bé i Jesuse, Been i tintuwe Nga i Tuluse, atin mélaw énda i mas na gérotor bé Beene. Ténoroén i Kristowe Beene saén i fatute féngadaféy de étew, békén do télaki taloo no do ségiyo. Atin ténoroén bé i funay de étew méfukas ro bé de sala ro, non bé kéunur ruwe saén bé Jesu Kristowe. Mélaw énda kailanga roy modore bé kitab i de Judio. Sénulat Pablowej ni dob berowe inok gétiga roy toowe fantag bé Kristowe atin inok énda munur ro bé de kétoro i de tugién témore énggumah dob berowe.

<sup>1</sup> I ni sulat tidéw dob begéne, sani Pablowe ségétew apostol sénugu Jesu Kristowe non been i niy kétayay Tuluse. I begéne brab dumo tome munur Timoteo sémulat gey mangéy dob begome <sup>2</sup> do munur bé Kristowe dob Kolosas, sani de dumo gey démayday fo modor bé Kristowe.

I Abay tome Tulus mégédaw damén begom brab irayén damén begom i métanéke fédéw.

<sup>3</sup> Sénga dasala key begom dob Tuluse, sani Abay i Kadna tome Jesu Kristo, démoyun gey fo fésalamat dob Beene sabaf bé begome. <sup>4</sup> Non énggélinooy key i fantage bé méégéte kéunur gom bé Jésu Kristowe brab kégédaw gome bé kéluhanay de dumo tom munur.

<sup>5</sup> Atin i funa kome munur brab mégédaw, non bé inam gome bé de baras gom gédoté kom moso dob lawayo. Atin énda mékédan i de ni baras gom. Enggétiga kom i fantage bé ni amun mén-uret dob begomey toowe, sani Fiyowe Uret fantag bé Jesuse. <sup>6</sup> Atin i ni Fiy Uret énggélinooy kom, been soy niy lémégebe dob médoowe do étew dob duniiae ni. Atin sabaf bé kéunur ruwe de, waléy fiyoy adat ruwe loo bé begome tidéw dob sunguwe gai énggélinooy kom i kégédaw i Tuluse brab tintu gésobuto kom i ni kégédaw i Tuluse.

<sup>7</sup> Enggélinooy kom i fantage bé ni kégédaw i Tuluse tidéw dob Epaphrase, sani gulaané tome dumo tom sugu-sugué Kristowe. Beeney mésarigone gémalbék tétabangan begey muret fantag bé Kristowe. <sup>8</sup> Bénréhén begey i fantage bé kégédaw gome sabaf bé kékémanduoy Rémogor i Tuluse begom.

<sup>9</sup> Mélaw tidéw fanay kégélingo gey bé de ni, démoyun dasala key begom. Ongoté key dob Tuluse, fefégétiga no begom i kétaya nuwe rigoné kom, brab fefégésobuté no begom brab fefégétiga no begom i fatute dob kékémandu i Rémogor ne. <sup>10</sup> Atin mélaw, gérigono kom i kétayay Kadnane inok mésuwat bé de adat gom. Gérigono kom i de kéluhanay de fiyo brab waléy gétiga kom i fantage bé Tuluse. <sup>11</sup> Atin démasalu bé fébagéré no begom bé barakat ne inok fédayday gom témingkél brab moror gom fiyon fo ké mérégén i de gétamana kom. <sup>12</sup> Atin géfésalamat gom dob Abaye Tulus non féndaitén so begom inok gégedot gom bé de irayén dob de étewén, sani de étew dob géfékayaé munur bé Kristowe. <sup>13</sup> Non i Abaye Tulus, fénukasén betom tidéw dob délémons, sani kékéulgéw Satanase brab fénbatién betom dob géfékayaé, sani kékéulgéw i gulaané nuwe Ngaén Jesus. <sup>14</sup> Atin sabaf bé kéléhu i Nga ne, ménfukas tom tidéw dob Satanase brab ménfésagad i de sala tom.

### Fantag bé Kristowe

<sup>15</sup> Enda giton i Tuluse, éndob i Kristowe, been i ménfégítowe bé atiy Tuluse non giton i Kristowe. Atin Beeney sunguwe Ngaén non ménwénén bé énda séna lénimbag i Tulusey de udenén éntingayén. Atin Been i toowe na fo gérotor bé kéluhanay de lénimbag i Tuluse. <sup>16</sup> Non fénlimbag i Tuluse bé Kristowey kéluhanay éntingayéne, dob lawayo brab dob fantade, do giton brab de énda do giton, fiyon i de rémogor do énda gitono brab de odoro ro loo soy de méguléw bero, falan Kristoy léménimbage bé kéluhanay de éntingayén inok usaré noy kéluhanane. <sup>17</sup> Wénén i Kristowe bé énda séna ménlibag i de udenén éntingayén. Atin i kéluhanay de éntingayén diyo dob karowe gonon non Kristowey méguléwe béro. <sup>18</sup> I kéluhana tome do munur, betom i maake lowoh Kristowe atin Beeney uléwe. Atin Been i miraye umul dob betome do munur de. Beeney sunguwe Nga i Tuluse, atin Beeney toowe na fo gérotor bé kéluhanay de tébule. Mélaw Beeney toowe fo gérotor, gérotor na bé kéluhanane. <sup>19</sup> Non sabaf fo dob kétayay Tuluse, tintu fo ségiléw soy Kristowe bé Beene. <sup>20</sup> Atin méuyot de so ké i kéluhanay éntingayéne dob duniyae ni brab dob lawayo géséfagayun de non bé Nga ne. Atin bé kéléhu i Nga ne dob kruse, énggféwaléyoy Tulusey kéluhanane dumo no.

<sup>21</sup> Bé do gétah, méravy gom dob Tuluse brab sébanil gom bé Tuluse non bé de tete rénigo gom brab de tete kékéfítung gom. <sup>22</sup> Endob béleewe ni non bé kéléhu Kristowe, fénwaléy i Tuluse begom do dumo no, inok waléy gom métintu dob adafa nuwe énda i sala gom brab énda i gétébo begom. <sup>23</sup> Endob kailanga kom i émfédaydaye bé késarig gome bé toowe kétoro. Atin féégét gom i kéunur gome. Brab kagom térenon i kégéinam gome bé de kéfiyonon fénasad i Tuluse begom amun énggelingoo kom i Fiyowe Uret. Been i niy toowe fo Fiyo Uret énggumah dob begome atin béleewe ni lémégéb mangéy dob kéluhanay ingéde dob duniyae ni. Atin i begéne, sani Pablowe, been i galbék guwe non sénugu Kristowe begén mangéy muret bé ni Fiyo Uret.

<sup>24</sup> Atin béleewe ni, mororu sabaf bé kérasay guwe témbangan begom. Mororu non sabaf bé de kérasay gu, gétabangu émfégilid bé kérasay Kristowe inok waléy fiyoy lowoh ne, sani de munur de. <sup>25</sup> I Tuluse fénwaléyén begén sugu-suguéy de munur inok gétabanga ku begom bé kéuret guwe bé kéluhanay de kékébéréhén. <sup>26</sup> Been i niy kékébéréh i Tuluse ménbunéy dob kéluhanay de étew bé do gétah. Endob béleewe ni fénggétiga noy de étewén. <sup>27</sup> Béleewe ni méuyot i Tuluse de ké fégétiga no dob kéluhanay de étewén i ni toow fo fiyo kétoro ménbunéy bé do gétah. Atin ay niy nan kétoro: Bati i Kristowe dob de fédew gom, atin sabaf bé ni waléy gom toow fo fiyo dob lawayo loo bé kéfiyoy Tuluse. I ni kétoro kay kéluhanay de étew. <sup>28</sup> Mélaw ureté key i fantage bé Kristowe dob kéluhanay de étew. Brab féingaté key i kéluhanane brab toroé key beroy kéluhanay gétiga keye inok kéluhana ro munur bé Kristowe inok waléy ro énda i kulang dob kéunur ruwe. <sup>29</sup> Atin i begéne fégéroru gémalbék inok mérigo damén i de ni. Atin fébagéréy barakat Kristowe begén inok gérigono kuy de ni.

## 2

<sup>1</sup> Méuyotu de ké gétiga kom i kégéroru guwe gémalbék témbangan begom brab de munur diyo dob Laodisea, loo soy kéluhanay de étew énda séna gélolo ro begén. <sup>2</sup> Fégéroru gémalbék inok émbagér i de fédew gom brab inok waléy gom maak sédumon sabaf bé dakéle késégédaw gom, brab inok tintu munur gom bé toowe sabaf bé kégésobut gome bé toowe kétoro fénggétigay Tuluse begom, sani fantage bé Kristowe. <sup>3</sup> Non Kristo saén i miraye bé tintuwe kégétigan brab tintuwe kégésobut.

<sup>4</sup> Bérhéku begom i ni inok énda géunur gom bé de tugi do akar i de étew fiyon fo ké maak toow i de kéuret ro. <sup>5</sup> Non fiyon fo ké énda diyou dob begome, démoyun so fégítungé ku begom. Atin mororu fo non gétiga ku émbagér i kéunur gome bé Kristowe, brab énda térenon kom de.

<sup>6</sup> Atin non ténayakuf gom i Kristowe Kadna kom, fatut rigo gom i tintuwe miring bé Beene non begom i de dumo no. <sup>7</sup> Ufama, i kayéwe déménarir dob fantade. Atin i begome, maak déménarir gom dob Kristowe. Mélaw kagom sésuway bé Beene. Rigo gom i kétaya nuwe brab fébagér gom i kéunur gome loo bé ténoroe nén begom. Atin fatut démoyun gom fésalamat dob Tuluse sabaf bé Kristowe. <sup>8</sup> Atin ingat gom inok énda i magakaran begom émféunur bé de tugi do kétoro énda i lantékén, fiyon fo ké maak toow i de ni. Non tidéw saén dob kéilawane, brab tidéw dob de saitan. Békén toow i nan kétoro non békén tidéw dob Kristowe. <sup>9</sup> I funa kuwe muret bé ni dob begome, inok gétiga kom i toowe fantag bé Kristowe. I Kristowe ménwaléy kéilawan. Gido loo, i Kristowe, tintu ségiléw bé Tuluse. <sup>10</sup> Atin i Tuluse niraya no begom bé tintuwe umul sabaf bé begom i de dumo Kristo. Beeney toowe méguléw, gérotor na bé kéluhanay barakatane méguléw brab do odoron. <sup>11</sup> Atin sabaf bé begom i de dumo Kristo maak do méntuli gomén. I kétuli gome, békén i kétulie rigonéy de étew loo bé adat i de Judio. Yamula Kristoy maake téménuli begom bé kékéda nuwe bé de tafayén tete do adat gom tidéw dob begome inok éndaén kailanga kom i rémigowe tete. <sup>12</sup> Brab amun ménbautis gomén maak ménlébéng gomén brab maak méntébule gom ménggéodor bé Kristowe, sabaf bé kéunur gome bé barakat i Tuluse ménfétébule de. <sup>13</sup> Bé do gétah énda i umul gom magufusa, non médooy de sala gom brab non énda modor gom bé kitabe niray Moisese, loo bé kéodoroy de Judio de. Endob béléewe ni niray i Tulusey umule magufusa dob begome loo bé ménfétébulee bé Kristowe. Atin tintu fo fénsagadén i kéluhanay de sala tom. <sup>14</sup> Maak kénayasén i kéluhanay ménsumlate do sala tom brab kitabe atin maak kénlabo no dob kruso séréngan bé Jesuse inok amun ménléhu i Kristowe, i Tuluse kenda noy kuwagib i de saitan méguléw brab de tete méguléw. Atin fénémala no bero dob téngaangay kéluhanay de étew bé kétabana nuwe bero bé kéléhu Kristowe dob kruse.

<sup>15</sup> Mélaw kagom fédayaén i de étew sémugu begom bé atiy fatute amaé kom brab inémé kom, taloo no sugué ro begom bé fatut kun fégadata kom i de mékétéfu do gai, brab do mantu térsang kélunganon, brab do gai kétérén. <sup>16</sup> Non i kéluhanay de ni maak do anlung i kéluhanay de étingayén saén do gégumah mosoén, atin i tintuwe, been i Kristowe. <sup>17</sup> Kagom fédayaén i de étew do félangka-langka kukumé ro begom sabaf bé de énggito ro kun tidéw dob Tuluse. Télamané ro begom féféngadafén bé de télaki. Endob kagom fédayaén de. I de ni do étew do ubo-ubo saén do téritantad ro, éndob i toowe, do félangka-langka ro. Atin marok do gérotor ro sabaf bé de fiyo kégétiga ro kun, éndob i toowe, énda i funa ro félangka-langka. <sup>18</sup> I de ni do étew éndaén ménsumfat ro dob lowohe, sani Kristowe. Endob i betome maak lowoh Kristo, atin Been i uléwe. Ménsumfat tom kéluhanan loo bé de réfa i lowohe, atin féerukéy Tuluse betom non ménsumfat tom kéluhanan dob Kristowe.

<sup>19</sup> Maak ménléhu gom énggéodor bé Kristowe. Mélaw méntangéy gomén tidéw dob de saitan brab éndaén géféguléwo ro begom. Mélaw kagomén modor bero. <sup>20</sup> Atin kagom odor-odor ké sugué ro begom maro, “Kagom kuwahén i ni”, taloo no, “Kagom amaén i nan”. <sup>21</sup> Non i amaéne waléy mékédan ké namaén. Mélaw kagom odoron i da nan do sugu non tidéw saén dob kéilawane. <sup>22</sup> I de ni étew maak fiyoy de sugu ro, non fégésé roy de étew ménjadaf bé de télaki, brab ubo-ubo ro téritantad, brab do lubagé roy de lowoh ro. Endob i de ni do sugu énda fo fiyo no brab énda fo toowén. Non énda gétabanga ro betom mika bé de tete kétayay lowoh tome.

### 3

<sup>1</sup> Maak méntébule gomén ménggéodor bé Kristowe, non wén i umul gom magufusa sabaf bé Beene. Mélaw fatut fégitung gom i fantage bé de étingayén dob lawayo diyo. Non diyo i Kristowe méguléw mésar dob kuwonoy Tuluse. <sup>2</sup> Fégitung gom i de étingayén dob lawayo diyo, békén i de étingayén dob fantade ni. <sup>3</sup> Non maak ménléhu gomén non éndaén modor gom bé de tete adat. Atin wén i tintuwe umul gom sétifon bé

Kristowe dob lawayo. Atin énda mékédan i ni umul non sédumon i Kristowe bé Tuluse. <sup>4</sup> I tintuwe umul gom diyo dob Kristowe. Atin amuk séfule giton i kéfiyo nuwe, brab giton soy kéfiyoy mantuwe umul gom non géodor gom bé Kristowe.

<sup>5</sup> Mélaw fatut tagak gom i de tete kétayay de lowoh gom, loo bé de kébigaén, brab mékérésike rigonén brab do kéarumén. Non i kéaruméne ségiléw bé kéféngadafe bé kéninontowe. <sup>6</sup> I de étew rémigo bé de ni, kukuméy Tuluse bero non énda modor ro bé de suguéen. <sup>7</sup> Atin fiyon i begome, rénigo gom i da nan bé do gétah, non tete sénay de adat gom bé beno.

<sup>8</sup> Endob béléewe ni, fatut tagak gom i kéluhanay de ni, loo bé kékérite, brab kéraréke, brab de ségiyo na do tete kébéréh. <sup>9</sup> Kagom tugion i de dumo gom, non té nagak gomén i de tafay do tete adat gom. <sup>10</sup> Brab ménfukas gomén bé kégédot gome bé mantuwe brab fiyowe adat. I ni mantu adat tidéw dob Tuluse. I Tuluse démoyun féwaléyé no begom mantu brab fiyo loo bé Beene inok toow fo gétiga kom i fantage bé Beene. <sup>11</sup> Mélaw ségiléw-giléw i de mantu étewén, fiyon fo ké do Judio taloo no do békén Judio, fiyon fo ké do méntuli taloo no énda, fiyon fo ké do énggégéganad taloo no énda, fiyon fo ké do rifén taloo no békén. Enda i ségiyo gérotor saliyu bé Kristowe, brab Been i batie dob kéluhana tome do munur de.

<sup>12</sup> Betomey de étew fénémili i Tuluse waléy do étewén sabaf bé kégédaw ne betom. Mélaw fatut mégédaw gom brab méuray i na gome, brab térfantad gom, brab métanék i de adat gom brab témingkél gom. <sup>13</sup> Atin fatut sétabang gom, brab séfésagad gom amuk wén i réménigo tete dob begome. Fatut fésagad gom i de dumo gom loo bé kégésagad i Kadnane begom. <sup>14</sup> Atin saliyu na bé de ni, fatut ségédaw gom, non been i niy funa kome waléy sétiman i de fédew gom loo bé fatute. <sup>15</sup> Atin fédaya gom i Kristowe fétanéké noy de fédew gom, inok énda sékérít gom non been i niy funay Tuluse fénwaléyén begom sébaan lowoh. Atin fatut démoyun gom fésalamat. <sup>16</sup> Atin i kéluhanay de fiyo kéto Kristowe fatut démoyun batidob de fédew gom. Atin fatut sétoro gom brab séféginau gom loo bé kégétigay Tuluse de begom. Atin kanta gom i de kanta démayéw bé Tuluse brab de kanta émfésalamat dob Tuluse. <sup>17</sup> Mélaw i rigoné kome, fiyon fo ké dob de kébéréh taloo no dob de rigonén, fatut rigo gom sabaf begom i de kuyug i Kadnane Jesus. Atin sabaf bé kéunur gome bé Kristowe, fatut démoyun gom fésalamat dob Abaye Tulus.

<sup>18</sup> I de begom do bawagan libun, odoro kom i de sugu i de bawag gom, non been i niy fatute rigonéy de munur bé Kristowe. <sup>19</sup> Atin i de begom do lagéy, fatut fégédaw gom bé de bawag gom brab kagom dusanén bero.

<sup>20</sup> I de begom do nga, odoro kom i kéluhanay sugu i de lukés gom, non been i niy késuwatay Tuluse. <sup>21</sup> Atin i de begom do boh brab do idéng, kagom fékélébuwanén i kéadowoy gome bé de nga gom taman waléy ro mékérít brab éndaén méuyot ro rémigo fiyo.

<sup>22</sup> I de begom do rifén, odoro kom i kéluhanay sugu i de amu gom. Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédew gom odoro kom i de sugu ro sabaf bé dakéle kébasana kom bé Kadnane. <sup>23</sup> Brab fiyon fo ké ati rigoné kome, fatut toow gom fo fégérör, maak békén saén kéilawan i galbéko kome éndob maak Kadnan i galbéko kome. <sup>24</sup> Fégétédém gom i ni, i Kadnane barasa no begom. Non i Kadnane barasa no begom bé de kéfiyonon irayén dob de étewén. Non Kristowey tintuwe amu gom. <sup>25</sup> Atin i de étew rémigo tete, kukuméy Tuluse bero loo bé kégétimal i de sala ro. Non i Tuluse, énda i isu ramigo no.

<sup>2</sup> I kéluhana kome do munur, fatut fédayday gom i kédasal gome dob Tuluse. Brab kagom manat ké démasal gom. Atin fatut fésalamat gom dob Tuluse ké démasal gom.

<sup>3</sup> Atin dasal gom so mongot dob Tuluse tabanga no begey inok wén i do gai géureto key i kékéréd ne brab géfégétiga key i Kristowe dob de étew. Been i niy kétoroe ménbunéy bé gétahe. Atin ménférisuwu béleewe ni sabaf bé kéuret guwe bé ni Fiyo Uret. <sup>4</sup> Mélaw dasal gom inok fékéntayéy Tulusey kéuret guwe loo bé fatute rigoné ku.

<sup>5</sup> Atin fatut fétuntay gom i de rigoné kom dob de étew do énda séna munur bé Kristowe, atin tulama gom uret i Kristowe sénga gai fakay ureté kom. <sup>6</sup> Atin féfiyo gom démoyun i késéuret-uret gome bero brab i késéuret-uret gome fatut wén i lagaén. Brab fatut gétiga kom i fatute késumbul gom dob kéluhanay de étew.

<sup>7</sup> I gulaané tome dumo tom Tikiko, sani mésarigone gémalbék brab dumo gu so ségiléw sugu-sugué Kadnane, been i émfégétigane begom fantag bé begéne brab goho kuwe ni dini. <sup>8</sup> Been i niy funa kuwe de sému mangéy dob begome, inok féororé no begom bé kéuret ne begom fantag bé de goho key dini. <sup>9</sup> Atin wén soy ségétéwe lagéy dumo gom sébaan gonon féndawét Onesimo modor de. Beeney gulaané tome dumo tom munur bé Jesuse. Toow fo mésarigon i ni étew. I berowe, ureté ro dob begomey kéluhanay de ménrigo dini.

<sup>10</sup> I Aristarkowe, ségifaé no begom. Been i dumo guwe ménférisu dini. Ségifaé Markose so begom, sani dumo Bernabewe sétiman bebe. Fén-uwito kun begom kékéréd fantag bé Markose, bé fatut tayakufé kom amuk gérumah dob begome. <sup>11</sup> Atin i Jesuse (féndawét so Justo) ségifaé no so begom. Enda i ségiyo do Judio mamungon begén muret fantag bé kékérguléw i Tuluse, saliyu bé de ni do télew gétew. Toow fo té nabanga ro begén.

<sup>12</sup> Atin i Epafrase, ségifaé no so begom, sani dumo gome sébaan gonon brab ségétéw so sugu-sugué Jesu Kristowe. Sénga tékélid démasal fo dob Tuluso inok méégét i kéunur gome brab énda témeréno, brab inok rigoné kom fo toow i kétayay Tuluse. <sup>13</sup> Enggitó gu foy kégéror ne gémalbék, mélaw géureto ku dob begomey fantage bé kégéror ne téma bangan begom brab de étew dob Laodisea loo soy de étew dob Hierapolis. <sup>14</sup> Atin i Lukase, sani gulaané tome muwa brab Demase so, ségifaé ro begom.

<sup>15</sup> Atin fésamfay gom so dob de munur dob Laodiseay késégifa geye bero brab dob libune féndawét Nimfas brab dob de munur sélimud méngadaf dob lawi ne. <sup>16</sup> Amuk gilid basané kom i sulat guwe ni, fatut fébasa gom so dob de munur bati dob Laodisea. Brab wén soy sulat guwe mangéy dob de munur dob Laodisea, fatut basa gom so. <sup>17</sup> Atin béréd gom dob Arkipowe bé fatut fétausé noy galbéke niray i Kadnane de.

<sup>18</sup> I begéne Pablo, sulaté kuy ni géfuray késégifa bé de kagén kémér. Kagom lifotén begén nikét bé sangkalie dob férisunone ni.

Mégédaw damén i Tuluse begom.

Pablo

## I Sunguwe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Tesalonika, atin médoobé de étew i ménwaléye do munur bé Jesuse sabaf bé kéuret ne. Endob i de Judio do bati diyo dénédél roy Pablowe mésut tidew dob ni ingéd, non ménika ro bé kétoro ne fantag bé Kristowe.

Amun tékédan i Pablowe tidew dob ingéde ni Tesalonika, ménbuku fantag bé de mantu do munur bati diyo. Ménbuku ké témérén ro munur bé Kristowe sabaf bé kéférasay i de Judio bero. Mélaw sénugu Pablowej ségétewe dumo no gémalbék féndawét Timoteo inok susiné no ké ati gohoy de munur. Amun ménséfule i Timoteowe mangéy dob Pablowe, nureté i fantage bé de munur dob Tesalonika bé fétausé roy kéunur ruwe bé Kadnane Jesu Kristo, fiyon fo ké mérásay ro. Mélaw sénulat Pablowej ni inok ureté no dob berowey kéoror ne brab inok féfiyo noy fédew ruwe. Dob ni sulat, ténero Pablowe soy fantage bé késéfule Kristowe brab kétébule i Tuluse bé de munur moso.

<sup>1</sup> I begeye Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, do étew i Abaye Tulus brab Kadnane Jesu Kristo.

Mégédaw damén i Tuluse begom brab irayén damén i métanéke fédew.

<sup>2</sup> Démoyun gey fésalamat dob Tuluse sabaf bé begome kéluhanan, atin sénga tékélid dasala key so begom dob Tulus. <sup>3</sup> Non buluk démasal gey dob Abay tome Tulus, gétédémo key i de fiyo rigoné kom sabaf bé kéunur gome bé Kristowe. Brab gétédémo key i kégéror gome gémalbék sabaf bé kéimu gome bé Kristowe. Brab gétédémo key i kéégét i inam gome bé késéfule i Kadna tome Jesu Kristo. <sup>4</sup> Do dumogey, gétiga key méimu i Tuluse begom brab fénemilién begom waléy do étewén. <sup>5</sup> Non amun nuret gey dob begomey Fiyowe Uret, énda nureto key saén begom, yamula fénggito gey so begom i de mékégaif rénigo gey dob barakat i Rémogor i Tuluse. Atin tintu énggétiga key toow fo fiyoy toowe dob Fiyowe Uret. Atin énggito gom i fiyowe adat gey amun diyo gey dob begome atin rénigo gey i kéluhanay de ni inok tabangé key begom. <sup>6</sup> Atin i begome, niring gom i adat geye brab adat i Kadnane. Fiyon fo ké ménggagéw gom médoobé kérasay, tényakuf gom i Fiyowe Uret. Atin toow fo ménoror gom, non fénoror i Rémogor i Tuluse so begom. <sup>7</sup> Mélaw, ménwaléy gom do étew fatut iringéy de munur dob Masedonia brab Akaya. <sup>8</sup> Non i kébéréh i Kadnane nuret gom békén saén ménlégéb dob Masedonia brab Akaya. Yamula i kéurete fantage bé kéunur gome bé Tuluse ménlégéb mangéy dob kéluhanay de ingéd. Mélaw éndaén kailanga key i murete fantage bé kéunur gome. <sup>9</sup> Non kéluhanay de étew muret fantage bé kétayakuf gome begey bé kéangéy geye témukaw begom. Atin ureté ro soy kétakag gome bé kéfengadaf gome bé de kéninontow amun ménunur gomén bé tintuwe brab méuyage Tulus inok féngadafé kom brab rigoné kom i kétaya nuwe. <sup>10</sup> Atin ureté roy fantage bé kéongot-ongot gome bé késéfule i Nga ne Jesus tidew dob lawayo. Beeney ténebule i Tuluse. Atin Beeney mémukase betom inok énda kukuméy Tuluse betom amuk kukumé no moso i de kéilawan.

### 2

<sup>1</sup> Do dumogey, begom soy énggétigane de bé wén i fiyo rénigoy kétukaw geye begom.

<sup>2</sup> Gétiga kom i kéférasaye begey brab kéfengirase begey dob ingéde Filipos. Ménrigoy ni bé énda séna ménagéw gey de mangéy dob begome. Endob fénbaraw i Tuluse begey inok géureto key begom i Fiyowe Uret tidew dob Beene, fiyon fo ké médooy sébanile begey.

<sup>3</sup> Atin i kéuret geye dob begome békén tidew dob tugie kétoro, taloo no tete i funa keye téromo, taloo no fagakara key begom. <sup>4</sup> Yamula, doyuné key bérhéen i kétayay Tuluse, non gékarangay Tuluse médait gey muret bé Fiyowe Uret funa no sénarigén dob begeye. Atin énda télamané key fésuwatén i de étew, yamula méuyot gey émfésuwat bé Tuluse

sani gétigane bé de fédew tom. <sup>5</sup> Gétiga kom i kageye kékérén. I kageye kékérén békén saén kékuvéy taloo no fégékurta gey. Gétigay Tuluse so toow i ni. <sup>6</sup> Atin énda séménléed gey bé de kédayéw gom begey taloo no kédayéw i de ségiyo. <sup>7</sup> Wén i atura key sémuug begom témaabang begey non do apostol Kristo gey, éndob énda rénigo gey de. Yamula amun diyo gey dob begome, mélémak i kérigo geye begom ségiléw bé ségétéwe idéng toow fo mélémak i kérigo nuwe bé de ngaén. <sup>8</sup> Atin sabaf bé kékéimu geye begom, nuret gey dob begomey Fiyowe Uret tidéw dob Tuluse. Atin békén saén i ni, yamula ménuyot gey so séloyuk begom bé kéluhanay de rigoné kom, non toow fo gulaané key begom. <sup>9</sup> Do dumo gey, gétiga key gétédémo kom soy kégéror geye gémalbék. Amun nuret gey dob begomey Fiyowe Uret tidéw dob Tuluse, fuweh na kélunganon i kégalbék geye inok gédoté key i kékaguyag geye. Mélaw énda méngkérégénan gom begey.

<sup>10</sup> Gétiga kom brab gétigay Tuluse so bé fiyo brab métintuy de rénigo gey dob begome do munur. Enda i rénigo gey funay ségétéwe gétébo begey. <sup>11</sup> Gétiga kom i de rénigo gey dob séngae ségétéw begom, ségiléw bé kérigo ségétéwe boh bé de ngaén. <sup>12</sup> Non fénbagér gey brab fénfiyo gey i de fédew gom. Atin nongot gey dob begome bé rigoné kom i fiyowe sénga tékélid loo bé fatute rigoné de étew i Tuluse. Been i ménemilie begom inok féguléwo no begom brab inok gétiga kom i kékifiyo nuwe.

<sup>13</sup> Atin ay ni soy funa keye démoyun fésalamat dob Tuluse. Amun nuret gey dob begomey kékérén i Tuluse, fénggelingo gom brab ténayakuf gom. Ménunur gom de bé békén saén kékérén i kélawane, yamula kékérén i Tuluse. Atin tintu fo tidéw dob Tulusey kékérén geye, non usaréy Tulusey kékérén ne émfébagér bé kéunur i betome do munur bé Jesuse. <sup>14</sup> Atin do dumo gu, i ménrigowe dob begome ségiléw bé ménrigowe dob de étew i Tuluse do munur bé Jesu Kristowe batí dob Judea. Férasay i de dumo ro bero do Judio. Atin ségiléw so bé begome, i de dumo gom batí dob kagome ingéd ferasayé ro so begom sabaf bé kéunur gome bé Jesuse. <sup>15</sup> I de Judio dob Judea fénléhu roy Kadname Jesus brab de sénarigo Tuluse muret bé kékérén ne. Atin férasay ro so begey. Toow fo énda mésuwat i Tuluse bero. Atin sébanil ro so bé kéluhanay étewe. <sup>16</sup> Non ténlama roy gémalée begey muret bé Fiyowe Uret dob de békén Judio, funa ro mífukas dob de sala ro. Mélaw ségiléw bé gétahé, toow fo ménfeno ron bé salae. Mélaw béléewe ni, toow fo mékérít i Tuluse bero.

<sup>17</sup> Atin do dumo gey, amun énggéséféka tom bé magade saén énda gélifoto key begom. Yamula toow fo mégundoy gey begom atin toow fo témenlama gey man mangéy diyaan inok géségo tom. <sup>18</sup> Méuyot gey séfule mangéy dob begome. Brab i begéne, Pablo, médoonén gule témenlamawu mangéy diyaan. Endob alangé Satanase fo begey. <sup>19</sup> I funa keye damén méuyot séfule mangéy sugud-sugud diyaan, non toow fo gulaané key begom. Atin gulaané key begom non sabaf bé begome, ménwaléy méégét i kóngot-ongot geye bé késéfule Jesu Kristowe. Atin sabaf bé begome, toow gey fo moror. Atin amuk diyo gey moso dob adafay Kadname Jesu Kristo kékéfule, géureto key i fiyowe fantag bé de rénigo gey sabaf bé kéunur gome. <sup>20</sup> Toow, begom i funa keye moror brab géfélangka-langka.

### 3

<sup>1</sup> Amun éndaén foy fégifusa key bé kégundoy geye begom, ménséfagayun gey télew gétew bé i begeye ruwo gétew batí gey dob Atenas, <sup>2</sup> brab ségétéw saén i mangéye diyaan. Mélaw sénugu gey i Timoteowe, sani dumo tome munur brab dumo gey gémalbék dob Tuluse muret bé Fiyowe Uret fantag bé Jesu Kristowe. Sénugu gey i Timoteowe inok fébagéré noy kéunur gome brab féfioné noy de fédew gom, <sup>3</sup> inok énda i ségétéw begom mébaleng i kéunur ne sabaf bé de kékérasay begom. Gétiga kom soy de ni do kérasay mérigo dob betome non beeniy bantak i Tuluse. <sup>4</sup> Non amun diyo gey séna dob begome, bénréh geyén dob begome bé ferasayén tom moso. Atin tintu gétiga kom so bé toow fo ménriko. <sup>5</sup> Been i niy funa kuwe séménugu bé Timoteowe mangéy dob begome. Endob téningkél guy kékuku guwe fantag bé begome. Mélaw sénugu guy Timoteowe

inok susiné noy fantage bé kéunur gome. Ménbukuu ké téneungkad Satanase begom brab bénalengén i kéunur gome atin mésinggula mélaw i kéluhanay galbék geye.

<sup>6</sup> Atin mantu séna énggumah i Timoteowe tidéw dob begome. Atin nuvitén i fiyowe uret fantag bé kéunur gome brab kégédaw gome. Atin bénréhén begey i doyuné kom kun fégitungén i fiyowe fantag bé begeye. Brab bénréhén soy kéuyot gome géségito begey loo bé kéuyot geye géségito begom. <sup>7</sup> Mélaw do dumō gey, fiyon fo ké béléewe ni médooy de mérégén géagéwo key brab kérasayan gey, ménfiyoy de fédéw gey sabaf bé begome. I kéunur gomey funay de fédéw gey ménfiyo. <sup>8</sup> Non bé do gétah, toow fo ménbuku gey fantag bé begome. Endob béléewe ni, moror gey non gétiga key mécégét i kéunur gome bé Kadnane brab éndaén fo émbaleng i de fédéw gom. <sup>9</sup> Béléewe ni, gáfésalamat gey dob Tuluso fantag bé begome. Fésalamat gey sabaf bé kéroror geye démasal dob Tuluso fantag bé begome. <sup>10</sup> Fuweh na kélunganon, démasal gey fo toow dob Tuluse ongoté key dob Beene tungkasé no betom géségito man ségule inok géféeégéto key i kéunur gome amuk wén i kulang de.

<sup>11</sup> I Abay tome Tulus brab Kadna tome Jesus, tafayé ro damén i agéwone inok géagéw gey mangéy dob begome. <sup>12</sup> Atin féinutéy Kadnane fédakélén damén i késégédaw gome brab kégédaw gome bé kéluhanay de étew, inok waléy ségiléw bé kédakél i kégédaw geye begom. <sup>13</sup> Mélaw fébagéré noy de fédéw gom, brab féwaléyé no begom toow fo fiyo brab do métintu inok énda métébo gom amuk diyo gomén dob adafay Abay tome Tulus bé gaiwe séfule i Kadnane Jesus beroy kéluhanay de étewén.

## 4

<sup>1</sup> Atin do dumō gey, wén soy bérhé keye begom. Ténoro gey begom i fatute adat rígoné kom inok mésuwat i Tuluse de. Atin been i niy rénigo gome. Atin béléewe ni sabaf bé atura keye tidéw dob Kadnane Jesus, ongoté key dob begome bé umana kom i da nan fiyo rígoné kom. <sup>2</sup> Gétiga kom i kétoro geye begom sabaf bé atura keye tidéw dob Kadnane Jesus. <sup>3</sup> Kétayay Tuluse ké métintu gom brab kagom bigaén. <sup>4</sup> I kéluhana kome fatut féfiyo gom i kékawag gome. Rigo gom i fatute loo bé kétayay Tuluse. <sup>5</sup> Mélaw féfiyo gom i kékawag gome loo bé fatute. Kagom iringén i de énda méngrintulus, modor ro saén bé de tete kétayay de lowoh ro. <sup>6</sup> Mélaw fatut énda i ségetéw begom rémigo késalaan loo bé ni dob dumō gome munur bé Kristowe taloo no lafisé kom. Non i Kadnane kukumé noy de étew rémigo tete loo bé ni. Bénréh geyén i ni dob begome bé do gétah brab sulaté ku man béléewe ni. <sup>7</sup> Non i Tuluse fénémilién betom inok waléy tom do métintu étew. Enda fénémilién betom inok sétayan tom bé békéne do bawag tom. <sup>8</sup> Mélaw amuk wén i étew mika bé ni kétoro, békén étew i kéikaa nuwe, yamula Tulus, sani miraye bé Rémogor ne dob betome.

<sup>9</sup> Enda kailanga kuy sémulatane begom fantag bé kégédaw gome bé de dumō gom munur. Non Tulus i téménoroe begom bé fatut ségedaw gom. <sup>10</sup> Atin gétiga key mécédaw gom bé kéluhanay de dumō gom munur bati dob Masedonia. Gido loo do dumō gey, ongoté key dob begome bé umana kom i kégédaw gome. <sup>11</sup> Fatut fétanék gom i kékati gome, brab kagom furaya fédéw i de dumō gom. Brab fatut fégérör gom gémalbék inok gédoté kom i kékaguyag gome, loo bé bénréh geye begom bé do gétah. <sup>12</sup> Amuk rígoné kom i ni, fiyon i de énda munur fégadata ro begom, brab énda kailanga kom i mongote dob de ségiyo inok gédoté kom i kékaguyag gome.

### *I késéfule Jesuse*

<sup>13</sup> Atin do dumō gey, méuyot gey de ké gétiga kom i fantage bé de ménléhuén kuyug Kristowe. Non amuk gétiga kom i toowe fantag bé ni, énda tete i de fédéw gom loo bé de étew énda i inam ro. <sup>14</sup> Non munur tom bé i Jesuse, ménléhu, tidéw bénó mémébule, atin séfule moso. Mélaw munur tom bé i de ménléhu munur bé Jesuse, tébule ro brab féséfuley Tuluse moso bero modor bé Jesuse.

<sup>15</sup> Ay ni sulaté key i kétoro i Kadnane: I de betom do méuyag séna dob gaiwe séfule i Kadnane, énda géétah tom bé de ménléhu do kuyug Jesuse. <sup>16</sup> Non bé gaiwe séfule

i Kadnane mélus tidew dob lawayo, wén i mékes toow fo métanug, brab émbéréh i gératore télakiy Tuluse, brab émbéréh i témburiy Tuluse. Tidew béno, i de étew munur bé Kristowe do ménléhuén, beroy de sungu tébule. <sup>17</sup> Tidew béno, i de betom do kuyug Jesuse do méuyag séna bé béno gai, sétimu tom betom i de mantu méntébule dob rawéno diyo. Atin sébalak tom bé Kadnane dob rotoro diyo. Tidew béno, diyo tom dob Kadnane taman sa taman. <sup>18</sup> Mélaw séfériyo gom fédew bé de ni do kékéréh gu.

## 5

<sup>1</sup> Do dumogey, énda kailanga key i sémulatane begom fantag bé gaiwe mérigo de ni. <sup>2</sup> Non gétiga kom i fantage bé késéfule i Kadnane moso. Kétékowan moso i de étew de loo bé kékétekoway ségétewe étew ké gégumah i ségétewe ménakaw ké kélungonon. <sup>3</sup> Bé lala i de étew émbéréh maro, "Métanék i ni gai brab énda i makakaid bé ni kékati," sonom béno tékow gégumah i gaiwe mébinasa ro. Atin énda géséliyaha ro de. Atin métékow i kégumah i nan gai loo bé kégumah i gaiwe kéararan i ségétewe libun obor. <sup>4</sup> Endob do dumogu, énda bati gom dob délemone loo bé de étew énda gétiga roy fatute. Mélaw énda fatut gom kétékowan bé kégumah i gaiwe séfule i Kadnane loo bé ségétewe kétékowan ké gégumah i ségétewe ménakaw. <sup>5</sup> I kéluhana kome bati gom dob géfékaya sani dob fangangaturay Tuluse. Enda bati tom dob délemone, sani dob fangangatura Satanase. <sup>6</sup> Mélaw katom démoyun féfidongén i de itunga tom loo bé de étew énda ongot-ongoté roy kégumah i Kadnane. Fatut démoyun tom mingat brab féfioné tom i adat tome brab énda odoro tom i de tete kétayay de lowoh tom. <sup>7</sup> Kélungonon i kéfidong i de étew brab kélungonon soy kéolo ruwe. <sup>8</sup> Endob i betome do bati dob géfékaya énda fatut odoro tom i de tete kétayay de lowoh tom. I betome do munur, fatut iringé tom i sundalowe, non fatut kégalé tom i kénéunur tome bé Tuluse brab kégédaw tome bé de dumotom non been i niy maake futow kémélung bé de kuméng tom. Brab fatut féégété tom i inam tome bé kéfukas tome dob de sala tom non been i niy maake futow sayaf téméléb bé de uléw tom. <sup>9</sup> Non fénemili i Tuluse betom békén inok kukumé no betom. Yamula fénemilién betom inok fukasé no betom sabaf bé Kadnane Jesu Kristo. <sup>10</sup> Non i Jesuse génantino no betom méléhu inok méuyag tom bati dob beene taman sa taman fiyon fo ké ménléhu tomén taloo no méuyag tom séna dob gaiwe séfule mangéy dini. <sup>11</sup> Mélaw fatut fétaus gom i késéfériyo gome fédew brab késétabang gome loo bé rigoné kome béleewe ni.

<sup>12</sup> Atin do dumogey, ongoté key dob begome bé fégadata kom i de gémalbék dob begome, sani de odoro kom fénemili i Kadnane témoiro begom. <sup>13</sup> Basana kom bero brab féimu gom bero sabaf bé galbék ruwe dob begome. Atin kagom sétiboh bé de dumogom munur.

<sup>14</sup> Atin do dumogey, ongoté key dob begome bé bérélh gom dob de faukén bé fatut ro gémalbék. Atin fatut fébagér gom i fédew i de mégilak. Atin fatut tabanga kom i de étew kailanga roy tabange. Atin fatut tingkélo kom i kéluhanay de étew. <sup>15</sup> Féginau gom i de étew bé békén ro sémuli ké wén i réménigo tete dob berowe. Yamula fatut rigo gom fiyo dob de dumogom munur brab dob kéluhanay de étew sénga tékélid.

<sup>16</sup> Atin fatut moror gom sénga tékélid. <sup>17</sup> Brab fatut dasal gom démoyun. <sup>18</sup> Atin fiyon fo ké ati goho kome, fatut fésalamat gom dob Tuluse. Non been i niy kétayay Tuluse rigoné kom sabaf bé kékwaléy gome do dumogesu Kristowe.

<sup>19</sup> Atin kagom alangén i Rémogor i Tuluse. <sup>20</sup> Atin kagom mika bé urete tidew dob Tuluse. <sup>21</sup> Téngkad gom i kéluhanane brab tayakuf gom i fiyowe. <sup>22</sup> Atin féravy gom dob kéluhanay tetee.

<sup>23</sup> I Tuluse, sani émfétanéke bé de fédew gom, féwaléyé no damén begom métintu. Atin diyagané no damén i de lowoh gom brab de rémogor gom brab de fédew gom inok énda i rigoné kom fatut sénditon gom de taman dob gaiwe séfule i Kadnane Jesu Kristo. <sup>24</sup> I Tuluse, sani ménféwaléye begom do munur, rigoné noy ni non toow fo gésarigon.

<sup>25</sup> Do dumogey, dasala kom so begey.

<sup>26</sup> Fatut ségifa gom i kéluhanay de dumogem munur, brab fégito gom i kégédaw gome bero ké séségifa gom.

<sup>27</sup> Atin sabaf bé atura kuwe tidéw dob Kadnane, ongoté ku dob begome bé basa gom i ni sulat dob kéluhanay de dumo tom munur diyaan.

<sup>28</sup> Mégédaw damén begom i Kadna tome Jesu Kristo.

*Pablo*

## I Géruwowe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulatén dob de munur do bati dob ingéde Tesalonika. Dob sunguwe sulat Pablowe, ténoréon i fantage bé késéfule Jesuse. Endob i de dumo bé de étew diyo, énda gésobuto ro de. Mélaw sénulat Pablowe man i ni sulat inok fégétiga no beroy fantage bé késéfule Jesuse, non bé sungu-sunguwe, gégumah i Ségétewe Sébanil bé Kristowe. I ni étew, médooy férigo nuwe tete bé de étew énda munur ro bé Kristowe.

Dob ni sulat, fénfiyo Pablowej fédew i de étew do munur diyo inok fédayday ro munur fiyon fo ké mérasay ro sabaf bé kéunur ruwe.

<sup>1</sup> I begeye, Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, sani de étew i Abay tome Tulus brab Kadnane Jesu Kristo.

<sup>2</sup> I Abaye Tulus brab Kadnane Jesu Kristo, mégédaw ro damén begom brab iray ro damén begom i métanéke fédew.

<sup>3</sup> Do dumo gey, fatut gey démoyun fésalamat dob Tuluse sabaf bé begome. Non toow fo minut méégét i kéunur gome brab minut fo dakél i késégédaw gome. <sup>4</sup> Been i niy funa keye émbéréh bé fiyowe fantage bé begome dob de munur bé Kristowe dob de simbaay Tuluse dob de ségiyo ingéd. Ureté key i fantage bé kéunur gome brab ketingkél gome bé de kéferasay begom brab de mérégén géagéwo kom. <sup>5</sup> Dob kéluhanay de ni, giton métintuy kékukum i Tuluse, atin waléy gom toow fo médait féguléwo no. Atin i funa kome mérasay, sabaf bé kéféguléwoy Tuluse begom. <sup>6</sup> Endob métintuy Tuluse atin mélaw férasayé no moso i de étew émferasay begom béleewe ni. <sup>7-8</sup> Atin kédané noy kérasay gome brab de kagey so kérasay. Rigoné noy ni dob gaiwe téfégito moso i Kadnane Jesus ké séfule tidew dob lawayo kémégal mérino aféy, beroy de barakatan do télaki no. Atin bé béno kukumé noy de étew mika ro bé Tuluse brab de énda munur bé Fiyowe Uret fantage bé Kadna tome Jesus. <sup>9</sup> Mékukum ro mébinasa taman sa taman. Sésuway ro bé Kadnane brab dob barakat ne rémendaw. <sup>10</sup> Mérigoy ni dob gaiy késéfule ne inok dayewéy kéluhanay étew ne brab fégadatay kéluhanay de munur de. Atin géamung gom so dob berowe non ménunur gom bé kéureto keye begom.

<sup>11</sup> Been i niy funa keye démoyun démasal mongot dob Tuluse bé féwaléyé no fiyoy de adat gom loo bé fatute rigonéy de étew fénemili i Tuluse. Ongoté key so dob Beene bé tabanga no begom bé barakat ne inok gérígono kom i fiyowe kétaya kom rigonén sabaf bé kéunur gome de. <sup>12</sup> Mélaw dayewé kom i Kadna tome Jesus, brab i Beene dayewé no so begom. Mérigoy ni sabaf bé kégédaw i Tulus tome brab Kadnane Jesu Kristo.

## 2

### *I késéfule Jesuse*

<sup>1</sup> Do dumo gey, fégétiga key begom i fantage bé késéfule i Kadna tome Jesu Kristo brab kétimu ne betom inok diyo tom dob Beene. Ongoté key dob begome, <sup>2</sup> bé kagom magad mégilak taloo no émbuku i de fédew gom amuk wén i gélingoo kom uret bé énggumahén kun i gaiy késéfule i Kadnane. Kagom munur de fiyon fo ké ségtew kun sénarigoy Tulusey ménbéréhe de taloo no bénréh i ségtewe kun muret taloo no wén kun i sulat tidew dob begeye fantage bé ni. <sup>3</sup> Mélaw kagom fo fédayaén i de étew fagakara ro begom. Non i gaiwe séfule i Kadnane, énda gégumahén taman énda médooy de waléy sébanil bé Tuluse brab téfégitoj Tetee Etew sani tintuwe fo sébanil bé Tuluse, sani mangéye dob emfernovo moso. <sup>4</sup> Atin ay niy rigonéy nan étew: Sébanil bé kéluhanay fengadaféy de étew brab kéluhanay de méméfou kun. Atin toow fo téfégérotor dob kéluhanay de ni. Atin mahur so dob lawi i Tuluse brab mésar diyo atin bérhé no been kun i Tuluse.

<sup>5</sup> Aw énda gétédémo kom i de ni? Bénréh gun i ni dob begome bé do gétah bé kédiyo guwe séna dob begome. <sup>6</sup> Endob bèleewe ni wén i malang bé ni Tete Etew, atin gétiga kom i malange de. Endob téfégitoi ni Tete Etew dob fatute gai. <sup>7</sup> Bèleewe ni, gémalbékén i barakat i ni Tete Etew, éndob mébunéy i de rigoné no. Endob i malange de, taus i kéalang ne de taman mékédan. <sup>8</sup> Tidew béno, i Tetee Etew téfégito. Endob amuk gérumah i Kadnane Jesus, féléhué noy ni Tete Etew bé kényuf ne de brab binasané no dob barakat i kéréndaw ne. <sup>9</sup> Endob amuk gérumah i ni Tete Etew, wén i barakatén tidew dob Satanase. Brab gérigono noy kéluhanay de séségiyo-giyo do mékégaif do galbék do énda toowén non békén tidew dob Tuluse. <sup>10</sup> Brab rémigo do médo do gékelasi do tete inok fagakara noy de étew do méléhu. Méléhu ro non énda ténayakuf roy toowe kétoro inok méfukas ro dob de sala ro. Yamula ménika ro de. <sup>11</sup> Been i niy funay Tuluse fénfégitungén bero bé békéne katabuwan inok munur ro bé de tugi. <sup>12</sup> Mélaw i kéluhanay de étew énda munur ro bé toowe kétoro éndob méuyot ro rémigo tete, kukuméy Tuluse bero.

<sup>13</sup> Do dumo gey, toow fo mégédaw i Kadnane begom. Fatut démoyun gey fésalamat dob Tuluse sabaf bé begom. Non fénemili i Tuluse begom fukasé no bé sunguwe. Hoo, fénwaléyén begom do métintu do étewén bé barakat i Rémogor ne brab dob kéunur gome bé toowe kétoro. <sup>14</sup> Atin sénéngkat i Tuluse begom munur dob Beene bé Fiyowe Uret nuret gey begom, inok kagom soy kéfiyoy Kadna tome Jesu Kristo. <sup>15</sup> Mélaw do dumo gey, féégét gom i kéunur gome brab lékafit gom dob de toow ténero gey begom dob de kéuret gey brab dob sulat geye.

<sup>16-17</sup> I Kadna tome Jesu Kristo brab Abay tome Tulus fébagéré ro damén begom brab féfiyoné ro damén begom inok démoyun gom gérgo brab gembéréh bé fiyowe. Toow fo mégédaw i Tuluse betom, sani émfébagére bé de fédew gom brab émféégéte bé kégéinam tome bé de kéfiyonon irayén.

### 3

<sup>1</sup> Atin do dumo gey, ay niy tamfaday béréré keye begom. Dasala kom begey inok magad mélégéb i kékéréd i Kadnane brab médooy de étew munur dob Beene brab fégadata ro so ségiléw bé de rénigo gom. <sup>2</sup> Dasal gom so dob Tuluse inok énda fidayaé noy de tete étew ferasayé ro begey. Non médooy de étew énda munur ro bé Fiyowe Uret.

<sup>3</sup> Endob toow fo gésarig tom bé Kadnane. Fébagéré noy de fédew gom brab diyagané no begom tidew dob Satanase. <sup>4</sup> Atin sabaf bé kéunur geye bé Kadnane, gésarigo key begom. Gétiga key rigoné kom bèleewe niy de sénugu gey begom brab taus gom so dob de gétundug do gai moso.

<sup>5</sup> I Kadnane fanangguwité no damén begom inok minut méégét i kéféimu gome bé Tuluse brab inok fidaya day gom fo toow sabaf bé kétabang Kristowe.

#### Fatut gémalbék

<sup>6</sup> Do dumo gey, sabaf bé atura keye tidew dob Kadnane Jesu Kristo, sugué key begom féraru dob de faukén do munur, sani de énda modor bé de ténero gey bero. <sup>7</sup> Gétiga kom fatut rigo gom i ségiléwe bé rénigo geye. Enda ménfaükén gey amun diyo gey dob begome. <sup>8</sup> Atin énda nongot gey saén i kéfaguyag geye. Yamula bénléy gey i de amaé key. Atin ménfégéror gey gémalbék fuweh na kélungonon inok énda kérégénan gom sabaf bé begeye. <sup>9</sup> Réni gey i de ni fiyon fo ké wén i kuwagib gey médot bé kéfaguyag geye tidew dob begome. Endob i funa keye énda médot bé kéfaguyag geye tidew dob begome inok iringé kom i fiyowe adat fénggito gey begom. <sup>10</sup> Atin amun diyo gey séna dob begome, ténero gey begom i ni: “I étewe mika gémalbék énda fatutén féamaén.”

<sup>11</sup> I funa keye sémulat bé ni non énggelingoo key wén i do faukén begom énda gémalbék ro. Enda kun i saliyu rigoné ro ké békén furaya fédew roy rigonéy de dumo ro.

<sup>12</sup> Mélaw sabaf bé atura keye tidew dob Kadnane Jesu Kristo, sugué key dob de faukén étew bé rigoné roy fatute. Fatut gémalbék ro inok gédoté roy kéfaguyag ruwe.

<sup>13</sup> Endob i begome, do dumo gey, kagom lugotén rémigo bé fiyowe. <sup>14</sup> Amuk wén i dumo gom énda modorén bé kétoro geye dob ni sulat, fégilolo gom. Tidew béno, kagom

séloyuk de inok waléy mémala. <sup>15</sup> Endob kagom sébanil de, yamula féginau gom loo bé fatute rigoné kom dob de dumo gom munur bé Jesuse.

<sup>16</sup> I Kadnane, sani émfétanéke bé de fédéw tom, toow fo damén fétanéké noy de fédéw gom sénga tékélid fiyon fo ké ati goho kome. Atin diyo damén i Kadnane dob begome kéhuhanan.

<sup>17-18</sup> Sulaté kuy ni bé kagéne kémér. Ségifaé ku begom. Loo bé niy kéfirmana kuwe bé kéluhanay de sulat gu. Loo bé niy késulat guwe.

Mégédaw damén begom kéluhanan i Kadna tome Jesu Kristo.

Pablo

## I Sunguwe sulat Pablowe dob Timoteowe

Ay niy sébaane bé de sénulat Pablowe, sani ménbantuge muret fantag bé Jesu Kristowe. Sénulatén dob ségétéwe lagéy féndawét Timoteo. I Timoteowe ni, been i dumo Pablowe amun ménagéw mangéy muret fantag bé Kristowe. Ténabanga Timoteowey Pablowe atin beeney maake nga Pablowe.

Sénulat Pablowej ni inok féingaté noy Timoteowe fantag bé de tugién do émbéréh énda kun fakay i mamae bé de dumo amaén. Wén soy de ségiyo tugién kétoro ro.

Dob ni sulat, ténero Pablowej fantage bé fiyowe kénéngintulus, atin téneroén soy fantage bé ati klasiy étewe fatut waléy odoroy de munur.

### *1-2 Timoteo,*

Sulata ku beem, sani maake nga gu sabaf bé kéunur me bé Kristowe. I begéne Pablo, sani ségétéwe apostol Jesu Kristowe non i Tuluse brab Jesu Kristowe sénugu ro begén muret fantag bé Kristowe, sani mémukase betom dob de sala tom. Atin i Jesuse, Beeney sarigo tome.

I Abaye Tulus brab Kadna tome Jesu Kristo mégédaw ro damén beem, brab méuray damén i na ruwe beem, atin iray ro damén beem i métanéke fédew.

### *Fantag bé tugiéne kétoro*

<sup>3</sup> Féginauné ku beem loo bé rénigo guwe bé do gétah amun téenagak gu beem bé kéagéw guwe mangéy Masedonia. Kago tékédan dob Efeso, non wén i de étew témoroy diyo bé éndae toow. Mélaw méuyotu de ké géléé mo bero. <sup>4</sup> Béréméh bero bé békénén féganadé roy de kétutul brab de kélabit bé de médo do katufuan funa ro démoyun séédél. I de ni do éntingayén énda fégésobuté ro betom i bantak i Tuluse non i tintuwe aguwon, been i kéunure bé Kristowe. <sup>5</sup> I funa kuwe sémuji bé ni inok ségdaw ro sabaf bé kétagak ruwe bé de sala ro brab sabaf bé fiyoy fédew ruwe brab sabaf bé tintuwe fo kéunur ro.

<sup>6</sup> Endob wén i de étew diyo bénaleng roy de ni inok témantu ro séédél bé éndae lantékén.

<sup>7</sup> Méuyot ro témoroy bénaleng roy de ni inok témantu ro séédél bé éndae lantékén.

<sup>8</sup> Endob i betowe, gétiga to fiyoy kitabe tidew dob Moisese amuk fiyoy késare de. <sup>9</sup> Gétiga to, i kitabe békén rénigo inok kay de fiyo do étew. Yamula rénigoy kitabe inok wén i gémélé bé de tete étew, brab i de étew do ménsala, brab de énda méngintulus, brab de étew énda fégadata roy Tuluse, brab de méméléhu bé de lukés ro brab de méméléhu do étew, <sup>10</sup> brab de étew sétayan bé de békén do bawag ro, brab de bakla, brab de miyag, brab de témuji, brab de témoi bénaleng toow, brab de étew félisé roy toowe kétoro. <sup>11</sup> Atin i ni toow kétoro, tidew dob Fiyowe Uret i ménbantuge barakatan Tulus, sani Fiyowe Uret sénarig dob begéne inok légébé ku.

<sup>12</sup> Fésalamatu fo dob Kadna tome Jesu Kristo, sani émfébagére begén inok gérígono kuy ni galbék. Fésalamatu dob Beene non kénarangén begén mésarigon funa no fénémilién begén inok waléy sugu-sugué no. <sup>13</sup> Fénémilién begén fiyon fo ké bé do gétah ménbéréhu fo tete fantag bé Beene, brab fénrasay gu, brab fénengiras gu. Endob i Tuluse toow fo ménuray i na nuwe begén non énda séna ménunuru, mélaw énda gétiga kuy fatute rigoné ku bé bénou. <sup>14</sup> Atin i Kadna tome toow fo méngédaw begén brab fénunurén begén brab méngédaw begén non been i de niy rigoné nuwe dob de étew do dumo Jesu Kristowe.

<sup>15</sup> Wén i toowe kékérén, fatut tayakuf gom brab unuro kom mano, “I Jesu Kristowe ménangéy dob duniyae ni inok fukasé noy de ménsala do étew inok énda mékukum ro.” Atin begéney toowe fo tete bero kékérén. <sup>16</sup> Endob been i niy funay Tuluse ménuray i na nuwe begén, inok giton i kédakél i kéténgkél Jesu Kristowe bé kékédaw ne begén sani toowe fo tete étew. Mélaw i kékérén de étew munur dob Beene moso, sani de gégeidot bé umule magufusa, gétiga ro toow fo mégédaw i Kristowe. <sup>17</sup> I tintuwe Tulus, sani éndae

giton, brab sani méguléwe bé kéluhanane, brab sani énda i féganayay kéuyag ne taloo no tamana no, médayéw damén brab basanan taman sa taman. Amen!

<sup>18</sup> Timoteo, beemey maake nga gu, sugué ku beem béeleewe, loo bé kékéréhé bénréh i sénarigoy Tuluse fantag bé beeme bé do gétah.

Odor go bé de ni do kékéréh inok gétabana moy de békén toow kétoro loo bé ségétéwe sundalo tabana noy dumo nuwe sébanil. <sup>19</sup> Féégétém i kéunur me brab odoro moy fatute. Non wén i do étew énda rigoné roy gétiga ruwe fatut, funay kéunur ruwe mébinasa. <sup>20</sup> I de dumo bero, been i ro Himeneowe brab Alejandrowe. Endob téna gak gu bero brab kénukum gu bero bé kíray guwe bero dob Satanase inok gétiga ro énda fakay ro émbéréh tete fantag bé Tuluse.

## 2

<sup>1</sup> I toowe fo sungu ongoté ku dob beeme, fatut dasala kom i kéluhanay étewe. Fégédaw-gédaw gom ongot dob Tuluse atin fésalamat gom dob Beene bé kéluhanay de rigoné no dob begome. <sup>2</sup> Fatut dasala kom i de datu brab kéluhanay de méguléw inok métanék i kékati tome atin énda i sétiboh bé lala tome rémigo bé fiyowe loo bé kétayay Tuluse. <sup>3</sup> I funa kuwe mongot bé ni non fiyoy démasale. Been i niy funay Tuluse, sani mémukase betom, mésuwat. <sup>4</sup> I Tuluse méuyot de ké mífukas i kéluhanay de étew inok énda mékukum ro. Brab méuyot so ké gétiga roy toowe kétoro. <sup>5</sup> Non sébaan saén i Tuluse brab sébaan saén i kékédéway Tuluse brab kéilawane, Been i étewe Jesu Kristo. <sup>6</sup> Non i Jesuse, nirayén i férénawa nuwe inok mécédan i kékukume bé kéluhanay étewe. Mélaw dob fatute gai, fénggito noy kéuyot i Tuluse mémukas bé kéluhanay étewe inok énda mékukum ro. <sup>7</sup> Atin been i niy funa nuwe ménemili begén inok waléyu apostol, atin sénuguén begén mangéy dob de békén Judio inok toroé ku bero inok munur ro bé toowe kétoro. Tintu fo bérhéhé kuy toowe, énda fo témugiu.

<sup>8</sup> Dob séngae gonon, méuyotu ké démasal i de lagéy. I de lagéy démasal, fatut fiyoy de adat ro. I de kémér ro tunggulen bé lala ruwe démasal, békén fatut fégérigo sala. Atin i de ni lagéy, békén ro fatut mécérir bé de dumo ro taloo no séédél ro. <sup>9</sup> Atin méuyotu de so ké kémégal i de libun bé fatute kékégal. Enda fatut ro miring bé de libun énda mémala ro. Fatut ro météméd. Mélaw énda fatut fékélébuwané roy émféfiyowe bé de buk ro bé de séségiyo-giyo kífutus taloo no de kékégono bé de bélodon do ono look perlas, taloo no de kékégal bé de balilaga do kégal. <sup>10</sup> Yamula i funa ruwe médayéw non fiyoy de rigoné ro loo bé fatute rigonéy libune méngintulus. <sup>11</sup> Atin i de libun fatut mantés ro brab térfantad ro ké gai kékéganad. <sup>12</sup> Enda tungkasé kuy de libun téromo taloo no sugué roy de lagéy. Fatut mécélingo ro saén. <sup>13</sup> Non Adam i lénimbage sungu, tidéw béo Eba. <sup>14</sup> Atin békén Adam i fénggakara Satanase. Yamula, Eba i fénggakara Satanase inok gáfeliso noy sugu i Tuluse. <sup>15</sup> Endob i de libun, tabangé no bero ké mécéngá ro, amuk fédaday ro munur, brab mégédaw ro, brab térfantad ro, brab rémigo ro fiyo.

## 3

### Fantag bé de odoron

<sup>1</sup> Toow i ni kékéréh mano, “Amuk méuyot i ségétéwe waléy odoroy de munur, toow fo fiyo, non tintu fo fiyoy nan galbék kétaya no.” <sup>2</sup> I ségétéwe odoroy de munur fatut ségétew lagéy énda i salaén funan de témo. Atin fatut ségétew saén i bawag ne. Atin fatut mécéntang i kékégitung ne. Atin fatut énda odoro noy de tete kétayay lowoh ne. Atin fatut fo métintu, brab tayakufé noy de étew dob lawi ne fiyon fo ké énda gélolo no bero. Atin fatut gétiga noy témore. <sup>3</sup> I odoroy de munur énda fatutén molon bé arake taloo no méuyot sétiboh. Yamula fatut métanék i adat ne brab mika sétiboh. Atin énda fatutén ké toow fo méuyot bé kurtæ. <sup>4</sup> I étewe odoroy de munur, fatut fiyoy kékégléw ne bé bawag ne brab de ngaén. I de ngaén fatut odoro roy de suguéen brab fatut fégadate ro démoyun. <sup>5</sup> Non amuk énda gétiga noy méguléwe bé kaane kuréngon, énda so gétiga noy méguléwe bé de munur bé Tuluse. <sup>6</sup> Atin i étewe mantu séna ménwaléy munur bé

Kristowe, békén fatut waléy odoroy de munur. Non amuk mérigoj ni, waléy félangklangka atin mélaw mékukum ségiléw bé Satanase. <sup>7</sup> Atin i étew waléy odoroy de munur, fatut ségétew fégadatay de békén munur inok énda génoé ro de. Mélaw énda gégakara Satanase de funa no gésala.

<sup>8</sup> Atin fantag man bé de tétabang bé simbaane, sani de fédawétén do “dikon”, fatut so fiyoy de adat ro brab do métintu ro do étew. Enda fatut ro molon bé arake taloo no arumién ro. <sup>9</sup> Atin fatut méégét i kéunur ruwe bé towe kétoro, brab énda fatut ruwo-ruwoy de fédew ro. <sup>10</sup> Amuk wén i ségétew méuyot waléy tétabang dob simbaane, fatut téngkadén na métah. Brab amuk énda i funan de témo, fakay waléy “dikon”. <sup>11</sup> Atin i bawag i dikone, fatut fiyoy adat ne. Enda fatutén gémoé bé étew. Fatut mééntang i kégéitung ne. Atin fatut fo mésarigon. <sup>12</sup> Atin i tétabange, fatut ségétew saén i bawag ne. Atin fatut fiyoy kéguléw ne bé bawag ne brab de ngaén. <sup>13</sup> Atin i de tétabang do gémalbék fiyo, fégadatay de munur bero. Atin géfèbaraw ro muret fantag bé kéunur ruwe bé Jesu Kristowe.

<sup>14</sup> I lala guwe ni sémulat dob beeme, wén i inam gu mangéy séko témukaw beem. <sup>15</sup> Endob amuk wén i malang begén, fégétigay ni sulat dob beemey fatute adat tom do étew i Tuluse. Betomey simbaay méuyage Tulus. Betomey maake do liléy brab sérinan, brab i towe kétoro féndiyoén dob betome. <sup>16</sup> Tintu fo gétiga tom i ni: Toow fo fiyoy kétoro i katome kégéintulus fénggitoy Tuluse betom. Non been i ni: I Kristowe ménwaléy kéilawan. Brab i Rémogor i Tuluse fénggitoy noy Kristowe métintu. Atin énggitoy de téaki. Atin wén i do ménuret fantag bé Kristowe dob de békén Judio. Atin médooy de étew dob duniye ni ménunur de. Atin déméniyat mangéy dob lawayo.

#### 4

##### Fantag bé Amaéne

<sup>1</sup> Ménkéntay i kékérél i Rémogor i Tuluse bé wén moso i do étew témérén munur bé towe, brab waléy ro munur bé de tugién do rémogor brab de kétoro i de saitan. <sup>2</sup> I de ni do kétoro tidew dob de témuji étew do ubo-ubo ro saén munur bé Kristowe. Enda tete i de fédew ro ké rémigo ro tete non éndaén gétiga roy fatute. <sup>3</sup> I de ni do étew toroé roy énda kun fakay i mawage brab énda kun fakay i mamae bé de dumo anaén. Endob sedek lénimbag i Tulusey de amaén? I funay Tuluse léminbag bé de amaén inok i betom do gétigan brab munur bé towe kétoro mama tom de. Mélaw fakay tom mama bé de ni amaén amuk giliid tom démasal fésalamat dob Tuluse. <sup>4</sup> Fiyoy kéluhanay de étingayén lénimbag i Tuluse. I kéluhanay de séségiyo-giyo do amaén fatut amaén tom amuk giliid tom démasal fésalamat dob Tuluse. Enda fatut ikaa tom i lénimbag i Tuluse. <sup>5</sup> Gétiga tom féfiyonéy Tulusey de amaé tom non bé kékésalamat tome de, atin non been i niy kétoro i kékérél i Tuluse de.

<sup>6</sup> Toow go fiyo sugu-sugué Jesu Kristowe amuk toroé moy de ni dob de dumo mo munur bé Kristowe. Atin taus go minut waléy fiyo sugu-suguén bé kégéganad me bé Fiyowe Uret brab towe kétoro nunuro mo. <sup>7</sup> Endob kago fégélingoén i de tutul énda médaitén ureténi. Mika i Tuluse bé de ni non békén toow. Yamula fébagérém i kéunur me bé towe kétoro inok rigoné moy kétayay Tuluse. <sup>8-9</sup> Wén i towe kékérél, fatut unuroy de étew mano, “Fiyoy ké fébagéré moy lowoh me. Endob toow na fiyo ké fébagéré moy kéunur me, non wén i lagaén dob de gai béléewe ni brab dob de géguah do gai dob lawayo moso.” <sup>10</sup> Been i niy funa tome mégéror gémalbék, non sémarig tom bé méuyage Tulus, sani mémukase bé kéluhanay de étew, brab tintuwe mémukas bé de étew munur dob Beene.

<sup>11</sup> Mélaw toroém i de ni brab suguém dob de étew. <sup>12</sup> Atin kago fédayaén i de étew énda fégadata ro beem non ménuguéd go séna. Yamula féfiyo moy kékérél me brab adat me brab kégédaw me brab kéunur me brab kérigo muwe bé lowoh me, inok i de munur bé Kristowe iringé ro beem. <sup>13</sup> Atin tantu go basa bé Ménsulate Kékérél i Tuluse dob adafay

de étew taman gégumahu diyaan. Atin toroém bero brab ureto mo bero. <sup>14</sup> Atin kago lifotén i kéfurunge niray i Tuluse beem amun ménbérél i de sénarigoy Tuluse muret atin ténegréy de odoroy de munur i bumbuna muwe. <sup>15</sup> Tantu mo rigoy de ni inok i kéluhanay de étew gito ro minut métintuy adat me rémigo bé kétayay Tuluse. <sup>16</sup> Ingata moy de rigoné mo brab de toroé mo. Non amuk taus go rémigo bé de ni, méfukas go bé de salaém brab méfukas soy de gégélingo beem.

## 5

<sup>1</sup> Kago ugarén i de lukésén lagéy. Yamula féginau mo bero maak do bohém. Atin féginau moy de kénogo lagéy maak do dumō mo sétiman idéng. <sup>2</sup> Atin i de lukés do libun, féginau mo bero maak do idéngém. Atin dob de kénogon, féginau mo bero maak do dumō mo sétiman, idéng, kago dufangén bero.

<sup>3</sup> Atin i de baléw énda i samung ro magifat bero, fégadata mo bero brab tabanga mo bero. <sup>4</sup> Endob amuk wén i do nga i de baléw taloo no do bebe ro, fatut do nga ro brab do bebe roy magifate bero inok baliwana roy kéfagifat i de lukés ro bero brab de bebe ro. Non been i niy kétayay Tuluse rigoné ro, sani kégédawe bé de lukés, tidéw bénoréy bénoréy de ségiyo étew. <sup>5</sup> Endob amuk énda i samung i baléwe magifat de, sémarig dob Tuluse atin démasal fuweh na kélungonon mongot tabang dob Tuluse. <sup>6</sup> Endob i baléwe rigoné noy tetee kétaya no, maak ménléhuén fiyon fo ké méuyag séna. <sup>7</sup> Toroém beroy de ni bénréh gu inok énda i gétébo bero. <sup>8</sup> Endob amuk wén i ségétew munur atin énda fagifaté noy de samungén brab énda fo fétintuné noy kéfagifat ne bé de dumō no sétifon lawi, tétagakén i kéunur ne brab ménwaléy toow na fo tete bé ségétewe énda munur bé Kristowe.

<sup>9</sup> Kago listanén i baléwe dob listanay de baléw fatut tabangan amuk énda séna labi no ném folo gébélantuwa. Atin békén saén i ni, fatut so éndaén mawagén man. <sup>10</sup> Brab fatut toow fo gétigay de étew fiyoy adat ne loo bé fiyowe kéfagifatén bé de ngaén, brab tanggafé noy de kana dob lawi ne, brab urahé noy sékéy i de dumō no munur, brab tabanga noy de étew kérasayan, brab rigoné noy fiyowe sénga tékélid.

<sup>11</sup> Endob kago listanén i de baléw do ménguwéd séna. Non amuk méuyot ro man mawag sabaf bé kétayay de lowoh ro, gétagaka roy galbék Kristowe. <sup>12</sup> Atin amuk rigoné roy ni, énda gétumana roy sunguwe fasad ro bé Kristowe. <sup>13</sup> Atin saliyu na bé ni, waléy ro faukén brab démoyun ro saén sugud-sugud. Atin umana ro nay tetee bé kégéno ruwe bé de étew bé éndae fatut béréhé ro, brab furaya fédew ro. <sup>14</sup> Mélaw dob kagéne de kéfégitung, fiyo ké mawag man ségule i de ménguwéd do baléw brab mégéngé ro, brab fagifaté roy de dumō ro sétifon lawi inok i de étew sébanil betom énda i gébérého ro tete fantag bé betome. <sup>15</sup> Non i de dumō do baléw ménbaleng i de fédew ro atin béléewe ménwaléy ro do kuyug Satanas.

<sup>16</sup> Amuk wén i libun munur bé Kristowe brab wén i do baléw do samungén, fatut fagifaté no. Fatut tabanga no bero inok énda kérégénan i de munur magifat bero. Mélaw i de munur géfagifata roy de baléw énda i do samung ro magifat bero.

<sup>17</sup> I de odoroy de munur, amuk toow fo fiyoy galbék ruwe, médait ro sémahud ruwo takéf, labi na foy de mégéror muret brab téromo bé kékérél i Tuluse. <sup>18</sup> Non wén i Ménsulate Kékérél i Tuluse mano, “Kago ikétén i ba i safie amuk sad-sadé noy faréye inok mérek.” Non fatut mama i safie mérek bé de énrekén. Atin wén soy Ménsulate Kékérél i Tuluse mano, “I gémalbéké, fatut gédoté noy sahud ne.”

<sup>19</sup> Atin kago fégélingoén i kétéboe bé ségétewe odoron taman énda i ruwo gétew taloo no télew gétew émféféngintoow de. <sup>20</sup> Atin géléém dob adafay de munur i ségétewe odoron énda témérénno rémigo tete inok mágilak i de dumō de.

<sup>21</sup> I Tuluse brab Jesu Kristowe brab de télakiy Tuluse, fiyon fo ké énda gito tom bero bénoréy, téngténgé ro betom béléewe ni. Mélaw sugué ku beem bé odoro moy de ni ténero gu beem. Brab kago wén i isu ramigo mo bé de étew. Yamula ségiléw-giléw i kérigo muwe bé kéluhanay de étew. <sup>22</sup> Atin kago magad mémili do étew inok waléy ro odoroy de munur. Non amuk mésala ro, beem soy mésénditon de. Fatut énda i gétébo beem.

<sup>23</sup> Atin kago miném saén wayég. Fatut miném go so kloh arak fégéuwa bé sur me, non démoyun go déméruruun.

<sup>24</sup> Wén i do étew magad fo giton i de sala ro, mélaw magad ro so mékukum. Endob wén soy do étew mébunéy i de sala ro atin énda gito no taman wén i sémusi de. <sup>25</sup> Atin ségiléw so bé ni, wén i do étew toow fo magad giton i de fiyo rigoné ro. Endob wén soy do étew énda fo magad giton i de fiyo rigoné ro, éndob giton so moso.

## 6

<sup>1</sup> I de munur do rifén, fatut toow fo fégadata roy de amu ro sénga tékélid, inok énda i gébéréh tete fantag bé Tuluse taloo no fantag bé kétoro tome. <sup>2</sup> Atin i de munur do rifén, amuk munur soy de amu ro, énda fatut ro mérarék bé de amu ro, non falan so bero do munur brab maak sétiman ro idéng. Yamula fatut umana roy kégéror ruwe gémalbék non i de tabangé ro, falan so bero do gulaané ro dumo ro munur.

Fatut toroém beroy de ni brab frégo mo bero. <sup>3</sup> Amuk wén i étew téromo bé ségiyowe kétoro brab énda magayu no bé toowe kékéréh i Kadna tome Jesu Kristo brab mika bé toowe kétoro fantag bé kétayay Tuluse, <sup>4</sup> toow fo félangka-langka i nan étew brab énda i gétiga no. Wén i tete kétaya no séédél brab ménigiras, brab mantém fiyon fo ké énda i funa no, <sup>5</sup> brab méuyot fo séédél bé de dumo étew tete i de kégéitung ro brab de étew do éndaén munur ro bé toowe kétoro. I de ni do étew marok waléy ro kawasa bé kékéngintulus ruwe.

<sup>6</sup> Endob i toowe, i de tintu do ménigintulus maak do kawasa amuk fiyo ronén bé kéluhanay éntingayéne karo, énda mingar ro bé ségiyowe. <sup>7</sup> Non bé kékumah tome, énda i nuwit tom. Brab amuk méléhu tom, énda soy uwité tom. <sup>8</sup> Mélaw, amuk wén i amaé tom brab kégal tom, fatut fiyo tom den. <sup>9</sup> Endob i de étew toow fo méuyot waléy kawasa, magad ro fo métukawan mésala bé de tete brab do dufang kétaya ro, funa ro mébinasa brab méléhu. <sup>10</sup> Non i kétayane bé kurtaey funay étewe rémigo bé kéluhanay kélasiy tete. Wén i do étew toow fo méuyot ro bé kurtae, funa ro témérén munur bé Kristowe brab funa ro toow fo tete i de fédew ro.

<sup>11</sup> Endob i beeme, Timoteo, ségétew go sugu-suguéy Tuluse. Mélaw féravy go dob de ni do adat. Brab télama mo rigoj métintuwe brab kétayay Tuluse. Atin féégétém i kékunur me, brab fégédaw go bé de dumo mo, brab tingkél go, brab fétanékém i adat me. <sup>12</sup> Atin fégéror go rigo bé fatute sabaf bé kékunur me, loo bé ségétewe toow fo méraan léméntu sekuya. Atin dotém i umule magufusa. Non i funay Tuluse beem ménémili waléy munur inok gédoté moy umule magufusa. Atin énggédotém i umule magufusa non fénayagém i Kristowe dob adafay médoowe étew. <sup>13</sup> I Tuluse, sani muyage bé kéluhanay éntingayéne, brab Jesu Kristowe, sani ménbéréhe bé toowe dob adafa Ponsio Pilatowe téngténgé ro betom béléewe ni. Mélaw sugué ku beem bé <sup>14</sup> tintu mo fo odoron i de sénugu gu beem brab rigo mo inok énda i gétébo beem. Rigo moy ni taman dob késéfule i Kadna tome Jesu Kristo. <sup>15</sup> Féséfuleéy Tulusey Jesuse dob fatute gai. Atin i Tuluse, Beeney barakatane máguléw bé kéluhanane, brab Beeney odoroy de odoron brab Kadnay de datu. <sup>16</sup> Been say méuyage tidew féganay brab méuyag so taman sa taman. Brab bati dob gégékayae énda i géfégédét de. Enda i ségétew énggégito de taloo no wén i gérito de. Médayéw damén i Tuluse brab máguléw damén taman sa taman. Amen.

<sup>17</sup> Atin i de kawasa do munur, bérhém bero bé békén ro félangka-langka brab békén ro sémarig bé de kurta ro taloo no de éntingayén do karo, non magad so mékédan. Yamula fatut sémarig ro bé Tuluse, sani témantuwe mirayan betom bé kéluhanay éntingayéne inok fiyoy goho tome. <sup>18</sup> Toroém i de kawasa rémigo fiyo, inok maak kawasa ro bé fiyowe rigoné ro. Fatut ro mágédaw brab fatut miray ro tabang dob de ségiyo atin fatut tukidé roy de languntama ro. <sup>19</sup> Amuk rigoné roy ni, wén i gédoté ro tidew dob Tuluse dob de gai gérumah moso funa ro tintu kawasa, brab énda mékédan no taman sa taman. Atin gédoté roy tintuwe umul magufusa.

<sup>20</sup> Timoteo, kago tagakén i toowe kétoro sénarig dob beeme. Kago fégélingoén i de késéuret-uret ikaay Tuluse. Atin férayu go dob de dufang kéfégitung i de étew fédawété ro “Kégettigan.” <sup>21</sup> Non wén i do étew émbéréh wén kun i kégétiga ro. Endob been i niy funa ruwe téménréen munur.

Mégédaw damén i Tuluse begom.

*Pablo*

## I Géruwowe Sulat Pablowe dob Timoteowe

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulat Pablowe dob Timoteowe, sani téménabangane de lémégéb bé Fiyowe Uret. Amun sénulat Pablowej ni, ménférисunén sabaf bé kéuret ne fantag bé Kristowe. Gétiga no éndaén mérugayén taman féléhuénén. Mélaw sénulatén i ni sulat dob Timoteowe inok sarigé noy galbék ne dob beene, atin inok fébagéré noy fédéw Timoteowe inok énda témérén no témodo bé toowe fantag bé Jesu Kristowe.

<sup>1-2</sup> Timoteo,

Sulata ku beem maak ségétew nga gu gulaané ku. I begéne Pablo ségétew apostol Jesu Kristowe non been i niy kétayay Tuluse. Sénuguén begén inok ureté kuy fantage bé mantuwe umul fénasadén betom, sani umule magufusa énggédot tom sabaf bé kéunur tome bé Jesu Kristowe. I Abaye Tulus brab Kadna tome Jesu Kristo mégédaw ro damén beem brab méuray damén i na ruwe beem brab iray ro damén beem i métanéke fédéw.

<sup>3</sup> Begén i ségétewé sugu-suguéy Tuluse brab fiyoy fédéw guwe bé kérigo guwe bé galbék i Tuluse loo bé rénigoy de katufua ku. Atin fuweh na kélungonon fésalamatu dob Tuluse démasal ongoté ku dob Beene bé tabanga no beem. <sup>4</sup> Toowu fo mégundoy beem. Atin gétédémo kuy kékérew me amun ténagak gu beem. Méuyotu géségito man beem inok mororu fo man. <sup>5</sup> Gétédémo kuy tintuwe kéunurém, ségiléw bé kéunur i bebe me Loida brab idéng me Eunis. Gétiga kuy méégét soy kaame kéunur. <sup>6</sup> Atin sabaf bé ni, fefégecédem gu beem bé fatut fébagérém i kífurunge niray i Tuluse beem amun ténégé ku beem. <sup>7</sup> Non i Tuluse énda nirayén betom i Rémogor ne inok talaw tom. Yamula nirayén betom i Rémogor ne inok émbaraw tom brab inok ségédaw tom brab inok gérígono tom i fatute.

<sup>8</sup> Mélaw kago mémala muret fantag bé Kadna tome, brab kago mémala fantag bé begéne sani ménférisu sabaf bé kéunur guwe dob Beene. Yamula amung go bé kérasay guwe sabaf bé Fiyowe Uret. Gérígono moy ni non fébagéréy Tuluse beem. <sup>9</sup> I Tuluse fénukasén betom dob de sala tom, brab fénémilién betom waléy do étewén. Rénigo noy ni békén sabaf bé fiyowe rénigo tom. Yamula fénukasén betom sabaf bé kaane funan brab sabaf bé kégédaw ne betom bé énda séna ménlimbag i duniya de. Atin i kégédaw ne betom fénagéwén dob Jesu Kristowe. <sup>10</sup> Atin béleewe ni fénggito noy kégédaw ne bé kégumah Jesu Kristowe sani mémukase betom dob de sala tom. Atin i Jesuse kenda noy barakat i kéléhue brab fénggétiga no betom i umule magufusa fénagéw dob Fiyowe Uret.

<sup>11</sup> Atin i Tuluse fénémilién begén waléy apostol inok ureté ku brab toroé kuy ni Fiyo Uret. <sup>12</sup> Been i niy funa kuwe mérasay béleewe ni. Endob énda mékédan i késarig guwe, non toow fo gétiga kuy Tuluse unuro ku brab gétiga ku diyagané no begén taman gérumah i gaiwe séfule i Kadnane inok gérígono kuy galbéké sénarigén dob begéne. <sup>13</sup> Fédaydayém i kéodoro muwe bé de toow kóbérén ténero gu beem. Atin fédayday go unur bé Tuluse brab fégédaw go bé de dumo mo. Gérígono moy ni non begom i de dumo Kristowe. <sup>14</sup> Bantaya moy toowe kétoro sénarig dob beeme. Gérígono moy ni sabaf bé barakat i Rémogor i Tuluse bati dob betome.

<sup>15</sup> Gétiga moy kétagak i kéluhanay de dumo gu munur begén dob Asia, fiyon i ro Figelowe brab Hermogenese. <sup>16</sup> Endob féfiyonéy Tuluse damén i Onesiforowe brab de samungén. Non médofo gule fénoror ro begén. Enda mémala ro fantag begén ségétewu férisu. <sup>17</sup> Yamula, amun énggumah i Onesiforowe dob Roma, fénagayasén begén sénléd taman énggito no begén. <sup>18</sup> Toow fo gétiga moy kétabanga nuwe begén dob ingéde Efeso. Mélaw mégédaw damén i Kadnane de dob késfule ne moso mangéy kémukum.

kétoro gu nuret gu dob de médo do étew. Mélaw i beeme, fatut toroém soy de étew gésarigo mo inok gétoro ro so dob de ségiyo.

<sup>3</sup> Fatut amung go bé kérasay guwe sabaf bé kéunur guwe, inok waléy go so sugu-sugué Jesu Kristowe mérásay ségiléw bé fiyowe sundalo. <sup>4</sup> I sundalowe énda furaya fédéwén i de rigonén békén kay sundalowe. Yamula rigoné noy funay odoro nuwe mésuwat. <sup>5</sup> Atin i sugu-suguéy Tuluse ségiléw bé ségétewe sékuya léméntu. Enda gétaba no saliyu ké odoro noy de sugu bé késékuya. <sup>6</sup> Atin i sugu-suguéy Tuluse ségiléw so bé ségétewe mégéror gémalbék dob fantade. Fatut been i sunguwe gégédot bé kéntew ne. <sup>7</sup> Fétuntayém i de ni do sénulat gu, non i Kadnane feféfésobutén beem i kéluhanay de ni.

<sup>8</sup> Fégétédémém i Jesu Kristowe, sani séfu Datu Dabide. Ménléhuén, éndob méntébule. Been i niy Fiyowe ni Uret toroé ku, <sup>9</sup> funa ku mérásay béléewe ni, nikétu bé sangkalie maak ségétew ménénakaw. Endob i kékérél i Tuluse énda ménikétén! <sup>10</sup> Been i niy funa kuwe ni fédayday témingkél bé kéluhanay de kérasay, inok gétabanga kuy de étew fénémili i Tuluse, inok méfukas ro so bé de sala ro sabaf bé kéunur ruwe bé Jesu Kristowe brab inok toow fo fiyoy goho ruwe beroy Tuluse taman sa taman. <sup>11</sup> Wén i toowe kékérél mano, “Amuk séréngan tom de méléhu bé kégantino Jesuse betom, séréngan tom de so méuyag taman sa taman. <sup>12</sup> Atin amuk témingkél tom bé de kékérasay betom, gégumah so moso i gaiwe méguléw tom séréngan bé Jesuse. Endob amuk dirungé tom i Jesuse bé békén tom do kuyugén, dirungé no so betom. <sup>13</sup> Atin fiyon fo ké énda géfédayday tom rémigo bé kétaya Jesuse, fédayday so fo rémigo bé ati bénréh ne rigoné no dob betome. Non énda fakayén ké énda tumané noy kékérél ne.”

<sup>14</sup> Feféfétédémém bé de munur diyaan i fantage bé de ni. Suguém bero dob adafay Tuluse bé békén ro séédél fantag bé atag i kékérél saén. Non énda gédotén i kéfionone bé késéédéle loo bé ni, yamula mébinasa saén i kéunur i de mégélingo de. <sup>15</sup> Rigo moy kéluhanay gérigono muwe inok mésuwat i Tuluse bé galbék me. Mélaw énda i funa mo mémala brab katabawan i kétoro me bé toow i kékérél i Tuluse. <sup>16</sup> Férayu go dob de énda do lantékén késéuret-uret ikaay Tuluse, non i de étew rémigo bé ni minut ro méravy dob Tuluse. <sup>17</sup> I kétoro i de énda méngintulus, ségiléw bé de toow fo mékébinasa kélazing magad fo témunoh dob lowohe. Ro Himeneo brab Fileto i ruwowe gétew dumoy de ni témore. <sup>18</sup> Ténagak roy toowe aguwon brab béninasa roy kéunur i de dumo bé de munur. Non bénréh roy énggilidén kun i kétébule tome. <sup>19</sup> Endob i toowe kétoro i Tuluse ségiléw bé toowe fo dakél batéw non énda émfarino. Non wén i Ménsulate Kékérél i Tuluse mano, “I Kadnane, gétiga noy ati kaane do étew.” Brab wén soy ségiyowe Ménsulat Kékérél i Tuluse mano, “I étewe émbérél bé been i étew i Kadnane, fatut tagaké noy de tete rigoné no.”

<sup>20</sup> Dob dakéle lawi, wén i do séségiyo-ségiyo do biléw brab do limfung diyo. I de dumo de do bélwon brab do filak. Atin i de dumo de do kayew rénigo do biléw brab i de dumo de métégas fantad rénigo do biléw. Mélaw i gefee de, usaré noy de balilaga de amuk wén i do gérotor kana no. Atin i de dumo de usaré ro sénga fuweh. <sup>21</sup> Ségiléw soy de ni bé étewe. Amuk toow fo malinis i fédéw i ségétewe étew bé kétakag ne bé de tete adatén, maak do bélwon tamuk i Tuluse usaré no dob fiyowe galbék, non médait usaréy Tuluse dob fiyowe galbék. <sup>22</sup> Mélaw, férayu go dob de tete kétayay lowoh i ménguwéde étew. Atin télama mo rigoy métintuwe, brab fébagérém i kéunur me, brab fégédaw go démoyun, brab fétanékém i de fédéw i de dumo mo inok énda i sétiboh. Non been i niy adat i de fiyo étew démasal dob Kadnane mongot tabang. <sup>23</sup> Atin férayu go dob de dufang késéédél énda i lantékén. Non been i niy funay de étew gésékérit. <sup>24</sup> Enda fatut séédél i sugu-suguéy Kadnane. Yamula fatut mégédaw bé kéluhanane. Brab fatut fiyo brab témingkél bé kétoro ne. <sup>25</sup> Enda fatutén mékérít, yamula fatut féfioné noy kétoro ne bé de sébanil de, inok fégalinéy Tuluse keeyén i de fédéw ro atin gésobuto ro mélaw i

toowe. <sup>26</sup> Tidéw béno, mééntang i de kéfégitung ro brab géféraréy ro tidéw dob Satanase, sani kéménéfoe bero inok fégésé no bero modor bé kétaya nuwe.

### 3

<sup>1</sup> Fégétédémém i ni. Dob tamfaday de gai, toow fo moso mérégén. <sup>2</sup> I de étew moso, do méitung brab arumén, brab do toow fo félangka-langka, brab do tete i de kégébaa ro, brab énda odoro roy de sugu i de lukés ro, brab do énda fésalamat ro, brab do mika ro modor bé de sugu i Tuluse. <sup>3</sup> Atin énda fo mégédaw ro, brab énda méuray i na ruwe bé dumo ruwe, brab do émbagér gémeno fégébinasa ro bé dumo ruwe, brab do magad sétiboh brab mékérit, brab mika ro bé fiyowe. <sup>4</sup> Békén saén i de ni, do tugién ro fo, brab énda fégitungé roy de tete rigoné ro, brab do félangka-langka ro fo, brab énda méimu ro bé Tuluse éndob rigoné ro saén i de kétayay de karo lowoh. <sup>5</sup> Atin ubo-ubo fénagadafé roy Tuluse, éndob énda munur ro bé barakat ne. Férayu go dob de ni do étew. <sup>6</sup> I de dumo bero, mahur ro dob de lawi inok toroé ro brab féguléwo roy de libun énda émbagér i de fédew ro brab mégilak ro sabaf bé de sala ro, atin médooy de tete kétaya ro. <sup>7</sup> Been i de niy de libun toow fo télamané ro féganadén i toowe éndob énda fo gésobuto ro de. <sup>8</sup> Ségiléw so bé késébanil ro Janese brab Jambrese bé Moisesey késébanil i de ni do lagéy bé toowe kétoro. Enda foy lanték i de kéfégitung ro brab békén toow i kéunur ruwe. <sup>9</sup> Endob énda mégulit i de rigoné ro, non gitoy kéluhanay de étew i kédufang ruwe, ségiléw bé kégitoj de étew bé kédufang ro Janese bero Jambrese.

<sup>10</sup> Endob i beeme Timoteo, gétiga moy kétoro guwe brab adat guwe brab funa kuwe gémalbék. Atin énggito moy kéunur guwe brab kétinkél guwe brab kégédaw guwe brab kéfédayday guwe fiyon fo ké gai mérégén. <sup>11</sup> Atin énggito moy kéferasaye begén. Brab énggétiga moy ménrigowe dob begéne dob Antiokia, brab dob Ikonium, brab dob Listra. Toow fo gétimal i kéferasaye begén dob de ni do ingéd. Endob té nabangay Tuluse begén dob kéluhanay de ni inok énda mébinasawu. <sup>12</sup> Atin béréhé ku beem i toowe, i kéluhanay de étew méuyot modor bé kétayay Tuluse sabaf bé kéunur ruwe bé Jesu Kristowe, toow ro fo férasayén kéluhanan. <sup>13</sup> Endob i de tete étew brab ubo-ubo saén i de kéunur ro, toow fo minut ro tete. Géfagakara roy de ségiyo étew bé de kétugié ro brab fagakara ro soy karowe lowoh. <sup>14</sup> Endob i beeme, fétausém i kéunur me bé toowe ténoréen beem brab nunuro mo. Non gétiga moy de téenoréen beem. <sup>15</sup> Brab gétédémo mo tidéw fanay kééngáém, énggésobuto mon i Ménslate Kébérén i Tuluse. Atin been i niy ménfégétigane beem inok mafukas go dob de salaém sabaf bé kéunur me bé Jesu Kristowe. <sup>16</sup> Atin i kéluhanay de Ménslat Kébérén i Tuluse, sénulat i de étew non fénémanduoy Tuluse de bero. Atin i kéluhanay de ni do ménslat fiyo fégétoro bé toowe, brab fégéféeéntang bé de tugi, brab fégéglé bé tetee, brab fégétoro bé métintuwe adat. <sup>17</sup> Mélaw dob kégéganade de, i étew i Tuluse waléy furung brab gérigo bé kéluhanay de séségiyo-giyo do fiyo galbék.

### 4

<sup>1</sup> Maak diyo to dob adafay Tuluse brab Jesu Kristowe, sani séfulee moso brab méguléw brab kémukum bé kéluhanay de étew, do méuyag loo soy do ménléhu. Mélaw sugué ku beem, <sup>2</sup> bé uretém i kébérén i Tuluse. Fatut tafayém démoyun inok fiyon fo ké ati gaiwe de, géuret go, fiyon fo ké mika mégélingo i de étew. Féégétém i kétéunur me bero. Géléém i de étew bé békén ro rémigo tete, brab féginau mo bero. Atin fatut tingkélo moy kétoro me bero. <sup>3</sup> Gégumah moso i gaiwe éndaén fégélingoéy de étew i toowe kétoro. Yamula odoro roy de tete kétaya ro. Atin séméléd ro bé de maistéro do témore saén bé de karo do kétayan atin fétoro ro bero. <sup>4</sup> Atin éndaén fo fégélingoé roy toowe kétoro. Yamula fégélingoé ro saén i de békén do toow do tutul. <sup>5</sup> Endob i beeme, fégitung go fiyo inok gérigo moy métintuwe sénga tékélid, fiyon fo ké atiy gégumahe mérégén dob beeme. Atin fédidaygo fiyon fo ké kérégénan go. Atin fétausém i galbék me muret bé

Fiyowe Uret, brab rigo moy kéluhanay kétayay Tuluse rigoné mo non beem i sugu-sugué nuwe.

<sup>6</sup> I begéne maak ségétéwu tulak non énggumahén i gaiwe méléhuun. <sup>7</sup> Enggilid gun i kéluhanay fatute rigoné ku, ségiléw bé kégélibid i ségétéwe sékuya léméntu. Enggilid gun i galbéke niray i Tuluse begén. Atin énda ménkédan i kéunur guwe bé toowe kétoro. <sup>8</sup> Atin dob gaiwe kémukum moso i Kadnane, gédoté kuy barase kay de métintu do étew i Kadnane, sani métintuwe kémukum. Atin békén saén begén i gégedote bé ni baras, yamula irayén so dob kéluhanay de étew toow fo ménggundoy bé Kristowe brab ongot-ongoté roy késéfule ne.

<sup>9</sup> Timoteo, toow fo télama moy magayase mangéy dini. <sup>10</sup> I Demase, té nagak non begén sabaf bé kégulaa nuwe bé de éntingayén dob duniyae ni. Mélaw ménangéy dob ingéde Tesalonika. Atin i Kresentewe ménangéy Galasia, atin i Titoe ménangéy Dalmasia. <sup>11</sup> Lukas saén i dumo guwe dini. Angéyém i Markose brab uwitém mangéy dini non gétabanga no begén bé de galbék gu dini. <sup>12</sup> Sénugu guy Tikikowe mangéy dob ingéde Efeso. <sup>13</sup> Amuk mangéy go dini, uwitém i mégéfole kégal gu fénled gu dob lawi Karpowe dob Troas. UWITÉM soy de libro gu, labi na foy de sulat gu.

<sup>14</sup> I Alejandrowe, sani fandaye galang, toow fo tete i rénigo nuwe dob begéne. Endob Kadnan séden i kémukume de. <sup>15</sup> Atin ingata mo non toow fo émbagér i kéuret ne sébanil bé de kétoro tom.

<sup>16</sup> Enda i dumo gu bé sunguwe kéamfilo ku bé lowoh guwe non té nagak ro begén kéluhanan. Fésagadéy Tuluse damén bero. <sup>17</sup> Endob énda té nagak i Kadnane begén. Been i dumo guwe brab fénbagérén begén, inok énggureto kuy kéluhanay Fiyowe Uret dob kéluhanay de békén Judio. Atin té nabanga no begén inok énda géféléhuoy de tete étew begén. <sup>18</sup> Atin gétiga ku, tabangay Kadnane begén inok énda gébinasana ro begén. Atin uwité no begén mangéy dob kégélibéw ne dob lawayo énda i sug-sug gu. Médayéw damén i Kadnane taman sa taman. Amen!

<sup>19</sup> Ségifaém begén i de sébawag ro Prisila brab Akila, brab kéluhanay de étew dob lawi Onesiforowe. <sup>20</sup> I Erastowe ménbati dob ingéde Korinto, brab té nagak guy Trofimowe dob Mileto non démeruun. <sup>21</sup> Télama mo foy mangéye dini lokut énda séna gumah i gaiy mélégénéye. I ro Ebulowe, Pudente, Lino, Klaudia, brab kéluhanay de dumo tom do munur ségifaé ro beem.

<sup>22</sup> Diyo damén i Kadnane dob beeme. Atin mégédaw damén i Tuluse begom kéluhanan.  
Pablo

## I Sulat Pablowe dob Ségétéwe Lagéy Féndawét Tito

Ay niy sébaane bé de sénulat Pablo, sani ménbantuge muret fantag bé Jesu Kristowe. Sénulatén i ni dob ségétéwe lagéy féndawét Tito, sani témabangane de bé kélégéb ne bé Fiyowe Uret.

Dob ni sulat, ténero Pablowey ati klasiy étewe fakay waléy odoroy de munur. Ténoroén soy fantage bé fiyowe adat i de munur bé Jesu Kristowe.

<sup>1</sup> Tito,

I begéne, Pablo sani sugu-suguéy Tuluse brab ségétew apostol Jesu Kristowe. Begéney fénemili i Tuluse inok sugué no begén mangéy témabang émfébagér bé kéunur i de étew fénemili i Tuluse brab inok fefégesobut gu beroy towe kétoro i katome kéféngintulus. <sup>2</sup> I ségiyowe de funa ku sémugu, inok gésobuto ro gésarig ro bé méuyag ro taman sa taman. I Tuluse, been i niy fénasad ne dob betome tidew féganay bé énda séna ménlimbag i duniyae de, bé irayén betom i umule magufusa. Atin gétiga tom énda fakayén ké énda tumanéy Tulusey fasad ne. <sup>3</sup> Atin béléewe niy gaiwe fégétiga noy kékéréh ne. Non sénarigén dob begéney kékéréh ne brab ureté ku non been i niy sénugu i Tulus tome mémukas.

<sup>4</sup> Sémulatu mangéy dob beeme, sani ménwaléye maak tintu nga gu bé kéunur tuwe bé Jesuse. I Abaye Tulus brab Jesu Kristowe, sani mémukase betom dob de sala tom, mégédaw damén beem, brab iray ro damén beem i métanéke fédew.

<sup>5</sup> I funa kuwe téménagak beem diyoan dob bungéde Kreta, inok géfégilido moy galbék tome, brab inok géfemili go do étew waléy odoroy de munur dob séngae ingéd diyo. Fégétédémém i de kétoro gu fantag bé de ni. <sup>6</sup> I fémilié muwe odoron, fatut ségétew lagéy énda météboén. Atin fatut ségétew saén i bawag ne. Atin i de ngaén, fatut do munur ro brab énda karangéy de étew bero do dufang taloo no mémélis bé de suguéen. <sup>7</sup> I odorone, fatut ségétew énda météboén, non beeney sarigone bé galbék i Tuluse. Enda fatutén félangka-langka, taloo no magad mékérít, taloo no miném arak taman molon, taloo no méuyot sétiboh, taloo no arumén bé kurtae. <sup>8</sup> I odorone, fatut féfiyoné noy kékagifat ne bé de kana no. Brab fatut méuyot rémigo fiyo. Fatut métintuy kérigo nuwe bé de dumo no atin rigoné noy kétayay Tuluse. Brab fatut énda odoro noy de tete kétayay lowoh ne. <sup>9</sup> Atin fatut toroé no saén i atiy modore bé towe kétoro, sani mésarigone kétoro to. Amuk rigoné noy ni, waléy émbagér i kéunur i de étew bé towe kétoro. Atin géfégito no énda katabuwan i kékéréh i de étew sébanil bé towe kétoro.

<sup>10</sup> Non médooy de étew mika mégélingo bé towe kétoro brab duraté ro soy de ségiyo étew bé de tugi kétoro ro énda i do lantékén, labi na foy kétoro i de munur do Judio.

<sup>11</sup> Fatut fo géléén ro inok éndaén témoro ro. Non gukété roy de ségékuréng bé de kétoro ro énda fatutén toroén. I funa ruwe saén témoro loo bé nan non méuyot ro saén kémurta. Fatut ro damén mémala. <sup>12</sup> Bé gétahe wén i ségétewé béliyan tidew so diyaan dob Kreta, ménbéréh mano, “I de étew dob Kreta do toow fo tete brab do tugién. Faulén ro so, éndob do arumén ro mama.” <sup>13</sup> Toow i nan bénréhén. Mélaw géléém fo bero toow inok waléy fiyoy kéunur ruwe. <sup>14</sup> Brab inok éndaén munur ro bé de békén toow do tutul i de Judio loo soy de sugu i de étew mika bé towe kétoro. <sup>15</sup> I étewe malinis dob adafay Tuluse, karangé noy kéluhanay éntingayéne malinis. Endob énda i malinis dob de étew énda séna malinis i de fédew ro brab énda séna munur ro bé Kristowe non énda séna mélénis i de itunga ro brab énda mémala ro bé de sala ro. <sup>16</sup> Béréhé ro gétiga ro kun i Tuluse, éndob giton dob de tete rigoné ro énda gétiga roy Tuluse. Toow fo tete i de adat ro brab énda modor ro bé fatute. Enda médait ro rémigo fiyo.

odoro roy de tete kétayay de lowoh ro. Atin fatut féégété roy kéunur ruwe bé Kristowe, brab fatut mégédaw ro bé de dumo ro, brab fatut ro témingkél.<sup>3</sup> Atin loo so bé niy toroé muwe bé de lukés libun bé fatut ro rémigo fiyo loo bé kétayay Tuluse. Békén ro fatut géméno, taloo no démoyun ro miném arak. Atin fatut témore ro fiyo,<sup>4</sup> inok métoro i de ménguwéd do libun bé féimué roy de bawag ro brab de nga ro,<sup>5</sup> brab fatut énda odoro roy de tete kétaya ro taloo no de tete kétayay de lowoh ro. Brab fatut fégéror ro gémalbék dob de lawi ro, brab fatut odoro roy sugu i de bawag ro, inok énda i émbéréh tete fantag bé kébéréd i Tuluse unuro tom.

<sup>6</sup> Atin loo so bé niy toroé muwe dob de ménguwéd do lagéy bé fatut énda odoro roy de tete kétaya ro.<sup>7</sup> Atin i beeme, fatut féfiyo moy de rigoné mo, inok iringéy de dumo étew beem. Fatut toroé moy toowe, brab kago séfoyok bé lala me témore.<sup>8</sup> Atin usarém i fiyowe kébéréd ké témore go inok énda i géadowoy bé de béréhé mo. Mélaw i de sébanil beto mémala ro non énda gétéboo ro beto.

<sup>9</sup> Toroém dob de rifén bé fatut odoro roy sugu i de amu ro brab fatut rigoné roy mékésuwate saén. Békén ro fatut séédél bé de amu ro.<sup>10</sup> Békén ro ménakaw. Yamula, fatut féténgténg ro bé de amu ro bé démoyun ro rémigo fiyo brab mésarigon ro. I de munur do rifén, amuk rigoné roy ni, médayéw i kétoroe fantag bé Tulus tome mémukas betom dob de sala tom.

<sup>11</sup> I kégédaw i Tuluse, sani funay de étew méfukas, fénggito no dob kéluhanay de étew.  
<sup>12</sup> Atin i ni kégédaw, fégétiga no betom bé fatut tagaké tom i de tete rigonén kéikaay Tuluse, brab téreño tom i kéodoro tome bé de tete kétayay de lowoh tom, inok métintu tom brab rémigo tom fiyo loo bé kétayay Tuluse amuk batí tom séna dob duniyae ni,  
<sup>13</sup> bé lala i kéongot-ongot tome bé fiyowe fo gai séfule i toowe fo barakatan Tulus tom Jesu Kristo, sani mémukase betom. Bé bénou, giton i kérédaw ne. I késéfule ne, been i niy inam tome.<sup>14</sup> Nirayén i férénawa nuwe génantino no betom inok fukasé no betom dob kéluhanay tetee. Atin inok féwaléyé no betom do malinis do étewén méuyot rémigo fiyo.

<sup>15</sup> Toroém i de ni. Wén i atura mo méguléw bé de étew diyoan. Mélaw usarém i atur me máginau bero brab géléém bero ké rémigo ro tete. Atin kago fédayaén bero énda fégadata ro beem.

### 3

<sup>1</sup> Fefégétédémém bé de munur diyaan bé fatut odoro roy de sugu i de méguléw do gémamak kukuman. Fatut mamung ro bé de udenén bé de fiyo rigonéy de gémamak kukuman.<sup>2</sup> Béréhém bero bé békén ro fatut émbéréh tete fantag bé de étew taloo no sétiboh ro. Yamula fatut ro rémigo fiyo dob kéluhanay de étew, brab fatut ro émbéréh fiyo dob kéluhanay de étew.<sup>3</sup> Non i betome so do munur, bé do gétah, do dufang tom brab énda ménodor tom bé de sugu i Tuluse brab énda énggétiga tom i fatute. Brab ménodor tom fo toow bé kéluhanay de tete kétayay de lowoh tom. Démoyn rénigo tom i tetee, brab toow fo médaléw tom. I de dumo do étew mérarék ro betom brab mérarék tom so bero.<sup>4</sup> Endob fukaséy Tuluse betom, non amuk fénggito noy kégédaw ne betom,<sup>5</sup> kenda noy de sala tom. Rénigo noy ni békén sabaf bé fiyowe rénigo tom, yamula sabaf bé kéuray i na nuwe betom. Fénukasén betom bé kélénis i Rémoor i Tuluse betom, sani kéumah tome man ségule inok wén i mantu umul tom brab mantu adat tom taman sa taman.<sup>6</sup> I Tuluse ténantuno no betom nirayan bé Rémoor ne fénagéwén dob Jesu Kristowe, sani mémukase betom.<sup>7</sup> Rénigo noy ni inok waléy tom métintu dob adafay Tuluse sabaf bé kégédaw ne betom, brab inok gédoté tom i umule magufusa, sani ongot-ongoté tome.  
<sup>8</sup> Toow i ni kétoro.

Méuyotu de ké toroé moy de ni dob de munur bé Tuluse diyaan inok waléy ro rémigo bé fiyowe galbék. Non amuk fiyoy galbék ruwe, been i noy fégétabange bé de ségiyo étew.<sup>9</sup> Endob kago mamung bé de késéédél énda i lantékén. Brab kago fégélingoén i toowe fo métaah kélabit bé de katufuan brab de késékérit fantag bé kitabe. I kéluhanay

de ni do énda i lantékén. <sup>10</sup> Fatut géléém i étewe émfésébanil bé de munur. Atin amuk énda téméré no, géléém man ségule. Atin amuk énda fo téméré no, kago nén séloyuk de. <sup>11</sup> Non toow fo gétiga mo tete i étewe loo bé ni, atin giton ménsala non bé de tete rénigo no.

<sup>12</sup> Sugué ku mangéy diyaan i Artemase brab Tikikowe. Amuk gégumah ro diyaan, toow fo télama moy mangéye dob begéne dob ingéde Nikapolis, non méuyotu bati diyo bé gaiwe mélégénéy. <sup>13</sup> Toow fo télama mo tabangan i Apolose brab Senase sani gétigane bé kitabe inok magad i kégéagéw ruwe. Brab tabanga mo bero bé kéluhanay de kailanga ro. <sup>14</sup> Toroém i de dumo to munur bé fatut ro fégéror rémigo fiyo inok gétabanga roy de étew do mérasay. Békén ro faukén.

<sup>15</sup> Ségifaéy kéluhanay de dumo gu beem dini. Atin i de dumo gey munur do méimu begey, fésamfayém dob berowey késégifa geye bero. Mégédaw damén i Tuluse begom kéluhanan.

*Pablo*

## I Sulat Pablowe dob Filemone

Ay niy sébaane bé de sénulat Pablo, sani ménbantuge muret fantag bé Jesu Kristowe. I Filemone ni, wén i rifé no féndawét Onesimo. Endob ténuulis Onesimowey kurta Filemone, atin ménraréy. Amun énggumah i Onesimowe dob ingéde Roma, énggébalaka noy Pablowe. Atin nuret Pabloney fantage bé Jesu Kristowe dob beene. Tidéw béno, énggésénule i Onesimowe bé de salaén atin ménwaléy munur bé Kristowe. Tidéw béno, ténabangén i Pablowe brab fénagifatén non diyo i Pablowe dob férисуноне.

Dob kitab i de Romano, fatut féléhuén i Onesimowe non ségétew rifén ménraréy. Mélaw sénulat Pabloney ni sulat dob Filemone, sani gefee bé Onesimowe inok ongoté no dob beene bé fésagadé noy Onesimowe. Tidéw béno, fénuitén i ni sulat bé Onesimowe non séfule mangéy dob Filemon.

<sup>1</sup> Filemon,

Begénye dumo muwe Pablo. Ay niwu dob férисуноне sabaf bé kéunur guwe bé Jesu Kristowe. I begéne brab Timoteowe, sani dumo tome munur, sulata key beem. I beeme, gulaané key beem dumo gey gémalbék bé galbék i Tuluse. <sup>2</sup> Atin sémulat gey so mangéy dob de munur sélimud méngadaf dob lawi me. Loo so dob Apiawe, sani maake libu key sabaf bé Kristowe, brab dob Arkipowe sani dumo geye maak sundalo gémalbék bé galbék i Tuluse.

<sup>3</sup> I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédew.

<sup>4</sup> Sénga démasalu, démoyunu fo fésalamat dob Tuluse sabaf bé beeme, Filemon. <sup>5</sup> Non énggelingoo kuy fantage bé mégéte kéunurém bé Kadnane Jesus brab fantag bé kégédaw me bé kéluhanay de dumo mo munur. <sup>6</sup> Atin démasalu so dob Tulus bé waléy gétila kom non bé késédumo tome sabaf bé kéunur tome bé Jesuse. Mélaw gésobuto kom i de kéfiyonon gédoté tom sabaf bé kéunur tome bé Kristowe. <sup>7</sup> Atin i kégédaw me bé de dumo mo, been i niy funa kuwe toow fo moror brab fiyoy fédew guwe. Atin moror soy kéluhanay de munur bé Kristowe sabaf bé beeme.

<sup>8-9</sup> Mélaw, wén i ongoté kuwe dob beeme. Fakay gésuguo ku beem rémigo bé fatute non bé atura kuwe tidéw dob Kristowe. Non begén i Pablowe, ségétew sarigo Jesu Kristowe, atin béléewe ni ménférissuwu sabaf bé Beene. Gido loo, ongoté ku saén dob beeme non toow fo gulaané ku beem. <sup>10</sup> Mélaw, ongoté ku dob beeme bé fésagadém i Onesimowe. Beeney maake nga gu sabaf bé kéunur ne bé Kristowe. Non amun diniwu dob férисуноне ni, fénunur gu. <sup>11</sup> Bé do gétila, énda i tabang Onesimowe beem. Endob béléewe ni toow fo énggétabangén dob beeme, loo so dob begéne.

<sup>12</sup> Atin béléewe ni féséfuleé ku mangéy dob beemey ni toow fo gulaané ku étew.

<sup>13</sup> Méuyotu de damén émfébati dob begéne bé lala guwe batu dob férисуноне ni sabaf bé kékélégéb guwe bé Fiyowe Uret. Non amuk batu dini, gétabanga no begén loo bé beeme amuk dini go damén. <sup>14</sup> Endob énda rigoné kuy ni amuk énda tungkasé mo de begén. Non énda méuyotu mémégés beem. Yamula méuyotu de ké tidéw fo dob kaame kétayan i kétabanga muwe begén.

<sup>15</sup> I funa nuwe keyén énggéséfekay Onesimowe beem bé magade saén, inok amuk séfule mangéy dob beeme, éndaén géséfeka gom tidéw béléewe ni. <sup>16</sup> Atin béléewe ni, i Onesimowe, békénén rifé mo saén. Yamula ménwaléyén maak dumo mo sétiman idéng sabaf bé kéunur ne bé Kristowe. Toow fo gulaané ku éndob toow na fo gulaané mo non békén saén rifé mo, yamula ménwaléyén maak dumo mo sétiman idéng sabaf bé Kadna tome.

<sup>17</sup> Mélaw amuk fégitungé mo begén ségétew dumo mo, tayakufém loo bé kétayakuf me damén begén. <sup>18</sup> Atin amuk réménigo tete dob beeme taloo no wén i utongén beem,

dob begéne séden étukém. <sup>19</sup> Sulaté kuy ni bé de kagén kémér: I begéne, Pablo, bayada ku beem. (Endob kago lifotén de wén i utongém begén, sani mantuwe umulém sabaf bé kéunur me bé Kristowe.) <sup>20</sup> Mélaw adih, toow fo damén méuyotu de ké tabanga mo begén bé rigoné moy nan nongot gu. Féororénu non sédumon tom sabaf bé kéunur tome bé Kristowe.

<sup>21</sup> Toow fo gétiga ku béleewe ni, rigoné moy kéluhanay ongoté kuwe beem dob sulat guwe ni, atin gétiga ku umana moy kérigo muwe bé éndae ongoté ku. <sup>22</sup> Atin wén nay ségiyo ongoté ku dob beeme. Tafayanu sibéy inok wén i batio ku ké mangéy diyaan. Non wén i inam gu féséfuleéy Tuluse begén mangéy diyaan sabaf bé kédasala kome bé késéfule guwe mangéy diyoan.

<sup>23</sup> Atin i Epafrase dumo gu ménférisu sabaf so bé kéunur ne bé Jesu Kristowe, ségifaé no beem. <sup>24</sup> Atin ségifaéy de dumo gu so gémalbék beem, ro Markos, Aristarko, Demas brab Lukas.

<sup>25</sup> Mégédaw damén begom kéluhanan i Kadnane Jesu Kristo.

Pablo

## I Sulate dob de Judio do Munur bé Jesu Kristowe

Enda gétiga tom de ké ati séménulate bé ni sulat, non i séménulate de énda sénulatén i dawét ne. Endob gétiga tom sénulatén dob de Judio do munur bé Jesu Kristowe. Sénulatén i ni inok fébagéré noy de fédew ro, non i de dumo ro do Judio fénrasay ro bero sabaf bé kéunur ruwe bé Jesuse funa ro éndaén odoro roy kitab i de Judio.

Dob ni sulat, wén i kétoroe bé Jesuse, Been i Nga i Tuluse, atin mélaw toow na fo gérotor bé de télaki brab de sénarigoy Tuluse muret bé kékérén ne brab fiyon i Moisese. Wén soy kétoroe bé fénléhu i Jesuse fégétulak fégékédan bé de sala i de kéilawan. Mélaw éndaén kailangay de étew i témulake do ayam taloo no do ségiyo éntingayén. Wén soy kétoroe bé toow fo kailangay de étew i munure bé Jesuse non Been i kéfédéway de étew mangéy dob Tuluse.

<sup>1</sup> Bé do gétah do gai, ménsébérén i Tuluse bé de katufua tom do Judio fénagéwén dob de étew do sénarigo no muret bé kékérén ne. Fénbérén hén bero médoor gule brab dob séségiyo-giyowe aguwon. <sup>2</sup> Endob béléewe ni, dob de ni géfuray do gai, ménsébérén dob betome fénagéwén dob tintuwe Ngaén. I Tuluse, fénlimbagén bé Nga ne niy kéluhanay éntingayéne, atin fénemili i Tulusey Beene waléy so gefe bé kéluhanane. <sup>3</sup> Atin i Nga i Tuluse ni, rémendaw bé barakat i Tuluse, non ségiléw so bé Tulusey ni Nga. Atin i Nga i Tuluse ni, Beeney émfétause bé kéluhanay éntingayéne inok énda méalfa ro. Rigoné noy ni dob barakatane kékérén. Atin amun énggilid kénda noy sala i de kéilawan, ménséfule mangéy dob lawayo inok mésar fingé dob kuwonoy Tuluse inok méguléw.

<sup>4</sup> Mélaw i Nga i Tuluse, ménwaléy toow na fo gérotor bé de télaki. Loo so bé ni, bé kéfédawét i Tuluse Jesusey Nga ne, giton toow na fo gérotor i Jesuse bé de télaki. <sup>5</sup> Non wén i Ménsulate Kékérén i Tuluse bénréhén dob Jesuse mano, “Beemey Nga guwe, béléewe ménwaléyu Bohém.” Bénréh i Tulusey ni dob Jesuse, éndob énda bénréhén de dob de télaki no. Atin wén soy Ménsulate Kékérén i Tuluse mano, “Begéney Boh ne, atin Beeney Nga guwe.” Bénréh i Tulusey fantage bé Jesuse, békén fantag bé de télaki. <sup>6</sup> Atin amun gédétén i gaiwe féuwit i Tulusey toowe fo gérotor Ngaén mangéy dob duniyae ni, ménbérén man mano, “I Beene, fatut féngadaféy kéluhanay de télaki gu.” <sup>7</sup> Endob ay niy kékérén i Tuluse fantag bé de télaki no mano, “I de télaki gu, sani de sugu-sugué ku, féwaléyé ku bero do réfuruh brab do aféy.” <sup>8</sup> Endob ay niy kékérén i Tuluse fantag bé Nga ne mano, “Beemey Tuluse brab méguléw taman sa taman. Métintu foy kéféguléw me.” <sup>9</sup> Atin méimu go bé fiyowe, brab mérarék go bé tetee. Been i niy funa kuwe, sani Tulus me, ménemili Beem inok fégérotoré ku Beem bé de dumo mo. Atin fénoror gu so beem.” <sup>10</sup> Atin wén soy ségiyowe Ménsulat Kékérén i Tuluse dob Nga ne mano, “I Beeme, Kadnan, bé féganayo Beemey léménimbage bé duniyae. Atin rénigo moy lawaye bé de kémérém.” <sup>11</sup> I duniyae brab lawaye, méalfa ro moso, éndob i Beeme, méuyag go taman sa taman. I de ni waléy ro tafay ségiléw bé kégale. <sup>12</sup> Ségiléw bé kékédét me bé kégale inok baliwana mo bé mantuwe de. Endob i Beeme, énda mafégalin go, atin énda i tamanay kéuyag me.” <sup>13</sup> Atin ménbérén soy Tuluse dob Nga ne mano, “Sar go fingé dob kuwono kuwe ni taman fétabané ku Beem bé de sébanil Beem.” Endob énda bénréh i Tulusey ni dob de télaki no. <sup>14</sup> Mélaw, i de télaki, beroy do sugu-suguéy Tuluse saén. Enda gito gey bero, éndob suguéy Tuluse bero témabang betom do étew gégédot bé umule magufusa tidew dob Beene.

## 2

<sup>1</sup> Mélaw fatut fo fétuntayé tom i de toow kétoro énggelingoo tom, inok taus i kéunur tome de. <sup>2</sup> Non toow i kitabe niray i Tuluse fénuwitén bé de télaki. Mélaw i kéluhanay de mémélis bé kitabe, ménkukum ro loo bé fatute. <sup>3</sup> Atin ségiléw so bé ni, tintu méukukum tom so amuk fédayaé tom brab énda odoro tom i kétoroe fantag bé fiyowe kéfukas i

Tuluse betom bé de sala tom. I Kadna tome Jesus i sunguwe ménuret betom fantag bé ni kéfukas, sani amuk munur tom bé Jesuse, kédané noy de sala tom inok énda mékukum tom. Atin i de étew énggégélingo bé ni kéuret i Kadnane, bénréh roy toow fo toow i kéuret ne de. <sup>4</sup> Atin i Tuluse, fénggito no so toow i ni kéuret bé kékérigo nuwe bero do ségiyo-giyo do mékégaif bé barakat ne. Atin nirayén dob de ni muret i de kéfurungon sabaf bé kékémanduoy Rémogor i Tuluse bero. Niray i Tuluse beroy loowe bé kétaya nuwe de irayén dob séngae ségétew bero.

<sup>5</sup> Atin bérhéhe ku begom i fantage bé mantuwe duniya gégumah moso. I Tuluse, énda fénémilién i de télaki méguléw bé ni mantu duniya. <sup>6</sup> Yamula fénémilién i de étew. Non wén i Ménsulate Kébéréhi i Tuluse mano, “Tulus, sedek énda lifoté moy de étew? Non kéilawan ro saén. Sede mélaw ké fagifaté mo bero? <sup>7</sup> Fénggérifantadém bero bé de télaki singkow saén. Endob niraya moy de kéilawan bantugan brab féngadaté mo bero. <sup>8</sup> Atin fénémiliém i de étew méguléw bé kéluhanay de éntingayén.” Been i niy Ménsulate Kébéréh i Tuluse. Mélaw gétiga tom féguléwoy kéilawaney kéluhanay éntingayéne, atin énda i éntingayén énda féguléwo no de. Endob gétiga tom so, béléewe ni énda séna méguléw i kéilawane bé kéluhanay éntingayéne. <sup>9</sup> Endob gido loo, gétiga tom i Jesuse fénggérifantad i Tuluse bé de télaki bé singkow saén inok méléhu gantino noy kéluhanay de étew inok énda méléhu ro. Ménrigoy ni sabaf bé kégédaw i Tuluse. Atin béléewe, bantugén i Jesuse brab fégadatan fo toow sabaf bé kékédaya ne bé kékélehue de. <sup>10</sup> I Tuluse, lénimbagén i kéluhanay éntingayéne brab Beeney émfétause bé kéluhanane. Atin fiyoy rénigo nuwe bé kékédaya ne bé Jesuse. Mérasay, non sabaf bé kérasay ne, énda i kulang dob kéfukas ne betom. Rénigoy Tulusey ni inok féwaléyé no betom médoo do ngaén inok médayéw tom séréngan bé Jesuse taman sa taman. Non i Jesuse, Beeney aguwoy de étew inok méfukas ro tidéw dob de sala ro.

<sup>11</sup> I Jesuse, linisé noy de étew dob de sala ro. Atin i betome do ménlinisén dob de sala tom, sétiman tomén Boh bé Jesuse, sani Tuluse. Been i niy funa Jesuse énda mémala no fédawété no betom do tuwaréyén. <sup>12</sup> Non wén i Ménsulate Kébéréhén mano, “Tulus, bérhéhe kuy fantage bé Beeme dob de tuwaréy gu. Atin dayéwé ku Beem dob kéluhanay de étew sélimud féngadafé ro Beem.” <sup>13</sup> Atin bénréh Jesuse so mano, “Sémarigu dob Tuluse.” Atin bénréhén so mano, “Ay niwu, begey i de nga i Tuluse nirayén dob Begéne.”

<sup>14</sup> Atin i de betom do nga i Tuluse, méléhu tom non kéilawan tom saén. Been i funa Jesuse ménwaléy so kéilawan loo bé betome. Rénigo noy ni inok méléhu, inok bé kéléhu ne, énggébinasana noy Satanase, sani tidéwoy kéléhue. <sup>15</sup> Atin rénigo noy ni inok géfukasa noy kéluhanay de étew bé ménrugayén i kégilak ruwe méléhu. <sup>16</sup> Atin békén do télakiy tabanga nuwe. Yamula betom do séfu Abraham i tabanga nuwe. <sup>17</sup> Been i niy funa nuwe kailanga noy waléye ségiléw bé betome do tuwaréyén, inok Beeney waléye toow fo mégédaw brab tintu fo gésarigon gérotor fadi tom dob adafay Tuluse, inok gékdana noy de sala tom do kéilawan. <sup>18</sup> Atin mélaw, gétabana noy de étew téngkadé Satanase, non i Beene ténéngkad Satanase so brab toow fo fénrasayén.

### 3

<sup>1</sup> Do dumo gu do munur bé Kristowe, sani de sénéngkat i Tuluse bati moso dob lawayo diyo, fégitung gom i fantage bé Jesuse. Been i no sénugu i Tuluse mangéy dob duniyae ni. Sénuguén inok waléye gérotor fadi bé kékéngintulus tome dob Beene. <sup>2</sup> I Jesuse ni, toow fo nodoro noy kéluhanay de fénggoy Tuluse de, ségiléw bé kékéngintulus tome dob Beene. <sup>3</sup> I étew rémigo lawi, mas na émbantug bé lawie. Ségiléw so bé Jesuse, mas na émbantug bé Moisese. <sup>4</sup> I kéluhanay de lawi, wén i do réménigo bero. Atin Tulus i réménigowé bé kéluhanay éntingayéne. <sup>5</sup> I Moisese, fiyoy rénigo nuwe amun sugu-suguén dob de étew i Tuluse. Atin i rénigo nuwe ménwaléy maak anlung i rígonéy Tuluse moso. <sup>6</sup> Endob i Kristowe, Beeney Nga i Tuluse brab Been soy sarigone méguléw bé de étew i Tuluse. Atin i betome do munur de, betom i de étew

i Tuluse, amuk méégét i kéunur tome de brab amuk énda mékédan i késarig tome de bé kéongot-ongot tome de.

<sup>7</sup> Non wén i Ménsumate Kébérélh i Rémodor i Tuluse mano, “Amuk gélingoo kom i kébérélh i Tuluse béléewe ni, <sup>8</sup> kagom fétégasén i de uléw gom loo bé kétégas i uléw i de katufua kom amun ménika ro bé kétayay Tuluse dob gonone énda i étew de bat. Non ténengkad ro diyo i ketingkél i Tuluse. <sup>9</sup> Fiyon fo ké énggito roy de ménfote folo gébélantuwa,” bang i Tuluse, “ténengkad roy ketingkél guwe bé de tete adat ro. <sup>10</sup> Mélaw ménkeritu bero brab bénréh gu maku, ‘Démoyun ro mika bé kétaya kuwe brab énda fo modor ro bé de sugu gu.’ <sup>11</sup> Mélaw ménkeritu bero, brab fénasada ku bero maku, ‘Enda géahur ro dob gono kuwe inok gétérén ro moso sérénan Begén.’ ” Been i niy kébérélh i Tuluse.

<sup>12</sup> Mélaw, do dumo gu, ingat gom inok énda i ségetéw begom waléy tete i itunga nuwe brab énda munurén bé Tuluse. Non amuk loo bé ni, diguré noy méuyage Tulus. <sup>13</sup> Yamula, fatut séféfiyo tom fédew sénga fuweh lokut wén sénay gai tom inok énda i ségetéw betom énggégakaran rémigo sala funa no waléy métégas i uléw ne. <sup>14</sup> Non amuk féegété tom i késarig tome bé Kristowe taman sa taman loo bé gétaho, toow fo gétaus tom sédumon bé Kristowe.

<sup>15</sup> Been i niy bénréh i Ménsumate Kébérélh i Tuluse mano, “Amuk gélingoo kom i kébérélh i Tuluse béléewe ni, kagom fétégasén i de uléw gom loo bé kétégas i uléw i de katufua kom amun ménika ro bé kétayay Tuluse.”

<sup>16</sup> Ati de étew énggégélingo bé kébérélh i Tuluse, éndob natuho roy Tuluse? Beroy de étew do Judio do fénanangguwit Moisese tidew Egipio. <sup>17</sup> Ati de étew kénritoy Tuluse bé ménfote gébélantuwa? Bero soy de Judio do ménsumate dob Tuluse funa ro ménléhu dob gonone énda i étew de bat. <sup>18</sup> Beroy de étew fénasaday Tuluse mano, “Enda fakayén ké mahur ro dob gono kuwe inok gétérén ro moso sérénan Begén.” Non énda modor ro bé kébérélh i Tuluse. <sup>19</sup> Mélaw gétiya tom énda énggéahur ro non énda ménunur ro bé Tuluse.

#### 4

<sup>1</sup> Fiyon fo ké énda géahur i de énggétah do étew, énda mékédan i fasad i Tuluse bé fakay géahur i de étew dob gonoy Tuluse témérén. Mélaw fatut mingat tom inok kéluhana tom géahur diyo. <sup>2</sup> Non énggélingo tom i Fiyowe Uret ségiléw bé kégélingo i de katufua tom de. Endob fiyon fo ké énggélingo ro, énda énggédot roy fiyowe non énda ménunur ro de. <sup>3</sup> Endob i betome do munur de, géahur tom dob gonoy Tuluse inok gétérén tom. Endob i de étew do énda munur, énda fakayén mahur ro. Non wén i Ménsumate Kébérélh i Tuluse mano, “Ménwaléyú ménkérít, atin réménigou fasad bé énda géahur ro dob gono kuwe témérén.” Bénréh i Tulusey ni fiyon fo ké ménfafayén i gono nuwe, non ménngildén i galbék ne tidew bé kélimbag ne bé duniyae ni. <sup>4</sup> Non wén i Ménsumate Kébérélh i Tuluse fantag bé géfitéw ne gétérésangan mano, “Amun énggilid i Tuluse bé galbék ne, téménréne dob géfitéw ne gétérésangan.” <sup>5</sup> Atin wén man i Ménsumate Kébérélh i Tuluse mano, “Enda fakayén ké mahur ro dob gono kuwe témérén inok gétérén ro sérénan Begén.” <sup>6</sup> I de sungu étew énggégélingo bé Fiyowe Uret, énda énggéahur ro dob gonoy Tuluse, non énda ménahur ro. Mélaw wén i do ségiyo étew géahur dob gonoy Tuluse inok gétérén ro sérénan de. <sup>7</sup> Gétiya tom i ni non réménigo man ségiyo gaiy Tuluse inok géahur i de étew dob gono nuwe témérén. Non amun ménifus i ménrugaye néni gai tidew bé gaiwe énda ménunur i de sungu do étew, fénbérélh i Tulusey Datu Dabide mano, “Amuk gélingoo kom i kébérélh i Tuluse béléewe ni, kagom fétégasén i de uléw gom.” <sup>8</sup> Atin fantag man bé de ni do sungu étew, amuk énggélanguito Josuehe bero mangéy dob tintuwe gonoy Tuluse inok tintu gétérén ro, éndaén damén ménbérélh i Tuluse fantag bé ségiyowe gai géahur i de étew dob gonoy Tuluse inok gétérén ro. <sup>9</sup> Mélaw gétiya tom géahur soy de étew i Tuluse dob gonoy Tuluse inok gétérén ro ségiléw bé kétéréy Tuluse dob géfitéw ne gétérésangan amun énggilid léménimbag. <sup>10</sup> Non i

kéluhanay de étew géahur dob gonoy Tuluse inok gétérén ro séréngan de, gétérén ro so dob de galbék ro ségiléw bé kétéréy Tuluse bé kélimbag ne. <sup>11</sup> Mélaw toow tom fo télamanén i mahure inok gétérén tom séréngan bé Tuluse. Katom félisén i kébéréh i Tuluse loo bé rénigoy de énggéétah do étew funa ro énda énggéahur.

<sup>12</sup> I kékéhéh i Tuluse toow fo barakatan brab miray bé umule magufusa. Ségiléw bé sundange toow fo murém. Non i kékéhéh i Tuluse maak diléké noy de itunga tom brab de fédew tom. I Nga i Tuluse gétiga noy kéluhanane fantag bé betome. Gétiga noy itunga tome brab fédew tome. <sup>13</sup> I Tuluse gétiga noy kéluhanane, énda i éntingayén mébunéy dob Beene. Gito noy kéluhanane, fiyon i de rigoné tom. Mélaw wén mosoy gai kailanga tom témidég dob adafa nuwe brab bérhéhén dob Beeney fantag bé kéluhanay de rénigo tom.

<sup>14</sup> Mélaw fatut fo fétausé tom i kékéhéh i kékunur tome bé Jesu Kristowe loo bé fénayag tome. Non wén i toowe fo fiyo gérotor fadi tom, sani Jesuse Nga i Tuluse, déméniat mangéy dob Tuluse. <sup>15</sup> Atin i ni gérotor fadi, toow fo gésobuto noy kélubay tome non kéilawan tom saén. Non i Jesuse ménwaléy kéilawan brab ténukaw Satanase bé séngae gékélesi kétukawan de ségiléw bé betome, éndob énda fo énggésala i Jesuse.

<sup>16</sup> Mélaw, katom mégilak fégédét dob mégédawe Tulus. Non méuray i na nuwe betom brab mégédaw betom, atin tabanga no betom dob de gai kérégénan tom.

## 5

<sup>1</sup> I kéluhanay de gérotor do fadi, fénémilién bero inok waléy ro do kékédéway de étew mangéy dob Tuluse. I galbéke sénarig dob berowe, témulak ro dob Tuluse inok mékedan i sala i de étew. <sup>2</sup> I de gérotor do fadi, do kéilawan ro saén atin mélubay ro. Mélaw gétinkélo roy de étew ké gésala ro atin méuray i na ruwe bé de étew gésala non énda gésobuto roy fatute. <sup>3</sup> Atin i de gérotor fadi, kéilawan ro saén, mélaw énda démoyun ro gérito bé fatute. Mélaw kailanga roy témulake inok kédanéy Tulusey de karo sala ségiléw bé de sala i de ségiyo do étew. <sup>4</sup> Atin i galbék i gérotore fadi, toow fo fégadatay de étew. Atin énda i ségétew étew géfémili bé kaane lowoh waléy gérotor fadi. Non Tulus saén i mémilie bé ati isuve waléy gérotor fadi loo bé kékémili ne bé Aarone bé do gétah.

<sup>5</sup> Atin ségiléw so bé niy Kristowe, békén Been i ménémilie bé lowoh ne inok waléy gérotor fadi. Yamula Tuluse i ménémilie de, sani ménbéréhe dob Beene mano, “Beemey Nga guwe, béléewe ménwaléyu Bohém.” <sup>6</sup> Atin wén soy ségiyowe kékéhéh i Tuluse mano, “Beemey ségétew fadi taman sa taman, ségiléw bé Melkisedeke.”

<sup>7</sup> Amun ménbati sénay Jesuse dob duniiae ni, déménasal brab kéménrew ménfégédaw-gédaw dob Tuluse, sani géfukase de bé kéléhue. Atin fénggélingo i Tuluse non bénasana noy Tuluse brab nodoro noy kétayay Tuluse. <sup>8</sup> Fiyon fo ké Nga i Tulusey Jesuse, féngganadén i kéodore bé de sugu i Tuluse bé kérasaye énggagéwo no. <sup>9</sup> Atin amun énggilid non i kéluhanay sénugu i Tuluse de, ménwaléy Been i mémukase bé kéluhanay de étew modor dob Beene inok gédoté roy umule magufusa. <sup>10</sup> Atin tidéw bénou, fénwaléy i Tulusey Jesuse gérotor fadi ségiléw bé fadie Melkisedek bé do gétah.

<sup>11</sup> Médooy gébérého keye fantag bé ni. Endob mérégén i kékéhéh i kékédéway de dob begome non métana gom gésobut. <sup>12</sup> Ménrugay gomén ménunur bé Jesuse. Mélaw fatut gomén damén do témore. Endob énda fakayén non taman so béléewe ni kailangan gom séna toroén inok gésobuto kom i de sungu kétoro fantag bé kékéhéh i Tuluse. Fatut damén mama gomén bé de métégas do amaén, sani ménaléme kétoro, éndob taman so béléewe ni maak témutu gom séna. <sup>13</sup> I de témutu séna, do nga ro séna. Enda gésobuto roy kétoroe fantag bé kétintuwe. <sup>14</sup> Endob i de lukés, mama ron bé métégase do amaén. Atin gélolo ronén i fiyowe brab tetee sabaf bé kékéhéh i Tuluse.

## 6

<sup>1</sup> Mélaw katomén séduli-dulién i de sungu kétoro fantag bé Kristowe. Yamula féganadé tom i de ménalém de. Endaén kailanga tom démoyun féganadén i de kétoro, loo bé fatut tagakéy de étew i de rigonén énda géfukasa no bero, brab fatut munur ro bé Tuluse.

<sup>2</sup> Endaén kailanga tom féganadén i kétoroe fantag bé kébautise, brab fantag bé kétégéné bé de bunbunan bé lala i kédasalane de, brab fantag bé kétébule i de étew, brab fantag bé kékukum i Tuluse taman sa taman. <sup>3</sup> Yamula féganadé tom soy de ménalém do kétoro, amuk tungkaséy Tuluse damén.

<sup>4</sup> I de étew téménréni ro munur, éndaén gésénule ro man ségule. Bé do gétah, énggésobuto ronén i toowe kétoro fantag bé Jesuse. Brab énggédot ronén i niray i Tuluse fénagéw dob Kristowe brab énggédot ronén i Rémogor i Tuluse. <sup>5</sup> Bé do gétah, énggétiga ronén toow fo fiyoy kébérén i Tuluse. Brab énggétérédama ronén i barakat i Tuluse fégito no moso dob de mantu do gai. <sup>6</sup> Gido loo, ténaak roy de ni. Mélaw éndaén fakayén fégésénuleén ro man. Non maak séguleé ro man féléhuén i Nga i Tuluse. Mélaw fémalané roy Nga i Tuluse dob adafay de étew.

<sup>7</sup> Ufama, i betome tidew dob fantade ni do kéilawan ségiléw tom bé fantade démoyun méranaan. Amuk témunoh i de fiyo ohokén do amaén, féfiyonéy Tulusey no fantad.

<sup>8</sup> Endob amuk férukéy fantadey de suwar brab de kéeroon, énda i do lagaén. Mélaw tuwégéy gefee de. Ségiléw so bé ni, i étewe miring bé fantade ni, kukuméy Tuluse.

<sup>9</sup> Mélaw, do dumo gu, fiyon fo ké loo bé niy kébérén guwe dob begome, gétiga ku taus gom rémigo fiyo loo bé fatute rigonéy de étew ménfukas dob de sala ro. <sup>10</sup> Toow fo métintuy adat i Tuluse. Enda mélifotén bé de fiyo rénigo gom brab kéimu gome bé Tuluse fénggito gom bé kétabanga kome bé de dumo gom munur bé Kristowe. Atin taman so béleewe niy kétabanga kome bero. <sup>11</sup> Toow fo méuyot gey de ké fétausé kom kéluhanan i kégéror gome taman bé késéfule Kristowe, inok gédoté kom i kéluhanay inamé kome. <sup>12</sup> Mika gey de ké waléy gom faukén. Yamula fatut iring gom i de étew do munur brab do témingkél. Beroy de étew gégédot bé fénasad i Tuluse.

<sup>13</sup> Fégitung gom i katufua tome Abraham. Amun fénasaday Tulusey Abrahame, énda i ségiyo toow na fo gérotor bé Tuluse inok usaré noy dawét ne fégésafaén. Mélaw nusar i Tulusey kaane dawét fénggésafaén bé ni fasad. <sup>14</sup> Ménbérén i Tuluse mano, “Fasada ku beem bé féfiyoné ku beem brab iraya ku beem médo do séfuém.” <sup>15</sup> Atin téméningkél i Abrahame, mélaw énggédotén i fénasad i Tuluse de. <sup>16</sup> Amuk sémafa i étewe, usaré noy dawét i ségettéwe étew toow na fo gérotor bé beene. Atin géunur mélaw i de étew géglingo de. <sup>17</sup> Ségiléw so bé ni, i Tuluse toow fo fénbagérén i fasad ne bé kérigo nuwe bé safá ne, inok i de étew fénasada no toow fo fégito no bero brab fégétiga no beroy énda émfégalin i fasad ne brab tintu fo tumané no. <sup>18</sup> Mélaw ruwo timan éntingayén i éndae fégaliné no. I sébaane de, been i fasad ne. Atin i géruwono nuwe, been i safá ne. Mélaw gétiga tom énda témugi i Tuluse. Mélaw i de betom do étew fédiyaga bé Tuluse, toow fo méégét i kéunur tome dob Beene loo soy inam tome bé gédoté tom i fénasad ne dob betome. <sup>19-20</sup> Toow fo méégét i inam tome bé tumanéy Tulusey fasad ne betom. Non sénarig tom i nan dob Tuluse. Mélaw énda mékédan i kéunur tome de. Atin i funa nuwe énda mékédan i késarig tome de non wén i kéfédéwa tom dob sékuloy Tuluse, sani Jesu Kristowe. Maak ménahur dob sibéy i Tuluse mangéy fingé bala bé rindunge dob lawi i Tuluse. Atin diyo mélaw dob sékuloy Tuluse. Ménwaléy gérotor fadi tom taman sa taman loo bé fadie féndawét Melkisedek bé do gétah.

## 7

<sup>1</sup> I Melkisedeke ni, beeney datu i ingéde Salem bé do gétah. Atin been soy fadie ménagadaf bé toowe fo gérotor Tulus. Atin wén i no gai, ménsetiboh i Abrahame bé de ségiyo datu, sani de kéménéfo bé samung ne, atin énggáféléhuo no bero. Atin bé lala Abrahame mule, énggabalaka noy Melkisedeke. Atin nongot Melkisedeke dob Tuluse, bé féfiyoné noy Abrahame damén. <sup>2</sup> Tidew bénou, niray Abrahame dey géfoloe bé téna ba nuwe énggédotén dob de datu fénléhuén. I atag i dawéte Melkisedek, “Métintu Datu”. Atin non datu i Melkisedeke dob Salem, i atag i dawét ne so, “Datu Kémédan bé Késétibohe”. <sup>3</sup> Enda ménusatén ké ati boh Melkisedeke taloo no ati idéng ne taloo no ati

katufua nuwe. Atin énda so ménsulat i fantage bé kéumah ne taloo no fantag bé kéléhu ne. Mélaw maak Nga i Tuluse non énda gétigay de étew de ké ati tidéwo nuwe de taloo no ati ténamana nuwe de. Mélaw i Melkisedeke fadi taman sa taman.

<sup>4</sup> Mélaw gétiga tom toow fo gérotor i Melkisedeke. Non fiyon i Abrahame sani katufua tome do Judio, nirayén i géfoloe bé ténaba nuwe énggédotén bé késétiboh ne. <sup>5</sup> I de fadi i de Judio, sani de séfu Lébi, séfu ro soy Abrahame. Sénugu i kitabe bero médot bé géfoloe tidéw dob de Judio. Mélaw éndot ro tidéw dob de dumo ro do Judio, fiyon fo ké do séfu Abraham ro so kéléuhanan. <sup>6</sup> Endob i Melkisedeke békén séfu Lebiwe. Gido loo, éndotén i géfoloe tidéw dob Abrahame, atin nongotén dob Tuluse bé féfioné noy Abrahame. Rénigo noy ni, fiyon fo ké Abraham i étewe fénasaday Tuluse. <sup>7</sup> Atin gétiga tom, i étewe ongoté no dob Tuluse bé féfioné noy ségétéwe étew, toow na fo gérotor i nan étew. <sup>8</sup> I de fadi i de Judio médot bé géfoloe tidéw dob de dumo ro Judio, méléhu ro. Endob i Melkisedeke, sani méndote bé géfoloe tidéw dob Abrahame, énda ménsulatén dob kékérén i Tuluse fantag bé kéléhu ne. <sup>9-10</sup> Atin amun niray Abrahamey géfoloe dob Melkisedeke, maak Lebi soy méniraye. Non fiyon fo ké énda séna ménumah i Lebiwe de, maak diyo séna dob lowoh i katufua nuwe Abraham bé kégébalak ne bé Melkisedeke. Atin Lebiy katufuay de fadi médot bé géfoloe tidéw dob de Judio. Mélaw giton bé ni, mas gérotor i kéfadi Melkisedeke bé kfadi i de séfu Lebi.

<sup>11</sup> Amun niray i Tulusey kitabe dob de Judio, ménemili do fadi, sani de séfu Lebi, inok beroy de gémamak bé kitabe. Endob amuk fakay waléy métintuy kéilawane sabaf bé galbék i de fadi tidéw dob de séfu Lebi, éndaén damén kailangan i ségiyowe fadi loo bé Melkisedeke, békén loo bé kfadi Aarone sani séfu Lebiwe. <sup>12</sup> Atin amuk fégalinén i fadie, fatut so fégalinén i kitabe. <sup>13-14</sup> Atin i Kadna tome Jesu Kristo, sani mantuwe fadi bénréh gu, békén séfu Lebiwe. Yamula, Beeney séfu Judahe, atin énda i ségiyo bé de séfu Judah do ménwaléy fadi. Mélaw bé kéléuhanay de séfu Judah, Jesuse saén i ménwaléye de fadi. Non énda bénréh Moisese de ké waléy do fadi i de séfu Judah.

<sup>15</sup> Atin ménggiton fo toow bé amuk wén i mantu fadi loo bé Melkisedeke baliwana no bé de séfu Lebi, wén soy mébaliwanan bé kitabe niray Moisese. <sup>16</sup> Atin i Jesuse énda ménwaléyén fadi sabaf bé kitabe sénugu bé i de séfu Lebi saén i waléye do fadi. Yamula ménwaléy fadi sabaf bé kébarakatay umul ne énda méléhuén taman sa taman. <sup>17</sup> Non wén i Ménsulate Kékérén i Tuluse mano, “Waléy go fadi taman sa taman, loo bé fadie Melkisedek.” <sup>18</sup> Mélaw i de tafay sugu fantag bé de fadi ménkédanén non énda i laga ro brab énda gétabanga ro betom. <sup>19</sup> Non i kitabe niray Moisese, énda fakayén ké waléy tom métintu sabaf bé kfodor tome de. Mélaw niray i Tuluse betom i mantuwe aguwon toow na fo fiyo. Atin sabaf bé ni, géfégédét tom dob Tuluse.

<sup>20</sup> Atin saliyu na bé ni, ay niy ségiyowe funan mas na fiyoy mantuwe ni agéwon. Amun rénigoy Tuluse fadi i Jesuse, réménigo so safra dob Beene. Endob énda rénigo noy ni safra bé kérigo nuwe bé de séfu Lebi do fadi. <sup>21</sup> Endob i Jesuse, ménwaléy fadi bé safra i Tuluse mano, “I Begéne Kadnan, rigoné kuy fasade bé waléy go fadi taman sa taman. Atin énda fégaliné kuy kétaya kuwe.” <sup>22</sup> Mélaw sabaf bé ni safra i Tuluse gétiga tom toow na fo fiyoy mantuwe aguwon rénigoy Tuluse inok tanggafé noy de étew, sani kénéur tome bé Jesuse.

<sup>23</sup> Atin ay ni ségiyowe funan mas na fiyoy mantuwe agéwon. I de fadi do séfu Lebi, kailangan médo ro non méléhu ro, atin amuk méléhu i ségétéwe de, kailangan wén i baliwa no. <sup>24</sup> Endob i Jesuse, méuyag taman sa taman. Mélaw énda i baliwa no. <sup>25</sup> Mélaw fakay géfukasa noy de étew tidéw dob de sala ro, sani de étew modor de mangéy dob Tuluse. Gérigono noy ni sénga tékélid taman sa taman. Non méuyag taman sa taman, atin mélaw wén i kfédéwa tom mongot dob Tuluse.

<sup>26</sup> Mélaw Jesus i gérotore fadi kailanga tom. I Jesuse, méméchéfu brab énda i salaén. Enda ségiléwén betom do gésala. Atin amun déméniyat i Jesuse, rénigoy Tuluse toow fo gérotor. <sup>27</sup> Ségiyo foy Jesuse bé de ségiyo do fadi. Enda kailanga noy témulake dob Tuluse sénga fuweh inok mémédan i kaane sala, atin tidéw bénó témulak man inok mémédan i

de sala i de ségiyo étew. Non nirayén i sébaane tulakén, sani lowoh ne. Mélaw éndaén kailanga noy témulake. <sup>28</sup> I kitabe niray Moisese, mémili do gésala étew inok waléy ro do gérotor fadi. Endob ménrugay tidéw béno, ménwaléy gérotor fadi i Nga i Tuluse non fénemili i Tuluse sabaf bé fasad ne bé safa ne. Atin i Jesuse ni, énda i salaén taloo no udenén kulang de. Atin ménwaléy gérotor fadi taman sa taman.

## 8

<sup>1</sup> Ay niy atag i kéluhanay de uret gey begom dob ni sulat. Wén i gérotor fadi tom loo bé nan nuret gu, Been i Jesu Kristowe. Diyo dob lawayo mésar fingé dob kuwonoy barakatane Tulus. <sup>2</sup> Mélaw diyo i Jesuse rigoné noy galbék i fadie dob tintuwe lawi i Tuluse dob lawayo. Békén étew i réménigowe bé ni lawi, yamula Kadnan i réménigowe de.

<sup>3</sup> I kéluhanay de gérotor do fadi, fénwaléyén bero do fadi inok miray ro do ayam tulakén dob Tuluse. Mélaw ségiléw so bé ni, i katome gérotor fadi, fatut wén i tulakén irayén dob Tuluse. <sup>4</sup> Amuk diniy Jesuse dob fantade ni, énda fakayén waléy fadi. Non wénén i do fadi do miray tulak loo bé fatute dob kitabe niray Moisese. <sup>5</sup> Endob i toowe, i galbéke rigonéy de fadi dob fantade ni, maak anlung i toowe galbék rigoné Jesuse dob lawayo diyo. Ségiléw so bé rénigo Moisese. Non amun gédétén rigoné noy safute lawi i Tuluse, bénréh i Tuluse de mano, “Rigo mo loo bé falas i tintuwe simbaan dob lawayo fénggito gu beem dob tuduke.” <sup>6</sup> Atin i galbék Jesu Kristowe bé kéfadi ne toow na fo fiyo bé galbék i de fadi do séfu Lebiwe. Atin ségiléw so bé ni, i mantuve aguwon rénigoy Tuluse inok tanggafé noy de étew toow na fo fiyo dob tafaye aguwon. Non toow na fo fiyoy fasade fégérigo bé mantuve aguwon.

<sup>7</sup> Amuk énda i kulang bé sunguwe aguwon, éndaén kailangan i mantuve de. <sup>8</sup> Endob i Tuluse énda ménsuatén bé de étew modor bé sunguwe aguwon. Non wén i Ménsulate Kébéréh i Tuluse mano, “Gégumah i gaiwe, bang i Kadnane, rigoné kuy mantuve aguwon inok tayakufé kuy de étew do séfu Israel. <sup>9</sup> Békén loo bé sunguwe aguwon rénigo gu kay de katufua ro bé gaiwe fénanangguwit gu bero mésut tidéw Egipto. Non énda ménodor ro bé no aguwon rénigo gu bero. Atin féndaya gu mélaw bero, bang i Kadnane. <sup>10</sup> Ay niy mantuve aguwon rigoné ku kay de séfu Israel dob de gai moso, bang i Kadnane: Sulaté kuy de kitab gu dob de itunga ro brab dob de fédéw ro. Atin Begéney Tulus ruwe, brab beroy de étew gu. <sup>11</sup> Atin mélaw, éndaén kailanga no moso toroé ro dob de dumoy fantage bé Begéne maro, ‘Fatut gétiga kom i Kadnane.’ Non i kéluhanay de étew, do gérotor brab do gérfantad, gétiga ron Begén. <sup>12</sup> Atin fésagadé kuy de sala ro, brab éndaén tédemé kuy de tete rénigo ro.” Been i niy kébéréh i Tuluse. <sup>13</sup> Atin mélaw gétiga tom i sunguwe aguwon tafayén brab éndaén i lagaén, non bénréh i Tuluse bé wén i mantu de. Mélaw gétiga tom éndaén méusar i tafaye de non ménkédanén.

## 9

<sup>1</sup> I sunguwe aguwon rénigoy Tuluse inok tanggafé noy de étew, wén i do suguén fantag bé kéféngadafe brab fantag bé fatute lawi féngadafan rigonéy de étew. <sup>2</sup> Rénigo roy safute lawi féngadafan. Atin wén i ruwo timan sibéyén. I sunguwe de, féndawét “Mékétéfu gonon”, atin wén i solo de brab ahayan brab fan tulakén dob Tuluse féndiyo dob ahayane. <sup>3</sup> Dob béngaway ni lawi wén i rindunge de. Atin wén soy rindung fégétéléb bé béngaway géruwonoy sibéy ne. Atin i ni sibéy féndawét “Toow fo Mékétéfu Sibéy”.

<sup>4</sup> Diyo wén i bélówone ahayan gonon témuwég bé dukahe. Diyo soy baule méntéléb bé bélówone. Atin i baule ni, been i niy tandaé bé fasad i Tuluse. Dob ni baul wén i bélówone binangga nahuron bé amaéne féndawét “maná”. Atin diyo so dob baule niy tugé Aarone déménau. Atin diyo soy de lumfayfay do batéw sénulatay Tuluse bé kitab ne. <sup>5</sup> Dob rotor i baule ni, diyo féntindég i de kéninontow i de barakatan do téaki émfégétigan bé diyo i Tuluse. Atin ménbekah i de fafak ro dob rotor i gonone firikon bé darae fégékédan bé de sala. Endob énda kailangan fégétiga key begom i kéluhanay de fantag bé ni gonon béléewe ni.

<sup>6</sup> Atin amun ménlosoén i kéluhanane loo bé ni, mahur i de fadi dob sunguwe sibéy féndawét “Mékétéfu gonon” sénga fuweh inok rigoné roy galbék ruwe. <sup>7</sup> Endob gérотор fadi saén i géahure dob géruwowe sibéy féndawét “Toow fo Mékétéfu Sibéy”. Atin ségule saén mahur sénga ségebélantuwa. Atin amuk mahur diyo, muwit dara tulaké no dob Tuluse inok mékédan i de salaén rénigo no do énda énggétiga no de, brab de sala rénigoy de dumo no do Judio sani de sala énda énggétiga ro rénigo ro. <sup>8</sup> I kéluhanay rigonéy de fadi ni, ténero i Rémogor i Tuluse de betom bé amuk wén sénay sungu sibéy, énda séna fakayén géahur i de étew dob géruwowe sibéy féndawét “Toow fo Mékétéfu Sibéy”. <sup>9</sup> I de ni maak do anlung i de gai saén béleewe ni. Fégétiga no betom bé i kéluhanay de iray dob Tuluse brab de ayam do tulakén, énda gékédana roy de sala. <sup>10</sup> Non i ni kéféngintulus, fantag saén bé de sugu bé atiy géamaay de étew brab géinémo ruwe, brab fantag so bé de kéurah ro bé de lowoh ro. Endob i de ni do sugu kay de lowoh ro saén, énda gékédana noy de sala ro. Tafayén i de ni do sugu, mélaw usarén saén taman dob gaiwe fégalinéy Tulusey aguwone.

<sup>11</sup> Endob i Kristowe, énggumahén brab ménwaléyén gérotor fadi i mantuwe aguwon toow na fo fiyo bé tafaye de. Atin i lawie féngadafan galbéko no, toow na fo fiyo bé tafaye de. Békén rénigoy de étew brab énda dini no dob fantade ni. <sup>12</sup> Atin ménahur i Kristowe dob Toowe fo Mékétéfu Sibéy ségule saén non éndaén kailanga noy mahure man. Atin békén do dara kambing taloo no do dara nati safi i uwité nuwe fégétulakén dob Tuluse. Yamula nuvitén i kaane dara fégétulakén dob Tuluse. Atin mélaw ménfukas tom tidéw dob de sala tom taman sa taman. <sup>13</sup> Bé do gétah, dara kambing brab dara safi brab awéw i natiwe safi i firikéne dob de étew do mékérésik dob kéféngintulus i de Judio. Atin tidéw béno, éndaén mékérésik ro. <sup>14</sup> Atin amuk waléy malinis i ségetéwe étew bé dara i de ayam, toow na fo fiyoy gérigonoy dara Jesu Kristowe. Non sabaf bé kétabang i Rémogor i Tuluse énda i tamana no, nirayén i lowoh ne fégétulak dob Tuluse. Non énda i tete dob Kristowe, fiyon kloh. Atin i dara ne, linisé noy de fédew tom dob de sala tom atin kédané noy késarig tome bé adate énda i lagaén. Atin mélaw gérigono tom i galbék i méuyage Tuluse.

<sup>15</sup> Atin been i niy funa Kristowe ménwaléy kéfeduwa tom inok rigoné noy ni mantu agéwon inok tanggaféy Tulusey de étew. Mélaw i kéluhana tome do fénemili i Tuluse, gédoté tom i kéfyonone taman sa taman loo bé fénasad i Tuluse. Fakay i ni mérigo non wén i kéléhu, sani kéléhu Jesu Kristowe, kémédan bé de sala tom rénigo tom bé lala tome séna ménodor bé tafaye agéwon.

<sup>16</sup> Ufama, wén i ségetéw étew rémigo sulat bé lala ne séna méuyag. Sénulatén ké ati gégédote bé de tamukén féledé no ké méléhu. Atin amuk ménléhuén i ni étew, kailangan wén foy émféféngintoow de ménléhuén. Tidéw béno, i étewé gégédot bé tamuk ne, gédoté no loo bé kékérén i sulate. <sup>17</sup> Endob amuk méuyag sénay ni étew réménigo sulat, énda i laga i ni sulat. Non wén saén i atagén ké méléhuén. <sup>18</sup> Atin ségiléw so bé niy tafaye ni aguwon rénigoy Tuluse. Non kailangan wén i dara inok mékédan i de sala. <sup>19</sup> Dob sunguwe de, bénréh Moisese dob de étew i kéluhanay de sugu tidéw dob kitabe. Tidéw béno, éndotén i dara i de nati safi brab kambing atin sénlawéken bé wayége. Tidéw béno, fénreén i bubul i bili-biliwe fénfuro no, brab fénreén soy klohe fongoy kayéwe féndawét isob. Atin tidéw béno, fénrikén dob de étew brab fénrikén so dob librowe sénulatan bé kitabe. <sup>20</sup> Atin bé lala Moisese mémirik, ménbérén mano, “Ay niy darae tanda i aguwone rénigoy Tuluse inok tayakufé no betom. Atin fatut odoro tom i ni agéwon non sénugu i Tuluse.” <sup>21</sup> Atin fénrik Moisese soy darae dob safute lawi féngadafan, loo so dob kéluhanay de gamit usarén bé kéféngintuluse. <sup>22</sup> Géfédew kéluhanay éntingayéne ténero i kitabe fatut firikon bé dara i ténulake inok waléy ro malinis dob adafay Tuluse. Atin amuk énda i dara ténulak, énda mífésagad i de étew bé de sala ro.

<sup>23</sup> I kéluhanay de éntingayéni dob lawie féngadafan kailangan firikon bé darae. Endob i de ni maak do anlung i toowe gamit i féngadafane dob lawayo saén. Mélaw fatut

toow na fo fiyoy tulakéne dob tintuwe gamit i féngadafane dob lawayo. <sup>24</sup> Mélaw ténulak Kristowey kaane dara. Atin énda ménahurén dob mékétifuwe sibéy dob fantade ni non maak anlung i tintuwe féngadafan dob lawayo saén. Atin diyo béniy Kristowe rigoné noy galbék i kéfédawa tome dob adafay Tuluse. <sup>25</sup> I gérotore fadi i de Judio mahur dob Toowe Fo Mékétufuwe Sibéy sénga bélintuwa, muwit bé dara i ayame fégétulakén. Endob i Kristowe, énda kailanga noy mahure médoor gule témulak bé lowoh ne. <sup>26</sup> Non amuk kailangan rigoné noy ni sénga bélintuwa, kailangan so mérasay médoor gule tidew bé gaiy kélémbage bé duniyae ni. Endob kailanga no saén i mahure ségule amun gédétén i tamfaday de gai. Atin méntefégito inok kédané noy sala i de étew sabaf bé kétulak ne bé lowoh ne. <sup>27</sup> I kéluhanay de étew kailanga roy mélöhue, tidew béno kukuméy Tuluse bero. <sup>28</sup> Atin loo so bé ni, téménulak i Kristowe ségule inok mékédan i sala i de medoo étew. Atin séfule mangéy dob duniyae ni. Endob énda séfuleén inok kédané noy sala i de étew. Yamula séfule mangéy dini inok fégilidé noy kfukas ne bé de étew mongot-mongot bé késéfule ne.

## 10

<sup>1</sup> I kitabe niray Moisese, maak anlung i de tintu fo fiyo iray Kristowe saén moso. Mélaw kulang i kitabe sémugu bé fatut témulak i étewe sénga bélintuwa taman sa taman. Non i kitabe énda géféwaléyo no métintuy étewe fégédét dob Tuluse. <sup>2</sup> Mélaw i de étew ménéngintulus loo bé sénugu i kitabe, amuk tintu ménwaléy ro damén malinis dob adafay Tuluse, éndaén tete i de fédew ro fantag bé de sala ro, atin éndaén kailanga roy témulake man ségule. <sup>3</sup> Endob i toowe, gétédémo ro énda séna ménkédan i de sala ro, non kailanga roy témulake sénga bélintuwa. <sup>4</sup> Non i dara i de safi taloo no do kambing, énda fakayén kémédan bé de sala.

<sup>5</sup> Mélaw amun gédétén gégumah i Kristowe dob duniyae ni, bénréhén dob Tuluse mano, “Enda méuyot go bé de ayam do tulakén dob Beeme. Yamula rénigo moy kagéne lowoh inok been i niy fatute tulakén dob Beeme. <sup>6</sup> Non énda mésuwat go bé de ayam tulakén do tuwégén dob ahayane féngadafan brab de tulak fégékédan bé sala i de étew. <sup>7</sup> Mélaw, béréhé ku dob Beeme, Tulus, ay niwu inok rigoné kuy kétaya muwe loo bé ménuslate fantag bé begéne dob libro muwe.” <sup>8</sup> Ay niy sunguwe bénréh Jesuse, “Enda méuyot go taloo no mésuwat go bé de tulak taloo no do ayam tuwégén dob ahayane féngadafan taloo no do tulak fégékédan bé de sala.” Bénréhén i de ni fiyon fo ké been i de niy sénugu i kitabe. <sup>9</sup> Tidew béno, bénréh Kristowe mano, “Tulus, ay niwu inok rigoné kuy kétaya muwe.” Mélaw gétiga tom kénday Tulusey tafaye aguwon tulakay de étew. Atin bénaliwana no bé tulak Kristowe. <sup>10</sup> Rénigo Kristowey kétayay Tuluse rigoné no. Mélaw i kéluhana tome ménwaléy tom malinis dob adafay Tuluse non ménkédanén i de sala tom sabaf bé tulak Jesu Kristowe, sani kaane lowoh. Mélaw éndaén kailangan i ségiyowe tulak.

<sup>11</sup> Dob tafaye aguwon, i de Judio do fadi témindég ro dob lawie féngadafan sénga fuweh inok rigoné roy galbék ruwe témulak médoor gule. Gido loo, i de fégétulak ro énda fakayén kémédan bé de sala ro. <sup>12</sup> Endob i Kristowe, téménulak saén ségule inok mékédan i de sala. Atin éndaén kailangan i ségiyowe tulak taman sa taman. Tidew béno, ménstar i Jesuse fingé dob kuwonoy Tuluse inok máguléw. <sup>13</sup> Diyo so béní ongot-ongoté noy gaiwe fétabanéy Tuluse bé de sébanil de. <sup>14</sup> Mélaw sabaf bé sébaane saén tulak, ménlinis tom tidew dob de sala tom, atin ménwaléy tom métintu taman sa taman.

<sup>15</sup> Atin wén soy kétoro i Rémogor i Tuluse fantag bé ni. Non bénréhén dob Ménuslate Kébéréh i Tuluse mano, <sup>16</sup> “Begéney Kadnane, atin ay niy mantuwe aguwon rigoné ku inok gétyakufo kuy de étew moso. Sulaté kuy de kitab gu dob de fédew ro brab dob de itunga ro.” <sup>17</sup> Atin bénréhén man mano, “Endaén fégétédémé kuy de sala ro taloo noy de tete rigoné ro.” <sup>18</sup> Mélaw amuk ménfésagadan i de ni, éndaén kailangan i ségiyowe tulak fégékédan bé de sala.

<sup>19</sup> Mélaw, do dumo gu, sabaf bé kéléhu Jesu Kristowe, éndaén kailanga tom i mégilake ké mahur tom dob Toowe fo Mékétéfu Sibéy gonoy Tuluse. <sup>20</sup> Rénigo noy mantuwe aguwon bé kétulak ne bé lowoh ne. Atin i de étew modor bé ni aguwon, méuyag ro taman sa taman. Amun ménbinasay lowoh ne maak rindung i bengaway Toowe fo Mékétéfu Sibéy ménkusi inok géahur i de étew. <sup>21</sup> Atin wén i toowe fo gérotor fadi tom, sani Jesu Kristowe. Beeney uléw tome do étew i Tuluse. <sup>22</sup> Mélaw fatut fégédét tom dob Tuluse énda ubo-ubo i kífengadaf tome de, brab énda ruwo-ruwoy de fédew tom bé kéunur tome de. Fakay i ni non maak ménfirikon tomén bé dara Kristowe fégékédan bé de sala tom inok éndaén fégitungé tom i de sala tom. Atin malinisén i de lowoh tom non bé kóbautise betom. <sup>23</sup> Enda ruwo-ruwoy fédew tome de. Yamula fatut féégét tom i késarig tome bé nan ongot-ongoté tom, sani fayagé tome dob de étew sani kétumay Tuluse bé fasad ne. Non gésarig tom bé tumané noy fasad ne. <sup>24</sup> Atin fatut fétausé tom i késégédaw tome, brab késétabang tome, brab kérigo tome bé fiyowe. <sup>25</sup> Atin katom térenon i késélimud tome méngintulus loo bé adat tome. Katom iringén i de étew témérén ron sélimud méngintulus. Yamula, fatut séfèbagéré tom i de fédew tom. Fatut fo rigoné tom i ni non éndaén mérugayén tidéw béléewe niy késéfule i Kadnane.

<sup>26</sup> Endob amuk fétausé tom i kérigo tome sala fiyon fo ké gétiga tom i toowe kétoro, ménsguggula i kétulak Kristowe atin énda i tulak fégékédan bé de sala tom. <sup>27</sup> Amuk wén i ségétew réménigo bé ni, fatut mégilak bé kékukum i Tuluse. Non wén i gonone aféy fégébinasa bé de étew sébanil bé Tuluse. <sup>28</sup> Bé gétahe, i étewe géfélis bé kitabe niray Moisese, énda méuray i nay de kémukum de amuk wén i ruwo taloo no télén gétew téumbo de. Mélaw féléhuén i ni étew ménalsa. <sup>29</sup> Amuk loo bé ni, ati keey i mérigowé dob étewe mika bé Nga i Tuluse? Toow fo gétimal i kékukume de non fénggito noy kékarang ne bé énda i laga i dara Kristowe kémédan bé de salaén, sani tandaé bé mantuwe aguwon kay de étew inok waléy ro malinis dob adafay Tuluse. I étewe mika bé Nga i Tuluse, maak fénéngirasén i Rémogor i Tuluse fiyon fo ké ménggédaw i Rémogor i Tuluse de. Mélaw i ni étew médait fo ké gétimal i kékukume de. <sup>30</sup> Non gétiga tom ménbéréh i Tuluse mano, “Begéney sémulie, Begéney kémukume.” Atin wén soy ségiyowe Ménsulat Kébéréh i Tuluse mano, “Kukuméy Kadnaney de étewén.” <sup>31</sup> Toow fo mékaid ké kukuméy Tulusey ségétewe étew. <sup>32</sup> Fégétédém gom i de énggétah do gai, amun mantu séna énggésobuto kom i toowe kétoro fantag bé Tuluse. Fiyon fo ké ménrasay gom, énda téménrén gom munur. <sup>33</sup> Wén i do no do gai, i de énda munur fénéngiras ro begom dob adafay médoowe do étew atin fénrasay ro begom. Atin wén i no gai fénrasay roy de dumo gom, brab ménamung gom bero non ménuray i na gome bero. <sup>34</sup> Atin ménuray i na gome bé de étew do ménféri su sabaf bé kéunur ruwe. Atin amun éndot roy de tamuk gom, énda ménkérít gom de. Yamula moror gom non gétiga kom wén i toow na fo fiyo tamuk gom gédoté kom moso, atin énda mékédano taman sa taman. <sup>35</sup> Mélaw, kagom térenon i késarig gome bé Kadnane. Yamula féégét gom i késarig gome de inok gédoté kom i dakéle baras. <sup>36</sup> Atin fatut fétingkél gom inok gérigono kom i kétayay Tuluse brab inok gédoté kom i fénasad ne. <sup>37</sup> Non wén i Ménsulate Kébéréh i Tuluse mano, “Endaén mérugayén, géumahén i nan ongot-ongoté kom. Enda mélisén. <sup>38</sup> Atin i de métintu do étew gu, gédoté roy umule magufusa non ménunur ro Begén. Endob amuk wén i ségétew bero ménbaleng i fédew ne sabaf mégilak atin éndaén munurén, énda mésuwatu de.” <sup>39</sup> Endob i de betom, do dumo gu, békén betom i de ménbaleng do fédewén brab do téménrén do munur do mékukum ro mélaw. Békén loo bé nan i de rigoné tom, non ménunur tom atin mélaw méfukas tom tidéw dob de sala tom.

## 11

<sup>1</sup> Ati kéunure? Wén i kéunur tom amuk tintu gétiga tom gédoté tom i de ongot-ongoté tom, sani de éntingayén énda séna gito tom de. <sup>2</sup> I de énggéétah do étew, fénswat roy Tuluse sabaf bé kéunur ruwe. <sup>3</sup> Sabaf bé kéunur tome bé Tuluse, énggésobuto tom i

kélimbag ne bé duniyae ni dob kébérén ne saén. Lénimbagén i kéluhanay de énggiton tidew dob de énda do giton.

<sup>4</sup> I Abele bé do gétah, sabaf bé kéunur ne, nirayén i toowe na fo fiyo tulak dob Tuluse bé tulake niray i ofo ne Kain. Sabaf bé kéunur ne, kénarang i Tuluse métintu, non tényayakufén i tulak ne. Atin sabaf bé kéunur ne, wén soy kétoroén dob betome fiyon fo ké ménléhuén.

<sup>5</sup> Atin i Enoke, sabaf bé kéunur ne, énda ménléhuén. Yamula féndiyat i Tuluse atin éndaén énggitoy de étew de non diyoén dob lawayo. Wén i Ménssulate Kébérén i Tuluse fantag bé Enoke bé ménsuwat i Tuluse de bé énda séna déméniyatén de. <sup>6</sup> Atin amuk énda munur i ségétewe étew bé Tuluse, énda géfésuwata noy Tuluse. Non i étewe fégédét dob Tuluse, kailangan munur bé wén i Tulus brab barasay Tulusey kéluhanay de séméléd de.

<sup>7</sup> Atin i Noehe bé do gétah sabaf bé kéunur ne, réménigo barko. Non amun bénréh i Tuluse dob beene bé wén i gégumah dakél dunuk, ménunur de. Mélaw nodoro noy sugu i Tuluse rémigo barko. Atin énda mélaw ménléné i Noehe brab de samungén fiyon fo ké kénukum i Tulusey de ségiyo étew dob duniyae ni. Atin mélaw sabaf bé kéunur ne, fénggito Noehe bé tete i de kéilawan. Atin fénwaléy i Tuluse métintuy Noehe sabaf bé kéunur ne.

<sup>8</sup> Atin i Abrahame so, sabaf bé kéunur ne, nodoro noy kékérén i Tuluse bé kétawag i Tuluse de brab sénuguén mangéy dob ségiyowe ingéd inok gédoté noy fantade fénasad i Tuluse irayén de. Mélaw téngakén i kaane ingéd sabaf bé kéunur ne, fiyon fo ké énda gétiga noy ayo nuwe de. <sup>9</sup> Atin sabaf bé kéunur ne, ménbat i Abrahame diyo dob fantado no, sani fénasad i Tuluse irayén de. Ménbat iyo maak ségétew miloh saén fiyon fo ké been i niy fantade fénasad i Tuluse irayén de. Ménbat iyo safute lawi rénigo no loo so bé nga ne Isak brab bebe né Jakob. Bero soy fénasaday Tuluse de irayén i fantade ni. <sup>10</sup> I Abrahame ni, nongot-nongotén i ingéde dob lawayo, sani ingéde bénantak i Tuluse brab rigoné no brab énda mékédano taman sa taman.

<sup>11</sup> Atin sabaf bé kéunur ne, i Abrahame ménwaléy boh, fiyon fo ké toowén fo lukés loo soy bawag ne Sarah. Endob fiyon fo ké lukés ron fo toow, séménarig ro dob Tuluse bé tumané noy fasad ne. <sup>12</sup> Atin mélaw fiyon fo ké toow fo lukésén i Abrahame ni brab éndaén géfoboro noy bawag ne, ménwaléy so katufuay médoowe étew. Ségiléw ro bé kédooj de giton dob lawayo brab de farék dob dénsaane.

<sup>13</sup> I de ni do étew ménunur bé Tuluse, ménléhu ro bé gaiwe énda séna énggédot roy fantade fénasad i Tuluse irayén bero. Gido loo, énda téménrén ro ménunur, non gétiga roy wén i gaiwe moso gédoté roy nan ongot-ongoté ro, sani fénasad i Tuluse bero. Atin fénggito ro bé békén tintu ingéd roy duniyae ni, yamula i tintuwe ingéd ro dob lawayo diyo. <sup>14</sup> Atin i de étew béléewe ni loo bé niy kékérén ruwe, fégito ro békén dob fantade niy tintuwe ingéd ro, yamula dob lawayo diyo. <sup>15</sup> Non i ro Abrahame, énda ménggundoy ro bé ingéde fénled ro. Amuk ménggundoy ro de, wén soy gai géfule ro mangéy diyo. <sup>16</sup> Yamula, ménuyot ro fo mangéy bat i dob ségiyowe ingéd, sani toowe na fo fiyo ingéd dob lawayo diyo. Atin i Tuluse énda mélaw mémala no ké fédawétén Tulus ro. Non ténafayén i ingéde bat ioy de ni étew.

<sup>17-18</sup> Atin sabaf bé kéunur Abrahame bé Tuluse, irayén damén i nga ne Isak fégétulakén dob Tuluse. Toow fo fédewén miray bé buntunge ngaén fégétulakén fiyon fo ké wén i fasad i Tuluse de mano, “Bé nga me Isak, waléy go katufuay médoowe étew.” Atin fiyon fo ké fénasaday Tulusey Abrahame loo bé ni, téneungkadén soy Abrahame féléhué noy nga ne. Atin ménodor i Abrahame bé sugu i Tuluse. <sup>19</sup> Non gétiga Abrahame gétebuleoy Tuluse soy Isake. Atin maak ténebule i Tuluse so non amuk énda génlé i Tulusey Abrahame, féléhué noy nga ne Isak.

<sup>20</sup> Atin i Isake amun lukésén, sabaf bé kéunur ne bé Tuluse, nongotén dob Tuluse bé féfiyoné no mosoy de ngaén, ro Jakob brab Isaw.

<sup>21</sup> Atin i Jakobe, sabaf bé kéunur ne bé Tuluse, amun gédétén méléhu, nongotén dob Tuluse bé féfiyoné noy séngae bebeén, sani de nga i nga ne Jose. Rénigo noy ni bé lala ne séménanday dob tugé ne fénéngadafén i Tuluse.

<sup>22</sup> Atin i Josehe so, sabaf bé kéunur ne bé Tuluse, amun gédétén méléhu, bénréhén i fantage bé kéésut i de séfuén, sani de Judio, tidéw Egipto. Atin bénréhén so bé fatut uwité roy bangkay ne ké mésut ro.

<sup>23</sup> Atin i de lukés Moises, sabaf bé kéunur ruwe, bénunéy roy nga ruwe Moises taman télaw gétérésang kélunganon i idad ne. Non i datue dob Egipto, sénuguén bé féléhuén i kéluhanay de nga lagéy i de Judio. Endob i de lukés Moisese énda ménggilak ro mémélis bé ni sugu, non ménunur ro bé Tuluse. Atin énggito ro toow fo fiyoy nga ruwe.

<sup>24</sup> Atin i Moisese ni so, sabaf bé kéunur ne bé Tuluse, amun métawanén étew, ménika de ké fédawétén nga i libune nga i Datue dob Egipto. Rénigo noy ni fiyon fo ké toow fo fiyoy goho nuwe dob lawi i datue gono no ménruk. <sup>25</sup> Endob sabaf bé kéunur ne, mas ménuyot mérasay séréngan bé de dumo no do étew i Tuluse bé singkowe saén kéfeguyaya muwit sala. <sup>26</sup> Fénggitungén, mas fiyo ké mérarék i de étew de sabaf bé kéunur ne bé Kristowe gérumah moso bé kéluhanay de ungangén dob Egipto gédoté no. Non gétiga no toow na fo fiyoy baras ne gédoté no tidéw dob Tuluse moso.

<sup>27</sup> Atin sabaf bé kéunur ne, ménékédan i Moisese dob Egipto fiyon fo ké mékerit i Datue de, non énda méglakén. Atin ménfédayday dob de gai do mérégén non maak gito noy éndae giton Tulus manangguwit de. <sup>28</sup> Atin sabaf bé kéunur ne, rénigo noy kandulie féndawét “Témara”. Mélaw sénuguén i de Judio mémirik bé dara i bili-biliwe dob de fintu i de lawi ro inok i téakiwe méméléhu taraa no saén i lawi i de Judio atin énda féléhué noy de ofo nga dob séngae lawi loo bé rénigo nuwe dob de étew dob Egipto.

<sup>29</sup> Atin sabaf bé kéunur ruwe bé Tuluse, amun ménusut i de Judio tidéw Egipto énggifar ro dob dogote féndawét “Furo Dogot” maak ménagéw ro dob tikare fantad. Endob amun ténundug i de sundalo tidéw Egipto bero atin téménlama ro mifar, ménléhu ro kéluhanan non ménsefule i wayége.

<sup>30</sup> Atin sabaf bé kéunur i de Judio, ménrundas i émbagére diding géliwét bé ingéd i de sébanil bero féndawét Jeriko. Non ménodor ro bé sugu i Tuluse bé agéwé ro liwétén sénga fuweh taman fitew gétérésangan. Tidéw bénou, rénundas i Tuluse. <sup>31</sup> Endob bati diyo so dob Jerikoy sundale libun féndawét Rahab. Atin sabaf so bé kéunur ne, énda ménléhuén séréngan bé de étew dob ingéd ne do mémélis bé de sugu i Tuluse. Non ténayakufén i de sénarigoy odoroy de Judio, sani de sénugu ro témulik bé kébagér i no ingéd. Endob sénékém ro saén i kétulik ruwe de.

<sup>32</sup> Témérénun muret fantag bé de énggéétah do étew ménunur bé Tuluse, loo bé ro Gideone, ro Barak, Samson, Jeffe, Dabid, Samuel brab sénarigoy Tuluse muret bé kébéréh ne. Non kulang i gai guwe muret fantag bé kéluhana ruwe. <sup>33</sup> I de dumo bero, sabaf bé kéunur ruwe, ménsetiboh ro bé de ségiyo do dakél ingéd atin téménaban ro. Méngguléw ro métintu, atin énggédot roy fénasad i Tuluse. Atin i de dumo bero énggétigémo roy ba i de mérayar brab do émbaraw dakél binatang féndawét leon inok énda gékekeo ro bero.

<sup>34</sup> Atin i de dumo bero sabaf bé kéunur ruwe, énda ménluwé ro dob de toow fo dakél do aféy. Atin i de dumo bero énda ménléhu ro bé de sundang i de sébanil bero. Fiyon fo ké mélubay ro, ménwaléy ro émbagér sabaf bé kéunur ruwe inok gétabana roy de sundalo sébanil bero tidéw dob de ségiyo ingéd. <sup>35</sup> Atin wén soy de libun bero ménchébule i de nga ro sabaf bé kéunur ruwe.

Atin i de dumo bero, ménléhu ro bé kéferasaye bero, non ménika ro tangéyén. Mas ménuyot ro mérasay brab méléhu inok tébule ro brab gédoté roy toowe na fo fiyo kéfaguyag. Rénigo roy ni sabaf bé kéunur ruwe bé Tuluse. <sup>36</sup> I de dumo bero de munur, déniyangka ro bero brab bénadas ro bero. Atin i de dumo bero, nikét ro brab fénrisu ro bero. <sup>37</sup> I de dumo bero, ménléhu ro bé kébérone bero batéw. Atin i de dumo bero, sénuvak ro bero bé ragarie. Atin i de dumo bero, téniboh ro bero bé sundange atin ménléhu ro. Atin i de dumo bero, énda i do kégal ro saliyu bé kulit i de bili-bili brab

do kulit kambing. Toow ro fo méskinan brab toow ro fo ménrasay. <sup>38</sup> Atin i de dumo bé de munur ni, énggétagaka roy de lawi ro brab ménangéy ro bati dob de gonon énda i do étew de bati brab dob de tuduk, brab dob de takub brab dob de tosong fantad non férasayén ro. Enggiton énda fo médait i de tete étew sétifon dob duniiae ni bé de ni do fiyo étew munur bé Tuluse.

<sup>39</sup> Toow fo ménswat i Tuluse bé de ni do étew sabaf bé kéunur ruwe. Gido loo, énda séna énggédot roy fénasad i Tuluse irayén bero. <sup>40</sup> Non bénantak i Tuluse betom i toowe na fo fiyo aguwon. Mélaw kailanga ro ongot-ongot betom do étew béléewe, inok tumané noy fasad ne bero sérénge betom.

## 12

<sup>1</sup> Mélaw gétédémo tom i de médo do énggétah étew do méégét ro munur bé Tuluse. Atin maak téngténgé ro betom béléewe ni. Atin i betome, maak sékuya tom bé lala ruwe téméngténg. Mélaw fatut tagaké tom i de éntingayén funa tom métana léméntu. I atag i ni kékéréh gu, fatut tagaké tom i de sala funa tom énda gérigo bé kétayay Tuluse. Atin fatut mégéror tom rémigo bé galbék i Tuluse. <sup>2</sup> Atin fatut féégét tom i kífégitung tome fantag bé Jesuse, sani émféunure betom brab émféégéte bé kéunur tome. I Jesuse, féndayaén i de étew kémelabo de dob kruse. Atin fiyon fo ké mékémalay kéléhu ne dob kruse, énda fégitungé no de. Yamula fénggitungén i kéoror ne ké gilid i kérasay ne. Atin béléewe ni diyo ménasar fingé dob kuwonoy Tuluse méguléw.

<sup>3</sup> Fétuntay gom i ménrigowe dob Beene. Féndayaén i de tete étew émférasay de. Mélaw i begome, fatut fébagér gom i de fédew gom brab kagom témérén munur, fiyon fo ké wén i émférasay begom. <sup>4</sup> Non fiyon fo ké atuho kom i salae, énda séna féléhuén gom sabaf bé kéunur gome. <sup>5</sup> Aw énggélifoto komén i kékéréh i Tuluse dob begome do ngaén, sani kékéréhe émféfiyo bé de fédew gom? Bang i Tuluse, “Nga gu, fétuntay go ké fítifé ku beem sabaf bé de salaém. Atin kago tete i fédew me de ké fítifé ku beem.” <sup>6</sup> Non i de étew fítifé ku ké mésala ro, beroy de étew kégédawa ku. Atin i de étew fítifé ku ké rémigo ro tete, beroy de étew ténayakuf gu maak do nga gu.” <sup>7</sup> Mélaw amuk mérasay tom, tingkél gom atin fégitung gom maak fítifé boh gome begom sabaf bé de sala gom. Non amuk kérasayan gom, gétiga kom i Tuluse ténayakufén begom maak do ngaén. Non i kéluhanay de boh, fítifé roy de nga ro amuk rigoné roy tete. <sup>8</sup> Atin amuk énda fítifé Tuluse begom ké mésala gom, békén gom do tintu ngaén, éndob do ngaén saén dob liyuwe. <sup>9</sup> I de katom boh dob fantade ni, fítifé ro betom ké rémigo tom tete. Atin mélaw basana tom bero. Mélaw, toow fo fatut ké féndayaé tom i Tuluse méguléw betom. Non Beeney Abay tome dob lawayo atin irayén betom i umule magufusa ké rigoné tom i ni. <sup>10</sup> I de katom do boh dob fantade ni, fítifé ro betom ké nga tom séna, loo bé gékaranga ruwe fiyo. Endob i Tuluse fítifé no betom inok tabanga no betom minut métintu loo bé kétintu nuwe. <sup>11</sup> Amuk fítifé Tuluse betom, mika tom de bé no gai brab tete i de fédew tom de. Endob sabaf bé ni moror tom de moso ké gégumah i gaiwe waléy tom métintu brab métanék i de fédew tom.

<sup>12</sup> Mélaw, do dumo gu, amuk maak lugotén gom rémigo bé kétayay Tuluse féégét gom i kéunur gome. <sup>13</sup> Taus gom agéw dob métintuwe aguwon inok i de étew énda séna méégét i kéunur ruwe, amuk gito ro begom énda minut ro mélubay, yamula minut méégét i kéunur ruwe.

<sup>14</sup> Rigo gom i kéluhanay de gérigono kom dob kéluhanay de étew inok énda gésékérit gom. Atin fétintu gom sénga tékélid, non amuk énda métintu gom, énda gito gom i Kadnane moso. <sup>15</sup> Atin ingat gom inok énda i ségétew begom témérén témayakuf bé kégédaw i Tuluse. Non i étewe loo bé ni ségiléw bé nohoke féla brab bisay onok ne, non mégukét i de munur. Atin been i niy funay de dumo no munur waléy so gésala. <sup>16</sup> Atin ingat gom inok énda i ségétew begom waléy mékérésik i adat ne taloo no diguré noy Tuluse, loo bé rénigo Esawe bé do gétah. Non énda génulaa noy kuwagib ne tidew dob Tuluse. I kuwagibe ni kaan, non been i ofo. Endob fénbélén i kuwagib ne dob tuwaréy

ne inok géama saén ségule. <sup>17</sup> Gétiga kom, tidew béno ménuyot de ké ongotéy boh ne dob Tulusey féfiyoné no. Endob éndaén fakayén, non fiyon fo ké kémérew, éndaén méfégalin i rénigo nuwe bé kékéluluk ne bé kuwagib ne inok gédoté no saén i kaamae.

<sup>18</sup> I aguwo tome mangéy dob Tuluse, énda ségiléwén bé aguwoy de katufua tom do Judio. Non fénfégédét ro dob sébaane tuduk gito ro, sani tuduke féndawét Sinai gonoy mérinoe aféy. Délémon diyo non bé mégéfole rawén brab émbagére réfuruh. <sup>19</sup> Atin bé béno, ménbéréh métanug i témburiwe brab métanug i kékéréh i Tuluse. Atin i de étew diyo, amun énggelingoo roy ni émbéréh, nongot roy éndaén damén émbéréhén ségule, <sup>20</sup> non toow ro de fo ménggilak. Non ménbéréh mano, “Amuk wén i kémuwah bé tuduke ni, fiyon ayam, kailangan féléhuén ibéron batéw.” <sup>21</sup> Atin toow fo mékégilak i no gonon gito ro. Mélaw ménbéréh i Moisese mano, “Lémukubu bé kégilak guwe.”

<sup>22</sup> Endob i betome, békén loo bé nan i kékégédét tome dob Tuluse. Non maak magéw tom dob tuduke Sion gonoy ingéd i méuyaage Tulus. I ni ingéd féndawét Jerusalem diyo dob lawayo, gonoy firoye ngibu télaki. <sup>23</sup> Maak fégédét tom dob de sungu nga i Tuluse, sani de étew ménslat i de dawét ro dob lawayo. Diyo ro ménlimud toow fo moror. Atin fégédét tom dob Tuluse, sani kémukume bé kéluhanay de étew. Atin ménfégédét tom so dob de rémogor i de ménléhu do métintu étew, sani de fénwaléyén do toow fo métintu dob lawayo. <sup>24</sup> Atin ménfégédét tom so dob Jesuse, sani réménigowe bé mantuwe aguwon inok gétanggafay Tulusey de étew. Atin ménfégédét tom so dob dara Jesuse fénirik. Toow na fo fiyoy dara Jesuse bé dara Abele. Non i dara Jesuse been i tanda i kégédaw i Tuluse. Endob i dara Abele, been i tanda i kékukum i Tuluse.

<sup>25</sup> Mélaw ingat gom inok énda mika gom mégélingo bé kékéréh i Tuluse. Non ménkukum i de énggétah do étew ménika mégélingo bé Moisese sani sénarigoy Tuluse muret bé kékéréh ne dob duniiae ni. Mélaw i betome so, amuk énda munur tom bé kékéréh i Tuluse tidew dob lawayo, toow na fo énda gésélyah tom bé kékukum i Tuluse. <sup>26</sup> Bé do gétah, ménkuyung i duniiae non ménbéréh i Tuluse. Endob béléewe ni, wén i fasadén mano, “Kuyungé ku man ségule i duniiae brab lawaye so.” <sup>27</sup> Ay niy atag i ni kékéréh: Mékédan i de éntingayén do mékuyung, sani de lénimbag i Tuluse. Mélaw i de éntingayén énda mékuyung ro énda mékédan ro.

<sup>28</sup> Mélaw fatut fésalamat tom dob Tuluse, non géahur tom dob kékéguléw i Tuluse énda mékuyungén taloo no mékédan. Fatut féngadafé tom i Tuluse loo bé kétaya nuwe de. Atin fatut basana tom i Tuluse brab mégilak tom mémélis bé de suguéen. <sup>29</sup> Non aféy i fégékukum i Tuluse.

## 13

<sup>1</sup> I betome do sédumon munur bé Kristowe, fatut fétausé tom i késégédaw tome. <sup>2</sup> Katom lifotén i témayakufe bé de étew énda séna gélolo tom de dob de lawi tom. Wén i de étew tényakuf roy de étew énda séna gélolo ro bero, éndob i toowe, tényakuf roy de télaki, éndob énda gétiga ro de. <sup>3</sup> Atin kagom lifotén i de férisu. Fatut méuray i na gome bero maak begom soy de ménféri su diyo dob berowe. Ségiléw so bé de mérasy, fatut méuray i na gome bero maak begom soy kérasayan, brab fatut fagifat gom bero.

<sup>4</sup> Atin fatut basana kom kéluhanan i késébawage. I de sébawag fatut énda sétayan ro bé de ségiyo. Non kukuméy Tulusey de étew sétayan ro saliyu bé bawag ruwe brab de bigaén.

<sup>5</sup> Atin kagom fésubranén i kétaya kome bé kurtae. Fatut kasukudan gomén bé wéne dob begome. Non bénréh i Tuluse mano, “Enda tagaké ku begom, taloo no fédayé ku begom.” <sup>6</sup> Mélaw sabaf bé késarig tome bé Tuluse, fatut béréhé tom matom, “Kadnan i téma bangane begén. Mélaw énda mágilaku bé de étew brab kérigo ruwe begén.”

<sup>7</sup> Fégétédém gom i de énggétah do odoron, sani de sénarigoy Tuluse muret bé kékéréh ne dob begome. Fégitung gom i de fiyo adat ro brab de rigoné ro taman kéléhu ro. Iring gom i kénur ruwe. <sup>8</sup> Non i Jesu Kristowe, énda émfégalino. Yamula ségiléw so

tidéw féganay taman béleeewe ni, brab taman sa taman. <sup>9</sup> Atin kagom munur bé de ségiyogiyo kétoro funa kom témérén munur bé towe kétoro. I kégédaw i Tuluse féégété noy kéunur tome. Endob i kéodorone bé de sugu bé atiy de amaén énda géamaa tom de, énda fo féégété noy kéunur tome. I de étew odoro roy de ni do sugu, énda gétabanga no bero.

<sup>10</sup> I betome do munur bé Kristowe, wén i tulak tom, sani Jesu Kristowe. Endob i de fadi i de Judio, sani de témulak séna dob lawie féngadafan dob Jerusalem, énda i kuwagib ro mama bé katome tulak. <sup>11</sup> Gétiga tom amuk témulak i de Judio, i gérotore fadi i de Judio, muwit bé dara i ayame témulak mangéy dob Toowe fo Mékétéfu Sibéy inok irayén dob Tuluse inok kédané noy de sala. Endob i de lowoh i de ayam do fénléhu, métuwégi dob liyuy ingéde. <sup>12</sup> Been i niy funa Jesuse ménléhu dob liyuy ingéde Jerusalem, inok kédané noy de sala i de étew bé dara ne inok mélinis ro dob adafay Tuluse. <sup>13</sup> Mélaw fatut mangéy tom dob liyuy ingéde inok géfégédét tom dob Beene. I atag i ni, fatut tagaké tom i adat i de Judio inok sémarig tom saén bé Jesuse. Fatut rigoné tom i ni fiyon fo ké fémalané ro betom séréngan bé Kristowe. <sup>14</sup> Non énda i ingéd dob fantade ni gono tom bati taman sa taman. Yamula ongot-ongoté tom i tintuwe ingéd tom batio tom moso. <sup>15</sup> Mélaw fatut dayéwé tom démoyun i Tuluse, atin fayagé tom i kéunur tome bé Jesuse. Non been i nan i maake kétulak tom bé Jesu Kristowe, sani fadi tome. <sup>16</sup> Atin kagom lifotén i rémigowe fiyo brab sétabang gom, non i ni adat maak tulak so émfésuwat bé Tuluse.

<sup>17</sup> Fatut odor gom bé de sugu i de odoro kom do munur bé Kristowe. Non beroy de démoyun témulama bé kéunur gome inok minut mégét. Non wén moso i gai susinéy Tulusey de galbék ro ké fiyo taloo no énda. Atin amuk modor gom bé de sugu ro, moror ro gémalbék. Atin amuk énda modor gom bé de sugu ro, waléy tete i de fédéw ro atin énda tabanga ro begom.

<sup>18</sup> Fétaus gom i kédasala kome begey. Gétiga key énda i rénigo gey tete non téménlama gey rémigo fiyo sénga tékélid. <sup>19</sup> Atin ongoté ku dob begome dasala kom begén dob Tuluse inok géséfuleu magad mangéy dob begome.

<sup>20</sup> Ténébule i Tulusey Kadna tome Jesu Kristo. Atin amun ménléhu i Jesuse, i dara ne ménwaléy tanda i mantuve aguwon rénígoy Tuluse inok tanggafé noy de étew. I ni aguwon énda mékdano taman sa taman. Atin sabaf bé kéléhu Jesuse maak Beeney towe fo fiyo témalima begom do maak bili-bili. <sup>21</sup> I Tuluse fétanéché noy de fédéw, irayén damén begom i kéluhanay de kailanga kom inok gérigono kom i kétaya nuwe. Atin tabanga Jesuse damén betom inok gérigono tom i funay Tuluse mésuwat. Médayéw damén i Jesu Kristowe taman sa taman. Amen!

<sup>22</sup> Do dumogu, ongoté ku begom bé fétinkél gom mégélingo bé ni sénulat gu funay de fédéw gom émbagér. Non énda métaah i sulat guwe ni begom. <sup>23</sup> Méuyotu de ké gétiga kom i fantage bé dumogu tom Timoteo. Mémentangéyén tidéw dob férisunone. Amuk magad damén i kégumah ne dini, géodor begén ké angéyé ku begom tukawén.

<sup>24</sup> Ségifa gom begey i kéluhanay de odoro kom do étew i Tuluse. Atin i de dumogu munur bati dob ingéde ni Italiya, ségifaé ro begom.

<sup>25</sup> Mégédaw damén i Tuluse begom kéluhanan.

## I Sulat Santiagowe

Santiagoy dawét i lagéye séménulat bé ni sulat. Been i tuwaréy Jesu Kristowe. Sénulatén i ni sulat dob de kéluhanay de munur bé Jesuse.

Dob ni sulat, ténero Santiagowe bé fatut féténgténg i de étew i kéunur ruwe inok giton tintu ro fo munur. Téneroén bé fatut ro rémigo fiyo brab métintu émféténgténg bé kéunur ruwe. Téneroén bé amuk énda fiyoy de rígoné ro, énda i atag i kéunur ruwe.

<sup>1</sup> Begénye Santiagowe, sani sugu-suguéy Tuluse brab Kadnane Jesu Kristo. Sulata kuy kéluhanay de étew i Tuluse do ménbéragar dob de séségiyo-giyo do ingéd dob duniaye ni. Ségifaé ku begom kéluhanan.

<sup>2</sup> Do dumo gu munur bé Jesuse, oror gom amuk kérasayan gom bé médoowe do kétengkad begom. <sup>3</sup> Non gétiga kom amuk fédayday gom munur ké téngkadén i kéunur gome, waléy mélaw témingkél i fédew gome. <sup>4</sup> Atin fatut fo féténgkél gom inok waléy gom toow fo métintu brab énda i kulang dob kétintu gome. <sup>5</sup> Endob amuk wén i ségetéw begom kulang sénay kégétiga nuwe bé fatute, ongot gom de dob Tuluse. Atin iraya no begom bé kégétigane non toow fo mégédaw i Tuluse brab méuyot fo témantu miray dob kéluhanane. <sup>6</sup> Atin amuk démasal gom mongot, fatut toow gom de fo munur bé gédoté kom i ongoté kome, kagom férubo-ruwonén i de fédew gom. Non i étewe ruwo-ruwoy fédew ne, démoyn émfarin i itunga nuwe, ségiléw bé bagéle dob dogote magéw sabaf bé kéfanir i réfuruhe de. <sup>7</sup> I étewe loo bé ni, békénén fatut kémarrang bé iray i Kadnane dob beeney no ongoté no. <sup>8</sup> Non ruwo-ruwoy fédew ne, énda sémarigén bé Tuluse. Brab énda fo gétiga no de ké atiy toowe fo kéuyoto no rígoné no.

<sup>9</sup> I de méskinan do munur bé Kristowe, fatut ro moror non fégérotoréy Tuluse bero. <sup>10</sup> Atin i de kawasa do munur bé Kristowe, fatut ro so moror non fégérifantadéy Tuluse bero. Non amuk méléhu i kawasawe, ségiléw saén bé kéléhu i de flores, non mélédan i tamuk ne dob beene. <sup>11</sup> Non i de flores, amuk sémbang i térsange, toow fo méduf atin méléhu i de flores. Mégangu ro brab éndaén fiyoy falas ruwe. Loo bé niy kébinasay kawasawe étew bé lala ne fégéror gémalbék kémurta.

<sup>12</sup> Moror i étewe fédayday témingkél brab sémarig bé Tuluse dob gaiwe téngkadén. Non amuk gilid i kétengkade de, gédoté noy umule magufusa sani barase fénasad i Tuluse irayén dob de étew méimu bé Tuluse. <sup>13</sup> Atin amuk wén i ségetéw ménalsa sabaf bé kétengkade de, békén fatut béréhé no mano, “Tulus i témingkade begén inok rígoné kuy salae.” Non i Tuluse énda téngkadé noy de étew inok rémigo ro sala, atin énda i gétengkad bé Tuluse. <sup>14</sup> Endob i toowe, kéluhanay étewe métengkad ro amuk féfanangguwit ro bé de tete kétaya ro. <sup>15</sup> Tidew béo, amuk modor ro bé de tete kétaya ro, mésala ro. Brab amuk démayday ro rémigo sala, méléhu ro. <sup>16</sup> Mélaw do gulaané ku do dumo gu, kagom fégitungén de ké fésalaéy Tulusey étewe, non békén toow i nan.

<sup>17</sup> I kéluhanay iray i Tuluse, fiyo. Brab i kéluhanay toowe fiyo, tidew dob Abaye Tulus, sani léménimbage bé kéluhanay rémendawe dob lawayo. I de ni do éntingayén, émfarin i kéréndaw ruwe. Endob i Tuluse, énda émfarino. <sup>18</sup> Non been i niy kétaya nuwe, fénwaléyén betom do ngaén bé toowe kékéréhén, inok waléy tom do toow fo gérator bé kéluhanay de éntingayén do lénimbagén.

<sup>19</sup> Do dumo gu, fégétédém gom i ni, kagom magad mélérít. Yamula fégélingo gom na métah, tidew béo, been nay no béréh gom. <sup>20</sup> Kétayay Tuluse ké rémigo gom fiyo, éndob énda gérigo gom fiyo ké mélérít gom. <sup>21</sup> Mélaw tagak gom i de mélérésik do adat gom brab kagomén rémigo tete. Unuro kom i Tuluse brab rigo gom i kétaya nuwe.

Enggélingoo komén i kékérél i Tuluse. Atin béléewe ni, fatut munur gom bé kékérél i Tuluse sani mémukase begom bé de sala gom.

<sup>22</sup> Mélaw odoro kom i kékérél i Tuluse. Buluk fégélingoé kom saén i kékérél i Tuluse éndob énda rigoné kom de, fagakara kom saén i kagome lowoh. <sup>23</sup> I étewe mégélingo saén bé kékérél i Tuluse éndob énda odoro no de, ségiléw bé étewe téméngténg dob féngalungone, atin gito noy falas ne. <sup>24</sup> Endob amuk énggilid gito noy falas ne atin magéw, atin tékédan, sonom so béno mélifot bé falas ne. <sup>25</sup> Endob i étewe toow fo féganadé no brab odoro noy kékérél i Tuluse, békén saén fégélingoé no brab magad gélifoto no, gédoté noy de kéfionon tidew dob Tuluse bé kéluhanay de rigoné no. Atin i kékérél i Tuluse, been i niy tintuwe kukuman énda i kulang de, mémukas bé de étew dob de sala ro.

<sup>26</sup> Amuk émbérél i ségétewe étew méngintulus kun, éndob énda fo démilaén tuko ké émbérél, énda i atag i kéféngintulus ne, atin tugio noy kaane so lowoh. <sup>27</sup> Dob karang i Tuluse, i toowe méngintulus do étew, tabangé roy de kérégénan libun do baléw, brab tabangé roy de kérégénan nga énda i do lukés ro. Atin i de étew do tintu fo méngintulus énda odoro roy de éntingayén do tete dob duniyae ni, inok énda waléy ro tete.

## 2

<sup>1</sup> Do dumo gu munur, séménarig gomén bé Jesu Kristowe barakatan Kadna tom. Mélaw énda fatutén ké wén i isu ramigo kom. <sup>2</sup> Ufama, amuk sélimud gom méngadaf bé Tuluse atin wén i ruwo gétew étew gégumah. I ségétewe de fiyoy kégal ne brab téménising bélwon. Atin i ségétewe de méskinan brab ménkusi i kégal ne. <sup>3</sup> Atin amuk toow fo fégadata kom saén i kawasawe de brab féésaré kom dob toowe fo fiyo ésaran, brab énda féésaré kom i miskinane de taloo no féésaré kom saén dob suduve, énda fo fiyoy adat gome. <sup>4</sup> Amuk rénigo gom i ni, ménsla gom bé kérámig gome, atin tidew dob de tete kéfégitung gom i de ni kékukum gom.

<sup>5</sup> Fégélingo gom do gulaané ku do dumo gu. Fénémili i Tulusey étewe méskinan inok waléy ro maak kawasa sabaf bé kékunur ruwe. Non i kékunur ruwe, been i kékawasa ruwe. Atin waléy ro so do kaan étew féguléwo no. Féguléwo no bero non been i niy fasad i Tuluse dob kéluhanay méimue bé Tuluse. <sup>6</sup> Endob i begome, siyawé kom i de méskinan. Ati de étew do énda mégédaw ro begom brab fégésé ro begom uwitén mangéy sékukum dob de kékédewan? Békén i de méskinan, yamula i de kawasa. <sup>7</sup> Been soy de niy de étew bérhéhe roy tete fantag bé fiyowe dawét Jesuse sani gefee betom.

<sup>8</sup> Wén i toowe fo gérotor sugu gébasana tom dob Ménsulate Kékérél i Tuluse mano, “Féimu go bé dumo muwe loo so bé kékéimu me bé kaame lowoh.” Amuk unuro kom, gérígono kom i fatute. <sup>9</sup> Endob amuk wén i isu ramigo kom atin basana kom saén i de étew bé de fiyo kégal ro, taloo no bé kédooj de kurta ro, ménsla gom. Non fénlis gom i kukumane niray Moisese. <sup>10</sup> Atin amuk énda odoro kom i sébaane sugu dob kukumane, maak énda so nodoro kom i kéluhanay de kukuman. <sup>11</sup> Ufama, békén saén bénréh i Tuluse mano, “Kagom sétayan bé ségiyowe saliyu bé bawag gome.” Bénréhén so mano, “Kagom méméléhu.” Mélaw fiyon fo ké énda dufangé kom i bawag gome, éndob ménméléhu gom étew, énda so nunuro kom i kukumay Tuluse. <sup>12</sup> Ingata kom i de rigoné kom brab de bérhéhe kom, non i Tuluse kukumé no begom bé kukuma nuwe fégéfukas bé de étew dob de sala ro. <sup>13</sup> Non énda méuray i nay Tuluse bé de étew énda méuray i na ruwe bé de dumo ro. Endob i de étew méuray i na ruwe bé de dumo ro, éndaén kailanga roy mágilake bé kékukum i Tuluse.

### *I kékunure brab fiyowe galbék*

<sup>14</sup> Do dumo gu munur bé Jesuse énda i lantékén ké émbérél i ségétewe étew mano, “Munuru,” éndob énda giton i kékunur ne dob de rigoné no. Enda toow i kékunur ne, mélaw énda séna mécédan i de salaén. <sup>15</sup> Ufama, amuk wén i ségétew munur, brab énggumah i de dumo no munur dob beene. Atin toow ro fo méskinan, kulang i de kégal ro brab énda i amaé ro. <sup>16</sup> Amuk bérhéhe no saén dob berowe mano, “Fiyo damén i de

fédew gom. Brab gégédot gom damén do kégal gom brab amaé kom,” éndob énda fo niraya no bero tabang, énda i lanték i de kébéréné. <sup>17</sup> Ségiléw bé nan i étewe béréréh no munur kun bé Jesuse, éndob énda fiyoy rigoné nuwe. Mélaw giton i énda toow i kéunur ne.

<sup>18</sup> Amuk wén i émbéréh mano, “Fakay méfukas i étewe sabaf bé kéunur ne. Atin fakay so méfukas i étewe sabaf bé de fiyo rigoné no.” Endob ay niy késumbulo kuwe de. Enda fakay méfukas i étewe ké munur saén bé Jesuse atin énda fo fiyoy rigoné nuwe. Non i begéne, fégito guy kéunur guwe dob fiyowe rigoné ku. <sup>19</sup> Amuk wén i étew munur bé sébaan saén i Tuluse, fiyo, éndob kulang i nan kéunur. Non fiyon i de saitan, munur ro so loo bé nan, atin lémukub ro bé kégilak ruwe de. <sup>20</sup> Toow fo dufang i étewe loo bé nan, mégitung kailangan saén i munure. Toroé ku begom bé énda foy lanték i kéunur i étewe ké énda so giton i de fiyo rigoné no. <sup>21</sup> I katufua tome Abraham, ati funa nuwe ménwaléy métintu dob adafay Tuluse? Ménwaléy métintu dob adafay Tuluse sabaf bé rénigo nuwe, amun ménodor bé sugu i Tuluse tulaké no damén i nga ne Isak dob ahayane féngadafan. <sup>22</sup> Mélaw gésobuto tom énggéodor bé sugu i Tuluse sabaf bé kéunur ne. Mélaw fénggito no toow i kéunur ne bé rénigo nuwe. <sup>23</sup> Mélaw gétiga tom toow i Ménsulate Kébéréh i Tuluse mano, “I Abrahame ménunur bé Tuluse. Atin i Tuluse kénarangén i Abrahame métintu sabaf bé kéunur ne.” Mélaw i Abrahame féndawétén “Dumoy Tuluse”. <sup>24</sup> Mélaw gétiga tom, i étewe waléy métintu dob adafay Tuluse sabaf so bé de rigoné no, békén saén sabaf bé kéunur ne.

<sup>25</sup> Ségiléw so bé niy libune sundal féndawét Rahab. Non ménwaléy métintu dob adafay Tuluse sabaf bé fiyowe rénigo no. Non tényakufén i de Judio do sénugu, tidéw béo té nabanga no bero inok géferaréy ro mangéy bé ségiyowe aguwon.

<sup>26</sup> I lowohe, amuk éndaén bati diyo i rémogor ne, ménléhu i nan lowoh. Ségiléw so bé ni, i kéunur i étewe énda gitono dob de fiyo rigoné no, maak ménléhu i kéunur ne non békén toow.

### 3

#### *I dilae*

<sup>1</sup> Do dumo gu, fiyo ké énda médo gom waléy témore. Non i begeye do témore, toow na fo méégét i kéfénginsaay Tuluse begey dob gaiwe kémukum moso. <sup>2</sup> I kéluhana tome do kéilawan, énda démoyun katabuwan i de rigoné tom. Amuk wén i étew gébéréh katabuwan sénga tékélid, énda i gétébo de. Fakay géféguléwo noy lowoh ne non falan fiyoy de kébéréhén. <sup>3</sup> Ufama, i gefee bé kudae, amuk rigono no kakang i ba i kuda ne, gébalengo no fiyon udenén féayo no de. <sup>4</sup> Loo so bé niy dakéle barko féagéwéy émbagére réfuruh. I suwil i barkowe toow fo kloh, éndob been i niy usaréy kafitane bé barkowe fégéfanangguwitén de dob kétaya nuwe ayo no. <sup>5</sup> Atin ségiléw so bé niy dilae. Non fiyon fo ké toow fo kloh, géusaran fégéfabantug-bantug.

Ufama, i bukae talun métuwéy bé klohe saén aféy ké mélégéb. <sup>6</sup> Atin i dilae, mésut i médoowe gékélasi do tete, funay de itunga tom brab de fédew tom waléy so tete. I dila i étewe gétuwégo noy fédew ne, non i aféy i dilae tidéw dob uleone emferno. <sup>7</sup> I kéilawane, géféguléwo noy kéluhanay de binatang, do kloh manok, do sédo, brab do ulé. Non gélayamay kéilawaney de ni. <sup>8</sup> Endob énda i étew gélayama noy dila ne. I de dila tom toow fo gérigono roy tete brab énda méféguléwo no. Ségiléw bé bisawe non mélébinasa. <sup>9</sup> Usaré tom fégéfésalamat dob Kadna tome brab dob Abaye Tulus. Endob usaré tom so fégéfémula bé de dumo tom étew, sani de lénimbag miring bé Tuluse. <sup>10</sup> I fiyowe kékésalamat brab i tete kékémula, ségiléw ro tidéw dob ba i étewe. Do dumo gu, énda fatut mérigoy ni. <sup>11</sup> Enda i fiyo wayég brab féla wayég ké sébaan saén i séfute ésuto ro. <sup>12</sup> Atin do dumo gu, i sébaane kayéw énda géfégégonokén saliyu saén bé kaane onok. Enda géfégégonokén ruwo gékélasi onok, i sébaane de fiyo brab i sébaane de tete. Atin i séfute miray bé métimuse wayég énda géirayén bé fiyowe wayég énda métimusén.

<sup>13</sup> Amuk wén i ségétew begom toow fo gétigan brab dakél i kégésobut ne fatut fégito no dob de fiyo rigoné no ula-ula. Atin fatut térifantad bé lala ne rémigo fiyo inok féténgén i kégétiga nuwe. <sup>14</sup> Endob amuk médaléw, taloo no méitung énda fatutén félangka-langka taloo no bérhéhé noy tugie fantag bé toowe kétoro. <sup>15</sup> I kégétigane loo bé nan békén tidew dob lawayo. Yamula tidew saén dob duniiae ni. Békén tidew dob Rémogor i Tuluse, yamula tidew dob Satanase. <sup>16</sup> Non i étewe médaléw brab méitung rigoné no soy médoowe gékelasi do tete brab fébukué noy de étew. <sup>17</sup> Endob i étewe wén i kégétiga no tidew dob Tuluse, toow fo fiyoy adat ne. Atin mika sétiboh. Brab mégédaw bé de dumo no, énda kérizo no bero. Tintu fo méuray i na nuwe bé de dumo no brab rigoné noy fiyowe dob berowe. Atin énda i isu ramigo no bé de étew brab énda ubo-ubo saén i de rigoné no. <sup>18</sup> I étewe kédané noy késétibohe, uwité noy de fiyo rigonén.

## 4

<sup>1</sup> Ati tidéwoy de késétiboh gom brab de késéédél gom? Tidew dob de tete kétaya kom démoyun sétiboh bé de fiyo kétaya kom dob de fédew gom. <sup>2</sup> Wén i do kétaya kom, éndob énda gédoté kom de. Mélaw méuyot gom méméléhu. Wén i do kéingara kom, éndob énda gédoté kom de. Mélaw méuyot gom séédél brab sétiboh. Atin i funa kome énda gégedoté bé de kétaya kom, non énda ongoté kom de dob Tuluse. <sup>3</sup> Atin amuk mongot gom, énda gédoté kom de, non tete i funa kom de mongot. Non ménongot gom inok gédoté kom i de éntingayén fégérigo gom bé de tete kétaya kom. <sup>4</sup> Ségiléw gom bé ségétewe libun wén i ségiyo tayané no saliyu bé bawag ne. Aw énda fo gésobuto kom de ké amuk séloyuk gom bé de tete éntingayén dob duniiae ni, sébanil gom bé Tuluse? Non i étewe méuyot rémigo tete, waléy sébanil bé Tuluse. <sup>5</sup> Kagom fégitungén de ké énda i lanték i Ménsulate Kébéréh i Tuluse mano, “I Rémogor i Tuluse bati dob betome toow fo médaléw.” Mélaw mika de fo ké wén i ségiyo kétaya tom saliyu bé Tuluse. <sup>6</sup> Endob toow fo mégédaw i Tuluse betom. Non wén soy Ménsulate Kébéréhén mano, “I Tuluse sébanil bé de étew félangka-langka, éndob mégédaw bé de étew térifantad.”

<sup>7</sup> Mélaw odor gom bé kétayay Tuluse. Atin atuho kom i Satanase, atin mélaw méraréy tidew dob begome. <sup>8</sup> Fégédét gom dob Tuluse, atin i Tuluse fégédét so dob begome. I de begom do ménsala do étew, tagak gom i de tete adat gom. I de begom do ubo-ubo saén do munur, félinis gom i de fédew gom inok waléy gom tintu fo munur. <sup>9</sup> Fatut tete i de fédew gom brab kérrew gom non bé de tete adat gom. Térén gom oror, fatut gom émbuku. <sup>10</sup> Fatut térifantad gom dob adafay Tuluse, atin fégérotoré no begom.

<sup>11</sup> Do dumo gu munur bé Jesuse, kagom sédowoy. I étewe dowoyé noy dumo nuwe brab kukumé noy dumo nuwe, maak dowoyé no brab kukumé no soy kitabe. Atin amuk kukumé noy kitabe, maak téfégérotor bé Tuluse, atin mélaw éndaén modorén bé kitabe. <sup>12</sup> Endob Tulus saén i miraye bé kitabe brab Been saén i kémukume. Been saén i gébinasawe bé étewe brab Been soy gétabange de inok énda mébinasa no. Endob i betome, énda i kuwagib tom kémukum bé de dumo tom, non kéilawan tom saén.

<sup>13</sup> Fégélingo gom begén, sani de begom do émbéréh makom, “Béleewe ni taloo no démo mangéy gey dob sébaane ingéd. Atin diyo bati gey ségébélantuwa inok émfébéléy gey brab gégedot gey médooy kurta.” <sup>14</sup> Kagom émbéréh loo bé nan. Non énda gétiga kom i mérigowe dob begome bé démoe. Non i de kéilawan, ségiléw saén bé ménifise rawén giton brab magad méalfa. <sup>15</sup> Ay niy fatute bérhéhé kom, “Amuk kétayay Kadnane, taus tom méuyag brab rigoné tom i ni taloo no rigoné tom i nan.” <sup>16</sup> Endob béleewe ni, félangka-langka gom brab fébantug-bantug gom. Enda fiyoy nan.

<sup>17</sup> Amuk wén i étew gétiga noy fatute rigoné no, éndob énda rigoné no de, ménsala.

## 5

<sup>1</sup> I begome do kawasa étew, fégélingo gom begén. Fatut kérew gom brab ruung gom sabaf bé de kérasay gom gégumah moso. <sup>2</sup> Non i de balilaga do tamuk gom waléy do mérénah. Brab i de médo do kégal gom amaéy de ifés. <sup>3</sup> Atin i de bélowan brab do filak do nitong gom, waléy do tangisén. Brab i kétangisé ruwe fégito roy énda nusar gom i de kurta gom fégétabang bé de méskinan. Mélaw toow fo gétimal i kékukume begom. Non nitong gom i de médo kurta gom taman dob tamfaday de gai. <sup>4</sup> Enda bénayada kom i de géménalbék dob fantad gome. Atin i de kurta énda féngébayad gom de, been i de niy usaréne fégétébo begom dob adafay Tuluse. Atin i de kétébo i de étew géménalbék dob fantad gome, énggéléingooy toowe fo barakatan Kadnan Tulus. <sup>5</sup> Toow gom fo kawasa brab fiyoy goho kome dob duniyae ni. Endob ségiléw gom bé de ayam do fénbobo inok sumbalién. Atin i begome fénbobo gom i lowoh gome. <sup>6</sup> Non kénukum gom brab fénléhu gom i de métintu do étew énda natuho ro begom.

<sup>7</sup> Endob i begome do dumogu, tingkél gom taman dob gaiwe séfule i Kadnane. Iring gom bé mohoke toow fo témingkél ongot-ongot bé gaiwe rémania inok témunoh i nohok ne atin gékétewo no. <sup>8</sup> Ségiléw so bé begome non fatut tingkél gom. Fatut féégét gom i késarig gome non gédétén i gaiwe séfule i Kadnane.

<sup>9</sup> Do dumogu, kagom séséndit, inok énda kukuméy Tuluse begom. Enda mérayu i kémukume, éndaén mérugay i kégumah ne. <sup>10</sup> Do dumogu, iring gom i de sénarigoy Kadnane muret bé kóbéréh ne bé do gétah, non toow ro fo témingkél démayday munur fiyon fo ké fénrasay ro. <sup>11</sup> Kénarang tom bero do toow fo moror non énggétéingkél ro dob de gai do mérégén. Atin gétiga kom i fantage bé ségétewé étew féndawét Job bé do gétah. Toow fo téméningkél démayday munur fiyon fo ké toow fo ménrasay. Atin gétiga kom soy toowe fo kéfifiyoy Kadnane de amun énggilid ménrasay. Non i Kadnane toow de fo mégédaw brab méuray i na nuwe de.

<sup>12</sup> Atin do dumogu, ay niy toowe fo balilaga sugu gu begom. Amuk rémigo gom fasad, kagom sémafa. Kagom bérhéhén de makom, “Gitoy lawayo” taloo no “Gitoy fantade”, taloo no udenén bérhéh kom fégésafa gom. Sugatén i kóbéréh gome, “Hoo” taloo no “Enda”, inok énda kukuméy Tuluse begom sabaf bé ni kóbéréh gom.

<sup>13</sup> Amuk wén i ségétewé émbuku begom, fatut démasal. Amuk wén i ségétew moror begom, fatut kémanta dayewé noy Tuluse. <sup>14</sup> Amuk wén i ségétew démeruun begom, fatut fétawagén i de odoroy de munur dob gono kome, inok dasala ro brab lulawa ro nor bé lala ruwe mongot dob Kadnane. <sup>15</sup> Non amuk tintu ro fo munur, i Kadnane féadiadiné noy démeruune ni sabaf bé kédasal ruwe. Atin fésagaday Kadnaney de salaén.

<sup>16</sup> Mélaw, fatut séfayag gom i de sala gom, brab sédasal gom dob Tuluse, inok adi-adi gom. Non toow fo barakatan i kédasal i métintuwe étew. <sup>17</sup> I Eliase bé do gétah, kéilawan so ségiléw bé betome. Atin amun ménbagér i kédasal ne mongot ké énda férana i Tuluse de, énda i rana bé méntéléwe gébélantuwa brab ném gétérésang kélungonon. <sup>18</sup> Tidéw béno, amun déménasal man mongot rana, fénrana i Tuluse brab i de nohok téménunoh ro dob fantade.

<sup>19</sup> Do dumogu, amuk wén i ségétew begom tétagakén i toowe kétoro, atin wén i ménféséfule de, <sup>20</sup> ay niy fatute fégétédémé kom: I étewe énggébalengo noy fédew i étewe ménsala inok tagaké noy tetee aguwo no, toow fo té nabanga no inok énda mékukumén méléhu. Yamula fésagaday Tulusey de médo do salaén.

Santiago

## I Sunguwe Sulat Pedrowe

Ay niy sunguwe bé de sénulat Pedro, sani ségétéwe bé de kuyug Jesus brab dumo no amun dini séna dob duniiae niy Jesuse. Sénulat Pedrowey ni sulat dob kéluhanay de munur bé Jesuse.

Amun sénulat Pedrowey ni, ménrasay i de munur sabaf bé kéunur ruwe. Mélaw sénulat Pedrowey ni émfébagér bé de fédew ro. Ténoroén bero bé barasay Tuluse bero dob lawayo amuk énda témérén ro munur. Mélaw ulanden ké mérasay ro dob duniiae ni.

<sup>1</sup> Begéney Pedrowe, sani séménulate bé ni. Begéney ségétéwe apostol Jesu Kristowe. Sémulatu mangéy dob de begom do fénemili i Tuluse, sani de begom do ménbéragar dob de ingéd Ponto, Galasia, Kapadosia, Asia, brab Bitinia. Maak do iloh-iloh gom dob duniiae ni non i tintuwe ingéd gom diyo dob lawayo. <sup>2</sup> Fénemili i Abaye Tulus begom sabaf bé kaane kétayan. Atin i Rémogor i Tuluse fénwaléyén begom do métintu inok modor gom bé de kétoro Jesu Kristo brab méfésagad gom sabaf bé kéléhu ne. Non maak ménfirikon gom bé dara ne funa kom mélinis.

Mégédaw i Tuluse damén begom brab irayén damén begom i métanéke fédew.

<sup>3</sup> Fatut fésalamat tom bé Tuluse sani Tuluse brab Abay i Kadna tome Jesu Kristo. Non sabaf bé kégédaw ne betom, nirayén betom i mantuwe umul bé kétébule ne bé Jesu Kristowe. Mélaw wén soy inam tom tébule inok méuyag tom taman sa taman. <sup>4</sup> Atin ongot-ongoté tom mélaw i kégégédot tome bé de kéfiyonon nitong i Tuluse betom dob lawayo énda mékédano taman sa taman, taloo no mébinasa taloo no mérénah taloo no mérénég. <sup>5</sup> Non bé kéunur tome, diyaganéy barakatane Tulus betom inok géfégilido noy kfukas ne betom moso dob géfuraye gai.

<sup>6</sup> Mélaw fatut moror gom de, non fiyon fo ké tete i de fédew gom singkow saén sabaf bé de kérasay gom, <sup>7</sup> kailanga kom soy mérasaye béléewe ni inok métukawan i kékagér i kéunur gome dob de ni do gai. Ufama, i kéunur gome ségiléw bé bélwone. Non i bélwone métukawan dob aféye inok giton ké tintu fo bélwon taloo no békén. Ségiléw so bé niy kéunur gome. Non i kéunur gome métukawan bé de mérégén géagéwon inok giton ké tintu gom fo munur taloo no énda. Atin toow na fo balilaga i kéunur gome bé de bélwon non do mébinasa ro. Atin amuk tintu gom fo munur, médayéw gom de, brab mébantug gom de, brab mébasanan gom de moso bé gaiwe séfule i Jesu Kristowe. <sup>8</sup> Fiyon fo ké énda énggitó gom i Jesuse, féimu gom de. Atin fiyon fo ké énda gito gom de béléewe ni, unur gom de. Atin sabaf bé ni, moror gom fo toow atin énda i fiyo kékérélh de émfégétigan bé kédakél i kéror gome de. <sup>9</sup> I funa kome toow de fo moror loo bé ni non kédanéy Tulusey de sala gom inok gédoté kom i umule magufusa sani ongot-ongoté kome sabaf bé kéunur gome.

<sup>10</sup> I de sénarigoy Tuluse muret bé kékérélh ne bé do gétah, féngganad ro fo toow i kfukas i Tuluse bé étewe. Atin nuret ro mélaw i fantage bé ni iray i Tuluse begom.

<sup>11</sup> Toow fo féngganad ro ké ati kédiron i gaiwe mérigoi ni kfukas i Tuluse brab ati kétuma nuwe de. Non fénemanduo Rémogor Kristowe bero brab fénggétiga no bero bé ferasayén i Kristowe, atin tidew béo médayéw i Kristowe fo toow. <sup>12</sup> Atin i kéuret i de ni do sénarigoy Tuluse muret bé kékérélh ne, fénggésobutén bero bé i funa ruwe muret inok métabangan gom, békén bero. Non i kéuret ruwe fantag bé Kristowe, been i ni énggelingoo komén béléewe ni tidew dob de téromo bé Fiyowe Uret. Atin i Rémogor i Tuluse, sani sénugue tidew dob lawayo, fénemanduo noy de ni téromo. Atin fiyon foy de téaki, méuyot ro de ké gésobuto roy ni kéuret ro.

<sup>13</sup> Mélaw fatut fébagéré tom i kékégitung tome atin féfiyoné tom i kékégitung tome. Atin fatut ongot-ongoté tom i de kéfiyonon gédoté tom dob gaiwe séfule i Jesu Kristowe.

<sup>14</sup> Atin non betom i de nga i Tuluse, fatut odoro tom i de suguéen. Atin fatut so digué

tom i de tete adat tom loo bé de rénigo tom bé do gétah amun énda séna gétiga tom i toowe kétoro. <sup>15</sup> Bé kéluhanay de rigoné tom fatut métintu tom, miring bé kétintuy Tuluse sani ménémilie betom. <sup>16</sup> Non wén i Ménsulate Kébérél i Tuluse mano, “Fatut toow fo métintu gom non toowu fo métintu.”

<sup>17</sup> Atin amuk démasal tom dob Tuluse, tawagé tom “Abay tom”, mélaw fatut basana tom fo toow i Tuluse bé lala tome méuyag dob duniyae ni. Non Beeney kémukume bé kéluhanay étewe sabaf bé de rigoné ro, non énda i isu ramigoy Tuluse. <sup>18</sup> Gétiga kom ké atiy fénggébayade niray i Tuluse inok kédané noy de tete adat gom énggédot gom tidew dob de katufua kom. Non i fénggékufas ne betom énda loo no bé de bélowan taloo no do filak do fakay mébinasa. <sup>19</sup> Yamula Kristoy fénggékufas ne betom. Beeney maake toow fo fiyo nati bili-bili fénléhu ténlak inok mékédan i de sala tom. Toow fo balilaga i ni kétulak. <sup>20</sup> Amun énda séna lénimbag i Tulusey duniyae ni, fénémilién i Kristowe inok mérigo ni. Atin dob de ni énggékfuray do gai ménangéy i Kristowe dini inok fukasé no betom dob de sala tom. <sup>21</sup> Atin sabaf bé Kristowe, ménwaléy tom do munur bé Tuluse, sani téménébulee bé Kristowe brab ménfedayéwe de so. Atin mélaw Tulusey sarigo tome brab wén i inam tom bé kétébule i Tuluse betom moso.

<sup>22</sup> Atin sabaf bé kénur tome bé toowe kétoro, ménwaléy tom malinis dob adafay Tuluse atin ménwaléy tom tintu mégédaw bé de dumo tom munur bé Kristowe. Gido loo, fatut fo féégété tom i késégédaw tome. <sup>23</sup> Non ménumah tom man ségule inok waléy tom do nga i Tuluse sabaf bé kébérél ne. I ni kébérél i Tuluse énda mékédan no taman sa taman brab miray umul magufusa. <sup>24</sup> Non wén i Ménsulate Kébérél i Tuluse mano, “I kéluhanay de kéilawan ségiléw ro bé de kéeroon, non méuyag ro singkow saén. I kéfiyoy de kéilawan magad mékédan ségiléw bé de ulak i de kéeroon magad mélaway brab mélawu. <sup>25</sup> Endob i kébérél i Kadnane, énda mékédan no taman sa taman.” Atin i kébérél i Kadnane, been i niy Fiyowe Uret nuretéen dob begome.

## 2

<sup>1</sup> Mélaw non ménumah tom man ségule, fatut tagaké tom i kéluhanay de tete rigoné tom. Katom témugi taloo no ubo-ubo saén i kéfengintulus tome, taloo no médaléw, taloo no féngirasé tom i de étew. <sup>2</sup> Fatut iringé tom i de kloh nga do témutu séna, non betom i de étew do ménumah man ségule. Fatut méuyot tom mégélingo bé fiyowe kébérél i Tuluse ségiléw bé klohe nga térumén témutu. Amuk rigoné tom i ni, i kénur tome waléy dakél ségiléw bé kéreruk i klohe nga taman waléy tom do gétawan bé kénur tome. <sup>3</sup> Non énggédot tom i kégédaw i Tuluse betom.

<sup>4</sup> Odor gom bé Kadnane Jesus sani méuyage taman sa taman. I Jesuse ségiléw bé batéwe nikaay de rémigo lawi. Endob fiyon fo ké ménika i de étew de, fénémili i Tuluse fénggérigo no bé lawi ne non kénarang i Tuluse toow fo balilaga. <sup>5</sup> Atin i betome, méuyag tom so taman sa taman. Fatut modor tom bé Kristowe inok waléy tom so maak do batéw usaréy Tuluse fégérigo no bé maake lawién féngadafay de étew de. Atin dob lawi ne ni, maak rigoné tom i galbék i fadi i Tuluse miray do tulak tayakuféy Tuluse. Atin i tulake iray tom, been i niy kéfengintulus tome. Atin i Jesu Kristowe, tabanga no betom méngeintulus loo bé ni. <sup>6</sup> Non wén i Ménsulate Kébérél i Tuluse mano, “Ménémiliu ségétew waléy méguléw ségiléw bé toowe fo balilaga batéw. Non maak rémigowu lawi dob ingéde Sion, atin Beeney maake toow fo fiyo balilaga batéw fégérigo gu bé ni lawi. Atin i kéluhanay de munur dob Beene, énda gésénule ro bé késarig ruwe de.” <sup>7</sup> I ni méguléw, sani ni maak batéw, toow fo gulaané tom do munur de. Endob wén soy de étew énda munur ro de. Atin énggétumana roy ni Ménsulat Kébérél i Tuluse mano, “I batéwe nikaay de rémigo lawi, ménwaléy na fo toow balilaga.” <sup>8</sup> Atin wén soy ni Ménsulat Kébérél i Tuluse mano, “Been i niy batéwe émfébangkud bé de étew inok mélawu ro.” Atin i atag i ni, énggébangkud ro non énda ménunur ro bé kébérél i Tuluse, non been i niy bénantak i Tuluse mérigo.

<sup>9</sup> Endob i de betom, betom i de étew fénémili i Tuluse. Betomey de fadi i Datue Kristo. Betomey de étew i Tuluse. Been i méguléwe betom. Betomey de étew fénémili i Tuluse

inok muret tom fantag bé de fiyo rigonéy Tuluse. Sénéngkat i Tuluse betom tidéw dob délémone mangéy dob kaane géfékaya toow fo fiyo. <sup>10</sup> Non bé do gétah, békén tom do étew i Tuluse, éndob béleewe ni ménwaléy tom do étewén. Bé do gétah, énda gétiga tom i fantage bé kégédaw i Tuluse, éndob béleewe ni énggédot tom fo toow i gédaw ne.

<sup>11</sup> Do gulaané ku do dumo gu, i duniiae ni békén tintu ingéd tom. Maak do iloh-iloh tom saén dini. Mélaw ongoté ku dob begome, kagom modor bé de tete kétayay de lowoh gom. I de ni do tete kétayay de lowoh tom maak sétipoh bé de rémogor tom méuyot modor dob Tuluse. <sup>12</sup> Fatut toow fo métintuy de adat gom inok fiyon i de békén méngrintulus do étew gito ro. Atin amuk téboé ro begom, i toowe, gétiga ro toow fo métintuy de adat gom. Atin mélaw gédawéwo roy Tuluse dob gai kégumah ne dini.

<sup>13</sup> Fatut odoro tom i de sugu i de gémamak kukuman fiyon i toowe fo gérotor méguléw. Fatut rigoné tom i ni non been i niy kétayay Kadnane. <sup>14</sup> Fatut so odoro tom i de sugu i de gobernador. Non i toowe fo gérotor méguléw i sémugue bero inok kukumé roy de rémigo tete atin inok dayewé roy de rémigo fiyo. <sup>15</sup> Non méuyot i Tuluse de ké féantésén i de dufang do étew témo betom, sani de émbéréh énda i lantékén. Non amuk gito roy de métintu rigoné tom, témérén ro démowoy betom. <sup>16</sup> Ménfukas tom dob kéodore bé kitabe tidéw dob Moisese. Mélaw fakay gérígono tom i kétaya tome. Gido loo, katom usarén i kéfukas tome fégésélyah tom rémigo tete. Yamula fatut odoro tom i kétayay Tuluse non betom i de sugu-sugué no. <sup>17</sup> Atin fatut fégadato tom i kéluhanay étewe. Atin fatut mégédaw tom bé kéluhanay de dumo tom munur bé Jesuse. Fatut fénigadafé tom i Tuluse. Atin fatut fégadato tom soy toowe fo méguléw.

<sup>18</sup> I begome do sugu-suguén, fatut odoro kom i de sugu i de amu gom, atin fatut fo fégadato kom bero toow. Atin békén saén dob de fiyo amu gom mégédaw begom. Yamula fégadato kom i kéluhanay de amu gom, fiyon fo ké dusa ro. <sup>19</sup> Non féfiyonéy Tulusey kéluhanay de étew témingkél bé kédusawe bero fiyon fo ké énda i rénigo ro tete, amuk témingkél ro sabaf bé késarig ruwe bé Tuluse. <sup>20</sup> Endob amuk rémigo gom tete, fiyon fo ké tingkélo kom i de amu gom ké dusané ro begom sabaf bé kérigo gome tete, énda so médait gom gégédot bé barase. Endob amuk fédayaé kom bero ké dusané ro begom fiyon fo ké énda i rénigo gom tete, féfiyonéy Tuluse begom. <sup>21</sup> I Kristowe féndayaén soy kédusay de étew de inok kédané noy de sala tom. Atin fatut iringé tom. Non i funay Tuluse ménfénur betom inok iringé tom i Kristowe. <sup>22</sup> Non énda i sala rénigo Kristowe, atin énda soy sébaan tugi bénréhén. <sup>23</sup> Atin amun fénengiras i de étew i Kristowe, énda séménulién méngriras. Amun fénrasay ro, énda fénémulaén bero. Yamula sénarigén saén dob Tuluse, sani métintuwe kémukum. <sup>24</sup> Ménkukum i Kristowe dob kruse noboén i de sala tom, inok tagaké tom i de tete rigoné tom atin inok gérigo tom métintu. Mélaw ménwaléy tom métintu sabaf bé kékukume bé Kristowe. <sup>25</sup> Bé do gétah, ségiléw tom bé de méntradin do bili-bili. Atin i Kadnane Jesus, ségiléw bé témalimae bé de bili-bili. Maak sénlédén betom atin amun énggito no betom, nuwitén betom mule mangéy dob Beene, sani magifate betom.

### 3

<sup>1</sup> Atin i de begom so do libun do bawagan, fatut odoro kom i de sugu i de bawag gom inok amuk wén sénay do énda munur bero bé kékéréh i Tuluse, waléy ro géunur sabaf bé fiyowe adat gom. Enda kailanga kom ureton bero, <sup>2</sup> non gito roy fiyowe adat gom brab kékengintulus gome funa ro waléy munur. <sup>3</sup> Atin kagom saén féfiyonén i de falas gom loo bé de kékéfiyo gom bé de buk gom, taloo no de ono gom, taloo no de kégal gom. <sup>4</sup> Yamula fatut féfiyo gom i de kékéréh gom brab de rigoné kom inok métanék i de adat gom. Been i niy funay Tuluse mésuwat begom. Atin énda mérénég i métintuwe adat loo bé kérénég i fiyowe falas. <sup>5</sup> I de énggétah do fiyo libun séménarig ro dob Tuluse, fénifiyo roy de lowoh ro bé kéodor ruwe bé de sugu i de bawag ro. <sup>6</sup> Loo bé Sarahe, nodoro noy de sugu i bawag ne Abraham brab féndawétén “Amu”. Atin i de begom do libun béleewe

ni, maak begom i de nga Sarah amuk iringé kom i de fiyo rénigo no brab énda mégilakén bé de udenén éntingayén.

<sup>7</sup> Loo so bé begome do lagéy do bawagan, fatut talima gom i de bawag gom bé lala gome sétifon bero dob duniyae ni. Non gétiga kom i de karo lowoh toow na fo mélubay bé de katom de. Gido loo, ségiléw so bé betome, non nirayay Tuluse so bero bé umule magufusa. Mélaw fatut basana kom bero inok fégélingoéy Tulusey de kédasal gom.

<sup>8</sup> Mélaw ay niy géfuraye bérhéhé ku begom. Fatut féwaléy gom sébaan i de itunga kom brab fésétima kom i de fédew gom. Fatut ségédaw gom non maak do sétuwaréy gom. Atin fatut séuray gom na brab térifantad gom. <sup>9</sup> Atin amuk wén i réménigo tete dob begome, kagom sémuli rémigo tete dob berowe. Amuk wén i ménémula begom, kagom sémuli mémula. Yamula ongot gom dob Tuluse féfyoné no bero. Non amun fénunurén begom, fénasad i Tuluse féfyoné no begom. <sup>10</sup> Non wén i Ménsulate Kébéréh i Tuluse mano, “I de étew méuyot ro ké fiyoy de goho ro brab méuyot ro moror, fatut bérhéhé ro saén i fiyowe atin témérén ro témugi. <sup>11</sup> Fatut tagaké roy de tete do adat ro atin méganay ro rémigo bé fiyowe. Atin fatut rigoné roy kéluhanay gagané ruwe inok énda mékérit i de étew de. <sup>12</sup> Non bantayay Kadnaney de métintu do étew atin fégélingoé noy de kédasal ro. Endob diguré noy de rémigo tete.”

<sup>13</sup> Amuk mégérör gom rémigo bé fiyowe, énda i gésug-sug begom. <sup>14</sup> Gido loo, amuk mérasay gom sabaf bé kétintuy de adat gom, fatut moror gom de. Kagom mégilak bé de kéilawan saén. Atin kagom émbuku. <sup>15</sup> Yamula, féngadaf gom i Kristowe dob de fédew gom, atin unur gom Beeney Kadnane. Atin fatut démoyun gom témafay sénga tékélid inok amuk wén i ménginsaan begom fantag bé késarig gome bé Tuluse, gétiga kom i késumbulo kome bero. <sup>16</sup> Endob amuk sémumbul gom, fatut félanat gom i kékéréh gome atin basana kom i de étew mégélingo. Atin sabaf bé begom i de kuyug Kristo, fatut fétintu gom i de adat gom inok énda waléy tete i de fédew gom. Fatut rigo gom i ni inok amuk wén i émbéréh tete fantag bé begome, mémala ro mélaw. <sup>17</sup> Amuk kétayay Tuluse ké mérasay gom sabaf bé de fiyo rigoné kom, fakay so. Békén saén mérasay gom sabaf bé de tete rigoné kom. <sup>18</sup> Non i Kristowe ménléhu inok fukasé no betom. Ménléhu ségule saén inok mékédan i de sala tom. Métintuy Kristowe, éndob ménléhu génantino no betom do tete étew inok féwaléyé no betom do étew i Tuluse. Fénléhu roy lowoh Jesuse, éndob énda énggéléhu roy Rémogor ne. <sup>19</sup> Atin non méuyag sénay Rémogor ne, ménangéy dob de rémogor do ménférisu atin nureto no bero. <sup>20</sup> Been i de niy de rémogor i de énggétah do étew énda ménodor ro bé Tuluse bé gaiwe téningkélo no bero bé de tete rigoné ro bé lala Noehe rémigo bé dakéle barko. Tidew béo, waléw gétew saén i éndae ménléné non énggéahur ro dob barkowe. Mélaw té nabangay Tuluse bero inok énda ménléné ro dob wayégo no. <sup>21</sup> Atin i wayége ni, maak anlung i wayége fégébautis betom funa tom méfukas dob de sala tom. I atag i kékautise ni, békén kéurah bé lowohe inok mékédan i luwéde. Yamula been i niy kéongot tome bé Tuluse bé kédané noy de sala tom inok malinis i de fédew tom. Fakay i ni sabaf bé kétébule Jesu Kristowe. <sup>22</sup> Atin ménule i Jesuse mangéy dob lawayo inok diyo dob kuwonoy Tuluse, sani gonone toow fo basanan, atin méguléw bé kéluhanay de télaki brab kéluhanay de étew do barakatan diyo brab de wén atura ro.

## 4

<sup>1</sup> Gétiga tom, amun dini sénay Kristowe dob duniyae ni, ménrasay bé kékédawéta nuwe. Mélaw fatut tom témafay bé kékérasay i de étew so betom. Non i de étew do mérasay éndaén méuyot ro mésala. <sup>2</sup> Mélaw, tidew béní, taman méuyag gom séna dob duniyae ni, fatut odoro kom saén i kétayay Tuluse atin kagomén odoron i de tete kétayay de lowoh gom. <sup>3</sup> Non bé gétahe, ménrugayén i kétete i de adat gom ségiléw bé de tete rigonéy de békén méngintulus. Non toow fo mékérésik i de rénigo gom, brab tete i de kétayay de lowoh gom, brab ménolon gom, brab mékémala-malay de rénigo gom dob de mékéolon do karagiya kom, brab fénéngadaf gom i de kéninontow funay Tuluse

mérume. <sup>4</sup> Endob béeewe ni, ménggaif i de énda méngintulus non éndaén mamung gom bé de toow fo tete do mémérésik rigoné ro. Atin mélaw féngirasé ro begom. <sup>5</sup> Endob fétindégéy Tulusey séngae étew dob adafa nuwe inok ureté roy kéluhanay de rénigo ro. Non i Tuluse, Been i kémukume bé de méuyag étew brab de ménléhuén. Atin tafayén kémukum béní. <sup>6</sup> I de étew do ménléhuén, mén-uret soy Fiyowe Uret dob berowe, inok fiyon fo ké ménkukum ro bé kéléhu ruwe ségiléw bé kéluhanay de kéilawan, géunur ro so, atin méuyag mélaw i rémogor ruwe ségiléw bé kéuyag i Tuluse.

<sup>7</sup> Gédétén i tamfadaye duniyae. Mélaw fatut féfiyo gom i kéfégitung gome fo toow inok fiyoy kédasal gome. <sup>8</sup> Atin ay niy toowe fo mélaga féginau gu begom: Ségedaw gom fo toow. Non amuk ségédaw tom, magad saén i kéfésagada tome bé de énggésala dob betome. <sup>9</sup> Atin fatut moror gom sétayakuf dob de lawi gom. <sup>10</sup> Atin i kéluhana kome, fatut usar gom i de kéfurungan niray i Tuluse begom. Fatut usar gom fégétabang gom bé de dumo gom munur. Non i funay Tuluse de méniray dob begome inok gétabanga kom i de ségiyo. <sup>11</sup> Atin i de begom do muret, fatut uret gom i kékéréh i Tuluse. Atin i de begom do tétabang, fatut usar gom i bagére niray i Tuluse begom inok démoyun médayéw i Tuluse de fénagéw dob Jesu Kristowe sabaf bé de tabang rigoné kom. Been damén i médayéwe brab máguléwe taman sa taman. Amen!

<sup>12</sup> Do gulaané ku do dumo gu, kagom mégaif sabaf bé ni toow fo démawét téméngkad begom béeewe ni. Non been i niy kailangane mérigo dob betome kéluhanan do munur bé Jesuse. <sup>13</sup> Kagom mégaif de, yamula oror gom de non gétkidon gom bé kérasay Kristowe. Oror gom inok toow fo moror gom bé gaiwe séfule brab médayéw moso. <sup>14</sup> Oror gom amuk wén i méngiras begom sabaf do begom i de kuyug Kristo. Non amuk mérigoy ni, gétila kom fénémanduooy barakatane Rémogor begom, sani Rémogor i Tuluse. <sup>15</sup> Enda damén mérigo no ké wén i mérasay begom sabaf bé de tete rigoné no loo bé méméléhue étew, taloo no ménakaw, taloo no rémigo bé de ségiyo tete rigonén, taloo no furaya fédewén i rigonéy de dumo no. <sup>16</sup> Endob amuk mérasay gom sabaf bé kéunur gome bé Kristowe, kagom mémala de. Yamula fatut fésalamat gom dob Tuluse sabaf féndawét gom do munur bé Kristowe.

<sup>17</sup> Enggumahén i gaiwe méganayén kémukum i Tuluse. Atin kukumé noy de kaan do étew sani de betom. Atin amuk betom do étewén i sunguwe kukumé no, toow na fo gétilal i géfuraye kékukumén bé de étew énda munur ro bé Fiyowe Uret tidew dob Beene. <sup>18</sup> Non wén i Ménsulate Kékéréh i Tuluse mano, “Amuk mérégén i kéfukase bé de métintu do étew dob de sala ro, ati keey i mérigowé dob de tete étew énda méngintulus ro?” <sup>19</sup> Mélaw amuk mérasay gom sabaf been i niy kétayay Tuluse, sarig gom fo toow bé Tuluse, sani mésarigone léménimbag begom, atin rigo gom saén i fiyowe.

## 5

<sup>1</sup> I de begom do odoroy de munur, wén i ongoté kuwe dob begome, non i begéne ségétew so odoron. Enggitoy guy kérasay Kristowe, atin médayéwu so séréngan de dob gaiwe séfule moso. <sup>2</sup> Mélaw, ongoté ku dob begome, toow gom fo talima i de kuyug Jesus sénarig i Tuluse begom. Begom i de maak do témalima bé de bili-biliy Tuluse. Fatut méuyot gom témalima bero non méuyot gom modor bé kétayay Tuluse. Kagom rigonén de ké maak mífégés gom de saén. Yamula rigo gom i galbék gome tidew fo dob kéfiyoy fédew gome. Enda fiyo no ké been i sahud gomey funa kome rémigo bé ni galbék. <sup>3</sup> Kagom féguléwon i de ni do munur sénarigén dob begome. Yamula fanangguwit gom bero inok iringé roy adat gome. <sup>4</sup> Atin mélaw, amuk séfule i Kristowe, sani maake gérotor témalima bé de bili-biliy Tuluse, gédoté kom i toowe fo fiyo baras gom énda mémédano taman sa taman.

<sup>5</sup> Atin loo so bé ni, i begome do ménguwé séna, fatut odoro kom i de sugu i de lukés. Atin fatut térifantad gom kéluhanan, inok gésétabang gom. Non wén i Ménsulate Kékéréh i Tuluse mano, “Sébanil i Tuluse bé de félangka-langka do étew, éndob mágédaw bé de térifantad.” <sup>6</sup> Mélaw fatut térifantad gom dob adafay barakatane Tulus inok Beeney

émfégérotore begom dob gaiwe kétaya no. <sup>7</sup> Atin kagom émbuku, yamula sarig gom i kéluhanay de bukué kom dob Tuluse, non fagifaté no begom.

<sup>8</sup> Atin ingat gom brab féfiyo gom i de kéfégitung gom. Non i Satanase, sani sébanile betom, démoyun sémugud ségiléw bé mérayare binatang sélédé noy ati géafasa nuwe betom inok amaé no. <sup>9</sup> Fatut féégét gom i de kéunur gom inok géatuho kom i Satanase. Non gétiga kom i de dumo tom munur bé Kristowe do bati dob de séségiyo-giyo ingéd dob duniyae ni, fénrasayén so bero ségiléw bé begome. <sup>10</sup> Endob amuk mérasay gom singkow, féégétay Tulusey kéunur gome dob Beene. Atin fébagéré noy de fédéw gom brab tabanga no begom bé kéluhanay de kailanga kom. I kéluhanay tabange begom, tidéw dob Beene non mégédaw fo betom. Beeney émféunure betom bé Kristowe inok gédoté tom i umule magufusa. Bé no gai, séréngan tom moso médayéw bé Jesuse. <sup>11</sup> Médayéw i Kadnane taman sa taman. Amen!

<sup>12</sup> Silbanoy témenabangane begén séménulat bé ni foko sulat mangéy dob begome. Beeney maake gésarigo ku tuwaréy gu sabaf bé Kristowe. I funa kuwe séménulat dob begome inok méégét i kéunur gome. Atin méuyotu de so émfégétigan begom bé toow i kétoro guwe fantag bé kégédaw i Tuluse, Mélaw kagom térenon i témayakufe de.

<sup>13</sup> I de munur bati dob Babilonia ségifaé ro begom. Fénemili i Tuluse so bero ségiléw bé begome. Atin i Markose ségifaé no so begom. Been i maake nga gu. <sup>14</sup> Fatut fégito gom i késégédaw gome ké séségifa gom.

I Tuluse irayén damén dob begome kéluhanan do munur bé Kristowey métanéke fédéw.

Pedro

## I Géruwowe Sulat Pedrowe

Ay niy géruwowe sénulat Pedrowe, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Dob ni sulat, féningat Pedrowey de munur fantag bé de tugién témore. Atin téneroén so bé tintu fo séfule i Jesuse, fiyon fo ké mérugay séna.

<sup>1</sup> I séménulate bé ni, been i begéne sani Simon Pedrowe ségétew sugu-sugué Jesu Kristowe brab apostolén. Sémulatu mangéy dob begome do munur bé Jesu Kristowe. Beeney Tulus tome sani ménémukase betom dob de sala tom. Sabaf bé énda i ramigo no bé étewe, fénwaléyén begom do munur dob Beene ségiléw bé kékéwaléy ne begey do munur dob Beene.

<sup>2</sup> Toow fo damén mégédaw i Tuluse begom brab irayén damén begom i métanéke fédew sabaf bé kégéloro gome bé Tuluse brab Kadna tome Jesus.

<sup>3</sup> I barakatane Tulus nirayén dob betomey kéluhanay kailanga tome inok fiyoy kékéngintulus tome bé lala tome séna méuyag dob duniyae ni. Fakay gérigono tom i de ni non gétiga tom i Jesu Kristowe, sani séménéngkate betom mangéy dob Beene inok géamung tom bé kéfiyono nuwe brab kégérotor ne. <sup>4</sup> Bé ni, nirayén betom i kéluhanay fiyowe do gérotor éntingayén fénasadén irayén, inok sabaf bé de ni, géséliyaha tom i de tete kétayay de lowoh tom fégébinasa bé de étew. Atin waléy i adat tome ségiléw bé adat i Tuluse. <sup>5</sup> Atin mélaw fatut rigoné tom taman gagané tom inok méégét i kéunur tome sabaf bé de fiyo rigoné tom. Atin i de ni do fiyo rigoné tom, fatut féégeté tom bé kégésobut tome bé kétintuwe. <sup>6</sup> Atin i kégésobut tome de, fatut féégeté tom bé de kéika tom bé de tete kétaya tom. Atin fatut féégeté tom i ni bé kékédayday tome. Atin i kékédayday tome, fatut féégeté tom bé kéodor tome bé Tuluse. <sup>7</sup> Atin i kéodor tome bé Tuluse, fatut féégeté tom bé késégédaw tome. Atin i késégédaw tome, fatut féégeté tom bé kéimu tome bé de dumo tom. <sup>8</sup> Amuk tintu gérigono kom i de ni, minut fo médooy de rigoné kom sabaf bé kéunur gome bé Kadna tome Jesu Kristo. <sup>9</sup> Endob amuk wén i ségétew munur békén loo bé niy adat ne, maak langafén i kékégitung ne non énda gésobuto noy toowe, atin énggelifoto noy kékéday de salaén funa no malinis i fédew ne.

<sup>10</sup> Mélaw do dumo gu, fatut toow tom fo télamené fégíttoy kékémili i Tuluse betom brab kékéunur ne betom. Amuk rigoné tom i ni, énda fo fakayén ké tagaké tom i kéunur tome dob Beene. <sup>11</sup> Atin moror mélaw i Tuluse témayakuf betom dob kékékuléw i Kadna tome Jesu Kristo, sani ménémukase betom dob de sala tom. Enda mékédan i kékékuléw ne taman sa taman.

<sup>12</sup> Mélaw démoyun fo féégetédém gu begom i de ni fiyon fo ké énggésobuto komén brab méégétén i kéunur gome bé toowe kétoro. <sup>13</sup> Non dob karang guwe de, fiyo fo ké féégetédém gu begom i fantage bé de ni bé lala guwe séna méuyag dob duniyae ni.

<sup>14</sup> Gétiga ku éndaén mérugay i kúuyag guwe dob duniyae ni, loo bé féngéétigay Kadna tome Jesu Kristo begén. <sup>15</sup> Mélaw rigoné kuy kéluhanay gagané kuwe béléewe ni inok énda gélifoto kom i de ni kétoro gu, fiyon fo ké éndaén dinigu dob duniyae ni.

<sup>16</sup> Toow foy kétoro geye begom fantag bé kégumah i Kadna tome Jesu Kristo. Békén do tutul saén nuret gey begom tidéw dob de kagey saén kékégitung, non énggito gey i kéréndaw ne. <sup>17</sup> Diyo gey de bé gaiwe fénggitoy toowe fo barakatan Abay Tulus i kéréndaw Kristowe brab kégérotor ne brab ménbéréh mano, “Ay niy Nga guwe toow fo méimuu de, brab toow fo mésuwatu de.” <sup>18</sup> Enggélingoo key i ni kékéraléh tidéw dob lawayo amun diyo gey dob Beene dob uruk i mékétfuwe tuduk.

<sup>19</sup> Mélaw tintu fo gétiga key toow i kúuret i de énggéétah do sénarigoy Tuluse muret bé kékéraléh ne. Atin fatut fo unur gom de so, non i kúuret ruwe maak solo réméndaw dob délémons taman géfuwén. Atin amuk gumah i géfuwéne, réméndaw i solo mubode dob

betome. Non i Kristowe maak Beeney solo mubode atin séfule mangéy dini moso. <sup>20</sup> Atin ay niy toowe na fo gérotor féginau gu begom: I toowe, énda i ségétew étew gétoroo noy atag i de kékérélh i de sénarigoy Tuluse dob Ménuslate Kékérélh i Tuluse, amuk énda témabang i Tuluse de. <sup>21</sup> Non i kéuret i de sénarigoy Tuluse muret bé kékérélh ne békén tidew dob kéfégitung i kéilawane saén. Yamula fénbérélh i Tuluse bero dob kéfémandu i Rémogor ne.

## 2

<sup>1</sup> Bé do gétah, wén i do étew do tugién do ubo-ubo sénarigoy Tuluse muret bé kékérélh ne. Atin ségiléw so bé béléewe ni, wén soy tugién do témore do gumah séko dob begome. Toroé roy de tugi fégébinasa bé kéunur gome. Toroé roy békén kun Kadnan i Jesuse fiyon fo ké ménléhu i Jesuse inok kédané noy de sala ro. Mélaw métékow ro mékukum. <sup>2</sup> Gido loo, médooy modore bé de mékérésik do adat ro. Atin sabaf mélaw bé ni, médooy méraréke bé toowe kétoro. Non i de étew, marok do dumo tom i de ni tugién témore. <sup>3</sup> I de ni do tugién do témore, ureté ro dob begomey de tugi do tutul tidew dob de karo saén itungan. Rigoné roy ni inok gégédot ro saén kurta, non do arumén ro fo toow. Endob ménrugayén i kétafayay Tuluse bé kékukum ne bero.

<sup>4</sup> Non i Tuluse, énda féndayaén i de télaki do ménalsa, yamula nibérén bero dob emfernowo. Diyo ronén béní dob délémons nikét ro dob de sangkali, ongot-ongot ro taman dob gaiwe tintunén fo kékukum i Tuluse. <sup>5</sup> Atin énda so féndaya i Tulusey de énggéétah do étew do ménalsa. Yamula fénléhuén i kéluhanay de étew do énda méngintulus fénagéwén dob dakéle dunuk. Enda i ségétew tétabangén bero saliyu bé Noehe, sani téménoroe bé tintuwe, brab de fitew gétew do dumo no. I kéluhanay de ségiyo étew ménléné ro. <sup>6</sup> Atin kénukum i Tuluse soy de étew ménbati dob de ingéd féndawét Sodom brab Gomora. Fénléhuén bero bé aféye taman métuwégo ro. Rénigo noy ni inok fégito noy kérigo nuwe bé de étew do énda méngintulus ro. <sup>7</sup> Atin i ségétewé lagéy féndawét Lot saén i tétabang i Tuluse inok énda méléhuén bé bénó. Enda kénukum i Tuluse de non métintu étew brab ménika mamung bé de mékérésik rigonéy de étew do énda modor bé de sugu i Tuluse. I de tete rigoné ro ménwaléy tete i fédew Lote de. <sup>8</sup> Non ménstifon beroy Lote dob no ingéd atin énggito noy de tete rénigo ro sénga fuweh brab énggelingoo noy de tete kékérélh ro. Mélaw métintu i fédew ne bé de tete adat ro, non métintuy beene. <sup>9</sup> Mélaw gétigay Kadnaney ati kétabang ne bé de étew do méngintulus inok énda mésala ro ké téngkadén ro. Atin gétiga no soy ati kédusawe bé de tete étew taman dob gaiwe tintu mékukum ro. <sup>10</sup> Atin toow na fo gétimal i kékukum i Tuluse bé de étew odoro roy de mékérésik do kétayay de lowoh ro atin mika ro bé aturay Tuluse.

I de ni do tugién do témore do énggélabilo ku, do félangka-langka ro fo brab do émbaraw. Enda fégadata roy de barakatan do étew dob lawayo diyo. Yamula féngrasé ro bero. <sup>11</sup> Atin fiyon i de télakiy Tuluse, do toow na fo barakatan bé de ni do tugién do témore, énda fo ménéngiras ro témébo bé de ni do barakatan do étew dob lawayo dob adafay Kadnane. <sup>12</sup> Endob i de ni do tugién do témore, énda mégilak ro rémigo tete non been i niy de adat ro, maak do mérayar ro binatang fatut fo kéfoén brab féléhuén. I de ni do étew féngrasé roy éndae gésobuto ro. Tintu fo féléhuén ro non ségiléw ro bé de mérayar do binatang. <sup>13</sup> Atin médusa ro fo toow non déménusa ro bé de ségiyo étew. Méuyot ro fo rémigo bé de tete do mékérésik kétayay de lowoh ro fiyon ké fuweh. Fatut fo mémala gom sérénan bero mama non mékérésik foy de rigoné ro brab tugi ro begom bé lala ruwe sérénan begom mama. Been i funa kome méadowoy. <sup>14</sup> I de ni do tugién do témore, amuk gérito ro do udenén do libun, méuyot ro de fo lémamfa. Atin énda fo témérén ro rémigo sala. Fagakara roy de étew énda séna mécégét i kéunur ruwe inok gésala ro. Atin i de ni do tugién do témore, toow ro fo do arumén. Mélaw toow fo kükuméy Tuluse bero. <sup>15</sup> Ténagak roy tintuwe aguwon atin maak do méntadin ro mélaw béléewe ni. Niring roy Balaame sani nga Basore. I Balaame ni, toow fo génulaa noy kurtae énggédotén bé de tete rénigo no. <sup>16</sup> Mélaw fénbérélh i Tulusey kuda Balaame maak

ségétew étew gémélé de sabaf bé de salaen. Atin téménréni mélaw i Balaame rémigo bé de kédufanga no.

<sup>17</sup> I de ni do tugién do témodo, ségiléw ro bé de ménirot do séfut. Ségiléw ro bé de rawén faniréy réfuruhe inok énda rémania ro dob de nohok. Ténafayay Tuluse bero gono ro toow fo délémon dob emfernowo. <sup>18</sup> Toow fo do félangka-langka. Maak do ménalém i de kékéréd ro, éndob énda foy atag i de kékuret ro. Médoo damén i de étew géfédew tagaké roy de tete adat ro brab sésuway ro damén bé de tete étew. Endob i de ni do tugién do témodo, fénasa ro bero bé de tete kétayay de lowoh ro. <sup>19</sup> I de ni do tugién do témodo, fasada roy de étew bé fakay ro kun méfukas dob kitabe ké modor ro bero non toroé roy fakay kun rigonén i kéluhanane. Endob i toowe, i de ni do tugién do témodo maak riféy de tete adat bero funa ro mébinasa. Non i étewe, maak riféy de udenén éntingayén méguléwon de. <sup>20</sup> Amuk wén i do étew géloy Kadna tome Jesu Kristo, sani mémukase betom, gétagaka roy de tete adat i de étew dob duniye ni fégébinasa bé de étew. Endob amuk séfuleo ro man ségule i de ni do tete adat atin waléy ro man maak do riféy salae, toow na fo géttimal i goho ruwe bé sunguwe de. <sup>21</sup> Toow na fo fiyo ké énda damén séna énggétiga roy métintuwe aguwon bé géttiga ronén atin tagaké roy sugi i Tuluse fénggétiga no bero. <sup>22</sup> Mélaw dob de ni do rigoné ro, giton toow i kékéréd i Tuluse mano, “I itue, séfuleo noy suwah ne atin amaé no man. Atin i babuye féndiyoh séfule so man mangéy témunna.”

### 3

<sup>1</sup> Do gulaané ku do dumo gu, been i niy géruwo sulat gu begom. Dob ni géruwo sulat gu, toow fo ténlama gu fénfégétédém begom i toowe inok fiyoy kékégitung gome. <sup>2</sup> Non méuyotu de ké démoyun gétdémo kom i kékéréd i de énggétah do sénarigoy Tuluse muret bé kékéréd ne. Atin méuyotu de ké gétdémo kom i sugu i Kadna tome mémukas betom sani sugue niray gey do apostol dob begome. <sup>3</sup> Dob sunguwe, fatut géttiga kom i ni: Dob de géfuray do gai, wén i do tete étew odoro ro saén i de tete kétaya ro, brab diyangkaé ro begom. <sup>4</sup> Béréhé ro begom maro, “Hon i gono Kristowe de? Aw békén ba fénasadén i séfule kun mangéy dob duniye ni? Enda fo munur gey bé nan, non i de sungu do munur bé Kristowe, ménléhu ro né. Tidéw bé kélémbage bé duniye ni taman so béléewe ni, énda so ménfégalino.” <sup>5</sup> Endob i de ni do étew, lénifot roy kélémbag i Tuluse bé fantade brab lawayo bé kékéréd ne saén. Atin lénimbag i Tulusey duniye tidéw dob wayége brab tidéw dob kérara i wayége. <sup>6</sup> Atin béninasay Tuluse soy de étew méuyag bé gétahe bé wayége non féndunukén. <sup>7</sup> Atin fentaus i Tuluse soy duniye ni bé kékéréd ne inok amuk gérumah i gaiy kékukum i Tuluse, binasané no bé aféyey ni duniya brab de békén do méngintulus do étew.

<sup>8</sup> Endob i de begom do gulaané ku do dumo gu, kagom lifotén i ni: Dob antaf fédew i Tuluse, i ségétérésangane maak séngibu gébélantuwa, atin i séngibuwe gébélantuwa maak ségétérésangan saén. <sup>9</sup> Mélaw énda toow i kékégitung i de étew bé métana kun i kétumay Kadnane bé fasad ne séfule mangéy dini. Yamula tingkéloy Kadnane saén begom, non énda damén méuyotén kémukum fiyon ségétew. Yamula méuyot de ké tagakéy kéluhanay de étew i de sala ro.

<sup>10</sup> Gido loo, i kégumah i gaiwe séfule i Kadnane ségiléw bé kégumah i ménakawe non métékow i kégumah ne énda géttigay de étew de. Atin bé bénou gai, tékow méalfa i lawaye bé lalae wén i toow fo mémégilak dégu. Atin i kéluhanay de éntingayén dob lawayo diyo, métuwégi brab mébinasa. Atin méalfa soy duniye ni brab kéluhanay de éntingayén de.

<sup>11</sup> Atin non mébinasay kéluhanay de ni moso loo bé ni, fatut métintu tom atin modor tom bé kétayay Tuluse. <sup>12</sup> Non ongot-ongoté tom i gaiwe kémukum i Tuluse. Mélaw fatut rigoné tom i tamay gagané tome inok magad gérumah. Bé bénou gai, métuwégi brab mébinasay lawayo diyo, atin mélagang i kéluhanay éntingayéne sabaf bé kékéduf ne. <sup>13</sup> Endob i betome, ongot-ongoté tom i fénasad i Tuluse betom, sani mantuwe laway brab mantuwe duniya. Diyo bati i de métintu do étew.

<sup>14</sup> Mélaw do dumo gu, i lala tome ongot-ongot bé nan gai, fatut fo rémigo tom saén fiyo inok énda i téboéy Tuluse betom, atin énda mélaw mékérítén betom. <sup>15</sup> Kagom lifotén i funay Tuluse témingkélon betom, non iraya no betom gai inok méfukas tom dob de sala tom. Been soy niy atag i sulat i gulaané tome dumo tom Pablo dob begome. Fénggétigay Tuluse de. <sup>16</sup> Been i niy démoyune fégétiga no begom dob kéluhanay de sultén fantag bé kékukum i Tuluse. Atin wén soy do dumo bé de kétoro dob de sultén toow fo mérégén gésobuton. Atin i de dumo do étew énda i gétiga-tiga ro, toroé roy békéne katabawan atag i de sulat Pablo. Loo so bé niy rénigo ruwe bé de ségiyo do Ménsulat Kébéréh i Tuluse. Mélaw been i niy funa ruwe mébinasa.

<sup>17</sup> Endob i de begom do dumo gu, gétiga komén i de ni. Mélaw ingat gom inok énda géunur gom bé de békén katabawan do kétoro i de étew do énda modor ro bé de sugu i Tuluse. Non amuk énda mingat gom, gésésuway gom bé toowe kétoro nunuro kom. <sup>18</sup> Fatut fo minut waléy méégét i kéunur gome sabaf bé kétayakuf gome bé kégédaw i Tuluse brab kégétiga kome bé Kadna tome Jesu Kristo, sani mémukase betom dob de sala tom. Médayéw fo damén béleewe ni taman sa taman. Amen!

Pedro

## I Sunguwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniiae niy Jesuse. Sénulat Juaney ni sulat dob de kéluhanay de munur bé Kristowe.

Dob ni sulat, ténero Juane bé fatut ségédaw i de munur bé Kristowe.

<sup>1</sup> Sulata key begom fantag bé Kristowe, sani miraye bé umule magufusa. Wénén i Kristowe tidew féganay. I Beene tintu énggito gey, brab énggelingoo key i kékérén ne, atin énggékuvaha key i lowoh ne. <sup>2</sup> Amun méntefégitoy Jesu Kristowe dob duniiae ni, énggito gey. Mélaw ureté key dob begomey fantage bé Beene. Been i fédawéténé “Umul Magufusa”. Been i dumoy Abaye Tulus atin ménwaléy kéilawan méntefégitoy dob begeye. <sup>3</sup> Ureté key dob begomey fantage bé énggito geye brab énggelingoo keye inok géunur gom de so inok waléy tom sédumon sabaf bé késédumo tome bé Abaye Tulus brab Nga ne Jesu Kristo. <sup>4</sup> Sulaté key i ni inok toow fo méégét i kéoror tome de.

<sup>5</sup> Ay niy kéurete bénréh i Nga i Tuluse begey atin bérhé key dob begome: I Tuluse maak Solo rémendaw, atin énda i délémon dob Beene. Non toow fo fiyoy Tuluse, énda i tete dob Beene. <sup>6</sup> Mélaw amuk bérhé tom dumoy tom i Tuluse, éndob tete sénay de adat tom, témugi tom. Témugi tom dob de kékérén tom brab dob de rigoné tom so. <sup>7</sup> Endob amuk fiyoy adat tome ségiléw bé kéfiyoy Tuluse, sédumon tom brab malinis tom dob adafay Tuluse non mécédan i séngae sala tom sabaf bé kéléhu Jesuse Nga i Tuluse dob kruse.

<sup>8</sup> Amuk bérhé tom énda i sala tom, tugio tom saén i de lowoh tom, énda munur tom bé towe kétoro. <sup>9</sup> Endob amuk fayagé tom i de sala tom dob Tuluse, fésagadé no betom bé de sala tom atin linisé no betom dob kéluhanay de tete adat tom. Rigoné noy ni non i Beene métintu brab tumané noy fasad ne betom bé fésagadé no betom. <sup>10</sup> Endob amuk bérhé tom énda i sala tom, maak fédawété tom i Tuluse ségétew témugi, atin énda munur tom bé kékérén ne.

## 2

<sup>1</sup> I begome maak do gulaané ku do nga gu, sulaté kuy ni dob begome inok énda rémigo gom sala. Endob amuk wén i gésala betom, wén i métintuwe kéfédéwa tom dob adafay Tuluse, sani Jesu Kristowe. <sup>2</sup> Atin i Jesu Kristowe ni, Beeney tulake fégékédan bé de sala tom. Atin békén saén i de katom do sala, éndob loo soy de sala i kéluhanay de kéilawan.

<sup>3</sup> Amuk modor tom bé de sugu i Tuluse, gétiga tom betom i de dumoy Tuluse. <sup>4</sup> Endob amuk wén i ségétew émbérén mano, “Begéney dumoy Tuluse”, éndob énda modorén bé de suguén, toow fo tugién i ni étew brab énda munurén bé towe kétoro. <sup>5-6</sup> Endob i étew modor bé kékérén i Tuluse, tintu fo méégét i kéféimu ne bé Tuluse. Non i étew bérhé no dumoy Tuluse, fatut iringé noy adat Jesu Kristowe. Amuk rigoné tom i ni, gétiga tom dumoy Tuluse betom.

<sup>7</sup> Do gulaané ku do dumoy gu, békén mantu sugu i ni sulaté ku dob begome. Yamula tafayén i ni sugu énggelingoo kom tidew féganay. Been i niy sugue téneroén betom bé fatut tom ségédaw. <sup>8</sup> Gido loo, maak mantu séna niray Jesusey ni sugu dob betome. Atin i Kristowe brab begome modor gom bé ni sugu. Gétiga kuy ni non béléewe ni minutén mécédan i délémone atin rémendaw i tintuwe solo, sani Jesu Kristowe.

<sup>9</sup> Amuk wén i ségétew étew émbérén munur kun bé Jesu Kristowe, éndob mérarék bé dumoy nuwe, bati séna dob délémone, non énda tintu no munur. <sup>10</sup> Endob i étew mégédaw bé dumoy nuwe munur, beeney tintuwe munur bé Kristowe. Atin énda i rigoné no funay dumoy nuwe gésala. <sup>11</sup> Endob i étew mérarék bé dumoy nuwe, énda toow i

kéunur ne bé Jesu Kristowe atin maak magéw dob délémone. Enda gétiga noy ayo nuwe non maak langafén non énda munurén bé Jesu Kristowe.

<sup>12</sup> Do nga gu, sulata ku begom non ménfésagadén i de sala gom sabaf bé Kristowe. <sup>13</sup> I de begom do lukés, sulata ku begom non énggélolo gomén i Kristowe ménwénén tidew féganay. I de begom do ménguwéd séna, sulata ku begom non ténabana komén i Satanase.

<sup>14</sup> I de begom do nga, sulata ku begom non ménwaléy gom sédumon bé Abaye Tulus. I de begom do lukés, sulata ku begom non ménwaléy gom sédumon bé Kristowe, sani ménwéné néen tidew féganay. I begome do ménguwéd do étew, sulata ku begom non émbagér i kéunur gome, atin énda mékédan i kékérél i Tuluse tidew dob itunga kome, atin ténabana komén i Satanase.

<sup>15</sup> Kagom féimuén i de tete do éntingayén taloo no do tete adat dob duniyae ni. Non amuk féimué kom i de tete do éntingayén dob fantade ni, énda féimué kom i Abaye Tuluse. <sup>16</sup> I kéluhanay de tete dob duniyae ni, békén tidew dob Abaye Tulus. Yamula tidew dob fantade niy tete loo bé de tete kétayay de lowoh i de étew, brab de kéingar, brab de kékélangka-langka. <sup>17</sup> Endob i duniyae ni, méalfa moso, loo soy de tete do éntingayén kétayay de étew. Endob i de étew rigoné roy kétayay Tuluse, méuyag ro taman sa taman.

<sup>18</sup> Do nga gu, gédétén i tamfadane. Enggélingoo komén i kégumah i ségétéwe étew moso féndawét “Sébanil bé Kristowe”. Atin béléewe ni wénén i do énggumah do étew do sébanil bé Kristowe. Mélaw gétiga tomén gédétén i tamfadane. <sup>19</sup> I de ni do étew sébanil bé Kristowe, békén ro do tintu dumo tom munur bé Kristowe. Atin been i niy funa ruwe témenagak betom. Amuk do tintu ro do dumo tom, énda damén ténagak ro betom. Endob sabaf bé kétagak ruwe betom, énggétiga tom békén ro do tintu dumo tom munur bé Kristowe.

<sup>20</sup> Endob i de begom, fénémanduo Kristowe begom bé Rémogor i Tuluse. Atin mélaw gétiga kom kéluhanan i toowe kétoro. <sup>21</sup> Mélaw i funa kuwe sémulatan begom békén sabaf bé énda gétiga kom i toowe kétoro. Yamula sabaf bé kégétiga kome de, atin gétiga kom soy énda i tugi dob toowe kétoro.

<sup>22</sup> Ati mélaw i témuie? I témuie, beeney émbéréhe bé békén kun Kristoy Jesuse. Been i niy étewe tintu fo sébanil bé Kristowe non miká bé Abaye Tulus loo so bé Nga ne Jesus. <sup>23</sup> I étewe miká bé Nga i Tuluse, miká so bé Abaye Tulus. Endob i étewe munur bé Nga i Tuluse, munur so bé Abaye Tulus.

<sup>24</sup> Mélaw, kagom témerén munur bé Urete énggélingoo komén bé do gétah. Non amuk énda témerén gom munur bé ni kétoro énggélingoo komén bé do gétah, gétaus gom sédumon bé Abaye Tulus brab Nga ne Jesu Kristo taman sa taman. <sup>25</sup> Non been i niy umule magufusa fénasad Kristowe irayén betom.

<sup>26</sup> Sulata ku begom inok géingata kom i de étew télamané ro begom féunurén bé békéne toow kétoro. <sup>27</sup> Endob i de begom, iraya Jesu Kristowe begom témantu bé Rémogor ne. Atin amuk bat i Rémogor ne dob de fédew gom, énda mélaw kailanga kom i témoree begom. Non i Rémogor ney témoree begom bé kéluhanane. Atin toroe noy toowe, békén i tugie. Mélaw odoro kom i kétoro i Rémogor ne, atin kagom tagakén i Kristowe.

<sup>28</sup> Mélaw do nga gu, kagom tagakén i Kristowe inok énda mágilak gom taloo no mémala gom de dob gaiwe séfule moso. <sup>29</sup> Gétiga tomén métintuy Kristowe. Mélaw fatut gétiga kom soy kéluhanay de rémigo bé métintuwe, beroy de nga i Tuluse.

### 3

<sup>1</sup> Fégitung gom, i Abaye Tulus toow fo gulaané no betom! Non féndawétén betom do ngaén. Atin i toowe, ménwaléy tom mon do ngaén. I funay de étew sébanil bé Tuluse énda gélobo ro betom do nga i Tuluse, non énda so gélobo roy Tuluse. <sup>2</sup> Do gulaané ku do dumo gu, ménwaléy tomén do nga i Tuluse. Endob énda séna gétiga tom de ké ati moso i kewaléyo tome. Endob gétiga tom i ni: Amuk séfule i Kristowe, waléy tom loo bé Beene,

non gito tom moso i tintuwe fo falasén. <sup>3</sup> Mélaw, i kéléuhanay de ongot-ongot bé késéfule Kristowe, fatut démoyun ro rémigo fiyo loo bé kéfiyo Kristowe.

<sup>4</sup> Amuk wén i ségétew réménigo sala, fénlisén i kukumay Tuluse, non i atag i salae, been i kékéfélise bé kukumay Tuluse. <sup>5</sup> Gétiga komén ménwaléy kéilawan i Kristowe inok kédané noy de sala i de kéilawan. Atin énggétiga kom soy énda i sala Kristowe, fiyon sébaan. <sup>6</sup> Mélaw i kéléuhanay de dumo Kristo, énda fakayén kétaus ro rémigo sala. Endob i étewe démoyun rémigo sala énda séna gélolo noy Kristowe brab énda séna munurén de.

<sup>7</sup> Do nga gu, kagom fédayaén i de étew émféunur begom bé tugie kétoro. Ay niy toowe kétoro: I de étew rémigo ro fiyo, beroy de métintu do étew ségiléw bé kétintu Kristowe. <sup>8</sup> Endob i de étew démoyun rémigo sala, beroy de kuyug Satanase. Non i Satanase tidéwén féganay i kérigo nuwe sala. Atin i Nga i Tuluse ménangéy dob duniyae ni inok kédané noy tetee galbék Satanase.

<sup>9</sup> I de étew ménwaléy do nga i Tuluse, énda démoyun ro rémigo sala non ménwaléy ro miring bé adat i Tuluse. Enda fakayén démoyun ro rémigo sala non Tulus i Abay ruwe.

<sup>10</sup> Endob i de étew énda mégédaw ro bé dumo ruwe, békén beroy de nga i Tuluse. Been i niy fégéolonone bé de nga i Tuluse brab de nga Satanase.

<sup>11</sup> Fatut tom ségédaw. Been i niy kétoroe énggelingoo komén tidéw féganay. <sup>12</sup> Enda fatutén iringé tom i étewe féndawét Kain. Non beeney ségétewe kuyug Satanase, atin fénléhuén i tuwaréy ne Abel. Atin i funa nuwe ménméléhu bé tuwaréy ne non métintuy rigonéy tuwaréy ne, éndob i beene tete i kaane rigonén.

<sup>13</sup> Mélaw do dumō gu, kagom mégaif de amuk mérarék begom i do étew sébanil bé Tuluse. <sup>14</sup> Gétiga tom i ni: I de kéilawan méuyag ro taman gégumah i gaiwe méléhu ro. Endob békénén loo bé niy betome, non énggédot tomén i umule magufusa. Mélaw fiyon fo ké méléhu tom dob duniyae ni, méuyag tom so dob lawayo. I funa tome gétigan bé ni non mégédaw tom bé dumō tome. Endob i de étew do énda mégédaw ro, méléhu ro fo toow. <sup>15</sup> Amuk wén i étew mérarék bé dumō nuwe, i ni étew ségétew ménméléhu étew dob kéfegitung i Tuluse de. Atin gétiga tom i de ménméléhu do étew énda séna énggédot roy umule magufusa. <sup>16</sup> I funa tome gétigan bé atag i “kégédawe” non féndaya Kristowey de étew ménméléhu de bé kégantino nuwe betom inok kédané noy de sala tom. Mélaw fatut iringé tom soy rénigo nuwe. Iray tom soy férénawa tome fégétabang tom bé de dumō tom. <sup>17</sup> Ufama, wén i ségétewe kawasa, atin gito noy dumō nuwe méskinan médooy foy kailanga nuwe. Endob amuk énda méruray i na nuwe de atin énda tabanga no de, giton énda tintu no méimu bé Tuluse. <sup>18</sup> Do nga gu, énda fatutén ké mégédaw tom saén dob de kékérédah tom saén. Non fatut fégito tom i kégédaw tome dob de fiyo rigoné tom. Been i niy tintuwe kégédaw.

<sup>19</sup> Mélaw amuk rigoné tom i ni, gétiga tom bé betom i de étew i tintuwe Tulus. Atin éndaén mélaw mégilak tom bé Tuluse ké diyo tom dob adafa nuwe. <sup>20</sup> Fiyon fo ké fégitungé tom médait tom mékukum, gétiga tom mas na fo gétigan i Tuluse bé betome, non gétiga noy kéléuhanane. <sup>21</sup> Mélaw, do gulaané ku do dumō gu, gétiga tom énda i funa tom mégilak, atin mélaw géfèbaraw tom démasal dob beene. <sup>22</sup> Fiyon atiy ongoté tome dob Tuluse, irayén dob betome. Non odoro tom i de suguén, atin rigoné tom i késuwata nuwe. <sup>23</sup> Atin ay niy sugu ne betom: Fatut munur tom bé Nga ne Jesu Kristo atin ségédaw tom loo bé sénugu Kristowe betom bé gétaho. <sup>24</sup> I de étew modor bé de sugu i Tuluse, bati ro dob Tuluse, atin i Tuluse bati so dob de fédew ro. Atin gétiga tom bati i Tuluse dob de fédew tom non nirayén betom i Rémogor ne.

sénarigoy Tuluse muret bé kékéréd ne, atin ménangéy ro dob de médo do ingéd dob duniye ni. <sup>2</sup> Atin wén i fégéolonon de inok gétiga kom i tidéwoy rémogore de. Amuk fayagéy ségétewe étew i Jesu Kristowe ménwaléy kéilawan, Rémodor i Tuluse bé bénoy ménémanduone de. <sup>3</sup> Endob i de étew bérédé ro énda kun ménwaléy kéilawan i Jesuse, énda bati i Rémodor i Tuluse dob berowe. Yamula fénémanduoy rémogor i Ségétewe étew Sébanil bé Kristowe. Enggelingoo komén i kégumah ne, atin bérédé ku begom énggumahén dob duniye ni béléewe ni.

<sup>4</sup> Endob i de begom, do nga gu, begom i de étew i Tuluse. Atin ténabana kom i de ubo-ubo sénarigoy Tuluse. Non i Rémodor i Tuluse bati dob de fédew gom mas na barakatan bé Satanase bati dob de fédew i de tete étew. <sup>5</sup> I de ubo-ubo sénarigoy Tuluse, toroé roy tete. Atin i de tete étew dob duniye ni fégélingoé ro bero non sébanil ro so bé Tuluse. <sup>6</sup> Endob i de betom, do étew i Tuluse betom. Atin i de étew gélolo roy Tuluse, fégélingoé roy kétoro tome. Endob i de békén do étew i Tuluse, énda fégélingoé ro betom. Mélaw been i niy fégéolonone bé de étew fémanduoy Rémodor i Tuluse sani témoree bé toowe, brab i de étew fémanduo Satanase sani de témore bé tugie.

<sup>7</sup> Do gulaané ku do dumo gu, fatut ségédaw tom non i kégédawe tidéw dob Tuluse. I de étew mégédaw ro bé dumo ruwe, beroy de étew do ménwaléy do nga i Tuluse brab dumoy Tuluse bero. <sup>8</sup> Atin i de étew énda mégédaw ro, beroy de énda séna gégéloro bé Tuluse, non mégédaw foy Tuluse. <sup>9</sup> Atin fénggitoy Tulusey kégédaw ne betom bé késugu ne bé buntunge Ngaén dob duniye ni inok gédoté tom i umule magufusa sabaf bé Beene. <sup>10</sup> Mélaw ay niy tintuwe kégédaw: Békén ké betom i méngédawe bé Tuluse. Yamula, Tulus i méngédawe betom. Been i niy funa nuwe séménugu bé Nga ne dob duniye ni inok félahuén fégétulak inok émfésagad i de sala tom.

<sup>11</sup> Do gulaané ku do dumo gu, amuk loo bé nan i kédakél i kégédaw i Tuluse betom, fatut fo ségédaw tom so. <sup>12</sup> Enda i ségétew énggigoéto bé Tuluse. Endob amuk ségédaw tom, bati i Tuluse dob de fédew tom, atin i kégédaw tome waléy toow fo dakél miring bé kaane kégédaw.

<sup>13</sup> Atin i Tuluse nirayén i Rémodor ne dob betome. Been i niy funa tome gétiga tom bati tom dob Tuluse atin i Tuluse bati dob de fédew tom. <sup>14</sup> Atin i begeye do apostol, énggito gey i Nga i Tuluse brab de rénigo no. Mélaw ureté key i fantage bé késugu i Tuluse bé Nga ne dob duniye ni inok fukasé noy de kéilawan dob de sala ro. <sup>15</sup> I de étew fayagé roy Jesuse Nga i Tuluse, bati i Tuluse dob de fédew ro, atin bati ro dob Tuluse. <sup>16</sup> Atin gétiga tom mélaw toow fo mégédaw i Tuluse betom. Mélaw gésarig tom de.

Non i Tuluse toow fo mégédaw. Atin i de étew do mégédaw, bati ro dob Tuluse atin i Tuluse bati dob de fédew ro. <sup>17</sup> I Tuluse féwaléyé no tintu fo dakél i kégédaw tome inok énda mégilak tom bé gaiwe kémukum i Tuluse. Mélaw éndaén mégilak tom bé no gai, non ménwaléyén ségiléw i adat tome bé Kristowe. <sup>18</sup> Enda i funa tom mégilak non mégédaw i Tuluse betom. Amuk toow fo mégédaw i Tuluse betom, mémédanén i funa tome mégilak. Non i funay de étew mégilak, been i kékukum i Tuluse. Mélaw i de étew mégilak, énda séna méégot i késarig ruwe bé kégédaw i Tuluse.

<sup>19</sup> I funa tome méimu bé Tuluse non férimu i Tuluse betom sungu. <sup>20</sup> Amuk wén i étew émbéréh mano, “Féimué kuy Tuluse”, éndob mérarék bé dumo nuwe, témuji. Non amuk énda féimué noy dumo nuwe gito no, ati kékifingé-fingé i kékéimu ne bé Tuluse énda gito no de? <sup>21</sup> Mélaw ay niy sugue niray Kristowe betom: I de étew féimué roy Tuluse, fatut féimu ro so bé de dumo ro étew.

<sup>1</sup> I de étew munur bé Jesuse Beeney Kristowe, sani fénemili i Tuluse méguléw, beroy de ménwaléy do nga i Tuluse. Atin i de étew féimué roy Abaye Tulus, féimué ro soy de dumo ro nga i Tuluse. <sup>2</sup> Atin amuk féimué tom i Tuluse brab odoro tom i de suguén, gétiga tom féimué tom soy de dumo tom do nga i Tuluse. <sup>3</sup> Non amuk féimué tom i Tuluse, odoro tom i de suguén. Atin énda mérégén i kéodoro tome bé de suguén. <sup>4</sup> Non kéluhana tomén

do ménwaléyén do nga i Tuluse, gétabana tom i Satanase, sani méguléwe bé duniiae ni. Atin i funa tome gétabana tom i Satanase non bé kéunur tome bé Jesuse. <sup>5</sup> Ati de étew gétabana roy Satanase? I de étew saén munur bé Jesuse Nga i Tuluse.

<sup>6</sup> I Jesu Kristowe sénugu i Tuluse mangéy dob duniiae ni. Gétiga tom i ni sabaf bé wayége brab dara ne. Non énda saén ménbautisén dob wayége, yamula réménanas soy dara ne amun ménkélabo dob kruse. Atin i Rémogor i Tuluse fégétiga no betom toow i de ni, non i Rémogor i Tuluse démoyun béréhé noy toowe saén. <sup>7</sup> Mélaw wén i télaw émféféngintoow fantag bé Jesu Kristowe: <sup>8</sup> I sébaane de, been i Rémogor i Tuluse. Atin i sébaane de, been i kébautise bé Jesu Kristowe. Atin i sébaane de, been i kéranas i dara Jesuse bé kéléhu ne. Atin falan séfagayun i de ni do télaw. <sup>9</sup> Munur tom bé kéuret i de étew saén, éndob mas na gérotor i kéuret i Tuluse funa tom tintu fo fatut munur. Atin nuret i Tulusey Jesuse Ngaén. <sup>10</sup> Mélaw i de étew munur ro bé Nga i Tuluse, ménunur ro bé toow i kéuret i Tuluse. Endob i de étew énda munur ro bé Tuluse, maak fédawét roy Tuluse ségétew tugién. Non énda ménunur ro bé kékéréh i Tuluse fantag bé Nga ne. <sup>11</sup> Atin ay niy toowe kétoro fantag bé Nga ne. Niray i Tuluse betom i umule magufusa tidéw dob Nga ne. <sup>12</sup> I de étew ménwaléy do dumoy Nga i Tuluse, wén i umul ro magufusa. Endob i de étew énda ménwaléy ro do dumoy Nga i Tuluse, énda énggédot roy umule magufusa.

<sup>13</sup> Sulaté kuy ni dob begome do munur bé Jesuse Nga i Tuluse inok gétiga kom wénén i kagom bé umule magufusa. <sup>14</sup> Enda mégilak tom démasal dob Tuluse non gétiga tom fégélingoé no betom amuk mongot tom bé ati kétaya nuwe irayén. <sup>15</sup> Gétiga tom démoyun fégélingoé no betom ké démasal tom mongot dob Beene. Atin mélaw gétiga tom irayén betom fiyon fo ké ati ongoté tome dob Beene.

<sup>16</sup> Amuk wén i ségétew begom gito noy dumo nuwe énggésala, atin énda ménléhuén bé nan sala, fatut dasal gom dob Tuluse inok irayén i umule magufusa dob nan dumogom. Béréhé ku begom i fantage bé de sala békén fégélehú i étewe. Endob wén soy do sala funay de étew méléhu. Atin énda féginauné ku begom démasal fantag bé de ni. <sup>17</sup> I kéluhanay de tete rigonén, sala. Gido loo, wén i do sala énda méléhu i de étew de.

<sup>18</sup> Gétiga tom i de étew do ménwaléy nga i Tuluse énda démoyun ro rémigo sala. Non i Jesuse Nga i Tuluse, diyagané no bero inok énda géférígono Satanase bero tete.

<sup>19</sup> Gétiga tom betom i de étew i Tuluse fiyon fo ké Satanas i méguléwe bé kéluhanay de étew sébanil bé Tuluse dob duniiae ni.

<sup>20</sup> Gétiga tom ménangéy i Nga i Tuluse dob duniiae ni, atin fénggésobutén betom inok gétiga tom i toowe Tulus. Ménwaléy tom do dumoy toowe Tulus brab Nga ne Jesu Kristo. Been i niy tintuwe Tulus atin tidéw dob Beeney umule magufusa.

<sup>21</sup> Do nga gu, kagom féngadafén i de kéninontow.

## I Géruwowe Sulat Juane

Ay niy sébaane bé de sénulat Juan, sani ségétéwe kuyug Jesuse brab dumo no amun dini séna dob duniiae niy Jesuse.

Dob ni sulat, féningat Juaney kéluhanay de munur fantag bé de tugién témore.

<sup>1</sup> Begéney lukése odoroy de munur bé Kristowe. Sémulatu mangéy dob beeme, sani libune fénémili i Tuluse brab dob de ngaém. Toow fo gulaané ku begom. Atin békén saén i begéney gémulaane begom, non i kéluhanay gétigane bé toowe kétoro gulaané ro so begom. <sup>2</sup> I funa keye gémulaan begom non munur gey bé toowe kétoro, atin énda mékédan i kéunur geye de taman sa taman.

<sup>3</sup> I Abaye Tulus brab Nga ne Jesu Kristo, mégédaw ro damén betom, atin méuray damén i na ruwe betom, atin iray ro damén i métanéke fédew dob betome. Mérigoy ni dob betome non munur tom bé toowe kétoro brab ségédaw tom fo toow.

<sup>4</sup> Toowu fo moror non énggétiga kuy de dumo bé de ngaém munur ro bé toowe kétoro loo bé sénugu i Abaye Tulus betom. <sup>5</sup> Mélaw, Di, ongoté ku dob beeme bé fatut tom ségédaw. Békén mantuy ni sugu labité ku dob ni sulat. Yamula tafayén i ni sugu niray dob betome tidew féganay. <sup>6</sup> Non amuk ségédaw tom, modor tom bé de sugu i Tuluse. Atin ay niy sugue nirayén betom bé féganaye: Fatut tom ségédaw.

<sup>7</sup> Médooy de mégakar do témore ménangéy dob de séségiyo-giyo do ingéd dob duniiae ni. Ténoro roy békén kun toow i Jesu Kristowe ménwaléy kéilawan. I de ni do étew témenoro bé ni, tintu ro fo tugién brab sébanil ro bé Kristowe. <sup>8</sup> Mélaw ingat gom inok énda mésinggula i kélugoté kome gémalbék. Atin mélaw gédoté kom i kéluhanay baras gome tidew dob Tuluse.

<sup>9</sup> I de étew témenagak bé toowe kétoro Jesu Kristowe atin ménunur bé ségiyowe kétoro, békén ro dumoy Tuluse. Endob i de taus munur bé toowe kétoro, beroy do dumoy Abaye Tulus brab Nga ne so. <sup>10</sup> Mélaw amuk wén i géumah dob begome atin témore bé ségiyowe kétoro bé kétoro Kristowe, kagom tayakufén de dob de lawi gom taloo no ségifaé kom. <sup>11</sup> Non amuk ségifaé kom i nan étew, géamung gom bé de tete galbékén.

<sup>12</sup> Médoo na damén i de kétaya ku béréhén dob begome, éndob énda méuyotu de sémulat. Yamula méuyotu damén mangéy témukaw begom inok gésétengaang tom séuret-uret brab géséoror tom fo toow.

<sup>13</sup> I de nga i dumo muwe sétiman idéng libun fénémili i Tuluse, ségifaé ro so begom.

## I Gétéléwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob ségétéwe féndawét Gayo, sani ségétéwe so munur bé Jesuse.

<sup>1</sup> Begéney lukése odoroy de munur bé Kristowe. Sémulatu mangéy dob beeme, Gayo. Beemey toowe fo gulaané ku dumo gu.

<sup>2</sup> Adih, démasalu dob Tuluse bé féfioné no beem brab iraya no beem fiyo kégélowohon loo bé kéiray ne beem bé mégéte kéunur. <sup>3</sup> Toowu fo moror amun énggumah i de dumo to munur bé Kristowe atin nuret roy fantage bé kéfedayday me munur bé toowe kétoro, loo soy adate nodoro mo bé ni toow kétoro. <sup>4</sup> Toow fo dakél i kéroror guwe bé gélingoo kuy fantage bé kéodoroy de nga gu bé toowe kétoro. Been i funa kuwe moror béri, non énggélingoo kuy fantage bé beeme.

<sup>5</sup> Adih, i kétabanga muwe bé de dumo tom munur ménawet diyaan i fégéolonone bé toow i kéunur me. Non fiyon fo ké énda séna gélolo mo bero, tényakufém bero. <sup>6</sup> I de begey do munur bati dini, amun ménlimud gey méngintulus, nuret i de ni do étew i kégédaw me bero. Atin amuk géawét ro man diyaan, fiyo ké tabanga mo man bero loo bé fatute mésuwat i Tuluse de inok gétaus ro magéw. <sup>7</sup> Non i funa ruwe magéw inok légébé roy kétoro Kristowe. Atin énda tayakufé roy tabang i de étew do békén munur bé Kristowe. <sup>8</sup> Mélaw i betome do munur, fatut tabanga tom i de ni do étew inok géamung tom bé galbék ruwe lémégéb bé toowe kétoro.

<sup>9</sup> Séménulatu sébaan foko sulat mangéy dob de munur diyaan, éndob énda féngélingo Deotrefesey kégéginai guwe. Méuyot de ké been saén i méguléwe bé de munur diyaan.

<sup>10</sup> Atin amuk géangéyu diyaan, ureté ku beem i kéluhanay de rénigo no, brab kéluhanay de tete tugi bénréhén fantag bé begeye. Atin békén saén i ni, non amuk géawét diyaan i de dumo tom munur, énda fo tayakufé no bero. Atin gélée noy de fiyo étew méuyot témayakuf bero, atin énda féahuré no dob lawie féngadafan i de étew témayakuf bero.

<sup>11</sup> Adih, kago iringén i tetee adatén. Yamula iringém i fiyowe adat. I de étew rémigo fiyo, beroy de étew i Tuluse. Endob i de étew rémigo tete, beroy de énda séna gégéloro bé Tuluse.

<sup>12</sup> I kéluhanay de étew émbéréh ro fiyo fantag bé Demetriowe. I métintuwe adatén i émféféngintoowe bé i beene, fiyo fo étew. Been soy niy funa keye de démayéw. Atin gétiga mo toow i kéret geye.

<sup>13</sup> Médoo fo damén i kéuyoto kuwe ureté beem, éndob mikau de sémulat. <sup>14</sup> Méuyotu damén ké géségitto to bé magade ni inok gésétengaang to séuret-uret.

<sup>15</sup> Métanék damén i fédew me. I kéluhanay de dumo to dini ségifaé ro beem. Ségifaém so begén i kéluhanay de dumo to diyaan.

## I Sulat Judase

Judas i dawét i séménulate bé ni sulat, sani tuwaréy Jesu Kristowe. Sénulat Judasey ni sulat dob kéluhanay de munur bé Kristowe.

Dob ni sulat, féningat Judasey kéluhanay de munur fantag bé de tugién témodo.

<sup>1</sup> Begéney Judase, sani dumo Santiagowe sétiman idéng, brab sugu-sugué Jesu Kristowe.

Sémulatu mangéy dob begome do étew fén-unur i Tuluse bé Jesuse. Begomey de étew kégédaway Abaye Tulus brab do diyagané Jesu Kristowe.

<sup>2</sup> Mégédaw damén i Tuluse begom, brab méuray damén i na nuwe begom, brab irayén damén begom i métanéke fédew.

<sup>3</sup> Do gulaané ku do dumo gu, bé gétahe, i toowe fo kéuyotu ku sulaté ku dob begome, been i niy fantage bé kéfukas Jesuse betom dob de sala tom. Endob kailangan fo sulaté ku na métah i kéféginau guwe begom bé fatut fo fétaus gom i kéatuho kome bé de étew méuyot mégalin bé toowe kétoro niray i Tuluse. Non sénarig i Tulusey kétoro ne dob betome do étewén. Atin kailangan énda fo mafégalino. <sup>4</sup> Kailangan fo féginauné ku begom lee non wén i do étew do békén méngintulus énggésélawék betom, éndob sékémé ro saén. Fégaliné roy toowe kétoro fantag bé kégédaw i Tulus tome. Non toroé roy fakay kun i de étew do rémigo bé de mékérésik do adat loo bé de rigoné ro, non énda kémukum i Tuluse kun non toow saén mégédaw. Atin bérhéhé ro békén kun Kadna tom i Jesu Kristowe brab békén kun Jesus i méguléwe betom. Endob ménrugayén ménbéréh dob Ménsulate Kébéréh i Tulusey fantage bé kékukume bero.

<sup>5</sup> Gétiga komén i kéluhanay de ni bérhéhé ku begom. Gido loo, fefégétédém gu begom i ni: Bé do géyah, ténangéy i Kadnaney de Judio mésut tidéw Egipto, sani ingéde gono ro ménrifén. Endob amun énggésut ron, fénléhu i Kadnaney de dumo bero sani do énda munur dob Beene. <sup>6</sup> Fégétédém gom i de télaki bé do géyah. Amun méntefégérотор ro brab ténagak roy fatute gono ro, fén-angéy i Tuluse bero dob délémons brab nikétén bero bé sangkalie énda mékédano taman sa taman. Atin diyo béleewe ni fénongot-ongot i Tuluse beroy gaiwe mékukum ro fo toow. <sup>7</sup> Fégétédém gom i de étew ménbati dob Sodoma brab dob Gomorah brab dob de ingéd gédet diyo. Ségiléw i rénigo ruwe bé de ni do télaki, non tete i de adat ro atin ménwaléy ro bakla. Mélaw kénukum i Tuluse bero bé kéfediyo ne bero dob gonoy aféye taman sa taman inok émféingat bé de ségiyo étew ké atiy mérigowe dob berowe ké ségiléw i de rigoné ro.

<sup>8</sup> Atin ségiléw so bé niy de tugién do témodo. Rigoné roy de toow fo mékérésik dob de karo do lowoh, atin bérhéhé roy odoro ro saén i kéfemandu i de téginéf ro. Endob mika ro modor bé de sugu i Tuluse atin fengirasé roy de barakatan do étew dob lawayo. <sup>9</sup> Fiyon foy toowe fo gérotor télakiy Tuluse fénawéti Miguel, énda rénigo noy loowe bé ni. Bé do géyah amun ménléhu i Moisese, méniséédél i ro Miguele bero Satanase fantag bé ati isuwe bero gégedot bé bangkay Moisese. Endob énda fo ménfébaraw i Miguele méngiras bé Satanase. Yamula ménbéréh saén mano, “Kadnan i gémélée beem.” <sup>10</sup> Endob i de ni do tugién do témodo, fengirasé roy éndae gésobuto ro. Ségiléw ro bé de mérayar do binatang non énda i gétya-tiga ro saliyu bé de tete adat ro funa ro ménbinasa. <sup>11</sup> Mékukum ro fo toow, non méniring ro bé adat Kaine, sani sunguwe ménméléhu bé gétaho. Atin méniring ro so bé adat Balaame, sani réménigowe bé békéne katabuwan. Non i de ni do tete témodo, rémigo ro tete inok gégedot ro kurta. Niring ro soy adat Korehe non rénigo noy sébanile bé Tuluse funa ro ménbinasa. <sup>12</sup> Amuk sélimud gom inok mama gom brab méngintulus gom, mamung ro begom. Maak do mékérésik bérétik, non rigone roy tetee do kétaya ro saén atin énda mon mémala ro de. Rigoné ro saén i de karo kétayan. Ségiléw ro bé de rawén énda muwit ro rana, atin faniréy réfuruhe saén. Atin ségiléw ro so bé de kayéw énda mégonok ro ké gai ro damén mégonok. Maak do ménrandutén do kayéw do

mégangu. <sup>13</sup> I de ni do tugién do téromo, ségiléw ro bé de dakél do bagél dob dogote ké wén i défuk, non i de tete do mémala do rigoné ro, maak do mémérésik buro-buro dob rotor i wayége. Ségiléw ro bé de gitoon énda modor ro dob fatute aguwo ro, non tagaké roy towe kétoro. Mélaw ténafay i Tulusey towe fo délémon gono ro mémérésik taman sa taman.

<sup>14</sup> Atin i Enoke, sani géénéme katufuan tidéw dob Adame, nureténi i kékérén i Tuluse sénarigén dob beene fantag bé de ni do étew mano, “Téngténg gom! Gégumah moso i Kadname beroy firoye ngibu do télaki no, <sup>15</sup> inok susiné noy de rénigoy kéléuhanay de étew. Atin kukumé noy de békén méngintulus do étew do ménsala non bé kéléuhanay de tete rénigo ro brab kéléuhanay de tete kékérén ro bénréh ro sébanil bé Tuluse.”

<sup>16</sup> I de ni do tugién do téromo, démoyun ro butédbutéd brab démowoy. Modor ro saén bé de tete kétaya ro. Atin do fébantug-bantug ro brab kémuwéy bé de étew inok mérigo saén i de karo kétayan.

<sup>17</sup> Endob do dumogu, fégétédém gom i bénréh i de apostol i Kadna tome Jesu Kristo begom fantag bé ati mérigowe dob de gai moso. <sup>18</sup> Bénréh ro begom maro, “Amuk gégumahén i tamfaday de gai, wén i do étew démiyangka begom. Been i niy de étew odoro roy de tete kétaya ro sébanil bé Tuluse.” <sup>19</sup> Been i niy de étew émfésébanil begom. Odoro ro saén i de tete kétaya ro. Atin i Rémogor i Tuluse énda batien dob berowe. <sup>20</sup> Endob i de begom do dumogu, fétaus gom i késétabang gome inok méégét i kénur gome bé kétoroe tidéw dob Tuluse. Atin fédaya gom i barakatane Rémogor i Tuluse témabangan begom démasal. <sup>21</sup> Atin fétaus gom i kétanggaf gome bé kégédaw i Tuluse bé lala gome ongot-ongot bé kéirayay Kadna tome Jesu Kristo betom bé umule magufusa sabaf bé kéuray i na nuwe betom.

<sup>22</sup> Atin fatut mégédaw gom bé de étew ruwo-ruwoy fédéw ruwe munur. <sup>23</sup> Tabanga kom i de ségiyo étew inok énda mémukum ro, maak fégayasé kom bero fégawitén tidéw dob aféye. Atin fatut mégédaw gom bé de ségiyo étew. Endob fatut mérarék gom bé de mémérésik do adat ro atin ingat gom inok énda géiring gom bero.

<sup>24</sup> Toow tom fo fésalamat bé Tuluse. Beeney gétabange betom inok énda gésala tom, atin Been soy géuwite betom dob adafa nuwe. Atin bé béo, mémédan i de sala tom brab moror tom bé lala tome gérito bé réndaw ne. <sup>25</sup> Dayewé tom fo toow i Tuluse fénagéw dob Kadna tome Jesu Kristo. Tulusey mémukase betom dob de sala tom. Beeney barakatane méguléw atin kaan i kéléuhanay aturane tidéw féganay taman sa taman. Amen.

*Judas*

## I Kéfégétiga Jesu Kristowe bé Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob de fitew timan simbaan dob dakéle ingéd Asia. Dob ni sulat, nuret Juaney fantage bé ati fenténgténg i Tuluse dob beene dob téginéfe. Binuwaya i kédoonoy ni sulat atin fantag so bé ati mérigowe moso. Fénggétigay Tuluse bé Juane bé tabanay Tulusey Satanase moso atin rigoné noy mantuve duniya brab laway gonoy de munur bé Kristowe bati sétifon bé Tuluse.

<sup>1</sup> Been i niy librowe fantag bé kéfégétiga Jesu Kristowe. I Tuluse sénarigén dob Beeney ni inok fégétiga no dob de sugu-suguéy Tuluse ké atiy mérigowe énda mérugayén tidew béni. Fénggétiga Kristowey ni bé késugu ne bé de télaki no mangéy dob begéne, sani sugu-sugué nuwe féndawét Juan. <sup>2</sup> Atin i begéne, sulaté kuy kéluhanay de énggito gu. Mélaw i ni libro, been i niy kékéréh i Tuluse brab toowe kétoro Jesu Kristowe. <sup>3</sup> Toow fo moror i étewe masa bé ni libro, atin moror soy de mégélingo bé ni uret tidew dob Tuluse atin modor bé ni kékéréh. Non éndaén mérugayén métuman i ni uret.

<sup>4-5</sup> Begéney Juane, atin sulaté ku dob begomey de fitew lumfuk do munur dob de fitew timan ingéd dob sakuf i dakéle ingéd féndawét Asia.

I Tuluse brab Rémogor ne brab Jesu Kristowe, mégédaw ro damén begom atin irayén damén begom i métanéke fédew. I Tuluse, ménwénén tidew féganay, atin wén so béléewe ni, atin énda mékédano taman sa taman. Atin i Rémogor i Tuluse bati dob adafay Tuluse atin wén i fitew fiman barakatén. Atin i Jesu Kristowe, mésarigon i kékéréh ne. Beeney Nga i Tuluse loo soy sunguwe mémentebule inok méuyag taman sa taman. Been soy méguléw bé kéluhanay de méguléw dob duniyae ni.

Mégédaw foy Jesuse betom. Atin fénukasén betom dob de sala tom bé kéléhu ne dob kruse. <sup>6</sup> Atin fénwaléyén betom do fadi, atin Been i méguléwe betom. Rigoné tom i galbék i fadie méngadaf bé Abay ne Tulus. Mégédaw damén i Jesu Kristowe atin méguléw damén taman sa taman. Amen!

<sup>7</sup> Séfule moso i Jesu Kristowe giton gégumah dob de rawén. Atin gitoy kéluhanay de kéilawan, fiyon i de étew ménméléhu de bé do gétah. Atin i kéluhanay de étew dob duniyae ni, kémérew ro sabaf bé Beene. Mérigo damén. Amen.

<sup>8</sup> I toowe fo barakatan Kadnan Tulus, wénén tidew féganay, atin wén so béléewe ni, atin énda mékédano taman sa taman. Bénréh i Tuluse mano, “I Begéne Alfa brab Omega, sani féganayane brab tamanane.”

<sup>9</sup> Begéney Juane, sani ségétéwe dumo gom munur bé Jesu Kristowe. Téméningskélú bé kékérasaye begén ségiléw bé kéluhanay de étew féguléwo Jesu Kristowe. I Begéne, sabaf bé kéuret guwe bé kékéréh i Tuluse brab kétoro guwe bé kéuret Jesuse, fén-angéyén begén fénbatí maak fériusu dob ni bungéd féndawét Patmos. <sup>10</sup> Wén i no sébaan gai kékéngadaf bé Kadnane, fénémanduoy Rémogor i Tuluse begén. Atin énggelingoo kuy métanuge béréh maak témburi tidew dob ségang guwe. <sup>11</sup> Ménbéréh mano, “Sulatém i énggito muwe, atin féuwitém mangéy dob de ni do fitew lumfuk do munur Begén do bati dob Efeso, Esmirna, Pergamo, Tiatira, Sardis, Filadelfia, brab Laodisia.”

<sup>12</sup> Tidew béo mémentekélidu inok téngténgé kuy ni émbéréh dob begéne. Atin énggito guy fitewe timan bélowan solo. <sup>13</sup> Atin wén i ségétéwe téménindég dob kérara i de fitew ni timan solo. I falas ne maak kélawané. Métaah i kégal ne taman dob de sékéyén. Atin lénégétén i bélowané dob kuméng ne. <sup>14</sup> Toow fo fute i buk ne maak fute safut, atin i de moto no maak rino aféy. <sup>15</sup> Atin i de sékéyén sémelinang maak galang métunag dob aféye. Atin i béréh ne maak érok samfaw. <sup>16</sup> Atin wén i fitew timan gitoon génamak i kuwonone kémérén. Atin wén i sundang mésut dob ba ne maak dila. Atin

i ni sundang, murém i de baén sébala-bala. Atin toow fo géfékaya i rangih ne maak térésang ké géutuh. <sup>17</sup> Amun énggito guy ni étew, méntéléngkébu dob adafa nuwe maak ménléhuun. Endob nahayén i kuwonone kémérén dob begéne atin ménbérél mano, “Kago mégilak. Begéney féganayane brab tamanane. <sup>18</sup> Begéney méuyage. Ménléhui, éndob méntébuleu, atin méuyagu taman sa taman. Wén i atura ku méguléw bé kéléhue brab gonoy de ménléhu. <sup>19</sup> Mélaw sulatém i de énggito mo, sani de mérigo béléewe ni brab de mérigo moso. <sup>20</sup> Béréhé ku beem i atag i de fitéw timan gitoo gito mo dob kuwonone kémér gu brab atag i de fitéw timan do bélodon solo. I de fitéw timan do gitoo, beroy de maak télaki bantaya roy de fitéw lumfuk do munur. Atin i de fitéw timan do solo, beroy de maak do fitéw lumfuk do munur.”

## 2

*Efeso*

<sup>1</sup> Atin féntaus Kristowey kékérél ne mano, “Sulatém dob télakiy Tuluse démiyaga bé de munur bati dob ingéde Efeso mamo, ‘Ay niy kékérél Jesuse. Begéney gémamake bé de fitéw timan gitoo dob kuwonone kémér gu brab magéwe dob kérara i de fitéw timan bélodon solo. <sup>2</sup> Gétiga kuy de rigoné kom, atin gétiga ku mégéror gom gémalbék brab gétiga kuy ketingkél gome. Atin gétiga ku so mika gom sélawék bé de tete étew. Atin téningkad gom i de étew béréhé ro do apostol ro kun funa kom énggétigan bé békén ro do tintu apostol. Atin gétiga kom tugién i kétoro ruwe. <sup>3</sup> Atin gétiga ku so témingkél gom bé kékérasay i de étew begom sabaf bé kéunur gome Begén. Atin fiyon fo ké mérerasay gom, énda mékédan i kéunur gome. <sup>4</sup> Gido loo, wén i téboé ku begom. Béléewe ni, éndaén féimué kom Begén loo bé do gétah. <sup>5</sup> Fégétédém gom i sunguwe kéimu gom Begén. Fatut gésénule gom brab tagak gom i de sala gom atin rigo gom fiyo loo bé do gétah. Non amuk énda rigoné kom i ni, mangéyu dob begome brab kédané kuy soloe tidéw dob gono nuwe. <sup>6</sup> Endob wén soy fiyo rénigo gom kétaya ku. Non ménkérít gom bé de tete rigoné de Nikolaita ségiléw bé kékérító kuwe bero.

<sup>7</sup> “Kéluhana kom, fégélingo gom i kékérél i Rémogor i Tuluse dob begome do munur.

“I de étew gétabana roy Satanase, iraya ku bero kuwagib mama bé onok i kayéwe miray bé umule magufusa, sani kayéwe dob bélodon fantad i Tuluse.”

*Esmirna*

<sup>8</sup> Atin féntaus Kristowey kékérél ne mano, “Sulatém dob télakiwe démiyaga bé de munur bati dob ingéde Esmirna mamo, ‘Ay niy kékérél guwe. Begéney féganayane brab tamanane. Ménléhui éndob méntébuleu. <sup>9</sup> Gétiga ku kérégénan gom. Gétiga ku méskinan gom. Gido loo, kawasa gom dob lawayo. Gétiga kuy de tete kékérél fantag bé begome bénréh i de étew béréhé ro do Judio ro. Endob békén ro do tintu Judio, yamula do étew Satanase ro. <sup>10</sup> Kagom mégilak bé kékérasaye begom énda mérugayén tidéw béní. I Satanase, téngkadé no begom bé kékérerisu nuwe bé de dumo gom. Atin kérégénan gom bé foloe gétérésangan. Endob fatut fédayday gom bé kéunur gome Begén, fiyon fo ké féléhué ro begom. Atin iraya ku mélaw begom lakay, sani umule magufusa.

<sup>11</sup> “I kékérana kome, fatut fégélingo gom i kékérél i Rémogor i Tuluse begom do munur.

“I de étew gétabana roy Satanase, énda mékukum ro bé géruwowe kéléhu.”

*Pergamo*

<sup>12</sup> Atin féntaus Kristowey kékérél ne mano, “Sulatém dob télakiwe démiyaga bé de munur bati dob Pergamo mamo, ‘Ay niy kékérél guwe, sani wéne sundangén murém i de baén sébala-bala. <sup>13</sup> Gétiga kuy Satanase i méguléwe bé ingéd gome, gido loo ménfédayday gom munur dob Begéne. Atin énda téragak gom i kéunur gome fiyon fo ké fénléhu roy Antipase sani mésarigone muret fantag bé Begéne. Fénléhu ro diyaan dob ingéde féngguléwo Satanase. <sup>14</sup> Gido loo, wén i de téboé ku begom. Non wén i do dumo begom modor bé kétoro Balaame bé do getah. Non i Balaame, ténorón i Balake émfésala bé de Judio bé kékéama ne bero bé amaéne téulak dob de kéninontow. Brab ténorón

bero bigaén. <sup>15</sup> Atin loo so bé ni, wén i do dumo begom modor bé kétoro i de Nikolaita. <sup>16</sup> Fatut gésénule gom brab tagak gom i de sala gom. Amuk énda, mangéyu dob begome énda mérugayén tidéw béní brab tibohé ku begom bé sundange mésut dob ba guwe maak dila.

<sup>17</sup> “I kéluhana kome, fatut fégélingo gom i kékérén i Rémogor i Tuluse dob de munur.

“Dob de étew gétabana roy Satanase, iray gu beroy amaéne féndawét mana nitong dob lawayo diyo. Atin iraya ku soy séngae ségétew bero bé futee batéw. Atin dob séngae sébaan batéw wén i ménsulate de mantu dawét énda i géglolo de saliyu bé étéwe géglodot bé ni batéw. Bero saén i de géglolo de.”

### Tiatira

<sup>18</sup> Atin féntaus Kristowey kékérén ne mano, “Sulatém dob télikiy Tuluse démiyaga bé de munur bati dob Tiatira mamo, ‘Ay niy kékérén guwe, sani Nga i Tuluse. Mérino i de moto gu maak aféy atin sémelinang i de sékéy gu maak galang métunag dob aféye.

<sup>19</sup> Gétiga kuy de rigoné kom, brab kégédaw gome, brab kéunur gome, brab de galbék gom, brab de ketingkél gom. Atin gétinga ku so toow na fo fiyoy de rigoné kom béléewe ni bé do gétah. <sup>20</sup> Gido loo, wén i téboé ku begom. Wén i libune féndawét Jesebel, sani ménbéréhe been kun i sarigoy Tuluse muret. Atin féndaya gom i ni libun témore bérigae dob de kuyug gu brab fénamaén bero bé de amaén ténlak dob adafay de kéninontow.

<sup>21</sup> Téningkélo ku, brab niraya ku gai inok gésénule brab tagaké noy ni tete rigoné no. Endob mika fo témagak bé de ni do tete rigoné no. <sup>22</sup> Mélaw fédéruuné ku inok énda géétekén tidéw dob iroo nuwe, loo soy de dumo no ménsébiga. Rigoné kuy ni béléewe ni, amuk énda tagaké roy de tete rigoné ro. <sup>23</sup> Atin féléhué ku soy de kuyugén. Tidéw bénó, i de munur dob kéluhanay de ingéd, gétinga ro mélaw i Begéne, gétinga kuy kékégitung i kéluhanay de étew brab de kétaya ro. Atin iray gu moso i fatute dob séngae ségétew étew sabaf bé de rigoné no.

<sup>24</sup> “Endob médooy gom dob Tiatira, énda ménodor gom bé ni tete kétoro. Atin énda gétinga kom i de féndawét do ménalém kétoro Satanase. Atin mélaw énda umana kuy kékérégéna kome. <sup>25</sup> Endob fatut féégét gom i kéunur gome taman séfuleu. <sup>26</sup> Atin dob de étew gétabana roy Satanase atin modor ro bé kétaya kuwe taman dob tamanane, iray gu beroy aturane méguléw bé de ingéd dob duniiae ni. <sup>27</sup> Iray guy ni aturan non i Abay guwe Tulus nirayén so dob Begéne. Atin émbagér i kékégléw ruwe, atin énda i géatuh bero. <sup>28</sup> Atin iray gu so dob berowey solo mubode.

<sup>29</sup> “I kéluhana kome fatut fégélingo gom i kékérén i Rémogor i Tuluse dob de munur.”

### 3

### Sardis

<sup>1</sup> Atin féntaus Kristowey kékérén ne mano, “Sulatém dob télikie démiyaga bé de munur bati dob Sardis mamo, ‘Ay niy kékérén guwe, sani gémamake bé Rémogor i Tuluse wén i fitew timan barakatén brab do fitew timan gitoon. Gétiga kuy de rigoné kom. Atin gétinga ku so médooy étewé émbérén bé wén kun i umul gom magufusa. Endob énda toowén, non énda gitono dob de rigoné kom. <sup>2</sup> Mélaw, tékénal gom! Atin fébagér gom i kéunur gome, non amuk énda, mécédan. Non gétinga ku kulang sénay adat gome funay Tulus guwe énda mésuwatén. <sup>3</sup> Fégétédém gom i ténoroe nén begom brab nunuro kome nén bé do gétah. Odor gom de brab fatut gésénule gom atin tagak gom i de sala gom. Non amuk énda gésénule gom, mangéyu dob begome bé gaiwe énda karangé kom de, loo bé kégumah i ménakawe. <sup>4</sup> Endob wén soy do dumo begom dob Sardis, énda dénungiso roy de kégal ro, sani de énda ménamung dob de tete adat. Mélaw géodor gom Begén kémégal fute non médait gom de. <sup>5</sup> I kéluhanay de gétaban bé Satanase, fékégalé ku bero fute loo bé ni, atin énda kédané kuy de dawét ro tidéw dob librowe sénulata ku bé de dawét i de étew géglodot bé umule magufusa. Atin béréhé ku dob téngaangay Abay guwe Tulus brab de télikie no, bé beroy de kuyug gu.

<sup>6</sup> “ ‘Kéluhana kom, fatut fégélingo gom i kékérén i Rémogor i Tuluse dob de munur.’ ”

### *Filadelfia*

<sup>7</sup> Atin féntaus Kristowey kékérén ne mano, “Sulatém dob télakiwe démiyaga bé de munur bati dob Filadelfia mamo, ‘Ay niy kékérén guwe, sani mékétéfuwe brab toowe. Wén i atura ku méguléw loo bé kékéulgéw Datu Dabide bé do gétah. Atin amuk féahuré kuy ségétéwe étew dob kékéulgéw guwe, énda i gélang de. Atin amuk énda féahuré kuy ségétéwe étew, énda i géféahur de. <sup>8</sup> Gétiga kuy de rigoné kom. Atin fiyon fo ké énda médo gom, ménfédayday gom munur Begén brab ménodor gom bé kétoro guwe. Mélaw ungkaé kuy bengawane fingé dob begome inok géahur gom, atin énda i géfintu de. <sup>9</sup> I de étew do émbérén do Judio ro kun, tugién ro non beroy de kuyug Satanas. Félingkuwédé ku bero dob adafa kome, atin gétiga ro mélaw mégédawu begom. <sup>10</sup> Sabaf témeningkél gom loo bé sénugu guwe, diyagané ku begom inok énda gésugsug gom dob de mérégén do gai géumah moso dob duniyae ni fégétingkad bé kékuanay kékuanay. <sup>11</sup> Sefuleu énda mérugayén tidew béni. Lékafit gom dob toowe kétoro unuro kom inok énda métadin i barase iray gu begom. <sup>12</sup> I de étew gétaban bé Satanase, féwaléyé ku bero do maak liléy i lawi i Tuluse atin éndaén tagaké ro de. Atin sulaté ku dob berowey dawéti Tuluse guwe, brab dawéti ingéd i Tuluse, sani mantuwe ingéd féndawéti Jerusalem mélus moso tidew dob Tuluso dob lawayo. Atin sulaté ku so dob berowey mantuwe dawéti gu.

<sup>13</sup> “ ‘I kékuanay kome, fatut fégélingo gom i kékérén i Rémogor i Tuluse dob de munur.’ ”

### *Laodisea*

<sup>14</sup> Atin féntaus Kristowey kékérén ne mano, “Sulatém dob télakiwe démiyaga bé de munur bati dob Laodisea mamo, ‘Ay niy kékérén guwe, sani fénawéte “Amen” non toow i kékret guwe funay de étew gésarig. I Tuluse fénlimbagén Begén i kékuananay. <sup>15</sup> Gétiga kuy de rigoné kom. Enda mon méduf gom brab énda mon mélégénéy gom, sani de békén kuyug gu taloo no sébanil Begén. Endob toow fo damén méuyotu de ké méduf gom taloo no mélégénéy gom. <sup>16</sup> Atin sabaf bé énda mon méduf gom taloo no mélégénéy gom, duraé ku begom tidew dob ba guwe. <sup>17</sup> Béréhé kom makom, “Kawasa gey, wén gey bé kékuanay kailanga keye.” Endob i toowe, mékégédaw-gédaw gom, éndob énda gétiga kom de. Non sabaf bé kékulang i kékunur gome, maak do méskinan gom brab do félawas brab do langafén. <sup>18</sup> Mélaw féginauné ku begom, béléy gom bé fiyowe bélowan, sani tintuwe kékunur dob Begéne, inok waléy gom kawasa. Atin béléy gom so bé futee kégal sani métintuwe rigonén inok éndaén maak félawas gom mémala. Atin béléy gom so bé uwa motowe inok gérito gom. <sup>19</sup> I de étew kégédawa ku, géléé ku brab fifté ku bero ké mésala ro. Mélaw fatut gésénule gom atin tagak gom i de sala gom. <sup>20</sup> Fégélingo gom, diyou dob bengaway lawi gome témauwag. Amuk wén i gégléingo bé béréhé guwe atin ungkaé noy fintue inok géahuru, mahuru atin sérénganu de mama. <sup>21</sup> Dob de étew gétabana roy Satanase, iray gu beroy kuwagibé mésar dob sékulo kuwe amuk mésaru néni méguléw, ségiléw bé kétaba kuwe brab késar guwe dob sékuloy Abay guwe Tulus bé lala ne méguléw.

<sup>22</sup> “ ‘I kékuanay kome, fatut fégélingo gom i kékérén i Rémogor i Tuluse dob de munur.’ ” Been i niy bénréh Kristowey.

## 4

<sup>1</sup> Tidew bénou, wén man i fénggitoy Kadnane begén. Atin énggito guy fintue ménungka dob lawayo. Atin ménbérén man i étewe ménbérén dob begéne bé gétahé de. Atin ménbérén man maak béréhé témburi mano, “Enggon, nik go angéy dini, atin fégito gu beem i kailangane mérigo moso.” <sup>2</sup> Sonom bénou, fénagéw i Rémogor i Tuluse begén mangéy diyo. Atin diyo dob lawayo, wén i saray datue. Atin wén i étew de ménasar diyo.

<sup>3</sup> Sémelinang i rangih ne loo bé de balilaga do batéw fénawéti haspe brab kornalina. Atin wén i mélunéwe béluntu loo bé falas i balilagae batéw fénawéti esmeralda géliwet dob sarane ni. <sup>4</sup> Atin wén soy ruwo folo bra fot sara datu géliwet bé ni saran. Atin

diyo ménsar i ruwowe folo bra fot do lukés odoron. Kéménégal ro fute brab wén soy do bélwon do lakay diyo dob de uléw ro.<sup>5</sup> Atin tidew dob sarane dob kérarae, mésut i kilote brab déguwe brab létee. Atin diyo dob adafay sarane ni, wén i do fitew timan mérino solo. Beroy de fitew rémogor i Tuluse.<sup>6</sup> Dob adafay sarane ni, wén i maake dogot maak féngalungon non toow fo métiyéw.

Atin wén i fot gétew barakatan étew géliwét bé sarane ni. Atin ménféno motoy de lowoh ro dob de saréwo ro brab dob de ségang ro.<sup>7</sup> I sunguwe de loo bé falas i binatange féndawét leon. Atin i géruwowe de maak falas i tuduwe safi. Atin i gétéléw ruwe maak falas i lagéye kélawan i uléw ne, atin i géefot ruwe maak falas banug lémayang.<sup>8</sup> I séngae ségétew bé de ni fot gétew étew barakatan, wén i do ném timan dofafak ro, atin i de lowoh ro ménféno do moto fiyon i fantad i defafak ro. Atin fuweh na kélungonon, énda témérén ro kémanta maro, “Mékétéfu, mémétefu, mémétefuy barakatane Kadnan Tulus. Wénén i Tulus tidew féganay, wén so béleewe, atin énda so mémédano taman sa taman.”

<sup>9</sup> Atin i de ni do fot gétew do barakatan étew, kémanta ro dayewé ro brab bantugé ro brab fésalamat ro bé ménsare dob sarané ni, sani Tuluse méuyag taman sa taman. I lala ruwe rémigo bé ni,<sup>10</sup> i de ruwo folo bra fot gétew do lukés odoron mémédunsum ro dob adafay Tuluse, féngadafé roy Tuluse méuyag taman sa taman. Atin fédiyoé roy de lakay ro dob adafay saray Tuluse ni, atin émbéréh ro maro,<sup>11</sup> “Kadna key Tulus, Beem i médaite dayewén brab bantugén. Atin Beem i médaite mémélew brab bantugén. Non Beem i léménimbage bé kéluhanane, atin ménwén i kéluhanane béleewe ni sabaf saén bé kétaya muwe.”

## 5

<sup>1</sup> Tidew man béno, énggito guy déniline sulat dob kuwonone kémér i ménsare dob saray Tuluse ni. Atin mémérebé bél sulfate sébala-bala. Atin wén i fitew timan tandaén inok énda i géungka de.<sup>2</sup> Tidew béno, énggito guy barakatane téaki. Atin mémétanug fo toow i kékéréh ne mano, “Ati médaite kémédan bé de ni do tanda atin ungkaé noy ni sulat inok basané no?”<sup>3</sup> Endob énda i ségétew étew médait géungka de taloo no gétengténg dob bukag ne, fiyon dob lawayo diyo taloo no dob fantade ni taloo no dob fantad i fantade.<sup>4</sup> Atin kéménrewu fo toow non énda i ségétew étew giton géungka bé ni sulat taloo no gétengténg dob bukag ne.<sup>5</sup> Tidew béno, i ségétewé bél de lukés odoron ménbéréh dob begéne mano, “Kago kémérew. Téngténgém. I Jesuse, sani fédawéténé ‘leon’ séfu Judah, séfu Datu Dabid so. Beeney téménabanane bél Satanase atin wén mélaw i kuwagibén kémédan bél de fitew tanda atin ungkaé noy ni sulat.”

<sup>6</sup> Tidew béno, énggito guy Natiwe Bili-bili téménindég dob kérara i saray Tuluse ni. Atin sénliwétoy fote gétew étew barakatan brab do lukés odoron. Atin i Natiwe ni Bili-bili, énggito guy de falién féngélehén bél do gétah. Atin wén i fitewé sidungén brab fitew timan moto no, sani fitewé rémogor i Tuluse fénuitén dob kéluhanay de ingéd dob duniiae ni.<sup>7</sup> Atin i Natiwe ni Bili-bili, ménangéy fégédét brab éndotén i sulfate ni dob kuwonone kémér i ménsare dob sarane ni.<sup>8</sup> Bé lala ne rémigo bél ni, i de fot ni gétew do barakatan étew brab de ruwo folo bra fot gétew do lukés odoron, mémédunsum ro dob adafay Natiwe ni Bili-bili. Atin i séngae ségétew bero, wén i génamakén baatén féndawét alpa, brab génamakén soy bélwone biléw ménféno dukah, sani kédasal i de étew i Tuluse.<sup>9</sup> Atin kéménanta ro mantu kanta maro, “Beem i médaite médot bél sulfate ni atin médait go kémédan bél de tanda. Non fénléhén Beem, atin daraém i fégébeléye bél de étew inok méfukas ro atin géséfule ro mangéy dob Tuluse tidew dob séngae tribu, dob séngae késébéréh, brab dob séngae kélasi étew, brab dob séngae ingéd.<sup>10</sup> Féngadafé mo bero brab fénwaléyém bero do fadi inok féngadafé roy Tulus geye. Atin fémélewé mo bero moso dob duniiae ni.”

<sup>11</sup> Tidew béno, téméngténg gu man ségule atin énggelingoo kuy bérérh i de laksáen do téaki. Téménindég ro géliwét bél sarane ni brab de fot gétew do barakatan étew brab de lukés odoron.<sup>12</sup> Atin kéménanta ro toow fo métanug maro, “I Natiwe Bili-bili fénléhén

médait fo dayéwén brab bantugén. Atin toow fo barakatan, brab toow fo gétigan, brab toow fo kawasa, brab toow fo émbagér.”<sup>13</sup> Atin énggelingoo kuy kantay kéluhanay de étew dob lawayo brab dob fantade brab dob fantad i fantade brab dob dogote, brab kéluhanay de étew dob kéluhanay de gonon. Kémanta ro maro, “I Beene mésar dob saray Tuluse ni brab i Natiwe ni Bili-bili, médayéw ro damén brab émbantug ro fo toow taman sa taman. Atin méguléw ro so taman sa taman.”<sup>14</sup> Atin bang i de fot ni gétew do barakatan étew, “Amen!” Atin i de lukés odoron méntédunsum ro méngintulus.

## 6

*I de tanda*

<sup>1</sup> Tidéw béno, énggito guy Natiwe Bili-bili kédané noy sunguwe bé de fitéw timan do tanda. Atin énggelingoo kuy ségétéwe bé de fot gétew do barakatan étew ménbéréh maak léte mano, “Enggon!”<sup>2</sup> Atin amun ténéngténg gu, énggito guy futee kuda. Atin i étewe de kéménuda, géménamak bohor. Atin wén i ménirayan de lakay. Atin ménagéw ménangéy sétiboh inok tabané noy de kélawan.

<sup>3</sup> Tidéw béno, kénday Natiwe Bili-biliy géruwowe bé de tanda dob sulate ni. Atin énggelingoo kuy béréh i géruwowe bé de barakatan do étew mano, “Enggon!”<sup>4</sup> Tidéw béno, ménsut i furowe kuda. Atin i étewe de kéménuda, nirayan kuwagib méganay bé késégirawe dob duniyae ni inok sétiboh i de étew brab séféléhu ro. Atin niray de soy dakéle sundang.

<sup>5</sup> Tidéw béno, kénday Natiwe Bili-biliy gétéléwe bé de tanda dob sulate ni. Atin énggelingoo kuy gétéléwe bé de barakatan do étew mano, “Enggon!” Atin amun ténéngténg gu, énggito guy mitame kuda. Atin i étewe de kéménuda, géménamak timbangan.<sup>6</sup> Atin wén i énggelingoo ku maak béréh étew tidéw dob kérara i de fot ni barakatan do étew mano, “Gétéléw saén baad bé ségantange arinah i mébéléye bé ségétérésangane sahud, atin ségantang faréy féndawét ‘barley’ saén i mébéléye bé ségétérésangane sahud. Atin kagom singgulaén i nore taloo no arak.”

<sup>7</sup> Tidéw béno, i Natiwe Bili-bili kénda noy géfote tanda tidéw dob sulate ni. Atin énggelingoo kuy géfote barakatan étew mano, “Enggon!”<sup>8</sup> Atin amun ténéngténg gu, énggito guy mérégunire kuda. Atin i dawét i étewe de kéménuda “Kéléhu”. Atin wén soy ségétéwe étew énggétundug de féndawét “Emferno”. Niray beroy aturane méméléhu bé géfote baad bé de kélawan dob duniyae ni. Féléhué ro bero dob késégirawe brab dob léngobe brab dob déruune brab dob de mérayar binatang.

<sup>9</sup> Tidéw béno, i Natiwe Bili-bili kénda noy gélimowe bé de tanda tidéw dob sulate ni. Atin énggito guy de rémogor i de étew fénléhuén sabaf bé kéunur ruwe bé kékéréh i Tuluse brab kéuret ruwe fantag bé ni. Diyo ro dob fantad i ahayane tulakan.<sup>10</sup> Ménkes ro métanug maro, “Barakatan Kadnan, i Beeme mékétéfu go brab toow i kékéréh me. Kédiron nay kékukum me sémuli dob de tete étew dob duniyae ni sabaf bé kékéléhu ruwe begey?”<sup>11</sup> Atin i séngae ségétew bero nirayan fute kégal. Atin wén i ménbéréhe dob berowe bé fatut témérén ro na singkow saén taman féléhuén nay kéluhanay de dumo ro do sugu-suguéy Tuluse kailangan féléhuén so loo bé berowe.

<sup>12</sup> Atin énggito guy Natiwe Bili-bili kédané noy généme bé de tanda. Tidéw béno, wén i toow fo ménbagér luba, atin i térsange ménwaléy mitam maak mitam safut. Atin i térsang kélungonone ménwaléy furo maak dara.<sup>13</sup> Atin i de gitoon ménlawu tidéw dob lawayo mangéy dob fantade maak do mata onok kayéw ménlawu bé kégérumfak i émbagére de réfuruh.<sup>14</sup> Atin i lawaye ménalfa maak sulat méndilin. Atin i kéluhanay de tuduk brab de bungéd méntéfegalín ro tidéw dob de gono ro.<sup>15</sup> Tidéw béno, i de datu dob duniyae ni, brab de méguléw, brab de odoroy de sundalo, brab de kawasa, brab de mégatur, brab kéluhanay de étew fiyon fo ké do rifén taloo no do békén rifén, ménrékunéy ro dob de takub brab dob fantad i de batéw dob de tuduk.<sup>16</sup> Atin ménkes ro dob de tuduk brab dob de batéw maro, “Tamfurén gey inok énda gitoy étewe ménas

dob saray datus dob lawayo begey atin inok énda gégumah dob begeyey kékérit i Natiwe Bili-bili. <sup>17</sup> Non énggumahén i gaiwe kémukum ro, atin énda i géatuh bero.”

## 7

<sup>1</sup> Tidéw béno, énggito guy fote télaki téménindég dob fote sugud i duniyae ni. Atin nalang roy fote réfuruh dob duniyae ni inok énda géiyuf ro dob fantade taloo no dob dogote taloo no dob de kayéw. <sup>2</sup> Atin énggito guy ségiyowe télaki énggumah tidéw sébangan nuvitén i tanda i méuyage Tulus. Atin ténavagén métanug i de fot ni télaki sénarigoy Tuluse minasa bé fantade brab dogote. <sup>3</sup> Ménbérélh i ni télaki dob de dumo no télaki mano, “Kagom binasanén i fantade brab dogote brab de kayéw taman énda gétandaa tom i de rangih i de sugu-suguéy Tuluse.” <sup>4</sup> Atin énggéléingoo kuy kédooy de méntandaan, mératuh bra fot folo bra fot ngibu gétew. Atin falan ro tidéw dob kéluhanay triboy de Judio. <sup>5</sup> Atin folo bra ruwo ngibuy méntandaane tidéw dob de séfu Judah. Atin folo bra ruwo ngibuy tidéwe de dob de séfu Ruben. Atin folo bra ruwo ngibuy tidéwe de dob de séfu Gad. <sup>6</sup> Atin folo bra ruwo ngibuy tidéwe de dob de séfu Aser. Atin folo bra ruwo ngibuy tidéwe de dob de séfu Naftali. Atin folo bra ruwo ngibuy tidéwe de dob de séfu Manase. <sup>7</sup> Atin folo bra ruwo ngibuy tidéwe de dob de séfu Simeon. Atin folo bra ruwo ngibuy tidéwe de dob de séfu Lebi. Atin folo bra ruwo ngibuy tidéwe de dob de séfu Isakar. <sup>8</sup> Atin folo bra ruwo ngibuy tidéwe de dob de séfu Sabulon. Atin folo bra ruwo ngibuy tidéwe de dob de séfu Jose. Atin folo bra ruwo ngibuy tidéwe de dob de séfu Benjamen.

<sup>9</sup> Tidéw béno, énggito guy toowe fo dakél ménlimud do étew. Enda gébilangan ro non toow ro fo médo. Tidéw ro dob kéluhanay de séségiyo-giyo gékélasi do étew, brab do tribo, brab do ingéd, brab do késbérélh. Atin téménindég ro dob adafay saray Tuluse ni brab dob adafay Natiwe ni Bili-bili. Atin kéménégal ro fute brab géménamak ro do dau bongo. <sup>10</sup> Atin ménbérélh ro métanug maro, “Dayéwé tom i Tulus tome ménsar dob sara nuwe, brab dayéwé tom i Natiwe ni Bili-bili non fukasé ro betom dob de sala tom.” <sup>11</sup> Atin i kéluhanay de télaki téménindég ro lémiwét bé saray Tuluse brab de lukés odoron brab de fot gétew do barakatan étew. Tidéw béno, méntéunsum ro dob adafay sarane ménadaf bé Tuluse. <sup>12</sup> Ménbérélh ro maro, “Hoo, féngadafé tom i Tuluse non médaït dayéwén brab bantugén brab basanan brab fésalamatan. Beeney tintuwe gétigan brab barakatan, brab Beeney méguléwe. Médayéw damén taman sa taman. Amen!”

<sup>13</sup> Tidéw béno, i ségetéwe bé de lukés odoron fénénginsaa no begén mano, “Ati de ni do étew kéménégal fute, ati tidéwo ruwe de?”

<sup>14</sup> Atin séménumbulu maku, “Idih. Endob i beeme, gétiga mo.”

Atin ménbérélh mano, “Beroy de étew tidéw dob dakéle kérégénon dob duniyae. Ténumak roy de kégal ro dob dara i Natiwe Bili-bili inok fute, sani kémédane bé de sala ro. <sup>15</sup> Been i niy funa ruwe téménindég dob adafay saray Tuluse brab diyo ro dob lawi i Tuluse fuweh na kélungonon rémigo bé kétayay Tuluse. Atin i Tuluse, sani ménsare dob sara nuwe, diyagané no bero, non diyo dob berowe. <sup>16</sup> Atin éndaén mélayah ro taloo no térumén ro. Atin éndaén kéédufan ro bé téresange taloo no do ségiyo na médu. <sup>17</sup> Non i Natiwe Bili-bili dob kérara i saray Tuluse, Beeney maake mantayan bero brab magifat bero. Atin fanangguwité no bero dob de séfut i wayége miray bé umule magufusa. Atin kédanéy Tulusey de kétete i de fédew ro inok éndaén kémérew ro.”

## 8

<sup>1</sup> Atin amun kénday Natiwe Bili-bili géfitéwe bé de tanda tidéw dob sulate ni métanék fo toow i lawayo bé rugay i ségréfae uras. <sup>2</sup> Tidéw béno, énggito guy de fitew gétew télaki, sani de démoyun témindég dob adafay Tuluse. Atin wén i ménirayan bero fitew timan témburi.

<sup>3</sup> Atin wén man i ségiyowe télaki énggumah ménuit bélowan fédégon dukah. Atin ménangéy dob ahayane tulakan brab téménindég dob sékulo nuwe. Atin niray dob beeney médoowe dukah inok sélawéké no bé de kédasal i de munur. Atin tulaké no diyo

dob bélowan tulakan dob adafay saray Tuluse. <sup>4</sup> Atin i bél i dukahe ni ménsélawék bé kédasal i de munur, ménangéy rotor tidéw dob fégone de génamak i télakiwe ni téménindég dob adafay Tuluse. <sup>5</sup> Tidéw béno, i télakiwe ni, éndotén i fégone bé dukahe atin fénénoén bé barawe tidéw dob ahayane tulakan, atin nibérén dob duniyae. Atin léménéte brab déménégu brab kéménilot brab léménuba.

### *I de fitéw témburi*

<sup>6</sup> Tidéw béno, i de fitéw ni gétew témburi do wén i do témburi ro, téménafay ron inok iyufé roy de témburi ro.

<sup>7</sup> Atin amun iyuféy sanguwe télakiy témburi nuwe, réménana yelo brab aféy mén-sélawék bé darae. Atin i gétéléwe baad bé duniyae méntuwég, loo soy gétéléwe baad bé de kayéw, loo soy kéluhanay de mélunéw do kéroon.

<sup>8</sup> Tidéw béno, niyuf i géruwowe télakiy kaane témburi. Atin ménlawu dob dogotey maake dakél tuduk ménrino bé aféye. Atin waléy dara i gétéléwe baad bé dogote. <sup>9</sup> Atin i gétéléwe baad bé de sédo brab do binatang dob dogote ménléhu ro. Atin ménbinasa soy gétéléwe baad bé de barko.

<sup>10</sup> Tidéw béno, niyuf i gétéléwe télakiy kaane témburi. Atin i dakéle gitoon ménrino maak félatut ménlawu tidéw dob lawayo mangéy dob gétéléwe baad i fulangiwe brab de séfut. <sup>11</sup> I dawét i ni gitoon, “Féla”. Atin i gétéléwe baad bé de wayéy ménwaléy féla. Atin médooy de étew ménléhu non énggéném ro bé ni wayéy féla.

<sup>12</sup> Tidéw béno, niyuf i géfote télakiy kaane témburi. Atin télew baad bé térésange brab térésang kélungonone brab de gitoon i ménbinasawe de. Mélaw télew baad i ménkédane bé kégéfkaya ruwe. Atin déménlémon i gétéléwe baad bé fuwehe loo soy kélungone de.

<sup>13</sup> Tidéw béno, bé lala guwe de séna téméngténg, énggelingoo kuy métanuge béréh i banuge lémayang dob kérara fuwehe mano, “Toow fo mékégédaw-gédaw i de étew dob duniyae ni amuk émbéréh sékoy télewe timan témburi iyuféy de mén sama télew gétew télaki!”

## 9

<sup>1</sup> Tidéw béno, niyuf i gélimowe télakiy kaane témburi. Atin énggito guy gitooone, sani télakiwe ménlawu mangéy dob duniyae ni tidéw dob lawayo. Atin niray dob beeney gunsie fégéungka bé towe fo ménalém liyung. <sup>2</sup> Atin nungkaén i liyunge ni. Sonom béno, ménsut i béle loo bé bél i dakéle aféy. Atin déménlémon i duniyae non nalang i ébéley réndaw i térésange. <sup>3</sup> Atin ménsut i de kasuk tidéw dob béle ni, atin méntébéragar ro dob fantade. Atin nirayén beroy towe fo démawét kékeke maak sifitan. <sup>4</sup> Sénugu ro bé békén binasané roy de kéroon taloo no do kayéw taloo no do udenén do nohok. Géfédawéto ro saén i de étew énda méntandaan i de rangih ro bé tanda i Tuluse. <sup>5</sup> Endob i de kasuk ni énda ténungkasén bero ké féléhué roy de ni do étew. Yamula, fédawéto ro saén bero taman méifus i limowe gétérésang kélungonon. Atin i kédawét i kékérasaya ruwe loo bé kédawét i kékeke i de sifitan. <sup>6</sup> Atin bé no limo gétérésang kélungonon i de ni do étew toow fo mérasy, toow ron méuyot damén méléhu, éndob énda fo méléhu ro de.

<sup>7</sup> I falas i de kasuk ni, maak do kuda kudaay de sundalo inok sétiboh. Atin wén i do maak do bélowan do lakay dob de uléw ro. Atin i de falas i de uléw ro maak do lagéy kélawan. <sup>8</sup> I de buk ro maak do buk libun. Atin i de kifé ro loo bé kiféy de mérayar binatang féndawét do leon. <sup>9</sup> Atin i de kuméng ro méntéléb bé maake futow. Atin i béréh i de fafak ro maak béréh i da médooy kalesa magayas mangéy sétiboh. <sup>10</sup> Atin i de igor ro maak igor i da sifitan non kêmeke ro. Atin been i ni de igor roy émfédawétonne bé de étew bé rugay i limowe gétérésang kélungonon. <sup>11</sup> Atin i datue mékuléw bero, beeney télakiwe mungka bé ménaléme liyung. I dawét ne dob Hebreowe “Abadon”, atin dob Griegowe “Apolion”, I atag ne, “Beeney Minasawe”.

<sup>12</sup> I sanguwe kékérasayan ménggilidén. Atin wén sénay ruwo de énda séna ménrigo no.

<sup>13</sup> Tidew béno, niyuf i géénéme télakiy kaane témburi. Atin énggelingoo kuy émbéréhe tidew dob fote sugud i bélowone ahayan tulakan dob adafay Tuluse. <sup>14</sup> Ménbéréh dob géénéme ni télaki wén i témburi no mano, “Tangéyém i de fot gétew télaki nikét dob dakéle wayég féndawét Eufrates.” <sup>15</sup> Tidew béno, ténangéyén i de fot ni gétew télaki. I de ni do télaki ténafoy non bero bé gétahe inok féléhué roy gétéléwe baad bé kílawane béléewe ni dob tintuwe ni gai. <sup>16</sup> Atin wén i ménbéréhe dob begéne bé i kédooy de sundalo kéménuda ruwo ratuh laks. <sup>17</sup> Atin dob ni fénggiton dob begéne, énggito guy de kuda brab de kéménuda de. I de ni do sundalo, wén i de futow fénggétéléb bé de kuméng ro. Furoy de falasén maak aféy brab gadung maak safiro, brab mérégunir maak asupre. Atin i de uléw i de ni do kuda maak do uléw leon. Atin mésut tidew dob de ba roy aféye brab bélé brab asuprewe. <sup>18</sup> Atin fénléhu roy gétéléwe baad bé kéluhanay de kílawan bé aféye brab bélé brab asuprewe mésut tidew dob de ba ro. <sup>19</sup> I de ni do kuda, dob de ba ro brab dob de igor roy bagér ruwe méméléhu. Non i de igor ro maak do ulé wén i do uléw ro émfédawéton bé de étew.

<sup>20</sup> Atin i de étew énda méléhu ro, énda gésénule ro bé kífengadaf ruwe bé de bélowan, do filak, do galang, do batéw, brab do kayéw do rénigo ro do kéninontow. I de ni do éntingayén énda do gérito ro taloo no do géglingo taloo no do géagéw. Atin i de ni étew énda so gésénule ro bé de kífengadaf ro bé de saitan. <sup>21</sup> Enda so gésénule ro bé de kífeléhu ro, loo soy de kóbélya ro, loo soy de kóbigaé ro, loo soy de kífénakaw ro.

## 10

<sup>1</sup> Tidew béno, énggito guy ségiyowe barakatan télaki ménlus tidew dob lawayo. Kéménagal bé rawéne atin léniwét i béluntuwey uléw ne. Atin i rangih ne maak térsang, atin i de sékéyén maak liléy aféy. <sup>2</sup> Atin wén i klohe sulat ménbilin dob kémér ne. Atin féndiyoén i kuwonone sékéyén dob dogote, atin i biwonge de dob fantade. <sup>3</sup> Atin téménawag toow fo métanug maak béréh i de leon. Amun téménrén témawag, sénumbuloy fitéwe do métanug léte. <sup>4</sup> Amun téménrén ro, géfédew sulaté ku damén i de énggelingoo ku. Endob énggelingoo kuy émbéréhe tidew dob lawayo mano, “Kago sulatén i kóbéreh i de fitew timan léte, non fatut sékémén saén.”

<sup>5</sup> Tidew béno, i télakiwe ni, sani énggito guwe téménindég dob dogote brab dob fantade, ténunggulén i kuwonone kémérén saréw dob lawayo. <sup>6</sup> Atin séménafa dob dawéti Tuluse méuyag taman sa taman, sani léménimbage bé lawaye brab kéluhanay de éntingayén de brab fantade brab kéluhanay de éntingayén de so brab dogote brab kéluhanay de éntingayén de so. Atin ménbéréh i télakiwe ni mano, “Endaén i anggaén! <sup>7</sup> Endob amuk iyuféy géfitéwe télakiy témburi nuwe, féagéwéy Tulusey nékém ne bantakén, loo bé bénréh ne dob de sugu-suguén do sénarigo no muret bé gétaho.”

<sup>8</sup> Tidew béno, ménbéréh man begén i émbéréhe tidew dob lawayo bé gétahe de mano, “Fégédét go dob télakiwe téménindég dob dogote brab dob fantade atin dotém i ménbilin sulat dob kémér ne.”

<sup>9</sup> Mélaw ménfégédétu dob télakiwe ni atin nongot gu dob beene ké irayén begén i klohe ni sulat. Atin ménbéréh dob begéne mano, “Dotém atin amaém. Amuk amaé mo toow fo meh dob ba me maak téne, éndob waléy mélétis dob sur me.”

<sup>10</sup> Tidew béno, éndot guy klohe ni sulat dob kémér ne, atin nama gu. Amun diyoén dob ba guwe, toow fo meh maak téne. Endob amun énggelinuo kun, ménwaléy mélétis dob sur guwe. <sup>11</sup> Tidew béno, wén i ménbéréhe dob begéne mano, “Kailangan ureté mo man ségule i kóbéreh i Tuluse fantag bé de médo do ingéd, brab de médo do kélasi étew, brab de klasi-klasi késbéréh, brab de datu.”

## 11

<sup>1</sup> Tidew béno, wén i niraye begén fégétémbu maak tugé. Atin wén i ménbéréhe dob begéne mano, “Tindég go atin témbu moy lawi i Tuluse brab ahayane tulakan. Atin bilangém i de étew diyo dob lawi i Tuluse méngadaf. <sup>2</sup> Endob kago témbunén i de fésayawan non nirayén dob de békén Judío. Gédaa roy mékétéfuwe ingéd Jerusalem

taman méifus i fote folo bra ruwo gétérésang kélungonon. <sup>3</sup> Atin sugué ku mangéy diyo muret i de ruwo gétew sénarigo ku. Kémégal ro do saku atin ureté roy kékéréh i Tuluse diyo taman méifus i séngibuwe bra ruwo ratuh bra ném fole gétérésangan.”

<sup>4</sup> Atin i de ni ruwo gétew muret, beroy de maak do ruwo timan kayew féndawét Olibo, atin maak do ruwo ro timan solo diyo dob adafay Kadnay fantade. <sup>5</sup> Atin amuk wén i témulama émfédawéton bero, mésut i aféye tidew dob de ba ro brab binasané roy de sébanil bero. Mélaw atiy témulamawe bero minasa, féléhuén. <sup>6</sup> Wén i kuwagib ro malang bé ranae bé gaiwe muret ro bé kékéréh i Tuluse. Wén soy kuwagib ro émféwaléy dara bé wayége. Wén soy kuwagib ro kémukum bé de étew bé de udenén do gékélesi fégédusa dob de udenén do gai kétaya ro. <sup>7</sup> Atin amuk gilidén muret i de ruwo ni gétew, sétiboh i nagawe bero, sani mésute tidew dob liyunge. Atin tabana no bero brab gáféléhuo no bero. <sup>8</sup> Atin i de bangkay ro fédiyoén dob kalsaday dakéle ingéd, sani ingéd i Kadna ruwe ménléhu dob kruse. I ménaléme dawét i nan ingéd “Sodoma” taloo no “Egipto”. <sup>9</sup> Atin bé rugay i télwe gétérésangan bra géraraan, i de étew tidew dob kéluhanay de ingéd brab do tribo brab do kélasi-kélasi késébéréh i de étew, tuliké roy de ruwo ni timan bangkay, atin énda tungkasé ro de ké lóbéngén. <sup>10</sup> Atin i de étew dob duniyae ni, toow ro fo moror sabaf bé kéléhu i de ruwo ni gétew. Atin rémigo ro do karagiya atin séiray ro do éntingayén sabaf bé kéroror ruwe de. Non i de ni do ruwo gétew sénarigoy Tuluse muret bé kékéréh ne ménférasay ro fo toow bé de étew dob duniyae ni. <sup>11</sup> Endob amun ménifus i télwe gétérésangan bra géraraan, fénférénaway Tuluse bero inok tébule ro. Atin téménindég ro. Atin i kéluhanay de énggégito bero, toow ro fo ménngilak. <sup>12</sup> Tidew béo, i de ni do ruwo gétew sénarigoy Tuluse, énggelingoo roy métanuge émbéréh dob berowe tidew dob lawayo mano, “Enggomén, nik gom mangéy dob lawaye ni.” Atin bé lala i kéténgténg i de sébanil ni bero, déméniyat ro mangéy dob lawayo dob rawéne. <sup>13</sup> Sonom béo, léménuba toow fo émbagér. Atin i géfoloe baad bé no ingéd ménbinasa. Atin ménléhu i fitewe ngibu étew bé lubae ni. Atin i de ségiyo do étew toow ro fo ménngilak, atin dénayew roy barakatane Tulus dob lawayo.

<sup>14</sup> I gérerowe mékégédaw-gédaw gérigonon ménngilidén. Endob gégumah sékoy gétéléwe de.

<sup>15</sup> Tidew béo, i géfitewe télaki niyufén i témburi nuwe. Atin wén i de métanug do émbéréh tidew dob lawayo maro, “I Kadna tome brab Kristo nuwe ménwaléy máguléw bé duniyae. Atin féguléwo no taman sa taman.” <sup>16</sup> Tidew béo, i de ruwo fole bra fot gétew lukés odoron sani de ménasar dob de saray de datu dob adafay Tuluse, ménédunsum ro ménadaf bé Tuluse. <sup>17</sup> Atin ménbéréh ro maro, “Toow fo barakatan Kadnan Tulus, Beem i Tuluse bé féganayo atin Tulus go so béri. Fésalamat gey dob Beeme non nusarém i barakat me atin féngganaya moy máguléwe bé duniyae. <sup>18</sup> I de étew do békén ménintulus, ménkérít ro toow non énggumahén i gaiwe kukumé mo bero. Atin kukumé moy de ménléhu do étew. Atin been soy niy gaiwe binasané moy de étew minasa bé duniyae ni.”

<sup>19</sup> Tidew béo, i lawi i Tuluse dob lawayo, ménungka. Atin i baule fégonon bé de ménusat fasad i Tuluse énggiton diyo. Tidew béo, kéménilot brab léménéte brab déménégu brab léménuba brab réménana do dakél yelo.

## 12

<sup>1</sup> Tidew béo, ménfégito maake anlung i mérigowe moso mérigo dob lawayo. Wén i libune kéménagal térsang, atin ménutuh dob térsang kélungonone. Atin wén i lakay dob uléw ne fitew i de gitoon de. <sup>2</sup> Obor i ni libun brab gédétén kéumahan. Atin mélaw ménkes sabaf bé kédawét i kékéngéga ne.

<sup>3</sup> Tidew béo, wén man i ségiyowe ménrigo ménfégito dob lawayo maak anlung. Wén i dakéle diwat-wat furoy falas ne. Fitew timan i uléw ne brab fole timan i sidung ne. Atin wén i lakay dob séngae uléwén. <sup>4</sup> Atin i igor ne génuyudén i gétéléwe baad bé

de gitoon brab nibérén dob duniyae. Atin diyo téménindég dob adafay libune ni gédét kéumahan inok amaé noy nga ne ké mumahén.<sup>5</sup> Tidéw béno, i libune ni énggégéngéga nga lagéy. Beeney méguléwe bé kéluhanay de ingéd atin énda i géatuh bé kékéulgéw ne. Endob wén i ménafas bé ngae ni brab nuwitén mangéy dob Tuluse dob lawayo dob sara nuwe.<sup>6</sup> Atin i libune ni ménraréy mangéy dob gonone énda i étew de bati, dob sébaane gonon ténafeay i Tuluse de. Diyo fagifatéy Tulusey ni libun bé séngibuwé brab ruwo ratuh bra ném folo gétérésangan.

<sup>7</sup> Tidéw béno, wén i gira dob lawayo. Atin i ségétewe bé de télakiy Tuluse féndawét Miguel brab de kuyugén do télaki, ménsétiboh ro sébanil bé diwat-wate. Atin i diwat-wate ni brab de kaan télaki, ménatuh ro.<sup>8</sup> Endob ténabanan i diwat-wate ni brab de télaki no. Mélaw éndaén ténungkasén bero bati dob lawayo.<sup>9</sup> Atin i dakéle ni diwat-wat brab de télaki no nibérén bero tidéw dob lawayo. Beeney Satanase, sani saitane fénggakara noy kéluhanay de kéilawan bé kétéféwaléy ne ulé bé gétaho. Atin nibérén mangéy dob duniyae beroy de tete télaki no.

<sup>10</sup> Tidéw béno, énggelingoo kuy métanuge béréh dob lawayo mano, “Béleewe ni métumanén i kéfukas i Tuluse bé kéilawane. Béleewe ni fénggitoy Tulusey atura nuwe méguléw. Béleewe ni, i Kristoy Tuluse fénggito noy atura nuwe méguléw. Non i témboe bé de dumo gey fuweh na kélunganon, dénédlén tidéw dob lawayo.<sup>11</sup> I de dumo gey ni, ténabana roy Satanase bé dara i Natiwe Bili-bili, atin sabaf bé toowe kétoro nuret ro. Atin énda gulaané roy de karo do férénawa, yamula féndaya roy de étew méméléhu bero sabaf bé kéunur ruwe.<sup>12</sup> Mélaw, i de begom do bati dob lawayo, oror gom. Endob i de begom do bati dob fantade brab dob dogote, mékégédaw-gédaw gom. Non i Satanase ménlus mangéy dob begome. Atin toow fo mékérít, non gétiga no éndaén mérugay i gai nuwe rémigo tete.”

<sup>13</sup> Atin i diwat-wate ni, amun énggétiga no nibérén mangéy dob duniyae, ménségéta i libune ni ménggéngéga nga lagéy.<sup>14</sup> Endob nirayén dob libune niy ruwowefafak i dakéle banug inok lémayang mangéy dob gonone énda i étew de bati. Diyo fégifatéy Tuluse bé rugay i télewe bra géraraan gébélantuwa. Atin énda gésugsugén bé Satanase sani diwat-wate.<sup>15</sup> Tidéw béno, i diwat-wate ni fénésutén tidéw dob ba ney médoowe wayégi inok anuré noy libune ni dob dunuke.<sup>16</sup> Endob ténabangay fantadey ni libun atin kéménla brab néséfén i wayége. Mélaw énda ménggésug-sug i libune ni.<sup>17</sup> Tidéw béno, toow fo ménkérít i diwat-wate ni bé libune ni. Atin ménagéw brab ménangéy sétiboh dob de ségiyo nga i libune ni brab kéluhanay de modor bé de sugu i Tuluse brab de éndaén mérugay i gai nuwe rémigo tete.<sup>18</sup> Atin i diwat-wate ni téménindég dob dénsaane.

## 13

<sup>1</sup> Tidéw béno, énggito guy nagawe géménaun tidéw dob dogote. Folo i sidung ne brab fitew i uléw ne. Atin wén i lakay dob séngae sidungén. Atin dob séngae uléwén wén i mén sulfate de mékémurka dawét.<sup>2</sup> I nagawe ni énggito gu maak falas i mérayare binatang féndawét leopardo. Atin i de sékéyén maak sékéy i mérayare binatang féndawét oso. Atin i ba ne maak ba i mérayare binatang féndawét leon. Atin i diwat-wate nirayén dob beeney barakat ne brab atura nuwe méguléw.<sup>3</sup> Atin i sébaane bé de uléw i nagawe ni maak ménléhuén, éndob ménadi-adiy fali ne funa no damén méléhu. Atin i kéluhanay de étew ménggaif ro de atin ménfuray ro bé nagawe ni.<sup>4</sup> Atin i kéluhanay de étew fénengadaf roy diwat-wate ni non nirayén dob nagawe niy atura nuwe méguléw. Atin fénengadaf ro soy nagawe maro, “Enda i ségiyo gérator bé nagawe. Atin énda i géatuh de.”

<sup>5</sup> Atin i nagawe ni, féndaya i Tuluse ménfédayday émbéréh do toow fo tete brab do fégéfélangoa-langka, méngras bé Tuluse. Atin ténungkasén méguléw taman méifus i fote folo bra ruwo gétérésang kélunganon.<sup>6</sup> Atin fénémulaén i Tuluse brab dawét ne brab gonoy Tuluse bati brab kéluhanay de étew bati diyo dob lawayo.<sup>7</sup> Atin féndayaén so sétiboh sébanil bé de étew i Tuluse, atin féndayaén so ténabana no bero. Atin nirayén

dob beeney aturane méguléw bé kéluhanay de étew tidew dob de séségiyo-giyo do tribo brab do ingéd brab do késébéréh brab do étew.<sup>8</sup> Atin féngadaféy kéluhanay de étew bati dob duniiae ni, sani de étew énda ménsulat i de dawét ro dob librowe lénistanan bé de étew gégédot bé umule magufusa. Sénulatén i de dawét ro bé énda séna ménlimbag i duniiae de. Atin i fénléhue Nati Bili-bili, Been i gefee bé ni libro.

<sup>9</sup> Fatut fégélingo gom kéluhanan i ni: <sup>10</sup> I de étew kailangan férисunén, waléy ro man méférisu. Atin i de étew kailangan féléhuén bé sundange, féléhuén ro bé sundange. Mélaw i de begom do étew i Tuluse, fatut fédidayday gom sémarig bé Tuluse atin fetingkél gom dob gaiwe kérégénan gom.

<sup>11</sup> Tidew béno, énggito guy géruwowe naga ménsut tidew dob fantade. Ruwo timan i sidung ne maak do sidung bili-bili atin i kékéréh ne maak béréh diwat-wat. <sup>12</sup> Atin i géruwowe ni naga, nusarén i aturay sunguwe naga méguléw dob adafa nuwe. Atin fénégésén i kéluhanay de étew dob duniiae méngadaf bé sunguwe naga, sani wéne falién géfédewén damén méléhu éndob ménadi-adi. <sup>13</sup> Atin i géruwowe ni naga, réménigo do médo do mékégaif. Léménawu aféy dob duniiae ni tidew dob lawayo dob téngaangay kéluhanay de étew. <sup>14</sup> Atin énggégéfakara noy kéluhanay de étew dob duniiae ni sabaf bé de mékégaif ténungkasén rigoné no dob adafay sunguwe naga. Tidew béno, sénuguén i kéluhanay de étew dob duniiae ni rémigo kéninontow fégébantug bé sunguwe naga, sani téni bohe bé sundange éndob énda ménléhuén de. <sup>15</sup> Atin i géruwowe naga, ténungkas dob beeney mirayane férénawa bé kéninontow inok gébéréh i kéninontow i sunguwe ni naga brab inok géféléhuo roy kéluhanay de étew énda féngadafé ro de. <sup>16</sup> Atin i géruwowe ni naga, fénégésén i kéluhanay de étew, fiyon i de gérotor loo soy de gérfantad, brab de kawasa loo soy de méskinan, brab de rifén loo soy de békén do rifén, fénégésén bero férigo tanda dob de kuwonon do kémér ro taloo no dob de rangih ro. <sup>17</sup> Amuk énda méntandaan i ségétéwe, énda gébélényen brab énda so géfélényen. Atin i ni tanda, been i dawét i sunguwe naga taloo no rumeroy dawét ne. <sup>18</sup> I de étew gésobut bé ni, bero saén i de féntilédtéd i Tuluse. Mélaw i de météltédtéd do étew, fakay gétiga roy atag i ni rumero non tanda i dawét i ségétéwe étew. Ném ratuh bra ném folo bra ném i ni rumero.

## 14

<sup>1</sup> Tidew béno, énggito guy Natiwe Bili-bili téménindég dob tuduke féndawét Sion. Atin diyo dob Beeney mératuhé bra fot folo bra fot ngibu étew. I de ni do étew, ménsulat dob rangih ruwey dawét i Natiwe ni Bili-bili brab Abay ne Tulus. <sup>2</sup> Atin énggélingoo kuy émbéréhe tidew dob lawayo maak érok dakél samfaw atin maak métanug léte. Atin i kékéréh ne maak béréh i de baat féndawét do alpa. <sup>3</sup> Atin i de mératuh bra fot folo bra fot ngibu do étew, téménindég ro dob adafay saray Tuluse bra de fot gétew do barakatan étew brab de lukés odoron. Atin kéménanta ro sébaan mantu kanta, sani kantawe énggétigay de ni do étew saén do mén-aun tidew dob duniiae. <sup>4</sup> Beroy de lagéy do énda ménsala bé késétaya ruwe bé de ségiyo do libun saliyu bé de bawag ro, non malinis i de adat ro. Atin furay ro bé Natiwe Bili-bili dob séngae ayo no. Beroy de mén-aun tidew dob de ségiyo do kéilawan inok beroy de sungu do niray dob Tuluse brab dob Natiwe Bili-bili. <sup>5</sup> Enda téménugi ro fiyon ségule. Enda i rénigo ro tete.

<sup>6</sup> Tidew béno, énggito guy ségiyowe télaki lémayang dob toowe fo gérotor. Atin bé béno so, nureténi Fiyowe Uret énda mékédano taman sa taman. Nureténi dob séségiyo-giyo gékélasi do étew brab do tribo brab do késébéréh brab do ingéd. <sup>7</sup> Ménbéréh métanug mano, “Basana kom i Tuluse brab dayew gom. Non énggumahén i gaiwe kukumé noy de kéilawan. Féngadaf gom i Tuluse, sani réménigowe bé lawaye brab fantade brab dogote brab de séfut.”

<sup>8</sup> Atin ménfuray i géruwowe télaki brab ménbéréh mano, “Ménbinasa né. Ménbinasa néni i dakéle ingéd Babilonia. Fénolo noy kéluhanay de étew bé arak ne. Atin i ni arak, been i niy mékérésike adatén émfésala bé de ségiyo étew.”

<sup>9</sup> Tidéw béno, ménfuray i gétéléwe télaki. Ménbéréh mano, “I de étew méngadaf bé nagawe brab kéninontow ne, brab méntandaan i de rangih ro taloo no do kémér ro bé tanda i nagawe, <sup>10</sup> mékukum ro fo toow. Non mékérít fo toow i Tuluse bero. I de rémigo bé ni, ferasayé no bero bé aféye brab asuprewe dob adafay de télakiy Tuluse brab Natiwe Bili-bili. <sup>11</sup> I aféye fégédusa bero, mégábél taman sa taman. Fuweh na kélungonon, énda téméré no démusá bé de étew méngadaf bé nagawe brab kéninontow ne, sani de étew méntandaan bé dawét ne.”

<sup>12</sup> Mélaw i de étew i Tuluse, sani de modor bé sugu i Tuluse brab de énda témérén munur bé Jesuse, fatut témingkél ro.

<sup>13</sup> Tidéw béno, énggelingoo kuy émbéréhe tidéw dob lawayo mano, “Sulatém i ni: Moror i de munur bé Kadnane ké méléhu ro tidéw béeleewe ni.” “Non témérén ron gémalbék atin gédoté roy barase sabaf bé de rénigo ro.”

<sup>14</sup> Tidéw béno, énggito guy futee rawén. Atin wén i ménsar de maak falas kéilawan. Wén i bélodon lakay dob uléw ne atin wén i génamakén murém sanggut. <sup>15</sup> Tidéw béno, wén i ségiyowe télaki ménsut tidéw dob lawi i Tuluse dob lawayo. Atin téménawag toow fo métanug dob étewe ni ménsar dob rawéne mano, “Usarém i sanggute fégékétewém. Non énggumahén i gaiwe kémétéw, togohén i duniyae.” <sup>16</sup> Tidéw béno, i étewe ni ménsar dob rawéne, sénayugén i sanggute dob duniyae. Atin kéntewén i duniyae.

<sup>17</sup> Tidéw béno, énggito guy ségiyowe télaki ménsut tidéw dob lawi i Tuluse dob lawayo. Wén soy murém sanggut génamakén.

<sup>18</sup> Tidéw béno, i ségiyowe télaki, sani méguléwe bé aféye, ménagéw tidéw dob ahayane tulakan. Ménkes métanug dob télakiwe gémenamak murém sanggut mano, “Usarém i sanggut ma nan fégékélengém bé onok i nohoke féndawét ubas dob safade dob duniyae. Non togoh ron.” <sup>19</sup> Mélaw i télakiwe ni, sénayugén i sanggut ne dob duniyae, atin kénléngén i de ubas tidéw dob safade atin nibérén dob kalute gonoy Tuluse kémérés bero non mékérít bé de ni do tete étew. <sup>20</sup> Atin ménkérés i de ni do tete étew dob kalute dob liyuy ingéde. Atin ménsut i de dara ro maak dunuk gédét ruwo gémitroy kénéalem ne atin télémratuh bra ruwo folo gékilomitroy kérayu ne.

## 15

<sup>1</sup> Tidéw béno, énggito guy ségiyowe mékégaif ménrigo dob lawayo maak anlung. Wén i do fitew gétew do télaki ménuit fitew timan fégédusa bé de kéilawan. Been i niy de géfuray fégédusa non fégéfélidé békérít i Tuluse.

<sup>2</sup> Atin énggito guy maake dogot maak féngalungan ménsélawék bé aféye. Atin énggito guy de étew ténabana roy nagawe brab kéninontow ne. Beroy de énda méntandaan bé rumeroy dawét ne. Téménindég ro dob doror i dogote maak féngalungan. Génamak roy de baat féndawét alpa niray i Tuluse bero. <sup>3</sup> Kénanta roy kanta Moisese, sani ségétéwe sugu-suguéy Tuluse bé do gétah, sani kantay Natiwe Bili-bili maro, “Barakatan Kadnan Tulus, toow fo fiyo brab dakél i rénigo muwe! Beem i méguléwe bé kéluhanay de ingéd. Toow fo métintuy adat me brab toow. <sup>4</sup> I kéluhanay de étew basana ro Beem, Kadnan. Atin i kéluhanay de étew fayagé roy kégérator me. Beem saén i mékétéfuwe. I kéluhanay de étew tidéw dob séngae ingéd, mangéy ro méngadaf dob Beeme. Non i kéluhanay de étew gétiga roy de métintu do rénigo mo.”

<sup>5</sup> Tidéw béno, énggito guy lawi i Tuluse dob lawayo ménungka. Atin diyo dob bukagey mékétéfuwe sibéy gonoy tanda i Tuluse. <sup>6</sup> Tidéw béno, i de fitew gétew do télaki ménuit békérít i Tuluse, ménsut ro tidéw dob lawi i Tuluse ni. Kéménagal ro bé toowe fo malinis fute safut. Atin lénibéo ro bélodon i de kuméng ro. <sup>7</sup> Tidéw béno, i ségétéwe bé de barakatan do étew nirayen dob de fitew gétew do télakiy fitéwe timan bélodon biléw ménfeno bé kékérít i Tuluse méuyag taman sa taman. <sup>8</sup> Atin i lawi i Tuluse ni ménfeno bé bélé tidéw dob kéréndaw i barakat i Tuluse, atin mélaw énda i géahur dob lawie taman gildi i de fitew timan fégédusa nuwit i de fitew gétew télaki.

## 16

*I de fitéw timan biléw*

<sup>1</sup> Tidéw béno, énggelingoo kuy métanuge émbéréh tidéw dob lawi i Tuluse dob de fitéw gétew do télaki mano, “Agéw gom atin luka gom dob duniyaey de fitéw timan do biléw ménféno bé kékérit i Tuluse.”

<sup>2</sup> Atin i sunguwe télaki ménagéw brab lénukaén i biléw ne dob duniyae. Atin i toowe fo féde brab mékérésik do kéraing téménunoh dob kéluhanay de étew do méntandaan bé nagawe brab de méngadaf bé kéninontow ne.

<sup>3</sup> Atin i géruwowe télaki lénukaén soy kaane biléw dob dogote, atin i wayége ménwaléy maak dara i ménléhue étew. Atin ménléhu i kéluhanay de sédo brab de binatang dob dogote.

<sup>4</sup> Tidéw béno, i gétéléwe télaki lénukaén i kaane biléw dob de séfut brab dob de wayég, atin ménwaléy ro dara. <sup>5</sup> Atin énggelingoo kuy béréh i télakiwe méguléw bé de wayég mano, “O mékétéfuwe Tulus, i Beeme ménwén gon tidéw féganay atin wén so béléewe ni, métintuy kékukum me. <sup>6</sup> I de tete ni étew, fénléhu roy de étewém brab de sénarigo mo muret. Mélaw féninémo mo bero dara. Médait ro mékukum loo bé ni.” <sup>7</sup> Tidéw béno, énggelingoo kuy émbéréhe tidéw dob ahayne tulakan mano, “Barakatan Kadnan Tulus, métintuy kékukum me brab toow.”

<sup>8</sup> Tidéw béno, i géfote télaki lénukaén i kaane biléw dob térsange. Atin fentuwégen bé térsangey de étew sabaf bé kééduf ne. <sup>9</sup> Atin méntuwégi de étew sabaf bé kééduf ne. Atin fénémula roy dawét i Tuluse, sani wéne aturan bé de ni fégédusa. Endob énda gésénule ro bé de sala ro brab énda dayéwé roy Tuluse.

<sup>10</sup> Tidéw béno, i gélimowe télaki lénukaén i kaane biléw dob saray datue kay nagawe. Atin ménwaléy délémon i kékéraléw i nagawe. Atin toow fo ménrasay i de étew atin gékekeo roy de dila ro bé kékédawéta ruwe. <sup>11</sup> Atin fénémula roy Tuluse dob lawayo sabaf bé kékédawéta ruwe brab de kéraing ro. Endob énda gésénule ro bé de tete adat ro.

<sup>12</sup> Tidéw béno, i géénéme télaki lénukaén i kaane biléw dob dakéle wayég fénawéti Eufrates. Atin méntikar i dakéle ni wayég inok wén i aguwoy de datu tidéw sébangan.

<sup>13</sup> Tidéw béno, énggito guy téléléwe gétew tete rémogor maak do falas fak ménasut tidéw dob ba i diwat-wate brab dob ba i nagawe brab dob ba i ségétewe ubo-ubo sénarigoy Tuluse muret. <sup>14</sup> Beroy de rémogor i de saitan do rémigo do mékégaif. Atin i de téléléwe ni gétew do saitan ménangéy ro dob kéluhanay de datu dob duniyae ni inok limudé ro bero atin inok rémigo ro gira dob gaiwe kémukum i barakatane Tulus.

<sup>15-16</sup> Bé béno gai, i de saitan limudé roy de datu dob gonone fénawéti Armagedon dob késébéréhe Hébreo. Atin bang i Kadnane Jesus, “Fégélingo gom! Sefuleu bé gaiwe énda gékaranga kom de loo bé kégumah i ménakawe. Moror i de étew mingat brab téménafay ro kémégal bé kóngot-ongot ruwe bé késéfule guwe. Non énda félawas ro bé késéfule guwe funa ro mémala.”

<sup>17</sup> Tidéw béno, i géfitéwe télaki lénukaén i kaane biléw dob kérara fuwehe. Atin wén i émbéréh métanug tidéw dob saray méguléwe dob lawi i Tuluse mano, “Enggilidén.”

<sup>18</sup> Atin kéménilot brab déménégu brab léménéte brab léménuba émbagér. Enda i ségiyo émbagér luba loo bé ni tidéw bé kékérlage bé kékérlawane, non toow na fo gétimal i kékérlage i ni luba. <sup>19</sup> Atin i dakéle ingéd Babilonia ménsefarak téléléw baad. Atin ménbinasay kéluhanay de ingéd dob duniyae ni. Non gétédémoy Tulusey ingéde Babilonia atin kukumé no sabaf bé kékérit ne de. <sup>20</sup> Atin i kéluhanay de bungéd brab de tuduk ménalfa. <sup>21</sup> Atin ménlawu i de dakél do yelo dob de étew. Atin limo folo gékiloy kékérlage i de yelo. Atin i de étew fénémula roy Tuluse sabaf bé de yelo non toow fo gétimal i kékérit ne.

## 17

<sup>1</sup> Tidéw béno, i ségétewe bé de télaki ménawit bé de fitéw timan do biléw, ménangéy dob begéne brab ménbéréh mano, “Enggon, fégito gu beem i kékukume bé ménbantuge

sundal, sani ingéde gédét dob médoowe do wayég. <sup>2</sup> I de datu dob duniyae ni ménstayan de. Atin i de étew dob duniyae ni, fénalsaén bero bé mékérésike adatén.”

<sup>3</sup> Tidéw béno, i Rémogor i Tuluse toow fo fénemanduo no begén, atin nuwit i télakiwe begén mangéy dob gonone énda i étew de bat. Diyo énggito guy libune kéménuda dob furowe naga. Wén i de mémurka dawét ménslat dob kéluhanay lowoh i nagawe ni. Atin fitéw timan i uléw ne brab folo timan i sidung ne. <sup>4</sup> Atin i libune ni kéménegal furo brab rambayung. Atin ménggono do bélowan brab do perlas brab do ségiyo balilaga batéw. Atin génamakén i bélowane tabu ménféno bé de mémurka brab do mémurka do éntingayén, sani galbék i sundale. <sup>5</sup> Atin ménslat dob rangih ney kékéréhe wén i ménbunéy atagén. I sulate ni mano, “I ménbantuge Babilonia, idéng i kéluhanay de sundal brab de mémurka do étew dob duniyae ni.” <sup>6</sup> Atin énggito guy ni libun ménolon sabaf bé kíném ne bé dara i de ménléhuén do munur bé Jesuse do ménléhu sabaf bé kéuret ruwe fantag bé kénur ruwe.

Amun énggito guy ni, toow fo ménggaifu de. <sup>7</sup> Atin i télakiwe ni ménenginsa dob begéne mano, “Sedek mègaif go? Fégétiga ku beem i ménbunéye atag i libune ni brab nagawe kénudaa no fitéw i uléw ne brab folo i sidung ne. <sup>8</sup> I nagawe énggito mo méuyag bé gétaho, éndob ménléhuén béeewe ni. Gido loo, mésut moso tidéw dob toowe fo ménalém liyung brab mébinasa. Atin i de étew dob duniyae ni, sani de étew énda ménslat i de dawét ro dob librowe listanan bé de étew gégédot bé umule magufusa, mègaif ro kékito roy nagawe ni. I ni libro ménslatén bé énda séna lénimbag i Tulusey duniyae de. Atin i nagawe ni méuyag bé gétaho, ménléhuén bén. Endob téfégito man moso.”

<sup>9</sup> Atin féntaus i télakiwey kékéréh ne mano, “Do gétigan saén do étew i gésobute bé ni: I atag i de fitéw timan uléw, been i de niy de fitéw timan burur gonoy ni libun mésar, sani de burur téindégoy ménbantuge ingéd. Atin i atag ne do fitéw gétew datu. <sup>10</sup> Atin i limowe bé de datu ni ménléhu ron. Atin i ségetéwe de méuyag mèguléw bén. Atin i ségetéwe de énda séna mèguléwén. Amuk mèguléw i géfítewe ni datu, mèguléw saén singkow. <sup>11</sup> Atin i nagawe ni, sani méuyage bé gétaho éndob ménléhuén bén, beeney géwaléwe datu gétundug bé de sungu do fitéw datu atin mébinasa moso.

<sup>12</sup> “Atin i de folo do sidung énggito mo, beroy de folo gétew do datu énda séna mèguléw ro. Endob irayén beroy aturane mèguléw bé rugay i ségeurase saén beroy nagawe. <sup>13</sup> Atin i de folo ni gétew do datu, ségiléw i kétaya ruwe, atin iray roy bagér ruwe brab atura ruwe mèguléw dob nagawe ni. <sup>14</sup> Atin sétiboh ro sébanil bé Natiwe Bili-bili. Endob i Natiwe Bili-bili brab de fénémilién do kuyugén sani de fénunurén dob Beene brab de rémigo bé kétaya nuwe, tabana roy de ni do folo gétew do tete datu. Témaban i Natiwe Bili-bili non Beeney Kadnay de mèguléw brab Beeney Datu i de datu.”

<sup>15</sup> Atin ménbérérh man i télakiwe ni dob begéne mano, “I de wayég énggito mo, sani gonoy sundale ménzar, beroy de étew dob de séségiyo-giyo do ingéd brab do kélasi-klasi do étew brab do késbérérh. <sup>16</sup> Atin i de folo timan do sidung do énggito mo, brab nagawe, mérarék ro bé sundale ni. Atin nafas roy kéluhanay de éntingayé no. Atin tagaké roy sundale ni félawas. Atin amaé roy ungé ne brab tuwégé ro dob aféyey sama ruwe de. <sup>17</sup> Rigoné roy ni non fékéntayéy Tuluse beroy rémigowe de inok métuman i bantak ne. Mélaw sébaan saén i kékéfitung ruwe, atin iray roy atura ruwe mèguléw dob nagawe taman métuman i kékéréh i Tuluse.

<sup>18</sup> “Atin i énggito muwe libun, beeney ménbantuge ingéd mèguléw bé de datu dob duniyae ni.”

## 18

<sup>1</sup> Tidéw béno, énggito guy ségiyowe télaki ménlus tidéw dob lawayo. Wén i dakél atura no. Atin ménggékaya i kéluhanay sugud i duniyae bé késélinang ne. <sup>2</sup> Atin ménkes i télakiwe ni toow fo métanug mano, “Ménbinas! Ménbinasay ménbantuge ingéd Babilonia. Ménwaléy bén batoy de saitan brab do tete do rémogor. Atin médoob do gékéla do tete brab mémurka do kloh manok bati diyo. <sup>3</sup> Non fénalsaén i kéluhanay

de étew bé mékérésike adatén, sani teteet kétayay lowoh ne. Atin i de datu dob duniyae ni ménamung ro bé de tete rigoné ro. Atin i de démagang ménwaléy ro kawasa sabaf bé de tete kétayay libune ni.”

<sup>4</sup> Tidéw béno, énggelingoo kuy émbéréhe tidéw dob lawayo mano, “Enggomén do étew gu. Sut gom tidéw dob tete anan ingéd inok énda géamung gom bé de salaén. Mélaw énda mékukum gom sérénge de. <sup>5</sup> Non toow fo médooy de salaén maak ménuntud mangéy dob lawayo. Atin i Tuluse énggétédémo noy teteet adatén. <sup>6</sup> I kéférasay ne begom, fatut sulio kom ruwo takéf kéférasay de so. Féno gom i tabu ne ruwo gule bé inéméne toow fo féla loo bé féniném ne begom. <sup>7</sup> I kédooy kébantug ne bé lowoh ne brab kéféfiyo nuwe bé lowoh ne bé gétahe, iring gom bé kéférasay gome de brab kéfékuku gome de. Non énda témuvé no félangka-langka mano, ‘Begéney baiwe, békénu baléw. Enda fakayén ké tete i fédéw guwe.’ <sup>8</sup> Sabaf bé ni kébéréné, wén i gai moso tékow mérásay. Non mékukum bé déruune brab kébukue brab lénggobe. Atin métuwégi toow bé aféye non toow fo barakatan i Kadnane Tulus kémukum de.”

<sup>9</sup> Atin i de datu dob duniyae ménamung bé de mékérésik rigoné no brab kékawasawe kétaya ro, kémérew ro, brab rémuung ro sabaf bé kébinasay ni ingéd amuk gito roy bél i aféye témuvé de. <sup>10</sup> Ténulik ro tidéw dob mérayue non mágilak ro mémamung bé kérasay ne. Atin béréné ro maro, “Mékégédaw-gédaw i ménbantuge ingéd Babilonia. Séguras saén i kékukume de.”

<sup>11</sup> Atin i de démagang kémérew ro so brab rémuung ro sabaf bé kébinasay ni ingéd non énda i méléy bé de daganga ro. <sup>12</sup> Endaén i méléy bé de bélodon do féléléy ro brab do filak, brab do balilaga do batéw, brab do perlas, brab de fiyo fute brab do furo brab rambayung safut, brab do balilaga do mamut kayéw, brab do éntingayén do rénigo garing, brab do balilaga do kayéw, brab do galang, brab do futow, brab do marmol, <sup>13</sup> brab do kanelia brab do ségiyo fégéfaninu, brab do dukah, brab do fégéfámut, brab do uwa, brab do arak, brab do nor, brab do arinah, brab do safi, brab do bili-bili, brab do kuda, brab do kalesa, brab do rifén, brab fiyon i de étew. <sup>14</sup> Atin ménbéréné i de démagang dob ingéde ni maro, “Endaén i kéluhanay de fiyo do éntingayén do kétaya mo. Atin ménkédanén i bantuga muwe brab kékawasa muwe. Atin éndaén géséfuleén mangéy dob beeme.” <sup>15</sup> Atin i de démagang do ménwaléy kawasa sabaf bé de kédagang ro, dob nan ingéd, tuliké roy de tidéw mérayue non mágilak ro mémamung bé kérasay ne. Kémérew ro rémuung. <sup>16</sup> Atin béréné ro maro, “Mékégédaw-gédaw i ménbantuge ni ingéd. Bé gétaho i de étew de kéménégal ro fiyo safut fute brab furo brab rambayung. Atin ménngono do bélodon brab balilaga do batéw brab do perlas. <sup>17</sup> Endob bé ségurase saén méntékow ménkédan i kékawasa nuwe.”

Atin i kéluhanay de kafitan bé de barko brab de étew de ménda brab kéluhanay de gémalbék dob de barko, ténulik roy de tidéw mérayue. <sup>18</sup> Atin ménkes ro bé lala ruwe témeóngténg bé bél i aféye témuvé bé ingéde ni maro, “Tidéw féganay, énda i ségiyo ménbantug ingéd loo bé ni!” <sup>19</sup> Atin rénigono ro réhuk i de uléw ro brab rémuung ro maro, “Mékégédaw-gédaw i ni ménbantug ingéd! Non sabaf bé kékawasa nuwe, waléy so kawasay de gefe barko. Endob bé ségurase saén méntékow ménbinasay kéluhanane.”

<sup>20</sup> I de begom do étew batí dob lawayo, oror gom sabaf bé kébinasay ni ingéd. I de begom do munur bé Jesuse, brab begom do apostol brab do sénarigoy Tuluse muret, oror gom. Non kénukum i Tulusey nan ingéd sabaf bé de tete rénigo no dob begome.

<sup>21</sup> Tidéw béno, i barakatané téaki fénurutén i dakéle batéw brab nibérén dob dogote. Atin ménbéréné mano, “Loo bé niy kéibére bé ménbantuge ingéd Babilonia inok mébinasa. Endaén gito no non toowén fo ménbinasa. <sup>22</sup> Atin éndaén gélingoo no dob ni ingéd i béréné i de baat do alpa, do suling, brab do témburi. Atin éndaén giton i de fanday gémalbék dob ni ingéd fiyon udenén klasi fanday, atin éndaén gélingoon i béréné i gilingane. <sup>23</sup> Endaén rémendaw i soloe dob ni ingéd. Atin éndaén i uyot dob ni ingéd. Bé do géta, toow fo ménbantug i de démagang do étew. Atin i de béliyan batí diyo, énggégéfágakara roy de étew dob séngae ingéd dob duniyae.”

<sup>24</sup> I funay ingéde Babilonia ménkukum, non fénléhuén i de étew sénarigoy Tuluse muret bé kékérél ne brab fénléhuén i de munur bé Jesuse. Atin i kéluhanay de étew fénléhuén dob duniiae ni ménléhu ro sabaf bé ni ingéd.

## 19

<sup>1</sup> Tidéw béno, énggelingoo kuy métanuge bérél i maake médoos étew ménlimud dob lawayo maro, "Dayéwé tom i Tuluse! Been i mémukase bé de étew, Beeney barakatane, Beeney ménbantuge. <sup>2</sup> Métintu brab toow i kékukum ne. Kénuumén i ménbantuge sundal non fénalsaén i kéluhanay de étew dob duniiae bé mémérésike adatén. Kénuum i Tuluse non fénléhuén i de sugu-sugué no." <sup>3</sup> Atin ménkes ro man maro, "Dayéwé tom i Tuluse! Mégébel i aféye témuwég bé ni ingéd taman sa taman." <sup>4</sup> Atin i de ruwo folo bra fot gétew lukés odoron brab de fot gétew do barakatan étew méntédunsum ro ménadaf bé Tuluse ménasar dob sara nuwe. Atin ménbérél ro maro, "Amen! Dayéwé tom i Tuluse."

<sup>5</sup> Tidéw béno, wén i ménbérél tidéw dob saray Tuluse mano, "I kéluhana kome do sugu-suguéy Tuluse brab begome do masanan de, fiyon gérotor taloo no do gérfantad, fatut dayéwé kom."

<sup>6</sup> Tidéw béno, énggelingoo kuy bérél i maake dakél ménlimud do étew brab maake érok dakél samfaw brab maake métanug léte maro, "Dayéwé tom i Tuluse non Been saén i barakatane Kadnan Tulus méguléw betom. <sup>7</sup> Fatut moror tom. Fatut dayéwé tom i Tuluse sabaf bé kégérotor ne. Non énggumahén i gaiy uyot i Natiwe Bili-bili béléewe ni. Atin ménatifayén i mawage bé Natiwe ni Bili-bili. <sup>8</sup> Kéménégéal sémélínang malinis fute safut." I atag i ni, been i niy de métintu rigonéy de munur bé Jesuse.

<sup>9</sup> Tidéw béno, i télakiwe ni ménbérél dob begéne mano, "Sulatém i ni: Toow fo moror i de étew ménsgékat dob uyot i Natiwe Bili-bili." Atin ménbérél man mano, "Been i niy toowe kékérél i Tuluse."

<sup>10</sup> Atin méntédunsumu dob adafa nuwe inok féngadafé kuy télakiwe ni. Endob ménbérél mano, "Kago féngadafén begén. Non dummo mo so begén sugu-suguéy Tuluse brab dumoy kéluhanay de munur bé kétoro Jesuse. Fatut Tulus saén i féngadafé muwe." I funa nuwe ménbérél bé ni non ségiléw i kétoro Jesuse bé de sénarigoy Tuluse muret.

<sup>11</sup> Tidéw béno, énggito guy lawaye ménungka. Atin énggito guy futee kuda. Atin i dawét i étew de kéménuda, "Sarigon" brab "Toow". Métintuy kékukum ne, atin métintu soy késétaboh ne. <sup>12</sup> I de moto no maak mérino aféy, atin médooy de lakay dob uléw ne. Atin wén i dawéte ménusat dob Beene, éndob énda i gétigan de saliyu saén bé Beene.

<sup>13</sup> Atin i kégal ne maak nérém dob darae. Atin i dawét i ni étew, "Kékérél i Tuluse."

<sup>14</sup> Atin i de médoos do sundalo tidéw dob lawayo ménfuray ro bé ni étew. Kéménuda ro dob de fute kuda, atin kéménégéal ro bé toowe fo malinis fute safut. <sup>15</sup> Atin i sunguwe ni étew, wén i muréme sundang mésut tidéw dob ba ne fégétaba no bé kéluhanay de ingéd dob duniiae ni. Atin féguléwo no bero atin énda i géatuh de. Atin fégito no beroy kékérit i barakatane Tulus non binasané no bero loo bé kékérés i ségétéwe étew bé de ubas. <sup>16</sup> Atin wén i ménuslate dob kégal i étewé ni brab dob foo ne mano, "Datu i de datu, Kadnay de méguléw."

<sup>17</sup> Tidéw béno, énggito guy télakiwe téménindég dob kérara i térsange. Atin ménkes métanug dob kéluhanay de kloh manok lémayang dob fuwehe mano, "Enggomén. Sétimu gom inok géama gom bé kanduli i Tuluse. <sup>18</sup> Enggomén, ama gom bé ungé i de datu, brab de odoroy de sundalo, brab de sundalo de so, brab de kuda, brab de kéménuda de so, brab kéluhanay de étew fiyon do rifén loo soy de békén de, brab de gérotor de so, loo soy de gérfantad de."

<sup>19</sup> Tidéw béno, énggito guy nagawe brab de datu dob duniiae ni brab de sundalo so. Ménslimud ro inok sétaboh ro sébanil bé étewé ni kéménuda fute brab de sundalo no tidéw dob lawayo. <sup>20</sup> Atin kénéfo roy nagawe beroy ubo-uboe sénarigoy Tuluse, sani rémigowe do mémégaif dob adafay nagawe ni. I de rénigo no do mémégaif, been i niy

funay de étew ménfégakaran méntandaan bé tanda i nagawe, sani de étew méngadaf bé kéninontow i nagawe ni. Atin i nagawe brab ubo-uboe sénarigoy Tuluse, ménibér ro méuyag séna dob ranawe aféy mérino bé asuprewe. <sup>21</sup> Atin i de sundalo ro, fénléhu ro bero bé sundange mésut tidéw dob ba i kéménudae fute. Tidéw béno, i de kloh manok, nama roy de ungé ro taman ménbésor ro.

## 20

*I séngibu gébélantuwa*

<sup>1</sup> Tidéw béno, énggito guy ségétéwe télaki ménlus tidéw dob lawayo. Atin génamakén i dakéle sangkali brab susie bé ménaléme liyung. <sup>2</sup> Atin kénéfoén i diwat-wate, sani ulée bé gétaho sani saitane féndawét Satanas. Atin nikétén inok férisuné no bé séngibuwe gébélantuwa. <sup>3</sup> Atin i télakiwe ni nibérén i Satanase dob liyunge atin kénandado no, atin ténlébén bé tanda. Mélaw éndaén géfagakara Satanasey de étew dob duniyae ni taman méifus i séngibuwe gébélantuwa. Tidéw béno, kailangan tangéyén man singkow.

<sup>4</sup> Tidéw béno, énggito guy saray de méguléw, brab de étew de so ménsar. Atin niray dob berowey kuwagibe kémukum. Atin énggito gu soy de rémogor i de étew fénléhuén sabaf bé kéuret ruwe bé toowe tidéw dob Jesuse brab kékérén i Tuluse. Enda fénengadaf roy nagawe taloo no kéninontow ne. Atin énda méntandaan i de rangih ro taloo no do kémér ro bé tanda i nagawe. Atin méntébule ro brab méguléw ro séréngan bé Kristowe taman méifus i séngibuwe gébélantuwa. <sup>5</sup> Been i niy sunguwe kétébule. I de dumo ro énda tébule ro taman énda gilid i séngibuwe gébélantuwa. <sup>6</sup> Toow fo moror i de étew tébule dob sunguwe kétébule, atin féfiyonéy Tuluse bero. Enda géamung ro bé géruwowe kéléhu. Atin beroy de waléy do fadi i Tuluse brab Kristowe. Atin méguléw ro bero ro Kristo bé ni séngibu gébélantuwa.

<sup>7</sup> Amuk gilid i ni séngibu gébélantuwa, tangéyén i Satanase tidéw dob kaane férisunon. <sup>8</sup> Atin mangéy dob kéluhanay de ingéd dob duniyae inok géfagakara no bero, sani de ingéd féndawét Gog brab Magog. Atin i Satanase, limudé no bero inok sétiboh ro sébanil bé Tuluse. Atin toow ro fo médoor loo bé kédooj de farék dob dénsaane. <sup>9</sup> Atin ménbéragar ro dob duniyae atin lénangkat roy ingéde gulaanéy Tuluse gonoy de étewén bat. Endob ménlawu i aféye tidéw dob lawayo funa ro ménbinasa kéluhanan. <sup>10</sup> Tidéw béno, i Satanase, sani magakarane bero, nibérén dob ranawe aféy brab asuprewe sani gonone nibéron bé nagawe brab ubo-uboe sénarigoy Tuluse bé gétahe. Atin dusanén ro fuweh na kélungonon taman sa taman.

<sup>11</sup> Tidéw béno, énggito guy dakéle brab futee saray méguléwe. Atin énggito gu soy ménsare de diyo. Atin i fantade brab lawaye ménalfa ro dob téngaanga nuwe atin éndaén giton ro. <sup>12</sup> Atin énggito guy kéluhanay de ménléhu, do gérotor brab do gérifantad. Téménindég ro dob adafay sarane ni. Ménungka i de libro atin ménungka soy librowe lénistanan bé de étew géhédot bé umule magufusa. Atin i de ménléhu ménkukum ro loo bé de rénigo ro, sani ménslate dob de libro. <sup>13</sup> Tidéw béno, i de ménléhu do étew tidéw dob dogote ménslate ro, atin ménslate soy de ménléhu tidéw dob fantade brab tidéw dob gonoy de ménléhu. Atin kéluhana ro ménkukum sabaf bé de rénigo ro bé kéuyag ruwe séna. <sup>14</sup> Tidéw béno, i kéléhue brab gonoy de ménléhu, nibérén bero dob ranawe aféy, sani géruwowe kéléhu. <sup>15</sup> Atin i kéluhanay de étew énda ménslate i de dawéti ro dob librowe listanan bé de étew géhédot bé umule magufusa nibérén so bero dob ranawe aféy.

## 21

*I de mantu*

<sup>1</sup> Tidéw béno, énggito guy mantuwe laway brab mantuwe fantad. Ménalfa i tafaye de loo soy dogote. <sup>2</sup> Atin énggito guy méméfuewe ingéd, sani mantuwe Jerusalem, ménlus tidéw dob lawayo tidéw dob Tuluse. Téménafay maak téméríma libun kéménégal fiyo inok balaké noy téméríma we lagéy. <sup>3</sup> Atin énggelingoo kuy métanuge bérén tidéw dob

saray méguléwe ni mano, “Béleewe ni bati i Tuluse sétifon bé de kéilawan. Bati dob berowe atin beroy de étewén. Beeney dumo ruwe atin méngintulus ro dob Beene. <sup>4</sup> Atin kédané noy de tete dob de fédew ro inok éndaén kémérew ro. Atin éndaén i méléhu taloo no rémuung taloo no démawét non ménkédanén i de éntingayén do tafayén.”

<sup>5</sup> Tidéw béno, ménbérélh i ménssare dob saray Tuluse mano, “Béleewe ni, féantuné kuy kéluhanane.” Atin ménbérélh dob begéne mano, “Sulatém i ni non toow i ni kékérélh brab gésarigon.” <sup>6</sup> Atin ménbérélh man mano, “Méntumanén. I Begéne Alfa brab Omega, sani féganayane brab tamanane. Iray gu dob de térumén do étew i wayége énda i bayadén tidéw dob séfute wayég miray bé umule magufusa. <sup>7</sup> I de étew ténabana roy Satanase, waléyu Tulus ro atin waléy ro do nga gu. <sup>8</sup> Endob i de étew do talaw brab do ménwaléy sébanil Begén brab de réménigo do mékérésik brab do ménméléhu brab do béliyan brab do ménengadaf do kéninontow brab do téménugi, géangéy ro dob ranawe aféy brab asuprewe, sani géruwowe kéléhu.”

<sup>9</sup> Atin i ségétewe bé de fitéw gétew do télaki ménutit do fitéw timan do biléw bé de géfuray do fégédusa, ménangéy dob begéne brab ménbérélh mano, “Enggon, fégito gu beem i témérimawe libun, sani mawage bé Natiwe Bili-bili.” <sup>10</sup> Tidéw béno, i Rémogor i Tuluse fénémanduo no begén atin nuwit i télakiwe ni begén mangéy dob uruk i gérotore tuduk. Atin fenténgtengén begén i ingéde Jerusalem, sani mékétéfuwe ingéd, bé lala ne mélus tidéw dob lawayo tidéw dob Tuluse. <sup>11</sup> Sémelinang i ni ingéd non diyo i barakatane Tulus. Sémelinang loo bé balilagae batéw féndawét haspe toow fo métiyéw maak féngalungon. <sup>12</sup> Atin wén i gérotore diding fénggélangkat bé ni ingéd. Atin folo bra ruwo timan i bengawa nuwe. Atin folo bra ruwo gétew i télakiwe mantay bé de bengawa no. Atin ménusat dob de fintuén i dawét i de folo bra ruwo tribou de Judio. <sup>13</sup> Atin télén timan i fintue dob séngae sébaan bé de fot timan diding. Télén i fingée de sébangan, atin télén soy fingée de déligdigan. Atin télén soy fingée de tégonon, brab télén soy fingée de élédon. <sup>14</sup> Atin i de diding i ni ingéd rénigo dob rotor i foloe bra ruwo batéw. Atin diyo ménusat i dawét i foloe bra ruwo do apostol i Natiwe Bili-bili.

<sup>15</sup> Atin i télakiwe, sani ménbérélh dob begéne, wén i bélwone fégétémbu no inok témbuné noy ni ingéd brab de bengawa no, brab de didingén fénggélangkat de. <sup>16</sup> Atin i ni ingéd ségiléw foy kédakél i kékuka ne bé kédakél i kétaaha nuwe. Non i télakiwe ni ténémbu noy ingéde ni bé bélwone fégétémbu no. Atin ruwo ngibu bra fot ratuh gékilometroy kétaah ne loo soy kékuka ne loo soy kégérotor ne. <sup>17</sup> Atin ténémbuy télakiwe ni soy didinge, atin ném folo gémitroy kégérotor ne dob kétémbuy kéléwane de, been i ni y nusar i télakiwe ni. <sup>18</sup> Bélwon i ni ingéd toow fo métiyéw maak féngalungon, atin dénididng haspe. <sup>19</sup> Atin wén i de toow fo balilaga do batéw fénfiyo bé de batéw féntindégon bé de diding ni. I sunguwe de fénfiyo bé haspewe, atin i géruwowe de bé safirowe, atin i gétiléwe de bé kalsedoniawe, atin i géfote de bé esmeraldawe. <sup>20</sup> I gélimowe de bé onise, i généme de bé kornalinawe, i géfitéwe de bé krisolitowe, i géwaléwe de bé berile, i gésiyowe de bé topasyowe, i géfoloe de bé krisaprasowe, i géfoloe de bra sébaan bé hasintowe, atin i géfoloe de bra ruwo bé amatistawe. <sup>21</sup> Folo bra ruwo timan do perlas i fénggérígowe bé de ni do folo bra ruwo timan fintu. Sénga sébaan fintu, sébaan so perlas i fénggérígowe de. Atin bélwon i aguwone dob ni ingéd métiyéw maak féngalungon.

<sup>22</sup> Enda gito guy lawi i Tuluse dob ni ingéd non dob séngae gonon, i kéluhanay de étew féngadafé roy barakatane Kadnan Tulus brab Natiwe Bili-bili. <sup>23</sup> Atin i ni ingéd, éndaén kailanga noy réndaw i térsange taloo no térsang kélégonon. Non rémendaw i barakatane Tuluse funa no géfekaya. Atin i Natiwe Bili-bili maak solo. <sup>24</sup> Atin i de étew dob duniyae ni, gérito ro sabaf bé ni réndaw. Atin i de datu dob duniyae ni, uwité roy kékawasa ruwe mahur dob ni ingéd. <sup>25</sup> Atin i de bengawan dob ni ingéd, méungka ro sénga tékélid. Enda méfintuén non énda i kélégonon diyo. <sup>26</sup> Atin i de fiyo do éntingayén brab kékawasay kéluhanay de ingéd, féahurén dob ni ingéd. <sup>27</sup> Endob énda i

tete géahur de, taloo no do tugién do étew taloo no do étew do mémémalay de rigoné ro. I de géahur saén dob ni ingéd, beroy de étew ménlistay de dawét ro dob libroy Natiwe Bili-bili listanan bé de étew gégédot bé umule magufusa.

## 22

<sup>1</sup> Atin i télakiwe ni, fénggito no begén i dakéle wayég miray bé umule magufusa. Sémelinang maak kristal. Tidew i ni wayég dob saray Tuluse brab Natiwe Bili-bili. <sup>2</sup> Atin mangéy dob kérara i aguwone dob ni ingéd. Atin wén i dakéle kayéw miray umul dob doror i wayége ni sébala-bala. Mégongok folo bra ruwo gule sénga ségbélantuwa. Ségule mégongok sénga ségétérésang kélungonon. Atin i de dau ro fégéuwa bé de étew dob duniye. <sup>3</sup> Atin énda i éntingayén mémula bé Tuluse dob ni ingéd.

Atin i de saray Tuluse brab Natiwe Bili-bili diyo dob ni ingéd. <sup>4</sup> Atin gito roy falas ne atin dob de rangih ro ménsumat i dawét ne. <sup>5</sup> Atin éndaén i kélungonon, mélaw éndaén kailanga roy soloe taloo no téresang non i Kadnane Tulus, Beeney solo ruwe. Atin méguléw ro taman sa taman.

<sup>6</sup> Tidew béno, ménbérén i télakiwe dob begéne mano, “Toow i ni kékérén énggelingoo mo brab gésarigon. Atin i Kadnane Tulus, sani miraye bé Rémogor ne dob de étew sénarigo no muret bé kékérén ne, sénuguén i télakiwe ni inok fégito no dob de sugu-sugué noy atiy mérigowé énda mérugayén tidew béní.”

<sup>7</sup> Atin bang Jesuse, “Séfuleu énda mérugayén tidew béní! Moror i de étew modor bé de kékérén fénggétiga ku begom dob ni libro.”

<sup>8</sup> Atin i begéne Juan. Enggelingoo ku brab énggito guy de ni. Atin amun énggilid énggelingoo ku brab énggito gu, ménédunsumu dob adafay télakiwe ni ménféténgténg begén bé de ni, inok féngadafé ku. <sup>9</sup> Endob ménbérén dob begéne mano, “Kago féngadafén begén. Non i begéne dumo mo so sugu-suguéy Tuluse, beroy kéluhanay de dumo mo sénarigo Tuluse muret, brab de modor bé de kékérén dob ni libro. Féngadafém saén i Tuluse.” <sup>10</sup> Atin ménbérén man dob begéne mano, “Kago bunéyén i de ni kékérén fénggétiga ku beem dob ni libro. Non gédétén métuman i kéluhanay de ni. <sup>11</sup> I de tete étew, kailangan fétausé roy de tete rigoné ro. I de mémérésik do étew, kailangan fétausé roy de mémérésik do rigoné ro. Atin i de fiyo do étew, kailangan fétausé roy de fiyo rigoné ro. Atin i de étew rémigo bé kétayay Tuluse, kailangan fétausé ro.”

<sup>12</sup> Atin bang Jesuse, “Séfuleu énda mérugayén tidew béní! Atin uwité kuy de baras inok iray gu dob de étew médait gégédot de sabaf bé de rénigo ro. <sup>13</sup> I Begéne, Alfa brab Omega, sani féganayane brab tamanane.”

<sup>14</sup> Moror i de étew ténumak i de kékérén ro inok malinis, sani de étew ménkédanén i de sala ro, non wén i kuwagib ro mama bé onok i kayéwe miray bé umule magufusa, atin géahur ron dob mantuwe ingéd. <sup>15</sup> Endob dob liyuy ingéde ni, diyo i de rémigo do mémérésik brab de béliyan brab de rémigo bé de tete kétayay de lowoh ro, brab de méméléhu, brab de ménadaf bé de kéninontow, brab de tugién, brab de rémigo bé békéne toow.

<sup>16</sup> Atin ménbérén i Jesuse mano, “Bégéney Jesuse, atin fénuit guy télaki guwe mangéy dob begome inok fénggétiga noy de ni dob de munur. Bégéney séfu datu Dabide. Bégéney gégékaya solo mubod.”

<sup>17</sup> I Rémogor i Tuluse brab i mawage bé Natiwe Bili-bili, ménbérén ro maro, “Enggon!”

I kéluhanay de mémérésik bé ni, fatut émbérén gom “Enggon!”

I kéluhanay de étew térumén, brab méuyot ro miném, fatut doté roy wayége énda i bayadén miray bé umule magufusa.

<sup>18</sup> I begéne, Juan, fénggétiga ku begom, Amuk wén i mumanan bé de kékérén dob ni libro, umanay Tulusey kékérén ne de bé de kékérén ménsumat dob ni libro. <sup>19</sup> Atin amuk wén i kékérén bé dumoy de kékérén dob ni libro fénggétiga ku begom, kékérén Tulusey de kaan baad bé de onok

tidéw dob kayéwe miray umul, brab kaane kuwagib bati dob mémékuwe ingéd sani de ménsumat dob ni libro.

<sup>20</sup> Atin i Jesuse, sani mérnbéréhe toow i de ni, ménbéréh mano, “Hoo ba, séfuleu énda mérugayén tidéw béni.”

Amen. Enggon, Kadnan Jesus!

<sup>21</sup> Mégédaw fo toow i Kadnane Jesus begom. Amen.